

ივანე ჯორჯიანი

საქართველო  
და

თბილისი

მ. ჯორჯიანი

„ლიტერატურა და ხელოვნება“

თბილისი

ივენი გოგუხთელი

სიქული  
თქვეული ტენი

ტოპი I

ქუილიტი  
ლიტონიანი  
და ჯელოვანი

„ლიტონიანი და ხელოვნება“

თბილისი

ივ. გოგარეთელის ორბოგეული შუადგინა. ნარკვევი  
„ივ. გოგარეთელის ცხოვრება და მოღვაწეობა“ დაწერა  
და გიგლიოგრაფია დაურთო ვ. წ ი წ ე ლ ი ა ჰ

## ივანე გომართელი

ოცნი თუ ხუთი ათეული წლის წინ, საქართველოს რომელ სოფელშიც უნდა მისულყავით, თუ მძიმე ავადმყოფს შეხედდებოდით — მისი სანატრელი მარტო ერთი რამ იყო — როგორმე თბილისამდე ჩაეღწია და გომართელთან მოხვედრილიყო. მოდიოდნენ დედაქალაქისაკენ, ვისაც როგორ შეეძლო — მატარებლებითა თუ ჩარდახიანი ურმებით, ცხენით თუ ქვეითად, მოდიოდნენ იმედითა და სასოებით და შინ ბრუნდებოდნენ, უმრავლეს შემთხვევაში განკურნებულნი, ფეხზე წამომდგარნი, გახარებულნი, ბრუნდებოდნენ, რომ უფრო შორს გაეტანათ გომართელის სახელი. ეს მარტო მის თბილისში ყოფნის წლებზე როდი ითქმის. ასე იყო ადრეც ივ. გომართელის პირველი ვრცელი ბიოგრაფიის ავტორს, მკვლევარს ვლ. წორწელის თავის ნარკვევში ასეთი ამბავი მოჰყავს: 1902 წელს, დიდ ჭიხაიში ლეჩხუმიდან ურმით, რომ იტყვიან, გაღადებული ავადმყოფი ჩამოიყვანეს და რაჟილა მას თავის წამოწვევაც არ შეეძლო, ხელით ასწიეს და ისე შეიყვანეს გომართელის კაბინეტში. გავიდა ხანი და ლეჩხუმელი თავისი ფეხით დაბრუნდა შინ. აუარებელი ასეთი მაგალითი შეიძლება დაეხსახელოთ. ზოგს იქნებ ეს გადაეარბებად მოეჩვენოს, მაგრამ ეინც მოაწრებია, დამემოწმება, რომ ამ კაცის ირგვლივ ქალაქადაც და სოფლადაც პირდაპირ ლეგენდები იქმნებოდა. ამიტომ ასე დაუღუვევლად მოდიოდა მისკენ ხალხი. 1908 წელს ერთ პირად წერილში იგი აღნიშნავს: „თბილისში ახლა ექიმები ბალიან ცოტანი არიან და მთელი ამოდენა ხალხი მე მომაწყვდა... დილის შვიდი საათიდან საღამოს რვა საათამდე მოცლა არა მაქვს“. ხალხის ასეთი მოზღვავება მარტო ექიმების სიმცირით არ აიხსნებოდა, აქ მეორე მიზეზიც იყო — ხალხში გასული ხმა მის სასწაულებრივ მარჯვენაზე და შეუცდომელ თვალზე. საქმარისია ითქვას, რომ მისი სახელი ზოგად სახელადაც კი იქცა: გომართელი ნიშნავდა მხსნელს, კირისა და სატკივრის უებარ განმკურნებელს, ხშირად გომართელისა მარტო სახელი არჩენდა ადამიანს.

დღეს, როცა შთაგონებით მკურნალობა ესოდენ განვითარდა და წინ წავიდა, ეს აღარავის გაუკვირდება. გასულ წელს ჩვენს პრესაში ერთი საინტერესო წერილი დაიბეჭდა. მისი ავტორი, ექიმი ბაბო სვანი ასეთ ამბავს მოგვითხრობდა: ერთმა უტაქტოდ და უხეშად ნათქვამმა სიტყვამ ახალგაზრდა ქალი დააბრმავა, მთელი თვე ეწვალნენ და ევრაფერი უშველეს. ბოლოს ავადმყოფი გამოჩინილი ქართველ პროფესორთან მიიყვანეს და მან სწორედ მაშინ მიმართა ფსიქოთერაპიის ყველაზე მძლავრ იარაღს — სიტყვას, და დაბრმავებულს ამ ჩადონსური მალამოთი

აუხილა თვალები. ასეთ მაგალითებს, ვინ მოსთვლის, რამდენს წააწყდებიო? ყოველ ტატიასა თუ წიგნში, რომლებიც ფსიქოთერაპიის საკითხებს ეხება. გომართელი თერაპევტიც იყო და ქირბუგიც და, ამას გარდა, აფთიაქის წამლებთან და მალამოებთან ერთად. როგორც ამბობენ, ამ უებარ წამალსაც — სიტყვასაც ხშირად მიმართავენ: გარდა ამისა, აქ განუზომლად დიდ როლს თამაშობდა ავადმყოფის წინასწარი რწმენა. რომ ის მხსნელთან მიდიოდა, დიდ როლს თამაშობდა უსაზღვრო ნდობა მკურნალისადმი, მისი ყოველი ნუგეშისმოძვეში, გამამხნეებელი, შთამავრუნებელი სიტყვისადმი.

გომართელი, როგორც ექიმი, ჩვენი თემა არ არის. ამაზე საეციალისტებს ბევრი რამ უთქვამთ და ალბათ კიდევ იტყვიან. აქ კი ჩვენს მთავარ საკითხზე გადავიდეთ. და თავიდანვე გვინდა აღვნიშნოთ, რომ ეს კარგი ექიმი, იმავე დროს, იყო ქართული სიტყვის ოსტატიც, იყო შესანიშნავი ლიტერატორი, გამოჩენილი პუბლიცისტი, რომელმაც ქართული აზროვნებისა და მწერლობის ისტორიაში წარუშლელი კვალი დასტოვა.

ივანე გომართელი ისეთ ადამიანთა რიცხვს ეკუთვნოდა, რომელთაც ქვეყანა შეჰხარის. ვისი სახელითაც ამაყობენ, ვისაც მუდამ სიხარულით ხვდებიან. აი, თუნდაც მართო ამ ამბავს დაეკირდიო. გამოჩენილი ქართველი მწერლის გიორგი წერეთლის ქალიშვილმა ელენემ, პარიზში რომ იყო გათხოვილი, 1907 წელს გაიგო — გომართელი ქუთაისიდან თბილისში გადმოსვლავ; ელენემ „ჭეჯილის“ რედაქტორს ანასტასია თემანიშვილს თურმე მაშინვე მოსწერა:

„ვანო გომართელის თბილისში გადმოსვლამ და თქვენს ახლოს დასახლებამ ძალიან გამახარა შენთვის და ლევანისთვისაც. ლევანს კარგი მეგობარი დაუახლოვდა და შენ — „ჭეჯილის“ საუკეთესო თანამშრომელი... ძიძაც გახარებული იქნება, ვინ იცის, რამდენჯერმე კიდევ იყო მასთან თავის გასასინჯავად“.

გომართელის, როგორც მწერლისა და ადამიანის დასახასიათებლად ეს წერილი ბევრს ამბობს: ჩამოვიდა კაცი ქალაქში და ეს ამბავი ყველასათვის ზეიმად იქცა — ქართული ჟურნალის რედაქტორს უხარიან, რომ კარგი ნაწარმოებები აღარ მოაყვდება. მოსიყვარულე მეგობრებს -- თავიანთი სულის სწორი გვერდით ეყოლებნათ, და ყველაზე მეტად კი მოხელი ძიძა ზეიმობს. მას თავისი სანატრული გომართელი ახლა გვერდით ეგულება და ამიტომ სიკვდილისა აღარ შეეშინდება.

უნდა აღვნიშნოს, რომ ივანე გომართელმა სამწერლო ასპარეზზე პირველი გამოსვლისთანავე მიიქცია საყოველთაო ყურადღება. მას, ჭერ კიდევ ახალგაზრდა მწერალს. იხსენებს პროფ. ალ. ხახანაშვილი და საპატიო ადგილს უთმობს თავის ფუნდამენტურ ნაშრომში — „ქართული ლიტერატურის ისტორიის“ მეოთხე ტომში, სადაც ვკითხულობთ, რომ ივანე გომართელი „...უნაყოფიერესი ახალგაზრდა პუბლიცისტი... კრიტიკის სფეროში უტილიტარულ თვალსაზრისზე დგას და უარყოფს -წმინდა ხელოვნების“ მნიშვნელობას“.

აქ, ძირითად კონტრუქტში უკვე ნაჩვენებია მთავარი იდეური გეზი, რომელსაც პირველივე დღეებიდან მტკიცედ დაადგა ივანე გომართელი. იგი, როგორც მოაზროვნე, როგორც მეტროპოლი პუბლიცისტი, განუზრებლად მისდევს იმ დიდ გზას, რომელიც თერგდალეულებმა გაუცხადეს ჩვენს მწერლობას, როცა მის მთავარ ამოცანად ხალხის სამსახური გამოაცხადეს. კლასიკურმა რეალიზმმა თავიდანვე მძაფრი და შეუპოვებელი ბრძოლა დაიწყო ე. წ. თვითმიზნურ, უიდეო ხელოვნებასთან. როცა ალ. ხახანაშვილმა ხაზგასმით აღნიშნა ივ. გომართელის მთავარი ღირსება — მისი შეუპოვებელი ბრძოლა თვითმიზნური, უიდეო ხელოვნების წინააღმდეგ, ამით მან იმასაც გაუცხა ხაზი, რომ ივანე გომართელი აქ ერთგული მოწაფე და მიმდევარი იყო თერგდალეულებისა და, პირველ რიგში, ილია ჭავჭავაძისა, რომელ-

მაც ქერ კიდევ 1860 წელს, ოცდასამი წლის ვაბუკმა განაცხადა, რომ პოეტმა არ შეიძლება იმღეროს „ერთ ფრინველმა გარეგანმა“, რომ ის ქვეყნად მოსულია „აბა მარტო ტუბილ ხმათათვის“, რომ ის მოვალეა „წარუძღვეს წინა ერსა“, „ერისა მომედ იყოს უმუნება და სიხარულში“, ერის წყლული თავის წყლულად მიიჩნის, მისი ტანჯით სული ეწვოდეს, მისი უბედობით მტკიცე გული ედაგებოდეს.

და რა იყო მთელი ცხოვრება ილია ჭავჭავაძისა, თუ არა გაუთავებელი ბრძოლა, უომარობისა და შეურიგებელი ჭიდილი ავბნობით სინამდვილესთან — მართლაც, მოწოდების ზარბივით გუგუნებდა საქართველოში მისი ხმა და აფხიზლებდა გონებას, სწავდა ადამიანის გულს საქვეყნო დარღობა და ტყვილით. მეტსახელები საუბრის 60-იანი წლების მოღვაწეებს, სახელოვან თერგდალეულებს პოეტად არც მიაჩნდათ ის, ვინც ამავე დროს მებრძოლი არ იყო. ე. წ. „წმინდა პოეზია“, ისეთი პოეზია, რომელიც გამოთიშული იქნებოდა ცხოვრებისაგან, რომელიც საზოგადოებრივი აზრის საყეთილო მოძრაობას გზას არ აძლევდა, — სამოციანი წლების დიდი მოღვაწეების სასტიკი გაიციხვის საგანი იყო. მომავლდინებული განაჩენი გამოუტანა ილია ჭავჭავაძემ უიღვო პოეტებს, როცა ეს სტრიქონები დასწერა:

„მეცნიერებასა და ხელოვნებას ჩვენ ვუყურებთ, როგორც ცხოვრების გასამჯობინებელ ღონისძიებათა. და... ზოგიერთმა უნაყოფო პოეტმა ხელოვნების სახელითა უუყარიდოს პირი თავისი ხალხის ცხოვრებასა, მეშვიდე ცას შეაჩეროს თავისი გაბეცებული თვლები და ბუღბუღსავით უაზრო სტევნა დაიწყოს და აღარ გაათავოს, ჩვენ იმათთან საერთო გზა არა გვაქვს... ჩვენ მეცნიერებას და ხელოვნებას მოვხიზვით არსებითსა პურსა ცხოვრებაში გამომცხვარსა და მშვირთათვის მოსახმარესა და გამოსადგესა. მეცნიერებამ უნდა გვიშველოს თავისი გამოცნობილი კუშმარტებით ცხოვრების ახსნა და გაგება; მან უნდა მოგვეცეს პირდაპირი პასუხი ყოველ საკირო კითხვაზედა... ხელოვნებასაც იმას მოვხიზვით, რომ სარკესავით ცხოვრება გადმოიცეს, რათა ჩვენი თავი მის მომხიზვავი კალმით ცხოვლად იყოს წამომდგარი ჩვენ წინა, რათა სიცუდეც და სიკეთეც ჩვენი დავინახოთ... დროა ხელოვნებამ თავი დაანებოს უგემურ ღმუქასა და თვალების სრესას, ეგება ცრემლი მომივიდესო. დროა ჩავიდეს ცხოვრების მდინარის ძირშია, იქ მონახოს შიგ მდებარე აზრი თავისი ცხოველი სურათებისათვის“.

ასე მკაცრად ჭკობის ილია ჭავჭავაძე უიღვო, აპოლიტიკურ პოეზიას, ე. წ. „წმინდა“ ხელოვნებას და სამაგიეროდ, დიდების პიმნს უძღვნის იმ პოეტებს, რომლებიც პირველნი გადაეშვებიან ხოლმე ცხოვრების მდელარეში, აღვიძებენ ადამიანის აზრს, მხარდამხარ მისდევენ ცხოვრებას და მომავლსაც განსჯერებენ, შესწვეა ძალა, რომ ამ მომავალს აწიზომივე დაედონ მავარი ფუძე.

აი, ყოველივე ამას გელისმობდა ალ. ხახანაშვილი, როცა ივანე გომართლის პუბლიცისტის საბრძოლო პათოსსა და უტილიტარულ მიმართულებაზე ლაპარაკობდა. ივანე გომართლის მოელ ლიტერატურულ მემკვიდრეობას ნათელ ზოლად ვასდევს ის კეთილშობილური ტრადიცია, ის მაღალი მიზანი, ის წმინდა იდეალები. რომლებიც ილიამ და აჯაკიმ დაანათლეს ჩვენს მწერლობას.

ივანე გომართლი სამწერლო მოღვაწეობას იწყებს XIX და XX საუკუნეების მიჯნაზე, ე. ი. სწორედ იმ ხანებში. როცა ჩვენს საზოგადოებრივ აზროვნებაში მარქსის დიადი მოძღვრება ფესვს მტკიცედ იკიდებს. ესაა დრო, როცა მოაზროვნეთა ახალ თაობას, გამსწავლულს მარქსიზმის ყველაზე მოწინავე იდეებით, ახალ, უფრო მაღალ საფეხურზე აყავს სამოციანელთა უმეირფასესი და კეთილშობილური ტრადიციები — მაღალი პუმანიზმი, უღრმესი პატრიოტიზმი, ბრძოლა ხალხის სოციალური და ეროვნული განათვისუფლებისათვის, ბრძოლა დახვესებული მემამუ-

ღერ-კაპიტალისტური სამყაროს დაანგრევად და ახლის, ადამიანისადმი სიყვარულზე დაფუძნებული წყობილების ასაგებად. ეს იყო მძაფრი იდეური გარდატეხის, აზრთა შეხლა-შემოხლის ეპოქა და ივანე გომართელი, როგორც ახალგაზრდა მარქსისტი-ლიტერატორი, სწორედ ამ ბრძოლის შუაგულში ტრიალებდა, როგორც ახლისათვის მებრძოლი, ყოველივე დახანებულისა და დრომოკმუნის შურიიგებელი მოძულე. ეს ნათლად ატყევა მის ყოველ სტატიას, ყოველ ნაშრომს.

სამშობლოს უსაზღვრო სიყვარულითა და მალად, კეთილშობილური პემანისტური იდეალებითაა გამსჭვალული ივანე გომართელის წერილები ნ. ბარათაშვილისა და ვახტანგ ორბელიანის, ილიასა და აკაკის, გიორგი წერეთლისა და დავით კლდიაშვილის. ვაჟა-ფშაველასა და ალექსანდრე ყაზბეგის, ეგნატე ნინოშვილისა და ირ. ევდოშვილის შემოქმედებაზე. აქ ის ყველგან გამოდის, როგორც გულშეურავლე პატრიოტი, როგორც ერთგული დამცველი ქართველი ხალხის ყველაზე უძვირფასესი საუნჯისა — მისი დიდებული სულიერი კულტურისა. მისი ყოველი წერილის მიზანი ის არის, რომ ეს მდიდარი საუნჯე ხალხში ფართოდ გაიტანოს, გაავრცელოს. ბარათაშვილის სულის ტკივილები თუ აკაკის წმინდა იდეალები ყოველი ქართველი მკითხველის გულში ღრმად ჩანერგოს და ყოველივე ამას რევოლუციური მიზანსწრაფვა მისცეს — ხალხის გული თავისუფლებისათვის ბრძოლის წყურვილით აღანთოს. ივანე გომართელმა ძალიან კარგად იცის, რომ ლიტერატურა — მალალი ტრიბუნაა, ფართო ასპარეზია ადამიანის განთავისუფლებისათვის დაწყებულ ბრძოლაში, და ამიტომ პუბლიცისტი თავის ყოველ წერილში იბრძვის. მუდამ იერიში მიჰქვს ძველ სამყაროზე, ამხილებს მის უსამართლოებს, მის განხრწნილებას, მის სიივეს და ზორობებებს და თანაც მკითხველს ნათლად უჩვენებს, რომ ამ დიდ ბრძოლაში ხალხს წინ მიუძღვინან მისივე საუკეთესო შვილები, მისი სასახელი პოეტები — მათი იდეალი ხომ ნათელი მომავალია, თავისუფლებაა. ამ პათოსით არის გამსჭვალული ყოველი წერილი ივანე გომართელისა, მწერლისა და პუბლიცისტისა, რომელიც თავის თავში აერთიანებდა გულდადინებულ მკვლევარსა და შურიიგებელ მებრძოლს, ლირიკული სულის ადამიანსა და ფიზიკურ ანალიტიკოსს.

ასეთია საერთო ტენდენცია. ხასიათი და მიზანსწრაფვა, დედააზრი ივანე გომართელის იმ წერილებშია, რომლებშიც ქართველი კლასიკური კულტურის ოსტატთა შემკვიდრებობა განხილული. ამასთან ერთად, როგორც მებრძოლ პუბლიცისტს შეჰფერის, ივანე გომართელი გულდასმით ადევნებს თვალს ყოველი ახალი მწერლის გამოხვლას დიდ საქვეყნო ასპარეზზე, პირველი ნაწარმოების გამოქვეყნებისთანავე ეხმაურება, და თუ ახალგაზრდა მწერალი ამის ღირსია, ივანე გომართელი მისი გულშეურავლე დამცველი და მეგობარია, მისი მეგობარია, მისი დამბრუნებელი. ის პირველი ეხმაურება ირ. ევდოშვილის, გიორგი ქუჩიშვილის, ნოე ხიციავაძის, ვალაკტიონ ტაბიძის, იოსებ გრიშაშვილის და სხვათა გამოხვლას სამწერლო ასპარეზზე, გზას უღოცავს, რათა შეუდრკვლად ემსახურონ სამშობლოს, ხალხს. რესეთის პირველი რევოლუციის წლებში, როცა ქართული მწერლობა მხარში ამოუდგა აჯანყებულ ხალხს, ივანე გომართელის წერილები უდერენ, როგორც მგზნებარე მოწოდებანი. მიმართულების მიფის საშუალებელი ტიარანის დასამშობად: ბნელი რეაქციის წლებში ის თავგამოდებით ებრძვის დეკადენტურ ლიტერატურას, შთაუნერავს მკითხველს ნათელი მომავლის რწმენას და იმედს, რომ რეაქციის თარეში ხანმოკლეა და მველი სამყარო განწირულია ისტორიის მიერ, მას აუცილებელი დაღუპვა მიეღის. ლიტერატურა. როგორც უკვე ვთქვით, მას საბრძოლო ტრიბუნად უქცევა და მისი უბრალო, მართალი სიტყვა მუდამ აუცილებლად მიდის ხალხის გულამდე.

ამ წერილებს გარდა წინამდებარე ორტომეულში შეტანილია ავანე გომართე-ლის ნაშრომები რუსულ და უცხოურ ლიტერატურაზე. აქაც ყველგან ჩანს მისი უჩვეულო ერუდიცია, პუბლიცისტური სიმძაფრე, შეერთებული ღრმა მეცნიერულ ანალიზთან; ის აქაც უმრავლეს შემთხვევებში მარჯვედ იყენებს მარქსისტული ეს-თეტიკის პრინციპებს და ამიტომ ამ ნაშრომებსაც დღესაც არ დაუქარავთ თავი-ანთი მნიშვნელობა. ყველაფერს რომ თავი დავანებოთ, ერთ კაცს მარტო ის ეყო-ფოდი შთამომავალთა შორის ხსოვნისა და პატივისცემისათვის, რომ ყოფილყო ავტორი პირველი ქართული მონოგრაფიისა ფრიდრიხ შილერზე. ეს წიგნი დაი-ბეჭდა 1903 წელს და მომდევნო წელს ხელახლა გამოიცა. აქაც მთელი სისაყსით ჩანს ივანე გომართელი. რათ აირჩია მან თავისი წიგნის თემად შილერი? წაიკით-ხავთ წიგნს და ეს სულ ადვილად მისახვედრი ხდება. ავტორი აქაც მებრძოლია, აქაც იარაღსხმულია ძველი სამყაროს წინააღმდეგ, და შილერიც მას ხიბლავს, როგორც პროტესტანტი, როგორც მეამბოხე. როგორც დიდი ტრიბუნი, მაუწყებე-ლი კაცობრიობის მომავალი განთავისუფლებისა ტირანთა ბოკილებიდან.

ეს მებრძოლი ტენდენცია თან გასდევს წიგნს და ეს ხელს კი არ უშლის, პი-რიქით, ხელს უწყობს მკითხველს უფრო სრულად წარმოიდგინოს თავისუფლების ამ დიდი პოეტის შემოქმედება.

აქვე უნდა აღინიშნოს, რომ ივანე გომართელია ავტორი პირველი სტატიისა გორკზე საქართველოში და პირველი მონოგრაფიისა გორკის შესახებ ქართულ ენაზე.

მოკლე შესავალ წერილში ძნელია სრულად დაახსიათო ივანე გომართელის მთელი ლიტერატურული მემკვიდრეობა. ერთი რამ კი აუცილებლად უნდა აღი-ნიშნოს — ივანე გომართელი მეტად ფართო პორიზონტის ადამიანი იყო, მას მარ-ტო პუბლიცისტიკისა და ლიტერატურული კრიტიკის სფერო არ აკმაყოფილებდა, ზშირად ეხებოდა ფილოსოფიის პრობლემებს და აქაც ერთგული დამცველი იყო მარქსისტული მსოფლმხედველობისა.

უარესად ხაყოფიერი იყო ივანე გომართელის მოღვაწეობა ჩვენს დროში, საბჭოთა ხელისუფლების გამარჯვების შემდეგ. 1927 წელს გამოქვეყნებულ წე-რილში იგი აღნიშნავდა, რომ საბჭოთა ხელისუფლება არის „ერთადერთი პოლი-ტიკური წყობილება, რომელიც უზრუნველყოფს ჩვენს მყუდროებას, ჩვენს მშვი-დობას. ვანეითარებას, დაწინაურებასა და მომავალს“.

და შემდეგ იქვე განაგრძობდა:

„ბრმა უნდა იყოს ადამიანი, რომ ვერ დაინახოს, რა დიდი საქმე კეთდება ჩვენ-ში: ელექტრონის სადგურები, აბრეშუმის, ბამბის, მადის, გრეხილ-ავეჯეულობის ფაბრიკები, სამზადისი ქალაღის ქარხნის ასაგებად, კარხლის მოსაყვანად, კაო-ბების ამოშრობა ფოსთა და ქობულეთში სარწყავი არხების გაყვანა და სხვა.“

ყოველივე ეს დიდი ეროვნული საქმეა თუ არა, დანარჩენს რომ თავი დავა-ნებოთ!“

როგორც ვხედავთ, ივანე გომართელი, სიცოცხლის უკანასკნელ დღეებამდე (იგი გარდაიცვალა 1938 წელს) თავის ხალხთან იყო და მის დიდ მომავალს შესტ-რფოდა და შექხაროდა.

წინამდებარე ორტომეულში წარმოდგენილია ივანე გომართელის რჩეული ლიტერატურულ-კრიტიკული სტატიები; აქ მნიშვნელოვანი ადგილი ეთმობა ლიტე-რატურული წლის მიმოხილვებს, რომელთა ტრადიცია ჩვენში ივანე გომართელმა დაამკვიდრა. აქ ნათლად ვხედავთ, თუ როგორ აქტიურად უნდა ჩაერიოს კრიტი-კოსი ლიტერატურულ პროცესში და მას სწორი გეზი უნდა მისცეს.

შესაძლებელია, მკითხველს ზოგი რამ მოძველებულად მოეჩვენოს ივანე გო-



მართლის ქვემოთ გამოქვეყნებულ წერილებში, მაგრამ უნდა გვახსოვდეს, რომ ეს ჩვენი საზოგადოებრივი აზრის განვითარების აწმყო კი არ არის, ისტორიაა და ამ ლიტერატურულ დოკუმენტებს მტკიცედ უჭირავთ თავიანთი ადგილი ქართული მწერლობის განვითარების გარკვეულ ეტაპებზე.

საერთოდ კი, ეს ორტომეული, რომელიც მოიცავს მხოლოდ ერთ ნაწილს ივანე გომარაიას მდიდარი ლიტერატურული და პუბლიცისტური მემკვიდრეობისა, თვალწინ გადაგვიშლის ამ შესანიშნავი ადამიანის მდიდარ და კეთილშობილურ სულიერ სამყაროს, მის იდეალებს, მის ტკივილებსა და მის იმედებს ხალხის ნათელ მომავალზე. დიდია და ფასდაუღებელი ივანე გომარაის ღვაწლი ქართული ხალხის წინაშე — იგი ეკუთვნის ჩვენი ქვეყნის საუკეთესო შვილების რიცხვს, რომელთაც მთელი სიცოცხლე ხალხზე ზრუნვაში გაატარეს და უკანასკნელ ამოსუნთქვამდე ერთგულად ემსახურებოდნენ სამშობლოს.

გიორგი ნატროშვილი

## თხზულებანი მამია გურიელისა

დიდი დრო და ჟამი არ გასულა მას აქეთ, როცა ყოველგვარი ლიტერატურული ნაწარმოების დასაფასებლად ვიწრო და თავისებური შეხედულება არსებობდა. ყოველნიერ ლიტერატურულ შრომას ერთგვარი საზომით ზომავდნენ, ერთგვარ კანონებს უწერდნენ; თუ თხზულებაში ეს კანონები დაკული იყო, მაშინ ის საუკეთესო ნაწარმოებად ჩაითვლებოდა. ყველას, ვინც ბუალო იცოდა და რითმების მოგონებას მოახერხებდა, შეეძლო პატენტიანი არისტარხებისა და მეცენატებისაგან თავზე ხელის გადასმა დაემსახურებინა და საქმე გაჩარხული იყო: პოეტის სახელსა და დიდებას მოიხვეჭდა. მწერლის ფსიქოლოგიას, ზნეობრივ და გონებრივ ფიზიონომიას, საზოგადოებას, რომელშიაც ის ტრიალებდა და რომლის გავლენის ქვეშაც იმყოფებოდა, — ამგვარი არისტარხები მხედველობაში არ იღებდნენ, ყურადღებას არ აქცევდნენ. ლიტერატურა ცხოვრებისათვის არ არსებობდა. მეცხრამეტე საუკუნეში მოწინავე ხალხთა ცხოვრება შეიცვალა, სოციალურმა და პოლიტიკურმა სახემ ფერი იცვალა და ეს ცვლილება იმდენად მძლავრი იყო, რომ ყოველისფერი თავისკენ გაიტაცა, ყოველისფერს დალი დააჩნია. ლიტერატურაც ცხოვრებას დაუკავშირდა. მისი გამომხატველი, გამომრკვევი და, ხშირად, გზის მაჩვენებელიც გახდა. შეხედულებამ ლიტერატურაზე, მის დანიშნულებაზე, მისი ღირსების ახსნამ და დაფასებამ სრულიად სხვა მიმართულება მიიღო. დღეს უმრავლესობისათვის ცხადია, რომ მემკვიდრეობას, აღზრდას, საზოგადოებას და სხვა. ყოველ ადამიანზე დიდი გავლენა აქვს. მართლაცდა. ყოველი ჩვენგანი ციდან ხომ არ ცვივა ან დედის მუცლიდან გონებადაპწიფებული და საბოლოოდ ხასიათგანმტკიცებული ხომ არ იბადება! მემკვიდრეობით ჩვენ თან დაგვყვება ერთგვარი ფიზიონომია: აღზრდა და იმწრის გავლენა, რომელშიაც ვტრიალებთ, ამ თანდაყოლილ თავისებებს და მიდრეკილებას თავისებურ ელფერს აქლევენ და ავითარე-

ბენ კარგს, ან ცუდ მხარეებს, იმისდა მიხედვით, თუ როგორია ეს აღზრდა და აღმზრდელი საზოგადოება. ყველა ამ ფაქტორების გავლენის ქვეშ ყოველ ჩვენგანს ებადება თავისებური მსოფლშეხედულება. ერყვევა და უმტკიცდება ხასიათი. რასაკვირველია, სხვადასხვა პირობები, რომლებშიაც შემდეგში ადამიანი ვარდება, მის შეხედულებას და ხასიათს ცოტად თუ ბევრად ცვლის. ასწორებს, მაგრამ მაინც ზემოხსენებული ფაქტორების ზეგავლენა იმდენად მძლავრია, რომ მათი უნიშანწყლოდ არსებიდან ამოშლა არავითარ ძალას არ შეუძლია; მათი გავლენა ადამიანის ყოველგვარ მოქმედებაში გამოსჭვივის, ყოველ ჩვენგანს აქვს აგრეთვე თავისი ინდივიდუალური განსხვავება, მაგრამ ეს განსხვავება ზემონათქვამ ფაქტორებს არამც თუ არ ეწინააღმდეგება და არ მალავს მათს გავლენას. პირიქით, თვითონაც ამ ფაქტორების ნაყოფია. ამიტომ, სანამ მამიას თხზულებების გარჩევას შევუდგებოდეთ, საჭიროა, გავიცნოთ ის საზოგადოება, რომლის ზეგავლენის ქვეშაც იმყოფებოდა პოეტის ნორჩი ბუნება, მემკვიდრეობით გადმონაცემი სიმდიდრე და აღზრდა. რომელიც მან მიიღო, რადგანაც ყოველივე ეს გასაგები იქნება მისი პოეზიის ასახსნელად. ამით ჩვენ დავინახავთ, რა გავლენა იქონია მამიაზე ამ პირობებმა და რაში დაეტყო ეს გავლენა მის თხზულებას? თუმცა ვრცელი წყაროები არა გვაქვს იმ „დარბაზის ერის“ დასახასიათებლად. რომელშიაც ნორჩი მამია ტრიალებდა, მაგრამ. თუ ჩვეუკვირდებით ჩვენი დროის თავადობას, შეგვიძლია, მცირეოდენი წარმოდგენა ვიქონიოთ იმის შესახებ, თუ რა უნდა ყოფილიყო მისი წინაპარი—მეორმოცე წლების თავადობა? თუ მოვიშველიებთ თვით მამიას და მის ბიოგრაფს, მაშინ დაახლოებით თვალი დაგვეხატება ეს წრე თავისი ღირსება-ნაკლოვანებით.

ჩვენი ერის დღევანდელი ცხოვრება ძალიან ბევრში განირჩევა მეორმოცე წლებისაგან. ისტორიული პროცესი სხვადასხვა ერში სხვადასხვაა, როგორც ამბობს პროფ. მილუკოვი, მაგრამ განვითარების ძირითადი მიმართულება კი ყველგან ერთგვარია. რაც შეეხება საქართველოს, შეიძლება მისი ისტორიული პროცესი სრულიად სხვა იყო, ვიდრე დასავლეთ ევროპაში, მაგრამ ამ საუკუნიდან ჩვენი ერი ბორძიკით მიისწრაფვის იმგვარი გზისაკენ, რომელიც ევროპამ უკვე გაიარა და მამასადამე, ჩვენი ისტორიული განვითარება დასავლეთ ევროპის ისტორიულ მსვლელობას ემსგავსება. თუ მეორმოცე წლებში ამ მსგავსების შესახებ ლაპარაკი შეუძლებელი იყო, რადგანაც მას ვერაინ ხედავდა, ახლა გაჩუმება არის შეუძლებელი. რადგანაც მას დღეს ყველა კარგად ხედავს, ბრძმის მეტი. მეორმოცე წლებიდან ლიტერატურა, თეატრი იფურჩქნება, ფეოდალური

წესწყობილება თანდათან სუსტდება, ხალხი სოფლებიდან ქალაქებისაკენ მიისწრაფვის და მოქალაქეობრივ ცხოვრებას იწყებს. მესამოცე წლებში ბატონყმობა ისპობა, ადამიანის შრომა თავისუფლება, წოდებრივ ურთიერთობას ნიადაგი ეცლება, ეკონომიურ და სოციალურ ცვლილებას კი ნიადაგი უმზადდება... ზემო იმერეთში აქამდე გლეხობის უმეტესი ნაწილი ისევ ბატონის ხელშია და უწინდელი ყმისაგან მხოლოდ მით განირჩევა, რომ მას ბატონი ვეღარ გაყიდის, სხვა არაფრით; ზემო ქართლში ისეთივე სამსახური აწევს გლეხს კისერზე, როგორც ყოფილა ბატონყმობის დროში. მაგრამ საქმე იმაშია, რომ ადამიანი განთავისუფლდა, თავისი თავის ბატონი გახდა და ვისაც შეეძლო, ამ თავისუფლებით კიდევ ისარგებლა და ახლაც სარგებლობს. მესამოცე წლებიდან მოკიდებული ჩვენ ცხოვრებას ცვლილება უფრო დაეტყო. ისტორიულმა მსვლელობამ ჩვენშიაც დაბადა ის ფერმენტები, რომლებმაც დასავლეთ ევროპის ცხოვრება სრულიად გადაატრიალეს, პოლიტიკურ, სოციალურ და ეკონომიურ სფეროში გასაოცარი ცვლილება მოახდინეს, წოდებრივი დაყოფა მოსპეს და ხალხი ორ დიდ კლასად, ორ მოპირდაპირე ბანაკად გაანაწილეს. ეს ფერმენტები მრავლდებიან, ძლიერდებიან და ჩვენს ცხოვრებას თანდათან აღულებენ. აზნაურობის უმეტესი ნაწილი გაღარიბდა, ქონებრივად გაგლეხკაცდა და გლეხკაცს გვერდში ამოუდგა. მას შეუერთდა, თუმცა ეს შეერთება ჭერ-ჭერობით ძალიან ეხამუშება და დაკარგული ღირსების წარმოდგენათ ირთობს და ინუგეშებს თავს, გულს იქარვებს. თავადობის ერთი ნაწილი დღეს თანდათან ღარიბდება და საცაა, ისიც გაგლეხკაცდება ქონებრივად, გლეხკაცს შეუერთდება. აზნაურობისა და გლეხობის მცირეოდენი ნაწილი გამდიდრდა, ქონებრივად გათავადდა, შეერთდა და ადგენს ახლა მესამე წოდებას, მართალია, ეს ნაწილი ჭერ რევოლუციამდე არაფერი არ იყო, რევოლუციის შემდეგ ერთობ პატარა, და მიკროსკოპიული გახდა, მაგრამ მისი უარყოფა დღეს აღარ შეიძლება; დარჩა თავის ალაგას თავადობის მეორე ნაწილი, რომელიც შეგვიძლია, მეორმოცე წლების თავადობის ნამდვილ მემკვიდრედ ჩავთვალოთ, მხოლოდ იმ განმარტებით. რომ ახალ ცხოვრებას ამ მემკვიდრის გონებრივი და ზნეობრივი ფიზიონომიისათვის უსათუოდ თავისი დალი უნდა დაეჩნია, ახლა გადაავლეთ მას თვალი და დაინახავთ, რას წარმოადგენს მისი ცხოვრება. თამამად ვიტყვი, რომ უმეტესი მათგანის ცხოვრება ცარიელია. უმიზნო, უიდეალო, უაზრო, შესაფერ განათლებას მოკლებულია და დაბადებიდან მოკიდებულს სიკვდილამდე მათი ერთადერთი საფაქრებელი და საზრუნავი ის არის, როგორ ვიქეიფოთ. როგორ გავატაროთ სა-

უკეთესოდ დრო, თუკი ახლანდელმა ცხოვრებამ ამათ ბუნებაში ასეთი დამამცირებელი მიმართულება არათუ ვერ ამოშალა. ვერც კი დაასუსტა. მეორმოცე წლების თავადობა რალად იქნებოდა ამგვარ გზას აცილებული. როდესაც მას ყოველისფერი ახლობელი ტრადიცია, ცხოვრება, მემკვიდრეობა, მდგომარეობა, სოციალური პირობები — ყოველისფერი ხელს უწყობდა, რომ ამგვარი შეხედულება ცხოვრებაზე ღირსეულ და უტყუარ მცნებად მიეჩნია?! ახლა თვით პოეტსა და ბიოგრაფს მიემართოთ; ვნახოთ. ისინი რალას გვეტყვიან, პოეტის მამის, დავით გურიელის, სასახლეში განუწყვეტლივ თავმოყრილი იყო გურიის საუკეთესო თავადაზნაურობა; იქ მუდამ ლხინი. მუდამ დროსტარება იყო. მაგრამ ეს დაუსრულებელი ნადიმები. რასაკვირველია, ნორჩ მამიას სულსა და გულს ვერავითარ განმავითარებელ მასალას ვერ მიაწვდენდნენ. მამიას ლექსებიდან ჩანს, რომ მისი მშობლები სიმპათიური პირები იყვნენ; მამას მამია, რაშიდის პირით, „სამშობლოს სვეტსაც“ კი უწოდებს, მაგრამ თვით მკითხველისათვის მიგვიჩვენია იმის გამოცნობა, ვის უფრო მეტი გავლენა ექნებოდა პოეტზე. მშობლებს, თუ გურიის საუკეთესო წარმომადგენელთა წრეს. მერე იმ დროს. როცა ჩვენში დედ-მამა შეილის აღზრდას ნაკლებ ყურადღებას აქცევდა. სასახლეში შეგროვილი გურიის არისტოკრატია ბატონყმური იდეალების საუკეთესო წარმომადგენელი და განმაპოროციელებელი იყო და ამ იდეალებს უნერგავდა ნორჩ არსებას, რომელზედაც აღზრდას და შთაგონებას ძალიან დიდი გავლენა აქვს. თუ მხედველობაში მივიღებთ, რომ ამგვარ აღზრდას პოეტის ბუნება ვერავითარ წინააღმდეგობას ვერ გაუწევდა. რადგანაც. ერთი მხრივ. ეს წრე თავისი ზნეჩვეულებითა და რწმენით მაშინდელი დროის საქართველოსათვის სრულიად ბუნებრივი იყო, და მეორე. თვით მამიას მემკვიდრეობით უნდა ჰქონოდა ამპარტავნობა. ბრძანებლობა, ვაჟკაცობისა და ფუქსავატი ცხოვრებისაკენ მიდრეკილება, ამგვარ შეხედულებას ითვისებდა ამ წრისაგან მომავალი პოეტი. პატარაობიდანვე მამია ისეთ პირობებში ჩააყენეს. რომ მის არსებაში უთუოდ უნდა განვითარებულყო მემკვიდრეობით გადმოცემული ამპარტავნობა, მედიდურობა, სხვისი პიროვნების დამცირება და ბევრი სხვა ბატონყმური პრინციპები. მას ჰქონდა საკუთარი დარბაზი, ჰყავდა საკუთარი ამაღა. რომელიც მის ყოველგვარ ინსტინქტს გუნდრუკს უქმევდა, მის ყოველ სურვილს. ჰირვეულობას, ეჩინანობას, მორჩილად და მოწიწებით ასრულებდა. ბავშვი ხედავდა. რომ მამამისს ახლდნენ:

ასობით ვაენი, თავზე მდგომელნი,  
მზად აღჭურვილნი, მლოდნი, მოსავე,  
მის თვალთა ქნევას, უტყვად რომელნი  
აღასრულებდნენ იმეგ წამსავე.

და თავის თავსაც პატარა მეფედ წარმოიდგენდა თავის ამალა-ში. რადგანაც მიმბაძველობის ინსტინქტი ბავშვს ძალიან ძლიერი აქვს. გამოვლევითობდა თუ არა ბატონიშვილს, ერთ აზნაურს პირი უნდა დაებანიებია, მეორეს ტანისამოსი ჩაეცმია, მესამეს სუფრა გაეშალა და საუზმე მიერთმია, მეოთხე მერაქიფედ თავს დადგომოდა. შემდეგ ბატონიშვილი სასახლეში გამობრძანდებოდა. დედ-მამას და და-ძმებს ინახულებდა და გაერეოდა „დარბაზის ერში“. გათენდებოდა თუ არა, დაიწყებოდა ბურთაობა, ჭირითი ან ნადირობა ქორმეძებრებით. საღამოც მუდამ ლხინში და ღროსტარებაში მიდიოდა. ხანდახან თუ. —

ზმებს მოსწრებულსა, ლექსებსა,  
ერთმანეთს სწრაფად ესროდენ,  
რუსთველის ნაანდერძევსა  
ზეპირად იმეორებდენ. —

ამასაც მხოლოდ ღროს გატარებისათვის ჩადიოდნენ და არა გონების ვარჯიშობა-განსავითარებლად. ეკვს გარეშეა, რომ ასეთი გამოშაირების სმენამ გაუღვიძა და განუვითარა მამიას ლექსების თხზვის სურვილი და არა პოეტურმა ფანტაზიამ. ამას გვიმტკიცებს ის გარემოება, რომ მამიამ სულ პატარაობიდანვე დაიწყო ზმებით გამოშაირება; ამ გარემოებას დიდი ქებით და ზეიმით მიეგებებოდა, რასაკვირველია, ყველა მსმენელი და ამით ეს სურვილი მამიას უფრო გაუძლიერდებოდა; გარდა ამისა, ამასვე მოწმობს პოეტის მთელი თხზულება, რომლის პოეტურ ფანტაზიას სუსტი ფრთები ასხია.

როცა „დარბაზის ერში“ შაირებით გაჯერდებოდა, ჩანგურითა და ქალების სიმღერით სმენას იტკბობდა, როდესაც ამითაც დაიქანცებოდა, ვახშმად დასხდებოდა, კიდევ იჭეიფებდა, იმხიარულებდა და ბოლოს დაიძინებდა: მაგრამ გათენდებოდა თუ არა, მსახური ისევ ეახლებოდა:

სკამეთ საუზმე. დარჩაო.

თუ როგორი იყო ეს საუზმე, იქიდან ჩანს, რომ ქათმები, შემწვარი კრაფი. ხბო, ხაჭაპურები — თავზე საყრელად მოდიოდა. დასხუდებოდნენ და გაიმართებოდა ღვინოში გამოჯიბრება. როცა ასეთი საუზმით გამოძლებოდნენ და გამოთვრებოდნენ, გაეშურებოდნენ მუხის ქვეშ და იქ თავს იყოლიებდნენ ჭადრაკის თამაშით. სანამ კიდევ

არ მოწივდებოდათ. ხშირად მოთამაშეებს ჩხუბი მოსდიოდათ და მარტო უშვერის სიტყვებით კი არა, ხმლებითაც კი მიიწევდნენ ერთმანეთზე, რაც მაყურებლებს უფრო ართობდა და მხიარულებას უმატებდა.

მზე გაღვიდა შუალღზე,  
მოვიდა დრო სადილისა

თამაშით მოქანცულნი სადილის მისართმევედ შიდიოდნენ. არც ერთ-ერთ მათგანს სმა და მოლხენა არ ძულს: ყველა თავის გულში ამბობს:

ნეტავ აქ ქეიფს და სმაში,  
ვინ არ მოილხენს, განცხრება!

მიუხედავად იმისა, რომ ისეთი მადლიანი საუზმე მიირთვეს, სადილს ისე შეექცეოდნენ, თითქო საუზმე კი არა, წინა დღის მარხული ყოფილიყვნენ; სიმღერით თავს ირთობდნენ, ვაჟკაცობას ღვინოში ცდიდნენ, ამგვარად, სასახლის არისტოკრატიის ცხოვრება თავიდან ბოლომდე განუწყვეტელ ქეიფს წარმოადგენს; მისი ერთადერთი მცნება კუჭის მრწამსია. გასაოცარია სწორედ, როგორ შეუძლია ადამიანს მთელი თავისი სიცოცხლე ამგვარად გაატაროს? და თუ ატარებდნენ, ეს იმას ნიშნავს, რომ გონებით ძალიან დაბალ საფეხურზე იდგნენ. ამგვარი ცხოვრებიდან მხოლოდ ერთი ნაბიჯია იმ ველურის ცხოვრებამდე, რომელსაც ორი ცოლი აქეთ-იქით ღახდა და, რადგანაც თვითონ ჭამით დაღალული იყო, ისინი ძალიან ტენიდნენ პირში ვეებერთელა ლუკმებს; როცა ქონი ლოყებზე გადმოდიოდა და მეტი სიმამღრით ქშინავდა და ხენეშდა, მის სახეზე ისეთი ნეტარება იხატებოდა, თვალები ისეთი სიამოვნებით და კმაყოფილებით გამოიყურებოდნენ, რომ თავისთანა ბედნიერი ქვეყანაზე აღარავინ მიაჩნდა. ამგვარი საზოგადოების გავლენის ქვეშ იმყოფებოდა მამია დაქაბუკებამდე. ამ ხნის განმავლობაში ხუცური და ქართული წერა-კითხვა შეისწავლა. მისი გონების მთელ საზრდოსა და ავლადიდებას, რამდენიმე გაზეპირებული ლოცვა წარმოადგენდა. მის მომავალზე არავინ ზრუნავდა. ისიც დანავარდობდა სასახლის გოგოებში, რომლებიც ახალგაზრდა ბატონიშვილის ყოველგვარ სითამამეს დიდ წყალობად და ბედნიერებად მიიჩნევდნენ და, რა თქმა უნდა, მამიაც ძალიან ადრე აყვებოდა ვნებათაღელვას. შემდეგ მამიამ ისწავლა რუსული წერა-კითხვა. შევიდა ქუთაისის გიმნაზიაში, ორი-სამი წელიწადი დაჰყო იქ. „სააზნაურო“ კლასამდისაც კი კერ მიაღწია და გამოვიდა. აი მამიას მთელი სწავლა-განათლება.

რომლისთვისაც შემდეგში ბევრი აღარა მიუმატებია რა. აი, როგორი გონებრივი სიმდიდრით გამოვიდა ის ცხოვრების სარბიელზე!

მამია მოსცილდა შინაურობას 1853 წელს და ჩამოვიდა თფილისში. თფილისის საზოგადოება ამ დროს იღვიძებდა, ქართული თეატრის საძირკველი შენდებოდა. მწერლობა იზადებოდა, გლეხობის განთავისუფლების დრო ახლოვდებოდა, საზოგადოდ, ჩვენს ცხოვრებას ახალი მოძრაობა ეტყობოდა. — მამიამ გულში ღრმად ჩაიჭდია სამშობლო საქმეთა სიყვარული თფილისში ყოფნის დროსო, ამბობს მისი ბიოგრაფი. ეს რომ მართალი იყოს, როცა მამია მოშორდა „დარბაზის ერს“ და თფილისის საზოგადოება, ახალი მოძრაობის საუკეთესო წარმომადგენლები გაიცნო, უსათუოდ შეადარებდა ერთმანეთს ამ საზოგადოების და იმ წრის ცხოვრება-მისწრაფებას, რომლის გავლენის ქვეშაც თვითონ აღიზარდა; უკანასკნელისადმი ზიზღი თუ არა, სიბრალული მაინც დაებადებოდა, ჩაებმოდა ამ ახალ საზოგადოებაში და მოქმედებას დაიწყებდა სამშობლოს საკეთილდღეოდ, რომლის საქმეთა სიყვარული თურმე „გულში ღრმად ჩაიჭდია“. მამიას კი ეს საზოგადოება თითქო არც კი შეუმჩნევეია, არავითარი ყურადღება არ მიუქცევია. მალე სამსახურში შევიდა და იქ მუდამ ოხრავდა და იგონებდა თავის დროსტარებას. მოიგონებდა ცხრამეტი წლის ლერმონტოვი, რომელსაც ძულს და ეზიზღება ის საზოგადოება, რომელიც მას გარს არტყია. რუსეთის გამოჩენილ პოეტს ამ საზოგადოებამ ღრმა კვალი დააჩნია, მაგრამ მას ყოველთვის ძულდა ეს საზოგადოება, ფუქსავატი, გახრწნილი, უზნეო; მაშინ, როცა ლერმონტოვს წყურია მოშორდეს ამ საზოგადოებას, მამიას სული მიუდის, როდის იქნება ჩემი შინაური წრე ვიხილო და ძველი დროსტარება გავიხსენო. იმ ცხოვრების გარეშე მას სიცოცხლე აღარ შეუძლია, თუ მოტყუებით, თუ მოხერხებით. ხშირხშირ „ოტპუსკებს“ იღებდა და მიეშურებოდა გურიის საუკეთესო არისტოკრატიისაკენ. მის თვალწინ მუდამ აჩრდილივით იხატებინა: მალთაყვა; იქაური დროსტარება, შველი, ირმები, მიმინოები, ხუმრობა; სიცილი, თამაში და მხიარულება: „დაფიქრებული ამებზე არა ერთხელ ამოვიოხრებ ხოლმე მწარეთ, გარნა ის ოხვრა ბევრათ უტკბესია ზოგიერთ ძალით გამოძახებულ სიცილზე“. აი, მამიას ნამდვილი სიტყვები. ამას შემდეგ სრული უფლება გვაქვს ვიფიქროთ რომ, პოეტს მემკვიდრეობით ვადმოცემული ჰქონდა ყველა ის თვისება და მიდრეკილება, რომლებიც შემდეგ „დარბაზის ერის“ გავლენამ გაუძლიერა და ურიგო აღზრდამ განუმტკიცა. მამია სისხლით სულდა და გულით ნამდვილი შვილი



იყო იმ არისტოკრატიული წრისა, რომლის ზეგავლენის ქვეშ ის 1853 წლამდე და შემდეგაც იმყოფებოდა. სიკვდილამდე არაფერი არ იზიდავდა მას ისე, როგორც ამ საზოგადოებაში ტრიალი; გაატარა თავისი სიყმაწვილე ამ წრეში, რომლის ცხოვრებაც ფუქსსავატობის მეტს არას წარმოადგენდა. ჯან-ღონით და სიცოცხლით აღვსილ-ვა ახალგაზრდამ იხილა თფილისის საზოგადოება, რომელსაც ის იყო თვალი ოდნავ აეხილა და ადამიანურ ცხოვრებას ეპირებოდა. და მისი ხორცშესხმული პატრიოტიზმი, რომელსაც ძილში და ფხიზლად მხოლოდ სამშობლო აგონდება, მაინც იმ ფუქ წრისაკენ მიისწრაფვის. იმ დროს, როცა თფილისის საზოგადოება შველას ითხოვდა, როცა მისთვის ჯან-ღონით სავსე ყოველი ყმაწვილი დაუფასებელი იყო, მამიამ თურმე შეიგნო ამ საზოგადოების სურვილი და საჭიროება, „სამშობლოს საქმეთა სიყვარული გულში ღრმად ნაიქლია“, და გადგა განზე, ლოთობა-ქეიფზე ოხრავდა და თავის „კახაბერს სხვა კაცს“ იგონებდა. სწორე მოგახსენოთ, ვერაფერი სამშობლოს სიყვარულია!

ამგვარად, თბილისის საზოგადოებამ მამიაზე ვერავითარი გავლენა ვერ იქონია, მისი შეხედულება ცხოვრებაზე ვერ შესცვალა. ცხოვრების ახალი მოთხოვნილება ვერ დაანახვა. ვერ შეაგნებინა. ამის მიზეზი ცუდი აღზრდის და გავლენის გარდა, მამიას წლოვანებაც იყო; თვრამეტ-ცხრამეტი წლის ყმაწვილს მაინცდამაინც დიდ გამჭრიახობას და ხასიათის სიმტკიცეს ვერ მოვთხოვთ. მამია შევიდა სამხედრო სამსახურში და ბევრ ლაშქრობაში მიიღო მონაწილეობა. სამხედრო წრემ არამტუჟ ვერ ამოშალა მასში წინანდელი გავლენა. კიდევ უფრო დაუმორჩილა პოეტი ამ გავლენას; შინ შეძენილი რწმენა და შეხედულება აქ უფრო განუმტკიცდა, ძვალ-რბილში გაუჯდა და ქეშმარიტ მცნებად გადაქცა. მესამოცე წლებში მამი, რამდენსამე ხანს თავისუფალი იყო; შეეძლო საზოგადო ასპარეზზე გამოსულიყო, მაგრამ, სამწუხაროდ, არც ერთ საზოგადო საქმეში მას არავითარი მონაწილეობა არ მიუღია და არაფერი გაუკეთებია. აქვე, რამდენადაც შემეძლო, უნდა აღმენიშნა ჩვენი ცხოვრების ტიპიური მხარეები მესამოცე წლებში, მაგრამ რადგანაც ამ ცხოვრების მიმდინარეობაში მამიას მონაწილეობა არ მიუღია, ეს ცხოვრება მას არ იზიდავდა და გავლენაც მაზე ვერ იქონია, ამიტომ მაშინდელი საზოგადოებრივი ცხოვრების უმთავრესი მხარეების აღწუსება უფრო საფუძვლიანად მიმაჩნია შემდეგ, როცა მამიას პატრიოტულ „თემაზე“ მექნება მსჯელობა.

როგორც დავინახეთ, მემკვიდრეობით მამიას ჰქონდა მიდრეკილება ამპარტავნობა-ბრძანებლობისაკენ. უხეირო აღზრდამ და გავ-

ლენამ ამგვარი თვისებანი განუძლიერა, სასახლის არისტოკრატია მას შეაყვარა ფუქსავატი ცხოვრება. ჩაუნერგა ის შეხედულება, რომლებიც მამიას მთელ თავის თხზულებაში გაჰყავს. თუ მხედველობაში მივიღებთ, ამათ გარდა, იმ გარემოებას, რომ მამიას პოეტური ფანტაზია სუსტი აქვს და ბაირონისა და ლერმონტოვის წაბაძვა უყვარს, მამიას პოეზია და მისი მოტივები ჩვენთვის დაახლოებით ახსნილი იქნება, და თამამად ვიტყვი, რომ ამგვარი ფაქტორების ძალით მამია სწორედ ისეთი პოეტი უნდა გამოსულიყო, როგორც დღეს არის.

მამიას ორიგინალურ ნაწარმოებში უმეტესი ნაწილი წვრილ ლექსებს უჭირავს. ერთ ნაწილს პოეტი მიუძღვნის ნაცნობებს და ნათესავეებს, მეორე ნაწილი სხვადასხვა საგანზე არის დაწერილი. გარდა რამდენიმე ლექსისა, მათი წაკითხვით თქვენ სულს და გულს არაფერი ეძლევა, რადგანაც უმეტესის დედააზრი სუსტია, უმნიშვნელო. ზოგიერთი ლექსი თქვენ გონებაში სრულ შთაბეჭდილებას ვერ ტოვებს, რადგანაც შიგ რამდენიმე აზრია არეულ-დარეული: პოეტმა თუ პატარა ლექსში რამდენიმე აზრი გაატარა და ზოგს თავი წააგლიჯა, ზოგს ბოლო — რა უნდა გამოიტანოს იქიდან მკითხველმა? მაინც უმთავრესი საგანი ამ წვრილი ლექსებისა არის ქალი, მოტივი—სევედა. საჭიროა დავინახოთ, როგორ უყურებს მამია ქალს და რა სარჩული უდევს მის სიყვარულს ამ სქესისადმი? პოეტი არჩევს ქალში სულიერ და ფიზიკურ მხარეს. როგორც გონებრივ და ზნეობრივ არსებას, ქალს ის ძალიან დაბლა აყენებს; აღიარებს, რომ მას ზეცით უხვად ბოძებული აქვს „ღვთაებრივი ძვირფასი ნიჭები“, მაგრამ ამ ნიჭს ის ვერ ცნობს, არ შეუძლია და არც უნდა მით ისარგებლოს. როგორც ჩიტი, ისიც არხეინად სუნთქავს, ფრინავს, ხან ერთ ყვავილს დასჭიკჭიკებს, ხან მეორეს, ყოველისფრით სარგებლობს, დარდი არაფრისა აქვს, მხოლოდ თავის სურვილებს მისდევს დაუღალავად; ამ სურვილების ერთადერთი შინაარსი ტრფობაა. მას არ ესმის „მოძმის ტანჯვა, სამშობლოს გასაჭირი, წინაპრების თავდადება“, ის არ არის იმგვარ არსებად გაჩენილი, რომ, — მის სმენას

მალის სულის განრისხება,

მისი გულის ზღვებრივ გრგვინვა, —

შეეხოს; ყოველივე, რაც ტრფობას არ შეეხება, მისი „მოსაზრების გარეთ რჩება“. მამიას არ სწამს „კეკლუც ქალების მონღობა, განწირულება, დიაცთა სირცხვილ-ნამუსი“. მისი მოწიფული ქალი მხიარულად გაიძახის:

საბრალო ყველა ქმრები,

თუ ჩვენ ერთგულად დაგვსახა.

პოეტის თვალში ქალები ხარბები, სიმდიდრის მონები და, წარმოიდგინეთ, — კაცობრიობის დამცემნიც კი არიან. მიუხედავად იმისა, რომ ქალების სულიერი მხარე ამდენად დაცემული ყოფილა, მამიას ისინი არც ეზიზღება, არც ძულს, არც ებრალებს; მათი სულიერი დაცემა მას გულს არ უმღვრევს; პირიქით, „თქვენ, მეტო ყოვლის ქებისა“—ო, ეუბნება მათ პოეტი და გამოუტყდება:

მეფე რომ ვიყო, ეუფლებდა  
სრულიად ცისა ქვეშეთსა,  
უსაზღვრო ნებით ვსუფევდე,  
გიბატონებდი შენ ერთსა.  
ღმერთი რომ ვიყო, ერთ წაშვდ  
სრულ ვყოფდი ყოველ შენს ნებას.  
შენ გაუფლებდი ზეცაზედ  
და თვით გიწყებდი ვედრებას.

კანა ამდენად დაცემული არსება გაღმერთებისა და ვედრების ღირსიაო, გაიძახის გულმოსული მკითხველი. დიახაც არისო, გიბასუხებთ პოეტი: რადგანაც ქალი ლამაზია, თავისი სიმშვენიერით ყველას ხიბლავს, ყველას გულს უტოკებს, სვე-ცხოველებას იძლევა; მხატვრის მეჩანგის ნიჭის აღმაფრთოვანებელიო. მკითხველი მაინც თავისას არ იშლის: მჯერა, რომ სილამაზეც ღირსებაა, მარა ისეთი: ღიადი კი არა, რომ სულიერი სიმამხინჯე სრულიად გამოიყადოსო. თურმე მკითხველი შემცდარია, რადგანაც პოეტის აზრით, ქალი მხოლოდ ვნებისათვის, სქესობრავეი ინსტინქტის დასაკმაყოფილებლად არის შექმნილი; მისი დანიშნულება მხოლოდ ეს არის და არა სულიერი ღირსებების გამოჩენა. ქალის სულიერი სიმამხინჯე მხედველობაში არ უნდა მივიღოთ, გვეუბნება მამია, რადგანაც მისი დანიშნულება ვნებათა დაკმაყოფილებაა მხოლოდ: ის ამ დანიშნულებას კარგად ასრულებს, „ტრფიალთა ვნებით აღნობსო“. ყოველი ადამიანი, რომელიც სინდისიერად ასრულებს თავის უზენაეს მოწოდებას, დიდების ღირსია, ამიტომაც აღმერთებს ქალს მამია და—

თავის ლამაზი მტერისა  
სამარადისოდ ერთგული არის.

სილამაზის გარდა ქალში სხვას არას ეძებს პოეტი; უყვარს ის და მისი სიყვარულიც წყურია მხოლოდ იმიტომ, რომ ის ლამაზია. ნეტარებით იგონებს, რაც მათი „ეშხით სიამოვნება გამოუცდია“, „კეკლუცთ ტრფობაში სურვილის მოკვლას“ არ გაურბის და ჩვენც გვიჩვენებს, ნურც თქვენ გაექცევითო. ამგვარად, მამიას სიყვარულიც ქალებისადმი მხოლოდ ფიზიკურ მხარეზეა აგებული და, მამასადა-

მე, ეროტიულია, პირუტყველი. რამდენად მართალია აზრი და შეხედულება ქალის სულიერი თვისებისა და მისი დანიშნულების შესახებ, რამდენად სიმპათიურია მისი სიყვარული ამ სქესისადმი, მკითხველმა თვითონ განსაჯოს.

როგორც ზემოთ მოვიხსენიეთ, მამიას ლექსების უმთავრესი კილო, სხვათა შორის, სევდაც არის. მამია ხშირად ოხრავს, მისი გული მწუხარებით და სევდით აღვსილია, მაგრამ მისი ამგვარი ლექსები თქვენ გულში შესამჩნევ თანაგრძნობას ვერ გამოიწვევს; მათ აკლიათ რაღაც, რაც სევდაზე აგებულ პოეზიის სულსა და გულს შეადგენს. პოეტის სევდა თითქო ბუნებრივი არ არის, ან ძალდატანებულია, ან გაზვიადებული და ამიტომ თქვენს გულს ვერა ხვდება და პოეტის ტანჯვას ვერ გაგრძნობინებთ. ხანდახან მამიას სულისკვეთება თითქო უკანასკნელ საზღვარს აღწევს, პოეტი სიკვდილსაც კი ნატრობს, მაგრამ ამგვარი წუთები მას მხოლოდ მგზავრულად თუ ესტუმრება, ისიც ძალიან ძვირად. ასეთი სულისკვეთება არ შეადგენს მის ორგანულ თვისებას, როგორც, მაგალითად, ეხედავთ ბარათაშვილში, რომლის ყოველი ლექსი სევდასა და მწუხარების კანვაზეა მოქარგული, მამიას შინაგანი არსება პესიმისტურად სრულიადაც არ ყოფილა მომართული. ის ტკება გაფურჩქნული ვარდის ხილვით და ამავე დროს კარგად იცის, რომ ეს ვარდი მალე დაქჷნება, მოისპობა; შეჷხარის ლამაზ ქალს, თუმცა მშვენივრად იცის, რომ ისიც დაბერდება, და მის ალაგს სხვები დაიჷერენ; ამგვარი მოფიქრება მის მხიარულებას სევდის ბურუსით უბრალოდაც ვერ ჩრდილავს. პუშკინსაც კი, რომელიც სრულიად არ ყოფილა პესიმისტი, ასეთი ფიქრები გულს სევდით უვსებენ; თუმცა მისი სევდა გულგატეხილი, ყოველისფერზე იმედდაკარგული ადამიანის გულიდან ამონაკენესი არ არის და მასში ნათლად გამოსჷვივის იმედი უკეთესი მომავლისა. მაგრამ რაც უნდა იყოს, სევდა სევდადვე რჩება. ბუნებით მამია მელანქოლიკი არ ყოფილა, რომ ყოველგვარ მოვლენაზე სევდის პრიზმით ეტკირა. იმ საზოგადოების ცხოვრებას, რომელშიაც პოეტი ტრიალებდა, ის ძალიან არ უჷვირდებოდა, რომ შიგ რამე სევდის გამომწვევი დაენახა. თუ საქართველო დაცემული იყო, პოეტის აზრით, ეს მოფიქრება მხოლოდ წარსულის დიდებასა და აწმყოს გინებას იწვევდა მასში და არა იმ სევდას, რომელიც გულიდან წყნარად გამოდის. მთელ ტანს დაუელის და ნაზად ღრღნას დაუწყებს. ის არ იყო იმდენად განათლებული კოსმოპოლიტი, რომ მთელი კაცობრიობის ინტერესები და ცხოვრების მსვლელობა გათვალისწინებული ჷქონოდა და ამ ცხოვრების ბნელ მხარეებს მისი გული დაეწყლულებია. მის სევდას პირადი ნიადაგი აქვს. პოეტი

მეტისმეტად ამპარტავანი და თავმოყვარეა. უნდა, რომ მისი ცხოვრების გზა სულ ვარდით იყოს მოფენილი; უცებ ეწყინა რამე, დაიწყო გოდება და რაშიც წინათ სიტკბობებს ჰპოებდა, ახლა ძირმწარედ მიაჩნია. გაიარა ერთმა წამმა, პოეტი დამშვიდდა და ისევ მხიარულად მღერის: ხომ ვხედავთ, რომ ყოველივე წარმავალია, ვიქეიფოთ, ვიმხიარულოთ, დავტკბეთ, ამოვწოვოთ მას, რის ამოწოვაც კი შეიძლება, აქ ვცხონდეთ და იქ ცხოვრებას თავი დავანებოთ. ასეთი ელვასავით უცებ აფორიაქებული და უცებვე ჩამქრალი სევდა ჩვენ გულს ვერ ააღელვებს და შიგ თანაგრძნობას ვერ დაბადებს. გარყვნილ კაცებს ხშირად თავი მოუკლავთ მწუხარებით. როცა ყოველგვარი წყარო დაშრობიათ თავის დასატკბობად, მაგრამ თანაგრძნობას კი ვერავის გულში ვერ დაბადებენ ისინი. მართალია, უმეტეს ნაწილად, სევდა-პესიმიზმის მიზეზი პირადი უკმაყოფილებაა, კერძო უბედურებაა, მაგრამ ამგვარი ადამიანი მხოლოდ მაშინ აატოკებს ჩვენ გულს და გადასცემს მას თავის მწუხარებას, თუ ეს უბედურება საგრძნობელია მართლა და მის უკმაყოფილობასაც ღირსეული სარჩული უდევს. წარმოიდგინეთ, რომ თქვენ წინ იმყოფება ადამიანი, რომელიც ჩაგრულთა და დავრდომილთა დაფარვისათვის სასიკვდილოდ დაქრეს და ავაზაკი, რომელმაც სახლი გაცარცვა, შიგ მყოფი ხალხი დახოცა, მაგრამ მოასწრეს, გადმოხტა ფანჯრიდან და დაიმტვრა; როგორც უნდა გიმტკიცებდეთ საღი გონება, გაქირვებაში ყველა ერთნაირად უნდა გებრალეზოდესო, გრძნობისათვის ამგვარი მტკიცება სრულიად უმნიშვნელო იქნება: პირველი უბრალო თანაგრძნობას კი არა, ცრემლებსაც კი გამოიწვევს თქვენს თვალზე, მეორის შესახებ კი შეიძლება ასეც თქვათ: ახია შენზეო, თორემ სიბრალულს ვინდა ჩივის. მამიას სევდაც გამოიწვევდა ჩვენ თანაგრძნობას, რომ ამ სევდის გამომწვევი გარემოებანი ღირსეულნი იყვნენ. მაგრამ უმნიშვნელო მიზეზები მას უცებ გულს მწუხარებით უვსებენ, მეორე წამს ისევ მხიარულ კილოზე მღერის, როგორც მისი რაშიდი:

ბრძოლას, ტრფიალსა, ლოთოღს. ლხენას  
გადაუხადე საკმაოდ ვალო.

და აქ რომ თანაუგრძნოთ, ყოვლად შეუძლებელია. ამიტომ მამიას სულის ობლობას სულის ობლობა არ ეთქმის; მისი მიზეზია სრულიად უბრალო გარემოებანი, უცხოელი პოეტებისადმი მიბაძვა და კიდევ ის გარემოება, რომ ზოგიერთ მწერალს, ბრანდესის სიტყვით, საშინლად უყვარს, მკითხველს ისე კი არ გააცნოს თავი, როგორც ნამდვილად არის, არამედ ისე, როგორიც სურს რომ

იყოს: ან უფრო მგრძობარედ და მელანქოლიკად, ძველებური მოდის მიხედვით, ან უფრო გამოცდილ, გულქვა და მიუკარებელ პირად, როგორც ახლა იქცევიან. მაშინ კი როგორც ყველაფერში, ისე აქაც ძველი მოდის მიმდევარია.

წვრილ ლექსებში საუკეთესოდ უნდა ჩაითვალოს „ადამიანი“. ეს ლექსი საუკეთესოა, როგორც გარეგანი ფორმით, ისე შინაარსით. ერთ-ერთ ამ თვისებათაგანს კი მაშინას ლექსები ხშირად მოკლებული არიან. ამ ლექსის შინაარსი შემდეგია: რა ბედნიერებაში ან უბედურებაშიც უნდა ჩაგაყენოს ბედმა, ყველგან უნდა გახსოვდეს, რომ „შენ ხარ მხოლოდ ადამიანი“; ადამიანის სახელის ღირსეულად ტარებისათვის კი საჭიროა გწამდეს იდეალი სიმართლისა, მოძმეთა და სამშობლოს სიყვარულისა. აზრი ღრმა ფილოსოფიურია, რომელიც სტოიკების მოძღვრებას წააგავს. ამ ლექსში ნათლად არის გამოხატული მაშინას ზნეობრივი შეხედულება ადამიანის დანიშნულებაზე. ამგვარი აზრი და ასე მკაფიოდ მას არც ერთ თავის ლექსში არ გამოუთქვამს:

ცხოვრების მიზნად სიმართლე გიჩნდეს  
და სიყვარული მოძმეთა ვალად:  
სამშობლო შენი მარად გახსოვდეს,  
თუკი ვსურს გახლე ადამიანად.

რაც შეეხება „ქობულეთურ ყანის სიმღერას“, რიგიანია, მაგრამ მის ლირიკას „ჩინებული ლირიკა“ არ ეთქმის. ის თქვენი გულის სიღრმემდის ვერ წვდება, რადგანაც ამ სიტყვების თქმის დროს თვით ყანის მუშის გულიც არ ივსება სევდით: ის ყანას დამღერის თავს და ამ დროს სასიმღერო სიტყვები, ათასი მწარე და სევდიანიც რომ იყოს, მხოლოდ გარეგანი ფორმა იქნება, რომლის შინაარსსაც მომღერლის სულიერ მდგომარეობასთან საერთო ბევრი არა ექნება რა; მისი გული ამ დროს იმედითა და ნუგეშით იქნება აღვსილი. ამგვარია ყანის მუშის ფსიქოლოგია. რაშიაც დამეთანხმება ყველა. ვისაც ყანაში მუშების სიმღერა გაუგონია. რაგინდ ნაღვლიანიც იყოს სიტყვები, თვით სიმღერის კილოც, მომღერლების სახე ამ დროს ყოველთვის მხიარული და იმედის გამომხატველია. სხვა ალბათ რომ ამბობდეს ამ სიტყვებს გლახი, მაშინ სხვა არის, მაგრამ ახლა როგორ გვაგრძობობებს მას, რასაც თვითონ არა გრძობს. ესეც რომ არ მივიღოთ მხედველობაში, შეადარეთ ეს ლექსი რაფიელის რომელსამე ლექსს. ამგვარი შინაარსისას, და დაინახავთ, ნამდვილი

ლირია, გლახის სულიერი მდგომარეობის გამოწმენტი როგორც უნდა.

მამიას ზოგიერთი პატრიოტული ნაწარმოები, როგორც, მაგ., „ქარჩხალის მთები“, „ალავერდი“, წრფელის გულიდან არის აღმონაკვეთი, მძლავრი და ამიტომ გაცილებით მაღლა დგანან, ვიდრე სხვა ლექსები: აქ არის მართლა პოეზია, მხოლოდ აქ არის მამია პოეტი, მამიას მთელი არსება სამშობლო სიყვარულით გამსჭვალულია, მისი მიზეზით „ადიდებს ღმერთს“ და მისი აწმყოთი გულგატეხილს ყოველივე, რაც კი იმის წარსულ ღიდებას მოაგონებს, მის გულში მეტ გრძნობას იწვევს, დიად შთაბეჭდილებას ახდენს, მის ძალას და ყურადღებას იპყრობს. ამიტომაც ზოგიერთ პატრიოტულ ლექსში, რომელშიაც მამია ამგვარ გრძნობას სრულიად ემორჩილება და მეტს არ ცდილობს, არ აზვიადებს, პოეტი მშვენიერია. მამიას პატრიოტული ლექსები და პოემები შინაარსის მხრივ ორ ნაწილად განიყოფებიან: პირველში ის გვიხატავს მამულის ახლანდელ დაცემას, დაუძლურებას, გვაგონებს წარსულ ღიდებას, ძლიერებას (ბაირონის „გიაურიდან“, „ქარჩხალის მთები“, „პოეტი და ჩვენება“). გადავლებს თვალს საქართველოს და ყოველი კუთხე მოუთხრობს მის ძველ ღიდებას; ჩაუკვირდება ახლანდელ საქართველოს და გულდამწვარი ამბობს:

მაგრამ, ვგრძნობ, ვინც მგრძნობელობს ცხოვრებას,  
ჩემთანა ერთად დაღერის მწარ ცრემლებს.

მის თვალში ერთი ნაწილი ქართველობისა „მატლქიები დაგლახებულნი, ყმები, — არა ტყვენი ყმებისა, შემარცხვენიელი თვისის ქვეყნისა“ არიან. მას ვერც კი მოუნახავს შესაფერი სახელი ამ ადამიანების დამცირების გამოსახატავად. „ქარჩხალის მთებში“ პოეტი აგვიწერს საუტხოოდ და მართლა პოეტური ხელოვნებით უმაღლეს მწვერვალებს და ჩამოგვითვლის იმ საუკეთესო ხანას და გმირებს. რომელთა მოწამეც ეს მთები არიან.

საქართველოს აწმყო კი მათ  
გულსა უჭრავენ, აუტოკებენ.  
და შავ ღრუბლებით შემოსილები  
მგლოვიარებენ, წყევლიან ბედსა.  
ღღეს თავდახრილნი, შერცხვენილები,  
ისევ ღრუბლებში იმაღვენ ქედსა.

ამგვარად, პოეტი თავისი ღროის საქართველოს ძალიან ემდურის. მამია თავისუფლებას ყოველისფერზე მაღლა აყენებს, ყოველისფერზე მეტად აფასებს:

მე სულ სხვა მინდა სანახავები,  
მრავალი ხალხი ერთად ხარობდეს,  
დაუწყობელი თუნდ იყოს ხმები,  
მხოლოდ უფლებას თვისას ჰგალობდეს. —

ამბობს პოეტი ერთ თავის ლექსში და იქავე უმატებს:

...მეგობრობას, ძმობას, ერთობას  
უშიშრად მაღლად განაცხადებდესო.

ის კი ავიწყდება, რომ, საცა თავისუფლების გალობაში ხმები ერთმანეთს არ ეწყობა, იქ მეგობრობის, ძმობის და ერთობის უშიშრად მაღლა განაცხადება ყოველად შეუძლებელია, რასაც თვით საქართველოს დამოუკიდებლობის უკანასკნელი დღეები მშვენიერად ამტკიცებენ. მეორე მიზეზი პოეტის უკმაყოფილობისა პირადი ნიადაგია. პოეტი სიყრმიდან „აღზრდილია ბრძანებლობაში“, „მამისაგან ნაანდერძევი“ აქვს თავისუფლების სიყვარული, „მტრის სიძულვილი“. ჯარგად ხედავს, რომ, —

ის სახელ-გვარად  
ვინ იყო მთავრად  
მპყრობის გურიის, ჩაქვ-აჭარისა,  
ჰგავს იმას, მარა  
არვინ ამთავრა  
არც არის მეფე ზღვა ლაშქარისა.  
არც აქვს ბათობი,  
არც პალო რკინის.

ამიტომ თავმოყვარე და ამპარტავანმა პოეტმა საქართველოს აწმყოს დაფასებაში პირადი ინტერესები რომ არ გაუჩიოს, რომ არ ინატროს ის დრო, როცა ის „მპყრობელი გურიის, ჩაქვ-აჭარისა“ იყო, შეუძლებელია. ამ მიზეზმა შეაყვარა წარსული ამ საუკუნის ჩვენ თავადობას და გული ააყრევინა აწმყოზე, რადგანაც თავის მნიშვნელობის დაკარგვას ვერ შერიგებოდა: ჩვენი აზრით, ეს ორი მიზეზი, მამიას პატრიოტული ლექსების სათავეა. „ჩემი ალავერდის-თანა“ ლექსებს დღეს ჩვენთვის მნიშვნელობა აღარა აქვს. მისი მოსმენა ალტაცებაში მოგვიყვანს, მაგრამ ეს ალტაცება უცებვე გაგვიქრება. ჩვენი ცხოვრება გადასხვაფერდა, სხვანაირად დატრიალდა:

სადაც აქამდის ხმლით და ძალით ჰფლობდა ქართველი,  
მუნ სამშვიდობოს მოქალაქის მართავს აწ ხელი.

ქართველობამ მყუდრო ცხოვრება იგემა; განვითარების გზას დაადგა. გარემოებამ მოითხოვა ისეთი პოეტები და დამრიგებლები, რომლებმაც ჩვენ ახალი ცხოვრების კარგი და ცუდი მხარეები უნდა



გაგვითვალისწინონ, გასაკვლევი გზა დაგვანახონ, დროის შესაფერ  
იარაღზე მიგვითითონ და მისი ხმარება გვასწავლონ. მამიას გადაჭარ-  
ბებული წარმოდგენა აქვს ჩვენი წარსულის შესახებ და აწმყოსაც  
ძალიან ამცირებს. ნამდვილად კი ჩვენ წარსულს არც ისეთი ბრწყინ-  
ვალე გვიჩვენებინა ადგა თავს, როგორც მამიას ჰგონია; აწმყოც არც  
ისე უნუგეშოა, როგორც მამია გვიხატავს. მეცხრამეტე საუკუნე  
პირდაპირი ნაყოფია მეთვრამეტესი; ამიტომ სამართლიანობა და  
ლოგიკა მოითხოვს: თუ გვინდა ქვეშაირი წარმოდგენა ვიქონიოთ  
ჩვენი ახლანდელი ცხოვრების შესახებ, მეცხრამეტე საუკუნე თამარ  
მეფის ხანას კი არ უნდა შევუდაროთ, არამედ მეთვრამეტის გასულს;  
საჭიროა ვიცოდეთ, რას წარმოადგენდა საქართველო ამ დროს, რო-  
გორის ძალღონით, წესწყობილებითა და ქონებრივ-გონებრივი სიმ-  
დიდრით გადმოდგა ფეხი მეცხრამეტე საუკუნეში. როგორც სხვა  
დროს, ისე მეთვრამეტე საუკუნეშიაც საქართველოს ყოველ კუთ-  
ხით ესია აუარებელი მტერი და ერთ წამსაც არ აძლევდა მას მოს-  
ვენებას. გარეშე მტერსაც რომ თავი დაენებებია, საქართველო მა-  
ინც ვერ მოისვენებდა, რადგანაც დინასტიური სისხლისღვრა, სასახ-  
ლის ინტერესები, მოურავებისა და ნაცვლების ძარცვა-გლეჯა მას  
მუსრს ავლებდა და სამარეს უთხრიდა. თუ გარეშე მტერი ძლიერი  
იყო, ძლიერი იყო შინაური მტერიც, რომელსაც ქვეყნის სათავეში  
მდგომი პირები წარმოადგენდნენ. ერთ მხარეს რომ გარეშე მტრისა-  
გან მოყენებული ზარალი დაედვათ და მას შინაური მტრის ნამოქ-  
მედარი ავუწონოთ, ძნელი სათქმელია, რომელი დასძლევს. მეფე  
გაპირვებაში იყო და თავადაზნაურობას დახმარებას სთხოვდა; ისი-  
ნიც ეხმარებოდნენ, მაგრამ, რასაც მეფეს აძლევდნენ, ორ იმდენს  
გლეხების კისრიდან იღებდნენ. როდესაც ირაკლი მოხუცდა და მა-  
მულის უბედურებამ სიცოცხლე მოუწამლა, ორგულთა მოქმედებამ  
ერთიორად იმატა და. რაც მტერს. გადაურჩა მათ ირგეს; მტრისაგან  
გადამწყვარ მამულზე მათ ხელი მოითბეს. ამგვარ წყობილებაში  
ხალხის კეთილდღეობა შეუძლებელი იყო. მართალია, კანონები კარ-  
გი და სწრაფი იყო მაშინ, მაგრამ მათ აღარავინ ასრულებდა. ავიდა  
გიორგი ტახტზე. თუმცა მეტად კეთილი კაცი იყო, მაგრამ მას ბე-  
რის ტანისამოსი უფრო მოუხდებოდა ვიდრე მეფის გვირგვინი. ქვეყ-  
ნის მართვა ნათესავეებსა და კარისკაცებს მიანდო<sup>1</sup>. ისინიც სარგებ-  
ლობდნენ მეფის სისუსტით, თამამად დანავარდობდნენ საქართვე-  
ლოში და მისი სახელით ყველას ტყავს აძრობდნენ.

გადმოდგა საქართველომ მეცხრამეტე საუკუნეში ფეხი, პო-

<sup>1</sup> ცხოვრება გიორგი XIII, პლ. იოსელიანისა.

ლიტიკურად მოკვდა, სამაგიეროდ გარეშე მტერი გაბრუნდა, დინასტიური ბრძოლა მოისპო, გადამტერებული ნაწილები დაშოშმინდნენ. გარეგანი და შინაური მყუდროება დამყარდა. გლეხი თავის ჩვეულებრივ მუშაობას შეუდგა. თავადაზნაურობამ კი ძველი მნიშვნელობა დაჰკარგა. ვინც ლუარსაბივით შინ ჯდომა არ ისურვავ, სამხედრო და საერთო სამსახურს მიაშურავ; სამსახურისათვის კი საჭირო იყო სწავლა, განათლება. ამიტომ ჯერ თავადაზნაურობაში დაიწყო მოძრაობა სასწავლებლისაკენ; თუმცა მაშინდელი განათლება მაღალი ღირებებისა არ ყოფილა, მაგრამ სულ არაობას ჯობდა! განათლების საჭიროება თანდათან ძლიერდებოდა, მსურველთა რიცხვიც მატულობდა. სკანდელს უკვირს, რომ მეორმოცდაათე წლების ახალგაზრდობამ მარტო გარეგნობას მიაქცია ყურადღება და ამიტომ ლანძლავს მას. დღევანდელი ახალგაზრდობაც თუ მხოლოდ გარეგნობით იკვებება, გასაკიცხია, მაგრამ მეორმოცდაათე წლების ახალგაზრდობა თუ მარტო გარეგნობის მეტს ჯერ ვერას ხედავდა, ამაში გასაოცარი არაფერი არის: პირიქით, სრულიად ბუნებრივი შედეგია ახალი ხანისა ქართველობის ცხოვრებაში.

მოწინავე პირები, რომლებიც მაშინ ჩვენი ცხოვრების სათავეში იდგნენ, კარგად ხედავდნენ, რომ ძველი, მამულის დამღუპველი ელემენტები თანდათან ისპობოდა, ისტორიული ევოლუცია ჩვეულებრივ გზას ადგებოდა; ქართველობა პროგრესიული ცხოვრებისაკენ მიიწევდა. მათ იფიქრეს: ჩვენ თუ ხალხს ხელი შევეუწყვეთ ამ გზაზე სასიარულოდ, დავებმარეთ, თავისი ინტერესები, უფლებანი შევაგნებოთ, გაჩნდება ახალი საიმედო ელემენტები, საზრიანად და მტკიცედ მოვიხვეჭავთ კეთილდღეობას და დაცემულ მამულს აღვიდგენთო. გაჩნდნენ ჩვენში სხვა აზრის და მიმართულების მამულისშვილები, რომლებიც ხალხის ბედნიერებისა და ეროვნული იდეის შესისხლბორცებისათვის საუკეთესო საშუალებად სწავლავანათლების გავრცელება, ბატონ-ყმობის მოსპობა, ეკონომიური წარმატება, ვაჭრობა-მრეწველობის ხელის შეწყობა და სხვ. მიაჩნდათ. რომ უკეთ შეეგნოთ, რა იყო ხალხისათვის დროის შესაფერად უფრო საჭირო, ისინი თვალყურს ადევნებდნენ რუსეთის ცხოვრებას და ყოველი პროფესიული მოძრაობა იქაური შეძლებისდაგვარად ჩვენში გადმოჰქონდათ, მცირეოდენი ცვლილებები, მაგრამ ცხოვრებაც იცვლება და დროის შესაფერი ცვლილება რწმენასა და შეხედულებაში საჭირო კი არა, აუცილებელიც არის. იმ დროიდან მოკიდებული ამგვარი იდეა ჩვენ მოღვაწეებს დღემდის ამოქმედებს. საქართვე-

ლოში არ იყო თეატრი. ჩვენმა მოღვაწეებმა დააარსეს თბილისში თეატრი და ახლა საქართველოს სხვადასხვა კუთხეებშიაც კი იზადება სცენის-მოყვარეთა გუნდები, რომლებიც ხალხს წარმოდგენას უმართავენ. „ლიტერატურამ უნდა დაისახოს ცხოვრებასთან დაკავშირებული ლოგიკური მიზანი“ ამბობს დანიის კრიტიკოსი ბრანდესი. ახალმა ხანამ წარმოშობა მწერლები, რომლებმაც შეიგნეს თავისი დანიშნულება, ლიტერატურა ცხოვრებას დაუკავშირეს, დაიწყეს ამ ცხოვრების ახსნა, სხვადასხვა პრაქტიკული კითხვების წამოყენება, გადაჭრა და დროის შესაფერი აზრების ცხოვრებაში გატარება. ჩვენმა ლიტერატურამ ამგვარი მიზანი დღემდის შეირჩინა და დღეს მას უფრო ვრცელი სარბიელი აქვს, ვიდრე აქამდის. დაიწყო რუსეთში მოძრაობა გლეხობის გასათავისუფლებლად. ამ მოძრაობამ ჩვენშიაც იჩინა თავი. ჩვენშიაც აღორძინდნენ დასები, თუ შეიძლება ეს სახელი ვუწოდოთ იმ პატარა წრეებს, რომლებიც მაშინ საზოგადო ასპარეზზე გამოვიდნენ სამოღვაწეოდ და გლეხობის განთავისუფლებას ნიადაგის მომზადება დაუწყეს. ისინი ცდილობდნენ, ბატონყმობა მოესპოთ და „საზოგადოებრივ ცხოვრებაში თავადაზნაურობის წარმატების პრინციპი დაემკვიდრებიათ“<sup>1</sup>.

ხელოვნურმა ლიტერატურამაც ხმა ამოიღო და სანტიმენტალურ-ტენდენციური გზა აირჩია. განთავისუფლდა გლეხობა და ამასთან მოჰყვა ხალხის გასანათლებლად ზრუნვა, ნელ-ნელა სასწავლებლების გახსნა სოფლებში. სამოღვაწეო ასპარეზზე ახალი მოძრაობა დაიწყო, რომელიც უარყოფდა წოდებათა განკერძოებით ყოფნას. მხოლოდ ერთი რომელისამე წოდებისათვის ზრუნვას და მისი სიმპათია ყველასათვის ერთნაირი უფლების მინიჭებისა და დემოკრატიული წეს-წყობილებისაკენ იყო. ხელოვნურმა ლიტერატურამაც მიმართულება იცვალა და რეალურ გზას დაადგა<sup>2</sup>.

მეცხრამეტე საუკუნემდე ქართველობა სოფლის ხალხი იყო. დღეს კი ქართველობა თანდათან ტოვებს მამაპაპურ კერას და ქალაქებისაკენ მიეშურება, მოქალაქეობრივ ცხოვრებას ჰკიდებს ხელს. ეს მიმდინარეობა ქართველობისა, სოფლიდან ქალაქისაკენ, რამდენიც დრო გადის, იმდენი უფრო მატულობს, იზრდება. თუ მეორმოცე წლებში საქართველოს დედაქალაქში ქართველობა მეხუთედ იქნებოდა იყო, დღეს თითქმის ნახევარია. საქართველოს ყოველ ქალაქში შედარებითი რაოდენობა ქართველთა და სხვა ტომთა შორის თანდათან კლებულობს ე. ი. ქართველობა მატულობს, რიცხვით

<sup>1</sup> იხ. „კვალი“ 97 წ. № 46

<sup>2</sup> *ibid.*

სხვა ტომს უთანასწორობა და შემდეგ, მგონი, კიდევ გადააჭარბოს. დღეს ქართველობა სამშობლოს ვიწრო ფარგალსაც გასცილდა და განჯაში, ერეკანში, ბაქოში მიეშურება; ამასაც აღარ სჭირდება და ზღვას იქითაც მიდის ბედის საძებნელად.

მეცხრამეტე საუკუნემდე საქართველოში ვაჭრობა-მრეწველობა უცნობი ხილი იყო. თვით ის გარემოება, რომ ჩვენში მუდმივი ჯარი არ არსებობდა<sup>1</sup>, ომის დროს ყველა, ვისაც კი შეეძლო, ჯარში უნდა გამოსულიყო, ყოველ გამოკვლევებზე ცხადად ამტკიცებდა, რომ ვაჭრობა მრეწველობა არათუ არ არსებობდა, შეუძლებელი იყო ამგვარ წესწყობილებაში. ეკონომიურად დაბალ საფეხურზე მდგომი ხალხის ტენდენცია სამხედრო ცხოვრებისაკენ არის. ეს ტენდენცია ჩვენმა ერთმა დამოუკიდებლობის უკანასკნელ უამამდე შეირჩინა.----ნებით თუ უნებურად, ეს. სულ ერთია. ფაქტი ფაქტად რჩება ორსავე შემთხვევაში; სანამ ეს ტენდენცია არ დასუსტდებოდა, ვაჭრობა ჩვენი ხალხის გულში არ დაიბადებოდა. მეცხრამეტე საუკუნეში ეს ტენდენცია თანდათან დასუსტდა, გლეხების განთავისუფლების შემდეგ თავის თავს ყველა თვითონ დაეპატრონა, ვაჭრობას და მრეწველობას ნიადაგი მოუმზადა; აღორძინდა, თანდათან ვითარდება, ძველ ცხოვრებას არღვევს, სხვადასხვა წოდებას აღნობს ერთად. რომ ჩამოასხას ის ელემენტები, რომლებიც ევროპამ დაბადა და ქართველობას აევროპიელებს. ეს გარემოებაც, სხვასთან ერთად, ნათლად ამტკიცებდა, რომ ჩვენი ცხოვრება უკან და უკან კი არა, თანდათან წინ მიდის. ერთობის იდეაც იბადება და ძლიერდება. დღეს გონებრივად და ქონებრივად ქართველობა დღითი-დღე წინ მიდის, გაევროპიელების გზას ადგას. რის შესახებაც ირაკლი II მხოლოდ ოცნებობდა: ჩვენს ეროვნებას ნიადაგი კი არ ეცლება, პირიქით, ასე მტკიცე, როგორც დღეს, სხვა დროს არც კი ჰქონია და, თუ ამ გზით ვიარეთ, რაშიც ეჭვი აღარ არის, ორგული, რამდენსაც უნდა ცდილობდეს და ლაპარაკობდეს, ამ ნიადაგს ვერ დაგვისუსტებს, რადგანაც მას ისტორიული პროცესი აშენებს და ამაგრებს.' ახლა უკან მივიხედოთ და ჩვენ თავს დავეკითხოთ, როგორი ბიჭი წადგა წინ საქართველომ მეცხრამეტე საუკუნეში? პატარა, ევროპასთან შედარებით, რაც ის იყო მეთვრამეტე საუკუნის ბოლო ხანებში. ჩვენი დროის ქართველობა დღითიდღე მეტ იმედს იძლევა, დღითიდღე ემჩნევა, რომ მომავალი აქვს; მეცხრამეტე საუკუნის ქართველობამ საკუთარი ძალღონით მოიჩინა დასწრებული ორგანიზმი, გადაარჩინა, თავი მოსპობას, გაჭრობას და ახლა თანდათან წელში იმართება. მისი

<sup>1</sup> ირაკლი II დაარსა, მაგრამ მას შემდეგ ისევ დაიშალა.

ცხოვრება მოწინავე ერთა ცხოვრებას ემსგავსება. ქონებრივად და გონებრივად ევროპიელდება.

\*

პირველი რიგის პატრიოტულ ლექსებს ეკუთვნის, სხვათა წორის, „პოეტი და ჩვენება“. ბევრისაგან გამეგონა ამ პოემის ქება, მაგრამ პირველად რომ წავიკითხე, მოლოდინი არ გამიმართლდა. უსათუოდ ვცდები-მეთქი, ვიფიქრე და რამდენჯერმე გულდასმით გადავიკითხე, მაგრამ უფრო დავრწმუნდი, რომ მამიას დიდი პოემის შექმნის ნიჭი არა აქვს. ჩვენთვის ყოველ ექვსგარეშეა, რომ მამიას თავისი ფიცის იდეა დემონის ფიცმა შთააგონა, და, მხოლოდ ამ ფიცის შესახებ არის მართალი ბიოგრაფის სიტყვები: „ღვთაებრივი ძალა შეეხო მამიას მხოლოდ რამოდენისამე წამით, მაშინ როდესაც ქმნიდა იგი „პოეტსა და ჩვენებასო“; რადგანაც ცარიელი ფიცი პოეტს უთაოდ ეჩვენა, მოინდომა თავის მოკერება, შექმნა ნაძალადევად ფანტასტიური პოემა და ძალიან წააგო. პოემა განიყოფება ორ ნაწილად, პირველია პოეტისა და ჩვენების საუბარი, მეორე — ფიცი; პირველი ხელოვნებასა და პოეზიას მოკლებულია; შეხვდებით შიგ ისეთ უხეირო შედარებებს, როგორც, მაგალითად:

როგორც რომ მთვარე ღამის შოგზაურს  
ბნელსა უნათებს, აჩვენებს გზასა,

როგორათაც მზე განათხულისა  
ფაქიზსა სხივებს უხეებით აფრქვევს.  
ეგრევე შენ უნდა ხალხისა კირი  
შემოიკრიბო, კისრათა იღო.

ფიციში კი მამია ნამდვილი პოეტია, მშვენიერი ხელოვანი: გვიხატავს ნათლად სურათს, გვიბადებს წრფელ და ქეშმარიტ გრძნობას. გვინთებს გულში იმ ცეცხლს, რომელიც მის კალამს სულს უდგამდა. თვითონ ენაც იმდენად მძლავრია, ექსპანსიური და მხატვრული, რომ შთაბეჭდილებას გვიორკეცებს. მაგრამ რამდენადაც მძლავრია ფიცი ცალკე, იმდენად უაღაგო და უფერულია მთელ პოემაში. ამგვარი პოემისათვის ასეთი ფიცი წასახდენი არ იყო. მოიგონეთ დემონი. ციდან დევნილი ობლად დადიოდა ქვეყანაზე და თავის გრძნობებს, „მსოფლიო ტანჯვებს“ მით იოკებდა, რომ „განუცხრომელათ შურსა თესავდა“, მაგრამ „ბოროტებაც ბოლოს შეძაგდა“. თვალწინ განუშორებლად უდგა ნეტარი დრო, სამოთხეში გატარებული; ტანჯვა ვერაფრით დაეამებია, მწარე ფიქრებს ვერსად დამალვოდა, ამ დროს პირველმა სიყვარულმა გული გაუთბო, დაებადა

იმედი; თამარის ერთი სიტყვა მას „კეთილობას, თვით ზეცის ც“ დაუბრუნებდა, ოღონდ კი მან დაარწმუნოს თამარი თავისი გრძნობის სიწრფელესა და კეთილის მტრობის დაგდების სურვილში. ამის შემდეგ მისი ფიცი, რაც უნდა გადაჭარბებული იყოს, მაინც ბუნებრივი და წრფელის გულიდან წარმონადგენი იქნება: რაც უნდა გააზვიადოს, მაინც ვაპატივებთ, თუ მის მდგომარეობაში შევალთ. მამიას ფიცი კი პოემაში უალაგოდ მიგვაჩნია. გასაოცარია სწორედ, რისთვის დასჭირდა პოეტს ასეთი მრგვინავი სიტყვები: წინაპრების ძვლების საფლავებში შეშფოთება, როდესაც ჩვენება მისებური სიტყვის მეტს არაფერს ითხოვს? ჩვენება თვითონ მორბის მასთან და პოეტი მას სრულიადაც არ ეძებს; იმის მაგიერ, რომ ჩვენებას მიმართოს თხოვნით, პოეტი ეგება მას ფეხქვეშ და უშველებელ ფიცს აძლევს.

პოეტი ჩაფიქრებული ზის; გამოეცხადება ჩვენება და, აი, რა სიტყვებით გაუმასპინძლდება მას პოეტი:

ეშმაკის ელჩსა მიემსგავსებო,

როცა ჰაერში მზიარულდები,

რა იცი მაშინ, მე აქ რა მჭირდა.

ვკვდებოდი, ვმღერდი, ან თუ მარჩობდენ, — და

შემდეგ ირონიულად დასძენს:

არ შეიძლება, გაგვაგებოთ

იქ, თქვენსა, ლმერთნი რაზედ ჰფიქრობენ?

ამჟერაა, პოეტს ჩვენების მოსვლა დიდად არაფრად ეამა. მამ, არც მისი წასვლა უნდა წყენოდა. მაგრამ დააპირა თუ არა ჩვენებამ წასვლა, ამპარტავანი პოეტი ერთბაშად სრულიად გამოიცვალა, მორთო ყვირილი, „წინ უვარდება მუხლმოდრეკილი“ ჩვენებას და შებრალებას თხოვს. ასეთ მოულოდნელ და გასაოცარ ცვლილებას, აი, როგორ გვიხსნის პოეტი: „მწეს ვერ ვხედავდი ჩემს განკარგულებაში და მხოლოდ ხმიანი მჭირდა მგრძნობიო“. ეს რომ მართალი იყოს, „ზეცისა შვილათ დანასახავი“ ჩვენების მოვლენა აალიან უნდა გახარებოდა; ჩვენ კი ვნახეთ, როგორც მიიღო. ამგვარი თავისმართლება ტყუილია; პოეტი გულწრფელად არ მოიქცა. მიზეზი სულ სხვა იყო: მის გულში იმხელა ფიცი აღარ ეტეოდა და შემთხვევას ეძებდა, რომ ვისმეს წინაშე წარმოეთქვა, შემთხვევა გამოუჩნდა, მაგრამ მოუფიქრებლობით ხელიდან გაუშვა. რაღა ექნა? ერთი გზალა დარჩენოდა უნდა მსახიობის ქურქში გახვეულიყო და სცენიურად თავი მოეკატუნებია. პოეტიც ასე მოიქცა და ჩვენება მოაბრუ-

ნა მხოლოდ იმისათვის, რომ თავისი ფიცი წარმოეთქვა მის წინაშე. ფიცი რომ ძალათი შეაჩეჩა პოეტმა ჩვენებას, იქიდანაც ჩანს, რომ ჩვენება არავითარ ფიცს არ ითხოვდა; ის არ გაჭინიანებულა, ბევრი ნვეწნა არ დასჭირვებია, მალე შეურიგდა პოეტს, უმეგობრდება კიდევ და ეუბნება:

თუ სიტყვას შენებურს დადებ,  
ნ-ვს ღონიერსა უმცრად აშრომებ.

ტანზედ საცმელად სახელოვნებას  
შეგიკერეინებ თითონ სიბრძნესა;  
ვანგიოქვამ ცოლნას და ხელოვნებას,  
შენს ბედს ვანატრებ მსოფლიო ერსა და სხვა.

აშკარაა, როცა ჩვენება ეუბნება, „თუ სიტყვას შენებურს დადებო“, ამით აღიარებს, რომ ის პოეტს ძალიან კარგად იცნობს და მისი ერთი სიტყვა მისთვის სრულიად საკმარისია, რომ ის უკვდავი გახადოს. როცა პოეტმა აღუთქვა, ოლონდ მიბრძანე და ყველაფერში შენი მონა ვარო, ჩვენება თავის სიტყვას უარყოფს და ეუბნება:

...მაშ, შემომდიცე,  
რაც სიცოცხლეზედ მეტად გიყვარდესო.

ყოვლად შეუძლებელია, რომ ჩვენებამ ზემონათქვამს შემდეგ კიდევ ფიცი მოითხოვოს. ამ სიტყვებს ძალით ათქმევინებს პოეტი ჩვენებას, რადგანაც უსათუოდ უნდა, ფიცი გაასალოს და მისი ჯავრი არა აქვს, თხოვენ თუ არა.

აქვე უნდა გამოვტყდეთ, რომ პოეტი ისე მოტყუვდა ჩვენებაში, როგორც დონ-კიხოტი. რომელმაც სოფლის გოგო პოდოსელ დულცი-ნეად მიიღო. პოეტს ჩვენება „წმინდა. ზეცისა შვილათ დანასახავი, უმანკო სული ეგონა, ის კი, ჩვენი აზრით, უფრო „ქმეკელა ქალს“ წააგავს, რომელსაც პოეტთან დამეგობრების სურვილი აღარ აყენებს. ის მოვიდა, ვითომ პოეტის ნეგეშისსაცემად; როდესაც პოეტი ხელეგ გატოტრინებული არ დაუხვდა, გაბრუნდა, მაგრამ შემთხვევა მიეცა, მალე გამოტრიალდა და ვითომდა წყრომით უთხრა პოეტს:

...შეგირიგდებო,  
სულ დაეიფიყებ, რაცა იყბედე.

დამიხედეთ „ზეცისა შვილათ დანასახავს!“ ამგვარი ლაპარაკი ენაწაგდებულ დედაკაცს კი შეშვენის, მაგრამ ზეცის უმანკო არსებას კი არა. როცა პოეტი მის წინაშე ჯვარს ეცემოდა და გრგვინავდა, ჩვენებამ, არც აცივა; არც აცხელა, შემოხვია ყელზე ხელი და გული-

ანად შუბლი დაუეოცნა. სრული უფლება გვაქვს, ვიფიქროთ, ის მხოლოდ ამიტომ გამოუცხადა პოეტს და არა იმისათვის, რომ, —

წუგეში ვცა  
გამოეყვანა ყოელის საფრთხილამ,  
ტანჯულისათვის ხმა გამოეცა.

ამგვარად, პოეტიცა და ჩვენებაც ორივე ერთმანეთს ატყუებენ: პოეტმა ვითომ მისთვის მოაბრუნა ჩვენება, რომ მუდამ მისი სიტყვა აესრულებია, ნამდვილად კი — მარტა ფიცის წარმოთქმა უნდოდა; ჩვენება ვითომ მისთვის მოვიდა, რომ, —

გამოეყვანა ყოელის საფრთხილამ:

ნამდვილად კი მისი მიზანი სულ სხვა იყო. შეიძლება გვიპასუხონ: პოეტის ფიცმა ისეთი მძლავრი შთაბეჭდილება მოახდინა მასზე, რომ აღტაცებაში მოსულმა თავი ველარ შეიკავაო. მაშინ კოცნა და გაქცევა რაღა იყო? თითქოს თავის საქციელისა თვითონვე შერცხვაო. თუ ჩვეულებრივი ზრდილობის კანონს არ ემორჩილებოდა, ადამიანის ცოდვილი ბუნება მაინც კარგად უნდა სცოდნოდა ღვთიურ არსებას; უნდა სცოდნოდა, რომ მისი კოცნა პოეტს „კი არ უშველიდა, მახვილს ახვედა“, და ასეთი დიადი მომენტი, როგორც ღვთიური ნიჭით უგნურებასთან პირობის დადებაა, პირუტყვეულ გრძნობათა აშლით არ უნდა შეელახა; მაგრამ საქმე იმაშია, რომ ეს „უმანკო, ზეცისა შვილათ დანასახავი ჩვენება“ ის არ არის, რაც პოეტს ჰგონია, საექვო ფიზიონომიისა და მისი საქციელიც საექვო არის. ჩვენების შესახებ თუ ასე გავაგრძელებთ სიტყვა, მხოლოდ მისთვის, რომ მკითხველისათვის შემდეგ გარემოებაზე მიგვეთითებია: მამიას არ ეხერხება მომქმედი პირების დახასიათება, ის არ არის ფსიქოლოგი, და თითქმის ყველა თავის მომქმედ პირში ხედავს იმ თვისებებსა და ღირსებას, რომლებსაც ისინი მოკლებული არიან.

\*

მეორე რიგის პატრიოტულ ნაწარმოებს, რომელშიაც პოეტი ცდილობს გულგატეხილი პატრიოტის დახატვას, ეკუთვნის დიდი პოემა „რაშიდ ვარდან-ოღლი“. ზევით, როცა „პოეტი და ჩვენების“ შესახებ გვქონდა ლაპარაკი, ის აზრი გამოვთქვით, რომ მამიას პოეტური ფანტაზია სუსტია, მას დიდი პოემების შექმნის ნიჭი არა აქვს-მეთქი, მთელი ეს მეორე პოემა ამ აზრის საუცხოო დამამტკიცებელია. შუბლშეკმუხვნილი რაშიდი, იმგვარი გამომეტყველებით, რომელიც შინაგან ძრწოლას, დარდიანობას მოწმობს. ზღვას გადაჩრებია და ელის: როდის იქნება, მკითხველმა დამინახოს, რომ დავიწყო

3. ი. გომართელი, I ტ.



ბარემ ჩემი მონოლოგიო. დავინახეთ, იმანაც დაგვინახა და მოჰყვა თავის ლოცვას, რომელშიაც ლოცვის მეტი ყოველისფერია. გგონიათ, რომ მის სიტყვებშიაც იგივე სევდა იქნება ჩასკვნილი, რომელიც მის სახეზე არის აღბეჭდილი, მაგრამ ტყუედებით:

სიამოვნებით მეტისმეტითა  
სისხლი მიღელავს, გული მიხტება. —

გეუბნებათ რაშიდი. როცა ამგვარად დაგვამშვიდა, თუმცა სახე დაღვრემილი მაქვს, მაგრამ ჩემი ჯავრი ნუ გაქვსთ, ეს ისე მომდისო. ზღვას ეკითხება სამშობლოს ამბავს და, პასუხი რომ არ ესმის, მოახტება ცხენს, ქუდს გატყორცნის და ქოჩრის გლეჯით დაეშვება ძირს, შეცურდება ზღვაში და ისევ გამხიარულდება.

სიმღერას იწყებს, ხმა ყელში დგება  
მხიარულობის აღსავსეობით.

ერთი მიბრძანეთ, ეს რომელი საგიყეთის წევრია, რომ ერთ წამს ნაღვლიანად იბღვირება, მეორე წამს მღერის, მესამეს—ქოჩორს იგლეჯს? დაიღალა რაშიდი ცურვით, ღონე გამოელია. აქ პოეტი მალავს მას თქვენი მხედველობიდან და აფხაზეთის ბუნების მეტად სუსტი აღწერის შემდეგ, რომელიც სიტყვათა ცარიელ კრებას წარმოადგენს და აფხაზეთის ბუნების ნათელ წარმოდგენას არ გვაძლევს, პოეტი ჩვენ თვალწინ ფარდას ახდის და ერთ კოშკში ლამაზ ვისიასა და რაშიდს ერთად დაგვანახვებს. სრულიად გაუგებარია, რისთვის დასჭირდა პოეტს მთელი შვიდი წინა თავი? დანარჩენ პოემასთან მას არავითარი კავშირი არა აქვს, მასში არ არის კვანძი პოემისა, არ არის დახასიათებული უმთავრესი გმირი; მოგვაჩვენა პოეტმა სერზე მდგომარე, ჩაახტუნა ზღვაში და ისევ დამალა. ბარემ რალზე აჩენდა? ეს შვიდი თავი რომ არ ყოფილიყო, პოემას არა დააკლდებოდა რა, რაშიდიც უკეთეს შთაბეჭდილებას მოახდენდა მკითხველზე. ახლა აი, სანამ კარგი მხრით გაგვეცნობოდა, თავისი ცუდი მხარეები დაგვანახვა, შეგვატყობია, რომ ცოტა ქარაფშუტა ყმაწვილია და ცდილობს, რაც არ არის, იმად შემოგვატყუოს თავი. მკითხველი, რომელიც ყოველ ნაწარმოებში ხელმძღვანელ იდეას ეძებს, ამაოდ დაიწყებდა თავისმტკრევას და, ვინ იცის, ამ პოემას რა იდეას არ დაამისებდა. ჩვენი აზრით, პოეტს არავითარი იდეის გატარება არ ჰქონდა სახეში; მას მხოლოდ უნდოდა დაეხატა გულგატეხილი პატრიოტის ტიპი, როგორსაც ის თანაუგრძნობდა. ახლა ეს ვიკითხოთ, როგორია მისი გმირი და როგორ შეასრულა პოეტმა თავისი მიზანი?

პოეტს რომ რაშიდი პატრიოტული გრძნობით არ დაეჯილდოებინა, იმ გრძნობით, რომელსაც მამია ძალიან მაღლა აყენებდა და ურომლისოდაც არავის ადამიანის სახელის ღირსად არ თვლიდა, პოემის ზოგიერთი ალაგები<sup>1</sup> რომ არ გვიმტკიცებენ, რომ მამია რაშიდში მცირეოდენადაც თავის თავს გულისხმობდა, მაშინ ყოველ ექვეგარეშე იქნებოდა, რომ მამიას სურდა დაეხატა ქარაფშუტა, ამაო ოცნებებზე შეშლილი კაცის ტიპი. ზემოაღნიშნული მოსაზრება კი ყოველ ექვეგარეშე გვეყოფს, რომ მამიას თავისი რაშიდი უყვარდა, მოსწონდა და, თუ დაგვიხატა, იმ მიზნით, რომ ჩვენც შეგვეყვარებოდა და გვეხილა მასში ნამდვილი სიმპათიური მამულიშვილი. სამწუხაროდ, მამიამ თავის მიზანს ვერ მიაღწია: მისი რაშიდი ერთობ სუსტი და საბრალო გამოვიდა. ვახვეულა ჩაილდ-ჰაროლდის ქურქში, რომ „დარბაისელს, ბრძენს, გამოცდილს“ დაემსგავსოს და ცდილობს, თავისი თავი სოფლისა და ბედის მომდღურავად გვაჩვენოს. სარკეში რომ ჩაეხედა, უსათუოდ დაინახავდა, რომ ჩაილდ-ჰაროლდის ტანისამოსი მას სრულებით არ უხდებოდა. როდესაც ადამიანის გულში შინაგანი ძრწოლაა, სევდას დაუსადგურებია, მაშინ ამგვარი პირისახე და ენა ერთმანეთს თავისთავად ძალდაუტანებლად ეთანხმებიან. ამგვარი ადამიანი, ხშირად უნებურადაც, თავის ნალაპარაკეებში თან ატანს ნალევლს და სევდა-ვარამს და მისი სიტყვებიც გიმტკიცებთ, რომ მისი სახის გამომეტყველება სცენიური, ხელოვნური კი არ არის, ბუნებრივი შედეგია მისი ფსიქოლოგიური მდგომარეობისა. რაშიდის ენა კი მისი სახის მტერია, ყოველ ნაბიჯზე მას ამტყუნებს. როცა რაშიდის სახე სოფლის მომდღურაობას ჩემობს, ენა გვეუბნება: არ დაუჯეროთ, რაშიდს ძალიან მოწონს დროსტარება, ქეიფი და განცხრომა ხოლო თქვენი მოტყუება უნდაო. რაშიდი ცდილობს ამგვარი ხერხით მეტი შთაბეჭდილება მოახდინოს მაყურებელზე, მაგრამ ვისია პირველ შეხედვაზედვე ატყობს, რა გორის ნაცარიც არის, და ეუბნება:

სულ არ გეტყობა  
შენ ამა ქვეყნის მომდღურაობა.

რაშიდი ფიქრობს, ალბათ დამაკლდა, ცოტა რომ კიდევ მოვიქმუხვნო წარბები და ცხვირი ჩამოვუშვია, მაშინ კი შემეტყობაო. ხმას გაიკმიდავს და „სევდის ჩრდილით“ სახეს მოიბურავს. როცა ხმითაც ვერას გახდა, გადაწყვიტა, მოდი ერთი ჩემს თავსაც ვუქებო,

<sup>1</sup> XXXV თავი და რაშიდის სამართალში მიეცემა, რომელიც პოეტის 1390 წ. სისხლის სამართალს მოგვაგონებს.

და, როგორც პოეტმა თითქმის ძალადობით გაასაღა ჩვენებასთან ფიცი. ისე რაშიდსაც სულმა ველარ მოუთმინა და, თუმცა ვისიას სრულებით არ უთხოვია, სიტყვაში გამოუჩრია:

ვარ... მცოდნე ბევრის ამბების  
და, თუ შიბრძანებ, გაიმზობ რასმე.

ვისიას რომ თანხმობა არ გამოეცხადებია, მისი ცოდვით წაწყდებოდა. აუშვა რაშიდმა ენა, ხან ოსმალურად მოჰყვა, ხან ჩერქეზულად. აქოდა, სხვადასხვა ენები ვიცო; მაცდურად და მოხერხებულად „თქმის საგნებსა ცვლის“. ასე ილაპარაკა თუ არა რაშიდმა მთელ ერთ ღამეს, რა ვიცით, ხოლო მეორე დღეს ჩვენ ვხედ: ვთმას და ვისიას მუხის ქვეშ, სადაც რაშიდი მას თავის თავგადასავალს უამბობს და თავის თავს საარაკო დევგმირად უსახავს:

გატაცებული კაცსა და ცხენსა  
ერთის შემოკერით გავაორებღო.

ასე ხომ ტარიელიც არ კვებულობდა, თუმცა მან ბევრგან საქმით დავგიმტკიცა გასაოცარი ვაჟკაცობა, რაშიდი კი ცარიელის სიტყვაობით გვიმტკიცებს, შეგვატყობია მთელი თავისი წარსული, რომელიც ომისა და გარუწყვეტელი ქეიფის მეტს არას წარმოადგენდა; დაგვარწმუნა, რომ ქეიფში მშვენიერი „ძმა-ბიჭი“ იყო, ამა სოფლისა ცხოვრება და განცხრომა ძალიან მოსწონდა. უბრალოდაც არსად წამოცდენია, რომ „შაებელს ეწამებოს“; გაათავა თუ არა მოთხრობა, გაახსენდა. რა როლსაც თამაშობდა და გააბა ღრიალი:

სიყრმიდან შაებელს ეუწამებივარ  
და ვერ ვახერხებ, თავი წავაგო.

ახა. ღმერთო! ფიცი მწამს, ბოლო მაკვირვებსო, სწორედ ეს არის. თუ გნებავთ: რაც არ მომხდარა, იმას იგონებს, რომ თავი სხვანაირად გვაჩვენოს. თავის სევედიანობაში დაგვარწმუნოს; ფაქტები ხელთ ექნებოდა და ის დაავიწყდებოდა? შემოიგლიჯა ტანისამოსი, ალბათ მიტომ, რომ თავისი „გათლილი, სპილოს მსგავსი ნახსმებით“ ვისია გაეოცებია, გადარეულსავით მოახტა ცხენს და ჰაიდა! რაშიდის ამგვარი მოქმედება სრულიად გაუგებარია და ამტკიცებს, რომ მან ყველაზე უმალ პოეტი მოატყუა: მამიას მართლა ჩაიღ-ჰაროლდისებური ტიპის გამოყვანა უნდოდა, მაგრამ რა ვქნათ, რომ ბუნება მეტად უსამართლო და ახირებულია: დიდი პოეტის კალამი მის ნიჭზე მაღლა დგას. პატარა პოეტის კალამი კი დაბალ ნიჭზე დაბალია და მის ფანტაზიაში გამოხატული სუსტი გმირი ქალაქზე ნამდვილი

მასხარა გამოდის. „დამოკიდებულება პოეტსა და მის გმირებს შორის ის პუნქტია, რომელზედაც უნდა გამოაშკარავდეს ყოველი მისი სუსტი მხარე, როგორც ადამიანის, ანუ როგორც ხელოვანისა“, ამბობს ბრანდესი. და მართლაც, ამგვარი პუნქტები ლალატობენ მამიას და გვიმტკიცებენ, რომ მისი ხელოვნება სუსტია; მას შეუძლია ხანდახან მშვენიერად აგვიწეროს ბუნება, როგორც მაგ., „კარჩხალის მთები“, მაგრამ, რაც შეეხება გმირების დახასიათებას, აქ სრულიად უძლურია და ამიტომაც მისი პოემები ძალიან სუსტი და უფერული არიან. მთელი ეს უკანასკნელი პოემა და განსაკუთრებით XVIII თავი ამტკიცებს, რომ პოეტს რაშიდი მართლა „მძინარე ლომად“ მიაჩნია, მოწონს; მასში კი, როგორც დავინახეთ, მოსაწონი მცირეოდენიც არაფერია; ის სიბრალულს კი გამოიწვევს მკითხველში, მაგრამ თანაგრძნობას ნურავისაგან ნუ ელის. რა არის ამის მიზეზი? ერთი თვით ბუნება რაშიდის: ის არის უხასიათო, ქარაფშუტა, ჭკუამჩატე, თავისთავის შესახებ დიდ აზრის მექონე; რაშიდობას, მგონი ძალიან ცოტა ინატრებს; მკითხველს კი ყოველი გმირი მხოლოდ მაშინ მოწონს, თუ მასში ხედავს თავის მსგავსებას, ან ისეთ ადამიანს, რომლისთანაც უნდა რომ იყოს, რომელსაც ჰბაძავს, შენატრის. მეორე—რაშიდის პატრიოტიზმი დაობებულია, ძველი, და არა თანამედროვე ცხოვრებისაგან წარმოშობილი; თანამედროვე ცხოვრების მსვლელობა რაშიდს არ ესმის. როდესაც ჩვენი მეთაურები დიდი ხანია გვეუბნებიან: საქართველოში ამდენი საკეთებელი და მასთან ნაყოფიერი მადლიერის საქმე არაოდეს არ ყოფილა როგორც დღეს არის; მოდით და, თუ კეთება გინდათ, აი, ეს აკეთეთ. აი, ესო. რაშიდი გვარწმუნებს, სამშობლო უზომოდ მიყვარსო, ამავე დროს წუწუნებს „სამშობლოსაც არად ვარგივარ, მძლავრი მკლავები მის შესაწევნათ ვერ მიხმარიაო“ და გაიძახის: „სისხლი მწყურია შარბეთის ნაცვლადო“, ამით ის გვიმტკიცებს, რომ ჩვენი ცხოვრების ვითარება მას არ ესმის, ვერ შეუგნია; ჰგონია, თუ ისევ ძველებურ, პატრიარქულ ხანაში დგას საქართველო. ახალ ცხოვრებაში მართო რაშიდის მკლავები ველარაფერს ხდება; მას ამის მიზეზი არ ესმის, სასოწარკვეთილებაშია და უკვირს, წინათ თუ ვარგებდი სამშობლოს მძლავრი მკლავებით, ახლა რატომ აღარ ვარგივარო. ამისთანა კაცს ჩვენ ვერც უკან ვაფხვებით, ვერც თანაგრძნობას გამოვუცხადებთ, ვერც მოვიწონებთ, დარიგებით კი ასე დავარიგებთ: ჩემო რაშიდ, აქამდის სადათას ძილით გძინებია; თუ მამული გიყვარს და გინდა, მას ემსახურო, ჯერ კარგად შეიგენი, როგორი სამსახური ეჭირვება დღეს მამულს და შემდეგ საქმესაც იზოვნითო. ჩვენი ცხოვრება იმისთანა აღარ არის, როგორიც შენ გგონია; საკეთებელი ბევრია,

ხოლო სხვაგვარი საკეთებელი; შენი წუწუნის მიზეზი კი ის არის, რომ ჭერ ვერ გამოფხიზლებულხარ-თქო.

მამიას თანამედროვე ქართველ მწერლობაშიაც ბევრი მიმდევარი ჰყავს. საქართველოს ახლანდელ ცხოვრებაზე დამაპატარავებელი შუშით მზერა, აწმყოს კრულვა და ქოლვა, წარსულის ხვნე-შით და ოხვრა-კვნესით მოგონება ჩვეულებრივი თემაა ზოგიერთი ჩვენი ხელმოკლე მოლექსებისა, რომლებიც თანამედროვე ცხოვრებას ემდურებიან და ამ ცხოვრებას კი იმდენად იცნობენ, რამდენადაც რაშიდი.

რომ ცილი არ დაგვწამონ, აქვე ვიტყვით, რომ სრულიადაც არ უარგყოფთ პატრიოტული ლექსების მნიშვნელობას. მაგრამ ისეთი პატრიოტული ლექსებისა, რომელიც წინ გვითითებს, მომავალს უგალობს და არა უკან იხედება და წარსულს შესტირის. მეორე მოქმედი პირი „რაშიდ ვარდან-ოღლში“ არის ვისია. თავიდან ბოლომდე ამ ქალის ხასიათი გასაოცარი და გაუგებარია. ერთ ალაგას რომ ერთნაირად დაგვიხასიათებს მას პოეტი, მეორე ალაგას სრულიად სხვანაირად; როგორც თვითონ ნებავს პოეტს, ისე ალაპარაკებს და ამოქმედებს, მაგრამ ვისიას მით შეუძლია თავი ინუგეშოს, რომ მამიას ყველა გმირი მასთან ერთ ტაფაში იწვის: როგორც მამიას ნებავს, ყველა ისე ირჩება. თავში ვისიას პოეტი ასე აგვიწერს:

ქალი წყეული,  
იმის მსგავსი არაა არს ცაში,  
არც ჭოჭოხეთში მისებრ გრძნეული.

მისი სილამაზის სახელი შორს იყო გავარდნილი.

ჩვეულნი ვაყნი ქართლ-კახეთიდან  
იმერ-აფხაზთა გმირნი, მესხეთის, —

სუყველა მასთან მიისწრაფვოდა, ვისია ყოველგვარ ღონისძიებას ხმარობდა, რომ ისინი ტრფობის ალით დაეტანჯა და მათი გული სამუდამოდ დაემორჩილებია, მხოლოდ იმისათვის, რომ

ამით ღროს კვლიდა, შეექცეოდა, —  
თორემ გრძნობებით წმინდისა ტრფობის,  
მის გულს ვერ ოდეს შეეხებოდა.

ამისთანა ადამიანს პოეტი მას შემდეგ „ჭერ განურყვენელ წმინდა სულს“ უწოდებს! ან მამიას ღროს „განურყვენელი წმინდა სული“ სრულიად სხვა მცნებას აღნიშნავდა, ან არადა, ვისიას ხასიათი თვით პოეტმაც არ იცის კარგად, და ჩვენ როგორღა გავგვაგებებებს? წარმოიდგინეთ, ამდენ გამორჩენილ გმირებში ვერც ერთმა ვისიას

გული უბრალოთაც ვერ გამოიხმაურა, თორემ სიკეარული — კიდევ მაღლობა ღმერთს ვისიასათვის ყველა ერთი იყო, ყველას განურჩევლად უხვდებოდა, რადგანაც მხოლოდ დროს მოკვლა და შექცევა უნდოდა; მათი ტანჯვა სიცილადაც არ ჰყოფნიდა: რაშიდის მოსვლა რომ მას გოგომ შეატყობია, ვისიამ იფიქრა, შეიძლება რომელიმე სახელგანთქმული ჭაბუკი მოვიდა ჩემი გულის ტყვედ მოსატაცებლადო, და ხარხართ დასძინა:

ეს თუ ნამდვილად მან განიზრახა,  
საბრალო, ოჰ, რა ტყვილად შეცდება!

ამის შემდეგ აშკარაა, რომ ვისია არათუ ახირებულად არავის შეიყვარებს, პირდაპირ—მის ბუნებას სიყვარული არ შეუძლია. როდესაც რაშიდს მიიღებს და ემუსაიფება, მის ლაპარაკში ნათლად გამოსჭვივის რაღაც დამცინავი კილო და თავისი უპირატესობის გრძნობა; ასე უნდა ყოფილიყო, რადგანაც ის გამჭირიახი გონების ქალი იყო, საუკეთესო ვაჟკაცობის ბუნება შესწავლილი ჰქონდა და მალე შეამჩნია, რომ დერვიშის ტანისამოსი, დაღვრემილი სახე, ვითომც ფილოსოფობის გამოსახატავად, სოფლის მომღურაობა,— რაშიდს არ უხერხდებოდა. რასაკვირველია, რაშიდი ვერავითარ შთაბეჭდილებას მოახდენდა იმისთანა ქალზე, რომელსაც მთელი საქართველო-აფხაზეთის საუკეთესო გმირები გულმოკლული გაუსტუმრებია. მიუხედავად ყოველივე ამისა, სწორედ სასწაული ხდება: ვისიას რაშიდი შეუყვარდება,

თავბრუ ესმება;  
ცოტა უკლია გულის წასვლამდის.

ენა ებმება, ცალკ-ცალკე გადაუბმელად ლაპარაკს იწყებს, ხმა უსუსტდება, სრულიად იცვლება, გონებას ჰკარგავს!.. არა, პოეტს არ ესმის თავისი გმირების ხასიათი, იმორჩილებს მათ და, როგორც ენებება, ისე ამოქმედებს. მოინდომა პოეტმა, რომ ვისიამ რაშიდი შეიყვაროს და საბრალო ვისიაც იყვარებს. მამიას არ სწამს ის ჭეშმარიტება, რომელიც ყოველი მწერლისათვის მცნებას უნდა შეადგენდეს: მწერალი უნდა ემორჩილებოდეს მომქმედ პირებს და არა მომქმედი პირები მწერალს.

\*

ჩვენი უპირველესი მიზანი იყო, აღგვენიშნა უმთავრესი თემები მამიას პოეზიისა და გაგვეჩრია ის უფრო შინაარსის მხრივ; ენას, გარეგან ფორმას, აგრეთვე, თარგმანებს ჩვენ არ ვეხებით. როგორც დავინახეთ, ქალი და მამულის წარსულის დიდება მამიას უმთავრესი

თემაა, ჩვენ განვიხილეთ, როგორი შეხედულებისა იყო მამია ქალის დანიშნულებაზე, რას აფასებდა მასში. ჯერ მემკვიდრეობით მამიას ხასიათი იმგვარი უნდა გამოსულიყო, რომ მას თავდაპირველად ქალში გარეგნობა უნდა ეძია. გარდა ამისა, ამგვარი აზრით ზრდიდა მას გურიის არისტოკრატია, რომლის გავლენის ქვეშაც ის იმყოფებოდა; ამგვარ მაგალითებს უჩვენებდა, რადგანაც არათუ მაშინდელი, ახლანდელი არისტოკრატიაც ამგვარი შეხედულებისა არის ქალის დანიშნულების შესახებ. ამგვარი აზრივე განუმტკიცა მამიას სამხედრო წრის ზეგავლენამ; რიგიანი განათლება კი არ მიუღია, რომ ქალის სულიერი მხარისა და როლის შესახებ კაცობრიობის ცხოვრებაში ქვეშარტი შეხედულება გამოერკვია. ამგვარად. ეს პირველი თემა მამიას პოეზიისა პირდაპირი შედეგია ყველა იმ დასახელებული ფაქტორების ზეგავლენისა.

მთავრის ჩამომავალს უსათუოდ მემკვიდრეობით უნდა დაჰყოლოდა ვაჟკაცური სული, თავისუფლებისა და ბრძანებლობის სიყვარული; არისტოკრატია, რომლის გავლენის ქვეშაც მამია იზრდებოდა, წარმოადგენდა მხედრულ წოდებას, ის ყველაფერზე მალა აყენებდა ფეოდალურ თავისუფლებას; აწყობში მას მნიშვნელობა დაეკარგა. წარსულში კი ის სრული ბატონი იყო თავის ქვეყანაში; ამიტომ მას აწყობ სძულდა, წარსულს ნეტარებით იგონებდა და რადგანაც. თვითონ წარსულში დიდებული იყო, მამულის მთელი წარსულიც დიდებულად მიაჩნდა. მამია იზრდებოდა ამ საზოგადოებაში და მის ამგვარ შეხედულებას საესებით ითვისებდა. ამგვარად, ეს თემაც მამიას პოეზიისა ზემოხსენებული ფაქტორების ზეგავლენის ნაყოფია.

მკითხველი უსათუოდ იკითხავს, ორივე ეს უმთავრესი საგანი მამიას პოეზიისა მართო მამიას საკუთრებაა, თუ ამგვარი მიმართულების პოეტები სხვებიც იყვნენ ჩვენშიო. აი, ჩვენი პასუხი: მეთვრამეტე საუკუნის გასულს და მეცხრამეტეს დამდეგს ხელოვნური ლიტერატურა ჩვენში უმთავრესად პოეზიას წარმოადგენდა. პოეზიის უმთავრესი საგანი იყო ქალი, მისდამი ეროტიული სიყვარული, მისი ფიზიკური სილამაზის მკობა. ამგვარ მიმართულებას ჰქონდა აზრი თვით ცხოვრებაში? — უსათუოდ, რადგანაც მაშინდელი წარჩინებული წოდება ამგვარი შეხედულების იყო ქალის ღირსება-დანიშნულებაზე და, რადგანაც ლიტერატურა თითქმის არისტოკრატის მონოპოლიას შეადგენდა, ჩვენი პოეტებაც ამ არისტოკრატის რწმენა-შეხედულებას ატარებდნენ. მეცხრამეტე საუკუნის, დასაწყისში საქართველომ დაჰკარგა თავისუფლება, საზოგადოება რამდენსამე ხანს გამოურკვეველ მდგომარეობაში დარჩა, თითქოს ყოვე-

ლივე, რაც მის გარშემო მოხდა, ან კარგად არ ესმოდა, ან უფრო იმდენად იყო მოქანცული, რომ ყურადღებას აღარ აქცევდა. გაიარა ასე ოციოდე წელიწადმა. თავადობა ყველაზე უმაღლეს გამოერევა, რადგანაც მან ყველაზე მეტი იზარალა; მიიხედ-მოიხედა გარშემო, თვალსაჩინო ნაყოფი ახალი ცხოვრებისა ვერ დაინახა, თავისუფლება კი ხელიდან გამოსცლოდა. მიიხედა უკან და დაინახა, რომ წარსულში მას თავის ქვეყნის ცხოვრებაში დიდი ალაგი ეჭირა; შესამჩნევი მნიშვნელობა ჰქონდა; ქვეყნის მართვაში დიდ მონაწილეობას იღებდა, ისეთი ბატონი იყო, ურომლისოდაც არა კეთდებოდა რა; აწმყოს ჩაუყვირდა და დაინახა, რომ ყოველივე ეს — ძალა, მნიშვნელობა, სრული უფლება, ბატონობა დაუბრუნებლად დაჰკარგა; მას მნიშვნელობა აღარ ჰქონდა, მას აღარავინ რას ჰკითხავდა, — ურომჭრილ მონა-მორჩილად გადაიქცა. ამგვარი თვალის ახელის ბუნებრივი შედეგი იყო, რომ ჩვენმა არისტოკრატებმა აწმყოზე გული აიყარა, შეიყვარა წარსული, აღიღებდა და ნეტარებით იგონებდა იმ დროს, როცა ის სრული ბატონი იყო. ამ ძველი თაობის გავლენის ქვეშ აღზრდილმა ახალმა თაობამაც ამგვარადვე შეხედა ცხოვრებას, დაებადა წარსულის განუსაზღვრელი სიყვარული, მისი დაბრუნების სურვილი და 1832 წ. შეთქმულება მოახდინა; მაგრამ ცდამ ამაოდ ჩაუარა, თავადობას მოლოდინი გაუცრუვდა; ძველი მნიშვნელობის დაბრუნების იმედი მან სამუდამოდ დაჰკარგა. ამ გარემოებამ უფრო გაუტეხა გული აწმყოზე; უფრო შეაყვარა წარსული.

ამგვარ მიმართულებას რომ ლიტერატურაშიაც არ ეჩინა თავი, შეუძლებელი იყო. მით უმეტეს, რომ მაშინდელი პოეტები თავდაზნაურობიდან გამოვიდნენ და არისტოკრატების გლოვასა და წარსულის დიდებას ლიტერატურაში უსათუოდ გაატარებდნენ. როგორც ზემოთ მოვიხსენიეთ, ყველაზე ნიჭიერი წარმომადგენელი ახალი ხანისა ჩვენ პოეზიაში არის ვახ. ორბელიანი, რომელსაც ილია სამართლიანად უწოდებს რომანტიკოსს. ეს მეტად სიმპატიური პოეტი ვულგატეხილია აწმყოზე, უნუგეშო ჰირისუფალია სამშობლოს წარსული დიდებისა, მაგრამ ჩვენი წარსულის ცრუ გამომხატველი როდია, თუ წარსულ დიდებას გვაგონებს, ამავე დროს პირდაპირ გვეუბნება:

ჩვენი ივერი მშვენიერი არს, სისხლის კალო,  
გმირთა აკლამა, გულსაკლავი და სავალალო,—

შიგვეთითებს წმინდა ნინოს ჯვარზე და გვეუბნება:

სისხლის ცრემლითა მის ჯვარზედა არს წარწერილი  
ჩვენის სამშობლოს ბნელის ეტლის მოახრობა ბნელი.



ვახ. ორბელიანმა ძალიან კარგად იცის და არც სხვა უმაღლეს, რომ, —

ესე არს ჩვენი ისტორია და ჩვენი ბედი:  
ჯკლის გვირგვინი, სასოება და კვლავ იმედი!

ეს იმედი მის სევდით მოცულ არსებას მუდამ თან დასდევს და ანუგეშებს:

თქვენი სამშობლო, დანგრეული, კვლავ აყვავდებაო.

ამგვარი მოტივი ჩვენმა პოეზიამ დღემდის შეინარჩუნა და შეიძლება, კიდევ დიდხანს შეიჩინოს, მაგრამ ლიტერატურის დედა-ძარღვს ის აღარ შეადგენს; უმთავრესი მნიშვნელობა სამუდამოდ დაჰკარგა და ჩვენს არისტოკრატიასთან თანდათან ისპობა, ქრება. ცხოვრებამ ახლა სხვა უფრო პრაქტიკული, უფრო საჭირობოროტო კითხვები წამოაყენა. როგორც ამ მოკლე განხილვიდან დავინახეთ, ორივე უმთავრესი თემა თავისი პოეზიისა, მამიას კი არ ეკუთვნის, ის მხოლოდ წარმომადგენელია ამგვარი მიმართულებისა ამ საუკუნის პირველი ნახევრის ჩვენს ღარიბ ლიტერატურაში. იგი თავისი წინამორბედებისაგან მით განირჩევა, რომ პირდაპირ ამბობს: ქალი მხოლოდ ვნებისათვის არის გაჩენილიო. მისი წინამორბედნიც ასე ფიქრობდნენ, მაგრამ ამდენად გამბედავი კი არ იყვნენ.

დასასრულ, შემდეგი კითხვა იბადება: თუ ცხოვრება შეიცვალა, ახალმა მიმდინარეობამ წარმოშობა ახალი მამულიშვილები და მოღვაწენი, თუ ამგვარი პირები თანდათან მრავლდებოდნენ და კვალსაც ტოვებდნენ ჩვენს ცხოვრებაში, რატომ ვერ იქონიეს მამიაზე გავლენა? ამაზე უნდა ვუპასუხოთ: ერთი—რომ ძალიან ძნელია იმ იდეების სრულიად დავიწყება, რომლებიც მემკვიდრეობას, აღზრდას და საზოგადოების გავლენას სიყმაწვილიდანვე შეუსისხლორცებია ადამიანისათვის; მეორე—მამია საზოგადოების ცხოვრებას თვალყურს მაინცდამაინც დიდად არაფრად ადევნებდა, რასაც მთელი მისი ცხოვრება ამტკიცებს; მას ეგონა, თუ ჩვენ წინ არც მივდიოდით და ვერც წავიდოდით, სანამ არ დაუბრუნდებოდით ძველებურ გზას, ურომლისოდაც პროგრესი. კეთილდღეობა მას შეუძლებლად მიაჩნდა; მესამე — ბოლოს მაინც ცხოვრების ახალმა მიმდინარეობამ, სხვაგვარმა მოღვაწეებმა, მამიაზე იქონიეს გავლენა და შეარყიეს მისი ძველი შეხედულებანი, რასაც გვიმტკიცებს მისი ორი ლექსი პოემიდან „რაშიდ ვარდან-ოღლი“, 1872 წ. დაწერილი და „ნატვრა“, რომელიც 1887 წ. ეკუთვნის. ზევით დავინახეთ, რომ მამია სამშობლოს აწმყოთი უკმაყოფილო იყო, წარსულს ოხვრით იგონებდა, მისი სიმპატია წარსულისაკენ იყო. ამგვარი შეხედულებ-

ბისა იყვნენ ის პირნიც, რომლებშიაც მამია აღიზარდა; ამიტომ მამიას ეს ძველი აზრის და ცხოვრების წარმომადგენლები სამშობლოს საუკეთესო და ღირსეულ შვილებად მიაჩნდა; ამგვარი პირებისაგან ელოდა ის მამულის ხსნას; მათი ყოველისფერი მოსწონდა, მუდამ იმათეც მიისწრაფვოდა და ეს ასეც უნდა ყოფილიყო; ყოველი ადამიანი ინსტიქტურად მიისწრაფვის თანამოაზრეებისაკენ, მით უმეტეს, თუ თავისი და მათი რწმენის ქეშმარიტებაში არავითარი ეჭვი არა აქვს. ლექსი პოემიდან „რამიდ ვარდან-ოღლი“ მოწმობს, რომ ამგვარი აზრი მამიამ ბოლოს გამოიკვალა; მან შეიგნო, რომ ძველი თაობა, რომელიც მას აქამდის მოსწოხდა, „გონების თვალთ ხვრინავს“, მისი ცხოვრება ადამიანის ღირსებასა სვრის; მას თავის დრო მოუჭამია, თანამედროვე ცხოვრებას მისი რწმენა და შეხედულება აღარ შეეფერება, გამოუსადეგარია მამულისათვის, ზანგადასული და ამიტომ, —

ყოველი არსი, ზანგადასული,  
უნდა წაიქეც და დაღუპეს იგი.

პოეტს სწამს, რომ ეს ასეც მოხდება, რადგანაც, —

არვის უნახავს მობრუნებული,  
ამნაირია ბუნების რიგი.

ეს სიტყვები პოეტისა თითქოს წინასწარმეტყველებაა, რომელიც ჩვენ დროში თანდათან სრულდება. ახლა პოეტი ასპარეზს ახალ თაობას უთმობს, სიხარულით ეგებება მას და იმედიცა აქვს, რომ, —

მათზე ნაყოფნიც კარგნი გამოვლენ.

მისი სიმპათია ახლა ამ ახალთაობისაკენ არის. ის აღარ ურჩევს მას, წარსული უნდა იყოს შენი იდეალიო, როგორც თავის პატრიოტულ ლექსებში, არამედ, — მომავლისაკენ გაეშურეთ, „ყრუ ტყეში შარა გაჰკაფეთ ძალითო“. მას სწამს, რომ ეს „ახალნი ვაზნი“ თავის ერის საყდარს აგებენ და სწადია, მათ მუშაობას შეუერთოს „სუსტი თუ რამ აქვს ძალი“, რომ მისგანაც — „ჩნდეს ერთი ქვის დაშენება“.

ქების ღირსია პოეტი, რომლის გამჭრიახობამაც წინდაწინვე გადასჭრა, საით მიდიოდა ჩვენი ცხოვრება, ვინ იყო ახალ ცხოვრებაში საჭირო და შესაფერი, ვინ მეტი და ზანგადასული. მეორე ლექსში „ნატვრა“, ის თითქმის სრულიად უარყოფს იდეებს, იმ რწმენას და შეხედულებას, რომლებიც პატრიოტულ თბზულებაში გამოთქვა. ის ამ ლექსშიაც სამშობლოს კეთილდღეობას ნატრობს,

ხოლო ამ კეთილდღეობის მოსახვეჭ საშუალებად ძველებური წეს-  
წყობილება და მარტო თავისუფლება კი არ მიაჩნია, არამედ ევრო-  
პული ცხოვრება — გაეფროპიელება: სამშობლოს განათლება, საე-  
როთო ნების გამეფება, მეურნეობის აყვავება, ვაქრობა-მრეწველობის  
იმდენად განვითარება, რომ „ფაბრიკები და მაშინები დაუთვლელი  
იყოს ყოველ სოფელში“, და ბოლოს, თვითონვე დასძენს:

ეს არის ჩემი უმწვერვალესი  
ნატვრა, ოცნებად გარდაქცეული.

ამგვარად. პოეტმა სამუდამოდ გამოიცივალა ბოლო ხანებში თა-  
ვისი აზრი და შეხედულება, თუ როგორი ცხოვრებაა ჩვენთვის შესა-  
ფერი და საუკეთესო, და ამით დაუხატა ყოველ ქართველ მოღვაწეს,  
ვისაც კი მამულის საკეთილდღეოდ უნდა მოქმედება, მიზანი, რომ-  
ლისკენაც ის უნდა მიისწრაფვოდეს. თუ პატრიოტულ ნაწარმოე-  
ბში მას იდეალი წარსულში გადაჰქონდა, ახლა იდეალს მომავალში  
ხედავს და მისი „უმწვერვალესი ნატვრა, ოცნებად გარდაქცეული“  
გვიმტკიცებს, რომ პოეტის თვალში ახლა წარსულის იდეალი, ამ  
მომავლის იდეალთან შედარებით, სრულიად სუსტი და უფერულია,  
თუ მისი პატრიოტული ლექსების ტენდენცია თანამედროვე იდეა-  
ლების მქონე მკითხველში თანაგრძნობას ვერ აღძრავს, ამ ლექსებში  
გამოთქმული შეხედულება და „უმწვერვალესი ნატვრა“ ყოველი  
სალი და განათლებული გონების მქონე ადამიანისათვის, ვინც უნდა  
იყოს ის, მეტად სიმპათიურია. ხოლო, სამწუხაროდ, პოეტმა გვიან  
იცნო ჩვენი ცხოვრება, გვიან შეადგინა ჭეშმარიტი აზრი მის მსვლე-  
ლობაზე; ძველ ტრადიციებზე აღზრდილს არავითარი ეჭვი არ ჰქონდა  
მათ უპირატესობაში, მათი სისრულე ბრმად სწამდა, მაგრამ, როცა  
„ახალგაზრებს“ თვალი მოჰკრა, ევროპის ცხოვრებას ჩაუკვირდა და  
შემდეგ ჩვენ ცხოვრებას ჩააჩერდა, თავის რწმენაში ეჭვი შეეპარა,  
უარპყო ის, მასთან ერთად მისი მიმდევარი ძველი თაობაც. ის თაო-  
ბაც, რომელშიაც აღიზარდა, მიეკედლა ახალ მოაზრებებს, დაებადა  
მათთან შრომის სურვილი, გამოირკვია. თუმცა ჯერ ბუნდად, უმთა-  
ვრესი პუნქტები სამშობლოს საჭიროებისა, მაგრამ უფრო ვრცელი  
პროგრამის დახატვა აღარ დასცალდა. რომ ძველი არისტოკრატიის  
წლიერ გავლენას ასცილებოდა, რიგიანი, დროის შესაფერი განათლე-  
ბა მიეღო, ნიჭიერი პოეტი თუ არა, ნაყოფიერი მოღვაწე მინც იქნე-  
ბოდა, ჩვენს ცხოვრებას უფრო დააჩენდა კვალს და ყოველი ქარ-  
თველის გულში „უქრობელ ლამპარს“ დაიდგამდა. ახლა კი ამის  
თქმა არ შეგვიძლია. როგორც უკვე მოვიხსენიეთ. მამიას მსგავსი  
პოეტები სამშობლოს დაცემამ კი არა, არისტოკრატიის დაცემამ გა-

მოიწვია ჩვენში; ისინი ჩვენი არისტოკრატიის ინტერესების დამცველნი არიან. დღეს ჩვენს თვალწინ ეს არისტოკრატია კვდება. მისმა ინტერესებმა საზოგადო უმთავრესი ხასიათი დაჰკარგეს და მათთან ერთად ღრმად ამგვარ პოეტებსაც მნიშვნელობა დაუკარგა.

დასასრულ, უნდა შევნიშნოთ, რომ მამია ვადაქარბებული აზრის იყო თავის ნიჭზე

მეც ღმერთი ვარ ვიწრო წრეში,  
გონებისა ნათლის სვეტი. —

ამბობს ის „ნაძღვეში“. ჩვენება მას მრავალჯერ ნიჭიერს უწოდებს; პოეტს თავისი შუბლი „ღვთაებრივ შუბლად“ მიაჩნია. თუმცა პოემა „რაშიდ ვარდან-ოღლში“ გვეუბნება:

სულაც არ ველი,  
რომ დაუეწიარს ძეგლსა აღვადგენო, —

მაგრამ გადამეტებული აზრი თავისი ნიჭის შესახებ მან მაინც ბოლომდე შეინარჩუნა. ჩვენ კი უხდა შევნიშნოთ, რომ მამია არ იყო ისეთი დიდი ნიჭის პატრონი, რომ საზოგადოებისათვის წასაბაძი იდეალები დაეხატა, ჩვენი დაქსაქსული ცხოვრებისათვის გზა ეჩვენებინა; არც ძლიერი დაკვირვებითი ნიჭი ჰქონდა, რომ ჩვენი ცხოვრების ყოველგვარი მოვლენა აღენიშნა, აწონ-დაეწონა და თავისი მსჯავრი დაედვა. მას შეეძლო მხოლოდ მოკლე ლექსების წერა და ამ ლექსებში რამდენიმე, როგორც შინაარსით, ისე გარეგანი ფორმითაც, იმდენად მშვენიერია, რომ მიმზიდველ სილამაზეს დიდხანს არ დაჰკარგავს. ამ ლექსების მიხედვით უნდა დავასკვნათ, რომ მამია ბუნებამ პოეტად დაბადა, მაგრამ დაბალი პოეტური ნიჭი, სუსტი ფანტაზია და ხელოვნება დაატანა. მამიას პოეზიას მნიშვნელობა აქვს კიდევ აი, რა მხრით: თემები მამიას პოეზიისა მარტო მამიასი კი არ არის, არამედ მთელი ჩვენი მეორმოცე წლების არისტოკრატიისაც. თავისი თავის გაცნობით პოეტი გვაცნობს ამ არისტოკრატიასაც, მის რწმენას, შეხედულებას, სურვილს და, მცირეოდნად, ცხოვრებას. ვისაც უნდა შეისწავლოს ჩვენი მეცხრამეტე საუკუნის პირველი ნახევარი, ჩვენი არისტოკრატია, გონებრივი და ზნეობრივი წინმსვლელობა ჩვენში, მამიას პოეზია მას ძალიან კარგ სამსახურს გაუწევს.

## პრიტიკული ზენიშვნები

ჩვენი ახალგაზრდა მწერლების უმეტესმა ნაწილმა უკვე შეიგნო მწერლის ნამდვილი დანიშნულება და მოვალეობა, ჩაუკვირდა აწმყო ცხოვრებას და შეძლებისდაგვარად აუწყებს მკითხველს მას, რასაც ის ჩვენ ცხოვრებაში კითხულობს. საარქივოდ გამზადებულთ კი დავიწყებით, რომ ყოველი მოღვაწე ღროისა და გარემოების შესაფერი უნდა იყოს. აღარ ახსოვთ რუსთაველის სიტყვები: საცა არა სჯობს, გაცლა სჯობს კარგისა მამაციასაგან, ჯიუტად დგანან ძველ გზაზე და უგალობენ ძველ ცხოვრებას. ტყუილა დაუწყებთ მათ ხვეწნას: ბატონებო, ვთქვათ, მთელი ჩვენი წარსული ოქრო იყო, მაგრამ ის წავიდა, გაქრა; ჩვენ აწმყოში ვცხოვრობთ და აწმყოს გათვალისწინება გვესაჭიროებაო, ყურსა ბამბისასა! ბ. ან. ფურცელაძე იმგვარ საარქივო მწერლებს ეკუთვნის, რომლებიც ნებით თუ უნებლიეთ აწმყოს აღარ არგია. ნება მათია, რა გვენაღვლებოდა მაინცდამაინც, წარსულში ეძიათ ნუგეში და აწმყოსათვის მომკვდარიყვნენ, რომ ჩვენც ძალით არ გვაჩეჩებდნენ თავის გემოვნებას ისეთ უხეირო პოემებში, როგორც „ციცკარა“. ისტორიული პროცესის მიმდინარეობის გაპოკვევა ისტორიკოსის საქმეა და არა პოეტის, რადგანაც ვერც ერთი პოეტი ამას ვერ შეასრულებს; შეიძლება პოეტს მიზნად აქვს, წარსულიდან წამოგვიყენოს სხვადასხვა გმირებში წასაბადი მაგალითი; მაგრამ ცხოვრება მუდამ ცვლილებაშია. პირობები იცვლებიან, აღამიანი კი ამ პირობების ნაყოფია. რის გაკეთებაც შეეძლო. რომელიმე პეტრეს მეთვრამეტე საუკუნეში, მას ვეღარ გააკეთებს მეოცეში, რადგანაც ან საჭირო აღარ იქნება, ანდა შეცვლილი პირობები არ გააკეთებინებენ. უმეტესობისათვის ძველების მიბაძვა მხოლოდ მაშინ იქნებოდა შესაძლებელი, ცხოვრება რომ უცვლელი იყოს და ჩვენც იმავე პირობებში ვცხოვრობდეთ, როგორც ჩვენი ძველები. ჩვენ არ ვიცით, რა მიზანი აწერინებდა ბ. ან. ფურცელაძეს „ციცკარას“; ხოლო ეს პოემა ვერც წასაბად მაგალითს აძლევს მკითხველს, შესაძლებელიც რომ იყოს წაბაძვა, და როგორც,

სახელოვანი ნაწარმოებიც მეტად სუსტია. ავტორი ცდილობს ფილოსოფოსიც დააკმაყოფილოს, ესთეტიკოსიც, მაგრამ ფილოსოფიაც ერთობ სუსტი გამოუდის, ბუნების აღწერაც: იმიტომ კი არა, რომ მას ფილოსოფიური განვითარება არ მიეღოს ან ესთეტიკურ გრძნობას იყოს მოკლებული, არამედ იმიტომ, რომ მთელი მისი გონება და მეცადინეობა უმთავრესად რითმების შეწყობას დაუპყრია, დანარჩენი კი ხელიდან ეპარება. თითქმის ყოველ ფურცელზე ერთი და იმავე სიტყვებით ბრძოლის სურათების აღწერა სწორედ მოთმინებას დაუკარგავს მკითხველს. ოთხ სტრიქონს ვერ წაიკითხავთ ისე, რომ გამეორება არ შეგხვდეთ. ჩვენი თავი მაინცდამაინც უგონოდ სწორედ არ მიგვაჩნია, მაგრამ, სანამ მესამედ არ წავეკითხე, შინაარსი ვერ გავიგეთ და დარწმუნებული ვართ, თვით ავტორსაც არ ჰქონდა რიგიანად გამორკვეული, რას წერდა. მაშ რით უნდა აიხსნას ის გარემოება, რომ მთელი მეორე კარი, რამდენიმე თავის გამოკლებით, პირველი კარის გამეორება არის?

მართალია, პოეტებს მეტი გრამატიკული თავისუფლება აქვთ, მაგრამ ან. ფურცელაძე ამ licentia poetica-თი ერთობ უხვად სარგებლობს ხოლმე და ამგვარი licentia, როგორც:

რომ არ მთლად მათი ძვლები  
გურჯისტანს ჩააყრევინა.

არა გვეგონია. ნამეტანი არ იყოს ამისთანა ლექსები, როგორც —

სისხლსა სემს, სისხლში დაცურავს,  
სისხლითვე ეზიარება.  
ამეხსნა თვალე, ვიცანი,  
ძალა უძლევი ძალისა.

სიკვდილს სიკვდილით სქარბობენ,  
სიკვდილთა ღმერთის საოცრად და სხვ.

ჩქარა გამოსათქმელად კარგია რომელსამე საყმაწვილო ქურნალში, ლექსად კი არ ვარგა. ათ სტრიქონს ვერ წაიკითხავთ, რომ ლექსი ბუნებრივი, ადვილი გასაგები იყოს; ზოგან კი აზრი იმდენად ბუნდუა, რომ, არა გვეგონია, მკითხველმა გაიგოს რამე. მაგალითად:

რას ვამბობ? — მას არ ჰკმარობენ,  
რომ კაცნი დარჩნენ მხეცათა:  
რა მხეცი უდროს ომს კაცსა? —  
მხედარნი გაკაცებულნი, —  
უნდა ვიტყოდეთ ამასა,  
როს სისხლზე საჭმე მიდგება.

როცა მწერალს პოეზია არ ეხერხება და მაინც არ ეშვება, იმდენად მაინც უნდა შეიბრალოს მკითხველი, რომ სქოლიოში აუხსნას, ამგვარი ლექსით რის თქმა უნდოდა.

პოემის უმთავრეს გმირებს შეადგენენ მზექაბუჯ და ცისკარა. დავინახოთ, რა არის მათში მკითხველისათვის სასარგებლო ან საყუარადღებო, თვით ავტორი მხოლოდ გარეგნობით აქებს თავის გმირებს, მათი ღირსება-ნაკლოვანების შესახებ კი თითქმის არაფერს გვეუბნება. ვიცი, რომ ცისკარა იყო „ვარდი გაშლილი, უზადო, ვითა აღმასი, უტოლო, უცალო“. — ერთი სიტყვით, ისეთი ლამაზი, რომ თვით მეფესაც ზედ რჩებოდა თვალი. ერთი მიბრძანეთ, მერე მკითხველს რა, ცისკარა რომ ლამაზი იყო? ნუთუ ამოდენა პოემის წაკითხვით მკითხველმა იმის მეტი ვერაფერი უნდა გამოიტანოს, რომ ოდესღაც საქართველოში ერთი ლამაზი ქალი ცხოვრობდა, რომელმაც საქმროს მოკვლის გამო ყვეს მთელი ჯარი გაუწყვიტა?! როცა ქალში მხოლოდ სააშოკოდ გაჩენილ ქმნილებას ხედავდნენ, მაშინ ამგვარ პოემებს კიდევ ექნებოდა გასამართლებელი საბუთი, დღეს კი ბ. ფურცელაძე ვერავის მოაწონებს თავის ცისკარას ცარიელი სილამაზით, თუმცა თვითონ მას ძალიან მოწონს, და სრული კმაყოფილი იქნებოდა, რომ ყველა ქართველი ქალი დღეს ცისკარასთანა იყოს. „ცისკარაში“ ხომ არაფერი ჰყრია, სილამაზის მეტი?! — მერე რა ვუყოთ? სილამაზის გარდა ქალს სხვა რამეც უნდა! არა, ბატონებო, არისტოკრატიზმმა თავისი ზნე-ჩვეულებით და შეხედულებით დრო და უამი მოკაბა და. თუ მაინცდამაინც არ იშლით და წარსულს არ ეშვებით, ისე მაინც შეხედეთ ამ წარსულს, როგორც თანამედროვე ცხოვრება გეუბნებათ: როცა ძველ დედებს გვიხატავთ თვალწინ, მათი ღირსება დაგვანახეთ. გვიჩვენეთ ყოველი არსის შინაარსი, დედააზრი; ნუთუ ჩვენ ძველ დედებში საუკეთესო ღირსება მარტო ლამაზი სახე იყო?

თუ ცისკარა ქვეყნის მშვენიება იყო, არც მზექაბუჯი იყო ნაკლები სახით, ტანადობით, ვაჟკაცობით... ისეთი მძლავრი მკლავი ჰქონდა: რომ —

პეერჯერა ნახეს სანციფრო,  
საზარო დასანახავი,  
რომ განრისხებულს მის ხმალსა  
ცხენი და კაცი ზედიზედ —  
რკინით და ქაქვით მოსილი —  
გაუკაფია შუაზედ.

თვითონ მზექაბუჯს კი არც ტყვია ეკარებოდა, არც მოწამლული ისარი, ვერც ხმალი, ვერც ლახტი. რატომ? განა ასიც ადამიანი არ იყო? — იქნებ რაიმე სასწაული იფარავდა!

რაც ითქვა, ისიც საკმარისია იმის გამოსარკვევად, თუ რა ღირსების არის ეს პოემა. იმისი წაკითხვით მხოლოდ ვაიგებთ, რომ ქვეყნად არსებობს საშინელი შურისძიება, არიან ლამაზი ქალები, ღონიერი კაცები. — ვანა ღირს წასაკითხად მარტო ამისთვისო? იკითხავ, მკითხველო. — არ ღირს და, თუ არ წაგიკითხავს, ნურც წაიკითხავ, თორემ. სხვა რომ არ იყოს რა. გული გაგიტყდება ჩვენს აწმყო ლიტერატურაზე.

1898 წ.



## ოცნება და ცხოვრება

(„მრევლში“ დ. კლდიაშვილისა)

წინათვე უნდა გამოგიტყდეს, მკითხველო, რომ მორალისტი არა ვარ, რომელიც ყოველი ადამიანის საქმეს, სურვილსა და მისწრაფებას განყენებულად ზომავს, ცუდს აგონებს, კარგს აქებს და მხედველობაში კი არ იღებს ცხოვრების სხვადასხვა გარემოებას. რომელიც ყოველი ჩვენგანის მოქმედებას მიმართულებას აძლევს. ჩემი საკუთარი შეხედულება. რასაკვირველია. მე არ აღმომიჩენია: ცხოვრების კანონებს ღვთისგან რჩეულნი იკვლევინ. ჩვეულებრივ მოკვდავთ გვატყობინებენ. მაგრამ ჩემისთანა მოკვდავმა რომ ტვინს ძალა დაატანოს და ამა თუ იმ მოძღვრების საზრიანი მიმდევარი გახდეს, ესეც დღეი საქმეა. — თუ გნებავთ, — ქების ღირსიც: რაც უნდა იყოს. ვასაკიცხი მაინც არ არის. რჩეულთ დაუდგენიათ: ადამიანი თავისი ღირსება-ნაკლოვანებით ცხოვრების გარემოებათა ნაყოფიანო: მაგრამ, სწორედ მოგახსენოთ, არა მჭეროდა და. მგონი. არც შესჰოდა. როდესაც ჩემს საკუთარ თავზე გამოვცადე ამ კანონის მძლავრი ბრძკალები და. რამდენადაც შემეძლო, სხვის მოქმედებასაც ჩაეუყვარდი. მაშინ კი დავრწმუნდი მის ქვეშარიტებას. ხშირად ადამიანი ცუდს საქმეს სჩადის. მორალისტი არც აცივებს, არც აცხელებს. და დასკრავს ბუკსა და ნალარას. ჩაპქოლეთ ცუდის საქმის ჩამდენაო. ვინც კი რეალურად უყურებს ცხოვრებას. გაარჩევს ამ ცუდი კაცის საქმეს და უმეტეს შემთხვევაში აღმოაჩენს: ათასი კარგიც ყოფილიყო. მისი ცხოვრება იმგვარ გარემოებათა შორის მოექცა. რომ ამგვარ საქციელს თავიდან ვერ აიციდენდაო. ყოველსავე ამას მხოლოდ იმიტომ ვამბობ, რომ მკითხველი მოვამზადო და თავი არ გამოვალანძღვინო; ჩემი ცხოვრებაც ისეთ გარემოებათა შორის მოექცა. რომ მიფეჩივე ყოველ საგანს, ყოველგვარ მოქმედებას მხოლოდ სარგებლობის თვალთ უყურო, სარგებლობის საზომით ვზომო. უსარგებლო რამ, ათასი ლამაზიც იყოს. წყალსაც წაუღია: ცხოვრება იმდენად ძნელია, ვაკვირებულთა რიცხვი ისე მრავალი, რომ მარტო სილამაზის გაღმერთება რა საკადრისია თუ სასარგებლო

რ. ლამაზიცა ხარ. თუ არავის არაფრად არგისარ, როგორც გენებოს. ისეთი ბრძანდებოდე. ვგრძნობ, რომ ყველაფრის სარგებლობის სახომით ზომა როგორღაც საჩოთიროა. მაგრამ რა ვქნა: წყველს ცხოვრებაა დამნაშავე. მე მხოლოდ უბრალო ობიექტი ვარ მისი უტყუარის კანონების გამოსახატავად.

დღეს მინდა. მკითხველო. ერთი ლიტერატურული ნაწარმოები შესახებ შეგატყობინო ჩემი აზრი. მაგრამ, როგორც უკვე მოგახსენე. ყოველგვარი ლიტერატურული ნაწარმოებიც იმდენად მომწონს, რამდენადაც ის მკითხველს სარგებლობას აძლევს მით, რომ ან ცხოვრებას გადაუშლის და ამით თვალს აუხელს. ან თავის საკუთარ გულში ჩაახედებს და ჩააფიქრებს. მგონი. ეს მეოთხე წელიწადია. რაც დავით კლდიაშვილი საბელეტრისტო ასპარეზზე გამოვიდა და მას აქეთ მისი ყოველი ნაწარმოები ძველებური ესთეტიკის დაკმაყოფილებას კი არ სცდილობს, არამედ გვიხატავს ჩვენს საკუთარს. ჩვენის ხალხის ცხოვრებას და გვიხატავს ისეთის ხელოვნებით, რომ, როცა კითხულობთ, ასე გგონიათ. თითქოს ყოველივე საკუთარს თვალებით გენახოთ. დავ. კლდიაშვილის მნიშვნელობის შესახებ ჯერ ადრეა ლაპარაკი, რადგანაც მისი ნიჭი მხოლოდ ახლა იშლება და თანდათან იზრდება, — მე მხოლოდ უკანასკნელი სურათი მაქვს სახეში. აქ ხალხის ცხოვრების დასურათებას ისეთი ალაგი არ უქირავს. როგორც ზოსიმე მღვდელის სულიერ მღვდომარეობას. ავტორი მხოლოდ ერთს წუთს ჩავვახედებს ზოსიმეს გულსა და გონებაში. მაგრამ ამ ერთ წამშიაც იმდენს გვატყობინებს. რამდენსაც ზოგიერთი ფსიქოლოგი მთელს ტომში ვერ გადმოგვცემდა. იმას აქვს მხოლოდ ერთი მომენტი აღებული ზოსიმეს სულიერი მღვდომარეობისა. მაგრამ ისეთი მომენტი, რომელიც ყველაზე უფრო საყურადღებოა. ზოსიმე ჩვეულებრივი ადამიანია. ის ერთი მრავალთაგანია. ახალგაზრდაც და ხნეირიც ყველა ჰპოებს იმასთან თავის მსგავსებას, — ზოგი აწმყოში. ზოგი წარსულში: მას ყველასთან აქვს ნათესაური კავშირი და მისი მწარე ფიქრები სხვა მრავლისათვისაც გულსაგმინავეია. ყოფილა და იქნება.

ღარიბი ოჯახისშვილი, ზოსიმე. სწავლის დამთავრებამდევე მუდამ იმ აზრით იყო აღფრთოვანებული. სწავლას გავათავებ თუ არა, დაუბრუნდები სოფელს და უანგაროდ შევედგები ხალხის სამსახურსაო. სრული იმედი ჰქონდა, რომ „ხალხში შეიტანდა პატივისცემას მისი წოდებისადმი, შეაყვარებდა იმით სახელს, ვინც მქადაგებელია სიყვარულისა მოყვასისადმი, ვინც განმანათლებელია სულისა, გამწმენდი გულისა ყოველივე მძულვარებისა და ბოროტებისაგან“. ეგონა, თუ თავისი მოქმედებით ხალხში ნდობას, სიყვარულს, პატი-

ვისცემას მოიხვეჭდა. ხალხს კირს შეუმსუბუქებდა, ცხოვრებას გაუადვილებდა, იმის გარშემო სიბნელეს მცირეოდნად მაინც გაჭანტავდა. მაგრამ მალე დაინახა, რომ ყოველივე ეს მხოლოდ ოცნება იყო; შედგა თუ არა ფეხი ცხოვრებაში, ეს ოცნებაც უნდა გამქრალიყო. ცხოვრებამ თავისი მოითხოვა; ზოსიმე თუ ხალხს სჭირია, ხალხის დახმარებაც საჭიროა მისთვის; სიღარიბით სულშეხუთულ ხალხს კი თავისის საკუთარის თავისთვისაც ვერ შემოუვლია, სწვისთვის სადა სცხელა? ის მოძღვარს იქვის თვალთ უყურებს და დარწმუნებულია, რომ ზოსიმეს „წაგლეჯაზე აქვს თვალები გამოპრაწული. ხალხთან დაახლოებას იმისთვის ცედილობს, რომ იმათ სარჩოზე იწყოს ცხოვრება...“ — აი, თავიდანვე რაგვარი ურთიერთობა დამყარდა მოძღვარსა და სამწყსოს შუა. კიმოთე გლეხი ამბობს:

„— ჩვენ ჩვენი საკუთარი გაჭირვება გვეყოფა, ძლივს სული გვიდგაია ტანში. ჩვენ სხვისაგან მოველით შველასა და დახმარებას, ჩვენის გაჭირვების გაადვილებას, და ამის მაგიერად ტვირთად გვაწვება... დასაბინავებლად ჩვენ გვიხდება და შესანახავად... ჩვენც ცოდვანი ვართ!“

— მართალია, მართალი! — მოისმა აქეთ-იქიდან სმები ამ სიტყვებზე“.

მწარედ ჩაფიქრებული ზოსიმე სწორად შეხედავს ცხოვრებას. თავის მდგომარეობას და დაინახავს, რომ ის არის „უბინაო, ღატაკი, ღატაკებით გარშემოხვეული, რომელთ ნაოფლართაც თავი უნდა ერჩინა. საიდგან, რა გზით უნდა დაბადებულყო ნდობა, სიყვარული, თანაგრძნობა მათ შორის?“. ზოსიმე მზად არის იტიროს, რადგანაც კარგად ჰგრძნობს, რომ ასე უნდა იყოს სიკვდილამდის, ასე ძულებში უნდა დალიოს თავისი წუთისოფელი თავისდა უნებურად, თავისდა გულსაკლავად. ცხოვრება საუკეთესო პრაქტიკაა, მან მალე აუხილა ზოსიმეს თვალები, მალე დაუმტკიცა მისი ოცნებების უნიადგობა, განუხორციელებლობა, და საბრალო მოძღვარს თვალწინ დაეხატა მთელი თავისი უძლურება და უსაშუალოება. მწარე ფიქრებში გართულ ზოსიმეს წინ შეხედება სოფლის მღვდელი, რომლის ერთადერთ საზრუნავს და საფიქრებელს „ბურუხუნა კანკიანთები“ შეადგენს და ზოსიმეს იღუმალი ხმა ჩასძახის: „ზოსიმე, აი შენის მომავლის გამოხატულება, შენც ასეთი ბოლო მოგელის“. ზოსიმე ინახულებს ავადმყოფი გლეხის ოჯახს, და პირველი ფეხის შედგმისათანავე უმეცრება, სიღარიბე და სიღატაკე ეგებება წინ. ზოსიმე აქაც ჰგრძნობს თავის უძლურებას: იმის თვალწინ ავადმყოფები უმწეოდ იხოცებიან და მას არავითარი შველა არ შეუძლია. მოვა ზოსიმე თავის საკუთარ სახლში, აქაც სიღარიბე, აქაც სიღატაკე ეგებება წინ

ნუგეშისა და იმედის მაგივრად. და სრულიად რწმუნდება, რომ მისი ოცნება უნიადაგო იყო. მისი მომავლის გამოხატულება კი მართლა მიხეილა ხუცესი ყოფილა, რადგანაც იმას ცხოვრება უნდა, ცოლ-შვილი თავს ახვევია და რითი არჩინოს ოჯახი, თუ არ ღატაკი ხალხის წაოფლართ? არ წაბაძავს მიხეილა ხუცესს? რა მოაგვაროს თავისის თავისთვის, ცოლისთვის, შვილებისთვის, რომლებსაც დედა უქმე დღესაც კი ვერ აცმევს რიგიანს ტანისამოსს: დაჰხვევენ და მერე რაღა ჩავაცვაო. „დროა ოცნებას თავი დაანებო, — ეუბნება ზოსიმეს იგივე იღუმალი ხმა: — კი უნდა გამოჰრაწო თვალები, თორემ ვერც სხვას წადგები და შენს თავსაც ავნებ! დროა აწი სოფლის ადათს შეეჩვიო, იცხოვრო ისე. როგორც სხვები ცხოვრობენ“. ყოველზე ამან გული მოუშაბა ახალგაზრდა მოძღვარს, ყოველივე ამან ნათლად დაანახვა, რომ ოცნება სხვა არის. ცხოვრება სხვა.

რა ჰქმნა ბოლოს ზოსიმემ? იმან გაიმარჯვა თუ ცხოვრებამ? რა უნდა ექნა?! შეურიგდა ბედს. ისე, როგორც ყოველი ჩვენგანი ურიგდება. ზოსიმე სრულიად ჩვეულებრივი ადამიანია და როგორ შეუძლია ცხოვრებას გაუმკლავდეს, ქედი არ მოიხაროს და ბოლომდე თავისი გაიტანოს? მშიერის კუჭით მშიერ ხალხს ზოსიმესთანა ადამიანი ვერ ემსახურება. აეტორს შეეძლო, არაჩვეულებრივის ხასიათით. ნიჭითა და მხნეობით დაეჩილდოვებინა ზოსიმე: ის შეებრძოლებოდა ცხოვრებას, ქედს არ მოიხრდა. ან თავისას ამჯობინებდა, ან არადა ბედს არ დაუთმობდა. ზედ შეაკვდებოდა; მაგრამ მაშინ ჩვენთვის იმდენად საყურადღებო არ იქნებოდა. იმდენად არ მოგვხვდებოდა გულს, როგორც ახლა: ხასიათის გასაოცარ სიმტკიცეს და თავდავიწყებას ბუნება მხოლოდ რჩეულთ აძლევს; ჩვეულებრივ ადამიანს ვერც მისი საკუთარი თავი და ვერც სხვა ვერ დასძრახავს და ვერ გაჰკაცებავს. რომ ამგვარი რჩეული ადამიანებივით ვერ მოიქცეს ცხოვრებაში; უმეტესი ნაწილი ზოსიმესა ჰგავს. სხვისი სამსახური მხოლოდ მაშინ შეუძლია, როცა ბუნებრივი მოთხოვნილებანი დაკმაყოფილებული აქვს. ზოსიმეს უსაშუალო მდგომარეობა უმრავლესობის უსაშუალობაა, მისი სულისკვეთება უმრავლესობის სულისკვეთება არის, ამიტომ ხვდება ის გულს. ამიტომაც გვალეღვებს და გვაჯობნობინებს სრულად თავისის საკუთარი გულის ვარამს.

უმეტესი ნაწილი ჩვენის ახალგაზრდობისა ზოსიმესავით ოცნებობს გატაცებული; ხალხი, სამშობლო — აი, რა არის მუდამ იმის გონებაში გამოხატული; მამულის სამსახური — აი, რა შეადგენს მისი მომავალი ცხოვრების საგანს. მაგრამ, ჩასდგამს თუ არა ცხოვრებაში ფებს. ყოველ ნაბიჯზე იმგვარი სურათები უხვდება, იმგვარს მდგომარეობაში ვარდება, როგორც ზოსიმე. ეს სურათები და მათგან

აღძრული ფიქრები ზოსიმესავით უკლავს გულს, კემშარიტ შეხედუ-  
ლებას აძლევს ცხოვრებას შესახებ და ეუბნება: ოცნება სხვა არაა.  
ცხოვრება სულ სხვაო. „აწი ყოველსავე ოცნებაზე ხელი უნდა აიღო  
და იცხოვრო ასე. როგორც სხვები ცხოვრობენ“. მას არ უნდა, არ  
შეუძლია სხვებსავით იცხოვროს. განა ის არ იყო, ამ „სხვებს“ რომ  
ჰკიცხავდა, ლანძღავდა და აგინებდა? იმათ ცხოვრებას პირუტყ-  
ვულს ცხოვრებას უძახდა? როგორ?! განა იმანაც „სხვებსავით“ უნ-  
და იწყოს ახლა ცხოვრება? ამოიხრებს მწარედ. ცრემლსაც დაჰვ-  
რის ზოსიმესავით, ცხოვრება კი თავისას იზამს: გარეთ სილატაკე,  
შინ სილატაკე საბოლოოდ მოჰქნის. შეურიგდება ბედს ზოსიმესავით  
და იწყებს ცხოვრებას! იმ მიზეზებს შორის, რომლებაც წინათ თვა-  
ლის დასაწახავად ეჯავრებოდა. კიდევ მაღლობა ღმერთს, თუ სულ  
იმათ არ დაემსგავსა.

ჩაუკვირდით ხმ მიზეზებს. გამოჰკითხეთ წარსული და დარ-  
წმუნდით, რომ ბევრი მათგანი საყმაწვილში, სანამ პირისპირ შე-  
ხვდებოდა ცხოვრებას, ზოსიმეზე ნაკლები არ იყო. ზოსიმესავით  
ოცნებობდა, იმედით აღვისილის გულით მოისწრაფოდა ცხოვრებაში,  
ხალხში. მაგრამ გარეთ სილატაკემ, შინ სილატაკემ სხვა მიმართულება  
მისცა იმათ ცხოვრებასა და მიასწრაფებას; გაიბრძოლეს ერთი ზოსი-  
მესავით და საბოლოოდ შეურიგდნენ ბედს, რომ შეუმიხნევლად,  
სხვის გამოუსადეგრად გაეტარებინათ თავისი დღენი. ცხოვრება შე-  
უჩერებლად წინ მიდის; გაქირვებულთა რაცხვი თუ მატულობს, თო-  
რემ არა კლებულობს. კეთილი ოცნებაა მომავალში საზოგადოებ-  
რივი და საერთაშორისო ცხოვრება-დამოკიდებულების ისე გარ-  
დაქმნა, რომ უმეტესობას ლეკმა-პური უზრუნველყოფილი ჰქონ-  
დეს: ახლა კი, დღევანდელ ვითარებაში ხალხი შიმშილს ებრძვის და  
ერთხანს იგივე ელის. ძველი თაობა წავა, ახალი დაძველდება, სხვა ახ-  
ლი თაობა აღმოცენდება. მაგრამ უმეტესი მათგანი, რაც უნდა სინა-  
თიური აზრი ჰქონდეს გამოხატული. ცხოვრებაში ზოსიმესავით  
იგრძნობს, დარწმუნდება, რომ გარშემო სილატაკე, ოჯახში სილა-  
ტაკე მისი აზრების განხორციელებას შეუძლებლად გახდის, ზოსიმე-  
სავით ჩამოჰყრის უიმედობის ცრემლს, გამოეთხოვება სამუდამოდ  
თავის ოცნებებს და ბედს შეურიგდება. ბევრს ცხოვრებაში გა-  
სულს ჩააფიქრებს ზოსიმე, მოაგონებს თავის საყმაწვილეს და  
ტლანქ მატერიალურ აწმყოს თუ არ შეაძლებს. მცირე ხნობით  
შაინც დაავიწყებინებს და დაუბრუნებს იმ ძვირფას წარსულს, როცა  
ის ჯერ ისევ სემნარაში მყოფ ზოსიმესავით ოცნებას შეჰხაროდა  
და მის რეალურად განხორციელებაში სრულიად დარწმუნებული  
იყო. ბევრჯერ ცხოვრებაში გამოუსვლელს ააშფოთებს ზოსიმეს სუ-

ლ-სკვეთება, რადგანაც დიდს მსგავსებას კპოვებს თავისს თავსა და მას შორის. ბევრს დაუნაღვლიანებს გულს ზოსიმეს მდგომარეობა, რადგანაც ნათლად დაინახავს, რომ მომავალში ისიც იმავე გარემოებათა შორის მოექცევა ცხოვრების სარბიელზე, როგორც ზოსიმე. ბევრი იტყვის: ვაითუ მეც ზოსიმესავით ჩამოვყარო სასოწარკვეთილების ცრემლები და ბედს შევეურიგდეთ. ამგვარმა ფიქრებმა შიძლება ზოგს მაინც მოანახვინოს რაიმე საშუალება, რომ მცირე-ოდნადაც არის აიცილოს ზოსიმეს მდგომარეობა ცხოვრებაში. აი, ეს მიმაჩნია ამ პატარა სურათის მნიშვნელობად და სარგებლობად.

ავტორს ისეთი ნიჭი აქვს, რომ ერთის კალმის მოსმით შეუძლია ამა თუ იმ გმირის დახასიათება; იმგვარად და ისეთ სიტყვას ათქმევინებს, რომ ეს ერთი სიტყვა შეგატყობინებთ მთქმელის მთელს ხასიათს, მისწრაფებას, ავ-კარგიანობას და ცხოვრების საგანს. ამგვარია პეტრია „სტოროფი“, რომელიც ცხოვრებიდან ცოცხლად არის ამოღებული, და მიხეილა ხუცესი, რომელიც ნამდვილი ტიპია. გასაოცარი სარკე, რომელშიაც ყველა ჩვენის სოფლის ძველებურ მღვდელს დაინახავთ. ეგ. ნინოშვილის შემდეგ დავ. კლდიაშვილი ჩვენ ახალგაზრდა ბელეტრისტა შორის ყველაზე უფრო ადვას რეალურ გზას. ის წინდაწინ არავითარის იდეით არ იჭურვება. ობიექტიურად გვიხატავს ჩვენს ცხოვრებას. ეს საუკეთესო გზა არის ბელეტრისტისათვის: ცხოვრება უთავბოლოდ და უაზროდ არ მიმდინარეობს, ისიც ბუნების უტყუარ კანონებს ემორჩილება, აქაც არის აზრი და იდეა. ხოლო ნიჭის დანიშნულება ის არის, ისეთი ტიპიური ფაქტები და მომენტები ამოიღოს ცხოვრებიდან, რომ ესა თუ ის აზრი და იდეა თავისთავად. ძალდაუტანებლად გამოაჰვიოდეს. დავ. კლდიაშვილს ასეთი ნიჭი აქვს, თუმცა ჭერჭერობით რომანტიზმის ზოგიერთი უბრალო ელემენტი ვერ მოუშორებია. უყვარს ეფექტით სავსე. გულშემზარავი სურათები, რომლებიც მკითხველის გრძნობაზე უფრო მოქმედებს. რასაც მოთბრობის უკანასკნელი სურათი ამტკიცებს. ჩვენში. სადაც საზოგადოება თითქმის ახლა იმაგრებს ფეხს. სადაც ჭერ ყველა თავისის თავისთვის სცხოვრობს. საზოგადო ცხოვრების მიმდინარეობას არ იცნობს და არ ეტანება, ამგვარის ნიჭისა და მიმართულების მწერალი დაუფასებელია, რადგანაც გვაცნობს ჩვენს ცხოვრებას. გვათვალისწინებს მის ცვლილება-მიმდინარეობას. გვიბადებს საზოგადო ინტერესს, ნელ-ნელა გვატყობინებს განკერძოებულად. თავისი თავისათვის ცხოვრებას და საზოგადოებრივ ცხოვრებაში ჩაბმის მოთხოვნილებას გვიღვიძებს.

## ხალხის გულის მესაიდუმლე

(თხზულებები ევანჯელ ნინოშვილისა)

### I

თუმცა მთელი სიტყვიერება გამოურკვეველი საგანია და მეცნიერების სახელს. ვინ იცის. რამდენი ხანი უნდა ელოდებოდეს. მაგრამ სიტყვიერების ერთი ნაწილი — კრიტიკა, თითქმის ყველა დანარჩენ ნაწილს ჩამორჩა. ერთსა და იმავე დროს, ერთსა და იმავე საზოგადოებაში შეხვდებით ისეთ კრიტიკოსებს, რომლებიც სრულიად სხვადასხვა საზომს ხმარობენ სიტყვაკაზმული ლიტერატურის სარკვევად; კრიტიკას მიზანი თვითეულს სხვადასხვანაირად აქვს დასახული. უცხო ენებზე ბევრია ასეთი სათაურის წიგნები: „საფუძვლები ლიტერატურული კრიტიკისა“, „მეცნიერული კრიტიკისა“ და ს.ვ., მაგრამ ყოველ ავტორს ეს საფუძვლები თავისებურად ესმის; ზოგი მათგანი ამტკიცებს: კრიტიკა რამდენიმე გვარია — ესთეტიკურა, ფსიქოლოგიური, სოციოლოგიური და სხვ. კრიტიკის საფუძვლების შესახებ ასეთი აზრთა სხვადასხვაობა. გვარებად მისი დაყოფა აშკარად ამტკიცებს მის გამოურკვეველობას. თუ მხედველობაში მივიღებთ იმ გარემოებას, რომ ყოველგვარი ცოდნის მიზანს მეცნიერულ ნიადაგის მოპოება უნდა შეადგენდეს. ცხადი იქნება, რომ ბევრი დრო გაივლის. სანამ კრიტიკა მეცნიერებად იქცეოდეს<sup>1</sup>. ამგვარ მდგომარეობაში ყოველი კრიტიკოსი იძულებულია, თავის კვლევას რაიმე მოსაზრება დაუდევას სარჩულად; უამისოდ მისი შრომა უსისტემო იქნება. მისი ანალიზი შემთხვევით ნიშნებზე დამყარებული ამიტომ, სანამ ე. ნინოშვილის თხზულებათა გარჩევას შევუდგებოდეთ, საჭიროდ დავინახეთ ზოგიერთი მოსაზრების წინ წამძღვარება.

<sup>1</sup> შესანიშნავმა ტენმა შექმნა მეცნიერული სისტემა კრიტიკისა, მაგრამ მის მიერ დაწყებული გზით აღარავის უყლია.

ლიტერატურული კრიტიკის მიზანია ახსნას სამსატერო ნაწარმოები და აღნიშნოს მისი ღირსება-ნაკლოვანება. ქვეყნიერებაზე შემთხვევითი არაფერია: ყოველგვარ მოვლენას თავისი მიზეზი და შედეგი აქვს. დეტერმინიზმმა სრული ალაგი დაიკავა ბუნებისმეტყველებაში და დიდხანია შეანგრია საზოგადოებრივ-ზნეობრივი მეცნიერების იდეალური კედელი. საზოგადოებრივი ცხოვრებას მკვლევარნი თანდათან რწმუნდებიან. რომ აქაც სრული დეტერმინიზმი არსებობს. სიტყვაკაზმული ლიტერატურაც დეტერმინიზმს ექვემდებარება; არც ერთი ხელოვნური ნაწარმოები. რა დაბალი ან მაღალი ღირსებისაც უნდა იყოს. შემთხვევითი არ არის; მას თავის საკუთარი მიზეზი აქვს. ამ მიზეზების შეგნება და გამორკვევა კრიტიკის უპირველეს საჭიროებას შეადგენს. უამისოდ ხელოვნური ნაწარმოების დაფასება მტკიცე საფუძველს იქნება მოკლებული.

ყოველგვარ იდეას, ყოველგვარ აზროვნებას. რა განყენებულაც უნდა იყოს ის, სარჩულად უდევს ნახატი<sup>1</sup>, ე. ი. გონებაში აღბეჭდილი სახე ჩვენ გარეშე არსებული საგნებისა და შემთხვევებისა. ნახატების სხვადასხვანაირად შეერთება კი ჰბადებს ადამიანს მთელს აზროვნებას. როგორ ჩნდება ნახატი ჩვენ გონებაში? გარეშე ბუნება მოქმედებს ჩვენი ხუთი გრძობის ორგანოებზე; ეს ორგანოები ნერვების შემწეობით გადასცემენ სხვადასხვა შთაბეჭდილებას, თავის ტვინის უჯრედები ირჩევენ ამ სხვადასხვაგვარ შთაბეჭდილებას და შემდეგ მათი განმეორება. ხელახლა გამოწვევა შეუძლიათ. მაგალითად, თქვენ შეგიძლიათ წარმოადგინოთ რომელიმე მსახობი, რომელიც წინათ გინახავთ. გონებაში ალაღვინოთ მისი სიმღერა, ლაპარაკი, ამგვარად. წარმოდგება ჩვენ გონებაში ნახატი; მაშასადამე, აზროვნობის წარმომშობი მხოლოდ ტვინის უჯრედებია. სხვა არაფერი. ფსიქოლოგიაში მატერიალიზმი გამეფდა და აქა-იქ თუ დარჩენილან უქიდურესი სპირიტუალისტები. ის-ნიც ჩელ-ნელა თვითონვე აღიარებენ თავის დამარცხებას<sup>2</sup>. რადგანაც ჩვენ სულიერ მოქმედებას სარჩულად უდევს ნახატი. ნახატი კი იბადება თავის ტვინის უჯრედებში გარეშე ცხოვრების ზეგავლენით, აქედან, ცხადია, რომ ჩვენი ყოველგვარი აზროვნება და, მაშასადამე, მწერლის ნიჭის ნაყოფიც, დამოკიდებულია. ერთის მხრივ, გარეშე

<sup>1</sup> როდესაც ჩვენ თვალდახუჭული წარმოვიდგენთ შორეულ პარებს და სხვ., ეს არის ნახატი გონებრივი.

<sup>2</sup> ამ ორიოდ წლის წინათ მოსკოვის პროფესორმა, სპირიტუალისტმა გროტ-მა საჯაროდ გამოაცხადა: სული ერთგვარი ენერჯია არისო, და ამით გზა დაულოცა მატერიალიზმს ფსიქოლოგიაში.



ცხოვრებაზე. მეორეს მხრივ, ტვინის აგებულებაზე, მისი უჯრედების თვისებაზე. გარეშე ცხოვრება ან აოციალური პირობები მწერლის ნიჭზე მოქმედებს ან პირდაპირ. ან შორეულს გზით: პირველ შემთხვევაში ის მასალას აძლევს მწერალს, მის სულიერ წყობილებას თავისებურ ბეჭედს ასვამს, აღვივებს მასში სხვადასხვა სიძაბოებს და ანტაპათიას და ამით ჰბადებს მწერლის ნიჭის განსაზღვრულ მიმართულებას, მის ხასიათს. ორსავე შემთხვევაში მხატვრული ლატერატურა გამომხატველი იქნება საზოგადოებრივი ფსიქოლოგისა. ყოველი საზოგადოება შედგება სხვადასხვა ან იურიდიული ან სოციალური კლასებისაგან; ამიტომ ყოველი მწერლის მოღვაწეობას ამ კლასის ბეჭედი აზის. რომლის გავლენის ქვეშაც გაფურჩქნილა მისი გონებრივი და ზნეობრივი მხარე. „მეუშა, რომელიც არშიებს ყიდულობს, ორივე თავის აზრით ხელმძღვანელობს, მაგრამ მათი აზრთა სხვადასხვაობა დამოკიდებულია საზოგადოებრივი მდგომარეობის სხვადასხვაობაზე. ეს უკანასკნელი კი ნაყოფია სოციალურის ორგანიზაციის“ — ამბობს მარქსი წერილში პრუდონის წინააღმდეგ. ამის საუცხოო მაგალითს წარმოადგენს ჩვენი ლატერატურა პატროტული რომანტიზმი, რომელიც სრული ნაყოფია თავადაზნაურობის (უმთავრესად, პირველის) კლასიური ინტერესებისა; სამშობლოს სიყვარული კი მხოლოდ უბრალო ფარია.

სულიერი მოქმედების მიზნად მართო თავას ტვინის უჯრედების (და არა რაიმე არამატერიალური სუბსტანციის) აღიარებას ჩვენთვის შემდეგი მნიშვნელობა აქვს; თუ დავამტკიცებთ, რომ თავის ტვინის ამა თუ იმ თვისებაში მემკვიდრეობას დიდი წილი უძევს. მაშინ ისიც ცხადი იქნება, რომ მწერლის ფსიქიკაზე და მამასადამე, მის ნაწარმოებზე მემკვიდრეობას გავლენა აქვს; უმთავრესად კი სულიერ თვისებათა მემკვიდრეობასთან დაკავშირება მწელია, რა არის მემკვიდრეობა? როდესაც წინაპრების თვისებანი გარდაეცემა შთამომავლობას, ამ გარეპოებას ეწოდება მემკვიდრეობა. მემკვიდრეობის ანაზნაღად ამ საუცუნის მეორე ნახევრიდან რამდენიმე ჰიპოთეზა გაჩნდა: დარვინის, ჰეკელის, ნეგელისა და ვეისმანის. უმაღლეს საფეხურზე მდგომ ცხოველებს აქვთ სასქესო ჯირკვლები; ამ ჯირკვლებში მზადდება სასქესო უჯრედები: კვერცხი — დედალი არსების სასქესო უჯრედი, და სპერმატოზოიდი — მამალი არსების სასქესო უჯრედი. ამ ორი უჯრედის, კვერცხისა და სპერმატოზოიდის შეერთებით ჩნდება ახალი უმაღლესი ცხოველები. აქედან აშკარაა, რომ მემკვიდრეობის საიდუმლოებაც ამ სასქესო უჯრედებში უნდა იყოს დამალული.

მთელი ტანი აშენებულია პატარ-პატარა უჯრედებიდან. დაბ-

ვინის ჰიპოტეზით. ტანის ყველა უჯრედებს ცილდება ჰატარა ნაწილები, ამ ნაწილებიდან წარმოიქმნება სასქესო უჯრედები, სასქესო უჯრედებიდან კი ცხოველები. მაშასადამე, ცხოველებს უსათუოდ უნდა გადაეცეს დედამის აგებულობის თვისებანი. ამგვარად, დარვიზის ჰიპოტეზა შემკვიდრეობას ადვილად ხსნის, მაგრამ არც ერთი ანატომიური ფაქტი მას არ ამართლებს, არავის არ დაუმტკიცებია, რომ სასქესო უჯრედები ისე მზადდებოდეს. როგორც დარვიზს ჰგონია; ამიტომ დღეს ეს ჰიპოტეზა ყველას მიერ უარყოფილია. ჰეკელის ჰიპოტეზა მეტაფიზიკურია; ნეგელის — მცირედნად ხსნის შემკვიდრეობას მცენარეებში და უმდაბლეს ცხოველებში; უმაღლესი ცხოველების შემკვიდრეობის ასახსნელად კი უვარგისად არის ცნობილი; ამიტომ არც ჩვენ მოგვყავს. ყველაზე უფრო რიგიანი ჰიპოტეზა ეკუთვნის ვეისმანს. მისი ჰიპოტეზა ანატომიურ და ემბრიოლოგიურ ფაქტებს არ ეწინააღმდეგება და ამიტომ მეცნიერებისაგან მიღებულია. ვეისმანის აზრით, სასქესო უჯრედებში არის ერთგვარი სითხე — იდიოპლაზმა. როცა კვერცხი სპერმატოზოიდთან შეერთებით განაყოფიერდება. მისი იდიოპლაზმა იყოფა ორ ნაწილად: ერთი ნაწილიდან ჩნდება სხვადასხვა უჯრედები, რომლების შეერთებითაც ცხოველი წარმოდგება. მეორე ნაწილიდან კი ჩნდება სასქესო უჯრედები. აქედან აშკარაა რომ სასქესო უჯრედებში მოთავსებული უნდა იყოს მთელი ტანის თვისება, რადგანაც ორივე ერთი და იგივე იდიოპლაზმიდან წარმოდგნენ. ამიტომ, როდესაც სასქესო უჯრედი განაყოფიერდება და მთელ არსებად იქცევა, ახალი ცხოველი, უქვევლია, თავის მშობლებს უნდა დაემგავოს. რადგანაც ყოველი სასქესო უჯრედი, რომლიდანაც შვილი ჩნდება, შეიცავს ნაწილს იმ იდიოპლაზმისა, რომლიდანაც მშობლები წარმოდგნენ. მეცნიერება აღარ უარყოფს შემკვიდრეობას, ის მხოლოდ ცდილობს ამ მოვლენის ახსნას. მომავალში ვეისმანის თეორიაც რომ უარყოფილ იქნას. შემკვიდრეობის ფაქტი მაინც ფაქტად დარჩება: ჩვენ მხოლოდ მისი ახსნა და შეგნება არ გვეცოდინება. შემკვიდრეობის მნიშვნელობა ხალხსაც კი შეუგნია დაკვირვებით და უთქვამს: დედა ნახე, მამა ნახე, შვილი ისე გამოიხატო. მეურნეობაში ამ კანონს ძალიან დიდი მნიშვნელობა აქვს. ბუნებრივი და ხელოვნური შერჩევის მნიშვნელობა ამ კანონზე არის დამყარებული, ჯანმრთელი და რაიმე მხრივ განვითარებული მშობლები უფრო საღ და ამტან მოღვაწეს ტოვებენ; ამ კანონის ძალით ადამიანს შეუძლია მცენარეთა და პირუტყვთა ჯიშის სურვილისამებრ შეცვალოს. შემკვიდრეობა მოქმედებს ტანის სიდიდეზე, სხვადასხვა ასოების გარეგნობასა და ზომაზე. ფერზე, ბალანზე და სხვადასხვა თვისებაზე; იორღა ცხენს.

იორღა კვიცი ჩამოუღის; კარგ მეწველ ძროხას — კარგი მეწველი ძროხა და სხე. ინსტინქტების მემკვიდრეობით გადაცემა ხომ ყველასათვის ცხადია. საექიმო მეცნიერებაში ყველასაგან აღიარებულია მემკვიდრეობის ძლიერება, ის ექიმი. რომელიც ავადმყოფს არჩენს და მისი მემკვიდრეობა კი არ იცის, გლახა ექიმი. გამორკვეულია, რომ თუ მამას რომელიმე ორგანო. მაგალითად. გული სუსტი აქვს. შვილსაც ეს ორგანო სუსტი ჰყვება; თუ მამა გაუნათლებელი იყო და გონების ვარჯიშობას მოკლებული. შვილი კი უმაღლეს სწავლას ეტანება (მარტო დიპლომისათვის არა. რასაკვირველია!), ხშირად ნერვებით ავადმყოფი — ნევრასთენი ხდება. რადგანაც მემკვიდრეობამ მას შრომას უჩვევი ტვინი არგუნა; აშკარაა, მემკვიდრეობის გავლენას თუ ბალანი და კანის ფერიც კი ვერ დაემალა, ვერც თავის ტვინი აცდება; თუ ავადმყოფობა, სხვადასხვა ორგანოსთვის ბანი მემკვიდრეობით გადადის შთამომავლობაზე. უეჭველია, ტვინის უჭრედებს ამა თუ იმთვისებასაც გადასცემს დედ-მამა შვილს. ვინც უარყოფს მემკვიდრეობას ტვინისთვისებათა გარდაცემაში, მან უნდა უარყოს ეს სხვა ორგანოების შესახებაც. ეს კი აბსურდი იქნება. რადგანაც ჩვენი აზროვნება ტვინის უჭრედების მოძრაობის ნაყოფია. როგორც ზემოთ დავინახეთ. ამ უჭრედებისთვისებაზე კი მემკვიდრეობა მოქმედებს. ამიტომ მწერლის ნაწარმოებზედაც უცილო გავლენა უნდა ჰქონდეს მემკვიდრეობას. ადამიანის ხასიათი ერთთავად ნაყოფია მემკვიდრეობისა: მწერლის ხასიათი კი ყოველთვის ატლევს თავისებურ მიმართულებას მის ნიქს. დამტკიცებულია, რომ მემკვიდრეობით ხშირად ბავშვებს გადაეცემათ ხოლმე დედ-მამის ან სხვა წინაპრების ცუდითვისებანი: ამის ბევრ მაგალითებს იძლევიან მცირეწლოვანი დამნაშავენი; მეორე მხრივ გამოცდილებამ დაამტკიცა. რომ ამგვარი ბავშვები აღზრდის შემწეობით კარგავენ მემკვიდრეობით გადმოცემულ ცუდთვისებებს. თუ ადამიანმა ზეპირად და ისწავლა რამე და რამდენისამე წლის განმავლობაში აღარ გაიმეორა, უმეტესი ნაწილი ავწყდება; აგრეთვე; რაც უფრო ხშირად ვიმეორებთ რამე. მით უკეთ გვრჩება გონებაში. როცა ბავშვები უცხო სიტყვებს სწავლობენ. ერთსა და იმავე სიტყვას რამდენჯერმე იმეორებენ და ამგვარის საშუალებით უკეთ იმანსოვრებენ. ამგვარად, ცუდ ტვინი ვარჯიშობს. ის იძენს ზოგიერთთვისებებს; თუ ვარჯიშობას მოკლებულია. შეძენის მაგიერ კიდევ ჰკარგავს. აღზრდა სარგებლობს თავის ტვინის ასეთითვისებით. ის ავარჯიშებს კარგთვისე-

1 ამგვარი მაგალითები ძალიან ბევრია ასლასან გამოჩული ექიმი. კახანოვის წიგნში.

ბებს და ამით ავითარებს ტვინს; ცუდის ვარჯიშობას კი ხელს უშლის და ამით. თუ ვერ ახშობს მათ, განვითარების ნებას მაინც არ აძლევს; ან. პირიქით. ცუდ თვისებებს ავარჯიშებს და ავითარებს. კარგს კი ახშობს. აღზრდითი მნიშვნელობა აქვს ოჯახს. სასწავლებელს, იმ საზოგადოებას და პირებს, რომლებიც მომავალ მწერლებს გარს ახვევია: აღზრდა აძლევს მის სულიერ თვისებას სხვადასხვა ელფერს და მიმართულებას და ამით ბეჭედს ასევე მის ნაწარმოებს.

ამგვარად, გარეშე ცხოვრება, ანუ სოციალური პირობები, მემკვიდრეობა და აღზრდა მწერლის მოღვაწეობის ხასიათის და შინაარსის წარმომშობია. ეს ფაქტები ერთგვარის მნიშვნელობისანი არ არიან.

სასწავლებლის, ოჯახის, საზოგადოების ხასიათი ნაყოფია სოციალური პირობების; ამიტომ, უმეტეს შემთხვევაში, აღზრდა სოციალურ პირობებს ემორჩილება. სოციალური პირობები ადამიანში ზოგ თვისებას ავითარებენ, ზოგს ახშობენ; ხშირად ბადებენ მათში ისეთ თვისებებს, რაც მემკვიდრეობას არ გადმოუცია და ამგვარად მემკვიდრეობაზედაც მოქმედებენ, მის გავლენას თავისებურ მიმართულებას აძლევენ. ამიტომ ზემოდხსენებულ ფაქტორებში მთავარი მნიშვნელობა აქვს პირველს — სოციალურ პირობებს. საზოგადოების, ერის ცხოვრება უცვლელი არ არის; ჩვენ გვწამს, რომ ის იმდენად იცვლება, რამდენადაც იცვლება ეკონომიური ნიადაგი; ეკონომიური ნიადაგი კი იცვლება იმდენად, რამდენადაც იზრდება და ვითარდება ერის მწარმოებელი ძალა. აშკარაა: იმ საზოგადოების ცხოვრება, რომელშიაც თითო ადამიანი შუათანა რიცხვით დღეში მანეთის საღირალს ამზადებს, სხვა იქნება, ვიდრე იმ საზოგადოების, სადაც თითო ადამიანი დღეში ორი მანეთის საღირალს ამზადებს. ამგვარად, მწარმოებელი ძალის მდგომარეობაზე დამოკიდებული საზოგადოებრივი განწყობილება, ურთიერთობა; საზოგადოებრივ ურთიერთობაზე კი დამოკიდებულია საზოგადოებრივი ფსიქოლოგია, ხასიათი. როდესაც იცვლება პირველი, ე. ი. მწარმოებელი ძალა, იცვლება საზოგადოებრივი ურთიერთობაც და ამას თან მისდევს საზოგადოებრივი ფსიქოლოგიის ცვლილებაც. ლიტერატურა, როგორც თავში მოვიხსენეთ, ხატავს საზოგადოებრივ ფსიქოლოგიას; მაშასადამე, მწერლის ლიტერატურულ მოღვაწეობაზე უმთავრესი გავლენა აქვს ერის მწარმოებელი ძალის მდგომარეობას (მწარმოებელი ძალა იზომება იმ ღირებულებით, რომელსაც განსაზღვრული ღრრის განმავლობაში ამზადებს მთელი ერი ან მისი ნაწილი; მაგალითად, ერთი ფაბრიკა თუ წელიწადში ორი ათასი თუმ-

ნის ჩიოს ამზადებს. მეორე კი ათასიას. მაშინ ვამბობთ: პირველის მწარმოებელი ძალა ორჯერ მეტია. ვიდრე მეორისა). ხოლო მწარმოებელი ძალის მდგომარეობა ხელოვნურ ლიტერატურაზე მოქმედებს არა პირდაპირ. არამედ შესაფერი სოციალური ცნობრებისა და საზოგადოებრივი ფსიქოლოგიის შექმნით.

მწარმოებელი ძალის განვითარება იწვევს საზოგადოებრივ განწყობილების ცვლილებას; ამის შედეგია, რომ ხალხის შეხედულება ირყევა. სხვადასხვა ფაქტორები: ან ფილოსოფია, ან პოლიტიკა, ან რაიმე რელიგიური სწავლა-მოდღვრება, გაიტაცებს ხალხს და გამოჰყავს სამოქმედო ასპარეზზე; ეს ფაქტორები ლიტერატურაზეც მოქმედებენ. მაგალითად. გერმანიაში მე-18 საუკუნეში ხელოვნური ლიტერატურის განვითარებას ძალიან შეუწყო ხელი ფილოსოფიამ. საფრანგეთში რესტავრაციის დროს ხელოვნურ ლიტერატურაზე პოლიტიკა მოქმედებს და სხვ. აგრეთვე ხშირად რამე ახალი იდეა ხელოვნურ ლიტერატურასაც იმორჩილებს და სულს უდგამს. მაგრამ როცა ლიტერატურის მკვლევარი ასეთ მაგალითებს ზედავს ისტორიაში, არასოდეს არ უნდა დაქმნა ფილოსოფიის მით. რომ ხელოვნური ლიტერატურის სათავედ ფილოსოფია. პოლიტიკა. რაიმე ახალი იდეა და სხვ., იცნას. მან უნდა ეძიოს თვით ამ ფაქტორების ფილოსოფიის. პოლიტიკის და სხვ. სათავე და ამგვარი ძიება მას ყოველთვის მატერიალურ პირობებთან მიიყვანს. თუ გენიოსი არისტოტელი ამბობდა: მონობა ლეთისაგან არის დაწესებული. ბიჩერსტოუ კი მონობის წინააღმდეგ იბრძოდა. ამის მიზეზი: ეკონომიურ პირობებში იყო. მეთვრამეტე საუკუნის მეორე ნახევარში რომ მწარმოებელი ძალა არ განვითარებულყო და საზოგადოებრივი ურთიერთობის შეცვლა ნელ-ნელა არ მოეთხოვა, ფრანგებს არ ეყოლებოდათ დღევანდელი კოლტერი. ინგლისელებს ბაირონი, გერმანელებს ბერნე და ჰეინე; მეთვრამეტე საუკუნის გასულის და მეცხრამეტის პირველი მეოთხედის ხელოვნური ლიტერატურა დასავლეთ ევროპაში, მცირეოდენი გამოწკნისის გარდა. გაყლენთილია თავისუფლების წყურვილით. ჰველ ზნე-ჩვეულებათა და შეხედულებათა დამბობის სურვილით. ყოველივე ეს კი შეუძლებელი იქნებოდა. რომ მწარმოებელი ძალის განვითარებას არ გაეზგრია პატრიარქული ფარგლები და არ მოეთხოვა სრული თავისუფლება.

მოკლედ. მხატვრული ლიტერატურის ხასიათი დამოკიდებულია უმთავრესად მწარმოებელი ძალის მდგომარეობაზე, შემდეგ მწერლის მემკვიდრეობაზე<sup>1</sup> და აღზრდაზე; ხოლო მწარმოებელი ძალა

<sup>1</sup> მწერლის ნაწარმოებში ყველაზე საძნელო საქმეს შეადგენს მემკვიდრეობის გველენის გამოაწკარაება; ამის მიზეზი რიგიანი ბიოგრაფიის უქონლობაა. საზო-

ლიტერატურაზე პირდაპირ არასოდეს არ მოქმედებს. არამედ მოქმედებს შესაფერისი სოციალური პირობების ფსიქოლოგიის შექმნით.

აქვე უნდა შევნიშნოთ, რომ თვითელი მწერლის მოღვაწეობაში ყველა ამ ფაქტორის გავლენის პოვნა და ყოველივე წვრილმანის ამ ფაქტორებით ახსნა მეტად ძნელია. ადამიანის ფსიქიური ცხოვრების მექანიზმის მათემატიკურ სინამდვილეზე დამყარება შეუძლებელია. თუმცა ადამიანი მანქანაა, მაგრამ ისეთი მანქანაა, რომელიც აზროვნებს. მოქმედებს და ამავე დროს გრძნობს თავის აზროვნებას და მოქმედებას. ადვილი შესაძლებელია, რაიმე მოულოდნელმა გარემოებამ ცვლილება შეიტანოს მის სულიერ მდგომარეობაში და ამით მის თხზულებასაც კვალი დააჩნოს. მაგრამ თუ ამ ფაქტორებმა მხატვრული ლიტერატურის შემთავრესი ძარღვი ახსნა, ეს სრულიად საკმარისია: ამის შემდეგ წვრილმანი ნიშნების ახსნა საძნელო საქმე აღარ იქნება. მკითხველმა არ იფიქროს, რომ ჩვენ ამ მიზეზებით ვფიქრობდეთ სამწერლო ნიჭის ახსნას; ფსიქოლოგია ჯერ იმდენად განვითარებული არ არის, რომ ტალანტის ახსნა შეიძლებოდეს ჩვენგან კი არა, გამოჩენილი მეცნიერებისაგან. ხოლო, როცა ნიჭი უკვე არსებობს. ადამიანი უნდა ეცადოს პირი მიმართულების და თვრების ახსნას. მხოლოდ ამგვარ ცდას წარმოადგენს ზემოხსენებული მოსაზრებაც.

როდესაც კრიტიკოსი გადადის მხატვრულ ლიტერატურის დაფასებაზე. გარკვეული უნდა ჰქონდეს თავისი შეხედულება ღირსებანაკლოვანებების შესახებ. რანაირი მიმართულების და ნიჭისაც უნდა იყოს მწერალი, ნაკლოვანებასთან ერთად რაიმე ღირსება ყოველთვის იქნება მის ნაწერებში: ენა. ლამაზი რითმები. ბუნების საუცხოო სურათები და სხვ. თუ კრიტიკოსმა ყოველ მწერალს ის ჩამოართვა ღირსებად. რასაც თვითონ მწერალი აძლევს, ასეთი რკვევით ვერავითარ სარგებლობას ვერ მოუტანს მკითხველს და დაემსგავსება იმ პეპელას. რომელიც ერთგვარის კმაყოფილებით დაფარვებებს ყოველ ყვავილს, გინდა სურნელოვანი იყოს. გინდა არა. თავდაპირველად მწერალი უნდა ხატავდეს ნამდვილ ცხოვრებას, რადგანაც ცხოვრებაში ბევრი უსამართლობა ხდება. ბევრი უზნეობა და ბოროტები. ითვსება, მწერალი უნდა ფარდას ხდიდეს ყოველისფერს, უნდა ებრძო-

---

გადავ, ლიტერატურის ყოველ მკვლევარს მეტად ვაუადვილებდნენ შრომას მწერლები, თვითონვე რომ სწერდნენ თავის ბიოგრაფიას და მასში იხსენებდნენ ღელის, შორეული წინაპრებისა და ძმების ხასიათს.

დეს უსამართლობას და ბოროტებას. იცავდეს ადამიანის ღირსებას და პიროვნებას, აღვიძებდეს და ავითარებდეს მკითხველში კეთილშობილურ მისწრაფებას, სიყვარულს კეთილისადმი, ზიზღს და სიჭულვილს ბოროტებისადმი. როგორც საზოგადოდ მეცნიერებას. ხელოვნებასაც მიზნად უნდა ჰქონდეს დასახული ცხოვრების გაუმჯობესება. ადამიანის სულიერი ამაღლება. თუ ხელოვნება ამ უმთავრეს დანიშნულებას არ ასრულებს, უმნიშვნელოა და, როგორც ყოველისფერი უსარგებლო, უარყოფილი უნდა იყოს... რაც შეეხება ესთეტიურ სიამოვნებას, ის ჩასკენილი უნდა იყოს მთავარ მიზანში; მწერალმა სიამოვნება სარგებლობას უნდა შეუერთოს, რომ ამით უკეთ განახორციელოს თავისი მიზანი. თუ მას მარტო ცარიელი სიამოვნება აქვს დასახული მიზნად, რა ლამაზიც უნდა იყოს მისი ენა, რა მუსიკალურა და მდიდარი მისი რითმა, რა საუცხოოც უნდა იყოს მისი სურათები, პეიზაჟები, ხელოვნების სამთავროში მას ალაგი არა აქვს. ვისაც დავიწყებული აქვს უმაღლესი მიზანი და ემსახურება ადამიანის მდაბალ გრძნობებს, უღირსია, ჯერ, როგორც ადამიანი, შემდეგ, როგორც მოღვაწე. რადგანაც თავისი მოღვაწეობით ცხოვრების გაუმჯობესებას ხელს კი არ უწყობს, წინ ეღობება. რაც შეეხება ზოგიერთის აზრს: წმინდა ესთეტიკა ადამიანის სულს აფაქიზებს და აკეთილშობილებსო, ცარიელი სიტყვებია, არავითარი დაკვირვება მას არ ამართლებს. ამგვარად, ცარიელი ესთეტიკა, თუ საშუალებას არ შეადგენს უმთავრესი მიზნის მისაღწევად, უარყოფილი უნდა იყოს. ვისაც ბაირონის ან ჰეინეს ლექსის მხოლოდ გარეგანი სილამაზე ატკბობს და არა მისი აზრი, მისი საოცარი სიბასრე თავისუფლების დასაცველად, ის არათუ თავის თავს, ბაირონსა და ჰეინესაც ამცირებს.

ამ მოსაზრების შემდეგ ჩვენ მივმართავთ ე. ნინოშვილის მოთხრობებს<sup>1</sup>, ვეცდებით ავხსნათ ამ მწერლის ლიტერატურული მოღვაწეობა და მივუთითოთ მკითხველს მის ღირსება-ნაკლოვანებაზე.

## II

მოწყვეტილ ვარსკვლავსავით ნინოშვილმა მხოლოდ გამოშუქება მოასწრო და მალე, ჩაქრა, მაგრამ ამ პატარა ხნის განმავლობაშიც ბევრის გაკეთება შესძლო, ბევრ საყურადღებო კითხვას შეეხო, ბევრ ახალ მოვლენაზე მიუთითა მკითხველს. მხატვრისა და პუბლიცისტის ნიჭი მასში ერთად იყო შეზავებული; თითქმის ყოველი მისი მოთხრობა პუბლიცისტური ხასიათისა არის და მისი ნი-

<sup>1</sup> იხილეთ ფელეტონს გურიის ცხოვრებიდან, რომელიც ნინოშვილს „ივერიანში“ ჰქონდა დაბეჭდილი, ჩვენ არ შევხებით.

ქის უმთავრესი ღირსება და მნიშვნელობაც ამაში მდგომარეობს. ნინოშვილის მიზანი იყო, დაესურათებია მკითხველისათვის ჩვენი გლეხის დღევანდელი მდგომარეობა და ამ მდგომარეობის ტენდენცია. ყოველ თავის მოთხრობაში ის აღნიშნავს გლეხის კეთილდღეობის ნელნელა დაქვეითებას, მისი ოჯახის დაღუპვას. ზოგ თავის მოთხრობებში ის აღნიშნავს იმ მიზეზებს, რომლებიც გლეხის ოჯახს შიგნიდან ურყევად საძირკველს. პირველი რიგის მოთხრობებს ეკუთვნის: „გოგია უიშვილი“, „პალიასტოპის ტბა“, „სიმონა“, „განკარგულება“, „მონადირე“, „მოსე მწერალი“, მეორეს: — „უცნაური სენი“, „პარტახი“, „არშიყნი“ და „ჩვენი ქვეყნის რაინდი“. ჩამოთვლის რიგზე გავარჩევთ ჩვენც ამ მოთხრობებს.

გოგია უიშვილი იყო ღარიბი გლეხის შვილი, მამამისმა მთელი სიყმაწვილე და ვაჟკაცობა ბატონის სამსახურს შეაღია. მამის სიყვდილის შემდეგ გოგიას და მის ორ ძმას დარჩათ პატარა ძველი ფიცრული სახლი, ნალია, ფაცხა და შვიდი დღიური „სანადელო“ მიწა. ჯერ გაუყოფელადაც რომ დარჩენილიყო ეს უძრავი და მოძრავი ქონება, მაშინაც რა იქნებოდა, თორემ სამად გაყოფის შემდეგ უფრო რა! ძველი სახლის ამარა დარჩა გოგია, მაგრამ ის და მისი ცოლი, მარინე, გულს არ იტეხდნენ: ხელს გავანძრევთ, გავირჩებთ და სიღარიბე ტბილ ცხოვრებად შეგვეცვლებაო. იმედი ის მძლავრი ყავარჯენია, რომელსაც ეყრდნობა ხოლმე გლეხი: რანაირი გაჭირვებაც უნდა ადგეს; ნახევარჯერ რომ მშიერი იყოს, მაინც გულს არ იტეხს იმედი აქვს: როცა იქნება, ჩემსკენაც გადმოიხედავს ღმერთიო, და ეს იმედი ჰფენს მცირეოდენ შუქს მის ბნელ ცხოვრებას, იმედით იმხნევებდა ახალგაზრდა გოგია გულს, მაგრამ რანაირად უნდა შესწრებოდა, „ტკბილს“ თავი დავანებოთ, უკეთეს ცხოვრებას? ორი კვალი მიწა, ისიც საბატონო — იმდენს არ აძლევდა, რაც უნდა ეშრომა, რომ კუჭი გაეძლო; სხვადასხვა გადასახადი, რომელიც ყოველ წელს იზრდებოდა, როგორღა უნდა გადაეხადა? გოგიას დაესია წვრილშვილი; მათი პატრონობაც ხომ ზედმეტ ხარჯს ითხოვდა; რაც დრო გადიოდა, გოგიას ცხოვრება არა თუ ტკბილდებოდა, როგორც ის ინუტეშებდა თავს, უფრო მწარდებოდა. წლებზე ფეხს იღვამდა გოგია, მიწას ოფლით რწყავდა; თავი აქინდრულ მუშაობაში ისე გამოეპარებოდა დღე, რომ მზეს ვერც ამომავალს დაინახავდა და ვერც ჩამავალს, მისმა სიყმაწვილემ გაირბინა, ჭაღარა გამოერია და რა დარჩა შედეგად? უარესი ცხოვრება ჯა გატეხილი გული, სიყმაწვილეში გოგიას მთელი გული ქონდა, მძიმე უღლის ზიდვაში მუდამ იმედი — უკეთესი მომავლის წარმოდგენა ახსნეებდა მას: დღეს



კი ეს უკეთესი მომავალი სადღაც გადაიკარგა სამუდამოდ. გოგიას გული გაუტყდა, ბედს ჩივილი დაუწყო; მალე ჩივილი ბედის წყევლად გადაექცა. ახალგაზრდა გოგია თუ ფიქრობდა, სიბერეში სიტყბობებს შეევსწრებო, ჭადარაშერთულ გოგიას სანეტარო ფიქრი მწარე ოხვრად შეეცვალა; „სიკვდილი ჯობია ჩემს სიცოცხლესო“, ხშირად ამოხდებოდა ხოლმე გულიდან. გოგიამ დათალა ფიცრები, რომ ახალი ოდა დაედგა, მაგრამ გაჭირვებამ გააყიდვია ფიცრები. მებატონე, მღვდელი, მამასახლისი, ნაცვალი — ყველა მას წოვდა სისხლს და რომელ ერთს გასწვდებოდა, თუ არაფერს გაყიდდა? მარინეს მზითვეიც გადასახადს მოუნდა, კაბაც კი ვერ გადაურჩა! თავის დაღუპვის მიზეზად გოგიას გადასახადი მიაჩნდა. ამიტომ ხანდახან მოთმინებიდან გამოსული კიცხავდა თავის მტანჯველს, უსამართლობას და, რაც გულში ნალველი ჰქონდა დიდი ხნიდან დაგროვილი, შეუკავებლად გადმონათხევდა. ამის გამო რამდენჯერმე ხიფათშიაც კინადამ გაება. ერთხელ მღვდელი უპირებდა ოქმის შედგენას, მეორედ მამასახლისი. ახალწელიწადის წინა დღე არის; გოგია თავის ცოლ-შვილშია; დღეს ივიწყებს ის თავის ჭირ-ვარაშს, უნუგეშო ცხოვრებას; უნდა ერთხელ მაინც გამოცადოს, თუ რა არის მხიარულება, სიამოვნება, სიყვარული, ალერსი, მის პატარა, მკვარტლით გაშავებულ სახლში საერთო მხიარულება. გოგიას საახალწლოდ ყოველისფერი დამზადებული აქვს და კმაყოფილია. ბავშვების სიხარულს ხომ საზღვარი აღარ აქვს. ერთ საქმეში იყო პატარა ორწლინაბევრის ქალი თებრო: ხან დედასთან მივიდოდა და დაუწყებდა ყურებას და ტიკტიკს:

„—ნენა, დიდი პული კიდევ გააკეთეფ?... სულო, სულო..

ხან მამას ეხვეოდა და ეუბნებოდა:

„— მამა, ხვალ კალანდაია, მე ალ დევიძინავ...“

გოგიაც შვილებს ეალერსებოდა და მათთან ერთად მხიარულობდა, ერთად ერთი ნუგეში და მოსაოხარი გლენისათვის ოჯახნია. მთელი მისი ცხოვრების დედაძარღვი, მისი სიცოცხლის მიზანი ეს ოჯახნია. დღეს თავის ოჯახში, თავის პატარა შვილებში. გოგიაც გამხიარულდა და სიამოვნებით სახეგაშლილი და გულშემსუბუქებული მოელის ხვალინდელ დღეს. მისი საუკეთესო ნუგეში და გამამხნევებელი ერთ დროს იმედი იყო, რომელიც არც ერთ გაჭირვების დროს მას არ შორდებოდა. ჭადარაშემორეულ გოგიას იმედმაც უღალატა; მაგრამ ახალი წლის მოლოდინში ცოლ-შვილში მხიარულებამ დაავიწყებია უნუგეშო აწმყო და მის გულში კიდევ ძველის ძლიერებით შემოაშუქა იმედმა.

„აი, წმიდაო ბასილე, თუ გამიმართლო საეტლო ის სიტყვა —

ბოლო ეამს კაი ცხოვრებაო, რომ მიწერს! აი ღმერთო, თუ ამ კალანდიდამ მოწყებული წაღმა შეატრიალო ჩემი იღბალი!" ამბობდა გოგია, იმედზე მტკიცედ დანდობილი. მაგრამ მისი ცხოვრება ისე მოეწყო, რომ ხანგრძლივ მხიარულებას მისი გულისაყენ და ბედნიერებას იმის ოჯახისაყენ ყოველის მხრიდან ვზა აქვს შეკრული. რადგანაც სოფელში ავაზაკობა იყო გახშირებული, მთავრობამ „ზეკუცია“ ჩამოაყენა სოფელში, ვითომდა სოფლის დასაფარავად, გინდა მგელს შეუქვამივარ, გინდა მგლის ფერ ტურასო, — სწორედ ამაზე არის ნათქვამი. მთავრობის ასეთმა ზომამ გლეხებს სიცოცხლე გაუმწარა უფირალების შემცირების მაგიერ მათი რიცხვი უფრო გამრავლდა. გლეხობას უნდა ეძლია უფროსისა და ყაზახებისათვის სასმელ-საჭმელი, ეზიდა შეშა, ეძლია ფული და სხვ. ამას ზედ ერთობოდა მრავალი უსამართლობა და შეურაცხყოფა. როცა მხიარული გოგია ახალწლის მზადებაში იყო, მოადგა ნაცვალი ყაზახ-რუსებით და ერთი თუმანი თხოვა. რადგანაც გოგიას ფული არ ქონდა. ყაზახებმა საკალანდო სამზადისი წაართვეს, ძალი მოუტლეს, გოგიას თავ-პირი დაამტკიცეს. ესეც არ აკმარეს: შებაწრეს და წაიყვანეს უფროსთან. ასეთი უსამართლობით გოგიას ნაღველით ევსებოდა გული. მაგრამ იმდენ ხალხს ერთი რას უზამდა! მას იმედი ქონდა, რომ სამართალი არსებობდა ქვეყნათ და ამიტომ თამამად მიდიოდა კანცელარიისაყენ, რადგანაც დარწმუნებული იყო, რომ სამართალი და კანონი დაიფარავდა მას, აქ იცნობდნენ მის უდანაშაულობას და გამოესარჩლებოდნენ. გოგია ჯერ მამასახლისს შეყვირის: თუ სამართალი გაქვს მიპატრონეო, მაგრამ იმას აქეთ-იქიდან აჩუმებდნენ: ნაჩაღნიკმა არ გაიგონოსო, გოგიას სწამს სამართალი. სწამს, რომ სამართლის წარმომადგენელი დაიფარავს მას: მამ რიდასი სამართალია, თუ მართალს არ აპატიებს? ამიტომ გოგია განგებ ცდილობს, უმფროსს ყოველისფერი გააგონოს და მას შეაბრალოს თავისი თავი.

„— მეც იგი მინდა გეიგონოს, ნაჩაღნიკი თუა და მოსამართლე, ავია, დამაქციეს და მიპატრონოს!“ — იძახდა გოგია.

მაგრამ იმედმა აქაც უმტყუნა გოგიას, არათუ შეიბრალებს, მათრახით გაასივა მან, ვისგანაც შველას ელოდა! გოგიამ დაინახა მთელი თავისი უმწეობა. დარწმუნდა; რომ მისთვის არც სამართალი არსებობდა და ძალაუფლებურად გადმოხეთქა ამ სიტყვებმა:

„— ჩვენდა ქვეყანაზე სამართალი არ ყოფილა! მე მომთხარეს, მე დამაქციეს, მე გაძლახეს! სამართლის კარზე მოველი მეგონა და აქანაი უარესი მიყვეს! სად ხარ, სამართალო, ღმერთო, ხატო, რჯულო!“

მაგრამ სამართალი არსად იყო, სამართლის მოწოდებაც კი კა-

ნონის დარღვევად ჩაუთვალეს გოგიას და ოცდაათი წყებლა დაარტყეს. ამ გარემოებამ გოგია მიწასთან გაასწორა. სამართლის ალაგას თუ უსამართლობას და ძალმომრეობას ნახავდა, ამას ის არასოდეს არ მოელოდა. გოგიას უბრალო ყაზახებზე მოსდიოდა გული, სამართლის წარმომადგენელმა კი უარესი დღე დააყენა და დაუმტკიცა მას, რომ სამართალი ნამდვილად ისეთი არ იყო, როგორც გოგიას ჰქონდა წარმოდგენილი.

„...რა ვქნა! ღმერთთა მოწამე, რაც თავს მოვსწრივარ, მერე დღეი არ მომისვენია და ღამე, ჩემი ოფლი მიწას ერთოდა, მარა ჩემს დღეს საშველი არ დაადგა! ერთი სიხარული არ მიხახავს! სხვაი სხვა იყო და შოლტით ხომ!.. არა, ამას იქით ყოფნა აღარა ღირს“.

ამდენი უბედურება ვეღარ აიტანა გოგიამ და სიცოცხლეს სიკვდილი არჩია, სააქაოზე გულგატეხილ გოგიას საიქიოზედაც კი ეჭვი შეეპარა. „რა ვიცი, სად მივალო“, ამბობდა ის სიკვდილის წინათ გოგიას უკანასკნელი სიტყვა იყო: „ეკითხოსო“ და ამ სიტყვაში შეაერთა მან მთელი თავისი ტანჯვა. მწარე ფიქრები, ჩივილი უსამართლობასა და უკანონობაზე.

ერთნაირმა გაჭირვებამ, მძიმე უღლის ერთად ზიდვამ, მარინესაც გაუტეხა გული; მაგრამ გაჭირვებაში მარინეც გოგიასავით იმხნევებს თავს: ღმერთი მოწყალეა, სულ ხომ ასე არ დაგვაგდებსო. გადის წლები, მარინე უარეს ყოფას თუ ესწრება, თორემ უკეთესს არა. ქვეყნიერებაზე არ მოიპოვება ისეთი სისაძაგლე და საზიზღროება, რომელსაც ადამიანი ვერ მიეჩვიოს. მარინეც ბამბის ფთილასავით მოქნა გაჭირვებამ; ის ყოველისფერს ითმენს, ყოველისფერს იტანს. თუ ხანდახან გულგატეხილ გოგიას უპასუხებს ხოლმე; როცა იქნება, ღმერთი ჩვენითანა გაჭირვებულებისაკენაც გადმოიხედავს და მოგვემს ტბილ ცხოვრებასო, თავის სიტყვები თითონაც აღარ ჯერა, თავის ძველ იმედს თითონაც აღარ ენდობა. თუ გოგიას თავის გაჭირვებასთან ერთად სხვისი გაჭირვების მზერა უფრო უკლავს სასოებას და ათქმევინებს: „მეც იმას ვტირი, რომ ჩვენი ცხოვრება ასე უსაბუთოდ არისო“, მარინეს სხვისი გაჭირვება თითქო მწუხარებას უმსუბუქებს. „მარტო ჩვენ ხომ არა ვართ ასე, ყაძახს ასში ერთს ვერ ნახავ, ჩვენზე უკეთესად იყოსო“, ამბობს ის და გულს ინუგეშებს: „რა ვუყოთ, საცდელი ჩვენ არ დაგვიკლია და თუ ვერ ვიხეირეთ, ალბათ. ასე ყოფილა ჩვენი ბედის წერაო“. გოგიას კი სწორედ ეს უფრო აწყვევლინებს ბედს: ის და მისი მეზობლები ცხოვრებას ებრძვიან. დღეს იმოკლებენ, მაგრამ საშველი არსაით არის. გოგია გრძნობს, რომ ამგვარი ცხოვრება სრულიადაც არ არის მათი „ბედისწერა“. რომ მათი ცხოვრება „უსაბუთოთ არის“ მოწყობილი, გრძნობს უსა-

მართლობას, ძალმომრეობას, მაგრამ თავი ვერსაით დაუღწევია. უსამართლობა თუ ბრანზმორეულ გოგიას ხშირად წარმოათქმევინებს გულის ნადებს და ყველასადმი საყვედურს. მარინე სახლშიც და კარშიც მორჩილებას არის შეჩვეული და ამიტომ ყოველისფერს გულშივე იკლავს. უსამართლობამ მხოლოდ ერთხელ ამოადგმევინა მარინეს ენა და ათქმევინა: „არ ყოფილა ჩვენდა სამართალი. უფროსი არა, თათარი ყოფილაო“. მაგრამ მისმა ფილოსოფიამ აქაც მალე მოიყვანა გონს: როცა უსამართლობამ და კანონის მაგიერ საზიზღარი უკანონობის ხალვამ გოგიას ისეთი თავზარი დასცა, რომ სიკვდილი აფიქრებინა, და იმსხვერპლა კიდევ, მარინე თავს იმაგრებს და ქმარსაც ამხნევებს. „ახლა თავი რომ დავიხოცოთ, იმით რა გაგვიკეთდება? რა ვუყოთ, ბევრს ჩვენზე უარესიც დამართიაო!“ მარინეზე გაჭირვება და უსამართლობა იმდენად არ მოქმედებს, როგორც გოგიაზე. ეს ადვილი ასახსნელიც არის. გლეხკაცი მცირეოდენი დამოუკიდებლობით მაინც სარგებლობს. გარეთ თუ სხვისი მორჩილია, თავის ოჯახში მაინც არის უფროსი და მბრძანებელი. ქალი კი მორჩილებაში აღზრდილია; გათხოვებამდე მამის მორჩილია, გათხოვების შემდეგ ქმრისა. მან არ იცის, რა არის თავისუფლება, დამოუკიდებლობა, პიროვნების შელახვა და ამიტომაც არც შეუძლია ყოველივე ამის რიგიანად დაფასება.

ამავე უსამართლობას ვხედავთ „განკარგულებასა“ და „მონადირეში“. სოფლის ღარიბ ნაწილს ეკუთვნის კაცია მუნჯაძეც და. თუ გაგვაცნო ავტორმა მისი მარტივი ცხოვრება და უბედურება, იმიტომ, რომ დაენახვებია გლეხკაცის გაჭირვებული მდგომარეობა და უსამართლობა, რომელიც მას ღუპავს. კაცია მუნჯაძე ბატონის გლეხია; წვრილშვილი, დილიდან საღამომდე მუშაობს, ოფლად დნება, მაგრამ მუშაობით კუჭიც ვერ გაუძლია, არათუ სხვა მოთხოვნილება დაიკმაყოფილოს; თითონ ტიტველი დადის, ცოლ-შვილი შეუმოსავი ჰყავს. კაციას ხარებიც არ გააჩნდა, საქირაოდ რომ წასულიყო. ბოლოს იჭირავე ცალი ხარი და გადაწყვიტა: სიმინდს მაინც გავყიდი და შვილებს დაემოსავო. კაციას სად ჰქონდა გასაყიდი სიმინდი, მაგრამ შვილების საცოდობა კლავდა. მთელი დღის ნამუშევარ კაციას ნაცვალი მოადგა კარზე და შეატყობინა: დიდი კაცი მოდის და ამალამ დარაჯად უნდა გახვიდე რკინიგზის ლიანდაგზეო.

„რამდენი რა არ ტრიალებს საწყალის ყაზახის თავზე! ცოლ-შვილი დაარჩინე, ფოშტის ფული გადაიხადე. უჩიტლის. მწერლის, გზის; სამუშაოზე წადი, სადარაჯოთ წადი, ყველას მორჩილება გაუწიე, ყველას ემსახურე! არა. ძალიან უბედურათ არის ყაზახის ცხოვრება მოწყობილი!“ ფიქრობდა კაცია, მაგრამ რა ექნა. როგორ

დაედნია ამ უბედურებიდან თავი? სიღარიბემ და აუტანელმა შრომამ მთლად მოტეხა ის, მაგრამ მისი შებრალება არავის აქვს, მის მდგომარეობაში არავინ შედის. დაქანცული კაცია წავიდა სადარაჯოთ, დაეძინა ლიანდაგზე და მატარებელმა გასრისა. ვინ იცის, მკითხველო. იქნება სიკვდილი უმჯობესიც იყო მისთვის!

უსამართლობას გვიხატავს ავტორი „მონადირეშიც“, სადაც ბეჟანას გარეული ღორის მოკვლის გულისათვის ასცხრა მანეთი გადაახდევინეს და წელიწად-ნახევრით სატუსალოში ჩაამწყვდიეს.

გაიცნობ, მკითხველო, გოგიას. კაცისა და ბეჟანას თავგადასავალსა და უბედურებას და, თუ ტანჯულისა და დაჩაგრულისადმი სიყვარული ოდნავადაც არის ათბობს შენს გულს, უექველია, გულს შეგიზარავეს მათი მარტივი, მაგრამ დაუსრულებელ უბედურებაზე აგებული ცხოვრება: ყველა ამ პირებს, ერთი მხრით სოციალური პირობები აუტანელ ცხოვრებაში აყენებენ. მეორე მხრით, ხალხის ზნე-ჩვეულების შეუფერებელი სამართალი, ხალხის ბუნების არმცოდნე მოსამართლენი ღმერთზედაც კი საყვედურს წარმოათქმევენებენ და სიცოცხლეზე ხელს ააღებინებენ. გოგია იმ ზომამდის მიიყვანა ცხოვრებამ და უსამართლობამ, რომ სიკვდილი არჩია სიცოცხლეს; ისე დაკარგა სასოება, რომ საიჭიოზედაც კი გული გაუტეხა და სიკვდილის დროს გლეხის ერთადერთი იმედი და ნუგეში — საიქოს იქნება მაინც მოვისვენო — უიმედობით შეეცვალა „რა ვიცი სად მივალო“, ამბობდა სიკვდილის წინ გოგია, ე. ი. ვინ იცის, იქნება არც იქ შემიწყნარონ. ვერც იქ ვიპოვო სამართალი და მფარველიო...

გოგიას კეთილდღეობას ორი გარემოება უთხრის ძირს: ერთი, თვით ცხოვრება, მეორე, უსამართლობა. ყოველი ადამიანი, რომელიც რაიმე მხრით ეხება ჩვენს ცხოვრებას, ან საქართველოს პოლიტიკურად სიკვდილს უნდა შეეხოს, ან ბატონყმობის მოსპობას. ერთ-ერთ ამთავანს ვერ აცდება, რადგანაც ორივეს ძალიან დიდი მნიშვნელობა ჰქონდა ჩვენს ცხოვრებაში. ბატონყმობის მოსპობასთან ერთად გლეხი განთავისუფლდა. თავის სრული პატრონი გახდა. ყველას ცხოვრება რომ შესაძლებელი იყოს, ჯოჯოხეთიც აღარ იქნებოდლო! ცხოვრების ისე მოწყობა, რომ ყველა ერთნაირად ბედნიერი იყოს და თავისი სვედრის ერთნაირად კმაყოფილი, შეუძლებელია. ჯერ ბატონყმობის მოსპობამდე ჩვენი გლეხობა ერთფეროვანი არ იყო: ბედნიერი და უბედური, მდიდარი და ღარიბი მაშინაც არსებობდა. ბატონყმობის მოსპობამ კი ხელი შეუწყო ამ მრავალფერობის გამოაშკარავებას; გლეხობის ერთი წილი თუ თანდათან თავს აღწევს გაპირვებულ ცხოვრებას, მეორე წილის ცხოვრება ვერ მი-

დის. წინათ გლესს ნაკლები მოთხოვნილება ჰქონდა, სახელმწიფოც არ აწვა ასე მძიმე უღლად კისერზე; ხარჯს ნამუშევრით ისტუმრებდა, ყიდვა არაფრის ღირდებოდა, — ტანისამოსსაც კი შინ მომზადებული სამოსლისა და შალისაგან იკერავდა. დღეს კი ცხოვრება გართულდა; ცხოვრების წინმსვლელობამ გლესიც გაიყოლია, სახელმწიფოს მოთხოვნილება მოემატა; ამიტომ გლესის სხვადასხვა გადასახადმა იმატა. წინათ გლესი თუ მიწის მოსავლით ისტუმრებდა გადასახადს, ახლა მას მარტო ფულს თხოვენ. ფულის შოვნა კი მას ძალიან უჭირს! წინათ თუ გლესი შინაური სამოსლით იმოსავდა თავს, გართულებულმა ცხოვრებამ გლესის გემო და მოთხოვნილება შეცვალა და გააფართოვა. ამგვარი სამოსლის ჩაცმა დღეს ახალგაზრდა გლესს კიდევ ეთაკილება. ყოველგვარი მოთხოვნილების დასაკმაყოფილებლად დღეს გლესს ფული ღირდება; უფულობა მას თანდათან ავალიანებს, აყიდვინებს ყოვლისფერს, მარტო თავისი მკლავების ამარა დატოვებს. ამგვარი გლესების რიგს ეკუთვნის გოგია უიშვილი და კაცია მუნჯაძე. სამართალი ხომ ხალხის ბუნებას და ზნე-ჩვეულებას არ შეეფერება და ცხოვრების ასეთი მსვლელობა საკმარისია, რომ გლესის მდგომარეობა თანდათან აუტანელი გახადოს. უსამართლობამ უფრო გაამწვავა გლესის მდგომარეობა. ჩვენ სოფლებში ხშირია ისეთი მოსამართლეები, რომლებიც სრულებით არ იცნობენ ხალხის ბუნებას, მის ზნე-ჩვეულებას და ენას. ამის გამო სამართლის მაგიერ ხშირად უსამართლობა ხდება; მთავრობა ხალხის ტვირთის შესამსუბუქებლად ხშირად ისეთ ზომებს სმარობს, რომ ხალხს დახმარების მაგიერ უარეს დღეს აყენებს. „გოგია უიშვილში“ მთავრობამ „ზეკუცია“ ჩააყენა სოფელში ფირალების მოსასპობად, ფირალები კი ათ წელიწადს ვერ მიაყენებდნენ სოფელს იმდენ გაჭირვებას, რამდენიც „ზეკუციამ“ ერთ წელიწადს მიაყენა. ფირალების მოსპობის მაგიერ ასეთი ზომით მთავრობამ უფრო გაამრავლა მათი რიცხვი. თუ ხალხი ფირალებს არ აძლევდა მთავრობას, ამაში ხალხი არ ყოფილა დამნაშავე. თუ გლესს მტერს მოაშორებთ. დიდ მადლობას გადაგიხდის, მაგრამ საქმე აი, რაშია: ბევრი ყოფილა ჩვენში ისეთი მაგალითი, რომ ხალხი შეუტყრებიან. გამოუცხადებიათ მისთვის: ქურდები და ავაზაკები მოგვეციოთ და გაგანთავისუფლებთ მათგანო. სოფელი გახარებულა, რჩევა-თათბირის შემდეგ მიუცია მთავრობისათვის ყველა ავი კაცი, მაგრამ ასეთი საქციელი ძალიან ძვირად დაჯდომია სოფელს. მე თვითონ ვიცი ისეთი მაგალითები, როცა ზემო იმერეთში მთავრობის რჩევით, სოფლებმა ქურდები გასცეს და შემდეგ მხიარულად გაიძახოდნენ: თუ ღმერთი შეგვეწია, ამას იქით ძალიც აღარ დაგვეჭირდებაო. მაგრამ

ქურდები კანცელარიის სატუსალოს არ გასცილებიან. რამდენსამე კვირის ან თვის შემდეგ ადგილობრივი კანონის წარმომადგენლების გულკეთილობისა გამო გამობრძანებულან და თავისი გამცემლები ცეცხლით გადაუბუგავთ. ამას შემდეგ ვინ გაამტყუნებს ხალხს. რამ მთავრობის და კანონისადმი მან ნდობა დაჰკარგოს? გოვიას უკანასკნელი სიტყვა: „მოჰკითხოხო“, მარტო იმათ კი არ შეეხება, ვინც უკანონობას სჩადის, არამედ იმათაც, ვინც უკანონობას ხედავს და არ ებრძვის მას; ვისაც შეუძლია, ხალხს დახმარება აღმოუჩინოს და არ ეხმარება, ვისაც საშუალება აქვს, სხვისთვისაც იზრუნოს და არ ზრუნავს.

ამგვარად, თავის პირველ მოთხრობაშივე ნინოშვილმა მიგვითხა გლეხის გაქირვებულ მდგომარეობაზე და დაგვანახა ორი მიზეზი: სოციალური პირობები და სამართლის წარმოების ნაკლოვანებანი, რომლებიც გლეხის ოჯახს ძირს უთხრიან.

### III

რადგანაც შავი ზღვა საქართველოს მთელ რუსეთთან და ევროპასთან აერთებს, ეს გარემოება უსათუოდ დიდ გავლენას იქონიებდა შავი ზღვის ახლომანლო მდებარე ქვეყნების ცხოვრებაზე. ამ გარემოებას უნდა მიეწეროს, რომ გურია-სამეგრელო კაპიტალისტური წარმოების გზას ადრე დაადგა, ვიდრე საქართველოს სხვა კუთხეები. მან გაიწვია ბათომში, ფოთში, ნოვოროსიისკში, ოდესაში და სხვა ქალაქებში ქართველი მუშა, ააღორძინა ქართველებში ვაჭრობა და დაბადა სოფელში სხვადასხვა მრეწველობა. „პალიასტომის ტბაში“ მოთხრობილია, თუ როგორ შეცვალა გურული გლეხის ცხოვრება ახალმა პირობებმა. ცვლილება დაეტყო, ერთის მხრით, იმ საშუალებებს, რომლებითაც გლეხი თავს ირჩენს, მეორეს მხრით, მის შეხედულებას და ჩვეულებას. კაპიტალიზმის განვითარებამ ევროპაში ყოველისფერი დაიმორჩილა, ყოველისფერს თავისი დალი დაასვა. ხელოვნებაც კი, რომელიც ძველი ბერძნების აზრით ღმერთების კალთებს ქვეშ იყო შეფარებული, დღეს კაპიტალიზმის მონა გახდა; უწინ თუ იყო „ხელოვნება ხელოვნებისათვის“. დღეს ეს მხოლოდ ლიტონი სიტყვებია: სხვა მიზანიც რომ არა ჰქონდეს რა ხელოვნებას, ფულს მაინც ვერსათ დამალება, ფული გახდება მის მიზნათ; დღეს ევროპაში კარგი მწერალი ნიქს გარდა ფულით გატენილ ჯიბესაც ნიშნავს. მეცნიერებამაც ფულის ბატონობას მოუხარა თავი. ამის საუცხოო მაგალითს წარმოადგენს შესანიშნავია მეცნიერი კოხი, რომელმაც თავისი ტუბერკულოზის ჩხირებით მილიონები შეიძინა; ბერინგი, რომელსაც დიფტერი-

ტის საწინააღმდეგო შრავი მილიონ ფრანკზე მეტს აძლევს წელიწადში. მრავალ სხვა ზნე-ჩვეულებასაც შეეხო კაპიტალიზმი თავისი ანგარიშების მოყვარე ხელით. დღეს ევროპაში ქორწინება მხოლოდ კომერციულ აქტს წარმოადგენს; ამ ცვლილებამ ჩვენშიც დიდი ხანია იჩინა თავი თავად-აზნაურობაში. ჩვენებური თავადი და აზნაური ქორწინებით უმთავრესად ფულის შექმნას ფიქრობს; იმერელი აზნაურის იდეალი ასი თუმანი მზითევია. გლეხობაში კი ამ გარემოებას დღემდის არ შემოედგა ფეხი; ეს ათიოდე წელიწადია, ნელ-ნელა ამ წოდებაშიც შემოდის. ასეთმა ცვლილებამ ხალხის ჩვეულებაში უმალ იქ იჩინა თავი, სადაც ცხოვრება უმალ დაადგა წარმოების ახალ გზას. ზემო იმერეთში დღემდის გლეხი არათუ მზითევს ითხოვდა, პირიქით, თითონ უნდა მიეტანა სასიდედროსათვის ფული. დღეს აქა-იქ შეძლებული გლეხები მორიდებით მზითევს თხოულობენ, მზითვიანი ქალის შერთვა სასახელოდ მიაჩნიათ. ქვემო იმერეთში კი, ნაპეტურ გურია-სამეგრელოში, გლეხი უმზითოდ ქალს ვეღარ ათხოვებს.

„იი დასაქცევი, თლათ წახდა დრო! — ამბობს ივანე, — ვაჭარ ურიასავით მარტო ფულისკენ უჭირავს ყველას თვალი, მოწიფულს კაცს მაქამდულა გული აღარ უძგერის მკერდქვეშ, ჩემ შვილობით არ ვიტყვი და ჩემი ციცი, მატაი, რომ უწინდელს დროში ყოფილიყო. მზითვი კი არა, პირ აქეთ დეიხარჯოდენ იმის ცოლათ შერთვამი, ჩვენ მუხურში იმისთანა ქალი ორიც არ მეიძებნება. ახლა მისი წონა მზითვი თუ არ დავაყარე თავზე, შინ უნდა დამიბერდეს“.

ახალმა ცხოვრებამ მზითვისათვის ზრუნვის გარდა ბევრი სხვა გასავალიც შესძინა ივანეს; ყოველისფერს კი მისი ერთი კვალი მიწა ვეღარ გასწვდა. ამიტომ მან სხვა სახსარს მიმართა. სხვებთან ერთად დადიოდა ფოთის ახლომახლო მდებარე ტყეებში, თლიდა ხეებს, კრავდა ტივებად, გაზაფხულზე ჩამოქონდა ფოთში და ყიდდა. ივანეს ცხოვრებიდან ერთი ასეთი დრო აქვს აღებული ნინოშვილს. „სოფლებში ბავშვებს და ქალებს გარდა, მუშახელი არ დარჩენილა. ვისაც თავისი ხეები ქონდა, ის იყო, და ვისაც არა, ისინი ქირით მიყავდათ“. ახალმა ცხოვრებამ გლეხს მრეწველობისათვის მოაკიდებინა ხელი. მრეწველობამ გლეხები ორად გაყო: ერთი პირი თითონ იხდიდა ბაჟს, თლიდა ხეებს და საკუთრად ყიდდა, მეორე პირი კი დღიურ მუშად გადიქცა. ივანემაც წაიყვანა რამდენიმე მუშა მთაში და დაამზადა ხეები. მთაში ხშირად უბედურების მსხვერპლი ხდებოდნენ გლეხები, მაგრამ ნათქვამია, გაჭირვება მიჩვენე. გაქცევას გიჩვენებო. რა უნდა ექნათ გლეხებს? ხიფათს რომ მორიდებოდნენ. შიმშილით დაიხოცებოდნენ. ივანე და მისი შვილი, ნიკოც ამ ხიფათის წერა გახდნენ და



პალიატომის ტბაში დაიღუპნენ. საბრალო ივანეს თავის თავზე აუსრულდა თავის სიტყვები:

..ასეა უბედური მუშა კაცის საქმე: მუშაობს, ფაფურობს, აი იქით აი აქეთ გეინედავ და ჩაკვტება საცხა, რავაც მწერი, ისე! ვინ შეიტყობს რამდენი ზალიკაი, სიმონიკაი, გოგიეი, იმ კუთხეში ჩაკვტება, რამდენი სხვა კუთხეში და რამდენი სად! რა არის ჩვენი სიცოცხლე!“

ნინოშვილის ერთ დიდ ღირსებას ცხოვრების სინამდვილით ხატვა შეადგენს; ზოგიერთ მოთხრობებში ეტყობა ტენდენცია, როგორც ქვევით დავინახავთ. სოლო, რაც შეეხება გლეხის ცხოვრების და ბუნების დასასიათებას, უნაკლოა, თუ რომელიმე მწერალს უყვარდა გლეხი, ვული შესტკიოდა მისთვის, ნინოშვილში ყველაზე უფრო იყო განვითარებული ეს თვისებანი — ასეც უნდა ყოფილიყო. ღარიბი გლეხის შვილმა, სიღარიბეში გაზდილმა მალე გაიცნო ხალხის მდგომარეობა, ნათელი ვონების და მგრძნობიერი გულის პატრონმა შეიყვარა დაჩაგრულნი. თუ საქმით, თუ კალმით ის იბრძოდა ბედკრულთა ტვირთის შემსუბუქებისათვის და ამ ბრძოლაში დადნა მთელი მისი არსება. არც ერთ მის მოთხრობაში არ არის არც ქადაგება, არც მოწოდება ხალხის დასახმარებლად, პირდაპირ ნათქვამი; ის მხოლოდ პირუთვნელად ხატავს ცხოვრებას, მაგრამ ხატავს ისე ნამდვილად და ცხოვლად რომ შეუძლებელია. თქვენც არ აგიტოკდეთ გული, თქვენშიაც არ დაილაპარაკოს სინდისმა და სურვილი მაინც არ დაგებადოთ უბედურთა ცხოვრების გაუმჯობესების ზრუნვისათვის. სურვილი კი პირველი ნაბიჯია საქმისაკენ. ნინოშვილს უზომოდ უყვარს გლეხი, მაგრამ არც ერთ ჩვენ მწერალს არ გამოუჩენია ასეთი საზრიანი სიყვარული გლეხისადმი, როგორც მას. დანარჩენი ჩვენი მწერლები დაბრმავებულნი არიან გლეხის სიყვარულით, ისინი ან ვერ ხედავენ გლეხის ნაკლულევანებას ან ხელს აფარებენ ამ ნაკლულევანებას, თითქოს ემინიათ, თუ ნაკლულევანება გამოვამქლავნეთ, ვერც სხვას შევავყვარებთ გლეხს და ჩვენც შეგვძულდება ერთმანეთიო... ნინოშვილი კი ღირსებასთან ერთად სრულად ხატავს გლეხის ნაკლევანებასაც. გლეხის ნაკლულევანება მის სიყვარულს სრულიადაც არ ასუსტებს, რადგანაც იცის, რომ უნაკლულო ადამიანი არ მოიპოვება და ამას გარდა, გლეხის ნაკლულევანება უმთავრესად მისი უვიცობის და ცხოვრების ბრალია. მიუხედავად ყოველივე ამისა, მკითხველიც იყვარებს ნინოშვილის გლეხს, თანაუგრძნობს მის გაქირვებულ მდგომარეობას. ჩვენ დანარჩენ მწერლებს უყვართ გლეხი პატიოსანი, ზნეობაამადლებული. უნაკლულო ე. ი. ისეთი გლეხი, რომელიც მხოლოდ მათ ოცნებაშია გამოხატული; ნამდვილი გლეხის სიყვარული კი მათ არ შეუძლიათ. ნინოშვილს კი მარტო ღირსებისათვის არ უყვარს გლე-

ნი; ის ხედავს; რომ გლესს ცხოვრება ავიწროებს, უსამართლობა სულს ხუთავს, გონების სიბნელე და სხვადასხვა დახანებული ჩვეულებანი ღუპავს და ეს სრულიად საკმარისია, რომ მან შეიყვაროს გლესი მთელი მისი ნაკლულევანებით.

...„ეი, პაი, ბიჭო, სად არის პირი და ერთობა! ჩვენსავე მოძმეებს რომ არ ეღალატნა, ვის რა ხელი ქონდა ჩვენთან! მარა ღალატი და უპირობა! ჰმ... მაშინ რომ ფხარიდან არ გამოგვეშლოდნენ!.. მოატყუეს უბედურები, აღალატებდეს და მერე თითონ უღალატეს!.. ყაძახებმა რომ ერთპირობა იცოდეს და ერთმანეთის ფხარის მიცემა; მაშინ...“ ამბობს გულნატყენი ივანე. რას უჩივის ასე ივანე? იმას, რომ წინად მას ხეებში ბაჟს არავე ახდევინებდა. დღეს კი ისევე გლესების წყალობით მათ „ბაჟით ხდიან სულს“. მთას ერთმანეთს ედავებოდნენ თავადაზნაურობა. სამღვდელეობა და გლესობა. რადგანაც გლესები დიდინანი ფლობდნენ მთას, მონაწილეობას ველარავინ წაართმევდა. მაგრამ გლესი ისეთი ალტრუისტი და საზოგადო ინტერესის დამცველი არ არის. როგორც სხვა მწერლები გვიხატავენ. თავადობამ ჩამოაგდო გლესებში განხეთქილება. ისინი თავის ნაყმევებს ეუბნებოდნენ: თქვენ არ გართმევთ და სხვას რას დაეძებთო. აზნაურებიც ამასვე ეუბნებოდნენ თავის ნაყმევებს. ასევე იქცეოდა ხაზინა და ეკლესიაც.

„დაიწყო ნელ-ნელა რღვევა გლესების ერთპირობამ, ზოგი თავადს ეკედლებოდა, ზოგი — აზნაურს, ზოგი — ხაზინას. დარჩა მცირე ნაწილი გლესობისა თავისთვის, მაგრამ რაღა დარჩენა იყო, იმისთანა დარჩენა! ის გლესები; რომლებმაც მათ უღალატეს, ილაჯს უწყვეტადდნენ: თუ ხის წართმევით, თუ ცრუ მოწმობით, ისე თვე არ წავიდოდა, რომ ამათ შორის თავპირის მტკრევა არ მომხდარიყო. ვინ იცის, რა ღონეს არ ხმარობდნენ ერთმანეთის დასაღუპად. ჩუმად ცეცხლს უქიდებდნენ ერთიმეორის სახლ-კარს და ცეცხლს აბუგვიანებდნენ ვაივავლახითა და ოფლით მონაგარს სარჩო-საცხოვრებელს! გზებზე თოფით უხვდებოდნენ და ჩუმად ჰკლავდნენ ერთმანეთს; ცილს უგონებდნენ და სისხლის სამართალში აძლევდნენ“.

შეიძლება, მკითხველმა თქვას: გლესები გააბრიყვეს და მიტომ მოიქცნენ ასეო. მაგრამ გლესი რომ უნაკლულო იყოს. ასეთ სისაძაგლეზე ვერ გააბრიყვებენ. წვითა და დაგვით ლუკმას ქამს გლესი, მან კარგად იცის სიღატაკის გემო. ისიც ადამიანია, მასაც ენატრება ტკბილი ცხოვრება; ამიტომ ის უფრო თავის თავზე ფიქრობს, თავის თავისათვის ზრუნავს და შემთხვევის დროს ეგოიზმი მას ბევრ სისაძაგლეს ადენინებს. ამით ჩვენ გლესის გაკიცხვა და დამცირება კი არ გვინდა, არამედ იმის აღიარება, რომ გლესიც ჩვეულებრივი ადამიანია და არა უცოდველი ანგელოზი, როგორც ზოგიერთი ჩვენი მწერ-

რალი გვიხატავს. სხვისაგან გაუბრიყვლებადაც რომ გლახი ხშირად სისაძაგლეს ჩადის, ამის მაგალითს ჩვენ დავინახავთ „მოსე მწერლის“ გარჩევის დროს.

#### IV

ნინოშვილის ცხოვრება პატარაობიდანვე ისე მოეწყო, რომ ადრე შეეჩვია ცხოვრების ჩაკვირებას, მის შესწავლას. ყოველი მისი მოთხრობა ღრმა დაკვირვების ნაყოფია, ცხოვრებიდან არის ამონაკითხი. ჩვენი გლახობა დღეს ორ ნაწილად იყოფა, რაც დრო გადის. ეს ორი ნაწილი თანდათან უფრო მკაფიოდ იხატება და ამავე დროს უფრო და უფრო შორდება ერთმანეთს როგორც ქონებით, ისე ინტერესებით, ზნეობით და სხვ. პირველ ნაწილს შეადგენენ გალატაკების გზაზე შემდგარი გლახნი, მეორეს გამდიდრებული გლახები — სოფლის ბურჟუაზია. პირველის წარმომადგენელია სიმონა ძალაძე. მეორის — დავით დროიძე („სიმონა“). ამ ოცდაათი წლის წინათ დავით დროიძე უბრალო გლახი იყო, ერთი აზნაურის ნაკაცარი. ყმაწვილობისას დავითი დადგა ვაჭარ ბერძენთან, რომელიც სოფლებში ნიგვზის ხეებს ყიდულობდა და ყიდდა. როცა ბერძენი თავის ქვეყანაში წავიდა, დავითმა საკუთრად დაიწყო ვაჭრობა და მოკლე დროის განმავლობაში ბევრ ფულს მოუყარა თავი. შემდეგ სიმინდის ვაჭრობას მოჰკიდა ხელი და თავისი ჯიბე კიდევ უფრო გაიტენა, დავითი ამას შემდეგ მოუბრუნდა თავის სოფელს, შეისყიდა მებატონისაგან მიწა, წამოჰკიდა ოდა და დაცოლშვილდა. თუმცა დავითი სოფლად ერთ ალაგას დაბინავდა, მაგრამ ალებ-მიცემობისათვის თავი არ დაუნებებია. თუ რამ სახეირო „საფოდრატო“ საქმე გაჩნდებოდა, დავითი ხელიდან არ გაუშვებდა; ფულს ასესხებდა და მარტო სარგებელი იმდენი გროვდებოდა, რომ ყოფნიდა. როდესაც დავითს უფროსი ვაჟი წამოეზარდა, იმან გახსნა თავის სოფელში დუქანი, მოიტანა ისეთი საქონელი, რომელსაც უფრო საჭიროებდა სოფლის ხალხი, დააყენა დახლში თავისი ვაჟი და დაიწყო ვაჭრობა. დავითის შეძლება თანდათან უფრო და უფრო იზრდებოდა. იმან მიჰყო ხელი მიწა-ადგილების ყიდვას და იმდენი შეიძინა, რომ „ბოლო დროს კარგი მამულის პატრონი თავადისათვის შეეძლო ხელის გაწვდენა“. რამდენსამე წლის შემდეგ უფროსმა ვაჟმა სოფლის დუქანს თავი დაანება და მახლობელ ქალაქში მალაზია გააღო. დავითის ორმა შვილმაც ვაჭრობას მოჰკიდეს ხელი. ორი უმცროსი ვაჟი დავითმა სასწავლებელში გამოზარდა; ერთი მათგანი პოლიციაში მსახურობდა, მეორე კი, საცაა. იუნკრის სასწავლებელს გაათავებდა და აფიცვრი გახდებოდა. დავითს აღარაფერი აღარ აკლდა. მხოლოდ ერთი გარემოება აწუხებდა:

თუმცა ძალიან მდიდარი იყო, მაგრამ გლეხად ითვლებოდა და ამიტომ ყოველგვარი გადასახადი კისერზე აწვა. გადასახადი მისთვის სამძიმო საქმეს არ შეადგენდა, მაგრამ სათაკილოდ მიაჩნდა, ამიტომ დახარჯა ფული და სასულიერო წოდებას მიეწერა. მთელი სოფელი დიდ პატივს სცემდა დავითს. თითქოს აღარავის ახსოვდა, რომ დავითიც ერთ დროს სხვებივით ღარიბი გლეხი იყო, ყველას აზნაურად მიაჩნდა და მის ოჯახს აზნაურის ოჯახს ეძახდნენ. სოფლის მოხელეები დავითს დამეგობრებული ჰყავდა და ამგვარად სოფელში დიდი გავლენა ჰქონდა. რასაც დავითი მოინდომებდა, უმეტეს შემთხვევაში ასრულებდა; შეექმნა სოფელს დავა ახალი ეკლესიის ადგილის შესახებ, დავითმა გაიმარჯვა, — დახარჯა ფული და ეკლესია იქ ააშენებინა, სადაც თვითონ უნდოდა. გლეხებმა იცოდნენ, რომ „დავითი მდიდარი კაცია და მდიდარს ყოველთვის უქრის ხმალი ღარიბზე.“ ის მეფის ტოლ კაცად მიაჩნდათ, დარწმუნებული იყვნენ, რომ ნეკის გაქნევით დალუპავდა, ვისაც გაიმეტებდა. ამიტომ დავითისა დიდი რიდი ჰქონდათ. ისეთი ადამიანიც კი, როგორც სიმონას დედა — ქეთევანია, რომელსაც ხშირად თოფით ხელში ვაჟკაცები უფრენია, დავითს ვერაფერს უბედავდა. ერთხელ დავითის შვილმა ქეთევანს ორი ღორი მოუტკლა. მხოლოდ იმიტომ, რომ იმის ეზოში შევიდნენ. სხვას რომ ექნა, ქეთევანი თოფით მიუხტებოდა, მაგრამ დავითთან პირიქით, თითონ მოიხადა ბოდიში, თითქოს დიდი დამნაშავე ყოფილიყოს მის წინაშე.

— რა ექნა, ქვრივ-ოხერი ვარ, პირუტყვის მოვლა ვერ შევძელი და შეგაწუხეთო.

საშუალო ბურჟუას ყოველისფერზე თავისი საკუთარი შესხედულება აქვს, მისი გონება ჩოთქსა და არშინს არ გაცილებია, ამიტომ ყოველგვარ მოვლენას, ადამიანის პიროვნებას, მის ღირსებას ის ფულით ზომავს. დავითს თუმცა ბევრი ვიწრო ბურჟუაზიული შესხედულება აქვს შეთვისებული, მაგრამ ერთ დროს ის ღარიბი გლეხი იყო, ნიადაგ სოფელში ცხოვრობდა, სოფლის ხალხთან ჰქონდა საქმე, ამიტომ გულით და გონებით ხალხს მთლად არ მოწყვეტია. სულ სხვა არის მისი შვილი ტიტკო: მემკვიდრეობამ, ცუდმა აღზრდამ და მისმა გავლენამ მისი გონება ყოველგვარი სპეტაკი აზრისათვის დაახშვეს. მისი აზრით, ვისაც ფული აქვს, სრული უფლება ეძლევა ყოველგვარი სისაძაგლე ჩაიდინოს. სინდისი, პატიოსნება მისთვის უშინაარსო სიტყვებია. სიმძლავრე ანუ ძალა ახლანდელ დროში ფულიაო, ამბობს ის. მას სიმდიდრე იმიტომ უნდა, რომ ყოველი ადამიანის დაჩაგვრა, სხვისი ზნეობის და პიროვნების შელახვა შეეილოს. ქალში ტიტკო აფასებს მხოლოდ გარეგნობას, ქალი მას მარტო სქესობრი-

ვი გრძნობის დასაკმაყოფილებელ მანქანად მიაჩნია. როდესაც თავისი სასიზღარო განზრახვა შეისრულა და სიმონას ცოლი დარიკო გააუპატიურა, დარიკოს ფულის ძლევა დაუწყო. როცა დარიკომ ფული არ წაიღო, ტიტკომ იფიქრა: „აღბათ ეშინია, სახლში რომ შეიტყონ, სცემენ“. მისი ვიწრო ბურჯუაზიული შეხედულება იმდენად ვერ ამადლებულიყო, რომ ადამიანის ყოველგვარი ღირსება ფულზე არ დაეხურდავებინა. ეკონომიურმა პირობებმა წარმოშობეს ჩვენში ღროიძეები. ესენი სუქდებიან და ყოველისფერს ანადგურებენ თავის გარეშემო. თუ როგორ უთსრიან ძირს სოფლის კეთილდღეობას ასეთი პირები, ამისი თავდებია თვით მათი ხასიათი და შეხედულებანი. მოწმე კი სიმონას დალუპვა.

წვერულვამაშვეანებული სიმონა იყო ქვრივ ქეთევანის ერთადერთი ვაჟი. ქეთევანის ოჯახი ერთ დროს შეძლებული ოჯახი იყო. მისი მამამთილი, გაბილა ძალაძე, თავმომწონე და გულადი გლეხი იყო; სხვისი ნაარმი არ უნდოდა, სხვას არ ჩაგრავედა, მაგრამ არც თვითონ დაეჩაგვრინებოდა ვისმე: ბატონსაც კი რიდი ჰქონდა მისი. ქეთევანის ქმარი მეტად მჩვარი კაცი გამოდგა; თავპირი რომ ვისმეს დაემტვრია მისთვის, ხმას ვერავის გასცემდა. მაგრამ ქეთევანი იყო მარჯვე დედაკაცი. ქორივით დასტრიალებდა ოჯახს და ყველას ის აძლევდა პასუხს. ბევრს შეაძულა თავი ქეთევანმა, ბევრ ჭორებს უგონებდნენ, მაგრამ სინიღისი წმინდა ჰქონდა და ვის რას შეეუბებოდა! ასეთი სიმარჯვით ქეთევანმა ოჯახი დამზობისაგან დაიფარა. სიმონა მამას არ ჰგავდა ხასიათით, ის ბაბუას გამოეგვანა. ბაბუასავით ამაყი და შეუპოვარი იყო. სიმონას ასეთი ხასიათი პატარაობიდანვე ეტყობოდა.

დავით დროიძეს სოფელში სიტყვის შებრუნებას ვერავინ უბედავდა. სიმონა კი თხუთმეტის წლისა იყო, რაცა ხალხში გალანძლა დავითი და დაემუქრა მას.

„--დავით, რა დაგიშავე, რომ პატარაობიდან შემიძულე? ისე შენმა ცოლ-შვილმა ნახოს ხეირი, რავაც მე შენი ან ყურძენი, ან წკნელი, ან იი დათიკაის სიმიინდი მევიპარე! აა, შენ წაწყმენდილო, ქვეყნის მყლაპაო, რას. მერჩი, რას?“

დავითმა დააქერინა სიმონა და „ნაობახში“ დაამწყვდევიანა, მაგრამ სიმონა იქიდანაც გამოიძახოდა: „თუ გამოვედი აქედან. გაჩვენებ შენს სეირსო!“

როცა სიმონა დავაყკაცდა, მას ტოლი არა ჰყავდა სოფელში; ყველა მას შენატროდა, ყველას ის უყვარდა; ქირში თუ ლხინში ყველა მას იწვევდა. „ყველა მეზობელი სიხარულით ეხმარებოდა და იხმარებდა სიმონას ყანაშიაც და სხვა საქმეშიაც. სიხარულით პა-

ტიუობდენ ქორწილში. ხათვლაში, გასაჰირში და დასალსინში. ან ვინ დაიწუნებდა მეზობლად მუშაობაში მარჯვეს, ლხინში კარგ მოსიძლე-რეს და მოთამაშე სიმონას“.

დროიძის წყალობით „ძალაძის მიდამო გაპარტახდა, შალღამათ გადაიქცა: პატარა სახლი, საძროხე, საღორე და ფაცხა დალპა და ჩაინგრა, სახლის კედლები ჯერ კიდევ იდგა, მაგრამ ისე, რომ მის და-ნახვანზე საშინელი სევდა მოგაწვებოდათ გულზე. მეზობლის ქალები და ბავშვები, როცა გაივლიდნენ ამ ყრუ მიდამოს სიახლოვეს, „წმინ-და გიორგი დამიფარეო“. გადიწერდნენ პირჯვარს და გააფურთხებ-დენ სახლისკენ“.

მოთხრობის ღირსება მდგომარეობს ტიპების სინამდვილეში. ნი-ნოშვილმა ცხადად დაგვანახვა სოფლის ცხოვრების შეცვლა: გლე-ხობის დიფერენციაცია, ახალი ურთიერთობის დამკვიდრება. დროი-ძეები ამ ორმოციოდე წლის წინათ არ იყვნენ ჩვენში. ისინი დღევან-დელმა ცხოვრებამ შობა; ხოლო ავტორმა ნაძალადევად მოა-წყო დამოკიდებულება დავითსა და სიმონას შორის, წინდაწინვე და-სახული მიზნისაკენ მიმართა, ამიტომ მოთხრობა ტენდენციური გამო-ვიდა. მოქმედების განვითარებაში ნაძალადეობა აშკარად გამოსჰვი-ვის, მოთხრობის ნასკვი იმაში მდგომარეობს, რომ დავითს სიმონა თავიდანვე ძულდა, მტრულად უყურებდა. მოსპეთ ეს მტრობა და მთელი მოთხრობა შეუძლებელი იქნება იმ სახით, როგორც ავტო-რმა დაწერა. ამიტომ ნათლად უნდა იყოს ახსნილი, რამ შეაძულა თა-ვიდანვე დროიძეს სიმონა? ამას კი ნინოშვილი არსად არ გვიხსნის რიგიანად. ძალაძის ოჯახი ყოველგვარ ღონეს ხმარობდა, რომ დავი-თი არ გადაემტერებინა. დავითს კი „სიმონა და საზოგადოდ ძალაძის ოჯახი, თავიდანვე ათვალწუნებული ჰყავდა“. რადა? რისთვის?! მარ-თალია. დავითი ატყობდა, რომ სიმონა თავის ბაბუა გაბილას წააგავ-და, მაგრამ ნუთუ ეს მსგავსება ასეთ შიშს მოჰგვრიდა დავითს, რომ თხუთმეტი წლის სიმონას მტრად გადაჰკიდებოდა და მისი დაღუპვა გადაეწყვიტა? აი, როგორ ლაპარაკობდა ყრილობაზე დავითი:

„...მართალია, ჯერ დიდია ვერ შეუბედავს. ვინცხაა, მარა, რომ გამოიცთება, იმასაც არ დააკლებს ხელს“.

აქ დავითმა სიტყვა შესწყვიტა, ცოტა ჩაფიქრდა და შემდეგ ისევ განაგრძო:

„— იქნება არაფერ შუაშია და ტყუილა წევიწყმინდო სული... ჩემი თვალთ არაფერი მინახავს მის ხელში... კიდევ ვიტყვი, ობოლი კაცია და, თუ დანაშაული არ არის, დიდ ცოდვას ვიღებ კისერზე, მა-რა“...

აქ კიდევ შეყოყმანდა და შემდეგ დაფიქრებით წარმოსთქვა: —

„მარა ჩემი ფიქრით იი ობოლი ბიჭი, სიმონაი, უნდა შობოდეს ამ წვრილმან ქურდობას, სხვაზე მე ჩემი ჭკუით გუმანი ვერ მიმიტანია და აწი თქვენ იცით“.

ამ სიტყვების ისე ახსნა, ვითომ დავითი განგებ ყოყმანობდა და მელიაობდა. რომ ხალხი მოეტყუებინა და არ შეენიშვნინებინა სიმონასადმი მისი სიძულვილი, შეუძლებელია. დავითი წრფელი გულით ამბობს ამ სიტყვებს, მას არ უნდა უდანაშაულოდ სხვისი დაღუპვა. ის არ არის იმდენად უსამართლო, რომ განგებ სიმონას ქურდობა დაწამოს. პირიქით, მას სიმონა ებრალება კიდევ, როგორც ობოლი კაცი. დავითი დარწმუნებულია, რომ სიმონა ბევრ „წვრილმან ქურდობას შერება“, მაგრამ მაინც ეძნელება ამის საჯაროდ აღიარება. ამას შემდეგ, როდესაც დავითს თავლა გაუტეხეს და ცხენი მოჰპარეს. დავითმა ქურდობა მაშინვე სიმონას დააბრალა და დარწმუნებულად იყო ამაში. ყოვლად შეუძლებელია, რომ დავითი დარწმუნებული ყოფილიყო სიმონას ქურდობაში ან მისთვის დაებრალებინოს ქურდობა; მთელმა სოფელმა იცოდა, რომ სიმონა იმ დღეს ცოლის მძახვან ერთად სამუშაოდ იყო ყანაში წასული და საღამოს დაბრუნდა სახლში. რომ ის ვერ შესძლებდა გათენებისას ცხენი მოეპარა, უცებ გადაემალა და ყანაში მუშაობაც დაეწყო, ამას ყველა მინვდებოდა. მართალია, დავითის მოჯამაგირე ამბობდა: ქურდები „სიმონას“ უძახოდნენო, მაგრამ ეს საკმარისი არ იყო, მართალია, სიმონა სამ წელიწადნახევარს დაატუსაღეს, მართალია, მამასახლისი დავითის ყურმოჭრილი ყმა იყო, მაგრამ სასამართლოში დავითის ძლიერებას ნაკლები გავლენა ჰქონდა. გაცილებით უარესი უკანონობაც ხდება, მაგრამ მისი ჩამდენიც გაცილებით მეტი გავლენის მქონეა, ვიდრე დავითი, რომელიც თავის სოფელს გარეთ უბრალო დავითია. უდანაშაულო სიმონა, რომლის სიმართლესაც მთელი სოფელი დაამტკიცებდა, რომ ასე დაესაჯათ, შეუძლებელი იყო; სიმონა არ იყო იმდენად გამოუცდელი და არც დედა მისი, რომ მოწმეების შოვნა ვეღარ მოეხერხებინათ. მართალია, სოფელს დავითის ხათრი ჰქონდა, ეშინოდა კიდევ, მაგრამ შიში და ხათრი იმდენად ვერ წაახდენდა ყველას, რომ სიმონაზე ხელი აეღოთ, ის გაემეტებინათ, მით უმეტეს, რომ დავითი სრულიადაც არ ცდილობდა, სიმონა უსათუოდ დაესაჯა; ის მინდობილი იყო სამართალზე და ამბობდა: „თუ მართალია, ეე სამართალი და გამართლოს, ჩემი რა საქმეაო“. სიმონა კი სოფელს უყვარდა და უმეტესობა მის სიმართლეს არ დაჰფარავდა. როდესაც სოფელს მოთხოვა მთავრობამ: ქურდები მომეციო, ავტორის მიზნისთვის საჭირო იყო, რომ სოფელს სიმონაც გაეცა. ამავე დროს მან კარგად იცოდა, რომ დავითი მთელ სოფელს ისე ვერ დაიმორჩილებდა, რომ მართა-

ლი კაცი დაელუბინებინა და ამიტომ წინდაწინვე გვატყობინებს: ხალხიც დარწმუნებული იყო სიმონას ავკაცობაშიო.

„რაც ერთხელ, სიმინდის მოპარვის გამო, და მეორეჯერ, დავითის ცხენის მოპარვის მიზეზით, სიმონა საპატიმროში იყო, დიახ, ამ ორ შემთხვევის შემდეგ მეზობლებს სიმონა მართლაც საეკვეო ადამიანათ მიაჩნდათ. ხალხმა რა იცოდა თუ სიმონა ორსავე შემთხვევაში ცამდის მართალი იყო. ხალხი უმეტეს შემთხვევაში ქვევრით არის: რასაც ჩასძახებენ, იმასვე ამოსძახებს. გავლენიანმა დავითმა ჩასძახა, სიმონა მავნებელიაო, და ხალხიც იმეორებდა, მავნებელიაო“.

დავითისთანა პირებს სოფელში გავლენა აქვთ. მაგრამ არც იმდენი, რომ მთელ სოფელს თავის სურვილისამებრ საუკეთესო პირები გაამეტებინონ; მარტო დავითის ჩაძახება სრულიად არ იყო საკმარისი, რომ სიმონა ხალხს გაეცა.

ყოველივე ნათქვამით იმის აღნიშვნა გვინდოდა, რომ წინდაწინვე დასახულმა მიზანმა ნინოშვილს ბევრი სიყალბე ჩაადენინა: დამოკიდებულება სიმონასა და დავითს შორის იმდენად ბუნებრივი, აუცილებელი არ არის, რამდენადაც ნაძალადევი, ტენდენცია ღირსებას შეადგენს სახელოვან ნაწარმოებებისას, როდესაც ის სინამდვილეს არ ამახინჯებს; ხოლო თუ სინამდვილე დამახინჯებულია, ბევრი პირობები მოქმედების განვითარებაში ნაძალადევად არის შექმნილი, ასეთი ტენდენცია ნაკლოვანებაა. ნაძალადეობა ეტყობა „პარტახსაც“. დანარჩენ მოთხრობებში ნინოშვილს არც ერთ ალაგას არ უღალატნია სინამდვილისათვის.

## V

მოსე მწერალი უბრალო გლეხის შვილი იყო. იმერეთში გლეხს კარგად აქვს შეცხებული, თუ რა მნიშვნელობა აქვს ახლანდელ დროში სწავლა-განათლებას, და ამიტომ მამამ პატარა მოსე სოფლის სასწავლებელში მიაბარა. მოსემ გაათავა სოფლის სასწავლებელი, მაგრამ მამამისს შეძლება არ ჰქონდა, რომ შვილი ქალაქს წაეყვანა. ოფის ხელში მიცემაც არ უნდოდა. ზოგი მწერალი მეტად იდილიურად ხატავს გლეხს მისი თოხით და დილიდან საღამომდე თავჩაქინდრული მუშაობით, მაგრამ ასეთი იდილია სრული სიყალბეა: გლეხს უყვარს თავისი ნაშრომი, ხოლო განუწყვეტელი მუშაობა, ოფლით მიწის რწყვა არც უყვარს და არც ეხალისება, მაგრამ რა ჰქნას, როდესაც ლუკმა-პურის მოსაპოვებლად მეტი გზა არ დარჩენია, მიეცით მას სხვა სახსარი ცხოვრებისათვის და ის დიდი სიამოვნებით დატოვებს



თავის თოსს და „გლეხის დიდება ყანას“. მოსეს მამას გამოცდილი ჰქონდა თოსის სიმწარე და არ უნდოდა, შვილიც ამ სიმწარეში ჩაეყენებინა. იმერელი კაცი საზოგადოდ მოხერხებულია, ეშმაკი და გაიძვერა. მოსეს მამასაც არ აკლდა ეს თვისებანი და შვილსაც უნაკლოდ გადასცა; გაიგო, პრისტავს ბიჭი ჭირდებაო და მაშინვე იფიქრა, პრისტავთან ჩემი შვილი გამოიცდება, საქმე როცა მექნება, პრისტავი მწყალობელი მეყოლებაო, და შვილი პრისტავთან დააყენა, რადგანაც მოსემ რუსული წერა იცოდა, ამიტომ პრისტავი ხშირად აძლევდა გადასაწერათ სხვადასხვა ქაღალდებს. რამდენიმე ხნის განმავლობაში მოსემ ზეპირად დაისწავლა სხვადასხვა ქაღალდების ფორმა, გაიმართა ხელი და ბოლოს პატარა საქმისათვის ქაღალდების დაწერაც შეეძლო. ხშირად მას პრისტავი სიტყვიერად ეტყოდა საქმის გარემოებას და მოსე თვითონ შეადგენდა ხოლმე ქაღალდს, მოსეს მამამ რომ შვილის ამბავი შეიტყო, პრისტავს ჯერ ძღვენი ძღვენზე უზიდა და ბოლოს ხევწნა დაუწყო: შვილი კანცელარიაში დამიყენე მწერლადო. პრისტავი დათანხმდა, ხოლო იმ პირობით, რომ მოსეს მისთვის ჯამაგირის მეოთხედი ეძლია. ასეთ პრისტავთან ცხოვრებით მოსე მალე გაიცინობდა. თუ რა არის ქრთამი. ჩვენი პრისტავი თუ იღებს ქრთამს, მევიდასი დიდი კაცი ვარ, რომ არ ავიღოო, — გაიფიქრებდა ის და ამით ჩაიხშობდა სინიღისის მხილებას. პრისტავთან მორჩილებას და მელობას შეჩვეული მოსე თავდაპირველად ხალხსაც პატივისცემით ეპყრობოდა, „თქვენ“-ობით ელაპარაკებოდა. მაგრამ, როდესაც ახალ ხელობაში მოშინაურდა და დაინახა, რომ ხალხზე მას გავლენა და ძალა ჰქონდა, ხალხი მას საჭიროებდა, მალე დაუწყო ხალხს უზრდელად მოპყრობა. ბოლოს იქამდე მივიდა საქმე, რომ დაიბარებდა ხალხს კანცელარიაში, აცდევინებდა საღმომდე და გამოუცხადებდა: წადით სახლში, ახლა დაღალული ვარ, თქვენთვის არ მცალიაო. მოსე ნელ-ნელა შეეჩვია ქრთამის აღებას, და ყალბი ქაღალდების შედგენას. თავდაპირველად გაუგებდნენ ხოლმე სიყალბეს, მაგრამ ბოლოს და ბოლოს ისე დახელოვნდა, რომ მისი დაჭერა ყოველად შეუძლებელი იყო. მოსე ისე შეეთვისა მექრთამეობას, რომ ქრთამი ჩვეულებრივ გასამრჯელოდ მიაჩნდა; როცა ის ქრთამს იღებდა, ყველას ისე აჩვენებდა თავს, თითქოს სისაძაგლეს კი არ ჩადიოდა. სხვას ეხმარებოდა და დახმარებაში მხოლოდ მცირეოდენ ხელფასს იღებდა. რომ ამგვარი აზრი უფრო დაემკვიდრებია იმათ გონებაში, ვინც მას დაასაქმებდა, ის განგებ ყოყმანს დაიწყებდა ხოლმე და საქმეს გააძნელებდა. ამ მხრივ საყურადღებოა მოსეს და ბაბალეს ლაპარაკი:

„— შენი მუხლების ჭირიმე, ნუ გამიწყობები — დაეღრიჯა ბაბალე მწერალს.

„— რა გინდა, რა საქმე გაქვს? თქვი, თორემ მოსვენება მესაქიროება, — უთხრა რბილათ მწერალმა“.

მოსე ხალხთან ძალიან უზრდელი იყო, მაგრამ ახლა მან შენიშნა, რომ გასაგებმავი ლუკმა ჩაუვარდა ხელში და ამიტომ მოუღბა ბაბაღეს.

„— ჩემი ოქრუა სალდათათ დაუწერიათ.

„— მერე?

„— გვიშველე რამე, ერთი შენ ხელს რომ ეკადრებოდეს, იმისთანა ქალაღლი გამიკეთე.

„— ამ შემთხვევაში შველა არ შეიძლება: ხელმწიფის გადაწყვეტილია, ვისაც შეხვდება, უნდა წავიდეს.

„— წვიღე რაც გვაბადია და გვიშველე რამე.

მოსე დაფიქრდა ბაბაღეს სიტყვებზე და შემდეგ უთხრა:

„— არ შეიძლება, გეუბნები, შემოღი ოთახში და გეტყვი, თუ რისთვის არ შეიძლება. — ბაბაღე შეჰყვა მოსეს ოთახში, მოსემ დაუდგა სკამი. დაბრძანდითო. უთხრა და თითონაც დაჯდა და განაგრძო ლაპარაკი:

საღდათობის საქმე ყველა საქმეზე უმძიმესია. სხვაი საქმე რომ იყოს, აღვიღათ გიშველიღით. ეგ კი, როგორც ვთქვი, მეტათ ძნელია, მაგრამ, ვთქვათ, მოვახერხე და გიშვეღვთ, რას მოგვეცემთ გასამრჯეღოს?

მოსემ აღრევე მოისაზრა და გადაწყვიტა, რომ საქმეს ხელს მოკიდებდა, რა საძნელოც უნდა ყოფიღიყო, თუკი ქრთამს აიღებდა, მაგრამ, ამღენ ხანს თუ იყოყმანა და საქმე გაახვიადა, იმიტომ, რომ ბაბაღე ხელიღდან აღარ წასვლოდა. ქრთამი აეღო და აეღო ისე, რომ პირიქით, ბაბაღე დარჩენიღიყო მისი უზომო მაღღიერი. როღესაც მოსე და ბაბაღე თითქმის მორიგღენენ ხუთ თუღმანზე, მოსემ კიღევ დაუღმატა: მე ჯერ სიტყვას ვერ მოგვემ — შემიძღლია გიშვეღლოთ თუ არა, თუკი შველა შეიძლება, სუთი თუღმნის გაღახდაც ნუ დაგეზარებათ“. როღესაც მეორე დღეს საღამოზე მოსე ბაბაღესას მივიღა, უკვე მოსაზრებული ჰქონდა მთელი საქმე, მაგრამ ბაბაღეს მაინც არ შეატყობია:

„— იღით რა, მგონია, ამაოთ ჩაგვიღლის თათბირი: ბეერი ვიფიქრე, მაგრამ არა უხერხღდება რა“.

ასეთი მოხერხებითა და ეშმაკობით მოსე ბეერს იგებდა ხალხის თვალში. წინათ თუ ქრთამების გუღისათვის უჩიოღნენ და ემღუროღნენ მას, ახლა მოსეს მექრთამეობაში ცუღდს აღარვიღნ რას ხეღავდა და ყველა დიღი მაღღიერი იყო, ვისაც ის საქმეს გაუკეთებდა, თუნდ ტყუიღა გაეკეთებინოს. ზალხში მას ძალიან ნასწავღი. ჰკვიანი და

გავლენიანი პირის სახელი ჰქონდა გავარდნილი: „სტავლას, ძმავ, მოხ-  
მარა უნდა. რამდონია, იგი, რაცხა უნივერსია, თუ სემელარია იქიდან  
გამოსული, მარა ნახე, თუ ჩვენი მოსე მწერლის მეათედი საქმე შეეძ-  
ლოს“. ყველა დარწმუნებული იყო, რომ, თუ მოსე მოინდომებდა.  
ღალმა მიმავალ მდინარეს აღმა დააწყებინებდა ღენას, მისი ქალა-  
ლი კაცისმკვლელს დააბრუნებდა ციმბირიდან. მოსემ გააკეთა მოწმო-  
ბა, ვითომ ბაბალეს ოქრუას მეტი ვაჟი არ ჰყავდა, სოფონა კი მისი  
გერი იყო, მოაწერია ხელი და ბეჭედი დააკრევირა მღვდელს, მამა-  
სახლისს და კეთილ-სინდისიერებს.

ათანასე ნამდვილი ტიპია სოფლის ძველებური მღვდლის. ის იყო  
სამოც წელს გადაცილებული მოხუცი. საქმის დღეს ყანაში ან ბაღში  
მუშაობდა. უქმე დღეს კი წირვა-ლოცვას უნდებოდა. ის ეკუთრება  
იმ დროს, როცა მღვდლობისათვის ძალიან ცოტა ცოდნა იყო საჭირო;  
მან მხოლოდ ხუცური იცოდა და მხედრულად — მარტო თავის სა-  
ხელის და გვარის მოწერა. ის იყო პატიოსანი, ხალხის მოყვარე და  
გულშემატკივარი; კარგად იცოდა ხალხის მდგომარეობა და ამი-  
ტომ არავის არ აწუხებდა: ჯვარის წერაზე, ნათლობაზე, დამარხვაზე  
მან ვაჭრობა არ იცოდა, რასაც მიცემდნენ, კმაყოფილი იყო. „ათანა-  
სეს მქადის ყუა რომ წუუტეხთ, დაგვჯერდება, არ გვექნება და  
დაგვიჯერებს“. ამბობდა ხალხი, რომელსაც ათანასე ძალიან უყვარდა.  
არავის ახსოვდა, რომ ათანასეს მრევლთან უკმაყოფილება მოსვლო-  
დეს. როდესაც მოხუცებულობის გამო სასულიერო მთავრობამ ათა-  
ნასეს გადაყენება მოუხდოდა, ხალხმა თხოვნა გაგზავნა: „სანამ ათა-  
ნასე ცოცხალია, ჩვენ სხვა მღვდელი არ გვინდა და არც მივიღებთო“,  
და ამგვარად დაიტოვა თავისი საყვარელი ათანასე. თუკი ვისიმე შეე-  
ლას შეიძლება ათანასე, ყოველთვის მზათ იყო და არაფერს დაიშუ-  
რებდა. როდესაც მას ბაბალეს არხაზე ხელის მოწერა თხოვეს, ის  
ავად იყო, მაგრამ მაშინვე წამოვიდა. არავითარი ეჭვი არ ჰქონდა,  
თუ მას მოატყუებდნენ და ხიფათში გააბამდნენ და ამიტომ შეამოწმა  
ქალაქი, თორემ პატიოსანი ათანასე ტყუილს თავის დღეში ხელს არ  
მოაწერდა. მოსე მწერალმა თუ ამდენი პირი გააბრიყვა, დარწმუნე-  
ბული იყო, რომ ვერავინ გაიგებდა. თორემ იმდენად დაცემული არ  
იყო, რომ ხუთი თუმნის გულისათვის ამდენი ადამიანის დალუპვა მო-  
ენდომებინა. როდესაც მოსე დააბეზღეს და მისი სიყალბე გამოაშკა-  
რავდა, მოსეს საშინელი თავზარი დაეცა. ის იმდენად იტანჯებოდა,  
რომ ხალხიც კი ამჩნევდა და ამბობდა: „ამ ჩვენს მწერალს რაცხა  
ფარცაგი არ დამართიაო!“ მან დაჰკარგა მოსვენება, ძილი, აღარც სას-  
მელი ახსოვდა, აღარც საკმელი. რა სტანჯავდა ასე მოსეს? აი რა:  
მოსემ იცოდა, რომ საქმეს სასტიკად გამოიძიებდნენ; ამიტომ

მას ან თავისი თავი უნდა გამოემეტნა, ან სხვები, ვინც საქმეში იყო გარეული. მარტო თავის თავი რომ ხსომებოდა მოსეს, მაშინ ასეთ სულიერ ტანჯვაში სრულიადაც არ ჩაეარდებოდა: თუმცა მისი მდგომარეობაც საშიში იყო, მაგრამ, თუ მოინდომებდა და სინდისზე ხელს აიღებდა, თავს ადვილად დაიძვრებდა, მაგრამ მოსეს ამდენი უდანაშაულო ხალხი ებრალებოდა, მას სინდისი სტანჯავდა. ის ორ ცეცხლ შუა იყო: ყველას გადარჩენა არ შეიძლებოდა, მაშინ ვინ გაემეტებია? თავის თავი თუ სხვები? მაღალ ზნეობას გარდა დიდი სულიერი ძალა და ხასიათის სიმტკიცე არის საჭირო, რომ ადამიანმა თავისი თავი გაიმეტოს სხვის გადასარჩენად; თავის თავის სიყვარულმა სძლია მოსე, „თავის თავის საშიშროებაში მიცემას, ისევე სხვა გავიმეტო, ჯობიაო“. გადაწყვიტა და დალუპა ყველა, მაგრამ მისი ხანმოკლე სულიერი ტანჯვა მაინც დარჩება მოწმედ, რომ ამ საზიზღარ მოსეშია ც არ იყო სრულად მოსპობილი ადამიანური ღირსება.

ჩვენ ამით სრულიადაც არ გვინდა იმის თქმა, მოსესთანა პირების უზნეობას მკითხველმა ბოდიში მოჰხადოს და შეურიგდეს. ჩვენ მხოლოდ მისი არსებობის მიზეზებს უნდა ვეძიებდეთ. მოსე ციდან არ ჩამოვარდნილა, არც აუხსნელ მოვლენას შეადგენს: ის ჩვენი გლეხის შვილია, ცხოვრების მიერ წარმოშობილი; სიღარიბისაგან თავის დაღწევის სურვილმა შეატოპია უზნეობის მორევში; რაღა ერთხელვე შეტოპა მოსემ, ველარ შეიკავა თავი და გასწია უფსკრულისაკენ, ველარ შეიკავა იმიტომ, რომ პატარაობიდანვე მოკიდებული მას მხოლოდ გამდიდრების სურვილი გაუღვიძეს გულში, დაახშევს მისი ადამიანური ღირსება და მხოლოდ უზნეობა და სხვისი ყვლეფა აყურებინეს და ასწავლეს. მოსეს მოქმედება ჩვენ გულს გვიმღვრევს, მაგრამ ამავე დროს არ უნდა გვავიწყდებოდეს, რომ მისი მოქმედების ყველა შედეგში მარტო მას არ უდევს წილი. არამედ სხვებსაც. ჩვენ თავში დაეპირდით მკითხველს და ახლა მოვიყვანთ იმის მაგალითს, თუ როგორი სინამდვილით და პირუთვნელად ხატავდა ნინოშვილი გლეხის ღირსებასთან ერთად მის ნაკლოვანებასაც. თუ ბაბაღე, ათანასე და სხვები მთელი ოჯახობით დაიღუპენ, ამაში მოსეზე ნაკლები წილი არ უდევს ბაგრატ ქერაძეს. ქერაძე და უნათლოშვილები ახლო მეზობლები იყვნენ, მაგრამ მუდამ მტრობა ჰქონდათ ერთიმეორეში. თავდაპირველად ერთ ნაჭერ მიწაზე შეექმნათ საჩივარი. არავითარი საშუალებით არ ზოგავდნენ ერთმანეთს საჩივრის დროს. როცა უნათლოშვილებმა მოიგეს საქმე, მტრობა უფრო გაძლიერდა; ამას შემდეგ კიდევ რამდენიმე მიზეზმა ორივე მეზობლები ერთი მეორის მოსისნლე მტრად გარდააქცია, ბაბაღეს ოჯახის ბედნიერება ბაგრა-

ტის უბედურება იყო; მუდამ ეხვეწებოდა ბაგრატი: „ღმერთო, ერთი იგინის საწყენი საქმე შემადღებდით“. გაიგო თუ არა ბაგრატამ, რა პოზიციებზე იყო გაინთავისუფლა ოქრუამ თავი სალდათობისაგან, თუნდა აღდგომ- გათენებოდეს: მაშინვე დააბეზლა... ამოწყდა ბაბალეს ოჯახი, ათანასეს ოჯახი, დაიკარგა რამდენიმე კაცი ციმბირში. — ყოველივე ეს უმთავრესად ქერაძის წყალობით. შეიძლება, ქერაძე არ მოელოდა ასეთ შედეგს, შეიძლება, ბოლოს დატანჯა სინდისმა და ანანებინა? სრულიადაც არა. ბაგრატა ძალიან კმაყოფილი იყო და იმის უგებდა უნათლოშვილებს. ვთქვათ: უნათლოშვილები მისი პტრები იყვნენ და არ შეეცოდა; მაგრამ მოხუცი ათანასეც ხომ მან დალუპა. სოფლის საყვარელი ათანასე, ამან მაინც რატომ არ დატანჯა?! მიეცით ბაგრატას მოსეს ცოდნა და გამოცდილება და უკეთესი „მოსე მწერალი“ გამოვა! ვინც, მცირეოდნადაც არის, სოფლის ცხოვრებას იცნობს, მან კარგად იცის, რომ ბაგრატასთანა პირები სანთლით საძებნელი სრულიადაც არ არიან, ისეთი მეზობლობა, როგორც ბაგრატასა და უნათლოშვილებს ჰქონდათ, დღევანდელ გლეხობაში იშვიათ მოვლენას არ შეადგენს: ცხოვრება გლეხისათვის დღითიდღე გასაქირი ხდება და მელიასი არ იყო: „გქონდა მშვიერი მუცელი, რაღა დიდება ღმერთსაო“. გაწვალებული ცხოვრება ადამიანს ხშირად ვიწყებინებს ზნეობა-პატრონებას. ამ მოთხრობაშიაც ნინოშვილმა ათლად დაგვანახა სამართლის წარმოების ნაკულუგვანებანი ჩვენში, დამნაშავეთა ლაპარაკი, მათი სახის გამომეტყველება, სამოცდახუთი წლის მოხუცი მღვდელი, რომლისგანაც ცუდი არავის გაუგონია, ადვილობრივ გარემოებათა ცოდნა საკმარისი იყო, რომ აღმოეჩინათ. ვინ იყო მართალი, ვინ მტყუანი და ამდენი ხალხი არ დაეღუპათ მხოლოდ იმიტომ, რომ გაბრძვიდნენ. ესეც რომ არ მივიღოთ მხედველობაში. საქმის რიგიანი გამოკვლევა და არა მარტო ფორმალიზმის დაცვა, ნათლად გამოაშკარავებდა სიმართლეს-სიყალბეს... ვინც წინააღმდეგია ჩვენში ნაფიცო მსაჯულების, მას მეტად გამოფიტული გული და დაჩლუნგებული გრძობა უნდა ჰქონდეს, რომ ასეთ უსამართლობას სედავდეს ჩვენ ცხოვრებაში და იმის მაგიერ, რომ მის მოსპობას ცდილობდეს, პირიქით, ეწინააღმდეგებოდეს ისეთ დაწესებულების შემოღებას. რომელიც მცირეოდნათ მაინც მოსპობს უსამართლობას.

## VI

ნინოშვილის მიზანი იყო, დაეხატა თანამედროვე გლეხის მდგომარეობა და ტენდენცია ამ მდგომარეობისა. ზოგ თავის მოთხრობებში ის ხატავს ყველა იმ მიზეზს, რომლებიც გლეხის ოჯახს, მის სიმტკიცეს გარედან უთხრან ძირს; ზოგში კი გვიჩვენებს იმ მიზეზებს,

რომლებიც გლეხის ოჯახს შიგნიდან აქცევენ. უკანასკნელ რიგის მოთხრობებს ეკუთვნის „უცნაური სენი“. გაბრიელა ჩამწარდაძე თექვსმეტი წლის იყო, როდესაც მამა მოუკვდა და მთელი ოჯახი მას დააწვა კისერზე, რადგანაც უფროსი შვილი იყო. „იმ დღემდე მოკვდეს გაბრიელა, რომ ჩემს ოჯახს ხარჯი და სამოსი მოაკლდებოდესო“, — უთხრა გაბრიელამ თავის თავს და დაუწყო მთელ ოჯახს პატრონობა. მთელი მისი არსება შრომამ შთანთქა, მუშაობის მეტი არაფერი ახსოვდა; სამაგიეროდ, გაბრიელამ პირნათლად შეასრულა თავისი სიტყვები: „ღები გვარიანის მზითვით დაათხოვა, ძმებსა და ღებს ასაზრდოებდა, მოყვარეს მოყვრობდა, მტერს მტრობდა“. მძიმე უღელმა და მოვალეობის ასრულებამ იმდენათ დაიმორჩილეს გაბრიელას მთელი არსება. რომ მან სიბერეში ფეხი გადადგა და ცოლის შერთვა ფიქრადაც არ მოსვლია. გაბრიელა აღარც სიბერისათვის იფიქრებდა ცოლის შერთვას, მაგრამ გარემოებამ აიძულა: ძმები გაეყვნენ, დედა დაუვარდა. გაბრიელამ გადაწყვიტა ცოლის შერთვა და კიდევ შეერთო, ისე, როგორც საზოგადოდ ირთავს გლეხი და თითქმის აზნაურიც საქართველოს ისეთ კუთხეებში, სადაც ძველი ტრადიციები და შეხედულებანი იმდენად ჭერ კიდევ არ შერყეულან. რომ ქალს თავისი უფლებანი შეეგნოს და მათ დასაცავად მტკიცედ იდგეს. გაბრიელას დამ გამონახა საპატარძლო; გაბრიელი შეჯდა ერთ დღეს ცხენზე. ნახა ცამეტი წლის ტასო, რომლის დანახვას ყველა ნატრობდა. ღმერთო, იმ ბედის გამხადე, რომ ტასო შემერთოს ცოლადო, თქვა, ის კი აღარ იკითხა, მისი წლოვანება შეეფერებოდა თუ არა ტასოს წლოვანებას, ან ტასოს უნდოდა თუ არა ის ქმრად.

„მართალია, ვერც იმას ვიტყვით, რომ გაბრიელასთვის არ გაერბინოს ასეთ ფიქრებს: „მე აგერ კიდევ მოვხუცთი და ჩემი საცოლო კი თორმეტ-ცამეტი წლის ბავშვია! რითი შევეფერებით ჩვენ ერთმანეთს? ჩემს საცოლოს სიყმაწვილის ჩიტი უფრინავს გულში და მე კი მოხუცებულობის ყვავე ჩამომჩხავისო“, მაგრამ ამგვარ ფილოსოფიურ მოსაზრებას უსწავლელი კაცის მოქმედებაში ძლიერ მცირე ადგილი უჭირავს; თავი და თავი გავლენიანი ძარღვი უფიცისათვის ერთხელ დაარსებული ზნე-ჩვეულებაა. აი ეს ჩვეულება უხვევდა თვალს და ეუბნებოდა გაბრიელას: „რა ყურადღების ღირსია, რომ შენსა და შენს საცოლოს შორის დიდი განსხვავებაა ყველაფრით? შენ ქმარი იქნები. ის — ცოლი, შენ — ბატონი, ის — ყმა“.

გაბრიელამ დანიშნა ტასო და მისმა მოუფიქრებელმა საქციელმა, „რჯულს უმტკიცესი ჩვეულების“ აყოლამ, ისიც დალუპა და აიხი ცოლ-შვილიც. ცამეტი წლის ლამაზ ტასოს რათ მოეწონებოდა მოხუცებული გაბრიელა, „რომლის მსხვილი წარბები, მძვინვა-

რე მოხუცის პირაჲს სახე და მაღალი, ცოტათი ბეჭებში მოხრილი ტლანქი ტანი“ მხოლოდ შიშს აგრძნობინებდა მას და ზიზღის მეტს არაფერს უბადავდა. ბევრს ტიროდა ტასო, ეხვეწებოდა მამას: ნუ გამათხოვებ, არ მინდა ქმარიო, მაგრამ ქალის გათხოვებას გლეხკაცი სხვანაირად უყურებს; სიყვარულით გათხოვება მას არ სწამს. ყმაწვილი ქალისაგან სიყვარულით გათხოვება მას გარყვნილებად ჰიანჩია. გლეხი დარწმუნებულია, რომ — როგორც მამას — სრული უფლება აქვს შვილის ბედ-იღბალი სურვილისამებრ გადაჭრას და არავითარ ცრემლებს, არავითარ გრძნობას ამ საქმეში ის ყურადღებას არ აქცევს. მან იცის ამ მხრივ თავისი უფლება, კანონიერია თუ არა მისი უფლება, ამას არ დაგიდევთ: რაც მისთვის ჩვეულებას ურგუნებია, მას სწამს და უცვლელადაც ასრულებს. ტასოს მამა ღარიბი გლეხი იყო, მზითევს ქალს ვერ მოაქცემდა. გაბრიელა კი გლეხის კვალობაზე ბარაქიანი კაცი იყო, მზითევს არ ითხოვდა და ეს სრულიად საკმარისი იყო, რომ ტასოს ცრემლებისათვის მამამისს არავითარი ყურადღება არ მიექცია. „მტირალი ტასო მამამ ძალით შესვა ცხენზე და, თითქო გაყიდული საქონელიაო, დაულოცა გაბრიელა ჩამწარდაძეს“.

გავიდა კარგა ხანი. ტასოს შვილებაც მიეცა, მაგრამ ის შარც ვერ შეუტიგდა თავის ბედს. პირველად ტასო გამოუთქმელ სევდას გრძნობდა; ცოლ-ქმრობის ბედნიერება მისთვის უცნობი იყო, გაბრიელასთან ყოფნა მას მხოლოდ ზიზღს აგრძნობინებდა და ბედნიერად მხოლოდ მაშინ თვლიდა თავის თავს, როცა გაბრიელას არ ხედავდა.

ღროს ისეთი ძლიერი გავლენა აქვს ადამიანზე, რომ მას ყოველგვარ უბედურებას და სისაძაგლეს აჩვევს. ტასოც შეეჩვია თავის იდგომარეობას, გაბრიელას: გამოუბრუნდა გული, დაიწყო ხალხში გამოსვლა, და მალე შეამჩნია, რომ ყველას მოსწონდა. გულგატეხილმა ტასომ მიაქცია თავის თავს ყურადღება; ახლა ის „დიდ ყურადღებას აქცევდა ტანისამოსის სისუფთავეს და გემოვნებას, თავსა და ტანს ტასო კვირაში სამჯერ მაინც იბანდა; სახლში იშვიათად გაჩერდებოდა, შეკრებილებას აღარ აკლდებოდა“. თავიდანვე გულგატეხილი ტასო ოჯახზე გულაყრილი იყო და გამრჩელობა და მუყაითობა გაბრიელასთან მას არ გამოუჩენია, ახლა კი ისე აიცრუა გული, რომ დედამთილისა და ქმრის საყვედურს ველარ აუდიოდა. რამ გამოცვალა ამდენად ტასოს ხასიათი? იმ გრძნობამ და ბუნებამ, რომელიც მხედველობაში არ მიიღეს მისი გათხოვების ღროს, ყმაწვილი ქალის ბუნება სიყვარულს ითხოვდა, ის კი ბებერ გაბრიელას მიჰყიდეს, რომლის შეყვარებაც მას არ შეეძლო, მან არ იცოდა, რა იყო ქმრის

აღერსი, სიყვარული; გულგატეხილი ადამიანი პირველ შემთხვევაზე დაძლია თავისმა ბუნებამ და სიყვარულმა, ქმრის ღალატი აფიქრებია. ტასო შეცდა, მაგრამ ძვირად დაუჯდა შეცდომა. შეხვდა „უცნაური სენი“, გადაედვა მისს ქმარ-შვილს. ქმარი და ერთი ქალ-ვაჟი დაებო-ცა. უმცროს ვაჟს ცხვირი მოძვრა, ტასო დაბრმავდა. ახლა ერთ და-ბახინჯებულ ბავშვს დაჰყავს სოფელ-სოფელ და ქალაქებშიაც სამოწ-ყალოდ ჯოხზე დედაბერი. ეს მაზინჯი ბავშვი არის ჩიტო, გაბრიელა ჩამწარდაძის ვაჟი, ხოლო უცხვირო, ბრმა დედაბერი — ამ ბავშვის დედა, ტასო, ის ტასო, რომლის სიმშვენეირეს აღტაცებაში მოჰყავდა ერთ დროს ტევრეთის ყმაწვილკაცობა“.

ჩვენთვის საყურადღებო ის კი არ არის, რომ ტასოს „უცნაურ-სენი“ შეეყარა: ეს მხოლოდ შემთხვევითი უბედურება იყო, საყუ-რადღებო ის არის, თუ რად შეცდა ტასო. იმიტომ, რომ კოტემ შეაღ-ღინაო, იტყვის ზოგი.

კოტე მამალაძე იყო გლეხის შვილი; სოფლის ერთკლასიანი სას-წავლებელი გაათავა, შემდეგ მახლობელ ქალაქში „პრიკაშიკად“ დადგა; ისწავლა რუსული ლაპარაკი, სავაჭრო ანგარიში, შეძლებაც შეიძინა და თავი ძალიან მოჰქონდა თავის მეზობლებში. ცხოვრებაში მისი ერთადერთი მიზანი საკუთარი კუქის სამსახური და ჯიბის გა-ტენა იყო. კოტეს მეტიც არ მოეთხოვებოდა; სიღარიბეში დაბადებულ და აღზრდილი ადამიანი, შესაფერ განვითარებას მოკლებული, ფუ-ლის საშოვარში ჩავარდა, გამდიდრდა მეზობლებთან შედარებით, იმიტომ ამაყობა რომ დაეწყო, სრულიად ბუნებრივად უნდა ჩავთ-ვალოთ. სწავლას კოტე ფულით ზომავს: ვინც ბევრ ფულს ბე-ტავს, კარგ სწავლულადაც ის მიაჩნია; თუ ნასწავლი ღარიბად ცხოვ-რობს, იმის შესახებ კოტე ამბობს: სწავლის მოხმარების უნარი ყო-ველ კაცს კი არ აქვსო, სოფლის ხალხიც კოტეს თვლით უყურებს სწავლას; სწავლას ის აფასებს მხოლოდ როგორც საშუალებას გამ-დიდრებისა და კეთილი ცხოვრებისათვის; სხვა მიზანი სწავლისა მას არ ესმის, ან ნაკლებ მნიშვნელობას აძლევს. თუ ღარიბი სო-ფლელი შვილს სასწავლებელში აძლევს, იმიტომ კი არაა, რომ მისი გონების განვითარებისათვის ზრუნავდეს, არამედ იმიტომ, რომ სა-შუალება მიეცეს გაუჭირვებელი ლუკმის ჭამისათვის. რა ნასწავ-ლიც უნდა იყოს ვინმე, თუ თავის სწავლას სარგებლიანად ვერ ასურდადებს ფულზე, სოფლის ხალხი ასეთ სწავლას არ ემადლიე-რება და ამბობს: რა გამოვიდა! თუ კი სწავლას ვერ მოიხმარს, რა მოხელეა ამისთანა სწავლაო. უტილიტარული შეხედულება საუკე-თესო შეხედულებაა, მაგრამ ასეთი ვიწრო უტილიტარიზმი, რასაც ვირველია, გასაკიცხია; მისი მიზეზი, ერთი მხრივ, ხალხის სიღა-



რიბეში მდგომარეობს, მეორე მხრივ, მის განუვითარებლობაში. გარდა ამისა, თვით ნასწავლი პირებიც ხელს უწყობენ ასეთი აზრის განმტკიცებას ხალხში: უმეტესი წილი ნასწავლებისა მხოლოდ ფულის სახვეტ მანქანად აქცევს თავის სწავლას, მხოლოდ თავის კუქისათვის ზრუნავს და ხალხმაც რომ მათი მოქმედების მიხედვით დააფასოს სწავლა, რა გასაკვირველია. სოფლელები შენატროდნენ კოტეს და ამბობდნენ მის დანახვაზე: შვილი ვარ და სწავლული ვარ, კოტე მამალაძემ უნდა თქვასო. კოტე გაბრიელას შორეული ნათესავი იყო და, სოფელში როცა ჩამოვიდოდა, მას ესტუმრებოდა ხოლმე. წერილ ვაჭრებში გაზრდილ ადამიანს ზნეობაზე თავისებური შეხედულება აქვს. შეზარბოშებულ კოტეს ლამაზი ტასოს დანახვაზე ქვენაგრძნობანი აეშლებოდა და შორეულ ნათესაობას არ დაერიდებოდა მისი ბაზრული ზნეობა, მაგრამ თუ გარემოებას არ მოეწონებოდა, თუ თვით ტასო არ ყოფილიყო ადვილი გასაპრიყვებელი, კოტე მას ვერ შეაცდენდა: ნაშუსის დაკარგვა, ქმრის ღალატი გლახის ქალს მომაკვდინებელ ცოდვად მიაჩნდა. ამის მარტო გაფიქრებაც კი კუპრის ტბას და ზედ გადებულ ბეწვის ხიდს დაუხატავს ხოლმე ვონებაში. მაშ, რად შეცდა ტასო? ტასოს შეცდომის მიზეზი ჩვენ გარემოებებში უნდა ვეძიოთ, ცამეტი წლის ტასო მიათხოვეს მოხუცებულ გაბრიელას, მიათხოვეს ასე, რომ მისი სურვილი მხედველობაში არ მიიღეს. ახალგაზრდა ქალის ბუნება სიყვარულს ითხოვდა: მას კი არ შეეძლო შეეყვარებია გაბრიელა, რომელსაც ძალათი მიჰყიდეს, როგორც უსულო ნივთი, ამგვარ პირობებში ის კი არ არის საკვირველი, რომ ტასო შეცდა, საკვირველი ის იქნებოდა, რომ არ შემცდარიყო, არა, ტასო არ იყო თავის თავისა და ქმარ-შვილის დაღუპვის მიზეზი. მიზეზი იყო უსამართლობა, ძველი ჩვეულება, ტასოს უფლებათა შელახვა. უსამართლო ჩვეულებამ ტასო ისეთ გარემოებაში ჩააყენა, რომ მას არ შეეძლო ქმრის ერთგული ყოფილიყო. შეცდა ტასო, — მაშ საძაგელი ყოფილა, საზიზღარი, გარყვნილი; პატიოსან პირთა შორის მას ალაგი აღარ აქვს, იძახის მრავალი. იმას ვინ იკვლევს, თუ რად შეცდა, ვისი ბრალი იყო. არათუ გლეხკაცობაში, უფრო მაღალ წრეშიც ხშირად შეხედვებით ისეთ დედ-მამას, რომლებსაც თავიდან ვერ გამოუტრეკიათ ის აზრი, რომ ისინი მშობლები არიან, უფროსები, მაშასადამე, სრული უფლება აქვთ შვილების ბედობაში ისე მოაწყონ, როგორც მათი დამყაყებელი აზრი და რწმენები მოითხოვენ. — შვილი თუ არ გვიყვარს, ვინლა გვეყვარება; შვილის საკეთეს და გაბედნიერებას თუ არ მოვინდომებთ, მაშ რაღა უნდა მოვინდომოთო, გაიგონებთ ხშირად ასეთი დედ-მამისაგან, — ის კი არ იცინა, რომ ხშირად შვილს, როგორც მტერს, ისე ექცევიან,

პედსიერების მაგიერ აუბედურებენ. ნამეტურ ქალები არიან შეაბრაალის მდგომარეობაში ჩაყენებული ზოგიერთი მშობელისაგან. მშობლების უფლება სრულწლოვანი ქალის, გინდ ვაჟის მიმართ. მხოლოდ მეგობრული რჩევის საზღვარს არ უნდა გადაცილდეს და არ უნდა იხატებოდეს იმ ძალმომრეობაში და სხვის უფლებათა გადალახვაში, რაც ზოგიერთ მშობელს თავის კანონიერ უფლებად მიაჩნია... მაგრამ ჩვენი ცხოვრება უკვე გვიჩვენებს სანუგეშო ნიშნებს და ამას ლიტერატურაც აღნიშნავს: ჩვენი ქალები უკვე თავისუფლებიან ძველი ჩვეულებისაგან, გონების კარს პროგრესულ და სპექტაკლურ შეხედულებებს უღებენ, ისინი ნელ-ნელა იგნებენ თავის ინტერესებს და უფლებებს და კიდევ ემზადებიან მათ დასაცვლად. საჯულისხმოდ ის არის, რომ ქალების ასეთი განთავისუფლება ხდება საქართველოს იმ ნაწილში, სადაც ერის მწარმოებელი ძალა უფრო ვითარდება, ესე იგი დასავლეთ-იმერეთში. ცხოვრების განვითარებამ დასავლეთ-იმერეთის ქალებს წილად არგუნა, დაანახონ თავის დანარჩენ თანამემამულეთ, თუ რაში მდგომარეობს მათი უფლებანი, რაც კლილება არის საჭირო მათ ცხოვრებაში და მოქმედებაში, და მაგალითი უჩვენონ, თუ როგორ უნდა თავისი ინტერესების დაცვა და ვერცკლილი ცხოვრების გზაზე განახლებული და ვაბრწყინებული გონებით სვლა.

\*

ნინოშვილს არა აქვს სრულად დახასიათებული კოტე მამალაძე. რადგანაც ამ მოთხრობის წერის დროს ამ ტიპის სრულად დახასიათება იმის მიზანს არ შეადგენდა; მაგრამ მოკლე დახასიათებითაც გარკვეული წარმოდგენა მოგვეცა ამ პირის შესახებ. როგორც ზემოთ დავინახეთ, კოტე თუმცა გლეხია, მაგრამ შეხედულებით, აზროვნებით, მოქმედებით, ზნეობრივი ელემენტებით და მედიდურობით შალიან განირჩევა დანარჩენი გლეხობისაგან. ამ პირს დაუკარგავს პეერი იმ ღირსებათაგანი, რომლებიც გლეხს ამშვენებენ, მათ ნაცვლად კი შეუძენია ფული. ასეთი ახალი ტიპების ხატვა ჩვენი ცხოვრებიდან პირველად გიორგი წერეთელმა დაიწყო „პირველ ნაბიჯში“ ფულავათი. წვრილ ბურჟუაზიულ ცხოვრებაში გადასვლა გლეხს უსათუოდ ცვლის. ეს ცვლილება კარგად შეამჩნია ნინოშვილმა და აგრეთვე ლალიონმა; ჩვენი ცხოვრების ახალი ტიპები მხოლოდ ამ ბელეტრისტიკაში დაგვიხატეს ჭერჭერობით.

უნდა მოვიხსენიოთ ის გარემოებაც, რომ ნინოშვილმა აღუნიშნავად არ დასტოვა ამ მოთხრობაში ის ფაქტი, თუ როგორ უპატრონოდ არის დატოვებული ჩვენი სოფელი ექიმობის მხრივ. სოფ-

ლად რომ ექიმი ყოფილიყო, გაბრიელას მთელი ოჯახი გადაარჩებოდა.

„დედაბრები თავიანთი ბალახ-წამლებით და მკითხავეებით ხუთობანქოებით აბა რა ექიმობას გაუწევდნენ ამ ავი სენით გახრწნილ გაბრიელას ოჯახს!“

უექიმობას თან დაერთო ხალხის უცოდინრობაც, თორემ მკოდნე ადამიანი რომ გამოჩენილიყო, დროზე მონახავდა საშუალებას და სენს მთელ ოჯახს არ დააღუპებდა. მაგრამ უექიმობას უვიცობაც ზედ მიემატა:

„ერთი ამბობდა: წითელი ქარიაო და ლოცვით უპირებდა განკურნებას. მეორე ქარ-ცეცხლიაო, და ამ ქარ-ცეცხლის წამალს ადებდა, მესამე დასუნვილიო, და ვინ მოთვლის, რა სენი არ დაარქვეს და რა წამლები არ სცადეს. ზოგი იმასაც ამბობდა: ბატონებია და წამლობა არ ეკადრებაო.“

## VII

„პარტახი“ თავიდან ბოლომდე ილუსტრაციაა იმ უბედურების, რომელიც გლეხს ატყდება უვიცობისა და მავნე ჩვეულებათა გამო.

ჯერან ტევრიძე გლეხკაცის კვალობაზე თავის სოფელში საუკეთესო მოსახლე იყო; მიწა იმდენი ჰქონდა, რომ მოსავალი არათუ თვითონ ჰყოფნიდა, ყიდდა კიდევ და ამით გადასახადს ისტუმრებდა. ეზოში წამოქიმული ჰქონდა ორთვალის ფიცრული სახლი, ბელელი, ფაცხა, ნალია, სხვადასხვა წვრილი შენობები. შინაური საქონელი, რაც საჭირო იყო ერთი გლეხისათვის, სრულად ჰყავდა. ამიტომ გასაკვირველიც არ არის, თუ გლეხს გარდა ბევრ გაღარიბებულ აზნაურსაც ეჭირა თვალის ჯერანზე; ცოტა რამ თუ შემოგვაძლია. ქალს მივცემთო. ჯერანიც კარგად ხედავდა, რომ ადვილად შეეძლო აზნაურს დასიძებოდა, მაგრამ იცოდა, აზნაური დიდკაცობას დამიწყებს, დაჯდება, ხელს აღარ გაანძრევსო, ამიტომ გლეხის ქალს ვაძებდა. ქალი ბევრი ეძლეოდა, მაგრამ ჯერანი მეტად შეუჭრებელი ხასიათის იყო, რადგანაც მდიდარი გლეხის სახელი ჰქონდა გავარდნილი და თვალადაც არ იყო ურიგო, უნდოდა, რომ მისი ცოლისთანა ქალი მთელ ეკლესიაზე არ გამოსულიყო. ასეთი ხასიათისაც რომ არ ყოფილიყო ჯერანი, მას ღრმად სწამდა ძველი ჩვეულება: ავი კაცად არ იხსენების, ვინც დედის უნებურს იზამსო. ჯერანისათვის დედას და დას უნდა გამოერჩიათ საცოლო, ჯერ მათ უნდა მოწონებოდათ; თუკი ისინი მოიწონებდნენ, ჯერანიც თანახმა გახდებოდა: „თუ გულით მონდომებია, ქალის სანახავათ საქმის გაკეთე-უარესი წუნია იყო; ის მუდამ მკითხავთან გარბოდა, მკითხავი კი

გადაჭრით არავიზე უთითებდა, ამიტომ ვერც ხვარამზეს გადაეწყვიტა ჯერანის იღბალი. ჯერანის და ელისაბედიც ამგვარად იქცეოდა: მას სწამდა, რომ ჯერანის საცოლეს ამორჩევა დედისა და დის საქმე იყო და არა ჯერანის. „— მამა რომ გვყავდეს ცოცხალი: მაშინ ჩვენ აღარ გვექნებოდა ხმაი. მარა მამა აღარ გვყავს, ჩემი ძმის ჳირისუფალი ახლა მე და ნენაი ვართ. ახლა ჩვენ თავზეა მისი ცოლის შერთვა“-ო, — ამბობდა ის. დედისა და დის უნებურათ რომ ჯერანს ცოლი შეერთო. ამას ელისაბედი ვერ წარმოიდგენდა. ხანდახან ჯერანი გაეხუმრებოდა ხოლმე დას: ესა და ეს ქალი მომეწონა და უნდა შევიერთოვო; თუ ელისაბედს ის ქალი არ მოსწონდა, გაცეცხლდებოდა ხოლმე: ჯერ დედა და დაი დაგვკალი და მერე შეირთეო. ჯერანი გაიცინებდა და მალე დაამშვიდებდა: „რა ბრიყვი მნახე მე, რომ შენ და ნენაის უნებურათ ცოლი შევიერთოვო“.

როდესაც მაშვალი მოვიდოდა ჯერანთან, ქალი ჯერ უსათუოდ ხვარამზეს უნდა ენახა; თუ მას არ მოეწონებოდა, საქმე ჩაშლილი იყო. თუ მაშვალი ჯერანსაც ურჩევდა: შენც ნახეო, ჯერანი უპასუხებდა: არა, ნენამ ნახოს, ნენა მე არ მიღალატებს; თუ მას დაუჭდება, მეც ვარს არ ვიტყვიო. ბოლოს, როგორც იქნა, მოეწონა ერთი ქალი ხვარამზეს. საქმე თითქმის გაათავა, მხოლოდ მკითხავის აზრი იყო საჭირო. სამ მკითხავს აკითხვიეს დედა-ქალიშვილმა და სამიკემ უთხრა: ბედი კარზე მოგდგომიათ და ხელიდან არ გაუშვათო. ძველი ჩვეულების ღრმად პატივისმცემელმა ჯერანმა თვითონ აღარ ენახულა ქალი და პირდაპირ მაყრებით დასანიშნავად წაიდა; მაგრამ დახეთ მის უბედურებას: საცოლეს შერცხვა, ფერი შეუკრთა. ტანისამოსიც არ უბდებოდა და ჯერანს არ მოეწონა. გაბრუნება შეუძლებელი იყო; ჯერანმა დანიშნა ქალი და გამობრუნდა სახლში. ჯერანმა დაავგიანა ჳვარისწერა; მას ქალი არ მოსწონდა და ერთი ფიქრი ეუბნებოდა, თავი დაანებეო, მეორე ფიქრი კი არწმუნებდა ხოფელში პატიოსან და სინდისიერ აღამიანს გიძახიან. ქალი შენს ნიშანს ატარებს და ახლა რომ თავი დაანებო, ხომ მოგეჭრა თავიო; ამას ჩასძახოდა ჯერანს ძველი ჩვეულება. ჯერანმა ძალად დაიწერა ჳვარი. სოფლის უაზრო ჩვეულებამ მას ბედნიერების მაგიერ უბედურება შესძინა და მისი მდიდარი კარმიდამო დღეს პარტახად გადააქცია.

ლიზა, ჯერანის საცოლე, თერთმეტი წლის ქალი იყო; თვალტანად მოხდენილი, ხასიათიც კარგი ჳქონდა. ჯერანს რომ პირველად თვალი მოჳკრა, არ მოეწონა; არ უნდოდა, მას გაყოლოდა ცოლად. მას სხვა უქვარადა, მაგრამ ძველი ჩვეულების წყალობით ის მშობლების სრული მონა იყო და ყოველგვარი გრძნობა თავისსავე

გულში უნდა ჩაეხშო. იმის ბედს აწყვეტდნენ და მას კი კრინტიც ვერ უნდა დაეძრა; ვისაც მისცემდნენ, იმას უნდა გაყოლოდა, როგორც გაყიდული პირუტყვი. როდესაც ჭერანმა ჭვარისწერა დააგვიანა, ლიზას უხაროდა, მაგრამ, რომ იფიქრებდა, თავის დანებებას საქმროსაგან როგორი ჭორები და დამცირება მოჰყვებოდა, სასოწარკვეთილებას მიეცემოდა და იტყოდა ხოლმე: „რა უჭირდა, არ გევეჩინე ღმერთსო“. უაზრო ჩვეულებას ისეთი გავლენა ჰქონდა. რომ ლიზას ერჩია, გაყოლოდა იმ კაცს, რომელიც მას ძულდა, ვიდრე სხვისი დაცინვის საგნად გამხდარიყო. გლებკაცი ქალს მხოლოდ გარეგნობას უსინჯავს, თვალით თუ არ მოეწონა, მისი აღარაფერი მოწონს, მისი სიყვარული არ შეუძლიან. ჭერანიც ასეთი იყო; ჩვეულებამ ის ააძულა შეერთო ისეთი ქალი, რომელიც მას არ მოწონდა; ცოლის შერთვა და მისი გაუბედურება ერთი გახდა. გულნაქლულ ჭერანს ცოლის აღარაფერი მოწონდა; ჭერ სახელი გაბოუცვალა. შემდეგ თმის დაწვნა დაუწუნა, ჭერანისაგან დაწუნებული ლიზა დედამთილმა და ელისაბედმაც აითვალწუნეს. თუ ლიზა დედამთილს ყველაფერში არ დაეთანხმებოდა, ხვარამზეს გული მოსდიოდა: უმცროსი უფროსს ყველაფერში უნდა დაეთანხმოსო. თუ დაღონდებოდა, იმას უწყებოდნენ: რა გაქვს სამგლოვიო, თუ გაუჩუმდებოდა ყველას, მაშინ უფრო უწყებოდნენ: განგებ იქცევი აგრე, რომ გაგვახელოო.

„—ესეც გველსავით გარისინდება და ჩაიწყვეტს ენას, რომ კულზე ცეცხლი მოგეკიდება კაცს! — ეუბნებოდა ერთ დღეს დედას ელისაბედი. — ყველა გველმა ადამიანმა ასე იცის გაჩუმება, ვითომ და ასე. მე კაი სულიერი ვარ, შენ რაც გინდა მითხარი, მე მაინც არ შეწყინება, მაგიერს არ ვეტყვიო. მარა გულში ქე წერს ყველას და ბოლოს გველსავით საწამლავით გადმოანთხევს“, — მიუგო ქალიშვილს ხვარამზემ.

ყველა მას უწყებოდა, ყველა მას ჰკიცხავდა, ყველა მას ლანძღავდა; მას კი უფლება არ ჰქონდა ხმა ამოედო. მთელ ოჯახში ლიზას ყველა მტრულად უყურებდა, არავინ იყო ისეთი, რომ მის მდგომარეობაში შესულიყო, რომ მისთვის გაეზიარებინა ლიზას თავის გულის პასუხი. მეზობლის დედაბერთან დადიოდა და ამასაც უწუნებდა. მშობლებს და დაძმებს ხომ მალე ამოაკვეთინეს მასთან სიარული. ლიზას მოძულდა თავი, სიცოცხლე ჯოჯოხეთად გადაექცა, ბევრჯერ დააპირა წასვლა, მაგრამ სოფლის შეხედულება, პირიქით, მას გაკიცხავდა და თავს მოჭრიდა. ამჟამად, ლიზა ასეთ მდგომარეობაში ეშმაკსაც კი შეეთვისებოდა, თუ კი მასში მცირეოდენ თანაგრძნობას და სიბრალულს ჰპოებდა. ამიტომ გასაკვირველიც არ არის,

რომ მან ლევანი შეიკვარა. ლიზა დიღხანს ებრძოდა სიყვარულს, მაგრამ მაინც სიყვარულმა სძლია და ასეც უნდა მომხდარიყო. მან ძლივს იპოვა ადამიანი, რომელმაც ის შეიბრალა, თანაგრძნობის ხელი გაუწოდა; ძლივს ნახა მეგობარი, რომელთანაც მას შეეძლო თავისუფლად ამოესუნთქა. ტკბილი საუბარი, თავისი სევდის გაზიარება. იმ დროს, როცა ის ყველას ძულდა, ყველას ეჩაგრებოდა. შეხვდა ადამიანი, რომელიც ეუბნებოდა: „შენ მიყვარხარ, ტყვია მომხვტეს ამ გულში, თუ ჭერ ანე მყვარებოდეს, რავაც შენო.“ ხედავდა, რომ მას გულწრფელად ეუბნებოდნენ ამ სიტყვებს: ის დარწმუნდა, რომ „ლევანი ერთადერთი ადამიანი იყო, რომელთანაც შეეძლო გამოეთქვა თავისი გულის პასუხი“, ამიტომ შეუძლებელი იყო არ შეთვისებოდა მას, არ გადაეტანა მასზე მთელი ის გრძნობა, რომელსაც აქამომდე საზრდო ვერ ეშოვა. ლიზამ კიდევ განიზრახა ლევანთან ერთად გაქცეულიყო სადმე, მაგრამ სხვა დაბრკოლებას რომ გადარჩენოდა, კანონს ვერსათ დამალუბოდა. ხალხის კიცხვა და წყევვა კიდევ სხვა იყო, მის გარშემო ცხოვრება ისე იყო მოწყობილი, რომ მისი ბედნიერება შეუძლებელი იყო. ლიზას კანონიერი და სრულიად აუცილებელი გრძნობა ლევანისადმი გამოაშკარავდა, ხალხმა დაინახა ამაში თავისი ჩვეულების და რწმენის დარღვევა და გაკიცხა ლიზა. მაშამ შემოუთვალა: თავი მომჭერი ამ სიბერის დღეს, მაგრამ ჩემმა თვალებმა აღარ განახოს ამას იქით! შენ დღეის იქით აღარ გყავს არც დედ-მამა და არც დამებბიო. ჭერანს წინათ ცოლის გალახვა სამარცხვინო საქციელად მიაჩნდა, მაგრამ ახლა ცოლის დანაშაული ისეთი დიდი იყო. რომ უოველისფერი დაივიწყა და მიჰყო ცოლის ლახვას ხელი. ლიზა გრძნობდა, რომ მას უსამართლოდ ექცეოდნენ, ამავე დროს თითქოს თავის თავსაც ამტყუნებდა: მისი რწმენა შერყეული იყო და ვარკვეულ გზას ჭერ ვერ დადგომოდა. „რა ვიცი, რეიზა შევცთი? ესე იყო ჩემი საქმე მოწყობილი და შევცთი! თლათ იგინია დანაშაული ჩემ შეცდომაში! არა ვითამ? აბა მე ვარ? რა ვიცი, ვერაფერს გეიგებს კაცი, ესეა მოწყობილი ჩვენი ყოფნა!..“

ლიზას მოუკვდა ერთადერთი შვილი, ამქვეყნად არათუ აღარაფერი იზიდავდა მას, ყოველიფერი ეჩაგრებოდა. სიკვდილი მისთვის სანატრელი შეიქნა, კიდევ მოიკლა თავი და დაამტკიცა ამით, რომ თუმცა ძველებურ რწმენა-შეხედულებაში იყო აღზრდილი, მაგრამ ძველი ჩვეულება დღევანდელ ცხოვრებაში მისთვის ისე მძიმე გამოდგა, რომ ვეღარ აიტანა და სიკვდილით გაინთავისუფლა თავი. შეუდარებელია მოთხრობის ბოლოს ის ადგილი, სადაც აწერილია ლიზას სულიერი მდგომარეობა, მისი მარტივი ფიქრები იმ

დროს, როცა ის თავის მოკვლას ეპირებოდა. მე არ ვიცი უკეთესი ალაგი ფსიქოლოგიის მხრივ ჩვენს ლიტერატურაში. ლიზას მთელი აზროვნება თავის მოკვლის წინ სიყმაწვილის დღეებსა და ნიკოს გარშემო ტრიალებს. მას უნდოდა ბედნიერი ყოფილიყო და ნება არ მისცეს. ახლა, მისთვის ყოველიფერი მოსპობილია. ის ჯერ მონა იყო მამის, შემდეგ ქმრის, ხმის ამოღების ნება არც ერთთან არა აქვს. მას სიყვარული სწადია, ის კი ყველას სძულს. როდესაც ყველააგან უარყოფილმა ნახა კაცი, რომელმაც ის შეიყვარა, დედმამამაც კი პირში ჩააფურთხეს და მის შვალობაზე ხელი აიღეს. რადა? განა მათი ბრალი არ იყო ყველაფერი? სიკვდილის მეტ-ლიზას აღარაფერი დარჩენია, მაგრამ ის იმიტომ კი არ იკლავს თავს, რომ სიცოცხლე მოსძულებოდეს, არა, მას სიცოცხლე უყვარს. მას უნდა ბედნიერება, მაგრამ „თავიდან არის ყოველიფერი უხეიროდ მოწყობილი“ და თავის მოკვლის მეტი აღარა დარჩენიარა. გაანთავისუფლეთ ლიზა ძველი ჩვეულების მონობისაგან, ნუ გადავლობებით მის ბედნიერებას წინ, იცანით მიბი პიროვნება და უფლებანი და ის სრული ბედნიერი იქნება.

არათუ ლიზა არის შესაბრალისა, შესაბრალისია მთელი ის წრე. რომელიც ჯერ ვერ განთავისუფლებულა დამყარებულ რწმენა-ჩვეულებათაგან. ლიზას გარშემო ყველა ისე შეუბორკავს ძველ ჩვეულებებს, რომ თავისუფლად ფეხის გადადგმა აღარ შეუძლიათ. ჯერანი დარწმუნებულია, რომ მისი ცოლის შერთვა მიბი დედის საქმეა და არა მისი. როცა მაშვალი მოუდის, ის დედაზე უთითებს: ნენამ ნახოს და თუ მოეწონა, თანახმა ვიქნებო. ბვარამზეც ამავე აზრის არის და საცოლოს სანახავად ჯერანს კი არა გზავნის, პირიქით, სხვებს არიგებს: „ჯერანს არაფერი უთბრათ, ჯერ მე ვნახავ და, თუ მომეწონა, ქეც დავნიშნოთ.“ ის კი ვერც ერთს ვერ შეუგნია, რომ ცოლის ამორჩევა იმიბი საქმეა, ვინც ირთავს და არა დედ-მამის, ჯერანი ხედავს, გაუბედურდა, მაგრამ მას ვერ შეუგნია, სად არის მისი უბედურების მიზეზი; ის დედას უწყობა: „ზლაპარში გამიგონია, დედაი, დაი მოლაღატე, მარა თუ მართალი იყო, დღემდე არ ვიცოდი და დღეს კი ჩემი თვალათ ვნახე.“ მას ვერ შეუგნია, რომ დედა და და აქ არაფერ შუაშია, რომ ყოველივე უბედურება წარმოდგა მისი სირეგვისაგან, უმკითხავოდ რომ ფეხს არ გადადგამს, და იმ ჩვეულებისაგან, რომელიც მას ღვთისაგან დადგენილი ჰგონია და რომლის დარღვევაც მომაკვდინებელ ცოდვათ მიანია. როდესაც მიბი და არ მოიწონეს, ის სიდდარს უწყობა: „თუ გულით მოენდომებია, ქალის სანახავათ საქმის გაკეთებამდი რეიზა მეიყვანა? ჯერ საქმეს გავაკეთებდი და ქალის ნახვას,

დასაწმენდავთ რომ მოვიდოდა, მაშინაც ქე მოესწრებოდაო“. ე. ი. ის წყრება. რომ მისმა სიდედრმაც ბოლომდე არ დაიცვა ის ჩვეულება, რომელმაც თვითონ (ჯერანი) გააუბედურა. ძმის ცოლის შერთვაში ელისაბედი დიდი თავგამოდებული იყო; თუ ქალებს ჩხრეკდა, თუ მკითხავენთან გარბოდა. როდესაც საქმე მის გათხოვებაზე მიდგა, დედა და ძმა ფაცურობდნენ, ის კი ისე იყო გაჩუმებული თითქო მას არაფერი შეეხებოდა; თავის გათხოვების საქმეში გარევა მას სამარცხვინო საქციელად მიაჩნდა, ამას გარდა, ურცხობათავაშვებულობაში ჩამოართმევდნენ! ლიზას არ მოსწონს საქმრო, სხვა უყვარს, მაგრამ ჩვეულებამ ის უბრალო ნივთად გადააქცია; მას უფლება არა აქვს, თავისი ბედის გადაწყვეტაში წილი მიიღოს, არ წაყვეს მას, ვინც ძულს და პირდაპირ გამოაცხადოს: მე ეს კაცი მიყვარს, მასაც ვუყვარვარ და ჩვენს ბედნიერებას ნუ ელობებიო. ზალიკას, ლიზას მამას, სასიძო კაცს უგზავნის და უთვლის: შენი ქალი არ მომწონს და გამიშვიო; ზალიკას უყვარს თავისი ქალი. მას ბედნიერება უნდა თავისი ქალის და არა გაუბედურება; მისი ქალი თუ ქმარს ეძულება, ამით ის უბედური იქნება, მაგრამ ზალიკა დაბრმავებულია უაზრო ჩვეულებით, რომლის დარღვევაც მას ოჯახის გაბანჯბად და შერცხვენად მიაჩნია. მამას, რომელსაც შვილ-უყვარს, თითქო კიდევ უნდა გახარებოდა და არ მიეცა შვილი ისეთი კაცისათვის, რომელსაც მისი ქალი ეძულებოდა; მაგრამ ზალიკა მონაა ძველი ჩვეულების და ამიტომ ის სასიძოს ჩხუბს უქადის: „ჩემი ოჯახს შერცხვენას ნუ შეინდომებს, თვარა დღეს მეც გავთავდები და იგიც დათავდებო.“

ჩვენ დავინახეთ. თუ რაში მდგომარეობს მოთხრობის დედა-აზრი; ხოლო აზრის განსახორციელებლად ავტორმა სინამდვილე ბევრგან დაამახინჯა. ბევრი სიყალბე იხმარა, ნაძალადევად მოაწყო ბევრი გარემოება, წინდაწინვე დასასულ მიზნის მისაღწევად და ამიტომ მოთხრობა მეტად ტენდენციური გამოვიდა. ავტორს სურდა უსათუოდ დაემტკიცებია, რომ ძველი ჩვეულებანი ხალხს ღუპავს; ცხოვრება კი იმდენად არ ეთანხმება ავტორს, რამდენადაც მას უნდოდა: მართალია, ცოლის შერთვაში ისეთი ჩვეულების გაბატონება, როგორც ნონოშვილმა დაგვანახვა, ბევრ უბედურებას თესავს, მაგრამ იმ ზომამდე კი არავინ მიყავს, როგორც ჯერანი და ლიზა. ამიტომ ავტორმა ჩაურთო მოთხრობაში ბევრი ნაძალადევი პირობები, რომ მას მიერ გამოჩნული დასასრული, დასკვნა აუცილებელი ყოფილიყო; ამით კი სინამდვილეც დაამახინჯა და მოთხრობის სახელოვან ღირსებას და მნიშვნელობასაც ზიანი მიაყენა. ჯერანს არ მოეწონა ქალი, მიუგზავნა სასიძომროს მოციქული, მაგრამ არ გაუ-

7. ი. გომართელი, I ტ.



შვეს; გაპარვა დააპირა, მაგრამ ვერ მოახერხა; სახლში დაბინავების შემდეგ სულ აღრენილი იყო და დედას და დას ხმას აღარ ცემდა. ცოლის ისე შერთვა, როგორც ჯერანმა შეირთო, იშვიათი მოვლენა არ არის ჩვენში. ჯერანს არ ეყვარებოდა ისეთი ქალი. რომელზედაც თათქმის ძალით დაიწერა ჯვარი, მაგრამ შვილის ყოლა, ისიც ვაჟის, ბოლოს მოუღებდა ყოველგვარ უკმაყოფილებას ცოლ-ქმარს შორის. ჩვენ კი ამას ვერა ვხედავთ: შინაურებს ისევე სძულთ ლიზა, როგორც წინათ. ჯერანს რომ არ დასოცოდა ხარები. ფიქრი რომ არ დაეჭრა მძიმედ, სიმამრს რომ ფულს არ შესესხებოდა, ელიზაბედის გათხოვებაც რომ არ გამორეოდა, ექვს გარეშეა. ლიზას ხელ-ნელა შეეჩვეოდნენ და სიძულვილი მოისპობოდა. ვაჟის აიკვდალი რაღა იყო? მკითხავე ამბობდა, ლიზა კუდიანი დედის შვილია, თითონაც კუდიანია, თქვენი ოჯახი აწი სულ უკან წავაო. ელიზაბედი გახმა, ჩამოდნა; ამას ლიზას კუდიანობას აბრალებდნენ. ამას შემდეგ ლიზა თხოვს ჯერანს, გამიშვი მამაჩემთანო და ის კი არ უშვებს. მკითხავის სიტყვებისა და უბედური შემთხვევების შემდეგ ჯერანი არათუ ლიზას შინ წასვლას არ დაუშლიდა, პირიქით, თითონ გააგდებდა და მოიშორებდა თავიდან. მართალია, მას ეთაბლებოდა ცოლის გაგდება, ეშინოდა, ვაითუ გაუნამუსოვდესო, ჰაერამ, როდესაც იმის კუდიანობაში დარწმუნდა. დალუპვის შიში უფრო ძლიერად იმოქმედებდა ჯერანზე. მაგრამ ავტორმა დააკავა ლიზა ჯერანის ოჯახში, მოუკლა ვაჟი, სხვადასხვა, სრულად შემთხვევითი გარემოებით, იმ ზომამდე მიიყვანა მისი ცხოვრება. რომ ლიზას თავის მოკვლის მეტი აღარა დარჩენოდა რა. ჩვენ სრულიად არ ვართ იმის წინააღმდეგი, რომ მოთხოვნილებაში შემთხვევითი ელემენტები ერიოს; მაგრამ, როდესაც მწერალი ტიპიურ მოვლენას ხატავს ცხოვრებიდან, ისე უნდა დახატოს, რომ მკითხველმა შემთხვევითი ელემენტებით არ ახსნას ეს მოვლენა; „პარტაჩის“ წამკითხველი კი უსათუოდ იფიქრებს: ძველმა ჩვეულებამ კი არა, სხვადასხვა უბედურმა შემთხვევებმა მიიყვანეს ლიზა იმ ზომამდე. რომ უსათუოდ თავი უნდა მოეკლაო.

## VIII

ცხოვრებიდან ამონაკითხი სურათები ნინოშვილს ხშირად სოციალურ კითხვებს აღუძრავენ ხოლმე. ერთ ამგვარ კითხვას ის შეეხო „არსიყენში“, მაგრამ გადაჭრით კი არ გადაჭრა, მხოლოდ წამოაყენა კითხვა, მისი გადაწყვეტა კი ისევ მკითხველს მიანდო. ელიზაბარ თავლაძე ოცდათუთმეტი-ორმოცი წლის კაცია; მისი შესაფერისი იყო ოცდაათი წლის ქალი, მაგრამ ის მდიდარი კაცი იყო, სოფლის ჩვე-

ულებას არც ის ჩამორჩა; ყველა ლამაზ და ყმაწვილ ქალს ეძებდა სა-  
ცოლედ და იმანაც ჩვიდმეტი წლის ვარდიკო შეირთო. ვარდიკო  
იყო მეტად ლამაზი გარეგნობით, წყნარი და გაურყვენელი ხასიათის  
ქალი; მისი ბუნება ვერ შეეთვისა ელიზბარს. რომელმაც ცოლი  
უფრო ქვეყნის დასანახავად შეირთო, ვიდრე ბუნებრივი ლტოლვი-  
ლების მიხედვით. ვარდიკოს შეუყვარდა ოცდაერთი წლის სიკო და  
კიდევ გახდა ამ სიყვარულის მსხვერპლი. მოთბრობის ბოლო ნაძა-  
ლადეგია. ელიზბარი არ იყო ჭკვიანი კაცი, მაშასადამე, ცოლის ერთ-  
გულებაში სრული დარწმუნებული იყო; ის კმაყოფილია მით. რომ  
ცოლი „ტკბილი სულიერი“ შეხვდა; მისი ილუზია ერთბაშად ირღვე-  
ვა: ცოლს საყვარელი ჰყოლია. ელიზბარისათვის ეს ამბავი ისეთი  
მოულოდნელი იყო. რომ შეუძლებელია ასე უცებ ცოლის სიკვდი-  
ლიც განეზრახა და ხანჯალიც ისე დაემალა, რომ სხვებს ვერ შეემჩ-  
ნიათ. შეუძლებელი იყო აგრეთვე გაბრაზებული ელიზბარი ხალხს  
არ შეეკავებია და ცოლი მოეკვლევინებია: ვინ იქნება ამდენად სუ-  
ლელი, რომ ვერ შეეტყო, სამოყვროდ მიიწევდა თუ სამტროდ ელიზ-  
ბარი ცოლისაკენ. ელიზბარი არ იყო იმდენად მოხერხებული კაცი,  
რომ გაბრაზება დაემალა. სხვებმა არა შემატყონ რა და ჩემი განზრა-  
ხვის ასრულება არ დამიშალონო, ან კი სად ეცალა ეს ეფიქრა. ყოვე-  
ლივე ეს რომ მივიღოთ მხედველობაში, ელიზბარი ცოლის მოკვლას  
მაინც არ გადაწყვეტდა. მართალია, ცოლის დალატი ქმრის თავის-  
მოჭრად მიაჩნია, მაგრამ ელიზბარი ხანშიშესული კაცი იყო. გატა-  
ცებით სიყვარული მას აღარ შეეძლო. ცოლი იმიტომ შეირთო, რომ  
ყველა ცოლს ირთავდა და იმასაც. როგორღაც, ეჩოთირებოდა უცო-  
ლოდ დარჩენა. მას იმდენად არ უყვარდა ვარდიკო, რამდენადაც მი-  
სი მადლიერი იყო; ამიტომ ცოლის დალატიც ისე ძლიერად ვერ იმო-  
ქმედებდა ელიზბარზე. როგორც ავტორმა დაგვიხატა: ელიზბარი  
სცემდა. გააგდებდა ცოლს, მორჩა და გათავდა.

დავუბრუნდეთ ახლა იმ სოციალურ კითხვას, რომელიც ნინოშ-  
ვილმა წამოაყენა. სიკოს და ვარდიკოს ერთმანეთი უყვართ, მაგრამ  
საზოგადოება დევნის ამგვარ სიყვარულს და ამიტომ იძულებული  
არიან გულწრფელი და პატიოსანი სიყვარული ქურდულად მა-  
ლონ. -- საუცხოო პატიოსანი სიყვარულია, როცა დამეებს ერთად  
ატარებენო, გაიღიმებს ზოგიერთი მკითხველი. მაგრამ სქესობრივი  
მხარე ყმაწვილი ქალისა და კაცის სიყვარულის აუცილებელი სარჩუ-  
ლია. ხოლო აქედან სრულებითაც არ გამოდის ის დასკვნა, ვითომ  
სიყვარულში ქვენაგრძნობის მეტი არა იყოს რა.

„ასეთი ჩემი საქციელი ხალხს დიდ დანაშაულობათ მიაჩნია. —

ამბობდა გულში სიკო. როცა ერთ ღამეს ვარდიკოსთან მიდიოდა, — მერე რამდენ ცოდვას სჩადის ხალხი ამის გამო, რამდენი ადამიანი ჰკლავს თავის ცოლს იმის გულისთვის, რომ შემარცხვინა თავისი ქცევითო, რამდენი ყმაწვილი ქალი იკლავს თავს სახელის გატეხის შიშით. რამდენი საწამლავი ხმარებულა, რამდენი ადამიანი დაღუპულა. რამდენი ახლათ დაბადებული ბავშვი ცოცხლათ დამარხულა მარტო იმის გულისათვის, რომ გარყენილება დაეფარათ და ქვეყანაში არ შერცხვნილიყვნენ. კარგია ეს? რატომ ისე არ უყურებენ იმ საქმესაც, როგორც სმას, ჭამას, სიცილს, ლაპარაკს, თამაშს?.. აქ სიკოს შეეშინდა: იქნება ძლიერ შორს შევტოპე ჩემის ფიქრებითაო, — მაგრამ არა, ძალბი მართალია, უკეთ იცისო, გაიფიქრა გულში“.

სიკოს აზრი. უჯანასკნელ სტრიქონს გარდა, ნინოშვილის აზრია, ნინოშვილმა იცოდა, რომ ხალხი არ იყო მართალი, თორემ არც ზემოხსენებულ სიტყვებს წარმოათქმევინებდა სიკოს; მაგრამ თავისი აზრის ლოლიკური განვითარება შეწყვიტა და გაჩუმება ამჯობინა. ამ კითხვის გადასაწყვეტად მარტო სიმპათია-ანტიპათია არ კმარა. ამისათვის საჭიროა მოკლედ განვიხილოთ: რამ წარმოშვა და განვითარა ადამიანში ის შეხედულება, რომ ქალმა გათხოვებამდის სქესობრივი უმანკოება უნდა დაიცვას და გათხოვების შემდეგ ქმრის ერთგულება. ეს ნათლად არის გარკვეული ფრ. ენგელსის წიგნში — „ოჯახის, კერძო საკუთრების და სახელმწიფოს წარმოშობა“, რომელშიაც მას მოყვანილი აქვს და შევსებული მეცნიერ მორგანის გამოკვლევანი. თავდაპირველად, როცა ადამიანი ველურად ცხოვრობდა. სრული სქესობრივი არევა სუფევდა, ისე, როგორც პირუტყვებში. ე. ი. ყოველი კაცი ყველა ქალის ქმარი იყო. ყოველი ქალი — ყველა მამაკაცის ცოლი. აქედან იწყება სხვადასხვა განსაზღვრა და გაწესრიგება სქესობრივი ურთიერთობისა. ჯერ მამასა და ქალიშვილებში მოისპო სქესობრივი აღრევა; შემდეგ დებსა და ძმებს შორის; ხოლო რამდენსამე დას ან ბიძაშვილს შეეძლოთ ჰყოლოდათ რამდენიმე საერთო ქმარი, რამდენსამე ძმას ან ბიძაშვილს — საერთო ცოლები. რადგანაც ამგვარ პირობებში მამის ცნობა ყოველად შეუძლებელი იყო, დედის კი ადვილი, ამიტომ ნათესაობა და მემკვიდრეობაც დედის გვარზე მიდიოდა, — არსებობდა მატრიარქატი. დროის განმავლობაში საერთო ცოლ-ქმართა რიცხვი თანდათან კლებულობდა; მაგრამ მატრიარქატის მოსასპობად და მონოგამური ოჯახის ასალორძინებლად საჭირო იყო შესაფერი ეკონომიური პირობები. ადამიანმა მოაშინაურა გარეული პირუტყვები, გაიჩინა ჯოგები. ამგვარად, დაიბადა სიმდიდრე-სიღარიბე, რადგანაც ზოგს ბევრი ჯოგი

ჰყავდა, ზოგს ცოტა, და ნელ-ნელა განვითარდა კერძო საკუთრება. ყოველი ადამიანი ცდილობდა, საკუთარი ჯოგები შეეძინა, რომ მოცილე არავინ ჰყოლოდა. სანამ მამაკაცს კერძო საკუთრება არ ჰქონდა, მისთვის საჭირო არ იყო საკუთარი შვილების ცოდნა და ამიტომ მატრიარქატშიაც ცუდს არაფერს ხედავდა. როდესაც მამაკაცმა კერძო საკუთრება შეიძინა, მისი ეგოისტური ბუნებისათვის საჭირო გახდა საკუთარი მემკვიდრეობის ცოდნა, რომ თავისი კერძო საკუთრება სიკვდილის შემდეგ მათთვის დაეტოვებია. ახალმა ეკონომიურმა პირობებმა მატრიარქატი უვარგისად გადააქცია და მის მაგიერ სხვა სოციალური ურთიერთობა მოითხოვა. მამაკაცი შეებრძოლა მატრიარქატს, ნელ-ნელა მოსპო ის და შექმნა პატრიარქალური დიდი ოჯახები ერთი უფროსი მამაკაცის მბრძანებლობის ქვეშ. შემდეგ კი წარმოსდგა ნამდვილი მონოგამური ოჯახი: მამაკაცმა მოსთხოვა ქალს, რომელიც ცოლად მიჰყავდა, რომ ის მხოლოდ მისი საკუთრება ყოფილიყო და ამით ქმრისათვის საშუალება მიეცა, თავისი საკუთარი შვილები სცოდნოდა. ამგვარად, ეკონომიურმა პირობებმა ან კერძო საკუთრების აღორძინებამ დაავალა ქალს, რომ ის მხოლოდ ერთი კაცის ცოლი ყოფილიყო; ქმრის ერთგულება არ დაერღვია და მხოლოდ მისთვის ეძლია მემკვიდრეები. რადგანაც ყოველი ქალი მომავალში მეუღლე და დედა უნდა გამხდარიყო, ერთხელვე ეკონომიური მიზეზებისაგან წარმოშობილი შეხედულება თანდათან განვითარდა და გაუთხოვარ ქალსაც მოსთხოვა უმანკოება. ამგვარად, თუ გაუთხოვარ ქალს საზოგადოება უმანკოების დაცვას ავალებს და გათხოვილს — ქმრის ერთგულებას, ასეთი შეხედულება დებადა და განავითარა კერძო საკუთრების აღორძინებამ, რადგანაც საკუთარი მემკვიდრეობის ყოლა მხოლოდ ცოლის ერთგულებაზე არის დამოკიდებული და არა ქმრის ერთგულებაზე, ამიტომ ზემოხსენებული შეხედულება მამაკაცზე ნაკლებად გავრცელდა. როდესაც საზოგადოების აზრი ქალის ზნეობას სქესობრივი მხრით სასტიკად ადევნებს თვალყურს, უცოლო ვაჟის ან ცოლიანი მამაკაცის გარყვნილებას ძალიან ადვილად უყურებს; მამაკაცი თუ სახარბიელო სასიძოს წარმოადგენს, რამდენი საყვარელიც უნდა ჰყოლოდეს, სიძედ მას ძალიან ცოტა დაიწუნებს; იმ ქალს კი, რომელიც ამ მხრით მამაკაცის მიბაძვას მოისურვებს, საზოგადოებიდან განდევნა არ ასცილდება. ზემოხსენებულმა შეხედულებამ ბევრი სარგებლობა მოიტანა. მაგრამ დღეს ზარალიც მოაქვს; ვარდიკოსა და სიკოს ერთმანეთი უყვართ, მათ უნდათ ერთად ცხოვრება, მაგრამ არც საზოგადოება, არც კანონი ამის ნებას არ აძლევს. ვარდიკოს არ შეუძლია

კანონიერ ქმართან ცხოვრება. მისი არსება სიკოსაკენ მიისწრაფვის; მიეცით მათ შეუღლების უფლება და სრული ბედნიერნი იქნებიან. მაგრამ დღევანდელი საზოგადოებრივი წყობილება ამის წინააღმდეგია და ისინი უბედურნი უნდა იყვნენ. მერე განა ცოტაა მათსავით უბედური? ის შეხედულება და კანონი. რომლებიც ვარდიკოსა და სიკოს ბედნიერებას წინ ეღობებიან, როგორც დავინახეთ, ეკონომიური მიზეზების ნაყოფი არიან. მხოლოდ მაშინ მოისპობა ასეთი შეხედულება და კანონიც და განთავისუფლდება სიყვარული, როდესაც შეიცვლება დღევანდელი ეკონომიური პირობები, ე. ი. როცა კერძო საკუთრების დღევანდელი ფორმა გადავარდება.

## IX

თუმცა ნინოშვილი გლეხის ცხოვრების ჭირ-ვარამს დასტრიალებდა თავს. კითხულობდა მის გულსა და გონებაში დაგროვილ მწარე გრძნობებსა და ფიქრებს, მაგრამ ის ისეთი დაკვირვებითი ნიჭის პატრონი იყო, რომ ჩვენი ცხოვრების არავითარი საგულისხმო მოვლენა არ გამოეპარებოდა. „ტარიელ მკლავაძეში“ მან დაგვიხატა უკვდავი ტიპი ჩვენი დღევანდელი ფეოდალური არისტოკრატისა და ნათლად დაგვანახვა ამ არისტოკრატის გონებრივი და ზნეობრივი მდგომარეობა. „ჩვენი დროის რაინდში“ ორი სხვადასხვა ტიპია. ადამიანი რომ ნაყოფია მემკვიდრეობის, აღზრდის და ცხოვრების პირობების, ამის საუკეთესო მაგალითს წარმოადგენს, ერთი მხრით, სპირიდონ მცირიშვილი, მეორე მხრით, ტარიელ მკლავაძე. სპირიდონი იყო უბრალო გლეხის შვილი. რადგანაც სხვა გლეხებთან შედარებით სპირიდონის მამა შეძლებულად ითვლებოდა, ამიტომ შვილი სოფლის სასწავლებელში მიაბარა იმ განზრახვით, რომ წერა-კითხვას ისწავლის და შემდეგ სადმე დუქანში მივაბარებო. გლეხის შვილს ხშირად მემკვიდრეობა სალი ზნეობითა და შრომისმოყვარეობით აჯილდოვებს; ცხოვრება კი განუმტკიცებს ხოლმე მას ასეთ თვისებებს. პატარა გლეხი ხედავს, რომ მის გარშემო ყველა მუშაობს, ყველა ოფლსა ღერის; იმასაც თანდათან ჭკალსა და რბილში უჯდება ის აზრი. რომ შრომა ადამიანის ცხოვრების დანიშნულებაა. ამ გარემოებაში უნდა იყოს იმისი მთავარი მიზეზი, რომ გლეხის და. საზოგადოდ, ღარიბი ოჯახისშვილი სწავლაში ხშირად მუყაითია. სპირიდონიც ერთგულად შეუდგა სწავლას; სოფლის სასწავლებელი მალე გაათავა და შემდეგ მამას აუტყდა, ქალაქში წამიყვანეო. სპირიდონის მამა უარს იყო, მაგრამ მეზობლები შეუჩნდნენ: ნიჭიერი ბავშვია და ჩხირს ნულარ მიატეხო. მამა „შეცდა“, როგორც თვითონ

ამბობდა და შვილი ქალაქს წაიყვანა. ქალაქში ცხოვრებას ხარჯი უნდა, საამისო შეძლება კი სპირიდონის მამას არა ჰქონდა. მაგრამ სპირიდონს ისე მძლავრად ჰქონდა გამჭდარი სწავლის სურვილი. რომ ვერავითარმა დაბრკოლებამ ვერ გაუტეხა გული. სპირიდონის სოფელი ქალაქიდან ოცი ვერსის მანძილზე იყო. სპირიდონი ყოველ კვირაობით მიდიოდა სოფელში და მოჰქონდა თითო კვირის საყოფილო ბიო, ყველი და ფქვილი; ცხოვრობდა ქალაქის განაპირას, ერთ ქოხში, რომელშიაც თვეში ოთხ აბაზს აძლევდა, ყოველ საღამოობით მასლობელ ტყიდან მოჰქონდა ფიჩხი, ანთებდა და მის სინათლეზე სწავლობდა გაკვეთილებს. საჭმელს თავის ხელით იკეთებდა. საზამთრო და საზაფხულო ტანისამოსი მისთვის ერთი იყო. ჭანსალი აგებულებისა სპირიდონი პატარაობიდანვე არ ყოფილა. ნამეტანმა შრომამ და გაკირვებამ სულ მოტეხა ის და სამუდამოდ დაასუსტა მისი აგებულება. შემდეგ სპირიდონი გადავიდა საოსტატო სემინარიაში, თუმცა ცხოვრების პირობები გაუუმჯობესდა, მაგრამ სპირიდონი ისეთი ადამიანი იყო, რომ დასვენება რა იყო, არ იცოდა: თუ თავისუფალი დრო რჩებოდა, სულ წიგნის კითხვას ანდომებდა და თავისი თავის განვითარებას ცდილობდა. ოცის წლის სპირიდონმა, გარეგნობით სუსტმა; მაგრამ სულით ძლიერმა და მრავალი პატიოსანი სურვილით აღესილმა, გაათავა სემინარია. ის გააწესეს მასწავლებლად ერთ შორეულ სოფელში. მისი სკოლა წარმოადგენდა პატარა ძველ სახლს. რომელსაც ფანჯრები ჩამტვრეული ჰქონდა, ჭერი და იატაკი წვიმისაგან დამპალი. ორიოდ დამტვრეულ სკამს გარდა სკოლაში არაფერი იყო. ოთახიც კი არ იყო მასწავლებლისათვის. სკოლის საქმეს ხალხი გულგრილად უყურებდა; სკოლის სარგებლობა მას არ სწამდა, რადგანაც ამ სარგებლობას ვერ ხედავდა და მასწავლებელს მტრული თვალთ უყურებდა. ამიტომ ბევრს კიდევ სურდა. რომ სკოლა სრულიად გაუქმებულიყო. სპირიდონს პირველ სანებში ყველა უსიამოვნოდ უყურებდა — „მოსულხარ, რომ ფულები აგვაციცლო, მეტს. ნუ გეშინია, არას შეგვძენო“, ამბობდნენ მის შესახებ გულში. ამგვარ პირობებში საქმის რიგიანად წაყვანა თითქმის შეუძლებელი იყო. მაგრამ ისეთი ადამიანისათვის კი არა. როგორაც სპირიდონია: მისთვის სიტყვა „შეუძლებელი“ არ არსებობდა, მას სწამდა თავისი მიზანი და სულითა და გულით მიისწრაფოდა მისკენ. უბინაობის გამო სპირიდონს ორი თვე იატაკზე ეძინა. ღამე თვითონ დაიგებდა და დღე ისევ ალაგებდა, რომ ბავშვებს არ გაეთელათ მისი ლოვინი. ამგვარად, ერთი პატარა ოთახი დღისით სასწავლებელი იყო, ღამით კი სპირიდონის საწოლ ოთახად იქცეო-

და. დამპალი იატაკი ლოგინის დანიშნულებასაც ასრულებდა. როცა აცივდა. სპირიდონმა იშოვა ბინა მღვდელთან. სპირიდონის გადასვლას მღვდლის ოჯახში დიდი მნიშვნელობა ჰქონდა. როგორც მისთვის, ისე მღვდლის ცამეტი წლის ქალის დესპინესათვის. ღარიბი ოჯახის შვილი. მგრძობიარე და მოსიყვარულე გულის პატრონი ასეცა უდო გველენას, განივითარა გონება და ამას შემდეგ შეუძლებელი იყო. მას მარტო თავის თავისთვის ეზრუნა; სპირიდონმა იცოდა, რა იყო სიღარიბე და სირეგვნე. ამიტომ შეუძლებელი იყო მისი გულისა და გონების პატრონს არ დაბადებოდა სიყვარული მათდამი. ვინც სიღატაკისა და უვიცობის მორევეში დატურავდა, არ აღძვროდა სურვილი, რომ მათ დახმარებოდა. მართლაც სპირიდონმა დაისახა მიზნად, ხალხს შეწეოდა, რამდენადაც შეეძლო, და ამ განზრახვით გამოსწია სოფლისაქენ. ჩვენ დავინახეთ. რა დაბრკოლება ვადაელობა წინ სპირიდონს სოფელში მისვლისთანავე: ხალხი მტრულად უყურებდა. კლასი არაფრად ვარგოდა, დასაძინებელი ოთახი არ გააჩნდა. მაგრამ სპირიდონი გულმოდგინედ შეუდგა ბავშვების სწავლებას, სკოლის გაუმჯობესებისათვის ზრუნვას. ის ეხმარებოდა, არიგებდა და ესარჩლებოდა ხალხს; ხალხმაც იცნო სპირიდონი და შეიყვარა ის. გაიარა ოთხმა წელმა და ხალხი არათუ სკოლის გაუქმებას ცდილობდა, თვითონვე ააშენა თავის ნებით სკოლისათვის კარგი სახლი. სპირიდონის საზრუნავი ეხლა ის იყო, რომ სკოლისათვის ბიბლიოთეკა დაეარსებია და მეტი შუქი მოეფინა ხალხის გონებისათვის. ხალხისათვის ზრუნვა, ხალხის სამსახური მის წმინდათა წმინდას შეადგენდა. ეს სუსტი ადამიანი ისე გატაცებული იყო თავისი მიზნით, რომ მზად იყო, ყოველგვარ დაბრკოლებას შეტაკებოდა, ოღონდ თავის მიზანს მიახლოებოდა. მან ადრე შეიგნო, რაშიაც მდგომარეობს ადამიანის ღირსება, მისი დანიშნულება. მან იცნო თავისი თავი ადამიანად და ამას შემდეგ აღარ შეეძლო დამსგავსებოდა უსულგულო არსებას. რომელსაც უბედურთა და დაჩაგრულთა კენესა სიმღერად მოესმის. მას ესმოდა კენესა და ეს კენესა იწვევდა სამოქმედოდ. ხალხის წყლულის დასაამებლად.

როდესაც სპირიდონი მღვდლის სახლში გადავიდა. სწავლება დაუწყო მღვდლის პატარა ვაჟიშვილს. ცამეტი წლის დესპინეს პირველ ხანს სპირიდონი ეჯავრებოდა. ერთხელ, როცა პატარა ძმა დესპინეს რუსულს ასწავლიდა, სპირიდონმა თავის მოწაფეს რუსული სიტყვების ამოკითხვა გაუსწორა, დესპინეს არ ექაშნიკა, მათ სწავლაში რომ სპირიდონი ჩაერია. „ვინ ეხვეწებოდა ნეტავი, რომ მოვიდა და გვასწავლასო“, ჩაილაპარაკა მან თავისთვის. მაგრამ, რაც უფ-

რო ეცნობოდა დესპინე სპირიდონს, მისი სიძულვილი თანდათან  
ჰქრებოდა: „თუმცადა სასაცილოა. მაგრამ სწავლება კი კარგი ცოდ-  
ნიაო“. ამბობდა ის რამდენისამე ხანს შემდეგ. ბოლოს და ბოლოს,  
დესპინე ყურადღებას აღარ აქცევდა სპირიდონის გარეგნობას: მას  
სწავლა უყვარდა. ძლიერი სურვილი ჰქონდა, გონება განეფითარებია,  
სპირიდონი კი კარგი მასწავლებელი იყო, კეთილი კაცი, და ეს საკ-  
მარისი იყო, რომ დესპინეს მალე გამოეცვალა აზრი სპირიდონის  
შესახებ და სიყვარულად გარდაექმნა ის გრძნობა, რომელიც მასში  
სპირიდონის გარეგნობამ აღძრა. თუ პირველად სპირიდონს უწყრე-  
ბოდა: ვინ ეხვეწებოდა, რომ მოვიდა და გვისწორებსო, ახლა ენატ-  
რებოდა, რომ სპირიდონს მისთვის ესწავლებინა, მაგრამ სპირიდონს  
ვერ უბედავდა. დესპინე დასძლია სწავლის წყურვილმა და ერთ  
დღეს დედას პირდაპირ გამოუცხადა: დედა, მე მინდა რუსული წიგ-  
ნის სწავლა, თხოვეთ უჩიტელს, მასწავლოსო. სპირიდონი დიდი სი-  
ამოვნებით დათანხმდა დესპინეს სწავლებას. ის შემთხვევას ეძებ-  
და, რომ სხვას დახმარებოდა. სხვისთვის სარგებლობა მოეტანა, ის  
„კმაყოფილებას გრძნობდა. როცა სხვას ასწავლიდა“. გავიდა ოთხი  
წელიწადი და სპირიდონის შრომამ შესამჩნევი ნაყოფი მოიტანა:  
ჩვიდმეტი წლის დესპინე სრულიად სხვა აზროვნების და ფიქრის ქა-  
ლი იყო, ვიდრე უმრავლესობა, არათუ სოფლის, ფორმალურად გა-  
ნათლებული ქალებისაც. დაბადებით დესპინე იყო ცოცხალი და სა-  
ლი ბუნებისაც. ის არ ბაძავდა ფუქსავატი ცხოვრების მაგალითებს,  
ცუდ გავლენას აცილებულიყო, ის მიიღტვოდა სწავლისა და სინათ-  
ლისაკენ: რუსულ წერა-კითხვას პატარა ძმისაგან სწავლობდა. შემ-  
თხვევამ ხელი შეუწყო და დესპინეში საესებით განეფითარდა ყველა  
კარგი თვისება, რომლებიც ბუნებას მისთვის მიენიჭებია. ოთხი  
წლის განმავლობაში მან გადიკითხა სპირიდონის წიგნები, ხშირად  
ლაპარაკობდა სპირიდონთან, გაიცნო მისი აზროვნება, სხვადასხვა  
შეხედულება, შეითვისა და უკეთ მოინელა სპირიდონის ცოდნა და  
საეტაკი აზრები. ვიდრე თვით სპირიდონმა. სპირიდონი პატარაობი-  
დანვე დაეწათა მუყაითად სწავლას. კითხულობდა ყველაფერს, რაც  
კი ხელთ მოხვდებოდა, და ბოლოს ბეჭდური სიტყვა იმდენად შეიყ-  
ვარა, რომ მისი სრული მონა გახდა. სპირიდონს სწამს, რომ გონება  
უძლეველია, ამიტომ ცხოვრება, გრძნობა და ყოველისფერი გონე-  
ბას უნდა ემორჩილებოდეს; სპირიდონს სჯერა. რომ გონებას შეუძ-  
ლია, ცხოვრება და ადამიანის ბუნება თავის სურვილისამებრ გარ-  
დაქმნას, ამიტომ ხშირად ემხრობა ისეთ მოსაზრებებს. რომლებსაც  
მისი გრძნობა ეწინააღმდეგება. დესპინე კი ცხოვრებაზე უფრო სალი



შესედლებების არის. სპირიდონს ბევრი კარგი სურვილი აქვს, ცხოვრებას კი ნაკლებად იცნობს და თუ თავის მოქმედებით ნაყოფი მოაქვს. იმიტომ, რომ მიზნით გატაცებული. არავითარ დაბრკოლებას არ ებუება. დესპინე კი უკეთ იცნობს ცხოვრებას, ის არ არის მონა განყენებული აზროვნებისა; ზედავს, რომ ცხოვრება, ადამიანის ბუნება, გრძნობა სშირად ეწინააღმდეგება გონებას, დარწმუნებულია. რომ ყოველსივე ამას აქვს ძალა და მნიშვნელობა; ამიტომ ცდილობს განყენებული აზროვნება ცხოვრების პირობებს, ადამიანის ბუნებას და გრძნობას შეუთანხმოს და ყოველისფერი გონებას არ უმსხვერპლოს.

## X

დესპინე გრძნობდა, რომ სპირიდონის „მეცადინეობით ის ადამიანი გამოვიდა, მისი მეცადინეობით აეხილა თვალები“. ამიტომ იმდენად შეუყვარდა სპირიდონი, რომ უმისოდ ცხოვრება აღარ შეეძლო. ერთხელ პირდაპირ გამოუცხადა სპირიდონს, უშენოთ გაძლება აღარ შემიძლიაო. ყმაწვილი ქალისაგან ეს იგივე სიყვარულის გამოცხადება იყო. სპირიდონსაც უყვარდა დესპინე, ბევრი უძილო ღამე გაეტარებია. მაგრამ ეგონა, რომ დესპინე მას, როგორც მეგობარს, ისე უყურებდა მხოლოდ, ამიტომ სიყვარულს თავისსავე გულში იხშობდა. კიდევ რომ დარწმუნებულიყო სპირიდონი, რომ ის დესპინეს უყვარდა, მაინც არ გაუშხელდა თავის გრძნობას: ერთი, რომ სპირიდონი ძალიან უკმაყოფილოა თავისი გარეგნობით, ამას ამტკიცებს მისი აღტაცება ტარიელის დანახვაზე. მეორე — სპირიდონს სხვანაირად ესმის სიყვარული, — მან იცის, რომ სწეული კაცია, ღარიბი. მისი ცხოვრების გზა ეკლიანია. ბევრი ტანჯვა და ვარაზი მოელის, ამიტომ თავის თავს ეკითხება: რა უფლება მაქვს ყოველგვარად ეს სხვას გაუფნაწილო და ბედნიერების მაგიერ უბედურება მივაყენოო. მან იცის, რომ სიყვარული გრძნობაა. გრძნობა კი გონების მორჩილი უნდა იყოს ყოველ შემთხვევაში. არც დესპინე უარყოფს, რომ გრძნობა გონების მორჩილი უნდა იყოს ყოველ შემთხვევაში. ხოლო გრძნობას არ ხდის ის გონების ყურმოჭრილ მონად: თუკი გრძნობაში გონება ვერავითარ უზნეობას ვერ ზედავს, მას უფლება არა აქვს ის შებორკოს. გარდა ამისა, სიყვარულიც სხვანაირად ესმის დესპინეს. ვიდრე სპირიდონს. სპირიდონს გარეგნობა და შეძლება ისეთ აუცილებელ თვისებად მიაჩნია, ურომლისოდაც გონებამ უარი უნდა უთხრას სიყვარულს; დესპინეს თვალში კი ამგვარი თვისებები მხოლოდ „წვრილმანი ანგარიშებია, რომლებიც სიყვარულთან მოსახსენებელი არ არიან“. დესპინეს, ცოტა არ იყოს,

იდეალურად აქვს სიყვარული წარმოდგენილი, მაგრამ სხვაგვარი წარმოდგენისა რომ იყოს ამ გრძნობის შესახებ. შეუძლებელია. ის ისეთი ადამიანია, რომ სულიერ მხარეს უფრო აფასებს. ვიდრე ვარეგნობას. სპირიტონიც სიამოვნებით შეჰყურებს ტარიელის ახოვნებას და. თუ მხედველობაში მივიღებთ მის ფიზიკურ სისუსტეს და უღაზათობას. შეიძლება კიდევ შენატროდა ტარიელს, როცა ამბობდა: „იმ ქვეყანას. რომელსაც შეუძლია აღზარდოს ასეთი შვილები. თავი უნდა მოსწონდესო“. დესპინე კი, მიუხედავად იმისა, რომ ზოგიერთ მხარეში იდეალისტია, ბევრ რამეს სარგებლობის თვალისა უყურებს: მან იცის, რომ უწინდელ დროში ტარიელისთანა რაინდებს მნიშვნელობა ჰქონდათ; ამიტომ. ძველ დროში რომ დაბადებულყო, კიდევ მოეწონებოდა ტარიელისთანა პირები; დღეს კი ცარიელ გარეგნობას პროგრესში არავითარი მნიშვნელობა არა აქვს; ამიტომ მარტო „ბევრი ზორცი“ აღარ მოსწონს მას. რამ განავითარა დესპინეში ასეთი შეხედულება ადამიანის ღირსებაზე. სიყვარულზე? გარეგნობით თავიდანვე არ მოსწონდა დესპინეს სპირიტონი, მაგრამ სპირიტონი ლამაზიც რომ ყოფილიყო, დესპინე მაშინაც არ შეიყვარებდა, თუ გარეგნობის მეტს მასში ვერას პოებდა. დესპინეს სალი ბუნება სინათლისაკენ მიისწრაფვოდა; ის ეძებდა სულიერ სილამაზეს და არა ზორციელს; რაც უფრო აშკარადებოდა დესპინეს წინაშე სპირიტონის სულიერი ღირსება. მისი გარეგნობა თანდათან ჰკარგავდა დესპინეს თვალში მნიშვნელობას. დესპინეს თანდათან ებადებოდა ამ „სასაცილო“ სპირიტონისადმი სიყვარული. როდესაც სპირიტონის წყალობით მას გაუბრწყინდა გონება. შეიგნო, რაში მდგომარეობდა ადამიანის ღირსება, მისი დანიშნულება, მას არ შეეძლო ღრმა სიყვარული არ ეგრძნო იმ კაცისადმი, რომელიც, ერთი მხრით, მიზეზი იყო მისი ადამიანად გახდომისა, მეორე მხრით, სრულიად შეეფერებოდა მის წარმოდგენას ღირსეული ადამიანის შესახებ. როდესაც დესპინემ სიყვარული გამოუცხადა სპირიტონს, ეს არ იყო პირველი, მოუფიქრებელი გრძნობა, როგორც სპირიტონს ეგონა: ეს იყო გრძნობა. რომელიც მთელი ოთხი წლის განმავლობაში ვითარდებოდა და იზრდებოდა იმის გონებასთან ერთად. როდესაც მას აზროვნება განუვითარდა, გონება გაუბრწყინდა, ეს გრძნობას ისე გაძლიერდა, იმდენად მოსაზრებელი და მომწიფებელი იყო, რომ მისი შეკავება, ჩაშობა აღარ შეიძლებოდა. ამიტომ გამოუცხადა ჩვიდმეტი წლის დესპინემ სპირიტონს ასე თამამად: „დიდი ხანია. ვადაწყვეტილი მაქვს, უშენოთ სიცოცხლე არ შემიძლიაო“. დესპინე არც ერთ სიტყვას არ ამბობდა ყალბად და გადამეტებულად

ამ დროს; მას მართლაც აღარ შეეძლო უსპირიდონოდ სიცოცხლე: მისი სიყვარული აგებული იყო სულიერი მხარეზე და არა გარეგნობაზე. გარეგნობაზე აგებული სიყვარული მალე ქრება, ხოლო სიყვარული, სულიერ მხარეზე დამყარებული, არასოდეს არ ილევა და არ ქრება. დესპინეს გონება საზრდოს მოითხოვდა; ვინ მიაწვდიდა მას ასეთ საზრდოს, თუ სპირიდონს დაშორდებოდა? მის ბუნებას სხვისი დახმარება, სხვისი სამსახური იზიდავდა; ასეთი იყო სპირიდონის წყურვილიც. ამ ორ არსებას შორის სულიერი კავშირი არსებობდა და რაკი ერთმანეთი იცნეს, მათი დაშორება ორივესათვის შეუძლებელი იყო, სპირიდონი და დესპინე — ორივე ერთად შეუდგა იმ მიზნის განხორციელებას, რომელშიაც ისინი თავის დანიშნულებას ხედავენ. ერთად ზრუნავდნენ სკოლისათვის. ბავშვებისათვის, თავისი მოქმედებით ყველას შეაყვარეს თავი; თავისუფალ დროს ისინი მუდამ წიგნს კითხულობდნენ და როგორც ბეჯითი შეგირდები. ისე მეცადინეობდნენ. ბევრია ისეთი პირი, რომლებსაც ცოდნა მხოლოდ ცოდნისათვის უნდათ, განვითარება მხოლოდ განვითარებისათვის, შეიძენენ ცოდნას, განვითარებენ გონებას და მათ სიამოვნებას საზღვარი აღარა აქვს; მათ მიაღწიეს მიზანს, ახლა თავის სიმშვენიერით ტკბებიან და სრული კმაყოფილი არიან. ასეთ პირებს დავიწყებული აქვთ, რომ განათლება მხოლოდ საშუალება არის და არა მიზანი. განათლების მიზანი ორგვარი შეიძლება: ადამიანი ან მისთვის ეტანება განათლებას. რომ გონება გაიხსნას და საკუთარი ცხოვრება გაიუმჯობესოს, პირადი ბედნიერებისათვის იზრუნოს; ან თავის თავთან ერთად უფრო სხვისი ცხოვრების გაუმჯობესებას ცდილობდეს. პირველი მიზანი არავითარ საქმეს არ შეადგენს: გონების განსაპეტაკება მხოლოდ იმას მოანდომო, რომ შენი ცოდნით შენვე დასტკბე, წილებზე ქონი დაიხვიო და მუცელი გაიზარდო, არავითარი სახელია. განვითარება და განათლება მაშინ არის ქეშმარიტი, პატიოსანი, პატივსაღები, როცა ერთად ერთ მიზნად სხვისთვის ზრუნვა, სხვების გონებრივად და ზნეობრივად ამაღლება დაუსახავს. ასეთი პირების რიცხვს ეკუთვნიან სპირიდონი და დესპინე. მათ უნდათ ხალხს სარგებლობა მოუტანონ. ამისათვის კი საჭიროა იმის ცოდნა, თუ რა ეჭირება ხალხს, როგორ შეიძლება მისი შველა; ამისათვის კი საჭიროა ჯერ თვითონ გამოარკვიონ, რაში მდგომარეობს ხალხის წარმატება. აი, მხოლოდ ამიტომ ეტანებოდნენ დესპინე და სპირიდონი თვითგანვითარებას. რომ ხალხის საჭიროება, მისი ინტერესები შეეგნოთ და საუკეთესო გზა მოენახათ ამ საჭიროების დასაკმაყოფილებლად. ჩვენი სოფელი უპატრონოდ არის მიტოვებული,

შისი წარმატებისათვის, მისი კეთილდღეობისათვის არავინ ზრუნავს; გლეხის ტვირთის შემამსუბუქებელი, მის გარშემო წყვილიადის გამფანტველი არავინ არის. მაგრამ, არა, გლეხის პატრონობა სპირიდონისთანა პირებს უღვიათ კისერზე, მაშინ, როცა საზოგადო ინტერესები ყველას მიერ დავიწყებულია, როცა საზოგადო მოღვაწეობა პირდაპირობის გესლითა და შურით იშხამება, მხოლოდ სპირიდონისთანა პირებს უკისრიათ სოფლის მფარველობა; ხალხის ტვირთის შემსუბუქება, მათ არ იზიდავს არც სახელი, არც დიდება; ისინი შრომობენ ისე, რომ მათ არავინ იცნობს, ისინი მიდიან ეკლიან გზაზე ისე, რომ მათ არავინ ხედავს; მაგრამ მათ უანგარო მოღვაწეობას ნელ-ნელა მოაქვს ნაყოფი.

## X I

ახლა გადავიდეთ მოთხრობის მეორე ტიპზე. თუმცა ნინოშვილი გვატყობინებს. ტარიელი ზემოური აზნაური იყო, მაგრამ ტარიელი ნამდვილი ტიპია ჩვენი დღევანდელი ფეოდალური არისტოკრატიისა. დავინახოთ, როგორია ეს ტიპი, და ამით გავიცნოთ ჩვენი ფეოდალური არისტოკრატიის გონებრივი და ზნეობრივი ავლა-დიდება, მისი აწმყო და მომავალი.

მკლავაძეების გვარი ძველ დროს განთქმული იყო ვაჟკაცობით. რადგანაც ახოვანება და ვაჟკაცობა ძველ დროს ქართველისათვის დიდ განძს შეადგენდა. ამიტომ. უეჭველია, მკლავაძეებს ძველი დროიდანვე მოჰქონდათ თავი ვაჟკაცობით. მემკვიდრეობას და აღზრდას ასეთი აზრი თანდათან უნდა განემტკიცებია მათში. ახალმა დრომ მკლავაძეებს ვაჭრობაზე და მამულის მოვლა-მოშენებაზე დაახურდავებია ვაჟკაცობა, მაგრამ ძველი შეხედულებანი ასე უცებ როდი ისპობა. მკლავაძეთა გვარში კიდევ დარჩნენ ისეთები, „რომლების თვალში ძველებურ რაინდობას, ე. ი. ძალმომრეობას ჯერ კიდევ შერჩენოდა გვირგვინი, რომლებისთვის ჯერ კიდევ იდეალური იყო ოველებური რაინდობა“. ამ უკანასკნელთა რიცხვს ეკუთვნოდა ერეკლე მკლავაძეც, ტარიელის მამა. ახოვანებითა და ვაჟკაცობით ერეკლემ თავს ვერ იქებდა. მაგრამ ამის გულისათვის ის სრულიადაც არ ემადლიერებოდა ბედს; ყოველთვის ნანობდა, რატომ ისეთი ვაჟკაცი არა ვარ, რომ ყველას შიშის ზარი დავცეო. როცა მისი გვარიაცი, სხვას მიბეგვავდა, ერეკლესათვის ეს აღდგომა იყო; როგორც მკლავაძეს, თავის მეგვარის ვაჟკაცობა ესახელებოდა. ტარიელი ჯერ შვილიც რომ არა ყოფილიყო ერეკლესი, ასეთ პირთან ცხოვრება უსათუოდ იმოქმედებდა მის ხასიათზე, მაგრამ ტარიელი ერეკლეს შვილი იყო და ცუდ აღზრდას და გავლენას ცუდი მემკვიდრეობაც

ზედ დაერთო: ტარიელს უსათუოდ გადმოეცემოდა მიდრეკილება-  
ვაჟაკობისაკენ და მუშტებზე ცქერისაკენ, რაც არათუ მის მამას,  
მთელ მის გვარს ჰქონდა ძვალ-რბილში გამჭდარი. როდესაც ტარი-  
ელი დაიბადა, ბავშვის კვალობაზე ისეთი სრული ტანისა იყო, რომ  
მამის სიხარულს საზღვარი არა ჰქონდა: „გენაცვალე, ღმერთო! ტა-  
რიელი დამებადა! დაილოცოს ჩვენი გვარი: გამოსულა ჩვენ გვარ-  
ში ლომკაცები და ეს არის, კიდევ გამოვიდა!“ — ჰყლობინებდა ერეკ-  
ლე. ექვსი წლის იყო ტარიელი, როცა მას ხანჯალი ჩამოჰკიდეს მშობ-  
ლებმა. მშობლებისა და ნათესავების გავლენა თავიდანვე ცალმხრივად  
ავითარებდა ტარიელის ბუნებას, თავიდანვე მხოლოდ ფიზიკური მხა-  
რის სიყვარულს და პატივისცემას უნერგავდა მას. გულადობა ტარი-  
ელს პატარაობითვე ეტყობოდა; ღამე და დღე მისთვის ერთი იყო. ერ-  
თხელ ძაღლები დაესიენ და ისე მოიგერია ჯოხით, რომ ყველა გაოცე-  
ბული იყო. ცუდ თვისებასთან ერთად პატარა ტარიელი კარგ თვისე-  
ბებსაც არ იყო მოკლებული, არ იყო ჭირვეული და ბოროტი. კარგი  
გავლენა და რიგიანი აღზრდა მას რიგიან ადამიანად გადააქცევდა. მა-  
გრამ ტარიელში მალე ჩაახშვეს კარგი თვისებანი და განავითარეს  
მუშტებზე ცქერა და სხვისი პიროვნების აბუჩად აგდება. მშობლები  
პატარა ტარიელს მუდამ საგმირო საქმეებით უჭედავდენ ყურებს  
და ამიტომ ის მალე შეეჩვია გმირების წაბაძვას. როცა ის ბავშვს  
გალახავდა, იმის მაგიერ, რომ მშობლებს დაეშალათ და დაეტუქ-  
სათ, აღტაცებაში მოდიოდნენ, დაუწყებდნენ კოცნას და ალერსს:  
„მართლა, რომ ტარიელი ხარო“.

ამის შემხედვარე ბავშვი, რასაკვირველია, იფიქრებდა, ალბათ  
კარგად ვიქცევიო. თავმოყვარეობა დასძლევდა და ხშირად გაიმე-  
ორებდა თავის გაკვეთილებს, რომ მშობლებისათვის და სხვისთვის  
ვაჟაკობით თავი მოეწონებია. რადგანაც მშობლები შეძლებული  
ოჯახის პატრონნი იყვნენ. ტარიელი სასწავლებელში მიიბარეს, თუმ-  
ცა იმიტომ კი არა, რომ სწავლის მნიშვნელობა შეგნებული ჰქონ-  
დათ, — სხვებს წაბაძეს. მშობლებისაგან ზნეწამზდარი, თვითნებობას  
შეჩვეული ტარიელი. რასაკვირველია, სწავლაში ვერ ივარგებდა. ტა-  
რიელი მალე გამოვიდა სასწავლებლიდან, მაგრამ ამის შემდეგ უფ-  
რო მეტი პატივითაც ეპყრობოდენ მშობლები და ნათესავები.

„ — ჩემი ვაჟი, ტარიელი, ვაჟაკი იქნება და ვაჟაკისთვის  
სწავლა არაფერი დიდი ბედენაა. — ამბობდა მამამისი; სხვები კვერს-  
უკრავდენ: — ეს რაინდათ დაუბადებია ბუნებას. ცოდვაც იქნება,  
სწავლის გულისთვის ამან თავისი სალი აგებულება დაასუსტოსო“.  
როდესაც ტარიელი წამოიზარდა, ცუდი აღზრდა და გავლენა უფრო

დაეტყო მას; ხედავდა, რომ ყველა მას აქებდა გარეგნობისათვის, ვაჟაკობისათვის, ამიტომ თანდათან შეისისხლხორცა ის აზრი, რომ ადამიანის უპირველესი ღირსება გარეგნობა და ღონე არის, ის თანდათან გამედიდურდა. მის თვალში სხვის პიროვნებას თანდათან ფასი დაეკარგა. სხვისი შეხედულობა ტარიელმაც შეითვისა და ვინც აზრ-ვანი, ლამაზი და მკლავღონიერი არ იყო, ბაღლინჯობად სთვლიდა. თავადი და აზნაური, განათლებული და გაუნათლებელი, ყველა მას ეუბნებოდა: შენისთანა შეილები სახელია ჩვენი ქვეყნის, შენით თავი მოგვაქვსო. კნეინებს ტარიელზე ამოსდიოდათ მზე და მთვარე. მასში მხოლოდ მამალს ხედავდენ, თავის თავში მხოლოდ დედალს და პირდაპირ ეუბნებოდნენ: მშვენიერი ამ ქვეყნად უმამაცესს ეკუთვნისო. ტარიელმა დაიწყო ლოთობა და გარყვნილება. ლოთობისათვის მას კი არ ძრახავდენ, აქებდენ კიდევ: ვაჟაკია და ქეიფიც შეშვენისო. რადგანაც მასში განამტკიცეს ის აზრი, რომ ადამიანის უპირველესი ღირსება გარეგნობა იყო, უმამაცესს და ლამაზს კი ყველა ქალი ეკუთვნოდა. ტარიელმაც აღვირი წახადა ზნეობას. ქალში გარეგნობა დააფასა, ქალი მარტო სქესობრივი გრძნობის დამაკმაყოფილებელ მანქანად მიიღო, ქალსა და მამაკაცს შორის დამოკიდებულება მარტო სქესობრივი გრძნობით განსაზღვრა და, ვინც კი მოეწონებოდა, ნამუსსა ხდიდა. თუ მის პირუტყვეულ სურვილებს ვინმე ხელს შეუშლიდა, ეს კიდევ უკეთესი: ტარიელი თავის ვაჟაკობას გამოიჩინდა. ზოგს კისერს მოუგრებდა, ზოგს ერთიმეორეს შეახლიდა, ზოგს ბურთივით გასტყორცნიდა, ზოგს მათრახით თავს გადუფხრეწდა. სხვისი გალაზნა მას ერის უკლავდა და სიამოვნებას აგრძნობინებდა; ამიტომ ის იარაღს იშვიათად ხმარობდა. ბოლოს სხვისი მიბეგვა ისეთ მოთხოვნილებად გადაექცა, ურომლისოდაც მას გაძლება აღარ შეეძლო. გლეხებს ტარიელისაგან დღე ჰქონდათ გამწარებული. ტარიელის მხეცობა იქამდის მიდიოდა, რომ ერთბელ თორმეტი წლის ქალი მოიტაცა სხვების დახმარებით. ყოველგვარი სისაძაგლე ტარიელს უდანაშაულოდ შერჩებოდა ხოლმე. ლოთობა, გარყვნილება, სხვისი პიროვნების შელაზნა, აი რაში ატარებდა ტარიელი სიცოცხლეს. გადაავლეთ თვალი ჩვენს ცხოვრებას და დაინახავთ, რომ მკლავაძეები ბევრი გვეყვანან, ამგვარი პირების ბუდეს დღეს ჩვენში მხოლოდ ფეოდალური არისტოკრატია შეადგენს, ე. ი. თავადობის ის ნაწილი. რომელმაც შეძლების დიდი წილი დღემდის შეირჩინა, გონების და ზნეობის კი ვერა შეიძინა რა. ტარიელის მსგავსი პირები ჩვენში ბატონყმობის დროსაც იყვნენ; როცა გლეხი ბატონის სრულ კუთვნილებას შეადგენდა, თავადი კი მზამზარე-

ულ სუფრას უჯდა. შეუძლებელი იყო, ტარიელის მსგავსი პირები არ დაბადებულყოყნენ. მაგრამ დღევანდელი ცხოვრება გაცილებით წინ წავიდა, ვიდრე ამ ორმოციოდე წლის წინათ იყო. ამიტომ მკლავაძე-ები უფრო გამოაშქარავდნენ; უწინ მათი გონებრივი და ზნეობრივი სულატაკე ასე მკაფიოდ არ ჩანდა, რადგან ცხოვრებაც დაბალ საფე-ხურზე იდგა; დღეს კი ცხოვრება განვითარდა, ადამიანის ღირსების დასაფასებლად დროის შესაფერი საზომი გაჩნდა და ტარიელის სუ-ლიერი სიმანხინჯე ყველასათვის ადვილი დასანახი გახდა. ტარიელი ბარომეტრია, რომელიც გვიჩვენებს ჩვენი ფეოდალური არისტოკრა-ტიის გონებრივ მდგომარეობას, მის მომავალს; ის რომ შემთხვევის ნაყოფი არ არის, აოამედ დიდი ხანია ვითარდება ჩვენ ცხოვრებაში და ლიტერატურაში, ამას ქვემოთ დავინახავთ.

## XII

უიშვილი, ჩამწარდაძე. მუნჯაძე, სიმონა, მოსე მწერალი, დავით დროიძე, მამალაძე. — აი, ის პირები, რომლებიც დაგვიხატა ნინოშ-ვილმა ჩვენი ცხოვრებიდან. მისი კალმის საგანი იყო გლეხი, სოფლის ცხოვრება; მან დაგვიხატა ამ გლეხის მდგომარეობა, მისი გაჭირვება და უსამართლობა, რომელიც მის კეთილდღეობას ძირს უთხრის; და-ვევანანჯა. თუ როგორ იცვლება სოფლის ცხოვრება. როგორ ანაწი-ლებს სოფლის ხალხს სხვადასხვა გარემოებანი, სოციალური პირო-ბები, უსამართლობა, რჯულზე უმტკიცესი ჩვეულებანი და უმეცრე-ბა ის ფურიები არიან. რომლებიც გლეხის ოჯახს საძირკველს უქცე-ვენ. ნინოშვილი რომ მესამოცე წლებში გამოსულიყო სამწერლო ასპარეზზე, ისე ვერ დაგვიხატავდა გოგია უიშვილებს. ჩამწარდა-ძეებს, დავით დროიძეებსა და მოსე მწერლებს. გლეხის განთავისუფ-ლებამ სოფლის ეკონომიური ცხოვრება ძირიანად შეცვალა და, რაც დრო გადის. ეს ცვლილება თანდათან უფრო ვითარდება. ჯერ, ბატონყმობის მოსპობამდე; გლეხობა არ წარმოადგენდა ჩვენში ერთგვარ მასას; მართალია, აქ ვერ შეხედებოდით, ერთი მხრით. უიშვილებს, ჩამწარდაძეებს, მეორე მხრით, დავით დროიძეებს და მოსე მწერლებს, მაგრამ განსხვავება მაინც არსებობდა. ის ელემენ-ტები. რომლებიც ჩვენ დროში ასე გამოაშქარავდნენ. ბატონყმობის მოსპობამდეც იყვნენ ჩვენ ცხოვრებაში, მაგრამ მათ განვითარებას უშლიდა ის გარემოება, რომ გლეხი ბატონის სრულ კუთვნილებას შეადგენდა; მეორე მხრით; თვით ხალხიც იმ აზრისა იყო, რომ „რაცა ვის რა ღმერთმან მისცეს. დასჯერდეს და მას უბნობდეს-ო“; ვინც არ დასჯერდებოდა თავის ხვედრს და წინ წაწევას მოინდომებდა, მის

წინააღმდეგ მთელი სოფელი ამხედრდებოდა. აიღეთ ს. მგალობლი-  
შვილის ახალი მოთხრობა „წარსულიდამ“; გიგოლა გულიაშვილი,  
განა მომავალი დავით დროიძე არ არის ან მოსე მწერალი? ბატონ-  
ყმობის დროს ამგვარი გიგოლა ბევრი იყო. მაგრამ როდესაც კანონი  
ამბობდა: „ყმისა ყველა ბატონისა არისო“, ჩვეულება ყმას თავის  
კეთილ შენაძენსაც კი უყიდდა ბატონის ვალში, ხალხს კიდევ ძალა  
ჰქონდა, გიგოლასთანა პირები აელაგმა და წინ არ გაეშვა. გიგოლას  
დავით დროიძედ გადაქცევა, რასაკვირველია, შეუძლებელი იყო.  
ბატონყმობის მოსპობით გლეხი თვითონ გახდა თავის შრომის პატ-  
რონი; ცხოვრებამ მას მიუხსაჯა კერძო საკუთრება, მის მისწრაფებას  
ერთი უდიდესი დაბრკოლება მოსცილდა; მაშინ ყოველი გლეხი დატ-  
რიალდა და კეთილდღეობისაკენ გაეშურა; მაგრამ მხოლოდ გული-  
აშვილები იქცნენ დროიძეებად და მოსე მწერლებად; დანარჩენმა კი  
სიღარიბეს თავი ვერ დააღწია. ახალმა დრომ ფული გააბატონა, ყო-  
ველიფერი ფულს შეუწონა; გართულებულმა ცხოვრებამ თვითფულ  
ადამიანს, საზოგადოებას, მთელ ერს და სახელმწიფოს მოთხოვნი-  
ლება გაუფართოვა; გლეხს ბევრი ხარჯი დააწვა კისერზე, ორი კვალი  
მიწა კი ყველაფერს ველარ გასწვდა და გლეხის მდგომარეობა უკან  
და უკან მიდის. თუ სოციალური პირობები გლეხის კეთილდღეობას  
ძირს უთხრის, მოსე მწერლები და დავით დროიძეები ხელს უწყო-  
ბენ სოციალურ პირობებს და გლეხის გაბოვანობის დროს ააბლო-  
ვებენ. თუ საუკეთესო გლეხები ველარ უძლებენ ცხოვრებას და იღუ-  
პებიან, როგორც ნინოშვილმა დაგვანახვა, როგორი უნდა იყოს უმ-  
რავლესობის მდგომარეობა? ამგვარად, სოფლის ხალხი იყოფა ორ  
ნაწილად; ერთი დაადგა გაპროლეტარების გზას, მეორე ადგენს  
სოფლის ბურჟუაზიას, რაც იმას ამტკიცებს, რომ ჩვენი ცხოვრებაც  
კაპიტალისტური წარმოების გზას დაადგა. ჩვენ დავინახეთ, რომ მო-  
სე მწერალს, დავით დროიძეს და დანარჩენ გლეხებს შორის დიდი  
განსხვავებაა, მაგრამ მსგავსებაც არის: მოსე მწერალი არ შეადგენს  
დიდ გამონაკლისს, გლეხობაში, მისი მსგავსი სხვებიც არიან, გამ-  
დიდრების სურვილი მოსეზე ნაკლებად არა აქვთ მორეული და თუ  
მოსესავით ზიანი ვერ მოაქვთ სოფლისათვის, იმიტომ. რომ გამოც-  
დილება და მოხერხება არ შესწევთ. გლეხობაში ხანდახან არანაკლებ  
სისაძაგლეს სჩადიან, ვიდრე მოსე მწერალი. თავის ინტერესების და-  
საცავად: ასეთი მაგალითია „მოსე მწერალ“-ში, „პალიასტომის  
ტბა“-ში, ყოველივე ეს კი იმას მოასწავებს, რომ მოსე მწერლისა  
და დავით დროიძესთანა პირებს კიდევ ბევრს წარმოშობს ჩვენი  
ცხოვრება. მარტო მოსე მწერლები და დროიძეები არ ეხმარებიან



სოციალურ პირობებს გლენის დაღუპვაში; უსამართლობა და ბევრი დასაყვებელი ზნე-ჩვეულებანი არანაკლებ ზარალს აყენებენ ხალხს, ყოველივე ამას ზედ ერთვის ხალხის დამღუპავი ჩვეულებანი, და დღევანდელი ოჯახი გლენს თავზე ექცევა, შიგნიდანაც და გარედანაც ირღვევა. გაბრიელა ჩამწარდაძე, ტასო, ჭერანი, ლიზა და სხვ.: ასეთი ჩვეულების მსხვერპლნი არიან. სიბნელე, რომელსაც მოუცავს გლენის გონება, ნებას არ აძლევს მას ასეთი ჩვეულებანი უკუაგდოს, და მისი კერის ჩაქრობას აუცილებელს ხდის. გლენი გასაჭირ მდგომარეობაშია, მაგრამ არიან ისეთი პირებიც, რომლებსაც მისი ტვირთის შემსუბუქება: მისი წყალობის დაამება, მისი გონების განსპეტაკება მიზნათ დაუსახავს; ასეთ პირებს ეკუთვნიან მკირიშვილი და ელისაბედი, ისევე ამ ხალხის გულიდან გამოსულნი. ჩვენი არისტოკრატია, ეს ერთ დროს გლენის „ბატონ-პატრონი“, ზოგიერთის მტკიცებით, რაღას შვრება, როგორ შეჩერებია გლენის იარებს? შველას ვინ ითხოვს, შველას ვინ ჩივის: კიდევ უფრო ამწვავებს ამ იარებს! ასეთი არიან ტარიელ მკლავაძეები: რომელთა ერთადერთ მიზანს პირუტყვეული ცხოვრება და სიამოვნება შეადგენს, მეტი არაფერი, ჩვენი ცხოვრება და ლიტერატურა ნათლად გვიმტკიცებს, რომ ტარიელ მკლავაძეები ციდან არ ჩამოვარდნილან; ისინი ნელ-ნელა განვითარდნენ ჩვენს ცხოვრებაში. ტარიელი ლუარსაბის ნამდვილი მემკვიდრეა, ლუარსაბის დროს რომ დაბადებულ იყო, იგივე თათქარიძე იქნებოდა; ლუარსაბი კი ჩვენ დროში რომ დაბადებულ იყო, ტარიელს შეიძლება გარეგნობით ჩამორჩენოდა, თორემ სხვაში არაფერში. იმის განხილვა, თუ როგორ იცვლებოდა დროის განმავლობაში ლუარსაბ თათქარიძე, ძალიან შორს წაგვიყვანდა. მაგრამ მოკლედ მაინც ვადავავლოთ თვალი. ლუარსაბის ერთადერთი მიზანი თავის თავის სიამოვნებაა და პირუტყვეული კმაყოფილება, ტარიელის მიზანიც იგივეა; ორივე ამაში ხედავს სიცოცხლის დანიშნულებას. მათ ხასიათსა და მოქმედებაში თუ განსხვავება არსებობს, თუ ლუარსაბი ემსგავსება გასუქებულ ღორს, რომელიც სხვას მაინცდამაინც არ აწუხებს, ოღონდ კუჭი მაძლარი ექნეს, ტარიელი კი მშობიარე ლომივით დარბის, რომ მეტი მსხვერპლი დასტანჯოს და ამით მეტი სიამოვნება დასტყუოს ცხოვრებას. იმის ბრალია, რომ ისინი მოქმედებენ სხვადასხვა დროს, მათ ხელთ სხვადასხვა საშუალებაა სიამოვნების მოსაპოვებლად. ამას გარდა, ლუარსაბს ჩვენ მხოლოდ ხანშიშესულს ვიცნობთ, ტარიელს კი ჯან-ღონით სავსე ახალგაზრდას. ლუარსაბი ცხოვრობს ბატონყმობის დროს; ის იმდროინდელი კაცია, როცა ჩვენი ცხოვრება მარტივი იყო, როცა ჩვენში რუსეთის ცივილიზაციას

ჯერ ფეხი ვერ მოემარებია და ჩვენი თავადობის მოთხოვნილება შესამჩნევად ვერ გაეფართოვებია. მართალია. ჩვენმა თავადობამ მესამოცე წლებზე გაცილებით ადრე იწყო ხელგაშლილი ცხოვრება, მაგრამ ლუარსაბი ძველებურად არის აღზრდილი, მასში ძველი ზნე-ჩვეულება ძლიერია, ის სოფლის ბატონია, სოფელს არ გაცილებია, ახალ ბიუროკრატიას არ იცნობს და ამიტომ არც მიმბაძველობის და ხელგაშლილი ცხოვრების გზას დასდგომია; მისი მოთხოვნილება მარტივია; ის გაძლება, ლოგინზე გაგორდება. ან ბუზებს დათვლის, ან დარეჯანს გამოემასხარავენ, ჩამოუგდებს ფილოსოფიას იმის შესახებ, თუ რა საჭმელი უკეთესია. ან ხვალ რა ვჭამოთ, და სრულ ნეტარებაშია; სხვა სიამოვნება მას არ უნდა, ამაზე მეტს ის არ ითხოვს. „გლახის ნაამბობში“ ლუარსაბმა კარგა მოზრდილი ნაბიჯი გადადგა წინ. ის მოაცილეს კარჩაკეტილ ცხოვრებას, გააცნეს ქალაქი, დაანახვეს სხვანაირი ცხოვრება და იმანაც უფრო ხელგაშლილად დაიწყო ცხოვრება, უფრო მეტი წყარო გამოიხსნა პირუტყვეული სიამოვნებისათვის. როგორც შემდეგი ლიტერატურა გვიმტკიცებს. ლუარსაბები უნივერსიტეტებშიაც წავიდნენ, მაგრამ დიპლომის მეტი ვერა გამოიტანეს რა: მეტს არც ეძებდნენ და არც საჭირო იყო მათთვის; გონების განვითარება მათ არ აინტერესებდათ. რაიმე იდეალები მათ არ აღელვებდათ; მათი ერთადერთი მიზანი იყო ბედნიერად ცხოვრება; ფულის შეძენა მართო თავის კუჭისათვის, ამისათვის კი დიპლომი სრულიად საკმარისი იყო. ამგვარად ლუარსაბმა სხვადასხვა დროს მხოლოდ კანი იცვალა და ჩვენ დროში დიდებულიძედ („ბნელო“), ტარიელ მკლავაძედ და აბესალომ სალამთაძედ („ირინეს ბედნიერება“) გადაიქცა<sup>1</sup>. რადგანაც ტარიელი იმ დროს, ცხოვრობს, როცა ცხოვრება გართულდა, მოთხოვნილება გამრავლდა, ის უკეთაც სიამოვნებს, ვიდრე მისი წინაპარი — ლუარსაბი. ცხოვრებაში ტარიელი სიამოვნების მეტს ვერას ხედავს და არც ეძებს; ყველაფერში მხოლოდ იმას აფასებს. საიდანაც მეტი სიამოვნების გამოწოვა შეუძლია; ქალი მის თვალში მხოლოდ სასქესო მანქანაა; გარყვნილება, ლოთობა, სხვისი პიროვნების შელახვა, — ყოველგვარი სისაძაგლე, მისთვის ნეტარებაა.

### XIII

ფეოდალური არისტოკრატიის ტიპი ჩვენ ლიტერატურაში პირველად მესამოცე წლებში გაჩნდა ლუარსაბ თათქარიძის სახით. მას

<sup>1</sup> ტარიელ მკლავაძის თანდათანობითი განვითარება ჩვენს ლიტერატურაში პირველად ხომლელმა აღნიშნა. „კვალი“, 1894 წ., № 38.

შემდეგ თითქმის ორმოცმა წელმა გაიარა და ლუარსაბები ამ ხნის განმავლობაში ტარიელებად, დიდებულიძეებად და სალამთაძეებად გადაიქცნენ. ჩვენმა ცხოვრებამ ამ ხნის განმავლობაში საკმარისად იცვალა ფერი: ლუარსაბმა კი რაღა ჰქნა? რა შეიძინა მისმა გონებამ და ზნეობამ? ლუარსაბი გონებრივად და ზნეობრივად, ე. ი. სულიერი მხრივ ძალიან დაბალ საფეხურზე დგას. მთელი მისი აზროვნება მხოლოდ კუქის გარშემო ტრიალებს; პირუტყვისაგან მხოლოდ იმით განაჩჩევს. რომ ლაპარაკი იცის. გაიარა ორმოცმა წელმა და ამ ხნის განმავლობაში ლუარსაბი არათუ ვერ ამალღდა, უფრო დაეცა, უფრო დაშორდა ადამიანს; წინათ თუ უვნებელი პირუტყვი იყო, დღეს მძეკად გადიქცა. გონებრივად ტარიელი ლუარსაბზე მალღა არა დგას: მის ერთადერთ საზრუნავსაც მხოლოდ პირუტყვეული სიამოვნება შეადგენს; შეიძლება, ლუარსაბივით ცრუმორწმუნე .არ იყოს და გუგულის ჯობნისათვის სამოთხეში შესვლას არ მოელოდეს. ზნეობრივად ლუარსაბზე უფრო დაქვეითდა: ლუარსაბს სწამდა, რომ მამაკაცი ბატონი იყო ქალთან შედარებით, მაგრამ ქალიც ადამიანად მიაჩნდა და არა მარტო უჩინის მოსაკლავ ნივთად; ტარიელი კი ქალში მხოლოდ თავის სიამოვნებას ეძებს; ტარიელმა იცის თავის პიროვნების დაცვა. როგორც მხეცმა. სპირიდონმა მას შეურაცხყოფა მიაყენა და შელახული თავმოყვარეობა მით დაიკმაყოფილა, რომ სპირიდონი ტალახში ამოსვარა. ლუარსაბი ყმას სცემს, მაგრამ ეს უფლება მას ჩვეულებამ და კანონმაც არგუნა; ტარიელი კი სჩადის ათასგვარ სისაძაგლეს და სინდისის მხილებას ერთხელაც არ გაუფაჩუნებია მასში; პირიქით, მას თავი მოსწონს თავისი საზიზღარი მოქმედებით. ერთი სიტყვით, ზნეობრივი მხარე, რომელიც საუკეთესო სამკაულს შეადგენს ადამიანის ბუნებისას, ტარიელში სრულიად დამახინჯებულია. აი, როგორ განვითარდა ლუარსაბი ამ ორმოცი წლის განმავლობაში: გონებით წინ ვერ წავიდა, ზნეობრივად უკან დაიწია. მაგრამ ტარიელი ხომ გამოხაჯლისს არ შეადგენს ჩვენს ცხოვრებაში, ის დღევანდელი ფეოდალური არისტოკრატის ტიპური წარმომადგენელია და ნათლად ამტკიცებს მისი გონებისა და ზნეობის სიღატაკეს. ჩვენი არისტოკრატია გლეხობასავით არც ბატონყმობის დროს წარმოადგენდა ერთფეროვან წოდებას, მაგრამ ბატონყმობის მოსპობასთან ერთად არისტოკრატია, როგორც იურიდიული კლასი, მოისპო და დღეს ნელ-ნელა ნაწილდება სხვადასხვა სოციალურ კლასად. მხოლოდ ერთ ნაწილს ქონება კიდევ შერჩენია დღემდის. მაგრამ ქონებრივად და ზნეობრივად თუ დაუწევია. თორემ წინ ვერ წასულა. აი, მხოლოდ ეს ნაწილი წარმოადგენს დღევანდელ ფეოდალურ არის-

ტოკრატიას და მისი წარმომადგენელია ტარიელი. ტარიელისთანა პირები ქონებას მალე გაფლანგავენ ლოთობა-გარყვნილებაში და ჩვენი ფეოდალური არისტოკრატია ნელ-ნელა დაღვეს სულს. ტარაი-ლისთანა პირები მხოლოდ მავნებელი წევრნი არიან საზოგადოებისა. როდესაც ტარიელს ქონება გამოეცლება, გაღარიბება შესცვლის მის ცხოვრებას და სოციალურ მდგომარეობას. ამასთან ერთად, შეიცვლება მისი აღზრდაც, გამოფხიზლდება მისი გონება და ისიც სასარგებლო წევრად გადაიქცევა; რაც უნდა იყოს, მაზარალებელი მაინც აღარ იქნება. არისტოკრატის დანარჩენმა ნაწილმა დიდი ხანია დაჰკარგა ფეოდალური ხასიათი და გადაგვარდა: ზოგი განათლებას დაეწაფა და ინტელიგენტთა რიგში მოექცა, ზოგიც გაპროლეტარების გზას დაადგა.

სოციალური პირობები: უსამართლობა, მავნებელი ჩვეულებანი, უმეცრება, — აი, რა ლუპავს ჩვენს გლეხკაცობას. ნინოშვილმა დაგვანახვა ხალხის იარები, ჩვენი მოვალეობა კი იმაში მდგომარეობს, რომ ამ იარების დაამებას და განკურნებას ხელი შეუწყოთ. დროა, დავანებოთ იმ ბავშვურ რწმენას თავი, ვითომც ჩვენ შეგვეძლოს ისტორიულ პროცესს გავუმკლავდეთ და გლეხები, რომლებიც გაპროლეტარების გზას დასდგომიან, ამ გზას ავაცილოთ. დროა, დავანებოთ ილუზიებს თავი და შევიგნოთ, რომ ადამიანი ყოვლის შემძლებელ არსებას არ წარმოადგენს, ის მეტად მცირე ძალ-ღონის პატრონია და უნდა ცდილობდეს ეს მცირეოდენი ძალა წყლის ნაყვას კი არ მოანდომოს, არამედ ისე მოიხმაროს, რომ, რაც შეიძლება, მეტი ნაყოფი გამოაღებინოს. სოციალური ცხოვრების ჩვენი სურვილისამებრ გარდაქმნა თუ არ შეგვიძლია, სამაგიეროდ ჩვენ შეგვიძლია გავუმკლავდეთ უსამართლობას, მავნებელ ჩვეულებებს, უვიცობას. გლეხს თუ ვერ ვიხსნით გაპროლეტარებისაგან, სამაგიეროდ შეგვიძლია ვიხსნათ ის უსამართლობისაგან, უვიცობისაგან. მოაშორეთ ყოველივე ეს გლეხს და მაშინ მისი ცხოვრება გაცილებით უმჯობესი იქნება, მისი ტანჯვა გაცილებით ნაკლები, ვიდრე დღეს არის.

#### XIV

ამ წერილის მეორე თავში ჩვენ ვამბობდით, რომ პუბლიცისტიკა და ბელეტრისტიკის ნიჭი ერთად იყო ნინოშვილში შეერთებული. ამ აზრს განმარტება ექირვება. ზოგიერთი ნინოშვილის ახლო მეგობარი დარწმუნებულია, რომ ნინოშვილი პუბლიცისტად იყო დაბადებული. ის პუბლიცისტობისათვის ემზადებოდა, ბელეტრისტიკა კი მას არ იზიდავდა და, თუ წერდა, მხოლოდ იმიტომ, რომ საპუბლი-

ცისტო ასპარეზისათვის მზადებაში წერის წყურვილი მოეკლათ. ამგვარი აზრი მწერლობაშიაც გამოითქვა ნინოშვილის გარდაცვალების შემდეგ. რამდენადაც გავიგეთ, განსვენებულ ნინოშვილსაც პუბლიცისტური ასპარეზი უფრო იზიდავდა თურმე. ამგვარად, იმასაც შემცდარი აზრი ჰქონდა შემდგარი თავის ნიჭის შესახებ და ზოგი თავისი მეგობარიც შეცდომაში შეიყვანა. ნინოშვილი ღრმად უკვირდებოდა ცხოვრებას და კარგად ამჩნევდა ჩვენი ცხოვრების ცვლილებას. როგორც ნიჭიერმა აღამიანმა, მან კარგად იცოდა, რომ იმ დროს, როცა ცხოვრება ახალ ხანაში გადადის, როცა ძველი ინგრევა და მის ნანგრევებში ახალი ელემენტები იბადებიან, პუბლიცისტი უფრო საჭიროა და სასარგებლო. ვიდრე ბელეტრისტი; ამიტომ გასაოცარიც არ არის, თუ ნინოშვილს პუბლიცისტური ასპარეზი უფრო იზიდავდა, ვიდრე ბელეტრისტული: ეს გარემოებაც მისი პატიოსანი და მიუდგომელი ბუნების დამამტკიცებელია. ნინოშვილს უნდოდა თავის თავში უფრო პუბლიცისტი ეხილა. ვიდრე ბელეტრისტი. მაკრამ მისი სამხატვრო ნიჭი იყო მხოლოდ ძლიერი, საპუბლიცისტო კი ზუსტი. საპუბლიცისტო ნიჭი მას ჰქონდა იმდენად, რამდენადაც ეს საჭირო არის თანამედროვე ბელეტრისტისათვის; პუბლიცისტური აღლოს საშუალებით მან შეიძლო ჩვენი ცხოვრების ამოკითხვა და ნიშნობლივი მოვლენების ამოცნობა; ხოლო ამ მოვლენების პუბლიცისტურ მსჯელობაში ჩამოსხმა მისი საქმე არ იყო, უსათუოდ სამხატვრო ფორმით უნდა შეემოსა; ის იყო პუბლიცისტი მხატვარი და არა პუბლიცისტი პროზაიკოსი. პუბლიცისტური ნიჭი მხოლოდ კომპასი იყო მისი სამხატვრო ნიჭისთვის, მას მხოლოდ სურათებით შეეძლო იმის თქმა. რასაც პუბლიცისტი განყენებული აზროვნებით გვიხატავს. ნინოშვილში პუბლიცისტი ყოველთვის ემორჩილებოდა ბელეტრისტს და ის მოთხრობები, საცა პუბლიცისტმა ბელეტრისტის გადაძლევა მოიწადინა, მეტად ტენდენციური გამოვიდა და სამხატვრო ღირსებით დანარჩენ მის მოთხრობებს ჩამორჩება. ძვირად შეხვდებით მწერალს, რომელსაც ამდენი მიუყვარებლობა გამოეჩინოს თავის მოთხრობებში, რომელსაც ამდენად დავეიწყებინოს საკუთარი თავი წერის დროს და ამდენად წაეშალოს პირადი გრძნობის ნიშნები თავის თხზულებებში, როგორც ნინოშვილმა. მას უზომოდ უყვარს გლეხი, იტანჯება მისი ტანჯვით, გული ეთუთქება. მისი უბედურებით, მაგრამ ყოველივე ეს მას არ უშლის გლეხის ღირსებასთან ერთად ნაკლულევანებაც დაუფარავად დაგვიხატოს. ვისაც იმდენად უყვარს გაჭირვებული და დაჩაგრული, როგორც ნინოშვილს. მას რასაკვირველია, არ შეუძლია არ შეიძლოს და ზიზღით არ

უყუროს ისეთ პირებს. როგორც მოსე მწერალი, დავით დროიძე და კოტე მამალაძეა.

## XV

ჩვენი ახალგაზრდა ბელეტრისტები როცა ასეთ პირებს გვიხატავენ, სანამ მათ დაგვიხასიათებდნენ, უმალ თავის ზიზლსა და სიძულვილს გვატყობინებენ ასეთ პირებისადმი. ნინოშვილის მოთხრობებში კი არ არის არც ერთი სტრიქონი, სადაც ის თავის ზიზლს გვიცხადებდეს მოსე მწერლის ან დავით დროიძისადმი და ყველა იმ პირისადმი, რომლებიც გლენს დღეს უმწარებენ. ან ცდილობდეს, მათდამი იმაზე მეტი სიძულვილი დაგიბადოს, რისიც ღირსი ისინი თავის მოქმედებით არიან. ყოველივე ეს ცხადად ამტკიცებს, რომ ნინოშვილს ჰქონდა ძლიერი რეალისტ-ბელეტრისტის ნიჭი. მისი ნიჭი ახლა იშლებოდა და ის, რისი დაწერაც მან მოასწრო, მხოლოდ აჩრდილს წარმოადგენს იმ ლიტერატურული განძისას, რომელსაც ჩვენ მწერლობას შესძენდა, ძლიერ სულთან ძლიერი სხეულიც რომ ერგუნებია მისთვის ბუნებას. ბუნებით ის იყო მეტად მგრძნობიარე გულის, პატიოსანი, სიმართლისმოყვარე, და მისი ხასიათი მის მოთხრობებსაც დაეტყო. ჭეშმარიტებას, სინამდვილეს ის ყველაფერზე მაღლა აყენებს და, გარდა ორიოდე ტენდეციური მოთხრობისა, ამ თვისებებისათვის არსად უღალატნია. ის ხედავდა ცხოვრებაში მრავალ უსამართლობას. თუ კალმით, თუ საქმით ებრძოდა მას და ამ ბრძოლას გადააღია თავისი სუსტი არსება. ჭეშმარიტების სიყვარულმა და ცხოვრების პირობებმა შეაჩვიეს ის ღრმა დაკვირვებას; ის ცდილობდა შეეგნო ჩვენი ცხოვრება და კიდევ შეეგნო, ბელეტრისტიკაში პირველმა დაგვანახვა ცხადათ იმ სოციალური კლასების წარმოშობა, რომლებიც ჩვენ ცხოვრებაში ვითარდებიან, და ახალი სოციალურა ურთიერთობა, რომელსაც ახალი კლასების განვითარება იწვევს. თავისი შეხედულებით, რწმენით, იდეალებით ნინოშვილი ნამდვილი შვილი იყო ჩვენი დღევანდელი ცხოვრების; ის დაიბადა ძველი და ახალი ხანის საზღვარზე და თავის სამხატვრო ნიჭით შეიტანა ახალი შუქი ჩვენ ლიტერატურაში; მთელი მისი ლიტერატურული მოღვაწეობა ილუსტრაციაა ახალი ხანის დაწყებისა ჩვენ ცხოვრებაში, ახალი კლასების აღორძინების, ახალი ურთიერთობის დამყარების, ძველ ჩვეულება-შეხედულებათა შერყევის, — ხალხის ფსიქოლოგიის ცვლილების. უიშვილს, ივანეს. მუნჯაძეს, სიმონას, ტასოს. ლიზას ძველი გზით სიარული აღარ შეუძლიათ. ცხოვრების ძვე-

ლი ჩაჩო მათთვის დღეს მეტად ვიწროა. ეკონომიური მიზეზები ითხოვენ ამ ჩაჩოს განგრევას და ნელ-ნელა კიდევ ანგრევენ. თუ ამდენად შეიცვალა ჩვენი ცხოვრება, თუ კარი დააკაჟუნა ახალი წარმოების ხანამ. უსათუოდ უნდა ყოფილიყვნენ ჩვენში ამ ახალი ხანის შვილებიც, მისი იდეოლოგიები; მათი შეხედულება ცხოვრებაზე და იდეალი უნდა სხვანაირი ყოფილიყო. ვიდრე ძველი თაობის, რომელიც ძველი ცხოვრების გავლენის ქვეშ აღიზარდა. რასაკვირველია, ასეთი პირები იყვნენ ჩვენში, მაგრამ ერთი—რომ მათი რიცხვი ცოტა იყო, მეორე — გარკვევით ჯერ არ ჩანდნენ და ძველი თაობის მეთაურებს არც უნდოდათ მათი დანახვა. ამგვარი პირების გუნდს ეკუთვნოდა ნინოშვილიც; თავისი დაუღალავი შრომით და სულის სიძლიერით ის ამხნევებდა ყველას. მისი ცხედრის გარშემო შეკრება ყველა მისი თანამოზიარე. რომ უკანასკნელად გამოთხოვებოდნენ ამ პატიოსან ადამიანს: ნინოშვილის კუბოსთან გამოაშკარავდა, რომ რამდენიმე პირი კი არა, მთელი ახალი დასი არსებობდა ახალი ღრის წარმოშობილი; ის კრიტიკულად უყურებდა ძველ მოღვაწეებს და მათ პროგრამისათვის საკუთარი პროგრამა ამოუყენებია გვერდში. ამ ახალ დასს „კვალმა“ (1904 წ. № 21) უწოდა „მესამე დასი“. „ივერიელებმა“ ჯერ მხოლოდ სიტყვა „მესამე-ს“ მიაქციეს უურადლება, იმის მეტი ვერა გაიგეს რა და დაიწყეს ძახილი: მალე მეოთხესაც გამოჩეკენ, მეხუთესაცო და სხვ. საქმე იმაში კი არ იყო, მესამეს დაუძახებდით თუ მეექვსეს ამ ახალ დასს, საქმე იმაში იყო. რომ არსებობდა ახალი დასი, რომლის ფიქრი. რწმენა და იდეალი სხვა იყო, ვიდრე ძველი თაობის, რომელიც სხვანაირად უყურებდა ჩვენს ცხოვრებას. ვიდრე ძველი მოღვაწეები. 1894 წელს „მომამბეში“ ნაღი წერდა: „ნუთუ ჩვენში კაპიტალისტური წესწყობილება არსებობს, როცა ქარხნები და ფაბრიკები არა გვაქვს და არც ერთ წარმოებაში მაშინებს არ ვხმარობთ?“ სამი წლის შემდეგ იმავე ურნალში ურბნელი ამტკიცებდა ამ დასის უნიადაგობას ჩვენში და დაამტკიცა მხოლოდ ის, რომ: მარქსის მოძღვრება არც ესმოდა და არც იყო მისი მიმდევარი. ნუთუ საკადრისია. ბ-ნო ნალო, ისეთი მოძღვრების დარღვევას ცდილობდეს ადამიანი. რომლის შესახებ სრული უვაცია? ასეთ პოლემიკას რომ გადაიკითხავ. მკითხველო. სწორედ გავგლიშობა: ეკამათებოდნენ ახალ მიმართულებას ჩვენს ცხოვრებაში, ამტკიცებდნენ ვითომ მის უნიადაგობას, ნამდვილად კი თავისი უვიცობის მეტს ვერას ამტკიცებდნენ; იმდენი შრომის გაწევასაც კი არ კადრულობდნენ, რომ შეესწავლათ. ოდნავად მაინც. ის მოძღვრება, რომლის წინააღმდეგაც ილაშქრებდნენ: ვინ არ იცის.

რომ ქარხნები და მაშინები კაპიტალიზმის უმაღლესი საფეხურია, რომ მანქანების და ქარხნების უქონლობა სრულადაც არ უარპყობს კაპიტალიზმის არსებობას, რადგანაც განვითარების დაბალ საფეხურზე კაპიტალიზმი არც პირველში და არც მეორეში არ საქირბებს? ძველი თაობის წარმომადგენლები თვითონვე დარწმუნდნენ თავის უვიცობაში და რომელი გზისთვის მიემართათ ახლა? აქამდე ამტკიცებდნენ მესამე დასის უნიადაგობას ჩვენში. მაგრამ როცა ეს ტყუილი გამოადგათ, მაშინ ერთი გზა დაარჩინოდათ: უნდა დაერღვით თვით ის მოძღვრება, რომლის წარმომადგენელიც მესამე დასი იყო. ძველი თაობა ჯერ თავს ინუგეშებდა, არავითარი ახალი დასი არ არსებობსო; როცა ამგვარი ნუგეშით ვეღარ ანუგეშეს თავი, ფეოდალურ ზომებს მიმართავს: როგორ გაბედეთ და ქედი არ მოიხარეთ ჩვენ წინაშე და კრიტიკულად დაუწყეთ ჩხრეკა ჩვენ მოქმედებასო; როცა წყრომაც აღარ გაუვიდათ, გამოაცხადეს: ჩვენში ქარხნები არ არის, მანქანებს ჩვენ არსათ ვხმარობთ. მაშასადამე, არც კაპიტალიზმი ყოფილა და მესამე დასიც ნიადაგს მოკლებულიაო. როდესაც თავის უვიცობისა თვითონვე შერცხვათ, თეორიას მოდგენ! მაგრამ დახეთ უბედურებას: მესამე დასი არათუ ვერ მოსპეს. ის დღითიდღე იზრდებოდა და დღეს დასი კი არა, უკვე მთელ თაობად გადაიქცა. მაგრამ ჩვენ მოწინააღმდეგეებს საფანელი შემოაკლდათ და ისევ ბატონყმურ იარაღს დაუბრუნდნენ, ლანძღვა-გინებებს; ამისათვის არც ცოდნაა საჭირო და არც ჭკუა! ჯერ მხოლოდ „ივერიამ“ მიმართა ამ ბასრ იარაღს და ცხადად დაამტკიცა თავისი სრული უძლურება იმ ცხოვრებასთან ბრძოლაში. რომლის ერთი საუკეთესო წარმომადგენელთაგანი ჩვენში ნინოშვილი იყო. როდესაც „ივერიელები“ კითხულობდნენ: რა გააკეთა მესამე დასმაო, და თავის თავს თვითონვე ანუგეშებდნენ: არაფერიო, უნიადაგაო და სხვ. ყოველივე ეს ნინოშვილსაც შეეხებოდა, რასაკვირველია. ნინოშვილმა გააკეთა ის, რისი მნიშვნელობაც მათ არ ესმოდათ; ნინოშვილმა იმდენი გააკეთა ხუთი წლის განმავლობაში. რამდენის გაკეთებაც ასე მოკლე დროის განმავლობაში ძველი თაობიდან ცოტამ შეძლო; ძველი თაობის მწერლებიდან ძალიან ცოტამ შესწირა თავისი თავი აწყყოს და მით მომავალსაც. ასე სრულად. როგორც ნინოშვილი, ძალიან ცოტა ხატავდა ჩვენ ცხოვრებას. მან გაანათა ჩვენი ცხოვრება, დაგვანახვა მისი მიმართულება და დაბადა აბალგაზრდა ბელეტრისტები. რომლებიც მის მიერ დაწყებულ საქმეს განავრცობენ და, რაც დრო გადის, თანდათან ირკვევა, ვინ არის უნიადაგო. ვინ მოჭამა დღე და ვინ უფრო შეეფერება აწყყოს.



ჩვენ ვცდილობდით, გამოგვერკვია, რამდენადაც შეგვეძლო წინოშვილის მოთხოვნების დედაზარი. მათი ღირსება და ნაკლულევა-ნება. დაგვრჩა მხოლოდ განვიხილოთ, თუ რამდენად ამართლებს ამ მოთხოვნების გარჩევა პირველ თავში გამოთქმულ მოსაზრებას. სოციალური პირობები პირდაპირ აძლევდნენ მასალას წინოშვილს თავისი ბელეტრისტიკისათვის; გოგია უიშვილი, ივანე, სიმონა, მუნჯაძე, მოსე მწერალი, დროიძე, მკლავაძე — ყველა ესენი ნამდვილი ტიპებია ჩვენი ერის სხვადასხვა ნაწილისა. ჩვენ წინანდელ ლიტერატურაში ტარიელ მკლავაძეს შეხვდებით სხვადასხვა სახით და წლოვანებით. მაგრამ გლახობიდან ვერ ნახავთ, ერთი მხრით, უიშვილებს და მუნჯაძეებს, მეორე მხრით, დროიძეებს და მოსე მწერლებს, რადკანაც თვით ცხოვრება არ იძლეოდა ასეთ პირობებს; ვერ შეხვდებით ჯერანს და ლიზას. ტასოს ტანჯვას. იმიტომ, რომ ხალხი ბრმა მონა იყო, მავნებელი ზნე-ჩვეულების უვარგისობა ვერ შეეგნო და ურიგდებოდა თავის ხვედრს. რამ დაბადა დღეს ჩვენში ასეთი პირები? რას შემოაქვს შუქი ხალხის ბნელ გონებაში? ბატონყმობის მოსპობით ჩვენი ერის მწარმოებელი ძალის განვითარებას დიდი დამაბრკოლებელი მიზეზი მოსცილდა; გლახობას მიენიჭა საკუთრება, ის თვითონ გახდა თავისი შრომის პატრონი; ამიტომ ყოველ ადამიანს უნერგია მოემატა ცხოვრების გაუმჯობესებისათვის და შრომა უფრო განაყოფიერდა. ამ გარემოებამ თავის მხრივ ხელი შეუწყო იმ განსხვავების განვითარებას და გამოაშკარავებას, რომელიც გლახობაში არსებობდა: ახალი პირობებით, უეჭველია, ერთნაირად ვერ ისარგებლებენ გიგოლა გულიაშვილისთანა პირები („წარსულიდან“ ს. მგალობლიშვილისა) და დანარჩენი გლეხები. გლახობის ერთი ნაწილი ნელ-ნელა მოსწყდა დანარჩენს და დღეს შეადგენს სოფლის ბურჟუაზიას: ამათ რიცხვს ეკუთვნის დავით დროიძე, მოსე მწერალი. ზოგი მათგანი სოფელს თავს ანებებს და ქალაქში მიდის, როგორც მამალაძე. ქალაქშიაც ფეხს იმაგრებს ჩვენი ბურჟუაზია. მწარმოებელი ძალის განვითარებამ შესცვალა ეკონომიური პირობები და ამით დაამყარა ჩვენს ხალხში სხვა ურთიერთობა დროიძეებსა და დანარჩენ გლეხებს შორის. ამ ორმოციოდე წლის წინათ, არათუ არ არსებობდა, შეუძლებელი იყო ისეთი დამოკიდებულება, როგორიც დღეს არსებობს მათ შორის. მწარმოებელი ძალის განვითარებამ გაართულა ცხოვრება. გაამრავლა ხალხის მოთხოვნილება. მარტო თავის მოთხოვნილების დასაკმაყოფილებლად გლახს დღეს მეტი ხარჯი და, მასასადამე, მეტი გარჯაც სჭირდება, ვიდრე წინათ. მართალია, ბა-

ტონყმობის მოსპობამ ჩვენი მწარმოებელი ძალის გახვითაწრება გამოიწვია, მაგრამ ამ განვითარებას შეუჩერებლად სიარული დიდხანს არ შეეძლო, რადგანაც ნატურალური წარმოების ფარგლებით იყო შეზღუდული. ჩვენმა მწარმოებელმა ძალამ მიადწია უკვე იმ ფარგლებს და თუ არ გაანკრია, მეტი ზრდა აღარ შეუძლია, მისი განვითარების შეფერხება კი გლახს ეკონომიურად აქვეითებს, რადგანაც მას არ შეუძლია, თავის შრომას იმდენი ნაყოფი გამოაღებინოს, რამდენიც მისთვის საჭიროა. ამგვარად: ჩვენი ერის მწარმოებელი ძალის მდგომარეობა და ის მიზეზები, რომლებიც მის განვითარებას წინ ეღობებიან, ერთი მხრით, წარმოშობენ უიშვილის, ივანეს, მუნჯაძის და სხვ. უბედურებას, მეორე მხრით, ხელს უწყობენ დავითის-თანა და მოსე მწერლისთანა პირების გამდიდრებას და გლახობის დიფერენციაციას: ერთს ყველაფერი ვალში ეყიდება, მეორე კი პირველის სიღარიბით უფრო მდიდრდება. სად არის გლახის საშველი? რას უნდა მიმართოს მან? გლახს ერთი საშუალებაა დარჩენია: მან უსათუოდ უნდა დააგდოს წარმოების ძველი გზა და მონახოს ახალი, ესე იგი, უნდა შესცვალოს დღევანდელი სოციალური პირობები. ამას ითხოვს მწარმოებელი ძალის განვითარება. მას აღარ რგებს ნატურალური წარმოების ვიწრო ტანისამოსი და, რომ ვითარდება ის და ცვლის ნელ-ნელა ჩვენ ცხოვრებას, ამას საკმარისად გვიმტკიცებს ნინოშვილის მოთხრობები. ივანე და მისი მეზობლები იძულებულნი არიან ისეთ წყაროს მიმართონ, რომელიც უკეთ დააჯილდოვებს მათ შრომას; თოხით ვეღარ აუვიდნენ ყველაფერს და ხელს კიდებენ სხვადასხვა მრეწველობას. თუმცა ბევრის აზრით შინამრეწველობა კაპიტალიზმის ძირითადი წინააღმდეგი ელემენტია, მაგრამ როგორც სხვაგან, ისე ჩვენში, შინამრეწველობის ზოგიერთი დარგის წარმოშობის მიზეზი უცილოდ კაპიტალიზმის ფეხის შემოდგამა.

## XVII

ქართველი ერი ნელ-ნელა ვაჭრობას ჰკიდებს ხელს; გაიხსნა ჩვენში ქარხნები; მათი რიცხვი ჯერ თუ ცოტაა. ეს იმას არ ამტკიცებს, რომ არ გამრავლდება. დაიწყო ნავთის და ქვამადნის წარმოება. ქვანახშირისა და ტყისკენ გაეშურა ქართველი მუშა და ვაჭარი. უისაც საკმაო მიწა აქვს ჯერჯერობით, ისიც კი ცდილობს გარეთ მუშაობით იშოვნოს რაიმე; ვინც თანდათან ღარიბდება, იმას მეტი რაღა დარჩენია. თუ არა მუშად გადაქცევა? ღარიბების რიცხვი კი თანდათან მატულობს. ამგვარ პირობებში კაპიტალიზმი სასურველიც არის, რადგანაც გაჭირვებულ ადამიანს საზრდოს გაუჩენს; შეიძლება.

ეს საზრდო ძალიან მცირე იყოს, მაგრამ უიმშვილით სიკვდილს მაინც აჯობებს. თუ ეკონომიურმა მიზეზებმა გლახობა გაჭირვებულ მდგომარეობაში ჩააყენა, სამართლის ცუდად წარმოებამ, გონების სიბნელემ და მრავალგვარმა უსამართლობამ უფრო გაამწვავა ხალხის მდგომარეობა. ჩვენ არ შეგვიძლია ყოველივე ამის სათავეში მარტო ეკონომიური პირობები დავინახოთ, მაგრამ უსამართლობის უმეტესი წილი რომ ეკონომიურმა პირობებმა შექმნა, ეს აშკარაა: ეკონომიურმა მიზეზებმა დაბადეს, ერთი მხრით, დროიძე და მოსე მწერალი, მეორე მხრით, ყველა ის პირობები, რომელთა გაჭირვება და შევიწროება ნინოშვილმა დაგვანახა. გლახის სიღარიბე მისი მდიდარი მეზობლისათვის საუცხოო საშუალებას წარმოადგენს გამდიდრებისათვის. გარდა ამისა, მდიდარი გლახის სამართლის კარზედაც ადვილად ჩაგრავს ღარიბ მოძმეს; დავით დროიძე რომ მდიდარი გლახი არ იყოს, უსამართლობით ვერ დალუპავდა სიმონას ოჯახს. დღეს ხშირად სიმართლის სასწორი იქით იწევს, საითაც ფულია; რადგანაც ფულის პატრონები დროიძეები არიან, რასაკვირველია, სოფლის მწერალ-მამასახლისები კი არა, იმაზე მსხვილი მოხელეებიც მათი ჯიბის მეგობრები იქნებიან!

ჩვენი არისტოკრატიის ცხოვრებაში რაღა ცვლილება შეიტანა შეცვლილმა დრომ? არ შეიძლება იმ ფაქტის უარყოფა, რომ ბატონყმობა ჩვენში ეკონომიურმა მიზეზებმა წარმოშვა<sup>1</sup>. ეკონომიურმა მიზეზებმა მოუჭინა ჩვენი ფეოდალური არისტოკრატია სავსე სუფრას; ისიც. რადგანაც კუჭი ყოველ წამს ძალზე გატენილი ჰქონდა. გონების განვითარებისათვის აღარ იწუხებდა თავს, სულიერი ინტერესები აღარ ახსოვდა; უზნეობის განვითარებისათვის კი თავისი სოციალური მდგომარეობაც ხელს უწყობდა. თავისუფალი დროც ჰქონდა, ამიტომ სურვილიც მალე დაებადა და პირუტყვეულ ცხოვრებაში ჰპოვა თავისი მიზანი. მაგრამ ცხოვრება მარტივი იყო, მოთხოვნილება ცოტა, ამიტომ არისტოკრატისაც უზნეობისათვის ვიწრო ასპარეზი ჰქონდა. ცხოვრებაში ხშირად შედეგი გაცილებით დიდხანს ცოცხლობს, ვიდრე მისი გამომწვევე მიზეზი; თუმცა ის მიზეზები, რომლებმაც ჩვენი არისტოკრატია წარმოშობეს და სხვის კისერზე დასვეს მუქთახორად, დიდი ხანია გადასხვაფერდნენ, მაგრამ ფეოდალურმა არისტოკრატამ კიდევ დიდხანს შეირჩინა სახე. დღეს. როდესაც ახალმა ეკონომიურმა პირობებმა ცხოვრება; ფერი აცვლევინეს, ჩვენი არისტოკრატიაც დაადგა გადაგვარების გზას:

<sup>1</sup> იხ. ხაბანაშვილის „ბატონყმობა საქართველოში“.

ერთი წილი დღითი-დღე დარბდება, პროლეტარდება, მეორე ინტელიგენტთა რიცხვში გადადის და ამით ორივე ჰკარგავს ფეოდალურ სახეს. დარჩა მხოლოდ ერთი ნაწილი, რომელმაც ჯერ კიდევ შეიჩინა ფეოდალური სახე; ამ ნაწილის წარმომადგენელთა ტარიელ მკლავადე. ამგვარად, ტარიელ მკლავადის სათავე ჩვენი ძველი ცხოვრების ეკონომიურ პირობებში მდგომარეობს. რადგანაც ცხოვრება განვითარდა და გართულდა, უზნეობასაც ფართო ასპარეზი გაეხსნა, და ახალ ცხოვრებაში ტარიელმა შეიძინა მხოლოდ ის, რითაც ლუარსაბ თათქარიძისაგან განსხვავდება, ე. ი. გონებრივად კუს ნაბიჯიც ვერ გადადგა წინ, ზნეობრივად უფრო დაეცა.

ყოველი დროის და ყოველი ერის ცხოვრებაში შეხვედებით ისეთ მოვლენებს, რომლებიც სხვადასხვა დროის ეკონომიური მდგომარეობის ნაყოფი არიან. ამის მაგალითებს ჩვენი ცხოვრებაც იძლევა. კერძო საკუთრებამ მოსპო უძველესი დროის მატრიარქატი და აღორძინა პატრიარქატი; პატრიარქატის გაძლიერებას კი თან მოჰყვა პატრიარქალური ოჯახის აღორძინება. ამ დიდ ოჯახს ჰყავდა ერთი უფროსი მამამთავარი, რომელსაც ყველაფერში მორჩილებდნენ ოჯახის დანარჩენი წევრები. ამგვარმა ოჯახმა ნელ-ნელა ვარდაქმნა თავისი წევრების შეხედულებანი; მამამთავარს ჩაუნერგა ის აზრი, რომ ყველასათვის მან უნდა იზრუნოს, უმცროს წევრებს კი ის აზრი, რომ მათ ყოველგვარ საქმეში უფროსის ნება უნდა აასრულონ. ასეთი პატრიარქალური შეხედულება ჩვენს ხალხშიაც იყო გავრცელებული და სხვათა შორის ცოლქმრობის საქმეშიც იხატებოდა. უმეტეს შემთხვევაში, საცოლუ და საქმრო ჯვარისწერის დროს პირველად ხედავდნენ ერთიმეორეს, მათ ბედ-იღბალს მათი მშობლები წყვეტენ. მათ დაუეითხავად, შვილების მოვალეობა მხოლოდ მორჩილება იყო და მშობლების ნების შესრულება.

თავადობაში და თითქმის აზნაურობაშიც ამგვარი შეხედულება საცაა მოისპობა. ყველაზე დიდხანს გლეხის ოჯახში დარჩა ეს ძველი შეხედულება, მაგრამ დღეს აქაც შეირყა მისი სიმტკიცე: ნინო-შვილის მოთხრობებში ჰხედავთ, რომ ამგვარ ჩვეულებას გლეხები ნელ-ნელა უსამართლოდ თვლიან. რამ შეცვალა ამდენად გლეხის აზროვნება? — მწარმოებელი ძალის განვითარებამ: მორსპო ჩვენში ბატონყმობა, მას თან გაჰყვა პატრიარქული ოჯახების უკანასკნელი ნარჩენები; ახალმა ეკონომიურმა პირობებმა ნელ-ნელა ფერი აცვლევინეს ცხოვრებას. შესაფერი შეხედულებანი და ჩვეულებანი მოითხოვეს, — და. რასაკვირველია. სოციალურ ცხოვრებაში სანამ ახალი რამ აღორძინდებოდეს და ფეხს მოიმჯარებდეს, ძველის უვარ-

გისობა უნდა შეიგნოს ხალხმა. თუმცა ჯერანს ჯერ კიდევ წმინდად სწამს ძველი ჩვეულება, მაგრამ მისი სიძულვილი ცოლისადმი, სამდღურაჲი დედისა და დისადმი და ცოლის წამება გვიმტკიცებენ, რომ მისი გონება და გრძნობა, მცირეოდნადაც არის, გაბრწყინებულია. ის იტანჯება ძველი ჩვეულების ფარგლებში; მალე მიხვდება ამ ჩვეულების უვარგისობას და კიდევ უარყოფს მას. ტასოს და ლიზას იმდენად გახსნიათ გონება, რომ ძველი ჩვეულება მათ აღარ მიაჩნიათ წმიდათა წმიდად. ხოლო მათ ძალა არ შესწევთ, მამების უკანონო უფლებას გაუმკლავდნენ, და ძველი ჩვეულების მსხვერპლი ხდებიან. მაგრამ ისინი კარგად ხედავენ, სადაც არის მათი უბედურების სათავე, მათ ეზიზღებათ ეს ძველი ჩვეულება და, რადგანაც ერთხელვე დარწმუნდნენ მის უვარგისობაში, აღარ შეუძლიათ მას შეურიგდნენ: ტასო ქმარს ღალატობს, ლიზა თავს იკლავს.

ნინოშვილის მემკვიდრეობის შესახებ ყოველგვარ მასალას მოკლებული ვართ. ამიტომ მარტო მცირეოდენი ცნობების შემწეობით არ შეგვიძლია მკითხველს სრულად დავანახოთ მემკვიდრეობის კვალი მის ნაწერებში. ნინოშვილის დედის შესახებ ვერა გავიგეთ რა. მამა იყო მეტად უწყინარი და გულჩვილი; ყოველიფერი უყვარდა მას და ეცოდებოდა: ჭიანჭველას არ დაადგამდა ფეხს. ყველა ეს თვისებები მემკვიდრეობამ სრულად არგუნა ნინოშვილს. აღზრდამ კი ძალიან განუვითარა. ის იყო მეტად მგრძნობიარე და პატიოსანი გულის პატრონი. მას ყოველიფერი აწუხებდა, ყველას გულშემატკივარი ის იყო და ყოველიფერი იმ ზომამდე ეცოდებოდა, რომ ხორცის ჭამაც კი ეზარებოდა თურმე. ასეთი გულის პატრონი უსათუოდ უნდა ყოფილიყო ყველა დაჩაგრულის მოყვარული და ყოველგვარი უსამართლობის მტერი, ნინოშვილმა თავის მთავარ მიზნად უსამართლობასთან ბრძოლა გაიხადა. დაჩაგრულნი და გაჭირვებულნი უზომოდ შეიყვარა და მათი მოსარჩლე შეიქნა. მეტისმეტად მორიდებული და თავაზიანი კერძო ცხოვრებაში, მთელი მისი ხანმოკლე სიცოცხლე ბრძოლა იყო გაჭირვებასთან და უსამართლობასთან. უმთავრესი მის მოთხოვნებში უსამართლობასთან ბრძოლაა გატარებული. ყველა უბედური და დაჩაგრული მას უყვარდა და ებრალებოდა; მეტად მგრძნობიარე გულის პატრონს, უსამართლობის არათუ ხილვა, წიგნში ამოკითხვაც კი აატირებდა ხოლმე (ამის მაგალითი გ. წერეთელსაც მოჰყავს ნინოშვილის ბიოგრაფიაში). დედის აღერსი მას არ ახსოვდა; გაჭირვება ადრე გაიცნო. ყოველივე ამის მიზეზია და აგრეთვე თვით ცხოვრების. რომ ნინოშვილის ყოველ მოთხოვნას უბედური ბოლო აქვს; რამდენი მოთხოვნაც უნდა დაეწერა

ნინოშვილს, ბედნიერებით დაბოლავებას ის ძვირად მოახერხებდა. პატიოსნების და სიმართლისმოყვარეობას უნდა მიეწეროს ის გარემოება, რომ ნინოშვილი ცხოვრების უტყუურად ხატვას ძალიან მალა აყენებს; რა ძლიერადაც უნდა უმღვრევდეს მას გულს სინამდვილე, მის გალამაზებას არასოდეს არ ცდილობს; მას უყვარს, ებრალება გლეხი, ებრძვის უსამართლობებს და სიბნელეს, რომელიც გლეხს სულს უხუთავს, მაგრამ სინამდვილეს მაინც არ ღალატობს. არავითარ ცუდ თვისებას არ გვიმალავს ის თავის საყვარელ გლეხში. მემკვიდრეობას ხელი შეუწყო აღზრდამ და იმ წრის გავლენამ. რომელშიაც ნინოშვილი ტრიალებდა. პატიოსანი, სამართლიანი. სიმართლისმოყვარე და მგრძნობიარე გულის პატრონი, დაბადებიდან მოკიდებული ისეთ პირობებში იყო, რომ სულ გაჭირვებასა და უსამართლობას ხედავდა; მან მალე გაიცნო ცხოვრება მთელი მისი. ნაკლულევეანებით: თუ სოფლის მასწავლებლად იყო. თუ მწერლად, თუ ასოთამწყობად. თუ მუშად და სხვ. ჩვენ არ ჩამოვთვლით აქ ყველა იმ გაჭირვებას, რომელიც უნახავს ნინოშვილს და თავის თავზე გამოუცდია. ამგვარი აღზრდა და გავლენა მალე მიიქცევედა მის ყურადღებას ცხოვრების ნაკლულევეანებებზე, დააფიქრებდა და მოაძებნიებდა მათ მიზეზებს და მართლაც, ის არათუ პრაქტიკულად სწავლობდა დღევანდელ ცხოვრებას, თავისუფალ დროს სულ წიგნს ანდომებდა და მეტისმეტი ნაკითხი იყო. მისი ხასიათის, აღზრდის და მუდამ ღარიბთა და გაჭირვებულთა შორის ცხოვრების ბრალია, თუ ნინოშვილი თავის მოთხრობებში სულ უბედურთა და დაჩაგრულთა გარშემო ტრიალებს და მათი გულის მესაიდუმლეა. ამგვარად სოციალურმა პირობებმა, მემკვიდრეობამ და აღზრდამ დააყენეს იმ გზაზე ნინოშვილი, რომლისთვისაც მას არ გადუხვევია თავის მოკლე. მაგრამ ნაყოფიერი მოღვაწეობის დროს და არც გადუხვევდა, რამდენი ხანიც უნდა ეცოცხლა. თუ რამ წარმოშობა ჩვენი დღევანდელი სოციალური პირობები. ეს უკვე განვიხილეთ.

1899 წ. 5 დეკემბერი.

## კრიტიკული შენიშვნები

(„ამოდის, ნათლება“ და სხვა მოთხრობები ვაჟა-ფშაველას 1898 წ.)

სიხარულით ვეგებებით ყოველ საყმაწვილო წიგნს, თუნდ დიდ ღირსებისაც არ იყოს; ჩვენს ბავშვებს ისე ცოტა აქვთ საკითხავი. რომ დიდ ღირსებას ვინლა დაეძებს! ვაჟა-ფშაველას წიგნაკი ისეთის ღირსების არის, რომ საყმაწვილო ლიტერატურაში საპატიო ადგილს დაიჭერს; რამდენადაც ყმაწვილებისათვის არის ეს წიგნი შესაფერი, იმდენადვე ხალხისათვისაც უმთავრესი ღირსება ყველა ამ მოთხრობებისა არის მეტად ცოცხალი, მხატვრული ენა, „ზნეობრივი აზრი, ზოგიერთი ნადირის ცხოვრების გაცნობა; — ყველა ამგვარი თვისებები ამ მოთხრობებისა პატარა ყმაწვილს კითხვას შეაყვარებს და შესაფერ მასალასაც მისცემს მის გონებას.

წიგნში მოთავსებულია ოთხი მოთხრობა; ერთს გარდა, ყველაში ოთხფეხი ან ფრინველებია მომქმედ პირებად გამოყვანილი. პირველში აღწერილია მგლების ცხოვრება ზამთარში. მოგროვდნენ ერთ ზამთარს ღამეში მშვიერი მგლები იმ განზრახვით, რომ სოფელს შეჰპაროდნენ, დაეშენნ თავქვე, სოფლისაკენ, მაგრამ ამ დროს მთვარე ამოვიდა, შუქი მოჰფინა არემარეს და მგლების საქმეც ჩაიშალა: სოფელში ველარ შეიპარებოდნენ. შიმშილმა თავისი ქნა: მგლებმა ერთმანეთს დაუწყეს თვალიერება, შემდეგ მიცვივდნენ ბებერ მგელს და მალე ბეწვიც კი გააქრეს მისი. მეორე მოთხრობა, „დათვი“, საუკეთესოდ მიგვაჩნია მთელ წიგნში: აქ მოთხრობილია შესანიშნავი შემთხვევა სოფლის ისტორიაში: დათვის მოკვლა! პირველ თავში აღწერილია დათვი თავისი ზნე-ხასიათით ისე ხელოვნურად, რომ კარგი მეცნიერული წერილიც ვერ დაუხატავს ბავშვს დათვს ასე ცოცხლად, როგორც აქ არის დახატული. მეორე თავში აღწერილია, თუ როგორ გაჩნდა ერთ სოფელში დათვი, როგორ მოემზადნენ სოფლელები მის მოსაკლავად, გაილაშქრეს და დაამარცხეს დათუ-

ნა. სოფელში როცა დათვის ბინას მიაგნებენ. საუკეთესო მონადირეები და გულადი ბიჭები მორიყიან თავს. შეიქმნება დაჯანგებული თოფების ფერვა; ცულების ლესვა და ბოლოს ისეთი ამბით წავლენ დათვზე სანადიროდ, თითქოს სამშობლოს მტერს ებრძოლებიანო. ყოველივე ეს ისე ცოცხლად არის აწერილი, თითქოს თქვენის თვალთ ხედავთ; ისეთი მოთხრობის შინაარსის გადმოცემა, რომლის უმთავრესი ღირსება მხატვრულ აღწერილობაში მდგომარეობს. ძნელი არის და უფერულიც გამოდის; ამიტომ არც ვკისრულობთ შინაარსის გადმოცემას. შეიძლება, მიპასუხო, მკითხველო: „როგორც გინდა, ისე ფქვამ: ხან წუნობ ცალიერ ესთეტიკას, ხან არაო“, მაგრამ ერთი ეს, — რომ ამ მოთხრობაში, როგორც უკვე მოგახსენე, მარტო ესთეტიკა არ არის; მეორე — რაც ეპატიება კი არა, მოეთხოვება კიდევ საყმაწვილო მოთხრობების დამწერს, ის დაეძრახება ბელეტრისტს ან პოეტს. დიდი ადამიანის გონებას უნდა წარუდგინო ცხოვრების დამახასიათებელი სურათები, ფორმისათვის კი ჩვეულებრივი ნორმა არსებობს: ენა უნდა იყოს უბრალო, ადვილად გასაგები, მეტი საჭირო არ არის; დიდისათვის უმთავრესი მნიშვნელობა შინაარსსა აქვს. როცა მწერალი მკითხველს ან არარაობას ან დაობებულ და გაცვეთილ აზრს აწვდის ულამაზეს ფორმაში. ამისთანა მწერალი თვითონაც უქმად ჰკარგავს დროს, სხვასაც აცდენს. პატარა ბავშვების მწერალი კი ხშირად სხვაგვარ პირობებშია: პატარას, ათთერთმეტ წლამდე, სანამ ზნეობრივ აზრებს მიაწვდიდე, კითხვა უნდა შეაყვარო; ამას კი მხოლოდ ცოცხალი ენით დაწერილი მოთხრობებით და მხატვრული დასურათებით მიადწევთ. ამ მოთხრობაში გაიცნობს ბავშვი აგრეთვე ხალხის ზოგიერთ ცრუმორწმუნეობას. გიგოლიმ კარგი სიზმარი ნახა და მხიარულად მიდიოდა დათვის მოსაკლავად, რადგანაც დარწმუნებული იყო, რომ დათვის მოკლავდა; თუ ცუდი სიზმარი ენახა, უეჭველია, მეორე დღეს სანადიროდ აღარ წავიდიოდა. გაემგზავრნენ დათვის მოსაკლავად. გაცილდნენ თუ არა სოფელს, ჭერ კურდღელმა გადაურბინა წინ, შემდეგ მელამ: ეს კი გლეხების თვალში ცუდი ნიშანი იყო. ყველა დაღონდა და, გიგოლას რომ არა, უკანვე დაბრუნებას აპირებდნენ. სხვები თუ შეაშინა კურდღელმა და მელიამ, გიგოლი რატომ აღარ შეშინდა? იმიტომ, რომ მან კარგი სიზმარი, „დაცილილი სიზმარი“ ნახა; როცა ამ სიზმარს ნახავდა, უთუოდ მოკლავდა რასმე! თევდორამ და ქიტესამ წილი ჰყარეს, დათვი რომელს დაბეგვსო; წილი ქიტესას ერგო.

თევდორე ახლა თითქმის დარწმუნებულია, რომ, წილი თუკი არ ერგო, დათვი ვეღარ დაბეგვავს; ქიტესა კი გულნატყენია იმით, რომ წილმა ამას არგუნა დათვისაგან დაბეგვა.



ორ უკანასკნელ ამბავს იგავის ხასიათი აქვს. პატრონმა ვირი ამუშავა და, როცა ვირი დაბერდა და ღონე გამოელია, გააგდო ცივ ზამთარში. აღამიანმა ვირი არ შეიბრალა. მაგრამ პირუტყვებმა — ირმებმა შეიბრალეს და მოუარეს; საკმელი უშოვნეს და სიკვდილს გადაარჩინეს.

ყოველგვარ ზნეობრივ სწავლას ბავშვისათვის მხოლოდ მაშინ აქვს მნიშვნელობა, როცა ეს ზნეობრივი აზრი მოთხრობაში ძალდაუტანებლად არის გატარებული. როცა ზნეობრივი სწავლა ნაძალადევად არის მოთხრობაში ჩაყვრებული. როცა აშკარად ჩანს, რომ ავტორს ხელოვნურად შეუქმნია სხვადასხვა პირობები რაიმე ზნეობრივი აზრის განსამარტებლად, მაშინ ასეთი მოთხრობები მიზანს ვერ აღწევენ: ბავშვებისათვის მათ სარგებლობა ვერ მოაქვთ. „უძლური ვირში“ კი ზნეობრივი აზრი, როგორც მაგ. ყველა ცხოველისადმი სიბრალული. მათი სიყვარული, მათთვის ზრუნვა, მათი ხოცვის სისაჩაგლე, ბუნებრივად არის გატარებული და თვით მოთხრობის მსვლელობის შედეგია. ხოლო ვირის დახასიათებაში ავტორი შემცდარი: ყველა მეიგავეების ვირი უქულობისა და უზრდელობის წარმომადგენელია; ამგვარი შეხედულება მარტო მეიგავეების სენტენცია არ არის, მათი ფანტაზიის ნაყოფი როდია. — ხალხიც ისე უყურებს ვირს. როგორც უქყო, რევენ და უზრდელ პირუტყვს. ვაჟა-ფშაველას „უძლური ვირი“ კი ნამეტანი კვეიანი და ზრდილობიანია. ირემი ვირს საკმელს აწვდის, ვირი მადლიერია და ამავე დროს წუხს, მე დიდხანს ველარ ვიცოცხლებ მაინც და ვაითუ შენც (ირემს) საზრდო დაგაკლოო. პატრონმა მას ჭაფით სული გააძრო, სასიკვდილოდ არ დაზოგა და როცა ბედმა ვირსაც გაუღიმა და პატრონი მას კუდზე მოაბეს დასაგლეჯად. ვირის ზნეს კი არ მიბაძა და სამაგიერო კი არ გადაუხადა მტრებს. გადაარჩინა.

უკანასკნელ ამბავში გამაძლარი სვაგი კლდის თავზე ზის, თავის თავისქებაშია და ბულბულის კიცხვაში. რომლის ქებაც წინათ ყორანისაგან გაუგონია. აი, მოფრინდა ყორანი და ჩამოჭდა კლდეზე, სვავის შორიახლოს. სვავმა თხოვა: მიამბე, როგორ გალობდა ბულბულიო. და ყორანიც მოუყვა: ბულბული უგალობდა ყვავილებს, ტყეს. ანკარა წყალს, მზეს, ნიავს, სვავს და ყორნებს ჰკიცხავდაო. — მე რომ ეგ გამეგონა. მაშინვე შუაზე გავგლეჯდიო, მოუვიდა სვავს გული, — ისე ლამაზად ამბობდა, რომ დამიმონაო. უპასუხა ყორანმა. სვავმა გადაწყვიტა, მოესმინა ბულბულის გალობა, რომ დადამდა, ის და ყორანი ქალაში ჩაეშენენ. ბულბულის გალობამ სვავსაც კი გული დაუკოდა და თვალეები აუცრემლა. ახლა დარწმუნდა სვაგი, რომ რაც უნდა ამხილოს ბულბულმა, ვერაფერს ვერ გაუბედავს.

ასეთი პოეზიის შემდეგ სვავს და ყორანს, შუადღისას, ხევში. ლეშზე ვხედავთ! მთელი ამბავი ალეგორია არის. ავტორს უსათუოდ ბულბულის სახით პოეტი გამოჰყავს. ჩვენ უნდა დავუმატოთ. რომ თუშ-ცა სვავის გულმაც კი იგრძნო ბულბულის გალობის სიმშვენიერე, მარა რამდენსამე საათს შემდეგ ის ისევ ლეშს შეექცეოდა და მის ვულს ეს სრულიადაც არ ეზიზღებოდა. ბულბულის ტუბილმა ხმამ. ცალიერმა ესთეტიკამ სვავი ისევ სვავად დატოვა! შეიძლება. უფრო მეტის სიამოვნებით მოუჯდა ლეშს.

ვინც პოეტს ადარებს ბულბულს, რომელიც ვარდს, მზეს და მთვარეს უგალობს, ის პოეზიაში უმთავრესად ესთეტიკურ მხარეს ეძებს და აფასებს. შეიძლება ამის შესახებ უფრო შესაფერ ალაგას შეგვხვდეს მკითხველთან ლაპარაკი, მაგრამ ახლაც არ შეგვიძლია არ ვთქვათ, რომ დღეს ყოველი მწერლის მოვალეობა ქართველი მკითხველის წინაშე იმაში მდგომარეობს, რომ, თუ შეუძლია, სხვა უფრო საჭირო და დროის შესაფერი მიაწოდოს, ვიდრე ცალიერი ესთეტიკა. წარმოიდგინეთ, მკითხველო, რომ ზაფხულის მშვენიერ დღეს უსიერ მთაში გზა დაგებნათ. ღამე თუ მთაში დარჩით, საშიშია. ნუ-თუ თქვენ გზის ძებნას თავს დაანებებთ და გულს ასე დაიმშვიდებთ: „გულო, რად გინდა გზის პოვნა? შეხედე, შენ გარშემო რა დიად სურათს წარმოადგენს ბუნება: მთის დარაჯნი ამართულან და უხვ ფოთლებში მზის შუქს აკრთობენ; ჩიტები საამურათ ყლურტულევენ; ნაკადულები მოჩუხჩუხებენ და მდელითი შემოსილ ნაპირებს ესიყვარულებიან და სხვადასხვა“. რანაირი ესთეტიკოსიც უნდა იყოთ, დიადი ბუნების ლამაზი სურათები ვერ დაამშვიდებენ თქვენს გულს, სანამ გზას არ იპოვით. ჩვენი საზოგადოებაც დღეს გზა-დაბნეულია: ჩვენი ცხოვრების სასწორი ისტორიულმა აუცილებლობამ შეარყია და აატოკა; რა არის დროგადასული და მოსასპობი, რა არის დროის შესაფერი და ხელმოსაჭერი. არავინ იცის, — ყველა გამოურკვეველ მდგომარეობაშია; ასეთ დროს ხალხს ცხოვრების გათვალისწინება უნდა, ჭეშმარიტი გზის ჩვენება და ვაყას მოთხრობებიც ამ მიზანს ისახავდნ.

1899 წ.

## ზარზანდელი „ჯეჯილის“ კრიტიკოსი

ერთადერთი საყმაწვილო ჟურნალი გაგვაჩნია, რომელიც ცდილობს უპატრონოდ დაგდებულ ბავშვებს რაიმე დახმარება აღმოუჩინოს, მაგრამ ჩვენი შიმშილები აქაც იჩინენ თავის ნამდვილ მამობას და მზრუნველობას: ან არ იწერენ ჟურნალს, ან იწერენ სხვის დასანახად, ვითომდა ქართული საქმისათვის გული შეგვტკივა, თანაუგრძნობთ და ვენმარებიო. შეილებს კი არ აკითხებენ.

თუ ჩვენი ოჯახი „ჯეჯილს“ არ წყალობს, არც ჩვენი ჟურნალ-გაზეთობა აქცევს მას ყურადღებას; თვისა და თვის თავზე გამოაცხადებენ: ესა და ეს ნომერი გამოვიდა, შინაარსი შემდეგიაო, მორჩა და გათავდა!

არც ფილოსოფოსის ტვინია საჭირო, არც დიდი განათლება და განვითარება იმ უბრალო ჭეშმარიტების შესაგნებად, რომ, თუ ბავშვი რიგიან აღზრდას მოკლებულია, მისგან მხოლოდ უვარგისი წევრი გამოვა საზოგადოებისა; სარგებლობა კიდევ მადლობა ღმერთს, — ხშირად საზარალო და მავნებელი წევრი იქნება. როცა სხვაგან ბავშვის აღსაზრდელ საშუალებათა შორის საყმაწვილო ლიტერატურას უპირველესი ალაგი უჭირავს და მთელი საზოგადოება ადევნებს მას თვალყურს, ჩვენში ჟურნალ-გაზეთების მეთაურნიც კი დარწმუნებულნი არიან, რომ საყმაწვილო ლიტერატურა საჭირო არ არის. მოდი და სხვას რაღა უნდა მოვთხოვოთ!.. მაგრამ წარსულ წელს „ჯეჯილს“ როგორღაც ბედმა გაუღიმა: „ივერიამ“ მას ფელეტონები უძღვნა. ამ ფელეტონებში აქა-იქ გამოთქმული იყო სხვადასხვა აზრი ბავშვის აღზრდისა, და საყმაწვილო ლიტერატურის შესახებ: ჩვენ გვსურს, მკითხველის ყურადღება მივაქციოთ ამ აზრს და შეძლებისდაგვარად დაეხმარებოდეთ მათი ღირსება-ნაკლულევენება.

თუ ცოტაოდნად თვალი გიდევნებია, მკითხველო, ჩვენი ჟურნალისტიკისათვის, შენინშნავდი, რომ ჩვენ სხვადასხვა აზრების გამოთქმა გვიყვარს, საბუთების მოყვანა კი არა, რაც ჩვენი ლოგიკის სი-

ლატაკეს და განუვითარებლობას ამტკიცებს. ჩვენში უმეტესი ნაწილი თავის აზრს და შეხედულებას საკუთარ გემოვნებაზე ამყარებს: თქვენ კი არაფერს გაიმტკიცებენ, გიცხადებენ: აი ჩემი გემოვნება: როგორი არისო! — კარგი და პატიოსანი, რომ მაგისტანა გემოვნება: გქონიათ, ჩემთვის ეგ სრულიადაც არ გახლავთ საყურადღებო, ეუბნებით თქვენ. ჩემი გემოვნება შენთვისაც და ყველათვისაც სავალდებულო არისო, გეუბნებიან პასუხად. მოდი და ეშმაკი ნუ გაიცინებს!

ამის შემდეგ გასაოცარიც არ არის, რომ ბ. ბოცვაძის ფელეტონებში დამტკიცება ცოტა არის. საკუთარი გემოვნება კი ყოველ სტრიქონში გამოსჰვირს. ავტორი გიცხადებთ: ეს ლექსი კარგია, ეს მოთხრობა არ ვარგა ე. ი. მე ეს მომწონს, ეს არ მომწონს. ფელეტონები უფრო იმას მოწმენი არიან, რომ ავტორს წარსული წლის „ჯეჯილი“ წაუკითხავს. ახა, ღმერთო! განა ამისთვისაც მადლობა უნდა გადავუხადოთ? ზოგი მოსწონებია, ზოგი არა, მაგრამ მწერალმა რა ქნას: ყველას გემოვნებას რაობით დააკმაყოფილებს ჩვენს კურთხეულ საქართველოში. სადაც ერთსულსა და ერთხორცს ლუარსაბსა და დარეჯანსაც კი არა აქვთ ერთნაირი გემოვნება. ამას შემდეგ ბ. ბოცვაძე, როგორც გულუბრყვილო ესთეტიკოსი. გვეუბნება: რაც მე მომეწონა, ის კარგია, რაც არ მომეწონა, ის არ ვარგაო. ჩვენთვის სრულიადაც არ არის საყურადღებო, ესთეტიკოსია ბ. ბოცვაძე თუ არა, რა მოსწონს მას და რა არა. ჩვენთვის არის საყურადღებო, თუ რად მოსწონს კრიტიკოსს ესა თუ ის ნაწარმოები; რად უნდა მოეწონოს სხვასაც ის. რაც კრიტიკოსს მოსწონს? ამას კი ბ. ბოცვაძე არ გვეუბნება; ის დარწმუნებულია, რომ ესთეტიკოს კანონები უტყუარი და ზოგადია და ამიტომ ფიქრობს; მე ეს მომწონს, მაშ, კარგია: ვისაც ესთეტიკური ალლო აქვს, ყველას მოეწონებაო. რას დავებებ. ვის როგორი გემოვნება აქვს, ან თქვენ რას დავებებ, როგორი ალლო მაქვს? მომიყვანეთ თქვენი აზრის ლოგიკური საბუთები და. ესთეტიკოსს სულ რომ არაფერი მომცნებოდეს. მაინც იძულებული ვიქნები დაგეთანხმოთ. რომ არ დამწამო, მკითხველო. ვითომ მეც საკუთარ გემოვნებაზე ვამყარებდე ჩემს მსჯელობას. მივმართავ ბ. ბოცვაძის ფელეტონებს და ვეცდები საბუთები მოგიყვანო.

ბატონი ბოცვაძე სასტიკი მორალისტია: ლიტერატურაში უზნეობის აღნიშვნა ძალიან ეჯავრება. თქვენ შეიძლება ციდან მოვლენილი ანგელოზი იყოს და გინდოდეთ, ქვეყანა სამოთხე იყოს, საცა ზნეობა და სიყვარული მეფობდეს ყველას სულსა და გულში; ამგვარი თვისება, რასაკვირველია, საქებია, მაგრამ თქვენ რაც უნდა გასურდეთ, ქვეყანაზე უზნეობაც ყოფილა, ბოროტებაც არის და კიდევ იქნება.

ლიტერატურა კი სარკვეა ცხოვრებისა; ის ხატავს და ვალდებულებს არის ხატოს ის, რაც ნამდვილად არსებობს, რეცეპტებს კი არ უწერს ცხოვრებას.

ამიტომ, თუ ნახეთ რომელიმე უზნეო პირი მოთხრობაში. მომწონხარ, არ მომწონხარ-ის ძახილი სულ მეტია და უმნიშვნელო; ავტორს იმიტომ კი არ გამოუყვანია ესა თუ ის პირი, რომ მოგწონებოდათ, არა, მას ამგვარი მიზანი არ ჰქონია და, თუ ჰქონდა, ძალიან ნაკლები ღირსების ავტორი ყოფილა; მან შეამჩნია ამგვარი პირები ცხოვრებაში და თავისი დაკვირვება თქვენც გაგიზიარათ; თქვენ კი ცხოვრებას უნდა ჩაუკვირდეთ, გასინჯოთ, რამდენად მართალია ავტორი და გამოიკვლიოთ ის მიზეზები და პირობები, რომლებმაც ავტორის მიერ გამოყვანილი პირი დაბადეს. მას უზნეო, ან ზნეობრივი საქციელი ჩაადენინეს. ვინ არ იცის, რომ ჩვენებური მედუქნეები მყიდველს ატყუებენ; ხშირად დამპალ საქონელს აპარებენ? „ჩეჯილის“ პირველი ნომრის ერთ მოთხრობებში ორიოდ სიტყვა არის ამის შესახებ ნათქვამი. მოთხრობა რომ ეკ. გაბაშვილის კალამს არ ეკუთვნოდეს. ბოცვაძე ერთ ალიაქოთს ატეხდა: გაგვირყვნის ბავშვებს ამისთანა საზიზღარი მოთხრობებიო; მაგრამ ახლა მარტო ამ ერთ ალაგს წუნობს და თან დასძენს: „მართალია, ბავშვები ცხოვრებაში ამაზე უარეს უზნეო სცენებსაც ჰხედავენ, მაგრამ კრიტიკულის თვალთ გარჩევა რომელისამე საქციელისა ბავშვს არ შეუძლია. ამიტომ გონიერმა აღმზრდელმა ამისთანა სცენებს უნდა აარილოს ბავშვი. ბავშვებისათვის საკითხავი მოთხრობებიც მოკლებული უნდა იყოს უზნეო სცენებს, ბავშვს უნდა უჩვენო რაც კარგია, და მოარიდო ყველაფერს, რასაც კი შეუძლია ზნეობრივად ცუდად იმოქმედოს“. როგორც ხედავ, მკითხველო, ბ. ბოცვაძე გამოთქვამს აქ თავის აზრს ბავშვის აღზრდისა და საბავშვო ლიტერატურის შესახებ: კრიტიკული თვალთ გარჩევა რომელისამე საქციელისა ბავშვს არ შეუძლია. ამიტომ მარტო კარგი უჩვენეთ ხოლმეო ე. ი. ბავშვი ატყუეთ, ქვეყნიერება სამოთხედ დაუსახეთო. ერთ მეფეს მეტად მასინჯი ქალი ჰყავდა. ქალს რომ თავის სახე ვერ დაენახა, მთელ სახელმწიფოში. მეფის ბრძანებით. სარკეები მოსპეს, მაგრამ როცა იქნა. მეფის ქალმა მაინც გაიგო თავისი სიმახინჯე: ტბაში დაინახა თავისი სახე: ქვეყანაზე იმდენი უზნეობა და უსამართლობა არსებობს, რომ, რაც უნდა ეცადოთ, ბავშვს ვერ დაუმალავთ. ჩვენ კი გვგონია. რომ მით უმეტეს უნდა დაანახოთ ბავშვს კარგიც და ავიც. ზნეობრივიც, უზნეოც და მიუფთხოვით მათ განსხვავებაზე; ამით თქვენ აალორძინებთ მის ბუნებაში კრიტიკის ნიქს, აღზრდის ერთი უმთავრესი მოვალეობათაგანი კი ის უნდა იყოს, რომ ბავშვს კრიტიკული აზროვნე-

ბა განუვითაროს. კარგიც გააცნოს, გლახაც, კრიტიკულად ააწონ-  
დააწონიოს, ცალმხრიობას ააცილოს და მარტო მის რწმენაზე და  
გრძნობაზე არ იმოქმედოს. იწყებს თუ არა ბავშვი აზროვნებას, მას  
უნდა გააცნოთ ქვეყნიერება, ადამიანი, ის ქვეყნიერება და ადამიანი  
კი არა, რომლებიც თქვენს სურვილშია გამოხატული, არამედ ის,  
რომლებიც ნამდვილად არსებობენ. ამისთვის კი საჭიროა კრიტიკა:  
უკრიტიკოდ ამა თუ იმ მოვლენის აწონ-დაწონა შეუძლებელია. თუ  
თქვენ გააცანით ბავშვს ცხოვრების მარტო კარგი მხარე. ცუდს რომ  
თვითონ შეხვდება, როგორ შეხედავს მას ბავშვი, როგორ დააფა-  
სებს? თუ თქვენ ცხოვრება სამოთხედ დაუსახეთ და ადამიანი ანგე-  
ლოზად, თვითონ რომ წინააღმდეგს დაინახავს, როგორი იქნება მისი  
სულიერი მდგომარეობა, მისი შინაგანი ჰარმონია? ცხოვრების ცალ-  
მხრივი გაცნობა და სულიერი ჰარმონია ერთად შეუძლებელია. ბავ-  
შვი ხომ ყოველთვის დიდის ობექტის ქვეშ არ დარჩება? როცა იქნება,  
ისიც გახდება დიდი, დამოუკიდებელი ადამიანი. ერთი მიბრძანეთ,  
მაშინ რა სარგებლობას მოუტანს მას თქვენი ცალმხრივი აღზრდა.  
კარგის გაცნობა და ცუდის დამალვა? თქვენ თავიდანვე უნდა მოამ-  
ზადოთ ბავშვი ამ დამოუკიდებლობისათვის, თავიდანვე უნდა მოამ-  
ზადოთ ის საზრიანი ცხოვრებისათვის; ამისათვის კი საჭიროა, გააც-  
ნოთ მას მთელი ცხოვრება, როგორც მისი კარგი მხარე, აგრეთვე  
ცუდიც. ბ. ბოცვაძე გვეუბნება: უზნეოს ისეც ბევრს ხედავს ბავშვი  
ცხოვრებაში, აღმზრდელმა კი უნდა აარიდოსო. ერთი მიბრძანეთ,  
რა მნიშვნელობა ექნება აღმზრდელის ამგვარ მოქმედებას, თუ  
ცხოვრება მას ეწინააღმდეგება? სწორედ მაშინ გაირყვნება ბავშვი,  
როდესაც ის ცხოვრებაში ბევრ ცუდს ხედავს, აღმზრდელი კი ამ ცუ-  
დის ნამდვილ ღირსებას და მნიშვნელობას არ უხსნის. აქედან ნურა-  
ვინ ნუ გამოიყვანს იმ დასკვნას, ვითომც ჩვენ ვჭადაგებდეთ: ბავშვს  
ყოველგვარი ცუდი და უზნეო მოვლენა, საქციელი გააცანიოთ. ყო-  
ველისფერში თანდათანობა არსებობს; ეს თანდათანობა არც აღზრ-  
დაში უნდა იყოს დავიწყებული; ყოველი წლოვანების ბავშვს უნდა  
ბიაწოდოთ ის, რასაც მოითხოვს მისი ბუნებრივი განვითარება. რვა  
წლის ყმაწვილს ჩვენ არ დავუწყებთ ისეთ მოვლენებზე ლაპარაკს.  
რომლის შესახებაც ზნეობრივად ვალდებული ვართ, თხუთმეტ-თექ-  
ვსმეტი წლის ყმაწვილს ქეშმარიტი შეხედულება მივცეთ და ამით  
კარგ გზაზე დავაყენოთ. როგორც საზოგადოდ, ხელოვნურ ლიტერა-  
ტურას, ისე საბავშვო ლიტერატურასაც უპირველესად ნამდვილი  
ცხოვრების ქეშმარიტად ხატვა უნდა მოვთხოვოთ. ის უნდა გვიჩვე-  
ნებდეს ადამიანის ყოველგვარ თვისებას, ზნეობასაც, უზნეობასაც,  
ბოროტებასაც, სიკეთესაც: მხოლოდ ყოველგვარი მათგანი ღირსეუ-



მიანია. რომელიც მხოლოდ ზიზლს გამოიწვევსო. „ყოველი წერაკითხვის მცოდნე რამდენიმე საათის განმავლობაში მთელ კრებულს გამოაცხობს ამისთანა მოთხრობებისასო“, დასძენს თავის ზიზლს ბ. ბოცვაძე. ბ. ბოცვაძემ წერაკითხვა იცის; მაშ, რამდენიმე საათის განმავლობაში მას შეუძლია, მთელი კრებული გამოაცხოს ამისთანა მოთხრობების. — მერე რა ეუყოთ, არ ევარგებაო! — გვიპასუხებს ბოცვაძე. ვთქვათ, არ ევარგება; მაგრამ, ვინც რამდენიმე საათში უხეირო მოთხრობების მთელ კრებულს გამოაცხობს, ის ერთი თვის განმავლობაში ერთ ხეირიან მოთხრობას უსათუოდ დაწერს; „ჯეჯილი“ კი თვეში ერთხელ გამოდის, მასალაც არ ექარბება მაინცდამაინც. ჩვენ გვგონია, რედაქცია დიდ მადლობას გადაუხდოდა ბოცვაძეს, რომ თვეში ერთი მოთხრობა მიეწვდინა ხოლმე „ჯეჯილისათვის“, მით უმეტეს, რომ ეს მისთვის არავითარ საქმეს არ უნდა შეადგენდეს, როგორც მისი სიტყვები ამტკიცებს. მაგრამ დავანებოთ ამას თავი და მივმართოთ ბოცვაძის აზრს საყმაწვილო მოთხრობების შესახებ. ბ. ბოცვაძე სამართლიანად აღნიშნავს იმ ფაქტს. რომ „ბავშვები უფრო ხალისიანად კითხულობენ იმ ადვილგასაგებ მოთხრობებს, რომლებშიაც დიდებია გამოყვანილი“. ამის მიზეზად ბოცვაძეს ორი გარემოება მიაჩნია: 1) ბავშვის ცხოვრება ღარიბია ფაქტებით, დიდის კი არა; 2) დიდს უფრო სრული და დამთავრებული ხასიათი აქვს, ვიდრე ბავშვს. ჩვენ გვგონია, რომ მიზეზი მხოლოდ პირველი გარემოება არის: ბავშვები თუ გატაცებით კითხულობენ მაინ-რად, კუპერს, ეულ-ვერნს და სხვ., იმიტომ კი არა, რომ გმირები დიდი კაცები არიან და დამთავრებული ხასიათი აქვთ. არამედ იმიტომ. რომ ამ ავტორების რომანები სავსეა ისეთი ფაქტებით. შემთხვევებით და გმირების თავგადასავალით, რომლებიც ბავშვის ფანტაზიას მეტად ხიბლავს და იტაცებს. მიეცით ბავშვს ისეთი მოთხრობა, რომელშიაც პატარები მოქმედებენ. მაგრამ საყურადღებო ფაქტები ბევრია; მაშინ დაინახავთ, რომ ასეთ მოთხრობებს არანაკლები ყურადღებით წაიკითხავენ ბავშვები. დღეს თუ ვხედავთ, რომ ბავშვები უფრო ხალისიანად კითხულობენ ისეთ მოთხრობებს, სადაც დიდები არიან გამოყვანილი. იმიტომ, რომ ძალიან ცოტა გვაქვს ისეთი მოთხრობები, რომლებშიაც მხოლოდ პატარები მოქმედებენ და ამავე დროს საყურადღებო ფაქტებიც ბევრი იყოს. ჩვენი აზრით. პატარა ყმაწვილებისათვის ათ-თორმეტ წლამდე იმდენად საჭირო არ არის გმირის სრული დახასიათება, რამდენადაც ცოცხლად დაწერილი მოთხრობა, რომელიც ბავშვს წაახალისებს. იკითხავთ; რა სარგებლობას მოუტანს ბავშვს ასეთი მოთხრობაო? — ის არ გარდაქმნის ათი წლის ბავშვს ფილოსოფოსად, არ გადააქცევს



მას ხორცშესხმულ ზნეობად; სამაგიეროდ, შეაყვარებს მას კითხვას, განუვითარებს აზროვნებას, ფანტაზიას, — ყოველივე ეს კი პატარა ბავშვისათვის მეტად საჭიროა: სანამ ბავშვს ლიტერატურით აღზრდიდეთ, მას უნდა შეაყვაროთ კითხვა და წაკითხულის შეგნებას და წარმოდგენას მიაჩვიოთ. ახლა მივმართოთ ბოცვაძის მიერ გაღანილ მოთხრობას „რა გვიყო ჭიაკოკონამ?“ შაქრო და ნიკო აპირებენ ჭიაკოკონის დანთებას. ჭერ მენახშირესთან მიდიან თივის მოსაპარად, მაგრამ მენახშირე გაუგებს და ცემით გამოისტუმრებს ორივეს. შემდეგ მიადგებიან ჩალით სავსე კასრს, მაგრამ კასრი დაუგორდებათ და წყალში ჩაყრის პატარა გმირებს. მიუხედავად ბევრი სხვა დაბრკოლებისა, შაქრო და ნიკო მაინც არ იტეხენ გულს და მიზანს მიაღწევენ: ეზოში ჭიაკოკონას დაანთებენ. მოთხრობა დიდი ნიჭითა და ხელოვნებით არ არის დაწერილი, ზოგ ნაკლულევანებას შეიცავს, მაგრამ არც უხამსი და უმსგავსია: ბავშვი დიდი ყურადღებით წაიკითხავს მას ბოლომდის, რადგანაც მოთხრობა ცოცხლად არის დაწერილი, ბავშვების ცელქობა-თავგადასავალია შიგ. მოთხრობა ნამდვილად არის ამოღებული ცხოვრებიდან: ვინ არ ყოფილა პატარაობისას ცელქი? ვის არ მოხვედრია ამ ცელქობისათვის? შეიძლება, ბოცვაძე დააძინა ამ მოთხრობამ, ბავშვს კი არ დააძინებს ისეთი მოთხრობა, რომელშიაც მათი საკუთარი თავგადასავალია აღწერილი. გარდა ამისა, ზნეობრივი აზრიც კარგი აქვს ამ მოთხრობას: მიუხედავად მრავალი დაბრკოლებისა, ბავშვებმა მიზანს მიაღწიეს. ამგვარი მაგალითებით შეგიძლიათ ჩააგონოთ ბავშვი, რომ ის დაბრკოლებას არ უნდა შეუშინდეს, ხოლო მიზანი ყოველთვის კეთილი უნდა იქონიოს და მისკენ მიისწრაფვოდეს. მაგრამ დედააზრი თუ ავტორის მიერვე არ არის ლექსის ამ მოთხრობის ბოლოში გამოთქმული, ბ. ბოცვაძე მის ახსნას არ დაგიდევთ.



შესანიშნავი ადამიანების ბიოგრაფიაში ბოცვაძე ყველაზე მეტ მნიშვნელობას ბავშვებისათვის იმგვარ ცნობებს აძლევს, რომლებიც გვატყობინებენ შესანიშნავი ადამიანის ბეჭითობას, გულკეთილობას და სხვ.

„პატარა მკითხველებმა ამ მხრივ უნდა გამოიჩინონ მიმბაძველობა“. ბევრნაირი აზრი არსებობს შესანიშნავი პირების ბიოგრაფიის მნიშვნელობის შესახებ. ბ. ბოცვაძეს ვეთანხმებით, რომ ბავშვებში მიმბაძველობის ინსტინქტი ძლიერია, სხვადასხვა მისაბაძავი მაგალითები ბიოგრაფიებში პატარა მკითხველზე გავლენას იქონიებენ; მაგრამ იმდენს კი არა, როგორც ბოცვაძეს ჰქონია. თუ ბავშვი ცუდმა

აღზრდამ და მემკვიდრეობამ გააზარმაცა, ათასი უჩიჩინო: პატარა კოლუმბი, პატარა გარიბალდი ბეჭითი იყვნენო, ამით მას ვერ გააბეჯითებთ. ამგვარ მაგალითებს შეუძლია სარგებლობის მოტანა მხოლოდ მაშინ, როცა რიგიანი აღზრდა და მემკვიდრეობა მას ხელს უწყობს. თუ უკანასკნელი პირობები დაცული არ არის, მაშინ ამგვარ ბიოგრაფიულ ცნობებს არავითარი მნიშვნელობა არ ექნებათ. როცა უმთავრესი ყურადღება აღზრდას ექნება მიქცეული, მაშინ მისაბაძი მაგალითებიც ჰპოვებენ ნიადაგს ბავშვის ბუნებაში. ბიოგრაფიის უმთავრესი მნიშვნელობა არც ამაშია. ბიოგრაფიების დახმარებით აღმზრდელმა უნდა ჩაუნერგოს ბავშვს ის აზრი, რომ ადამიანის ღირსებისათვის მარტო სმა-ჭამა და ძილი კი არ არის საჭირო, არამედ შრომა თავისთვის და სხვისთვის. გარდა ამისა, ყოველი გონებაგახსნილი ადამიანი ზნეობრივად ვალდებულია იცნობდეს იმ პირებს, რომლებმაც შესამჩნევი სარგებლობა მოუტანეს კაცობრიობას; ამგვარი შრომა კი შესაფერისია ბავშვის გონებისათვის. დასასრულს, როდესაც ბავშვი რომელიმე შესანიშნავი პირის ბიოგრაფიას კითხულობს, უსათუოდ შეიძენს ცოტაოდენ ცოდნას ისტორიიდან, ან მეცნიერებიდან. მაგალითად: როცა ბავშვი კითხულობს კოპერნიკის ბიოგრაფიას, ის გაიგებს, რომ დედამიწა მზის გარშემო ტრიალებს; გლადსტონის ბიოგრაფიიდან გაიცნობს ინგლისსა და მის ცხოვრებას და სხვ. ბიოგრაფია წაახალისებს ყმაწვილს და ამგვარი ცოდნის შეძენას გაუადვილებს; ეს კი ფრიად სასარგებლოა.

ბ. ბოცვაძე გაკვრით ეხება ფიზიოლოგიურ წერილებსაც. პირველ წერილში კითხულობს: ყოველგვარი სიცოცხლის უკანასკნელი მიზეზი ჩვენ დედამიწაზე არის მზეო; არ მოსწონს და ამბობს: „ვთქვათ, ეგ ყველა კარგია, მაგრამ ფრიად განყენებულად არის ნათქვამი, თითქოს დაჯერების მეტი არაფერია საჭიროო“. ეს „ვთქვათ“, აი, რას ნიშნავს, მკითხველო, ტყუილია. ვითომ ყოველგვარი სიცოცხლის უკანასკნელი მიზეზი დედამიწაზე მზე იყოს, მაგრამ, მართალიც რომ იყოს, განყენებულად არის ნათქვამიო. რომ ბ. ბოცვაძე ამ აზრის არის, ამას ქვემოთაც დავინახავთ. თუ ყოველი სამეცნიერო წერილის მხოლოდ თავსა და ბოლოს წაიკითხავთ, ბ. ბოცვაძე, რასაკვირველია, დასკვნა ყოველთვის განყენებულად მოგეჩვენებათ. თორემ მთელი პირველი წერილი მხოლოდ ამ აზრის დამტკიცებაა. მეტი არაფერი. იქ აწერილია, რომ ცხოველებს უმცენარეოდ სიცოცხლე არ შეუძლიათ, მცენარეებს უმზეოდ; აქედან ყველასათვის ცხადია, რომ უმზეოდ დედამიწის ზურგზე სიცოცხლე წარმოუდგენელია. ბ. ბოცვაძემ მზიდან დაიწყო და შემდეგ ერთბაშად შემოგვაჩვენა: სიცოცხლე რთული საგანია; ჩემი თუ არ გჯერათ, აი, ავტორი-

ტეტიო. ავტორიტეტის სიტყვებს იმოწმებს ბოცვაძე და გვიმტკიცებს: აი, სიცოცხლე რა რთული მოვლენა ყოფილა: შენი ფიქრით კი. მისი მიზეზი მზე არისო! აბა კრიტიკაც ამას ჰქვია! ერთი მიბრძანეთ. ბ. ბოცვაძე, რისთვის ან ვისთვის დაგჭირდათ იმის მტკიცება, რომ სიცოცხლე რთული მოვლენაა: ამის წინააღმდეგი რა ნახეთ პირველ ფიზიოლოგიურ წერილში? თქვე დალოცვილო. „ივერია“ კიდევ მოგიცდიდათ და ჯერ თქვენ თვითონ რომ გაგეგოთ, რასაც კითხულობთ. არ არჩევდით, საკუთარ რიტორიკაში გზა აღარ დაგებნეოდათ. როგორც ზემოთ დავინახეთ. ბოცვაძეს არ სჯერა, რომ დედამიწის ზურგზე სიცოცხლის საბოლოო მიზეზი მზე არის, მაგრამ თავისი ურწმუნოება პირდაპირ ვერ აღიარა; ვაითუ სიცრუე გამოდგესო. გადაჩხრიკა ლეგროკლერკი და ამოიკითხა: სიცოცხლე რთული მოვლენა არისო და გაგვისწორა შეცდომა. ცოტა რომ დაფიქრებულყო ბ. ბოცვაძე, ლეგროკლერკის შეწუხება აღარ დაჰკირდებოდა, ჩვენც მის ლოგიკაში და ელემენტალური სამეცნიერო ჰეშმარტების ცოდნაში ეჭვი არ შეგვეპარებოდა.

ბოცვაძემ ლეგროკლერკის ავტორიტეტით შეგვაშინა, მაგრამ ტყუილა გაისარჯა და ავტორიტეტის სიტყვებიც ვერ გაიგო. ავტორიტეტს ჩვენც გამოვჩხრეკდით როგორმე. შეიძლება უკეთესსაც, ვიდრე ბოცვაძე, რომელსაც ყოველი პროფესორი ავტორიტეტი ჰგონია, მაგრამ ზემოთმოყვანილი აზრი, რომლის ჰეშმარტებაში ბოცვაძეს ეჭვი შეჰპარვია. იმდენად ცხადია ყველასათვის, რომ მისი მტკიცება და ავტორიტეტების შეწუხება სწორედ სამარცხვინოდ მიგვაჩნია.

როდესაც ბ. ბოცვაძე ლექსებსა და მოთხრობებს არჩევს, უმთავრეს ყურადღებას გრამატიკას აქცევს, დანარჩენის დასაფასებლად კი ცხონებული სუმაროკოვის კლასიფიკაციით ხელმძღვანელობს. სხვადასხვა პოეტურ ნაწარმოებებს სუმაროკოვი რამდენსამე რიგად ჰყოფდა: ერთს უწოდებდა მშვენიერს, მეორეს ფრიად კარგს, მესამეს კარგს და ბოლო რიგში ათავსებდა ისეთ თხზულებებს, რომელთა შესახებაც სათქმელი არაფერი მაქვსო. ბოცვაძეც ასე ირჩება: ზოგს უწოდებს ძალიან კარგს, ზოგს „რიგიანია“, „არა უშავს რა“ და სხვ. თუმცა ბ. ბოცვაძე პირდაპირ არ გვიცხადებს, მაგრამ „ჯეჯილის“ VII და VIII ნომრის გარჩევა გვიმტკიცებს, რომ თარგმანებს ის ძალიან ნაკლებ მნიშვნელობას აძლევს. რატომ? იმიტომ, რომ თარგმანებში ქართული ბუნება და ქართული სახელეები არ არის! ნუთუ რობინზონს, ანდერსენის ზღაპრებს და სხვ. ქართველი ბავშვებისათვის არავითარი მნიშვნელობა არ ექნება? ნუთუ ასე ძნელი ასახსნელია ბავშვებისათვის, რომ უცხოელები სხვანაირ

სახელებს ხმარობენ, ვიდრე ჩვენ? ამის მიხედვით ბოცვაძე კიცხავს „პატარა პუმის თავგადასავალს“; რადგანაც იქ სულ უცხო სახელებია, გარდა მარინესი. ვინც ეს მოთხრობა დაწერა, რომ სცოდნოდა ქართველი კრიტიკოსის ახირებული ხასიათი, უსათუოდ ქართულ სახელებსაც დაარქმევდა თავის გმირებს! კიდევ მადლობა ღმერთს, რომ ერთს მაინც დაარქვეა მარინე; მაგრამ ავტორს გასამართლებელი საბუთი აქვს. ის უსათუოდ ფიქრობდა: ქართველ პედაგოგებში არ იქნება ისეთი ლაყუთავიანი, რომ ყმაწვილებს ვერ აუხსნას, პუმი და ფრიმანი ადამიანებს ჰქვია, თუ კატებსო. ბოცვაძის სიტყვებით, ამ მოთხრობაში არც ერთი რიგიანი ტიპი არ არის გამოყვანილი. ეტყობა, მას მოთხრობა მხოლოდ გადაუთვალეირებია, თორემ დარწმუნდებოდა, რომ პუმი ნამდვილი ტიპია და მოთხრობის ერთი უმთავრესი ღირსება იმაში მდგომარეობს, რომ პუმი საუცხოოდ არის დახასიათებული: ყოველი მისი სიტყვა, ყოველი მოძრაობა ახასიათებს ექვსი წლის ბავშვებს. მეორე ღირსება მოთხრობისა მისი ცოცხალი ენა და აღწერილობაა; მარტო ეს საკმარისია, რომ ის ბავშვებისათვის შესაფერ მოთხრობად ვიცნოთ. თუ ეს უკანასკნელი ღირსება ქართულად ნაკლებად არის დაცული, ეს მთარგმნელის ბრალია და არა ავტორის. მოთხრობა ფრანგულიდან არის თარგმნილი და ასე ცოცხალ მოთხრობას საყმაწვილო ლიტერატურაში იშვიათად შეხვდებით. ქართული თარგმანის მიხედვით, მისი გაკიცხვა მოუფიქრებელ საქციელად მიგვაჩნია: ვინც დედანს თარგმანით აფასებს, მას ძალიან დიდი სიფრთხილე მართებს.

ბოდიშს ვიხდით მკითხველის წინაშე, რომ სიტყვა გაგვიგრძელდა, მაგრამ სანამ დავაბოლოებდეთ, საჭიროდ მიგვაჩნია, მკითხველს ჩვენი აზრი გავუზიაროთ საყმაწვილო ჟურნალის შინაარსის შესახებ. სხვა ქვეყნებში, სადაც მკითხველი ბევრია, შესაძლებელია და საჭიროც არის რამდენიმე საყმაწვილო ჟურნალის არსებობა: ზოგი უფრო პატარა ბავშვებისათვის არის დანიშნული, ზოგი უფრო მოზრდილი ყმაწვილებისათვის და სხვ. ჩვენში კი ჯერჯერობით ერთმა საყმაწვილო ჟურნალმაც თუ იხეირა. ესეც დიდი ამბავია. ამიტომ ჩვენი საყმაწვილო ჟურნალი იძულებულია, ყველა წლივანების ბავშვი დააკმაყოფილოს რვა წლიდან მოკიდებული თოთხმეტ წლამდე. რა მიზანს უნდა მისდევდეს საყმაწვილო ჟურნალი? მან ხელი უნდა შეუწყოს ბავშვების აღზრდას და განათლებას; ამიტომ შინაარსიც მიზნის შესაფერისი უნდა ჰქონდეს. ბავშვის აღზრდაში ძალიან დიდი მნიშვნელობა აქვს შთაგონებას და მიმბაძველობას; ხოლო ჩვენ აქ ჰიპნოტური შთაგონება არა გვაქვს სახეში. გიუ-

იოს და ვუნდტის განმარტებით, შთაგონება არის ისეთი რწმენის გადაცემა, რომლის მოტივებიც ჩვენგან დაფარულია და რომელიც განხორციელებისაკენ მიისწრაფვის. ცნობილია, რომ მიმბაძველობა ბავშვის ბუნებაში ძალიან არის განვითარებული; ის ცდილობს ყოველი მაგალითის წაბაძვას; ყოველგვარი რწმენა იმორჩილებს მას, მით უმეტეს რომ მოტივების გამორკვევა და აწონდაწონა ბავშვს არ შეუძლია; ყოველ ამგვარ რწმენას ბავშვისათვის შთაგონების ხასიათი ექნება, მაგრამ ეს შთაგონება უბრალო დარიგებაში, ან დასჯაში არ უნდა იხატებოდეს. საყმაწვილო ლიტერატურა არის მძლავრი საშუალება, რომელიც შთაგონებით მოქმედებს ბავშვზე; შთაგონებას კი შედეგად მოსდევს მიმბაძველობა. საყმაწვილო ჟურნალში შთაგონება ხელოვნურ ფორმაში უნდა იყოს ჩამოსხმული; მისი შინაარსიც სამ ნაწილად უნდა იყოს დაყოფილი: მოთხრობები, ლექსები, იგავები და ზღაპრები. ამ ნაწილს შეუძლია, შთაგონებით იმოქმედოს ბავშვზე და მის აღზრდას ხელი შეუწყოს.

პირველი ნაწილის ყოველი ნაწარმოები მარტივად და ადვილ-გასაგებად უნდა უხატავდეს ბავშვს ისეთ მაგალითებს, რომლებსაც მან ან უნდა წაბაძოს, ან არა, ჩვენ საჭიროდ მიგვაჩნია, რომ საყმაწვილო მოთხრობები მცირეოდნად ტენდენციური იყოს; ხოლო ტენდენცია ისე არ გვესმის, ვითომ ავტორმა თვითონ უნდა შეთხზას ის, რაც ცხოვრებაში შეუძლებელია. ყოველი მოთხრობა, რომელიც ისეთ სურათს ხატავს, რაც ცხოვრებაში ხდება, მაგრამ იშვიათად,—ტიპს არ შეადგენს, ტენდენციის ელემენტებს შეიცავს უსათუოდ. რვა წლის ყმაწვილს სანამ ლიტერატურით აღზრდიდეთ, ჯერ კითხვა უნდა შეაყვაროთ, განყენებულ აზროვნებას შეაჩვიოთ. ამიტომ საყმაწვილო ჟურნალმა ადგილი უნდა დაუთმოს ისეთ მოთხრობებსაც, რომლების უმთავრესი ღირსება ცოცხალი ენა და საზაღისო სურათებია. მოთხრობას შეუძლია მეცნიერული ცოდნაც შესძინოს ბავშვს; ამის მაგალითს გვიჩვენებს ვაჟა-ფშაველას ზოგიერთი საყმაწვილო მოთხრობა.

მეორე ნაწილი საყმაწვილო ჟურნალისა უხდა შეიცავდეს: ისტორიას, ეთნოგრაფიას, მოგზაურობას და ბიოგრაფიას. ამ ნაწილს ექნება ორგვარი მნიშვნელობა: ერთი მხრით, უჩვენებს ბავშვს წასაბაძ ან გასაკიცხ მაგალითებს, მეორე მხრით, სხვადასხვა საჭირო და ელემენტარულ ცოდნას შესძენს:

მესამე ნაწილი დათმობილი უნდა ჰქონდეს ბუნებისმეტყველებას: ბოტანიკას, ზოოლოგიას, ფიზიოლოგიას, ასტრონომიას, მარტივ ფიზიკურ კანონებს და გეოლოგიას. მესამე ნაწილის მნიშვნელობა

მხოლოდ ის იქნება, რომ ბავშვს სხვადასხვა ელემენტარული ცოდნა შესძინოს. საყმაწვილო ჟურნალი უნდა აძლევდეს ბავშვს ქეშმარიტ ცოდნას, მასში არ უნდა ჰქონდეს ადგილი დათმობილი არაფერს, რაც მართო რწმენაზე არის დამყარებული. კრიტიკას და სკეპტიციზმს ბავშვის ბუნებაში კი არ უნდა ვახშობდეთ, არამედ უნდა ვავითარებდეთ...

ქალების ემანსიპაციის საშინელი მტრებიც კი აღიარებენ, ბავშვის აღზრდა და პირველდაწყებითი განათლება ქალს უფრო შეუძლია, ვიდრე მამაკაცსო. საუკეთესო ასპარეზს ამ მხრივ ჩვენი ქალებისათვის საყმაწვილო ჟურნალი უნდა წარმოადგენდეს. „ჭეჯილში“ კი ქალები ძალიან მცირე მონაწილეობას იღებდნენ აქამდის. რას უნდა მივაწეროთ ეს გარემოება? ერთი მხრით, სიზარმაცეს, მეორე მხრით, იმ გარემოებას, რომ საყმაწვილო ჟურნალის სარგებლობა შეგნებული არა გვაქვს. რასაკვირველია, კარგი მოთხრობებისა და ლექსების დაწერას საამისო ნიჭი უნდა, რომლის უქონლობისათვის ვერავის ვერ გავკიცხავთ, მაგრამ დანარჩენი მასალის მიწოდებისათვის მხოლოდ სურვილი. საქმის სიყვარული და სარგებლობის შეგნებაა საჭირო. ანდერსენის ზღაპრების გადმოთარგმნა არც ერთი ქალისათვის არ შეადგენს საძნელო საქმეს, რომელიც კი რუსულში გავარჯიშებულა. მოგზაურობის, ეთნოგრაფიული წერილების გადმოთარგმნას, კომპილაციურად მოკლე ბიოგრაფიების, ასტრონომიული, ზოოლოგიური და სხვ. წერილების შედგენას ყოველი ქალი შესძლებს, რომელსაც საშუალო სასწავლებელი დაუმთავრებია. ამგვარი შრომა ჩვენში ბევრ ქალს შეუძლია და, თუ შრომის სურვილი ძალიან ცოტას აქვს, მგონი, საყვედურის მეტი არავის გემართებს. ჩვენი საზოგადოებრივი ცხოვრება დღესდღეობით იმგვარ პირობებშია, რომ ყველასაგან უანგარო შრომას მოითხოვს, და, ვის სინდისსაც ხავსი არ მოჰკიდებია, ზნეობრივად ვალდებულია, ამ უანგარო შრომაში მონაწილეობა მიიღოს.

## ქართული სიტყვაკაზმული ლიტერატურა 1898 წელს

ბუნებისა და სიცოცხლის საიდუმლოება უძველესი დროიდან იქცევდა ადამიანის ყურადღებას, მრავალი წლის ფიქრისა და კვლევის შემდეგ ფილოსოფოსთა შორის თანდათან დამყარდა ის აზრი, რომ არსებობს მატერია და სული; მატერია სულის მორჩილია, ჩვენი ფსიქიური მოქმედება შედეგია სულისა და არა მატერიისაო. ზოგიერთი იმასაც კი ქადაგებდა, ნამეტურ, სასულიერო პირებიდან, რომ მხოლოდ სული არსებობს და მატერია კი მისი ქერქი არისო. აქა-იქ თითო-ოროლა პირს თუ შეეპარებოდა ეჭვი ასეთი დუალიზმის შესახებ; თავისი აზრის ხმამაღლა გამოცხადება ხშირად ძნელდებოდა, რადგანაც სამართალი და ძალა სამღვდლოების ხელში იყო... თანდათან განვითარდა ბუნებისმეტყველება; მატერიის თვისება და კანონები, რომლებსაც ის ემორჩილება, უფრო და უფრო გამოირკვა; ყველა ამან კი იდეალურ შეხედულებას ნელ-ნელა ძირი გამოუთხარა. ეს დავა ჭერაც არ გათავებულა და, ვინ იცის, როდის გათავდება; ხოლო მეცნიერთა უმეტესობამ უარყო დუალიზმი და აღიარა მონიზმი ე. ი. მხოლოდ მატერიის არსებობა. ისინი ამბობენ: მთელი ჩვენი ფსიქიური მოქმედება შედეგია მატერიის და სხვა არაფრისო. ჩვენში მატერიას გარდა არ არსებობს არაფერი, რასაც დამოუკიდებლად, თავისთავად განვითარება შეეძლო; ფიქრობს და აზროვნებს თავის ტვინი, მასალას კი თავის ტვინს გარეშე ცხოვრება აძლევსო. ამიტომ. კერძო პირისა და მთელი ხალხის ფსიქოლოგიაც რომელიმე ხანაში შედეგი უნდა იყოს ცხოვრების პირობების და, რადგანაც ცხოვრება თანდათან ვითარდება. იცვლება და წინ მიდის ხალხის ფსიქოლოგიაც უსათუოდ უნდა იცვლებოდეს. ყოველი ადამიანის იდეა ნაყოფია ცხოვრების; ამიტომაც არის, რომ სხვადასხვა დროს სულ სხვადასხვას შესტრფოდა ადამიანი. გენიოსიც ისეთივე ნაყოფია ცხოვრების. როგორც უბრალო მოკვდავი; ვოლტერი, კენე, მონტესკიე. დალამბერი, ჰოლბახი და სხვ., მეთვრამეტე საუკუნის მოღვაწენი. პიროვნების განთავისუფლების და ავტორიტეტის უარყოფისათვის იბრძოდნენ. ისინი რომ ორი საუკუნით ადრე დაბა-

დებულებიყვნენ, ექვს გარეშეა, მაშინ ყველა ავტორიტეტის მომხრე იქნებოდა. ამგვარად. თუ ადამიანის ფსიქიკა ნაყოფია ცხოვრების. ლიტერატურაც. როგორც მწერლის, და ხშირად. მთელი ხალხის ფიქრი. გრძნობა და სურვილი, იმავე ცხოვრების ნაყოფი უნდა იყოს. შეისწავლეთ ლიტერატურა და მით გაითვალისწინებთ ხალხის ფსიქოლოგიას და მის ცხოვრებას; შეისწავლეთ ცხოვრება და შეუმცდარად იტყვიეთ. რანაირი უნდა ყოფილიყო ასეთ ცხოვრებაში ხალხის ფსიქოლოგია და მისი ლიტერატურა. მე მსურს, თვალი გადავავლო ჩვენი წარსული წლის ლიტერატურას და დავანახო მკითხველს: რას გვეუბნებოდა წარსული წლის სახელოვნო ლიტერატურა ჩვენი ცხოვრების შესახებ. რას გრძნობდა და ფიქრობდა მწერალი და ხალხი. რომელსაც მწერალი გვიხატავდა და რა დაგვიტოვა სასიცოცხლო შარშანდელმა ლიტერატურამ...

თავდაპირველად, აზრად გვქონდა, მწერლები დაგვეყო იმისდა მიხედვით, თუ რას გვიხატავდნენ და როგორ გვიხატავდნენ, მაგრამ რადგანაც თითქმის ყველა ერთსა და იმავეს კითხულობს ჩვენ ცხოვრებაში. ამიტომ ამგვარი დაყოფა საჭირო არ არის. ცალკ-ცალკე გადავათვალიერებთ ჩვენს ურნალ-გაზეთობას და ვეცდებით გამოვარკვიოთ ის, რაც თავში მკითხველს აღუთქვით. დავიწყოთ „ივერიიდან“. „ივერიის“ ფურცლებზე წარსული წლის განმავლობაში ყველაზე უფრო ნაყოფიერი ბელეტრისტი ე. მ.-შვილი<sup>1</sup> იყო. ჯერ დაიბეჭდა მისი სურათი „ვისი ბრალია?“ ბ. შ. არაგვისპირელს ჩვენ მწერლობაში ძალიან ბევრი მიმბაძველი გამოუჩნდა; ხოლო ეს მიბაძვა ჯერჯერობით სათაურს არ გაცილებია. ე. მ.-შვილს სურათი აღებულება მეთამბაქოების ცხოვრებიდან. ჩვენ პირდაპირ აღვნიშნავდით, თუ რად მიიქცია ამ სურათმა ჩვენი ყურადღება, მაგრამ რადგანაც მკითხველს შეიძლება დავიწყებული ჰქონდეს, ამიტომ შინაარსის გადმოცემა აუცილებლად მიგვაჩნია. მეთამბაქოე კიყო გაიძვერაობით. გაუტანლობით. მოტყუებით და სხვა ხერხებით გადიდრდა და ყველა მეთამბაქოე ხელში ჰყავს ჩაჭერილი; მის გვერდით ცხოვრობს მისი შორეული ნათესავი თომა. ღარიბი მეთამბაქოე. კიკოს ეზოს გაფართოება უნდა და ამიტომ ყოველ ღონეს ხმარობს. რომ თომა არეკოს როგორმე. მაგრამ ვერაფერს ხდება. თომას ჰყავს და. რომელსაც ცოლად თხოულობს მეთამბაქოე სოსიკო, მაგრამ თომა უარს ეუბნება: „შენისთანა ლაწირაკს დას არ მივათხოვებო“. სოსიკას თავმოყვარეობა შელახულია; ის ცდილობს, თომას რითიმე გადაუხადოს სამაგიერო. და მალე შემთხვევასაც ხელს უწყობს. სო-

<sup>1</sup> ეგნატე მენთეშაშვილი.



ფელში გაიგეს, ქალაქში ნასწავლ ხალხს მოუნდომებია, ჩარჩებისა-  
გან დაგვიხსნას და საწყობი დაგვიარსოსო. სოფელში უნდა მომხდა-  
რიყო ყრილობა, ამოერჩიათ კაცები და ქალაქს გაეგზავნათ თავისი  
გაპირებული მდგომარეობის შესატყობინებლად. თომამ ყრილო-  
ბის ამბავი კიკოს არ გააგებინა, რადგანაც სოფლელები დაარწმუნა:  
კიკო საქმეს ჩაგვიშლისო. სოსიკამ ისარგებლა ამ შემთხვევით და  
კიკოსთან თომა დაასმინა. გაბრაზებულმა კიკომ გასწია ქალაქისაკენ.  
მოიყვანა სომეხი ვაჭარი და მთელი სოფლის თამბაქო აყიდვინა, თო-  
მას თამბაქოს გარდა. თომას ცალკე შოვალეები აწუხებენ, ცალკე  
ქორწილი ეჩქარებოდა, რადგანაც წელიწადია, დანიშნული იყო; ფუ-  
ლი კი არ ჰქონდა. წაიღო ქალაქს თუთუნი, მაგრამ ვერც იქ გაყიდა;  
გაბრაზებულმა გამოსწია სოფლისაკენ და კიკო მოკლა. ავტორი არ  
გვიხასიათებს სრულიად არც თომას, არც სოსიკას; ყველაზე უკეთ  
ისევე კიკოა დახასიათებული. მოთხრობა წარმოადგენს ჩვენი ცხოვრე-  
ბის დამახასიათებელ სურათს; ავტორმა შენიშნა ეს სურათი და, თუმ-  
ცა რელიეფურად ვერ დაგვიხატა, მაგრამ დაახლოებითი წარმოდგენა  
მიანიც მოგვცა იმის შესახებ, თუ რა ხდება ჩვენი ხალხის ცხოვრება-  
ში. ჩვენი სახელოვნო ლიტერატურა, რომელიც ნამდვილ ცხოვრე-  
ბას გვიხატავს, საკმარისად გვიმტკიცებს, რომ ჩვენი ცხოვრება იშ-  
ლებია, ირღვევა. ის დამოკიდებულება, რომელიც სუფევდა სხვა-  
დასხვა წოდებას შუა, ისპობა და წოდებებიც თავის სახეს კარგავენ.  
ამღვრელი ცხოვრების მორევში ნელ-ნელა იშლებიან. ამ მხრივ  
ჩვენმა მწერლებმა შრომა გაინაწილეს და სხვადასხვა წოდებას ჩაუკ-  
ვირდნენ. რამდენადაც მახსოვს, ჯერ გიორგი წერეთელმა დაგვანახ-  
ვა, რომ, აზნაურობის ცხოვრება იშლებია; მალე ნინოშვილმა საუც-  
ხოოდ დაგვიხატა, თუ რამდენად გამოეცალა ჩვენი გლეხობის და  
აზნაურობის ძველ ცხოვრებას ნიადაგი; ლალიონმა გაგვაცნო, რა  
ტიპები დაბადა ახალმა ცხოვრებამ; ახლა ბ. დ. კლდიაშვილი და ან.  
ერისთავი საუცხოოდ გვიმტკიცებენ თავდააზნაურობის ცხოვრების  
შერყევას და „მოლიბულ გზაზე“ დაქანებას. ამასთან, ჩვენი ლიტე-  
რატურა გვიმტკიცებს, რომ ჩვენი ცხოვრება ირღვევა ისე, როგორც  
ირღვეოდა დასავლეთ ევროპაში მეთვრამეტე საუკუნის გასულს და  
მეცხრამეტის დასაწყისს.

ჩვენი ძველი ცხოვრების ნანგრევებზე თანდათან შენდება ისე-  
თი სოციალური ცხოვრება, როგორიც არის დასავლეთ ევროპაში.  
რამ შეცვალა ევროპის ცხოვრება? კაპიტალისტურმა წარმოებამ. რა  
ცვლის დღეს ჩვენ ცხოვრებას? აშკარაა, იგივე პროცესი. კარგია ეს  
მოვლენა თუ ცუდი? ამას ჩვენი ლიტერატურა არ გვეუბნება: ის  
მხოლოდ ხატავს მას, რაც დღეს ჩვენს ცხოვრებაში ხდება. ე. მ. —

შვილას „ვისი ბრალია?“ მოწამეა ასეთი პროცესისა ჩვენს ცხოვრებაში. კიკოსთანა პირებს ჩვენი ძველი ცხოვრება არ იცნობდა. ის ნაყოფია ამ პროცესის, რომელმაც ძველ წყობილებას ბრძოლა გამოუცხადა და კიკოს პირით დამარცხება უწინასწარმეტყველა. კიკო იყო ერთი ღარიბი გლეხი ამ თორმეტი წლის წინათ. დღიურად სხვას ემსახურებოდა და ამით ირჩენდა თავს. კიკო ხედავდა, რომ ცხოვრება მისი იყო, ვისაც ფული ჰქონდა, და ამიტომ ფულის შეძენის სურვილი მასაც დიდი ჰქონდა; მაგრამ რა ექნა. რაობით შეეძინა ფული? საცოლო ბიჭი იყო, შეეძლო მზითვიანი ქალი შეერთო და ამით შეეძინა ფული, მაგრამ კარგ ქალსაც და მზითვესაც მას არავეინ მიცემდა: ან კარგი ქალი და უმზითვო, ან მზითვეი და უზეირო ქალი! რომელს ირჩევს კიკო? კიკოს თავდაპირველად ფული უნდა და, სადაც ფული იქნება, მისი სურვილიც იქით გადაძლევს. ამიტომ რა-ნაირი ქალიც უნდა ყოფილიყო, შეირთავდა, ოღონდ მზითვეი კი ჰქონოდა. ოცდათხუთმეტი წლის ქალი რომ ოცდაოთხი წლის ვაჟს შეაძლიოთ ჩვენი სოფლის ხალხში, დიდ გალანძღვად მიიღებს; კიკომ კი შეირთო მზითვის გულისათვის ოცდათხუთმეტი წლის ტასო ამ დღიდან დაიწყო საკუთრად თამბაქოს თესვა; ვაჭრებსა და ხალხს შუა შუამავლობას მოკიდა ხელი; ქრთამს იღებდა და ოთხი-ხუთი წლის განმავლობაში ქისაც გაეზარდა, თვითონაც გასუქდა, დაინათლია ვაჭარი გეურქა, და ამის შემდეგ სოფლის სრული ბატონი გახდა. აიშენა საუცხოო სახლი და მდიდრულად მოაწყო; უჩაიოდ ახლა ვეღარ ძლებს, შავ მალღადაკრული ქურჭი წამოისხა. სოფლელების თამბაქოს კიკო და მისი ნათლია ყიდულობდნენ სულ იაფად და თვითონ ერთიორად ყიდიან. სოფლელები ყოველსავე ამას ხედავენ, მაგრამ ბოლმას გულში იკლავენ მამ, რა ქნან? მათ ფული ჰქირდებათ, ნახევარი მათგანი კიკოს ფულით აკეთებს თამბაქოს; იციან, რომ გაჭირვების დროს ისევ კიკოს უნდა მიმართონ. სხვას სული არავეს უდგას, რომ მათ ხელი მოუმართოს და ამიტომ იძულებული არიან კიკოს ტკბილი სიტყვის მეტი არაფერი გააგონონ. სოსია თითქოს გამბედავი გლეხია სოფელში, მაგრამ ისიც კი ვერას უბედავს კიკოს, რადგანაც იცის. რომ ტყვილა თავს დაიდუბავს და კიკოს ვერას დააკლებს. ამგვარად, სოფლელებმა იციან, რომ კიკო ატყავებს მათ, მაგრამ მაინც მისი მორჩილი უნდა იყვნენ. რადგანაც უიმისოდ ცხოვრება არ შეუძლიათ. ცხოვრება ისე მოეწყო, რომ კიკო აუცილებელ საჭიროებას შეადგენს სოფლისათვის; თუმცა ყველა დარწმუნებულია, რომ კიკო მათ ღუპავს, მაგრამ ამავე დროს კიკოს იქით გზა არა აქვთ. კიკო ჰირს შეადგენს, მაგრამ ისეთ ჰირს. რომელიც აუცილებელია, საჭიროა. მოთხრობაში საყურადღებო ის

არის, რომ თუმცა კიკო ქართველი გლეხია, გეურქა კი სომეხი. მაგრამ საერთო ინტერესებმა ორივე შეაერთა. სოფელში რომ ყოფილიყვნენ სომეხი მეთამბაქოები, უეჭველია, თავის სისხლს გეურქას არ მიემხრობოდნენ, არამედ დანარჩენ ქართველებთან გაიყოფდნენ ზედსა და უბედურებას, ავტორმა თვით ცხოვრებაში დაგვანახვა, რომ ქართველებს და სომეხებს შორის თუ მტრობაა, ეს მტრობა ეკონომიურ ნიადაგზე აღმოცენდა და აუცილებელიც არის, სანამ მიზეზი იქნება; მოსპეთ მიზეზი, მტრობაც თავისთავად მოისპობა. მაგრამ ცხოვრება ამ მიზეზს კი არ სპობს, უფრო აძლიერებს. დღეს თვით ჩვენს ხალხში ჩნდებიან გეურქასთანა პირები და მიუხედავად თავისი ქართველობისა, გეურქებზე უკეთესად ფცქვნიან ხალხს და თავს აძულებენ მას.

•

მწერლობაში ჩვეულებად არის გადაქცეული ახალწელიწადს და აღდგომა დღეს დღეის შესაფერი მოკლე ამბების დაწერა. ერთი ასეთი სააღდგომო სურათი იყო „ივერიაში“ ი. ო-სი „ქრისტე აღსდგა, დედა!“ სამი თვეა, დედა ავად არის; აღდგომის დამეს მამა თავისი პატარა ქალებით ელოგიაზე წავიდა; როცა ეკლესიიდან დაბრუნდნენ, პატარა ქალი გაექანება დედის ოთახისაკენ და წითელი კვერცხით აღდგომას ულოცავს; მაგრამ დედა მკვდარია. სურათი მეტად გრძნობიერად არის დაწერილი, განსაკუთრებით, პატარა ბავშვების ბუნება, მათი ცელქობა და საუბარი ისეთი სინამდვილით და ცოცხლად არის დახატული, რომ ავტორს ნიჭი ეტყობა. ამ წელს რომ უფრო თამამად მოკიდებდეს კალამს ხელს და თან ცხოვრებას ჩაუყვირდებოდეს. უეჭველია, ჩვენ ლიტერატურას სარგებლობას მოუტანს.

„ივერიაში“ ვკითხულობთ შემდეგ ე. მ-შვილის ვრცელ მოთხრობას „ღმერთმა მისცეს მაგიერი“. ღარიბ გლეხს, გლახას, ქალი ჰყავს გასათხოვარი — კეკო, რომელსაც ქარუმა უყვარს. რადგანაც ქალი სიყვარულით იტანჯება, დედმამას უნდა გაათხოვოს, მაგრამ ფული არა აქვს. გლახას ძეძვიანი ადგილი ჰქონდა მოშორებით; იფიქრა, იმას მაინც გაეყიდო და წავიდა დასათვალიერებლად. მაგრამ მამული მის მდიდარ ძმას მიხას შემოეღობა. გლახა მივიდა მიხასთან და წაეჩხუბა. მიხამ იშოვა ცრუ მოწმეები და გლახა დააპატიმრებინა; ქარუმას მშობლებს შეუჩნდა და სხვა რძალი აშოვნია. კეკო ჭავრმა მოჰკლა. აი, მოკლე შინაარსი. მოთხრობა კარგია ხელოვნების მხრივ. მაგრამ გაცილებით უკეთესი, როგორც ჩვენი ცხოვრების ტიპური სურათი. რასაკვირველია, მოთხრობისათვის ყოველგვარი თემა გამოდგება. ხოლო როდესაც ავტორი იღებს ისეთ სიუჟეტს. რომელიც

ცხოვრების ტიპიურ მოვლენას შეადგენს, ეს მის ნიჭს და ღრმა დაკვირვებას ამტკიცებს. თავდაპირველად მოთხრობისაგან ვითხოვთ ჩვენი ცხოვრების გადმოშლას. რა მხრივაც უნდა იყოს. მაგრამ ამავე დროს ის ხელოვნების ნიმუშსაც უნდა წარმოადგენდეს და არა ავტორის რეზონირობას. როდესაც მეორე პირობა დაცული არ არის. მაშინ მოთხრობა თავისი მიზანს ვერ აღწევს. ხელოვნება იმაში მდგომარეობს, როდესაც ავტორი ნახულს ისე ხატავს, რომ ცხოველ და დამთავრებულ წარმოდგენას მოგცემსთ. და მის მიერ დახატული სურათი სინამდვილეს წააგავს. როდესაც მწერალი ისე ხატავს. როგორც ის ნამდვილად არ არსებობს, მაშინ მკითხველს უსათუოდ ექვი ებადება: შეიძლება ავტორის მიერ დახატული სურათი სრულეზბით გამოგონილი იყოს, ან სულ სხვა სახით არსებობდეს ცხოვრებაშიო. ე. მ.-შილს ხელოვნების მხრივ ზოგიერთი ნაკლი ვერ აუცდენია; ჩვენ ჯერ ამ ნაკლოვანებას დავასახელებთ, შემდეგ ვიტყვიო. რა მხრივ არის ეს მოთხრობა შესანიშნავი. მართალია, გლეხის ქალის გათხოვება დღეს იმრიგად აღარ წარმოებს. როგორც წინათ. როცა ქალმა ჯვრისწერის დღესაც არ იცოდა, მისი საქმრო ვინ იყო. მაგრამ გლეხის ქალი დღესაც მშობლების მორჩილია და ამიტომ მის გათხოვებაში სიყვარულს ნაკლები მნიშვნელობა აქვს. წინათ თუ გლეხი დედ-მამა ქალს არაფერს ჰკითხავდენ საქმროს შესახებ. დღეს ეუბნებიან: აი, შვილო, ესა და ეს კაცი გვეძლევა. მოგვწონს და შენც იფიქრეო. თუ მშობლებმა გულით მოინდომეს რომელიმე ყმაწვილი სიძედ, ქალს რომ ძალიანაც უყვარდეს სხვა, ის მაინც მშობლებს ემორჩილება. გაუთხოვარი ქალის სიყვარულს გლეხი ჯერ ექვის თვალთ უყურებს; ის ფიქრობს; გათხოვდება. კიდევ შეუყვარდება: მანამდე სიყვარული რას მიქვიაო. ქალი იმ აზრშია აღზრდილი. რომ მისი გათხოვება მშობლების ნებაა, იცის. რომ. შეიძლება სულ სხვას მისცენ. ვიდრე იმას, ვინც უყვარს. ურიგდება ამ გარემოებას და თავის სიყვარულსაც ძვირად თუ ვისმე გაუმელავენებს, ისიც ამხანაგს და არა მშობლებს. მისმა საყვარელმა პირმა სხვა რომ შეირთოს, ის იწუხებს, რასაკვირველია. მაგრამ ჯავრს რომ გადაჰყვეს, ეს შეუძლებელია: მისი ფიქრით, ეს ასეც უნდა მომხდარიყო, მან ჯერ არ იცის, რომ მისი გათხოვება სრული მისი ნებაა და არა მშობლების კეკო ავტორის სუსტად ჰყავს დახასიათებული; ჩვენ მას გამბედავ და ენერგიულ ქალად სრულიად ვერ ვიცნობთ. ვერ ვხედავთ მასში ისეთ არსებას, რომელსაც შეუძლია, თავისი საწადელი ბოლომდე შეასრულოს. რაც უნდა დაუჭდეს; ამიტომ ვერც იმას დავიჯერებთ, რომ მას შეეძლოს, მშობლებს მოუყვეს: მე ქარუმა მიყვარს, და, თუ იმას არ მიმათხოვეთ, სიცოცხლეს არ მიინდაო. წარმოიდგინეთ. ის

იმდენად აღარ მალავს თავის სიყვარულს, რომ მთელმა სოფელმაც კი იცის. მომავალში კეკო იზამს მას, რაც ახლა ავტორმა დასწამა. დღევანდელ კეკოს კი ამგვარი საქციელისათვის გამბედაობა, ხასიათის სიმტკიცე და თვით ცნობიერება არ შეწევს: ის ნელა-ნელა თავისუფლდება ძველი რწმენებისაგან, ეს რწმენები ახლა ირყევა, მათ დამხობამდე ჯერ კიდევ შორს არის; ის ბედავს სიყვარულს და ამით პროტესტს უცხადებს მშობლების სრულ უფლებას თავის გათხოვებაში; ხოლო სად თავდება ამ მხრივ მშობლების უფლებები და სად იწყება მისი, ეს ჯერ მან არ იცის და ამიტომ თავის სიყვარულსაც ვერ გამოამყვანებს. კეკოს სიკვდილი ხომ სრულიად ნაძალადევაა: ეკოსთანა კი არა. იმაზე უკეთესი ქალები სიყვარულით არ კვდებიან; ბევრს იჯავრებენ, შეიძლება, ძალით თავი მოიკლან, მაგრამ ეს ხომ ბუნებრივი სიკვდილი არ არის: ზოგიერთ მწერალს წარმოდგენილი აქვს სიყვარულის სევდასაც თავისი ბაცილები აქვსო, რომლებიც აღამიანს არ გადაარჩენენ, თუკი ხელში ჩაიგდესო

ახლა ღირსებას შევვხვით. როგორც პირველ სურათში, ამ მოთხრობაშიც ე. მ. -შვილმა დაგვიხატა, თუ როგორ იცვლება ძველ ნიადაგზე აშენებული სოფელი და მისი კუთვნილება — გლეხი. მდიდარი მიხა და ღარიბი გლახა, რომელსაც სხვის მოჯამაგირეობაში ზღვება სული, ძმები არიან. გლახას დახასიათებას ჩვენ არ გამოვუდგებთ: ის ერთი ღარიბი გლეხია, რომელსაც ყოველი მკითხველი იცნობს. ღარიბულ წნულში ცხოვრობს, ნახევარჯერ მშვიერია: თავისი მოსავალი ზამთრობამდე არ ყოფნის; თუ ვალს იღებს, თუ დღიურ მუშაობაში წლებზე ფეხს იღვამს, თუ მოჯამაგირეობს და ამით იცდენს თავიდან შიმშილით სიკვდილს. მიხა კი მდიდარი გლეხია, მშვენიერი სახლი აქვს, ფართო ეზოთი შემოფარგლული; დილა-საღამოს ჩაი და სოფლის მოხელეების მეგობრობა! ერთ ღროს მიხაც ღარიბი გლეხი იყო. მან იცოდა, რომ დღეს ფულია ბატონი და მისმა მთელმა მეცადინეობამ, ფიქრმა, სურვილმა, მოსაზრებამ, ნატვრამ — ამ ერთ ფოკუსში მოიყარა თავი. ოღონდ ფული კი შეეძინა და ყოველგვარ საძაგელ საქმეს ჩაიდენდა. მიხას თვით ცხოვრებამ მოუწყო ხელი. თორემ კიდან ზომ არ ჩამოვარდნილა: ისიც გლეხი იყო, როგორც ყველა სხვა! როდესაც გლახას გაეყო, ქვითკირის სახლი მას დაუტოვა და სართათ ათი თუმანი აიღო; ეს ფული ავალა, აბარტყა; შემდეგ გამართა სავაჭრო დუქანი; თანდათან გამოიქნა ვაჭრობაში. ინსტინქტურად შეისწავლა. როგორც უნდა ატყაო ხალხი. რომ „ზაკონთანაც“ პირნათლად გამოხვიდე და ჯიბეც გაივსო. „უპატენტოთ“ არაყს ყიდდა, ყალბ ვექსილებს ადგენდა; ხელის მოწერა ოთხ-ხუთნაირად იცოდა, რომ შემთხვევის ღროს თავის ნაწერზე

უარი ეთქვა. სოფელში მიხას დიდი გავლენა ჰქონდა. სოფლის მოხელეები მისი ყურმოჭრილი ყმები იყვნენ: რადგანაც მას ჯიბე ფულით ჰქონდა გატენილი, ბელელი—სულადით, მარანი ღვინით. ღარიბ სოფელს ფულიანი კაცი ყოველთვის ჰქირდებოდა; მოხელეები ყველაფერს უსრულებდნენ, რადგან მისგან ჰქრთამს გამოელოდნენ. გლახასთან შედარებით მიხა უზნეო და საძაგელ კაცად გვეჩვენება, მაგრამ, გარემოებას რომ ჩაუკვირდეთ, მიხას ბევრ ბრალს ვერ დავდებთ. ცხოვრება რომ შეიცვალა და ფული გაბატონდა, ეს ახლა ყველა გლახამ იცის. ამ მოთხრობაში ქალებიც კი გაიძახიან, უწინდელი დრო აღარ არისო. თუ ავადმყოფობა გახშირდა და ღმერთიც მოსავალს აღარ იძლევა, ამასაც კი ღვთის შეცვლას აბრალებენ: ფულის გემო გლახამ მიხაზე ნაკლებ არ იცის; გარემოებას რომ ხელი მოეწყო და ფული ეგდო ჯიბეში, მიხაზე ნაკლები უზნეო და უსინდისო არც ის იქნებოდა; მიხა და გლახა კი არ არიან აქ დამნაშავე, არამედ თვით ცხოვრება. ცხოვრებამ ფული გაბატონა, მისი შეძენის სურვილი ყველას ძლიერი აქვს; მიხას გლახაზე მეტი თადარიგიანობა და გამჭრიახობა დაჰყვა, გარემოებამაც ხელი მოუწყო. გამდიდრდა და ახლა ის მთელი სოფლის ცხოვრების დარღვევას ხელს უწყობს. გლახა თანდათან ღარიბდება, მამული მას ოთხი თვის სარჩოსაც არ აძლევს, ნახევარჯერ დღიურ მუშად დგას. ვაჭირვება ამ ორ კვალ მიწასაც გააყიდვინებს და მაშინ ხომ სრული მონა გახდება მიხასთანა პირების. ცხოვრება ყოფს ჩვენს ხალხს ორ ნაწილად: ერთს ფულს აძლევს, მეორეს თავის მკლავის ამარა ტოვებს; ადამიანი იმდენად გაუმადლარია, რომ მიხამ რაც უნდა შეიძინოს, მაინც იმას ეცდება გლახას რასმე გამოჩინოს. გლახა ითმენს, სანამ შეიძლებს. როცა ვეღარ შეიძლებს, მაშინ რაღას იზამს? როცა ჩვენი ცხოვრება იმდენად განვითარდება, მაშინ იგივე ცხოვრება გამოახავს გლახას ხსნის გზას. გლახამ მხოლოდ იმდენი უნარი უნდა გამოიჩინოს. რომ ეს გზა დაინახოს, მისი მნიშვნელობა შეიგნოს და მაგრად დაადგას ზედ ფეხი. გლახა ასეც მოიქცევა: ამის საუკეთესო თავდები მისი სიღარიბეა.

ყურადღების ღირსია ბ. გრ. ცენტერაძის „დესპინე და ნიკო“. რომლის უმთავრესი საგანი სიყვარულია. ვინ არის სიყვარულის წინააღმდეგ? სიყვარული ადამიანის ბუნების აუცილებელ საჭიროებას შეადგენს, მაგრამ რუსთველიც მართალია, როცა ამბობს: ოდეს ტურფა გაიფლდეს, აღარ ღირდეს არცა ჩირადო. იმდენი მოთხრობა და რომანი დაწერილა და იწერება მხოლოდ სიყვარულის შინაარსით, რომ მკითხველს თავი აქვს მობეზრებული. ამგვარი მოთხრობა-რომანებისათვის სწორედ ახალი სერვანტესია საჭირო, რომ ამ რუ-

ტინას შეუბრალებელი სატირით ბოლო მოუღოს. ქართველ მწერალს, რომელიც მოთხრობის საგნად სიყვარულს ირჩევს, მხოლოდ იმ შემთხვევაში გავამართლებ, როცა ამ სიყვარულს მარტო სიყვარულისათვის კი არ ხატავს; არამედ საარგებლობს იმით, რომ ცხოვრებაში ჩაგვახედოს; ან ამ სიყვარულს ისეთ პირობებში აყენებს, რომლებიც ახალი ცხოვრების ნაყოფი არიან. „დესპინე და ნიკო“ აღებულია გურიის ცხოვრებიდან. აზნაურის ქალს, დესპინეს, უყვარს გლეხი ნიკო. როცა დესპინეს მამა არ თანხმდება და ხნიერი აზნაური მოყავს სიძედ, დესპინე თავს იკლავს. ამ სიყვარულმა ჩვენი ყურადღება იმიტომ მიიქცია, რომ, ერთი მხრით, აზნაურის ქალია, მეორე მხრით, გლეხი ნიკო. ამგვარი სიყვარული ამ ოციოდე წლის წინათ ჩვენში შეუძლებელი იყო; დღესაც შესაძლებელია მხოლოდ დასავლეთ იმერეთში, რომელმაც ცხოვრების გზაზე დანარჩენ საქართველოს გაუსწრო. ზემო იმერეთში, ქართლში, კახეთში აზნაურის ქალმა რომ უბრალო სოფლის გლეხი შეიყვაროს და მისი ცოლობა მოინდომოს, შეუძლებელია. ამ კუთხეში ჯერ ამდენად არ გათავისუფლებულან ძველი რწმუნებისაგან ჩვენი აზნაურის ქალები. ნიკო შუამავალსაც კი უგზავნის დესპინეს მამას, ქაიხოსროს; ამ შუამავალსა და ქაიხოსროს ლაპარაკი ძალიან საყურადღებოა. ერთ დროს მდიდარი აზნაური ქაიხოსრო დღეს გაღარიბებულა; თავადებში დაეთრევა, რომ კუჭი გამოიძღოს. მაგრამ ამპარტავენობა მაინც ვერ მოუშორებია. ნიკოს ის ვერაფრით ვერ წუნობს; მხოლოდ ეს აფიქრებს: აზნაურმა ყაზახს როგორ მივცე ქალიო. შუამავალი დათია გლეხკაცია; ჯერ კიდევ სწამს, რომ აზნაურობა მაინც სხვაა, ვიდრე გლეხობა; მაგრამ ამავე დროს თამამად ამბობს: თავი და ბოლო საქმე კაცია. თუ კაცი ვარგა, ყველაფერს ჯობიაო. მან იცის, რომ „ახლა ძველი დროი არ არის“. თავადობამ და აზნაურობამ თავისი დრო და ჟამი მოკვამა და ახლა ნელ-ნელა იბარგება. ვინც მე არ დამაფასებს, არც მე დავაფასებ, გინდა თავადი იყოს, გინდა აზნაურიო, ამბობს დათია. ქაიხოსრო, როგორც ძველი დროის მოტრფიალე, დარწმუნებულია, რომ ქალის გათხოვება დედ-მამის ნებაა, ვისაც უნდა. იმას მისცემს, ასეც ირჩება და თავისი ქალის სიყვარულს ყურადღებას არ აქცევს. დათიაც ასე ფიქრობდა წინათ, ის არ კითხავდა თავის ქალს, მითხარი, ვინ გიყვარს, რომ მიგათხოვო; დღეს კი ის ცხოვრებამ დაარწმუნა, რომ „უპირველესი საქმეა, ქალსაც და კაცსაც თუ ერთმანეთი მოწონს და უნდა“. დათია აღვილად ითვისებს ცხოვრებისაგან წამოყენებულ პროგრესულ აზრებს, ის წარსულს არ ეპოტინება, რადგანაც წარსულში მას ბევრი არაფერი დარჩენია; ქაიხოსროს კი წარსული ურჩევნია აწმყოს. არა

ერთხელ მოიგონებს ხოლმე ხვნემით წარსულ დროს. მის თვალში წარსული ჯობია აწმყოს და ამიტომ დაობებულ რწმენებსაც ვერ ტოვებს. დესპინეს ჯერ სავსებით ვერ შეუგნია თავისი უფლება: ხედავს, რომ მამას შეუძლია თავისი ნებით გაათხოოს ქალი, მაგრამ ამავე დროს სწამს, რომ მის სიყვარულსაც მნიშვნელობა აქვს; ის აცხადებს, მე ნიკო მიყვარს და სხვას არ წაყვებობო, მაგრამ ამავე დროს გრძნობს, რომ მამის უფლება ძლიერია. ის ჯერ ვერ დარწმუნებულა, რომ მისი გათხოვება სრული მისი ნებაა და ამიტომ მტკიცე პროტესტიც ვერ გამოუცხადებია მამისათვის: მას უნდა, მამას დაემორჩილოს, თავის უფლებაც დაიცვას, მაგრამ როდესაც ორი მოპირდაპირე უფლების შეთანხმება შეუძლებელი ხდება, დესპინე თავს იკლავს და ამით გვიმტკიცებს. რომ მისი უფლების შებღალვა მამის უსამართლობად მიაჩნია. ჩვენ სიხარულით ვეგებებით გურული ქალის ასეთ გათავისუფლებას და თავის უფლებათა შეგნებას; ხოლო მოთხრობაში ერთი გარემოება გვაკვირვებს: რად მოიკლა დესპინემ თავი, როდესაც მას გაქცევა შეეძლო? თავის მოკვლა უკანასკნელი საშუალება არის, შეიძლება ეს აუცილებელი იყო, მაგრამ ავტორმა არ დაგვანახვა, თუ დესპინეს ამის მეტი გზა აღარ დარჩენოდა. დესპინემ ერთხელ პაემანი დაუნიშნა ნიკოს და ღამით ინახულა; ჩვენ გვგონია, ასეთი ვაბედული ქალი კიდევ დაუნიშნავდა ნიკოს პაემანს და შეეცდებოდა გაქცეულიყო, სანამ უკანასკნელ საშუალებას მიმართავდა. მაგრამ მაშინ აღარც დესპინე მოკვდებოდა. აღარც ნიკო გადაირეოდა; ჩვენი მწერლები კი დარწმუნებული არიან. მოთხრობა უსათუოდ უბედურებით უნდა დაბოლოვდესო. თუ თვით მოქმედების განვითარება ითხოვს უბედურ ბოლოს, მაშინ ასეთი დაბოლოება საჭიროც არის, როგორც მიზეზების აუცილებელი შედეგი; მაგრამ თუ მოქმედების განვითარება არ ითხოვს ისეთ ბოლოს, მაინცადამაინც სიკვდილი და გადარევა რა საჭიროა?! მთელი მოთხრობა დამთავრებულ სახელოვნო ნაწარმოებს წარმოადგენს. ფსიქოლოგიის მხრივ განსაკუთრებით კარგია ის ადგილი, საცა დესპინე ოთახში ზის მორთული და თვალწინ ეხატება თავისი პატარაობა, როცა, ჯავრი რა იყო, არ იცოდა; სიყვარულის პირველი გრძნობა, ნიკოსთან გატარებული წუთები. ჩანგურზე მღერა და სხვ. ამგვარ სანეტარო წარსულსა და საზარელ აწმყოს შუა კონტრასტი კარგად გამოხატა ავტორმა.

შემდეგ „ივერიაში“ იწყება ვრცელი მოთხრობა „დღეობა“ დ. მაჩხაძელისა. გლუხ სოსიას ერთი ვირის მეტი არა გააჩნდა რა და ისიც



დღეობისთვის გაჰყიდა. გლახა დღე დაადგა სოსიას, რადგან ვირის სამუშაო სულ მას დაატყდა თავს. გადაწყვეტა თავისი „მერცხალა“ გამოეყიდა, დაუდგა მყიდველს მუშად. გაცივდა და მოკვდა. ჯავრმა მისი ცოლიც საიქიოს გაისტუმრა და დარჩნენ უპატრონოდ ობლები.

ავტორს მიზნად ჰქონდა ეჩვენებინა, თუ რამდენად საზარალოა დღესასწაულები სოფლის ხალხისათვის. მწერალი, რომელიც ცხოვრებას ხატავს, მხოლოდ ორი გზით მიაღწევს ამ მიზანს: ან უნდა დახატოს ისეთი მოვლენები, რომლებიც თავისთავად ახასიათებენ ცხოვრებას, ან უნდა გაგვაცნოს სხვადასხვა ხასიათები; ხასიათების მიხედვით, მკითხველს შეუძლია თვით ცხოვრებაზეც წარმოდგენა იქონიოს. დ. მაჩხანელს პირველი გზა აურჩევია: მან დაგვანახვა, როგორ აღარიბებს გლეხს დღესასწაული, მაგრამ მარტო ამ პატარა აზრის რვა ფელეტონად გაკვიმვა დაკარგულ შრომად მიგვაჩნია. როგორც ხელოვნური ნაწარმოები, მოთხრობა მეტად სუსტია. მთელ პირველ ფელეტონში ავტორმა ერთი დიპლომიანი და მისი კნენა გამოლანძღა, შემდეგ ვირი გაგვაცნო, რომელმაც დიპლომიანს ძილი დაუფრთხო; ვირი ბოლოს სოსიას „მერცხალა“ აღმოჩნდა. ავტორმაც დიპლომიანს თავი მიანება და სოსიას ამბავს მოგვიყვა. ვირს რომ ყროყინი არ გაება, ავტორს აღარც სოსია გაახსენდებოდა და დიპლომიანზე მოგვიყვებოდა რასმე; გამოაკელით, ამას გარდა, ავტორის რეზონირობა, გლეხების საუბარი, რომელიც სრულიად უაღაგოდ არის ორ ფელეტონში გაკვიმული და მოთხრობა ორ ფელეტონშიც მშვენივრად მოთავსდებოდა. მოთხრობა აღებულია ერთი სოფლის ცხოვრებიდან. რუსული ანდაზა ამბობს: „მთელ სიცოცხლეს სწავლაში გაატარებ, მაინც ბრყივი მოკვდებიო“. ქვეყნიერებაზე ჯერ ძალიან ბევრი რამ არის აუხსნელი; რაც ახსნილია, იმისი სრულად შესწავლაც ძნელია, რადგანაც სიცოცხლე მოკლეა, გონება სუსტი; ამიტომ რუსული ანდაზაც მართალია. მაგრამ ჩვენი საქართველო თითქოს იმდენად პატარაა, რომ მისი სხვადასხვა კუთხის დაახლოებით ცოდნა არ უნდა იყოს ძნელი; მიუხედავად ამისა, დასვთ ჩვენს უვიცობას! -აბა, იცოდი, მკითხველო, თუ ბედნიერი არკადია ქიზიყში იყო? არკადიაში მწყემსი ვაყები და ქალები ერთმანეთის სიყვარულსა და აღერსში ატარებენ სიცოცხლეს; ამ სოფელში თურმე დახავსებული ბებრებაც ისე ესიყვარულებიან ერთმანეთს, როგორც ახალგაზრდა დანიშნულები. ხანდახან კი ჩხუბი მოსდით და მაშინ აღარ გვანან არკადიის მწყემსებს: ძაღლსა და ღორს უკვლენ ერთიმეორეს საფლავზე! შემდეგ ნანობენ, რად ვაწყინეთ ერთმანეთსო, ტირიან. ბოლოს ჩაეკონებიან ერთმანეთს გულ-მკერდში და შერიგდებიან. თუ ქმარი მოკვდა, სიყვარული აღარც ცოლს აცოცხლებს,—

ორ კვირაში გაუყენებს საიქიოს. ბ. დ. მაჩხანელს რომ არა, ხომ არ გვეცოდინებოდა, რა ყოფილან ეს ქიზიყელები!? აი, სოსია ორმოც-დათოთხმეტი წლის კაცია, სულ გათეთრებულია; მისი მარიამიც ორმოცდახუთისა მაინც იქნება: ოცდაათი წლის ჯვარდაწერილები ყოფილან და თოთხმეტი წლისა აღარ იყო, რომ გათხოვდა?! ოცდაათი — წელაწადი! ხუმრობაა! ამ სოფელში თურმე, რაც ხანში შედიან, უფრო ყმაწვილდებიან, ამიტომ სიყვარულიც უფრო უძლიერდებათ. მოხუცი სოსია მარიამის „მარწყვის ტუჩებთან ტუჩებს ადუღებს“. მარიამიც „ტკიპასავით ეკვრის სოსიას გულში“. თურმე როცა ქმარი წავა სადმე ორიოდ დღით, „მთვარესავით გაბადრული ცოლი დნება, ბროლ-ლალის ფერი ლოყები ყვითლად უხმება, შავი ბრიალა ცეცხლივით გიზგიზა თვალები უქრება“ და სხვ.. მაგრამ მოვა თუ არა ქმარი, ცოლი ჯერ ცრემლებს აფრქევს. შემდეგ ყელზე მოეხვევა და მალე ისევ მთვარესავით გაივსება და გაიბადრება. ყმაწვილებს კი არა, მოხუცებსაც ასე ემართებათ! რა იდილიაა! რა სანტიმენტალური ხაპიათის ყოფილან ამ სოფლის მცხოვრებნი. თუ არ გჯერათ, მოისმინეთ პატარა ხანს ოცდაათი წლის ჯვარდაწერილი მარიამისა და მისი ბებერი სოსიას მუსაიფი — „აგრე სიყვარულით გივლიდი, გიფრთხილდები ყოველთვის, როგორც გასათხოვარი ქალი თავის სანუგეშო სილამაზეს უვლის აკეკლუცებს და უფრთხილდება თავის თვალის ჩინივით“, — ეუბნება სოსიას მარიამი, შენ რომ შეუძლოთ გახდები ხოლმე, მე მოწყვეტილ იასავით ვკვანები, მთვარესავით ვილევი, სანთელივით ვიწვები, გაზაფხულის ღრუბელსავით ცრემლით ვიღვრები“ და სხვ. არა, ასეთი სიყვარული ხომ არკადიაშიაც არ არსებობდა! ასეთი ლაპარაკი ვინღა შეასწავლა ამ სოფლის მცხოვრებთ. იქნება ქართული ენის აკადემიაც აქ იყო? წარმოიდგინეთ ვირებიც კი არაჩვეულებრივი ყოფილან ამ სოფელში. თუ პატრონი მოუკვდათ ტირიან, აღარც ქამენ და აღარც სვამენ! ან კი რა გასაკვირველია; ხარი ხართან დააბი; ან ზნეს იცვლის ან ფერსაო: ასეთი ადამიანების ხელში ვირებიც რომ დაბრძნებულნიყვნენ, ადვილი შესაძლებელია. ყოველსავე ამის შემდეგ. ცხადია, რა ღირსებისაც არის მოთხორობა და ავტორის ნიჭი. ბ. დ. მაჩხანელმა ასეთის მოთხორობებისაგან ამ წელს მაინც დაგვიფაროს. თუ იმას შეეცხეთ. ეს იმიტომ, რომ ახალგაზრდა მწერლები გაგვეფრთხილებია, როგორ არ უნდა წერონ და ერთი გარემოება აღგვენიშნა: მიუხედავად იმისა, რომ მოთხორობა მეტად სუსტია, მასშიაც შეამჩნევს მკითხველი, რომ ქიზიყის სოფლის ძველი ცხოვრება იშლება; სოსია ნახევარჯერ დღიურ მუ-

შად უდგას მდიდარ გლეხებს და ამით ირჩენს თავს. სოფელი ვა-  
კარ-კარაპეტებს, გამდიდრებულ გლეხებს, მამასახლისს ჩაუგდიათ  
ხელში და გლეხებს ტყავს აძრობენ. ვთქვათ, დეპომ კარაპეტები  
აბარგა; მაგრამ ადგილობრივ მდიდარ გლეხებს რაღას უზამს, როცა  
ისინი კარაპეტებზე უკეთესი თუ არა, ნაკლები აღარ არიან? „ჩვენი  
შეძლებული გლეხკაცისთანა ღარიბი ადამიანის შეუბრალებელი,  
დამსრჩობი და ამოსაწყვეტი ქვაწვია ენგიდუნიაზედაც არ იქნებაო“,  
ამბობს მათ შესახებ სოსია.



ჩვენ მოკლედ განვიხილეთ: რაც კი იყო „ივერიის“ სიტყვა-  
კაზმულ ლიტერატურაში რაიმე მხრივ შესანიშნავი; გადავალთ ახლა  
„კვალზე“. იანვრიდან დაწყებული მარტამდე „კვალში“ იბეჭდებოდა  
ბებრიძის მოთხრობა ქართლის ცხოვრებიდან „რა მოუფა სოსიკას“.  
ღარიბ სოსიკას, რომელსაც ცოლ-შვილი ნახევარჯერ მშვიერი ჰყავს.  
ღარჩენილ გადასახადში ხარები წაართვეს. სოსიკას სიმდიდრეს ეს  
ხარები შეადგენდნენ; ისინიც რომ გაეყიდათ, რაღა ეშველებოდა?  
ისესხა აბრამისაგან ორი თუმანი ფული, რაშიაც მისცა ოთხი თუმ-  
ნის ვექსილი. და ხარები დაიხსნა. სიცივეში გდებით და უპატრო-  
ნობით ხარები გალახულიყვნენ; გაზაფხულზე ჯათა ვეღარ აიტანეს  
და დაიხოცნენ. ყანა სოსიკას სეტყვამ წაუხდინა; ერთადერთი ხბო-  
იანი ძროხაც აბრამმა წაართვა ვალში. სოსიკამ რკინიგზაზე გასწია  
სამუშაოდ, მაგრამ რკინა დაეცა და შინ დაბრუნების შემდეგ დიდ-  
ხანს აღარ უცოცხლია. მისმა ცოლმა ტასიამ გაჭირვებას და შვილე-  
ბის საცოდაობას ვეღარ გაუძლო და თავი ჩამოიღო. ტასიას თავის  
მოკვლის შესახებ ჩვენ სრულიადაც ვერ ვიტყვი. რომ ეს ნაძალა-  
დები იყო მოთხრობაში: ამგვარი ბოლო ბუნებრივი შედეგია მთელი  
მოთხრობის მსვლელობისა. ახლა შენ წარმოიდგინე, მკითხველო,  
რა აუტანელი უნდა ყოფილიყო გაჭირვება, რომელმაც გლეხის  
ცოლს ტასიას თავის მოკვლა გადააწყვეტინა! „რა მოუფა სოსიკას“  
ნათლად გვიჩვენებს, თუ რა გაჭირვებულ მდგომარეობაშია ქართ-  
ლელი გლეხი. მიწის უქონლობა, სხვადასხვა განდასახადი, რომლის  
გასტუმრება გლეხს ავალბიანებს, უფრო და უფრო გაჭირვებულ  
მდგომარეობაში აყენებს; შესაძლებელი რომ იყოს, გლეხი თავს  
გაიყიდის. თუ საშველი არსაიდან გამოჩნდა. ბევრს თავის მოკვლის  
მეტი აღარაფერი დარჩენია. ზარმაცი რომ იყოს სოსიკა, მაშინ სულ  
სხვა არის, მაგრამ იმისთანა მშრომელი გლეხი წშირად არ მოიპო-  
ვება; თუ დღიურ მუშად დგება; თუ რკინიგზაზე გარბის სამუშაოდ.

მაგრამ უკიდურესი სიღარიბიდან თავი მაინც ვერ დაუღწევია: სულ რომ კარგი წელიწადი იყოს, ადგილის შემოსავალი ზამთარამდე თუ ეყოფა, დანარჩენ ღროს ყველაფერი საყიდელი აქვს და ამიტომ უნდა მოშორდეს სახლ-კარს, დადგეს სადმე მუშად, ეკების იქ ორიოდ გროშს თავი მოუყაროს. რასაც იშოვნის. ცოლ-შვილის გამოკვებაში და შემოსვაში დაეხარჯება; მტერსა და მოყვარეს რილათი დაუხვდეს? გადასახადი რაობით გადაიხადოს? ამისთანა გაჭირვებულ მდგომარეობაში სოსიკა — მომავალზე სრულებით ვეღარ ფიქრობს; მთელი მისი აზროვნება დღევანდელ გაჭირვებას შთაუწყობს; ოღონდ ამ გაჭირვებაში სული მოიბრუნოს როგორმე და აღარაფერს აღარ დაეძებს.

„— აბა, ბატონო, ისე დაწერეთ ვექსილი, როგორც გითხარით, — ეუბნება აბრამი მწერალს.

— ყაბული გაქვს, ისე დაწერო ვექსილი, როგორც აბრამი მეუბნება? — ეკითხება სოსიკას მწერალი კეთილად.

— ყაბულ ვარ, შენი ჭირიმე.

— მერე იცი, როგორ მეუბნება?!

— არ ვიცი, მაგრამ...“

ამგვარად, სოსიკამ არ იცის, რამდენს უწერს აბრამი ვექსილში. მაგრამ რაც უნდა დაუწეროს, თანახმაა. აი, რას ნიშნავს მისი დაუბოლოებელი „მაგრამ“: არ ვიცი, მაგრამ რაც უნდა ჩაწეროს, მაგის იქით გზა არა მაქვსო. სოსიკას გაჭირვებით, რასაკვირველია, აბრამი სარგებლობს. სოფელში ვაჭრობით, კაპიკის კაპიკზე დებით აბრამს ფული მოუგროვებია და დუქანი გაუღია. ახლა ავალებს ფულებს, იგირავენს ადგილებს და მთელი სოფელი მისი მოვალეა. „გაილეწებოდა თუ არა ჭირნახული, ურმები დაიძროდნენ სოფლებიდან და ურემი ურემზე იდგა აბრამის კარზე სავსე ტომრებით დასაპალნებული... აგრეთვე რთველზე აბრამის სახლს ხშირად მოადგებოდნენ ურმები ყურძნით და ხილით სავსე გოდრებით. ასეთ სარგებელს აბრამი მალე ფულად აქცევდა, და, სადაც კარგი ნაპატივარი ნაფუზრები და ვენახები აღმოჩნდებოდა, ხელიდან არ გაუშვებდა“. სოფლის გაჭირვებამ წარმოშობა აბრამი, მაგრამ ის სოფელს გაჭირვებას კი არ უშსუბუქებს, უფრო უძლიერებს. არც მარტო აბრამია ამაში დამნაშავე: გლეხი აბრამისაგან ვალს იღებს, რომ ან მღვდელი გაისტუმროს, ან გადასახადი მოიშოროს, ან მიცვალებული დამარხოს, ქორწილი გადაიხადოს და სხვ. მთელი წელიწადი შრომობს და, არათუ ვალის გასასტუმრებელს ვერ მოირჩენს კუჭი თუ გამოიძლო და სარგებელი როგორმე გადაიხადა, მეტს ვერ შეძლებს. ყველაზე მეტი მოთხოვნილება, როგორც ქორწილი, დამარხვა, ნათლიობა და

სხვ., გლენმა ვალით უნდა დაიკმაყოფილოს: ვალი ვალს ემატება და გლენი საშველს ველარსად ხედავს. ქართლელი გლენხაკის ცხოვრება ამ მოთხრობაში კარგად არის დახასიათებული და მკითხველს ნათელი სურათი ეხატება თვალწინ. აქვე უნდა მოვიხსენიოთ ზოგიერთი ნაკლოვანების შესახებ. ყოველი ადამიანის გაჭირვებას, ამა თუ იმ საქციელს მოთხრობაში მაშინ აქვს მნიშვნელობა, როცა ყოველივე ეს სოციალური პირობებით არის გამოწვეული; ჩვენ ვუკვირდებით მაშინ ამ სოციალურ პირობებს, ვხედავთ, რა უბედურებამდე მიჰყავთ მათ ადამიანი, და თანდათან სურვილი გვებადება: უკეთესი ცხოვრების მოახლოების, ერთიმეორის მდგომარეობის გაუმჯობესებით ხელი შევეუწყოთ. როდესაც ადამიანის უბედურების მიზეზი ისეთი ძალაა, რომელთანაც არაფერი არ გავგვივა, მაშინ მოთხრობა მიზანს ვერ მიაღწევს. მაგალითად: სოსიკას უბედურებაში დიდი მნიშვნელობა აქვს სეტყვას. სეტყვა ყოფილა და იქნება, მისგან ადამიანის დაფარვა არ შეგვიძლია; სოსიკასი კი არა, მდიდარი თავადიშვილის ყანაც რომ ყოფილიყო, სეტყვა მაინც წაახდენდა. მის წინაშე ყველა თანასწორია. ამგვარი ძალის გარევა ადამიანის ცხოვრებაში მოთხრობის ნაკლოვანებად უნდა ჩაითვალოს. მკითხველს შეუძლია იფიქროს: სოსიკას უბედურება ცხოვრების ბრალი კი არ არის, შემთხვევითია, სეტყვამ გააუბედურა. თორემ სეტყვას რომ არა, არაფერი უჭირდაო. ჩვენი მწერლები ცდილობენ: ადამიანის მთელი ხასიათი და ბედ-იღბალი მის სახელში და გვარში გამოხატონ: თუ კაცი უბედურია, მისი გვარიც უსათუოდ უბედურშვილი უნდა იყოს („ესლა მაკლდა“, ე. მ.-შვილისა), თუ გულკეთილია და შემბრაღე, გვარიც კეთილადე უნდა ჰქონდეს (მწერალი „რა მოუვა სოსიკასში“); თუ ხალხის მტყაყვებელი. — ყვლეფიანელი ან ყვლეფიაშვილი და სხვ. თუმცა ყოველივე ეს წერილმანია, მაგრამ მაინც დიდ ნაკლს შეადგენს; როცა მოთხრობის დასაწყისშივე ასეთ გვარს კითხულობთ, წინდაწინვე იცით, რას უმზადებს ავტორი თავის გმირს, რის გამო თქვენ ხალხისი გეკარგებათ, მოთხრობასაც ბუნებრიობა აკლდება. ავტორმა თუ თავისი გმირი უბედურ ვარსკვლავზე დაბადა, უსათუოდ უბედურად უნდა მოჰკლას, რომ მთელ ტანჯულ სიცოცხლეში არავითარმა მხიარულების და ნუგეშის შუქმა არ შემოანათოს მის ბნელ ცხოვრებაში. ესეც ცალმხრივობაა და სინამდვილეს მოკლებულია: რა უბედურიც უნდა იყოს ადამიანი, ერთი დღე მაინც შეხვდება ისეთი, ან აწმყოში, ან წარსულში, როცა ის ივიწყებს თავის უბედურებას, როცა სიხარული მის სახესაც მოაშუქებს და ოდნავ მაინც დაჰფარავს სევდისა და ტანჯული ცხოვრების ნაოკებს.

„კვალის“ შარშანდელ ნომრებში: შ. არაგვისპირელს ჰქონდა რამდენიმე ეტიუდი. რადგან ამ ეტიუდებს იდეით კავშირი აქვთ ავტორის წინა წლების ეტიუდებთან, ამიტომ მარტო რამდენიმე ეტიუდის შესახებ სიტყვის გაგრძელება საჭიროდ არ მიგვაჩნია. აქ ავტორს გამოჰყავს თანამედროვე ცხოვრების ნაკლოვანებანი, ადამიანის უსაშუალო მდგომარეობა, გაჭირვება, ფუქსავატობა, შეუბრალებლობა; მისი ცხოვრების სიფუტე და სხვ. აღდგომაა, ყველა მხიარულობს. ყველა ერთმანეთს ულოცავს: ქრისტე აღსდგა, სიკვდილითა სიკვდილი დათრგუნაო, საცოდავ დედას კი თავისი ერთადერთი შვილი „ბაბლო“ უკვდება; — სხვისი ჭირის თანაგრძნობა. სიკვდილითა სიკვდილის დათრგუნვა ცარიელი ილუზია ყოფილა! მეორე ეტიუდში ავტორი დაგვანახვებს ჩვენი რამდენიმე ახალგაზრდის ცხოვრებას, რომელიც მხოლოდ სმა-ჰამაში და ქეიფში გამოიხატება, და გულდათუთქული იძახის: ვცხოვრობთ, ვცხოვრობთო. და მართლაც. თუ ჩვენი ცხოვრება ამის მეტს არას წარმოადგენს. განა ეს ცხოვრებაა?! ამგვარ აზრში ჩვენი ცხოვრების შესახებ შ. არაგვისპირელს ვერ დავეთანხმებით. ვინ ამბობს, არის ჩვენ ცხოვრებაში სამწუხარო მოვლენები, არიან პირები. რომელთა ცხოვრება ყოველგვარ ადამიანურ ღირსებას მოკლებულია. მაგრამ ერთი მიბრძანეთ: ამგვარი მოვლენები სად არ არის, რომ ჩვენ, ქართველებს, აგვეცდინა თავიდან? სამწუხარო სურათებთან სანუგეშო მოვლენებსაც გვიჩვენებს ჩვენი ცხოვრება. და ვინც მარტო სამწუხაროს ხედავს, ან მარტო სანუგეშოს, ის ყოველთვის შეცდომაში შევა. ერთ ეტიუდში, „ხა, ხა, ხა, რა სულელი ხარ!“, ორ ახალგაზრდას ერთმანეთი უყვარს; ბედნიერება ახლოს არის, ორივეს უნდა ბედნიერება, ორივეს სრული უფლება აქვს ბედნიერი იყვნენ, მაგრამ შეუბრალებელი სიკვდილი უარჰყოფს მათს ბედნიერებას. ყოველივე ეს ხომ უსამართლობაა, შეუბრალებლობა, მაგრამ ადამიანს მორჩილების მეტი არაფერი დარჩენია; მისი ბედნიერება ფუჭია. უნიადაგო; ის იტანჯება. წვალობს, მაგრამ მისი ტანჯვა ბუნების მხიარულებას ოდნავაც არ არღვევს: როცა გულამღვრეული ადამიანი მოკაშქაშე ცას ეუბნება, შენ გულს ადამიანის ტანჯვა არა წვდებაო, ვარსკვლავები ციმციმით გადმოსძახებენ: რა სულელი ხარო! ე. ი. რა ჯავრი აქვს ბუნებას შენი ტანჯვისო. ეტიუდში „რა ზიზღით მიცქერის?!“ იგივე უნუგეშობა და უკმაყოფილება არის გატარებული, გიგლა ადამიანია, შიმშილით კვდება, მაგრამ ცხოველთა მფარველი საზოგადოების წევრიც კი არ იბრალებს. რომელმაც მეჩაგვეს მთელი ოქმი შეუყენა, აქაოდა, ცხენს ცოტა მძიმე

ტვირთი დაუდევით. მეხმა მოკლა გიგლა, მაგრამ სიკვდილის შემდეგაც „მხოლოდ ზიზლი, ზიზლი და ზიზლი შეგეძლოთ ამოგეკითხათ გლეხის ოდნავ გახელილ თვალებში და მოლიმარ ტუჩებში“. ნოველაში „გულცივობამ!“ საზოგადოებაზე ჩივილი უმაღლეს წერტილს აღწევს. გაბრო საზოგადოებაში მხოლოდ გულქვაობას, გულცივობას, ფლიდობას, მოლაღატეობას, სუსტის განადგურებას და ძალმომრეობას ხედავს, მეტს არაფერს; ყოველივე ამან მას რწმენა დაუკარგა მომავლისა და არაგვის ზვირთებში ეძებს განსვენებას. აშკარაა, გაბრო სწეული ადამიანია: შეიძლება საზოგადოება დაცემული იყოს, მაგრამ გაბრო თუ ზვირთებში ეძებს განსვენებას, ამაში მარტო საზოგადოება არ არის დამნაშავე. ან რა შუაშია მომავლის რწმენა? თუ საზოგადოებას მომავალი ბრწყინვალე გვირგვინს არ უქადის, ნუთუ ეს უფლებას აძლევს ადამიანს, საზოგადოების სამსახურზე ხელი აიღოს, თუკი სამსახური შეუძლია? ეჭირვება საზოგადოებას სამსახური. შეველა, დახმარება? შეგიძლიათ ემსახუროთ? თუ მას შეველა ეჭირვება, ეს სრულიად საკმარისი საბუთია, რომ მიეშველოთ, თუკი შეგიძლიათ, მიუხედავად იმისა. რა მოვლის მას მომავალში... ნუთუ მშვიერ ადამიანს პურს არ მიაწოდებ. მკითხველო. თუკი გვაქვს. მხოლოდ იმ მოსაზრებით, რომ ამ მშოერს მომავალი ფილოსოფოსის სახელს არ უმზადებს? ყოველგვარი სამწუხარო მოვლენის უგულო მაყურებელი კი არ არის შ. არაგვისპირელი, — მას გული ეთუთქება.

სევდით და უნუგეშობით არის გამსჭვალული სიმპათიური პოეტის — ი. ევდოშვილის პოეზია, რომლის ფსიქოლოგია თითქმის გამოირკვა. ჩვენ არ შეგვიძლია ვრცლად გავჩერდეთ იმის ლექსებზე. რომლებიც წარსული წლის „კვალში“ იბეჭდებოდნენ, რადგანაც მათი მოტივი იგივეა, რაც ავტორის წინანდელი ლექსების და ამიტომ პოეტის დასახასიათებლად საჭიროა მთელი მისი პოეზიის განხილვა და არა ერთი წლის. აქ მხოლოდ მოკლედ აღვნიშნავთ, მისი შარშანდელი ლექსების მიხედვით, რომ ევდოშვილსა და არაგვისპირელს შორის დიდი მსგავსება არის. ევდოშვილის მთელ ყურადღებას ცხოვრების სისაძაგლე, გაუტანლობა, შეუბრალებლობა, ფულის გაბატონება, ღარიბის ტანჯვა და წვალება იპყრობს, ის ხედავს, რომ ყველა—მდიდარიც და ღარიბიც—არსებობისათვის იბრძვიან. ერთმანეთის სიბრალული, თანაგრძნობა, გატანა არაგვის არა აქვს. ის უკვირდება ცხოვრებას და ამჩნევს. რომ არათუ ადამიანები, თვით ცხოვრებაც შეუბრალებლად ანადგურებს ყველა ვაჭირვებულს და სასოწარკვეთილი იძახის:

ეი! ძმობილნო, მითხარით: კიდევ  
რამდენმა უნდა გამოთაროს  
ამ ტანჯვის გზაზე, ვოლგოთის ქვართო,

მაგრამ ხმას არავინ სცემს, თითქოს ეს ტანჯვის გზა სამარადი-  
სოდ ასე უნდა დარჩესო.

უფსკრულის პირას, თვით განსაცდელში  
წამოჩოქილი ეკლიანს გზაზე, —

პოეტის სიყვარულს იწვევდა, —

და სალოცავად  
წარმოიტყოლა მხოლოდ მის სახელს:

მაგრამ კერძო ცხოვრებამ მას არ არგუნა ბედნიერება. ცხოვ-  
რების გრიგალმა არც ის დაინდო და დღეს, —

თვით „სიყვარული“, ამ სიტყვის ბგერა  
აწ გულს მოეჭმის გლოვიაა ზარათ.

პოეტმა თვითონ დაჰკარგა სიყვარული, მაგრამ ასეთ უნუგეშო-  
ბაში არ ჩაეარდებოდა, თავის გარშემო რომ მაინც ხედავდეს სიყ-  
ვარულს; სამწუხაროდ, ფულმა ყველაფერი დაიმონა და წმინდა სი-  
ყვარულის გვირგვინსაც კი შეეხო თავისი უწმინდური ხელებით:  
ფულით სიყვარულს ყიდულობენ, მხოლოდ ფულიანი უყვართ! პო-  
ეტი განაბული ყურს უგდებს ცხოვრების ტრიალს, იტანჯება, მაგ-  
რამ მისი ტანჯვა არავინ იცის; თავის სამარეს ის თავის გულშივე  
ახვევს, რადგანაც ეშინია, რომ ვერავის რას აგრძნობინებს; და მწა-  
რედ გაიძახის:

ასე მიედივარ მე ჩემს გზაზე ობოლი ეტლით,  
მე მსურს მიყვარდეს მოშორებით, ხალხის ფარულათ.  
ღე, ზოგი წყევლით, ზოგი სიმთა ამონაყენისით  
ამოიძალოს ჩემი გული, წავიდეს სრულათ!

პოეტს უნდა დაივიწყოს, გაშორდეს დედამიწას.

მაგრამ კვლავ თვალნი იზიდავენ დედამიწისკენ;

მას კი არ ძალუძს, ადამიანის უბედურებას რაიმე მხრივ შემ-  
უაროს

და ასე ობლად დაკანკალებს ბედის ამარა.

ვის ამტყუნებს პოეტი ადამიანის უბედურებაში? — ადამიანს?  
არა. პოეტს ყველა ებრალება — ტანჯულიც და მტანჯველიც, დაჩა-  
გრულიც, დამჩაგვრელიც, სიყვარულის მყიდველიც და გამყიდვე-  
11. ი. გომართელი, I ტ.



ლიც, რადგანაც ყველა ესენი ცხოვრების ცვალებადობის ნაყოფი არიან, და პოეტიც მხოლოდ ამ სოციალურ პირობებს ემდურის, რომლებმაც ამდენი უბედურება და უსამართლობა წარმოშობა. პოეტი გრძნობს, რომ რაღაც ძალა ცვლის ცხოვრებას და ჰბადებს მრავალ უთანხმოებას, რა არის ეს ძალა, მას ნათლად ვერ შეუგნია, ხოლო გრძნობს კი, რომ მასთან შებრძოლება არ შეუძლია. ამის მიზეზია, რომ ის გულჩათხრობილი, მარტოდმარტო დაკანკალებს. გენიოს ბაირონს სევდა უღრღნიდა გულს, მაგრამ ის ბედნიერი იყო, რადგანაც ძალას გრძნობდა და მთელ საზოგადოებას ერთმა გამოუცხადა ბრძოლა. მე ევლოშვილს ბაირონს კი არ ვადარებ, მაგრამ ევლოშვილის ნიჭი ბაირონის ნიჭსაც რომ ასცილდეს, მაშინაც ობლად დაიწყებს პოეტი კანკალს, რადგანაც გრძნობს იმ რაღაც ძალის ძლევამოსილებას, რომელიც ჩვენს ცხოვრებას ცვლის და ბევრს უნუგეშო სურათს ჰბადებს. რაც ტანჯავს ევლოშვილს: იგივე ტანჯავს არაგვისპირელსაც; არაგვისპირელიც ცხოვრებას ემდურის და მის უსამართლობას. ხოლო რაღაც აუცილებელი ძალის გრძნობა, რომელსაც ემორჩილება ცხოვრება, მის ეტიუდებში არ ჩანს. არაგვისპირელის სევდაში ცხოვრების გარდა ადამიანის ბუნებას და მის არარაობასაც წილი უდევს: ცხოვრება რომ ყველას საბედნიეროდ იყოს მოწყობილი, არაგვისპირელის სევდა მაინც არ გამოილევა, რადგანაც სიკვდილი ყოველთვის იქნება და ყოველთვის შეწყვეტს ადამიანის ბედნიერებას.

•

შარშანდელ „კვალში“ იყო კ. გოგოლაძის ლექსები; ამ პოეტის ფიზიონომია ჯერ ჩვენთვის გამოურკვეველია. მისი ნიჭი ჯერ რყევამია; რა გახდება მომავალში მისი პოეზიის ფოკუსად არ ვიცით; ხოლო მასაც სევდა და უნუგეშობა აღელვებს და თანდათან ირკვევა, რომ ამ სევდის მიზეზი დღევანდელი ცხოვრების უნუგეშო მოვლენებია. შემცდარი იქნება თქმა, ვითომ კერძო ადამიანის სულიერი განწყობილება მარტო საზოგადოებრივი ცხოვრების ნაყოფი იყოს; ხშირად ადამიანს ეწვევა სხვადასხვა უბედურება, რომლებსაც სოციალურ პირობებთან არავითარი კავშირი არა აქვთ, და ეს უბედურება აღმოუფხვრელ კვალს ტოვებს მის სულში, მაგრამ კერძო პირობები ვერ წარმოშობდა ევლოშვილისა და არაგვისპირელის არსებაში ასეთ უნუგეშობასა და სასოწარკვეთილებას, რომ ჩვენი დღევანდელი ცხოვრება არ გამხდარიყო ამის უმთავრეს მიზეზად. ზოგიერთ ხანაში რომ ამგვარი მწერლები მრავლდება, ზოგიერთ ხანაში კი სულ არ არის, ეს საკმარისი საბუთია ვიფიქროთ, რომ

უმთავრესი მათი წარმომშობი მიზეზი საზოგადოებრივი ცხოვრებაა. ადამიანი და, მით უმეტეს, ისეთი მგრძობიარე გულის და სპეტაკი ნიჭისა, როგორც პოეტი, თუ თავის კერძო ცხოვრებაში უბედურია, უნუგეშობას და სასოწარკვეთილებას თავის დღეში არ. დემორჩილება, თუ გარეშე ცხოვრება ანუგეშებს და იმედს აძლევს. ის ფიქრობს: მე უბედური ვარ, მაგრამ ეს შემთხვევის ბრალია; აგერ უმეტესობა ბედნიერია, მაშასადამე, საზოგადო ცხოვრების სამდურავი არავის გემართებსო, ევდოშვილსა და არაგვისპირელს თავის ნაწერებში ავტობიოგრაფიული ძალიან ცოტა აქვთ, ისინი საზოგადო ჭირ-ბოროტებას უჩივიან, საზოგადო სევდა-ვარამს გამოთქვამენ. აშკარაა, მათი ფიზიონომიის ახსნა ისევ ცხოვრებაში უნდა ვეძიოთ, ამგვარი მწერლები როგორც ევდოშვილი, არაგვისპირელი, მარტო ჩვენში კი არა, რუსეთში და დასავლეთ ევროპაშიც გამრავლდნენ. აილეთ, მაგალითად, რუსეთის პოეტი, ბალმონტი, — მისი პოეზიის მოტივი იგივეა. რაც ევდოშვილის. რამ წარმომშობა ევროპაში ასეთი მწერლები? რამ წარმომშობა ჩვენში? დასავლეთ ევროპის ლიტერატურაში კარგა ხანია, გაისმის: საუკუნის ბოლო, საუკუნის ბოლო, და ბევრგვარ მოვლენებს ამ „საუკუნის ბოლოთი“ ხსნიან. რა არის ეს საუკუნის ბოლო? აი, რა: კაპიტალისტურმა წყობილებამ დასავლეთ ევროპაში ეს არის უკანასკნელ წერტილს მიაღწია, მძლავრად განავითარა დასავლეთ ევროპის მწარმოებელი ძალა, წარმომშობა მრავალი უთანხმოება და დიდხანს სიარული თავისი გზით აღარ შეუძლია. უთანხმოება თანდათან იზრდება; მისი მოსპობა თვით კაპიტალიზმს არ ძალუძს, რადგანაც მან წარმომშობა და მანვე გაზარდა ეს უთანხმოება. აშკარაა, თვით კაპიტალიზმს უნდა მოეღოს ბოლო, მუშათა მოძრაობამ და სოციალიზმმა უკვე დარეკა მისი აღსასრული. დღეს ევროპა გარდამავალ ხანაშია. საქართველოში, როგორც დაკვირვება და ლიტერატურა გვიმტკიცებს, უკვე იჩინეს თავი იმ ელემენტებმა, რომლებმაც დასავლეთ ევროპაში კაპიტალიზმი წარმომშობეს, ცხოვრება შეირყა, წოდებრივი საზღვრები წაიშალა, ფული გაბატონდა; ფულის პატრონი ხდება ის, ვისაც საკუთარი მოხერხება და ცხოვრება ხელს უწყობს, და ამიტომ დღეს ჩვენში ცხოვრებაც იმისია, ვისაც ფული აქვს, მიუხედავად წოდებისა. ფულის ქონება წელეებზე ქონის დახვევას კი არ მოასწავებს მარტო, არამედ მეტი ცოდნის შექენასაც; გამდიდრებული გლეხები ჩვენში შვილებს სასწავლებელში ზრდიან, მაშინ, როდესაც თავად-აზნაურების შვილები სიღარიბის გამო ხშირად უსწავლელი რჩებიან, — ამ ფაქტმა ჩვენს ბელეტრისტიკაში იჩინა თავი. ცხოვრება აიძვრა, გაჩნდნენ ჩარჩები, მევახშეები, — ყველა ესენი

ხომ კაპიტალიზმის წინამორბედნი არიან. აშკარაა, ჩვენი ცხოვრების რყევა ნიადაგს უმზადებს იმგვარ ცვლილებას, როგორიც უკვე განვითარდა დასავლეთ ევროპაში. მაშასადამე, ჩვენი ცხოვრებაც გარდამავალ ხანას წარმოადგენს. რასაკვირველია, ევროპის გარდამავალი ხანა სულ სხვა არის, ვიდრე ჩვენი: მან კაპიტალიზმი განავითარა და მარქსის მიერ ნაჩვენებ მიზანს უახლოვდება. ჩვენ კი ახლა შევადეთ კაპიტალიზმის კარი; მაგრამ ყოველი გარდამავალი ხანა, რანაირიც უნდა იყოს, ხალხს ძალიან მძიმე ტვირთად აწევება. ყველა გრძნობს, რომ ცხოვრებაში რაღაც ცვლილება ხდება, ვის რა მოელის, არ იციან, ამ მომავლისა ყველას ეშინია; ამგვარ ხანაში მრავლდება გაჭირვებაც, უბედურებაც და ყოველგვარი ჰუმანური გრძნობა საზოგადოებაში სუსტდება: შინ რომ ბავშვებს შიოდეს, გარეთ ტაბლას რა უნდაო, ნათქვამია, — როცა ადამიანს თავისი გზა ვერ გაურკვევია, მაშინ არც სხვის გაჭირვებაზე ფიქრობს. პოეტს უფრო მგრძნობიარე გული აქვს, ვიდრე სხვას; ის მეტს ხედავს და უკეთ არჩევს ცხოვრებაში ყოველივეს; ამიტომ ყოველი გარდამავალი ხანის პოეტი უფრო იტანჯება, მეტ უნუგეშობას და სევდას ეძლევა, ვიდრე უბრალო ადამიანი. ევდოშვილი, არაგვისპირელი, გოგოლაძე თუ საზოგადო ჭირ-ვარამზე მიგვითითებენ და თავის უნუგეშობას გვიცხადებენ გასაკვირველი კი არა, ასეც უნდა იყოს: ისინი გარდამავალი ხანის შვილები არიან და არ შეუძლიათ, არ იტანჯონ. რაც მეტი ნიჭი აქვს მწერალს, მით უფრო საუკეთესო გამომეტყველია თანამედროვე ცხოვრებისა.

თავის უკანასკნელ მოთხრობაში „თოფის სროლა“ ბ. გიორგი წერეთელმა აღნიშნა ჩვეულებრივი სინამდვილით, თუ როგორ დაწვრილმანდა იმერეთის აზნაურობა; მეგობრულად ცხოვრების მაგიერ იმის მეცადინეობაში არიან, რომ ერთმანეთს რამე ავნონ. თუ ყანაში ერთიმეორისას რასმე შეასწრებენ, ხოცავენ, ერთიმეორეს დასაწვავად არ ზოგავენ. რამ გამოიწვია ასეთი მტრობა და შური მათ შორის? გალარიბებამ: ორივეს ერთადერთი მარჩენალი მიწაა; მიწა კი შემოაკლდათ და ამიტომ ყოველ სიმიზნის ძირს უფრთხილდებიან, რომ კუჭი გამოიძლონ, რადგანაც მეზობელს მეზობლის ღორმა ან საქონელმა რომ არაფერი წაუხდინოს ყანაში, შეუძლებელია, ამიტომ მტრობაც აუცილებელი ხდება.

აკაკის კრებულის შესახებ ჩვენ არას ვამბობთ. იმიტომ კი არა, რომ სათქმელი არაფერი გვქონდა, — სათქმელი ბევრია, მაგრამ ჩვენი მიზანია, აღვნიშნოთ მხოლოდ წარსული წლის სახელოვნო ლიტერატურა და ამოვიკითხოთ მასში ცხოვრება. აკაკის კრებულში, გარდა რამდენიმე ლექსისა, პოეტის წინანდელ თხზულებებში

იყო მოთავსებული; მათი გარჩევა კი უფრო შესაფერისი იქნება მისთვის, ვინც აკაკის მთელი ლიტერატურული მოღვაწეობის დაფასებას შეუდგება. დავეჩა „მოამბე“, მაგრამ ორიგინალური სიტყვაკაზმულობით შარშანდელი „მოამბე“ ძალიან ღარიბი იყო. წარსული წლის „მოამბეში“ საუკეთესოდ მიგვაჩნია დავ. კლდიაშვილის „მრევლში“; ამ სურათის შესახებ ჩვენი აზრი თავის დროზე გამოვთქვით („ივერია“, 1898 წ: № 63) მხოლოდ მოკლედ შევნიშნავთ, რომ „კვალის“ ბიბლიოგრაფმა („კვალი“, № 6) ეს სურათი შეცდომით აგვიხსნა და დედააზრადაც სრულიად სხვა მიიჩნია.

შარშანდელ „მოამბეში“ იყო ორი კომედია: ერთი აზიანისა, ერთიც დუტუ მეგრელისა. პირველი „ინჯილერი ან დობტური“ ამოღებულია სომეხთა ცხოვრებიდან და მხოლოდ კარიკატურას წარმოადგენს. უმთავრესი მოქმედი პირები არიან: სალომე უზარნოვი და მისი ორი შვილი ინჯილერ-დობტური ავეტიქა და გასპარა. ოდესღაც და სადღაც ერთი უნიჭო მხატვარი ცხოვრობდა; განიზრახა ლომის დახატვა და ბევრი შრომის შემდეგ, როგორც იქნა, დახატა, მაგრამ დახეთ მის უბედურებას: მისი ლომი ძალღს უფრო გავდა, ვიდრე ლომს! მხატვარს არც შრომის დაკარგვა უნდოდა, არც ის, რომ მისი ლომი ძალღად მიეღოთ; შალე საუცხოო საშუალება გამოიხატა. თავისი ფიქრით, სურათს მოაწერა: ძალი კი არ გეგონოთ, ლომიო, და გამოჰკიდა. აზიანსაც, არ ვიცით, რა მიზეზს მივაწეროთ, ამ მხატვარივით დამართნია, ამოურჩევია ავლაბრელი კინტოების საუკეთესო წარმომადგენლები, რომლებიც მუშტი-კრივში ზორბა ბიჭები არიან. და ერთისათვის ინჟინერი დაურქმევია, მეორისათვის დობტური! დალოცვილო აზიანო, სახელი ხომ არ ახასიათებს ადამიანს?! თუ აზიანს თავისი კომედიით უნდოდა ეთქვა: შეხედეთ, როგორია, სომხის ინტელიგენცია, მაშ სხვები რაღა უნდა იყვნენო, დიდად ცდება: არც ავეტიქას, არც გასპარას სომხის ინტელიგენციის ტიპისა არა აცხიათ რა. თუ ავტორს უნდოდა ეთქვა: შეხეთ, სომხის ინტელიგენციაც კი ფულს ეძებს ყოველგან და ყველაფერშიო, ნამდვილი ინტელიგენტები უნდა დაეხატა ჩვენთვის, რომ დავერწმუნებინეთ. ავეტიქა და გასპარასთანა პირები რომ ავტორს ინტელიგენციაში ენახა, ყოვლად შეუძლებელია, ჩვენ დავეთანხმებით, რომ ამათი მსგავსი რამ ნახა სომხის ინტელიგენციაში, — მხოლოდ მსგავსი. მაგრამ მეტად გაბერა, გადაამახინჯა და ნამდვილი ცხოვრების მაგიერ კარიკატურა წარმოგვიდგინა. სალომე უზარნოვის შესახებ ამას ვერ ვიტყვით, ამგვარი ქალები სომხობაშიც ბევრია, სხვაგანაც. სალომეს არ მოეთხოვება მეტი, ის არც ჩემობს ინტელიგენტობას. მაგრამ როდესაც ავეტიქა და გასპარა

რა მუშტი-კრავში ერთიმეორეს ეცილებიან, ცოლებს დღეში ათჯერ ურტყამენ რუსული დალაბანდივით, უშვერი სიტყვებით ლანძღავენ, დედ-მამას აგინებენ, ცოლებს უმტკიცებენ, ჩვენ თქვენი ბატონი ვართ, ხელები უნდა გვიკოცნოთო და კიდევ ასრულებენ ამას; ათასი გვარწმუნოს ავტორმა: ესენი ინტელიგენტები არიან, ინჟინერი და დოხტურიო; ავლაბრელი კინტოების ცნობა ძნელი არ არის.

დუტუ მეგრელის კომედიის, „სიკვდილი და სიცოცხლის“. პირველ ნახევარს დიდი სიხარულით მივეგებეთ, რადგანაც მასში ნამდვილი ტიპები იყვნენ დახატული: პლატონ ვარდიშვილი, ახალგაზრდა ექიმი, რომელსაც სურვილი აქვს ხალხს რაიმე სარგებლობა მოუტანოს. თავადის ქალი დარიკო, თავადი ნესტორ ჭიქიაშვილი.

კომედიის უმთავრესი ფოკუსი დარიკო და პლატონია. კომედიის მეორე ნახევარმა მოლოდინი გაგვიცრუა: აქ დარიკო და პლატონი სრულიად გამოცვალა და დაამახინჯა ავტორმა; მეორე ნახევარში ორივე პირი თითქმის ფარსს თამაშობენ მაყუარებლის წინაშე. აიღეთ, მაგალითად, ის სურათი, სადაც პლატონი თავის მოკვლას აპირებს. ეს განა ის პლატონია, რომელიც ავტორმა პირველ ორ მოქმედებაში გაგვაცნო?! ის კი არ იტანჯება; მასხარაობს და თანაგრძნობის მაგიერ სიცილს იწვევს. ბ. დუტუ მეგრელმა კარგად დაიწყო, ცუდად გაათავა: დარიკოსი და პლატონის ხასიათი ბოლომდე ვერ დაიცვა. ასეთი მეტამორფოზის გამო მათი დახასიათება შეუძლებელია. დარიკო, რომელსაც ჩვენ ვხედავთ პირველ ორ მოქმედებაში, წარმოადგენს ქარაფშუტა კნიაყნას ტიპს; მისი ხასიათი და ბუნება, ფუქსავატი აღზრდისა და ცუდი გავლენის გამო, სრულიად დამახინჯებულია. ცხოვრებაში მისი ერთადერთი მიზანი მხიარულება, დროსტარება და ლამაზი ქმარია. თავადების წრეს რომ ასცილებოდა, დიდი რამ კი არ გამოვიდოდა, მაგრამ ადამიანურ ღირსებას ამდენად არ დაჰკარგავდა; ახლა კი ის სრულებით დაღუპულია. თავადი ნესტორ ჭიქიაშვილი სუსტად არის დახასიათებული; ის იმგვარივე ტიპია, როგორიც ნინოშვილის ტარიელ მკლავაძე („ჩვენი დროის რაინდი“) და კლდიაშვილის აბესალომ სალამთაძე („ირინეს ბედნიერება“). დარიკო და ნესტორი მთელი თავისი ხასიათით, მოქმედებით, მასწრაფებით გვიხასიათებენ ჩვენს გახრწნილ თავადობას, რომელსაც, დღეს არის თუ ხვალ, ბოლო მოეღება. სამწუხაროა ეს გარემოება? სამწუხარო ის არის, რომ თავადობას დღეს უმეტეს წილად დარიკოსთანა და იასონისთანა წევრები ჰყავს, და, თუ ამაზე უკეთესი პირების მოცემა არ შეუძლია, რაც მალე მოისპობა, ის ჯობია.

თუ არ დაგავიწყდა, მკითხველო, ჩვენი მიზანი იყო შემდეგი:

ამოგვეკითხა, წარსული წლის სიტყვაკაზმულ ლიტერატურაში ჩვენი ცხოვრება: გაგვეგო, რას გრძნობდა მწერალი და ხალხი, რომელსაც ის გვინახავდა, და აღვენიშნა, თუ რა დაგვიტოვა წარსულმა წელმა სიტყვაკაზმულ ლიტერატურაში სასიცოცხლო. ჩვენ მოკლედ განვიხილეთ, რაც კი რამ იყო საყურადღებო ჩვენი მაშინდელი ჟურნალ-გაზეთების სიტყვაკაზმულ ნაწილში და დავინახეთ, რომ ბელეტრისტიკა მთელი წლის განმავლობაში გვინახავდა ჩვენი სოფლის ცხოვრების ცვლილებას; ეს ცვლილება იმაში მდგომარეობს, რომ ძველი სოციალური წყობილება იშლება, ახალ სოციალურ პირობებს ნიადაგი უმზადდება, ბელეტრისტიკები თანაუგრძობენ მათ, ვისაც ცხოვრებამ ტანჯულთა ხვედრი მიუსაჯა, და ზიზღით უყურებენ მათ, ვინც გლეხის ცხოვრების დარღვევას ხელს უწყობს. ხალხი, როგორც ბელეტრისტიკა გვინახავს, გრძნობს, რომ მის თავზე რაღაც ამბავია, რომ დრო შეიცვალა, ისიც ის აღარ არის, რაც წინათ იყო, და გამოურკვეველი მომავლის წინაშე დგას. ჩვენი შარშანდელი პოეზია, როგორც უკვე დავინახეთ, კანონიერი ნაყოფია გარდამავალი ხანისა, რომელშიაც ჩვენ ვცხოვრობთ, და ამ ხანის საუკეთესო დამახასიათებელია. თუ ბელეტრისტიკაში გამოსტკევივის, ერთი მხრივ, სიბრალული, მეორე მხრივ, ზიზღი და სიძულვილი, პოეზიას ყველა ებრალება და ეცოდება, თუმცა მეტი სიბრალული აქაც ტანჯულისა და დაჩაგრულისაკენ არის. პოეზია ბუნდად გრძნობს, რომ ჩვენს ცხოვრებას ცვლის და წყლულებს აჩენს რაღაც ძალა, რომელთანაც მას შებრძოლება არ შეუძლია, ამიტომ სევდითა და უნუგეშობით არის გამსტკევალული. სასიცოცხლო წარსული წლის სიტყვაკაზმულმა ლიტერატურამ დაგვიტოვა: დაგ. კლდიაშვილის „მრევლში“, ე. მ.-შვილის ზოგიერთი მოთხრობა, გრ. ცენტერაძის „დესპინე და ნიკო“, ი. ბებრიძის — „რა მოუვა სოსიკას“, ევლოშვილის ლექსები და არაგვისპირელის ეტიუდები, ე. მ.-შვილის შესახებ უნდა შევნიშნოთ, რომ მას ფანტაზია სუსტი აქვს, დაკვირვება კი კარგი. ამიტომ ის კარგად უნდა ჩაუკვირდეს ჩვენს ცხოვრებას, შეისწავლოს ის და იქ ეძიოს თემა თავისი ხელოვნებისათვის. უამისოდ მისი მოღვაწეობა უსარგებლო იქნება. ერთი შენიშვნაც ევლოშვილს, რამდენადაც უფრო იფურჩქნება მისი პოეზია, პოეტი იმდენად უფრო გულჩახვეულია და ფარული ხდება; ამიტომ გვეშინია, ვაითუ: ხალხის ფარულად, მოშორებით, სიყვარულის სურვილმა სულ მოწყვეტოს დედამიწას და სიმბოლიზმის სამთავროში გადაიტანოს. ამის ზოგიერთ ნიშნებს უკვე ვხედავთ მის უკანასკნელ ლექსში „გედის სიმღერა“

## ხელოვნება და მისი მიზანი

ეს წერილი უკვე მოფიქრებული მქონდა, როდესაც „კრებულს“ III და IV ნომრები მივიღე. ამ ნომრებში ჩემი ყურადღება, სხვათა შორის, ბ-ნი ხომლელის კრიტიკულმა სტატიამ მიიქცია: ერთი იმიტომ, რომ ამ კრებულში“ საყურადღებო ძალიან ცოტაა, მეორე, თავის სტატიაში ბ-ნი ხომლელი მეც შეხება და, ხომ მოგეხსენებათ, ადამიანი განსაკუთრებულ ყურადღებას აქცევს ყოველისფერს, რაც კი მის ღირსებას ან ნაკლოვანებას შეეხება. როდესაც ბ-ნი ხომლელის სტატია წავიკითხე, ამ წერილის განხორციელების სურვილი უფრო გამძლიერდა, ამის მიზეზიც ცხადია: სამი წელიწადი არც კი არის, რაც სამწერლო ასპარეზზე გამოვედი, და ასე მოკლე ხნის განმავლობაში ბევრი ყურადღებასაც არ მომაქცევდა, ვერც გამოირკვევდა ვინმე ჩემს ფიზიონომიას, როგორც მწერლისას, მაგრამ წარმოიდგინეთ ჩემი გაოცება, როდესაც ბ-ნი ხომლელის შენიშვნა წავიკითხე:

„მე განზრახვა მქონდა, ივ. გომართელის შემცდარ და ბუნდოვან აზრებზე სალიტერატურო კრიტიკის შესახებ პრინციპიალური სჯაბაასი დაემწყყო“ და სხვ. თუ ამდენად ბედნიერი ვიყავი, სწორედ არ ვიცოდი და დიდად ვუმაღლი ბ-ნ ხომლელს, რომ შემატყობინა.

ჩვენში ძალიან ბევრს გაუხდია მეთერთმეტე მცნებად „შენც სუ, მეც სუ“, და როდესაც მწერალი ასეთი მცნების მაღიარებლად გამოდის, ეს ფრიალ საზარალო მოვლენაა, სამწუხაროს რომ თავი დავანებოთ.

მე რომ ბ-ნ ხომლელს არ შევხებოდი, მას შეიძლება არც კი სცოდნოდა. რომ გომართელიც არსებობდა ქართულ მწერლობაში, მაგრამ ახლა ჩემი აზრების გარჩევაც კი მოუწადინია! ასეთი ყურადღებისათვის დიდი მადლობელი ვარ, მაგრამ ცხადზე უფრო ცხადია როდესაც გულმოსული ადამიანი კალამს იღებს ხელში, მაშინ ის

სამართალსა და სიმართლეს აღარ დაგიდევთ, მისი ერადერთი მიზანია გულის მოფხანა, სულის დამშვიდება მოპირდაპირის დამცი-რებით. მეც ვიფიქრე, ვაითუ ბ-ნმა ხომლელმაც ეს შეცდომა ჩაიღი-ნოს ჩემს წინააღმდეგ-მეთქი და ამიტომ, ვიმეორებ, ახლა უფრო სა-ჭიროდ ვცანი მკითხველს გავუზიარო ჩემი შეხედულება ხელოვნე-ბისა და მის ღანიშნულების შესახებ,—მით უმეტეს, რომ ასეთი ში-ნაარსის წერილები ჩვენში ძვირად იბეჭდება, და ამით ბ-ნ ხომლელ-საც შრომა გავუადვილო. მე საზოგადოდ ვერიდები, რაც შეიძლება, უმართებულო კილოსა და მედიდურობას და ამიტომ ვურჩევ ბ-ნ ხომლელს, ხელს ნუ აიღებს განზრახვაზე და თუ ჩემი შექსპირი ნი-ნოშვილი, როგორც მას ჩემს გულში ამოუკითხავს, შემუხსრა, მისი ულრიციც<sup>1</sup> უნდა შემუხსროს სრული გამარჯვებისათვის. ახლა კი ჩვენს საგანს მივმართავთ.

ხელოვნება ბევრგვარია, მაგრამ ამ წერილში მე მხედველობაში მაქვს მხოლოდ პოეზია, თუმცა თავისთავად ცხადია. რომ პოეზია ხელოვნების ერთი დარგია და ამიტომ, რაც ითქმის ერთ დარგზე. იგივე მთელ ხელოვნებაზე უნდა მართლდებოდეს. პოეზიის თეორია ჯერჯერობით მეტად გამოურკვეველ საგანს შეადგენს, ამის გამო ვერ ნახავთ ისეთ კრიტიკოსს ან პოეზიის თეორეტიკოსს, რომ თავ-სი კერძო აზრი არ ჰქონდეს პოეზიის შესახებ. ესთეტიკის თეორიის განვითარებაში ჩვენ ვხედავთ ორ მიმართულებას. მეტაფიზიკურსა და პოზიტიურ-ევოლუციონურს. პირველი მიმართულების შემომ-ტანი ესთეტიკაში არიან ფრანკფურტის ფილოსოფოსი ბაუმგარტენი, რომელიც XVIII საუკუნეში ცხოვრობდა და რომელმაც პირველ-მა შემოიღო სიტყვა „*esthetica*“, ფიშერი და სხვები. მთავარი პრინ-ციპი როგორც ბაუმგარტენის. ისე ფიშერისა, მათი საკუთარი, ორი-გინალური კი არ არის,—ერთიცა და მეორეც თავის გამოკვლევაში სხვადასხვა ფილოსოფიური სისტემით ხელმძღვანელობდნენ. რად-განაც მეცხრამეტე საუკუნის პირველ ნახევარში მოდაში იყო ჰეგე-ლი, რომელიც ყოველგან და ყოველისფერში თავისი მეტაფიზიკური და თითქმის სრულებით გაუგებარი აბსოლუტური იდეის ლოგიკურ განვითარებას ჰხედავდა, ფიშერმაც ჰეგელის აზრი ესთეტიკაში შე-მოიტანა და ესთეტიკა აბსოლუტური იდეის გამოხატულებად აღი-არა. ასეთივე მეტაფიზიკოსი იყო ესთეტიკაში სხვათა შორის გოეთე. მეტაფიზიკური მიმართულება ესთეტიკის თეორიაში აშკარად ყალ-ბია. მას მხედველობაში აქვს ხელოვნება განყენებულად და არა ცხოვრებასთან და ადამიანთან დაკავშირებით. მეტაფიზიკოსთა აზ-

<sup>1</sup> შექსპირის აღრინდელი კრიტიკოსი.



რით ყოველი სახელოვანი ნაწარმოები თავისთავად უნდა იყოს სრული და უნაკლო, მიუხედავად იმისა, თუ როგორ მოქმედებს ის მკითხველზე. მაგალითად: შესაძლებელია, რომელსამე სახელოვან ნაწარმოებს ყოველი მკითხველი ალტაცებაში მოჰყავდეს, მაგრამ მეტაფიზიკოსი ესთეტიკოსი მას ჩირადაც არ აფასებდეს; აგრეთვე შესაძლებელია მან ისეთი ნაწარმოები დასახოს ხელოვნების სიმშვენიერედ, რომელიც მკითხველის გულსა და გონებას არაფერს არ აძლევს. მეტაფიზიკა, თავის განყენებულ აზროვნებაში, დედუქციით ხელმძღვანელობდა, უარჰყოფდა ფაქტების დაკვირვებასა და ცდას. იგონებდა დოგმატურ პრინციპებს და ამ პრინციპებით ცდილობდა მსოფლიოს ახსნას. ამავე გზას დაადგნენ მეტაფიზიკოსი ესთეტიკოსები. ყოველი მათი განმარტება ხელოვნებისა დოგმატიურ მსჯელობაზე არის აშენებული. ამგვარ თეორეტიკებს თავისი წარმომადგენლები კრიტიკაშიც ჰყავდათ. ასეთი არიან ნიზარი, ბუალო, დღევანდელი ბრუნეტიერი. პოზიტიურ გზას ხელოვნების გამოკვლევაში დაადგნენ ლესინგი, კანტი და განსაკუთრებით სპენსერი, რომელმაც თავისი ესთეტიკური პოზიტიური თეორია ევოლუციონიზმზე ააშენა.

როგორც სპენსერი გვატყობინებს, ესთეტიკურ გრძნობათა განხილვაში<sup>1</sup>, თავისი თეორიის შექმნამდე მას ერთი გერმანული ციტატა შეხვედრია. ამ ციტატის აზრი ის ყოფილა, რომ თამაშისა და ესთეტიკურ გრძნობათა სათავე ერთი და იგივე იმპულსი არისო. ეს აზრი ჰემმარიტების წინასწარმეტყველება არისო, დასძენს სპენსერი და თვით ჰემმარიტება კი ალბათ მისი საკუთარი თეორია უნდა იყოს. სპენსერის თეორიით, ესთეტიკური გრძნობა, რომელსაც ხელოვნება აღვიძრავს, არის უბრალო თამაში, და მას არავითარი მიზანი არა აქვს, გარდა სიამოვნებისა. თუ მივმართავთ ცხოველებს, დავინახავთ, რომ აუცილებელ მოთხოვნილებათა დაკმაყოფილება მათ მთელ ღროს არ ართმევს. მათ კიდევ რჩებათ თავისუფალი ღრო. თუ გონების რომელიმე ორგანო დიდხანს არის დასვენებული, ზედმეტის ძლიერებით მიისწრაფვის მოქმედებისაკენ და თუ გარემოებამ ხელი შეუწყო, ნამდვილი, რეალური მოქმედების მაგიერ მისი მსგავსება, მისი იდეალური აჩრდილი ჩნდება. ამგვარად წარმოდგება ყოველგვარი თამაში ანუ უმაქნისო და უსარგებლო ვარჯიშობა. მაგალითად, ვირთაგვა რომ გალიაში დაამწყვდიოთ, ის ყოველისფერს ღრღნის კბილებით, რაც კი რამ მოხვდება. კატა,

<sup>1</sup> Спенсер, Основная психология, 1898 г.

რომელსაც თავის კლანკები დღეს იმდენად აღარ ჰკირდება. როგორც გარეულად ცხოვრების დროს, ხანდახან წინა ფეხებს გამოშვერს, გამოუშვებს კლანკებს და სკამებსა და ხის კანს კაწრავს და სხვ. სპენსერს მოჰყავს აგრეთვე ძაღლების მაგალითი, კნუტის, ეირაფის და სხვ. ასეთი უსარგებლო თამაში ცხოველის განვიცარებასთან ერთად თანდათან ვითარდება და ადამიანში კი ესთეტიკურ გრძნობად იქცევა; ამ ესთეტიკურ გრძნობას ანუ თამაშს იწვევს ადამიანში ესთეტიკური ნაწარმოებნი, მაგრამ როგორც დაბალ საფეხურზე, ისე მაღალზედაც თამაშს არავითარი მიზანი არა აქვს. გარდა სიამოვნებისა. ფსიქოლოგიის მეცხრე თავში სპენსერი მართო იმას ამბობს, რომ ესთეტიკური გრძნობა სიცოცხლის სარგებლობის მიზანს მოკლებულიაო, მაგრამ სხვა ნაწერებში, მაგალითად „სარგებლობა და შეენიერებაში“, ამ აზრს აფართოვებს და პირდაპირ და სრულიად დაუმტკიცებლად ქადაგებს: სარგებლობა და ხელოვნება შორიშორს არიან ერთმანეთისაგანო. ამგვარივე აზრის არის კანტიც და მთელი ეგრეთწოდებული კრიტიკოსთა სკოლა. სპენსერის შეცდომა იმაში მდგომარეობს, რომ პირადი სიცოცხლის სარგებლობა და საზოგადოებრივი სარგებლობა ერთიმეორისაგან ძალიან დაშორებული არიან; შედარებაც კი შეუძლებელია მათ შორის. შეიძლება რაიმე მოქმედება კერძო სიცოცხლისათვის სრულებით უსარგებლო იყოს, საზარალოც კი, მაგრამ ამავე ჯროს სა\* ეადო ცხოვრებაში სარგებლობა მოჰქონდეს. რომელიმე მილიონერის სიცოცხლისათვის სულ ერთია, შესწირავს თუ არა თავისი სიმდიდრის ერთ ნაწილს რაიმე საქველმოქმედო საქმეს; მაგრამ მათთვის ვის ინტერესსაც ეს საქმე წარმოადგენს, სულ ერთი არ არის... რომელიმე უაიტის სიცოცხლისათვის სულ ერთია, მოიგონებს თუ არა ის ორთქლის ქვაბს; მაგრამ კაცობრიობისათვის კი სულ ერთი არ არის: ორთქლის ქვაბი რომ დღემდე არ გამოეგონებიათ, დღევანდელი ევროპაც ის არ იქნებოდა, რაც ახლა არის და სხვა და სხვა. ხელოვნების საგნად სპენსერი მშვენიერებას სახავს და რადგანაც, მისი აზრით, მშვენიერება და სარგებლობა ერთიმეორეს არ ეთანხმება. ის, ვისაც სარგებლობა მიზნად დაუსახავს, ამით მშვენიერებას უარყოფს; ამიტომ ხელოვნებამაც სარგებლობას თავი უნდა დაანებოს. ბურჟუაზიული ფილოსოფოსის ასეთი აზრი და ადამიანის ინტერესთა აბუჩად აგდება მე სრულებით არ მაკვირვებს, რადგან მჯერა, რომ კლასიური ფსიქოლოგია და კლასიური ინტერესებით დაბრმავება ადამიანს რა ნიჭის პატრონიც უნდა იყოს, ბევრ სიყალბეს ჩაადენინებს საბრალო ობიექტიური ჭეშმარიტების სახელით: ხოლო გასაოცარია, სადამდის მიიყვანა სპენსერი თავისმა თეორიამ;

ის ამტკიცებს: კონტრასტი მშვენიერების აუცილებელ პირობას შეადგენს, და რადგანაც კონტრასტი უფრო წარსულშია, ვიდრე აწმყოში. ამიტომ ხელოვნებაშიც აწმყოს თავი უნდა დაანებოს და თავის საგნად წარსული გაიხადოსო. კიდეც იღბალი, რომ ჩვენი წარსულის ჰირსიუფალი მწერლები სპენსერს ნაკლებად იცნობდნენ, თორემ თქვენი მტერი: მარტო წარსულის გლოვაში ამოხდებოდათ სული! სპენსერის ესთეტიური თეორია დღეს ყველაზე გავრცელებულია; გავრცელებულია იმიტომ, რომ დღეს დიდსაც და პატარასაც, მეცნიერსაც და უბრალო მოკვდავსაც ენაზე ევოლუციონიზმი აკერია; ყველგან ევოლუციას ხედავენ, ყველაფერში ევოლუციონიზმის გამოკრევეა უნდათ და, რადგანაც სპენსერმა თავის თეორია ევოლუციონიზმის კანვაზე მოქაჩა, ეს ფაქტი სავსებით საკმარისია, რომ, მისი თეორია უტყუარ მცნებად აღიარონ. როგორც ზემოთაც დავინახეთ, სპენსერის თეორიაში ორი მთავარი მუხლია: 1. ესთეტიური ნაწარმოებნი ანუ ხელოვნება აღძრავს ადამიანში ესთეტიურ გრძნობას; 2. ესთეტიური გრძნობა უსარგებლო თამაშია, რომლის პირდაპირი მიზანი ესთეტიური სიამოვნება არის. თუმცა აქედან სპენსერს პირდაპირი დასკვნა არ გამოჰყავს, მაგრამ მკითხველისათვის ცხადია, რომ ამ ორი მუხლიდან მხოლოდ ერთადერთი დასკვნაა შესაძლებელი, ის რომ ხელოვნება ადამიანს უმთავრესად ესთეტიურ სიამოვნებას ანიჭებს. თუმცა, სპენსერი დიდი სახელმძღვანელო ფილოსოფია, მაგრამ მე, ჩვეულებრივ მოკვდავს, მისი ესთეტიკური თეორია შეცდომად მიმაჩნია. ჯერ ერთი ფიზიკურ თამაშსა და მწერლის გონებრივ მუშაობაში, როცა ის ხელოვნურ ნაწარმოებს ქმნის, ან მკითხველის გონებრივ პროცესში, როცა ის ხელოვნურ ნაწარმოებს კითხულობს, არავითარი მსგავსება არ არის. მართალია, სპენსერმა ადამიდან დაიწყო და შორს გამოუნახა საფუძველი თავის თეორიას, როდესაც კატასა და ძაღლებს მიმართა, მაგრამ იმის დამტკიცების ნაცვლად, რომ კნუტის თამაში და ვირთავისაგან ხის ღრღნა ადამიანის ხელოვნების ან ესთეტიურ გრძნობათა პროტოტიპია, მან მარტოდონ ანალოგიების მეტი არა მოგვეცა რა. საზოგადოდ, სპენსერს ანალოგიები ძალიან უყვარს. მთელი მისი სოციოლოგია ამ ანალოგიებზე არის აშენებული. ამ ანალოგიების მიხედვით აღიარა მან საზოგადოება ორგანიზმად, პარლამენტი სოციალური ორგანიზმის ტვინად და ტელეგრაფის მავთულები ნერვებად. მაგრამ თვით ეს მაგალითებიც ცხადად გვიჩვენებენ, რომ ანალოგიებით არაფრის დამტკიცება არ შეიძლება, გარდა საკუთარი თვალთმაქცობისა. „მოქმედებანი, რომლებსაც თამაშს ვუწოდებთ, ესთეტიურ მოქმედებებს იმ საერთო ხაზით უერთდებიან,

რომ არც პირველი და არც მეორე არ ეხმარებიან პირდაპირ იმ პროცესებს, რომლებიც სიცოცხლისათვის არიან დანიშნულნი, — წერს სპენსერი<sup>1</sup>; მაგრამ ნუთუ ასეთი ზოგადი მსგავსება საკმარისია. რომ ხელოვნებისა და თამაშის სათავედ ერთი და იგივე იმპულსი ვაღიაროთ? ასეთი მეთოდით ყოველგვარი უმსგავსოების დამტკიცება შეიძლება; მაგალითად, — კოპერნიკის, ნიუტონის, დარვინის სამეცნიერო მუშაობა სრულებით არ ეხმარება იმ პროცესებს, რომლებიც სიცოცხლისათვის არიან დანიშნული; ამგვარად, მათაც კჭონიათ საერთო ხაზი თამაშთან; მაგრამ ნუთუ ამ მეცნიერთა მუშაობასა და თამაშს ერთი და იგივე სათავე აქვს? კნუტის თამაშობიდან რომ ვინმე მკვლევარი თანდათანობით ხელოვნებამდე მივიდეს, შეუძლებელია, რადგანაც, ერთი მხრით, თამაშობა და, მეორე მხრით, ხელოვნება სრულიად სხვადასხვა პროცესია. შეიძლება მათ შორის რაიმე ანალოგიური მსგავსება იყოს, მაგრამ მათი სათავე ერთი და იგივე არ არის: თამაშია ფიზიკური პროცესი, ხელოვნება კი აზროვნებითი, ფსიქოლოგიური. მეცნიერება ჯერ არ არის იმდენად განვითარებული, რომ ცხოველთა საზოგადოებაში და ბუნებაში აღმოაჩინოს ყოველივე იმის ნიშნები, რაც ადამიანის ბუნებაში და საზოგადოებაში არსებობს. ევოლუციონიზმს, როგორც მეთოდს, შეუძლია ადამიანთა ცხოვრების ბევრი საიდუმლოების გარკვევა, როცა ის ადამიანთა ისტორიის ან ისტორიის წინა დროთა საზღვრებს არ სცილდება, როცა დღევანდელი ცხოვრების სათავეს ველური ადამიანის ცხოვრებაში ეძიებს; მაგრამ როდესაც ის ადამიანს თავს ანებებს და პირუტყვის მიმართავს, რომ აქ დაგვანახოს ყოველივე იმის ნიშნები, რაც ადამიანის ფსიქიკაშია, ამ შემთხვევაში ევოლუციონიზმი დღესდღეობით უძლურია. ეჭვს გარეშეა, თუკი ადამიანი მხოლოდ უმაღლესად განვითარებული ცხოველია, რის უარყოფაც აღარ შეიძლება, მისი ფსიქიკის ელემენტები პირუტყვის ფსიქიკაში უნდა იყოს, მაგრამ რომელიმე კნუტსა და ადამიანს შორის იმდენი განსხვავებაა, რომ ამ ელემენტების პოვნას მეცნიერებამ ჯერჯერობით თავი უნდა დაანებოს.

■

როგორც ზემოთა ვთქვი ხელოვნება ფსიქოლოგიური პროცესია. დღევანდელი ფიზიოლოგიური ფსიქოლოგია თავის ძირითად ელემენტად წარმოდგენას აღიარებს. წარმოდგენათა შეერთებით ის ხსნის ყოველგვარ ფსიქოლოგიურ აქტს, როგორც მარტივს, ისე

<sup>1</sup> Основная психология, 1898 г., стр. 413.

რთულს. წარმოდგენას ადამიანის ტვინში იწვევს მგრძობელობა (ощущение). ყოველი მგრძობელობის მიზეზი არის, ერთი მხრით, ჩვენს გარეშე, მეორე მხრით, ჩვენში. ჩვენ გვაქვს გრძობის რამდენიმე ორგანო. იმოქმედებს თუ არა გარეშე მიზეზი გრძობის რომელსაზე ორგანოზე, ეს მოქმედება ნერვების შემწეობით გადაეცემა თავის ტვინში მგრძობელობის ცენტრებს<sup>1</sup> და ამგვარად ამ ცენტრებში დაიბადება მგრძობელობა. ეს ცენტრები წვრილი ნერვების შემწეობით უერთდებიან წარმოდგენის ცენტრებს; მგრძობელობა გადაეცემა ამ ცენტრებს პირველი ცენტრებიდან და ამგვარად ჩნდება წარმოდგენა. ამ უქანასქნელი ცენტრების ძირითად თვისებას ის შეადგენს, რომ მას შეუძლია როგორც წარმოდგენათა აღძვრა, ისე წარმოდგენათა შერჩენა, რასაც მდაბიურად მენსიერებას ვეძახით. რანაირად ჩნდება ნერვების ცენტრებში გრძობელობა. წარმოდგენა და წარმოდგენათა შეერთებით მთელი აზროვნება, ეს სრულებით გაუგებარია. რადგანაც ყოველგვარი ხელოვნების სათავე. როგორც ფსიქიური აქტის, წარმოდგენაა, წარმოდგენის გამომწვეველი კი გარეშე მიზეზია და ადამიანის ფსიქიკა, აქედან ცხადია. რომ ყოველი ხელოვნება ნაყოფია ორი ფაქტორის: გარეშე მიზეზისა და მწერლის ფსიქიკისა. როგორც ყოველი ფსიქიკური აქტი, ხელოვნებაც რეფლექტორული აქტია. რა არის რეფლექსია, ამას ახლავს ავსსნი. მძინარე ბავშვს რომ ფეხზე ნემსი უჩხვლიტოთ, ის ფეხს გაანძრევს; ამგვარსავე მოვლენას ჩვენ ვხედავთ ყველა ცხოველში, რომლებსაც ნერვები აქვთ. ამოუჭერით ბაყაყს თავის ტვინი და დასვით ერთ ალაგას. რამდენხანსაც უნდა გააჩეროთ ასე ბაყაყი, ის ალაგიდან არ დაიძვრის. მაგრამ ნემსი რომ უჩხვლიტოთ ფეხზე, მაშინვე გადახტება; სიმკვავე რომ წასცხოთ რომელიმე ალაგას, ეცდება, ფეხით სიმკვავე მოიცილოს. ამ, მოვლენას უწოდებენ ოჯულექსს.

როგორ ხსნის თანამედროვე მეცნიერება რეფლექსს? ყოველგვარი რეფლექტორული მოძრაობისათვის საჭიროა გრძობის ნერვი ცენტრი; რომელსაც ეს ნერვი უერთდება, და მოძრაობის ნერვი. რომელიც ამ ცენტრიდან გამოდის, მაგალითად, თქვენ უჩხვლიტოთ მძინარე ბავშვს, ფეხზე ნემსი. ის ამ დროს ტკივილს ვერ გრძობს; რომ იგრძნოს, გამოელვძება, მიუხედავად ამისა, ფეხი

<sup>1</sup> ცენტრი ჰქვია ნერვული უჯრედების გროვას, რომელიც ერთ განსაზღვრულ ფუნქციას განაგებს.

იქით მიიქვს, ამის მიზეზი აი, რა არის: ფეხის კანში გაფანტულია გრძნობის ნერვები. როდესაც თქვენ ბავშვს ფეხში უჩხვლიტეთ. ამით გრძნობის ნერვი (ერთი ან რამდენიმე) გააღიზიანეთ. ეს გაღიზიანება გარდაეცა ხერხემლის ტვინში იმ ცენტრს, რომელსაც გაღიზიანებული ნერვი უერთდება. ამ ცენტრიდან მოდის ფეხის უნთებისაკენ მოძრაობის ნერვი; გაღიზიანება ცენტრიდან ამ ნერვზე გაშვებულია, ამ ნერვმაც უნთები შეამოკლა და ამგვარად, ფეხი აამოძრავა. ყოველი რეფლექტორული აქტი აუცილებელია: თუკი არსებობს გარეშე მიზეზი, რეფლექსი უსათუოდ გაჩნდება. რეფლექტორული ცენტრები ხერხემლის ტვინშია. თავის ტვინში ასეთი ცენტრები ჯერ ვერავის უპოვია. მაგრამ ასეთი ცენტრების არსებობაზე ბევრი ფაქტი მიგვითითებს. შედარებით ანატომია უეჭველს ხდის, რომ თავის ტვინი უმაღლესად განვითარებული ხერხემლის ტვინია. ანატომიაში თანდათან მკვიდრდება აზრი, უკვე გოეთეს მიერ გამოთქმული. რომ თავის კეფის ძვლები იგივე ხერხემლის ძვლებია, რომლებსაც დიდი ხნის განმავლობაში დიდი ცვლილება განუცდიათ. არის ერთი უმდაბლესი ხერხემლიანი ცხოველი, amphioxus Lan-  
ceolus, რომლის თავის ტვინი და ხერხემლის ტვინი ერთიმეორისაგან არ განირჩევა; ამ ცხოველში თავის ტვინი ჯერ იმდენად ვერ განვითარებულა, რომ ხერხემლის ტვინიდან გამოყოფილიყოს. მრგვალპირიან თევზებში თავის ტვინი ცოტათი მომსხმოა ხერხემლის ტვინზე და ამით განირჩევა უკანასკნელისაგან.

აქედან დაწყებული რამდენიც უფრო განვითარებულია ცხოველის ორგანიზაცია, იმდენად უფრო მსხვილი თავის ტვინი აქვს, ე. ი. თავის ტვინი იმდენად უფრო დაწინაურებია განვითარებაში ხერხემლისას. თუკი თავის ტვინი ხერხემლის ტვინიდან განვითარდა, ხერხემლის ტვინში კი რეფლექტორული პენტოზებია, აშკარაა, ასეთი ცენტრები თავის ტვინშიც უნდა იყოს, მაგრამ თავის ტვინის ბოქმედება იმდენად რთულია და მრავალგვარი, რომ ამ რეფლექტორული ცენტრების გამოცალკევება და გამოაშკარავება ჯერ ვერავის მოუხერხებია. თავის ტვინის მოქმედება იმდენად წააგავს რეფლექტორულს, რომ ეჭვს გარეშეა, ყოველი ფსიქიური აქტი იგივე რეფლექსია, იმ განსხვავებით, რომ თავის ტვინში აღძრულ რეფლექსს ჩვენ ვგრძნობთ. თავის ტვინის მოქმედება რეფლექსებად პირველად სეჩენოვმა აღიარა. როდესაც სამოცდაათიან წლებში მისი შესანიშნავი წიგნი „თავის ტვინის რეფლექსები“ გამოვიდა. როგორც რუსეთში, ისე საზღვარგარეთ საშინელი პოლემიკა და კრიტიკა გაიმართა. სეჩენოვს მაშინ ძალიან ცოტა მომხრე გამო-

უჩნდა, მაგრამ დღეს მისი მომხრეთა რიცხვი სწრაფად იზრდება. ჯერ სრულებით ახალგაზრდა ფიზიოლოგიური ფსიქოლოგია სწრაფად იზიდავს მეცნიერებს; ის უარყოფს თავისუფალ ნებას, ქადაგებს სრულ დეტერმინიზმს ფსიქიკის მოქმედებაში და ფსიქოლოგიაში დეტერმინიზმის შემოტანა ხომ იგივე რეფლექსებით ახსნა არის თავის ტვინის მოქმედებისა. ხელოვნება, როგორც ფსიქიური აქტი, თავის ტვინის რეფლექსებად უნდა ჩავთვალოთ. პოეტი, რომლის ფსიქიკაში, გარეშე მიზეზი სხვადასხვა წარმოდგენებს იწვევს, ადრე თუ გვიან კალამს იღებს ხელში, რომ თავისი წარმოდგენანი გარეთ გამოიტანოს, როგორმე გამოხატოს; ან გარეშე მიზეზთაგან აღძრული წარმოდგენანი წარმოშობს მასში სხვადასხვა გრძნობებს, ემოციებს, და ის კალამს იღებს, რომ თავისი სულისა და გულის მოძრაობა გამოხატოს. ამაში მე ვხედავ მხოლოდ ასაცილებელ რეფლექტორულ აქტს. თუ ხელოვნების პროცესი რეფლექტორულია, რატომ ყველა ხელოვანი არ არისო, იკითხავს მკითხველი. შემცდარია ის აზრი, ვითომ ხელოვნის ნიჭი სრულებით დამორბეული იყოს არახელოვანის ნიჭს, სახელოვნო ნიჭის ნასახი ყოველ ადამიანს აბადია. აიღეთ ბავშვი, რომელიც თოვლის კაცს აკეთებს; ამ თამაშში უსათუოდ არის ხელოვნების ნიშნები. ყოველ ჩვენგანს ხასიათად სჭირს, თუ რამე ნახა, ან გაიგონა საყურადღებო, უსათუოდ სხვასაც შეატყობიოს. ძვირად ნახავთ ადამიანს, რომელსაც სიყმაწვილეში ან ლექსი ან რაიმე მოთხრობა არ დაეწეროს. შეიძლება ერთი და მეორეც ძალიან შორს იყოს ხელოვნებაზე, მაგრამ ასეთი პროცესი უეჭველი მსგავსებაა სახელოვნო პროცესის. ამგვარი მაგალითები შეიძლებოდა ბევრი მომეყვანა, მაგრამ აქედანაც ცხადია. რომ ხელოვანის ნიჭი იგივეა, რაც ჩვეულებრივი ადამიანის, მხოლოდ პირველ შემთხვევაში ეს ნიჭი ერთი მიმართულებისაკენ უმაღლესად არის განვითარებული, მეორე შემთხვევაში კი არა. რად ვითარდება ერთ შემთხვევაში ეს ნიჭი, მეორეში კი არა, რად არის ერთი ხელოვანი ძლიერი, მეორე კი სუსტი და სხვა. ამგვარი კითხვები ჯერჯერობით სრულიად გაუგებარია და აუხსნელი. აქ მნიშვნელობა უნდა ჰქონდეს მემკვიდრეობას, იდეათა ასოციაციის მრავალგვარობას და სიმდიდრე-სიღარიბეს, რეფლექსების სისწრაფე-სიძლიერეს, მაგრამ, ვიმეორებ, ასეთი კითხვები დღევანდელი მეცნიერებისათვის მიუვალ სიმაგრეს შეადგენენ...



თუმცა სახელოვნო პროცესი აუცილებელია, მაგრამ აქედან ის დასკვნა როდი გამოძინარეობს, ვითომ ხელოვნების მსახურს არა-

ვითარი მიზანი არ უნდა ჰქონდეს დასასული. როგორც ყოველი  
 მოღვაწე, ისიც რაიმე მიზანს უნდა მისდევდეს. პირველი შეხედვით,  
 ეს აზრი მკითხველს პარადოქსად მოეჩვენება; ის უსათუოდ იფიქ-  
 რებს: თუ კი სახელოვნო პროცესი რეფლექტორულია და მიზანს  
 მოკლებულია. მაშასადამე, მწერალიც მორჩილია ამ პროცესს. მას  
 არ შეუძლია ის წარმოდგენანი და გრძნობები არ გამოხატოს, რომ-  
 ლებიც მას ამ დროს აღელვებენ. მაშ მიზანის დასახვას რაღა მნიშ-  
 ნელობა აქვს! მაგრამ აქ რომ არავითარი პარადოქსი არ არის.  
 ამას ახლავ დაენახვებ მკითხველს. მიემართოთ მაგალითებს. საკმ-  
 ლის მიღება, საზრდობა აუცილებელი პროცესია: თუ მოშვიდა ადა-  
 შიანს, ეს გრძნობა მას ძალას ატანს. საზრდო მიიღოს. მიუხედავად  
 ამისა, ადამიანს შეუძლია, ამ აუცილებელ პროცესს მიზანი მოუნა-  
 სოს და ის ასეც ირჩება: ცდილობს საზრდო მ-სთვის მარგებელი  
 იყოს. და ყოველგვარ მახარალებელ ნივთიერებას ერადება. თუ  
 არსებობს გარეშე მიზეზი. მგრძნობელობა აუცილებელ პროცესს  
 შეადგენს ადამიანის ბუნებაში; რამდენიც უნდა ვეცადოთ მგრძნო-  
 ბელობას ვერ მოვსაბოთ; მაგრამ აქედან ის დასკვნა არ გამოდის.  
 ვითომ შეუძლებელი იყოს მგრძნობელობა მიზანს შეეუფართოდ.  
 გამოცდილებამ ყოველი ჩვენგანი დაარწმუნა, რომ ზოგი მგრძნობე-  
 ლობა სასიამოვნოა, ზოგი კი უსიამო; ამიტომ ყოველი ჩვენგანი  
 ეტანება სასიამო მგრძნობელობას, უსიამოს კი ერიდება და ხშირად  
 თავიდან იცილებს, თუმცა ერთიც და მეორეც ერთიანად აუცილე-  
 ბელია. შეიძლება, ბევრი მოიხანახოს მაგალითები, რომ რაიმე პროცე-  
 სის თვითარსი, ობიექტური უმიზნობა სრულებით არ აიძულებს ადა-  
 შიანს, საკუთარ მიზანს თავი დაანებოს და ბუნების ხელში უსულ-  
 გულო ავტომატად გადაიქცეს. მაშ, როგორ შეიძლება. ხელოვანმა  
 მიზანი დაისახოს. როდესაც სახელოვნო პროცესი უმიზნოა? ჩვენ  
 ვიცით. რომ ეს პროცესი რეფლექტორულია, მისი წარმომშობია,  
 ერთი მხრით. გარეშე მიზეზი. მეორე მხრით, ხელოვანის ფსიქიკა.  
 ერთი მიზეზი იწვევს ხელოვანში შესაფერ წარმოდგენებსა და  
 გრძნობებს ანუ შესაფერ ხელოვნებას. მეორე მიზეზი თავის შესა-  
 ფერს ანუ სხვაგვარს. მესამე კიდევ სხვაგვარსა და სხვა. ყოველგვა-  
 რი წარმოდგენანი და გრძნობები რომ ერთნაირი ღირსებისა და ფა-  
 სის იყენენ ხელოვნის თვალში. შეუძლებელია; უსათუოდ ერთს ის  
 მეტს მნიშვნელობას აძლევს. მეორეს ნაკლებს, მესამეს არავითარს  
 ამიტომ მას სრული უფლება აქვს და შეუძლია კიდევ. ეპიოს ისეთი  
 გარეშე მიზეზები, რომლებიც მასში იწვევენ მნიშვნელოვან წარ-  
 მოდგენებს და გრძნობებს; ისეთ მიზეზებს კი, რომლებიც მის



თვალში უმნიშვნელო წარმოდგენებს და გრძნობებს იწვევენ. ყურადღება არ მიაქციოს, ერიდოს. ამგვარად. მისი სახელოვანი პროცესი ისევ ისე რეფლექტორული, აუცილებელი დარჩება და თავისთავად უმიზნო, ხოლო თვით ხელოვანის მიერ საზრიანად მიმართული მიზნისაკენ. აიღეთ მთელი ის დარგი ხელოვნებისა, რომლის სიუჟეტიც ისტორიიდან არის აღებული. ისტორიული სიუჟეტების მოწამე თვითონ მწერალი არ არის, მათსადაც, არც შეიძლება თქმა, მწერალმა დაინახა და უმიზნოდ დახატაო. ყოველი მწერალი სანამ სახელოვნო ნაწარმოებს დაწერდეს ისტორიული შინაარსისას, სწავლობს შესაფერ ეპოქას, ჩხრეკს არქივებს, ოქმებს და სხვ. აქედან აშკარაა. მწერალი წინდაწინვე გამორკვეული და განსაზღვრული მიზნით შეუდგება ხოლმე შრომას.

რა საზომით უნდა ხელმძღვანელობდეს მწერალი, რომ გაარჩიოს. როგორ წარმოდგენებსა და გრძნობებს მეტი ფასი აქვთ, როგორს ნაკლები, როგორს სულ არავითარი ე. ი. რაში უნდა მდგომარეობდეს ყოველი ხელოვნის მიზანი? ხელოვნების მიზნის შესახებ სხვადასხვა დროს სხვადასხვა აზრი არსებობდა. მაგალითად, ენციკლოპედისტთა (ვოლტერი, დიდრო და სხვ..) აზრით, ხელოვნების მიზანი თავისუფლება არის. კანტი ამტკიცებს, ხელოვნების მიზანი მშვენიერებააო. საფრანგეთის მწერალი ტეოფილ გოტიე ქადაგებს *Jart pour Jart* ღიუმა -- მამა ამტკიცებს: ხელოვნების მიზანი საზოგადოებრივი სარგებლობა არისო. შესანიშნავი ფსიქოლოგი ბენი თავის ფსიქოლოგიაში აღიარებს: ხელოვნების პირდაპირი მიზანი სიამოვნება არის და ამიტომ ყოველისფერი. რაც სიამოვნებას ხელს უშლის. ხელოვნებიდან განდევნილი უნდა იყოსო; სიამოვნების მიზანს ემხრობა სპენსერიც; გიუიო თავის ესთეტიკაში ამ აზრის არის: სასარგებლოა. მშვენიერი და საამო თავდაპირველად ერთი და იგივე იყო. მათსადაც. ხელოვნების მიზანიც სარგებლობა არისო, და სხვა და სხვ. ხელოვნების ყოველი მსახური მე მიმაჩნია საზოგადო მოღვაწედ. საზოგადო მოღვაწეობა მხოლოდ სამგვარია: სასარგებლო და საზარალო. ვინც საზოგადო მოღვაწეობის ასპარეზზე გამოდის. მას სახეში უნდა ჰქონდეს მხოლოდ და მხოლოდ საზოგადოებისათვის სასარგებლო მოღვაწეობა და ეს ასეც იყო ყოველ დროს. ძვირად გამოსულა საზოგადო ასპარეზზე მოღვაწე იმ მიზნით, რომ საზოგადოებისათვის ზარალი მოეტანოს, ან უქმად წყალი ენაცოს და არა გაეკეთებინოს რა. აიღეთ რა მავნებელი მოღვაწეც გინდათ, რა ზარალიც უნდა მოეტანოს მას საზოგადოებისათვის, უმეტეს შემთხვევაში, ის დარწმუნებული იყო, რომ სარგებლობა მოკ-

ქონდა: არიან. რასაკვირველია, ისეთი მოღვაწეები, რომლებიც საზოგადო საქმის ქერქში პირად ინტერესებს და ანგარიშებს ახევენ და შეგნებულად საზარალოდ მოქმედებენ. მაგრამ ასეთ მოღვაწეს საზოგადო საქმე კი არა აქვს სახეში, არამედ თავისი საკუთარი „მე“ და ამიტომ ჭეშმარიტი მოღვაწეობის კვლევაში მათი მაგალოთები არაფერს არ გვეუბნება, იმის მეტს. რომ დაბალი მიმართულების აუპიანი ყოველთვის იყო და არის.

ზემონათქვამიდან ის აზრი გამომდინარეობს, რომ ხელოვნების ერთადერთი მიზანიც საზოგადოებრივი სარგებლობა უნდა იყოს. ყოველივე ადამიანისაკენ, ყოველივე ადამიანისათვის, აი, რა უნდა იყოს ყოველი მოღვაწის და აგრეთვე ხელოვანის დევიზი.

როდესაც ხელში აიღებთ რომელსამე გამოკვლევას ესთეტიკის შესახებ, ერთ გასაოცარ მოვლენას დაინახავთ: ყოველ ავტორს, მეტაფიზიკოსი იქნება ის, პოზიტივისტი, თუ ევოლუციონისტი, აქსიომად დაუსახავს კანტის აზრი. რომ ხელოვნების მიზანი მშვენიერებაა. ან ხელოვნება თვითმშვენიერებად მიაჩნია. და ყველა მარტო იმას ცდილობს, რომ განმარტოს ეს მშვენიერება და გამოიკვლიოს მისი კანონები. იყო დრო, როდესაც ლიტერატურას ყველა თვლიდა მაღალი წოდების გასართობ ვარჯიშობად: მწერლები მხოლოდ ამ წოდებისათვის წერდნენ. მხოლოდ მისი სიამოვნება ჰქონდათ მხეველობაში. სხვა არაფერი. ამიტომ სრულებით ჩვეულებრივია. თუ ასეთ დროს ქადაგებდნენ: ლიტერატურამ ცხოვრება უნდა უარჰყოს, მისი მიზანი მშვენიერებაა, ის თვით არის მშვენიერებაო და სხვა ამგვარი. მაგრამ ჩვენს დროშიც რომ ასეთი ქადაგება კიდევ მძლავრად გაისმის, ეს კი გასაოცარია. საფრანგეთის ნიჭიერი ფილოსოფოსი გიუიო თუმეცა სპენსერისა და კანტის აზრის სრული წინააღმდეგია, მაგრამ ხელოვნების მიზანი რომ მშვენიერებაა. მასაც აქსიომად მიაჩნია, ხოლო ამტკიცებს: თავდაპირველად სასარგებლო. მშვენიერი და საამო ერთი და იგივე იყო; და ამგვარად, ხელოვნების საბოლოო მიზნად სარგებლობას აღიარებს. ზოგიერთი მისი საბუთი ჭეშმარიტია, მაგრამ მშვენიერი და სასარგებლო ერთი და იგივეც რომ არ ყოფილიყო თავდაპირველად. ეს მაინც არ ამტკიცებს. ვითომ ხელოვნების მიზნად მშვენიერების დასახვა აქსიომა იყოს. დღეს ასეთი ქადაგება: ხელოვნების მიზანი მშვენიერებაა, ხელოვნება თვით მშვენიერებააო, უარყოფილი უნდა იყოს. ხელოვნება მღბაძვას სინამდვილისა. მიუხედავად იმისა. მშვენიერი იქნება ეს სინამდვილე. თუ არა. სახელოვნო პროცესში მე ვერ ვამჩნევ ვერაფერს ისეთს, რაც ოდნავ მაინც მეუბნებოდეს: მშვენიერება ჩემი

მიზანიაო. ან რა არის თვით მშვენიერება? ამის რიგიან პასუხს ვერც ერთი მკვლევარი ვერ მოგუემთ.



ყოველ მკითხველს შეუძლია, იკითხოს: რად უნდა იყოს საზოგადოებრივი სარგებლობა ხელოვნების მიზანიაო? ასეთი კითხვა საფუძვლიანია და ვეცდები. შეძლებისდაგვარად ავხსნა. წარმოიდგინე, მკითხველო. რომ ქვეყნიერება მრავალ პატარა კუნძულებად არის დაყოფილი. თვითეულ კუნძულზე მხოლოდ ერთი ადამიანი ცხოვრობს: ერთმანეთთან მიმოსვლა მათ არც შეუძლიათ, არც საჭიროებენ. მხოლოდ დროგამოშვებით ქალსა და მამაკაცს საშუალება ეძლევათ. ერთმანეთი ინახულონ, რის გამოც კაცობრიობა შეუფერხებლად მრავლდება. ყოველ ახალ წევრს საკუთარი კუნძული ეძლევა. ამგვარად. არაერთი საზოგადოება არ არსებობს, ყოველი ადამიანი ცხოვრობს თავისთვის. საზოგადოების გარეშე. ამჟამად. ასეთ ადამიანს არავითარი წარმოდგენა არ ექნება რაიმე ზნეობაზე და მოვალეობაზე. ამგვარ ადამიანს სრული უფლება აქვს იცხოვროს ისე, როგორც მას უნდა. იმოქმედოს და იფიქროს. როგორც ენებება არავითარი დაბრკოლება. არავითარი შეზღუდვა უფლებათა მისთვის არ არსებობს. ბუნებამ ისე მოაწყო მისი აგებულება. რომ ყოველ უჯრედს ინსტინქტურად გამჭდარი აქვს სიცოცხლის უსაზღვრო სიყვარული: მის ნერვებს მგრძნობელობის თვისება აქვთ, მას ეს კი შეუნიშნავს, რომ ზოგიერთი მგრძნობელობა მისთვის სასიამოვნოა. ზოგი კი უსიამო; დაუევირდება თავის ბუნებას და მალე დარწმუნდება, რომ სასიამო გრძნობელობა მისთვის მარგებელია, უსიამო კი მაზარალებელი. რადგანაც სიცოცხლის ინსტინქტური სიყვარული სარგებლობისაკენ იწევს, ზარალს კი გაუბრძის, ამიტომ ჩვენი ჰიპოტეტური ადამიანი თავის მოქმედებაში მხოლოდ საკუთარი სიამოვნებით, საკუთარი სარგებლობით იხელმძღვანელებს, რატომო, თუ იკითხავთ, იმიტომ, რომ საზოგადოდ, ყოველი ცხოველისა და ადამიანის ორგანიზაცია ასეთია, ეს კანონი ფიზიოლოგიურია და არა ჩემ მიერ გამოგონილი; ალტრუისტული გრძნობანი რომ განუვითარდეს. შეუძლებელია. რადგანაც მთელ კუნძულზე ის ერთადერთი ადამიანია. გაიარა ასეთ მდგომარეობაში დიდმა დრომ, ხალხი ისე მომრავლდა. რომ ცალკე კუნძული აღარავის გაწვდა და კერძო ცხოვრება თანდათან საზოგადოებრივ ცხოვრებად შეიცვალა. ადამიანი საზოგადოებრივ არსებად გადაიქცა. პირველ ხანებში ასეთი ადამიანი თავის მოქმედებაში ისევე საკუთარი სარგებლობით იხელმ-

ცვანელებს. ისე როგორც წინათ. ინდივიდუალური ცხოვრების დროს: მაგრამ მალე შენიშნავს, რომ მისი ცხოვრება საზოგადოებაში იმდენად უწყალო აღარ არის, როგორც კუნძულზე იყო: იქ ყოველგვარ სურვილს ისრულებდა. მოქმედებაში მიაი ხელისშემშლელი არავინ იყო, აქ კი თავის ბევრ სურვილს ვერ იკმაყოფილებს. საოგებლობის მაგიერ ხშირად ზარალშიც ვარდება. თუ ეს ადამიანი ამ ახალ ცხოვრებას ჩაუკვირდება. დარწმუნდება რომ ცვლილების მიზეზი ის არის, რომ ყოველი წევრი, რომლებისაგანაც საზოგადოება შედგება, მასავით მხოლოდ საკუთარი სარგებლობით ხელმძღვანელობს და ამასთან ხელმძღვანელობს განუსაზღვრელად. რადგანაც მათი მოთხოვნილება მარტივია. თითქმის მხოლოდ ფიზიოლოგიური, ანტიომ სარგებლობისა და სიამოვნების წყარო ყველააათვის ერთი და იგივეა. ყველა აქეთ ეტანება განუსაზღვრელად და ერთიმეორეს ხელს უშლის. ასეთი საზოგადოების წევრნი, როცა იქნება, მივლენ იმ დასკვნამდე, რომ საჭიროა საკუთარი სარგებლობით ხელმძღვანელობის შეზღუდვა იმდენად, რომ ერთმანეთს ნაკლებად აზარალონ და ამით არსებულ პირობებში ყოველმა ადამიანმა, რაც შეიძლება ნეტი სარგებლობა გამოიხსოს. მეტი სიამოვნება მიიღოს. რაკი ერთხელვე მივლენ ასეთ დასკვნამდე, ან პირობას დადებენ, რომ მოქმედების დროს ერთი მეორის ინტერესებიც სახეში იქონიონ და ამით თავისი მოქმედება შეზღუდონ; თუ თავის ნებით არ შეთანხმდებიან, სულ ერთია—აღრე თუ გვიან ცხოვრება თვით აიძულებს, რომ ამ გზას დაადგინენ: ყოველი საზოგადოება იმ გზა ირჩევს, რომლის ბოლოშიც უფრო მეტი ბედნიერებაა არსებულ პირობებში. დაადგება თუ არა ჩვენი ჰიპოტეტური საზოგადოება ამ გზას. ამით ის აარსებს ზნეობის პირველ პრინციპს: იცხოვრე ისე, რომ შენს საზოგადოების წევრს რაც შეიძლება ნაკლებად აზარალო. გავდა რამდენიმე საუკუნე: ხალხი გამრავლდა. ცხოვრება გართულდა, მოთხოვნებიდან დაკმაყოფილება მარტო საკუთარის ძალ-ღონით გაძნელდა. ამ დროის ჰიპოტეტური ადამიანი დაკვირვებიდან უსათუოდ გამოიტანს იმ დასკვნას, რომ ხანდახან სხვისთვის სარგებლობის მოტანა შენთვისაც სასარგებლოა. მაგალითად, მოკლა ერთმა გაბეჯელი ხარი; ხანამ სულ შექამდა, მატლი დაესია, აუყროლდა. ასეთმა ხორცმა აწყინა და იძულებული გახდა. გადაეგდო. მის მეზობელს კი ამავე დროს მთელი კვირის განმავლობაში ვერა მოუყლავს რა და ხან მშვიერია, ხან ბალახით საზრდოობს. რამდენსამე მის შემდეგ მისმა მეზობელმა ხარი მოკლა, მან კი ვერაფერა; ის მზიერი დარჩა. მის მეზობელს კი კიდევ აუყროლდა ხორცი და მ-

სავით გადასაგდები გაუხდა. ერთსაც და მეორესაც. როდესაც მეორედ მოკლავენ დიდ ნადირს. კარგად ეცოდინებათ, რომ სულ ვერ შეკამენ, ამიტომ, როცა იქნება. ამ დასკვნამდე მივლენ: რაც მეტია, მეზობელს მივცემ და. როცა მას ექნება, ის მე მომცემსო, ვამეორებ. ასეთი მაგალითები ნელ-ნელა დაარწმუნებს ჩვენი ჰიპოტეტური საზოგადოების წევრებს. რომ ერთმანეთის დახმარება სასარგებლოა.

როგორც დავინახეთ, საზოგადოებრივი ცხოვრება ადამიანის თავისუფლებას ზღუდავს. ბორკავს. საკუთარი სიამოვნებისა და სარგებლობის უსაზღვრო სიყვარული ასეთ შებორკვას უსათუოდ ეწინააღმდეგება და უეჭველია, როცა იქნება, გამოჩნდებიან ისეთნი, რომლებიც ზემოთდადებულ პირობას დაარღვევენ, პირადი სარგებლობისათვის სხვის ინტერესებს უარყოფენ, და ამგვარად, საზოგადოება ნელ-ნელა გაიყოფა ორ ჯგუფად: ერთი იქნება დამჩაგრელი. მეორე დაჩაგრული. ასეთი დაყოფის შექმნაში დიდი მნიშვნელობა ჰქონდა უწინდელ დროში ომიანობას და ზნეობის ზემოთაღნიშნულ პრინციპს. რომლის მიხედვითაც რომელიმე ველური თავისი გვარეულობის წევრს არას ერჩოდა, სხვისას კი შესაქმელადაც არ ინდობდა, ასეთი ორი მთავარი ჯგუფი ადამიანის საზოგადოებაში უძველესი დროიდან არსებობს. აიღეთ მონობა, ბატონყმობა. ჯღევანდელი დრო; ყოველგან ერთი ნაწილი დამჩაგრელი იყო და არის, მეორე დაჩაგრული. დამჩაგრელია მონების პატრონი, ბატონი, ბურჟუა; დაჩაგრულია მონა. ყმა, პროლეტარი. ამ ორ მთავარ ჯგუფს გარდა ყოველთვის რჩებოდა და დღესაც არის ერთი ნაწილი საზოგადოებისა, რომელიც არც პირველს ეკუთვნის, არც მეორეს. ხოლო ამ ნაწილის ზოგი წევრი დამჩაგრულთ ემხრობა, ზოგი დაჩაგრულთ. ჩვენი დროის ინტელიგენცია უმთავრესად ამ ნაწილს წარმოადგენს. ჩვენს ჰიპოტეტურ საზოგადოებაში დამჩაგრულები: ეცდებიან, თავისი ძალა და მფლობარეობა შეიერჩინონ დაჩაგრულნი კი ამის შეცადინეობაში იქნებიან. რომ დამჩაგრულნი მოიშორონ და თავისი ცხოვრება გააუმჯობესონ. საერთო ინტერესები ორი ჯგუფის წევრებს ცალკ-ცალკე შეაერთებს; პირველნიც დარწმუნდებიან და მეორენიც, რომ შეერთებით, ერთმანეთის დახმარებით უფრო მიაღწევენ თავის მიზანს. ცხოვრების ასეთი და ზემოთმოყვანილი მაგალითები ადამიანში ნელ-ნელა ააღორძინებს და გააძლიერებს ამ რწმენას, რომ საჭიროა ერთი-მეორის დახმარება. რაკი საზოგადოება ამ გზას დაადგება, ამით ის აფართოებს ზნეობის პირველ პრინციპს და აღიარებს მეორეს: იცხოვრე ისე, რომ შენი საზო-

ჯადოების წევრს სარგებლობა მოუტანო. მთელი კაცობრიობის ზნეობრივი ცხოვრება. უძველესი დროიდან, ჩემი აზრით. ამ ორაპრინციპის გარშემო ტრიალებს; დროთა განმავლობაში საზოგადოება გადაიქცევა სამშობლოდ, სამშობლო კიდევ მთელ კაცობრიობად. მაშინ, როდესაც რომელიმე ველური თავისი გვარის ინტერესებს ვერ გასცილებია. დღევანდელ განათლებულ ევროპიელს კაცობრიობის ინტერესები აკერია ენაზე. ამგვარად, ჩვენ დავინახეთ, რომ ადამიანის ერთადერთი მიზანი საკუთარი ბედნიერებაა. რაკი საზოგადოება გაჩნდა, საკუთარი ბედნიერების მიღწევა შეუძლებელი ხდება. თუ სხვისი ინტერესებიც არ მიიღე მხედველობაში. როდესაც საზოგადოებრივი ცხოვრება ვითარდება, მაშინ საკუთარი ბედნიერების მიღწევა შეუძლებელი ხდება. თუ სხვისი ბედნიერებისათვისაც არ იზრუნე, ჩვენ ჰიპოტეტურ საზოგადოებაში, რომელმაც ზნეობის მეორე პრინციპი უკვე აღიარა, მალე გაჩნდებიან იდეოლოგიები, რომლებიც ზნეობრივი მოქმედების მატერიალურ სარჩულს ყურადღებას არ მიაქცევენ. ვერ შეამჩნევენ და გამოიგონებენ მოვალეობას, კატეგორიულ იმპერატივს და სხვ. მაგრამ მოვალეობა, კატეგორიული იმპერატივი მეტაფიზიკური მცნებაა და ადამიანის ბუნებაში მათ არავითარი რეალური საფუძველი არა აქვთ. თავდაპირველად ადამიანი სხვას იმიტომ კი არ დაეხმარა, რომ მოვალეობამ აიძულა, არამედ დარწმუნდა. რომ ასეთი დახმარებით ის თავის სასარგებლოდაც მოქმედებდა ე. ი. ცხოვრებამ აიძულა. დახმარებოდა სხვას. საზოგადოების ამგვარი წყობილება, სადაც ყველა ცდილობს თავისი მოქმედებით ერთიმეორეს სარგებლობა მოუტანოს, რაიმე მოვალეობაზე ან სხვა ზნეობრივ გრძნობაზე კი არ არის დამყარებული. არამედ საკუთარი ინტერესების სიყვარულსა და აუცილებლობაზე. ასეთი წყობილება საუკეთესო და ერთადერთი შესაძლებელი საზოგადოებრივი წყობილებაა, სადა ყოველ ადამიანს შეუძლია, რაც შეიძლება მეტი ბედნიერება მოიხვეჭოს, და ამიტომაც აუცილებელია. რადგანაც თვით ბედნიერების წყურვილი არის ადამიანის ბუნების აუცილებელი ინსტინქტური თვისება. დღევანდელმა ცხოვრებამ უკვე აღიარა ეს მეორე ზნეობრივი პრინციპი და მომავალში უსათუოდ განხორციელდება ისეთი საზოგადოებრივი წყობილება. სადა ეს პრინციპი ყოველ ადამიანს ძვალ-რბილში ექნება გამჭდარი. ასეთია სასურველი კი არა, აუცილებელი გზა საზოგადოებრივი განვითარებისა. თუ მხედველობაში მივიღებთ იმ გარემოებას, რომ რაც შეიძლება მეტი ბედნიერების შექნას სურვილი არსებულ პირობებში საშუალო ადამიანის თვისებას შეადგენს.

ეს გზა ერთადერთი გზაა. სოციალურ ფორმაში განხორციელება ეს მომავალი წყობილება. კომუნისტურში, თუ სხვა გვარში, ამის, მისხვედრა შეუძლებელია და მთავარი არც ეს არის.



ყოველი აუცილებელი მოქმედება როდესაც შეუწყვეტლად მეორდება. ბოლოს ადამიანის მოთხოვნილებად იქცევა; მეც ეპვი არა მაქვს. რომ თანაგრძნობა, ერთმანეთის გატანა. დახმარება.—როცა იქნება. ადამიანის ბუნებრივ მოთხოვნილებად გადაიქცევა. სწორედ ამის შედეგია. რომ წინათაც იყვნენ და დღესაც არიან ისეთი პირნი, რომლებიც სრულიად ივიწყებენ საკუთარ ბედნიერებას. როდესაც საზოგადო საქმეს ემსახურებიან. მაგრამ როგორ განვითარდა ასეთი ალტრუიზმი. ეს უკვე დავინახეთ. ამგვარად ერთი მხრით. ცხოვრების განვითარება და. მეორე მხრით. საკუთარი ბედნიერების წყურვილი აუცილებლად აიძულებს ადამიანს. სხვას დაეხმაროს ანუ საზოგადო ცხოვრებაში სასარგებლოდ იმოქმედოს. ამიტომ ჩვენი ყოველი მოქმედების სარჩულად რომ საზოგადოებრივი სარგებლობა უნდა იყოს. ეს თავისთავად გამომდინარეობს ზემოთმოყვანილი მსჯელობიდან და. რამდენადაც შეგძლო. კიდევ დავასაზღვრეთ. ყოველ ადამიანს თავისი მოქმედებით ან სარგებლობის მოტანა შეუძლია. ან ზარალის. ან არც ერთის მე ყველაზე მაღლა პირველ რიგში მოქმედებას ვაყენებ: სხვამ თავისი იცის. ყოველ მოღვაწეს საშუალო ადამიანი უნდა ჰქონდეს სასეში. საშუალო ადამიანების უძლიერესი სურვილი საკუთარი ბედნიერებაა: მაშასადამე. ყოველი მოღვაწე ხელს უნდა უწყობდეს მას ამ ბედნიერების მიღწევაში. რასაკვირველია. ზოგიერთს ეს „ბედნიერება“ და „საზოგადოებრივი სარგებლობა“ ისე ვიწროდ ესმის. რომ ამ მცნებაში მანქანარი კუჭის მეტს ვერას ხედავს. მაგრამ ნუთუ ესეც უტილიტარიზმის ბრალია?!

თუმცა ბ-ნი ხომლელი დიდი წინააღმდეგია უტილიტარიზმისა ხელოვნებაში და ბ-ნ ანტონ ფურცელაძისა და ჩემ „დამამცირებელ და გამათახსირებელ მიმართულებაზედ“ თავის გონებამახვილობას ავარჯიშება. მაგრამ. ნამდვილად. ისიც უტილიტარიზტია: სარგებლობის საზომს. რომელსაც ასე მედგრად ებრძვის თავისივე აღსარებით. თითონაც სწორად მიმართავს; კრებულის III და IV მე-15 გვ. წერს: „დიდად მავნებელია ასეთი მწერლობა (იგულისხმეთ ეგ: ნინოშვილი). ნამეტურ ჩვენში“ და სხვ. აგრეთვე ბ-ნ ხომლელს რომ ჩემი მიმართულება საზარალოდ არ მიაჩნდეს და გამათახსირებლად

ჩვენი ნორმი ხელოვნებისათვის. არც ჩემი აზრების შესახებ აღეძვროდა:— „პონციპიალური სჯა-ბაასის“ მაღა.

თუმცა საზოგადოებრივი სარგებლობა მიზნად უნდა ჰქონდეს დასახული ხელოვნების ყოველ მსახურს, მაგრამ ყოველისფერი, რასაც სარგებლობა მოაქვს, ხელოვნების სამთავროში სრულებითაც არ შედის. მაგალითად, მეჩექმის ხელობა საზოგადოებისათვის სასარგებლოა, მზარეულის ხელობა საზოგადოებისათვის სასარგებლოა და მრავალი სხვ., მაგრამ არც ჩექმის კერვა, არც საქმელის ხარშვა ხელოვნებას არ წარმოადგენს პასკალის აზრით. პოეტის ხელობასა და მქარგავის ხელობას შორის არავითარი განსხვავება არ არის. მე არ ვიცი, ირონიით ამბობდა ამას პასკალი, თუ ნამდვილად. ხოლო ორსავე შემთხვევაში დიდად ცდებოდა. რა არის ამის მიზეზი? ერთი სასარგებლო მოვლენა, გინდ მოღვაწეობა, რად ეკუთვნის ხელოვნებას და მეორე კი არა? როგორც ზემოთ დაინახა მკითხველმა, ხელოვნების პროცესს, როგორც აუცილებელ რეფლექტორულ აქტს. მიმბაძველობის ხასიათი აქვს. გარეშე მიზეზის ზემოქმედება აღძრავს მწერალში სხვადასხვა წარმოდგენებსა და გრძნობებს; ყოველი ხელოვანი გვიხატავს თავის საკუთარ წარმოდგენებსა და გრძნობებს და ამით ის, ერთი მხრით, ჰბაძავს გარეშე ბუნებას, მეორე მხრით, თავის საკუთარ ბუნებას ანუ საერთოდ სინამდვილეს.

ყოველმა სახელოვნო ნაწარმოებმა მკითხველში, ან მაყურებელში უნდა აღძრას იგივე წარმოდგენანი და გრძნობები, რომლებიც ხელოვანში იყვნენ აღძრული სახელოვნო პროცესის დროს, ე. ი. სახელოვნო ნაწარმოებმა ისე უნდა იმოქმედოს მკითხველზე, როგორც სინამდვილე თვით ხელოვანზე მოქმედებს. მან სინამდვილის მაგივრობა უნდა გაუწიოს მკითხველს. ეს შეადგენს ყოველი ხელოვანის მეორე პირობას და ლოგიკურად გამომდინარეობს პირველი პირობიდან: ხელოვანი მხოლოდ იმ შემთხვევაში ბაძავს სინამდვილეს, როდესაც ჩვენში აღძრავს იმგვარ წარმოდგენებსა და გრძნობებს, როგორიც მასში სინამდვილეს აღუძრავს. რაც უფრო მეტი მკითხველის ან მაყურებლის არსებაში გამოიწვევს სახელოვნო ნაწარმოები იმგვარსა და ისეთსავე სიტხოველია და სიძლიერის წარმოადგენებსა და ვრძნობებს, როგორიც ასულდგმულეებდა ხელოვანს თავისი პროცესის დროს, იმდენად მეტი ღირსების არის სახელოვნო ნაწარმოები; რაც უფრო ნაკლებ პირთ აღუძრავს წარმოდგენებსა და გრძნობებს, იმდენად უფრო ნაკლები ღირსების, და თუ არავის არ აღუძრა ამგვარი წარმოდგენანი და გრძნობები ცხადია, ხელოვნური ნაწარმოები ყოველგვარ ღირსებას მოკლებული ყოფილა. ხელოვნების მესამე პირობა მდგომარეობს წარმოდგენათა



და გრძნობათა აღძვრის სინამდვილესა და სიცხადეში. ორ ნაწარმოებში. რომელთაგან ერთი ადვილად და ცხადად გვაძლევს ხელოვანის გრძნობა — წარმოდგენებს, მეორე კი უფრო მეტ შრომას ითხოვს მკითხველის მხრით და მკაფიო წარმოდგენებსა და გრძნობებსაც არ აძლევს. პირველი გაცილებით მაღლა დგას ხელოვნების მხრით მეორეზე. ეს პირობა დამყარებულია ეგრეთ წოდებულ „ძალთა ეკონომიის პრინციპზე“. ამიტომ ბ-ნი ხომლელი აშკარად შემეცდარია. როდესაც ამბობს „მხატვრისათვის მხოლოდ ერთადერთი პირობაა საჭირო და ეს უდიდესი პირობაც სწორედ იმაში მდგომარეობს, რომ ცხოვრების სინამდვილეს არ უმტყუნოს მან და მართალი სურათი გამოხატოს“ (გვ. 16). მარტო ეს პირობა თავისთავად არაფერს არ ნიშნავს. თუ თან არ ახლავს სხვებიც. ამ ერთადერთი პირობის ძალით ფოტოგრაფიული ხატვა, რომელსაც ასე დევნის ბ-ნი ხომლელი, საუკეთესო ხელოვნებად უნდა ჩაითვალოს, და თუ სხვა პირობა აღარ წამს, გაუგებარია, რაღად კიცხავს ფოტოგრაფიულ ხატვას?

განვიხილოთ ახლა ფოტოგრაფიული ხატვა, რომელსაც ყველა ქოლავს გაუკითხავად. ეს კითხვა მჭიდროდ არის შეკავშირებული ტიპის მნიშვნელობასთან ხელოვნურ ნაწარმოებში; ამიტომ ჯერ ტიპს მივმართავ. კრიტიკოსთა უმეტესი ნაწილი ხელოვნური ნაწარმოების დაფასებაში ტიპით ხელმძღვანელობს; მათ თვალში ის ხელოვანი, რომელიც ტიპს რიგიანი სისრულით და რელიეფურად ვერ ხატავს, ნაკლები ღირსების ხელოვანია; ის მწერალი, რომელსაც არავითარი ტიპი არ მოუცია, სრულიად უმნიშვნელოა. „ტიპის შექმნა სახელოვნო შემოქმედების ჳემშარიტი დანიშნულებაა; სადაც ის არ არის, იქ არც არავითარი შემოქმედებაა“. ამბობს რუსეთის დღევანდელი კრიტიკის საუკეთესო წარმომადგენელი ე. სოლოვიევი<sup>1</sup>. ბ-ნი ხომლელი ნინოშვილის ერთ დიდ ნაკლს იმაში ხედავს, რომ „ხასიათების და ტიპების შეგნებასა და ხატვაზე დაშორებული წარმოდგენაც არა აქვს მას“, თუმცა ბ-ნი ხომლელი აქ ისეთ შეცდომას ჩადის, რაც სრულიად გამოუცდელ მკითხველს თუ დაემართება: ტარიელ მკლავაძეში ნინოშვილმა დაგვიხატა ისეთი ტიპი, რომელზე საუკეთესო ჩვენ მწერლობას ჯერ არ მოუცია. სხვადასხვა აზრი და დაფასება ერთი და იმავე მწერლის სხვადასხვა პირებისაგან შესაძლებელი მოვლენაა. მაგრამ ცოცხალი ტიპის უარყოფა ტარიელ

<sup>1</sup> „Жизнь“, № 5. ст. 211. ჩემ წერილში მოყვანილი მოსაზრება ტიპის შესახებ რუსულ მწერლობაში პირველად ამ ავტორმა გამოთქვა.

მკლავადეში ან სრული დაბრმავება, ან კრიტიკული უნარის სრული უქონლობა.

ამგვარად, სხვადასხვა მიმართულების კრიტიკოსებს ტიპი იმ ყაყად მიიჩნიათ, რომელიც გამოააშკარავებს მწერლის ნიჭის ძლიერება-უძლურებას. ამგვარი აზრი სრულიად საფუძვლიანია, ხოლო ერთი რამ არის განსამარტავი: ის კრიტიკოსებიც კი, რომლებსაც სინამდვილის ხატვა ხელოვნების ძირითად პირობად მიაჩნიათ, ტიპს დაეუნებოთ ითხოვენ, მაშინ, როდესაც ტიპი მხოლოდ ილუზიაა, — სინამდვილეში ტიპი — ადამიანი ერთობ ძვირად არსებობს. ის თვისებანი, რომლებსაც მწერალი ერთ ადამიანში მოუყრის ხოლმე თავს სინამდვილეში მრავალ სხვადასხვა პირობებში არის გაბნეული: მხატვარი გამოკრეფს სხვადასხვა ნამდვილ პირობიდან იმ თვისებებს, რომლებსაც მის თვალში საზოგადო მნიშვნელობა აქვთ. დანარჩენ თვისებებს უყურადღებოდ ტოვებს, გამოკრებილებს კი ერთ ადამიანში ან ტიპში შეაერთებს. ამგვარად, მისი ტიპი ძალიან ბევრ ადამიანსა ჰგავს, ნამდვილად კი არც ერთი მათგანი არ არის. მიუხედავად ამისა, როდესაც მწერალი ტიპს ხატავს, ის ამით დალატობს სინამდვილეს, თუ არა? სრულებითაც არა. როდესაც მწერალი ტიპს ხატავს, ის არაფერს არ იგონებს, მთელ მასალას სინამდვილიდან იღებს. მაშასადამე, ის სინამდვილეს არ დალატობს, ხოლო ასეთი საშუალების წყალობით მკითხველს შესამჩნევად უადვილებს შრომას, შესაფერ წარმოდგენებსა და გრძნობებს მის არსებაში ნაკლების შრომითა და მალე იწვევს. მწერალს რომ ტიპისათვის არ მიემართა, სათითაოდ უნდა დაეხატა ის ოცი, ორმოცი და ხშირად მეტი პირობი, რომლებიდანაც მან ტიპი გამოძერწა. რამდენად უფრო მძიმე იქნებოდა ასეთ შემთხვევაში მკითხველის შრომა, ეს თავისთავად ცხადია...

წარმოვიდგინოთ ახლა, რომ მწერალმა ნახა ტიპიური ადამიანი თვით ცხოვრებაში, ასეთი შემთხვევა შესაძლებელია, თუმცა ათასში ერთხელ თუ მოხდება ტურგენევი, მაგალითად. გვიცხადებს: ბაზაროვის ტიპი ერთმა პროვინციელმა ექიმმა ჩამოსახაო. მართალია, ტურგენევს პირდაპირ არ გადმოუხატავს ამ ექიმიდან თავისი ბაზაროვი, მაგრამ ბაზაროვის უმთავრესი თვისებანი ამ ექიმში უპოვა. რომ აიღოს მწერალმა ეს ტიპიური ადამიანი და შეუცვლელად ანუ ფოტოგრაფიულად გადმოხატოს, მისი ფოტოგრაფიული სურათი ხელოვნება იქნება თუ არა? უსათუოდ. რადგანაც მასში დაცული იქნება ხელოვნების ყველა პირობა. როდესაც მწერალი მხატვრულად ვერაჟობს ცხოვრებაში, მაშინ ის ანალიტიკური შრომის შემდეგ თვითონ ქმნის ამ ტიპს. მაგრამ თუკი ცხოვრებაში ჰპოვა ტიპი და ფოტოგრა-

ფიურად გადმოხატა. ამით ის არას ჰკარგავს. როგორც ხელოვანი; და არც მის ნაწარმოებს აკლდება რამე. განვიხილოთ ასლა შემდეგი შემთხვევა: მწერალმა სინამდვილიდან აიღო ჩვეულებრივი ადამიანი ივანე, პეტრე, გიორგი და სხე. და გადმოხატა მათგან ფოტოგრაფიული სურათი: ასეთი ნაწარმოები ხელოვნება იქნება თუ არა? ექვს არეშა. ხელოვნება იქნება. რადგან მასში დატულია ხელოვნებისათვის მთავარი პირობა — სინამდვილის ბაძვა. ხოლო გაცოლებათ ცუდო ნაკლები ღირსების. ვიდრე ტიპის შექმნა. ესთეტიკოს თეორეტიკოსმა ასეთი ნაწარმოები უსათუოდ უნდა იცნოს ხელოვნებად. მაგრამ კრიტიკოსმა უნდა უარჰყოს ის. რა არის ასეთი სხვადასხვაობის მიზეზი? თეორეტიკოსი იკვლევს ხელოვნებას. როგორც მეცნიერი. ობიექტურად და არა ადამიანთან შეფარდებით. თუ მომართავს ხელდახან ადამიანსაც. მხოლოდ ამისათვის. რომ ხელოვნების თვისე- და კანონი უყეთ გამოირკვიოს. კრატკოსს სახელოვნო ნაწარმოების ევლევის დროს მუდამ მხედველობაში ჰყავს ადამიანი მისი ინტერესებოთ. თუ კრატკოს დევნის ფოტოგრაფიულ ხატვას არა ტიპურად. არამედ ჩვეულებრივი პარებისას, იმიტომ. რომ ასეთი ხელოვნება მკითხველს გონებაში არც ერთ ახალ წარმოდევნას. არც ერთ ახალ გრძნობას არ ჰბადებს. არ აცნობს მას ცხოვრებას. ე. ი. მას არავითარ საოგებლობა არ აძლევს: ივანეს. პეტრეს. გიორგის და მრავალ მისთანს ყოველი ჩვენგანი თავისთავად ხედავს ცხოვრებაში. აქ მწერლის დასმარება არავითარ საკიროებას არ შეადგენს; ასეთი პარები ხელოვნებაში მკითხველისათვის სრულებით არ არიან საყურადღებო და საინტერესო; მისთვის საყურადღებოა ის პირობოთმელიც არც ივანეა. არც პეტრე. არც გიორგი. მაგრამ რომელია პეტრესაც. ივანესაც და სხე მისთანებს. ბევრი რამა აქვთ საყურადღებო. ამგვარად. როდესაც ბ-ნ ხომელი ფოტოგრაფიურად ხატვის წინააღმდეგია. სრული უტოლიტარისტული მხედველობით ხელმძღვანელობს. თუმცა თვითონ ამას ვერა გრძნობს: თორემ ფოტოგრაფიული ხატვა სრულებით არ ეწინააღმდეგება ამის „ერთადერთად ხედავს პირობას“ მართალი სურათის გამოხატვას. რადგანაც ფოტოგრაფიული სურათი ყოველთვის მართალია. მე ამას ბ-ნ ხომელის კი არ ვუწუნებ. ხოლო ეს მავალათი ამჟარად ამტკიცებს. რომ უტოლიტარული მხატველობის სრული უარყოფა არც ერთ ადამიანს არ შეუძლია. ვინც უნდა იყოს ის.

•

მე დავანახე მკითხველს. რომ ყოველგვარ ფოტოგრაფიული ხატვა განუტრეხელად დევნა შეცდომაა; კრატკოსმა უმალ უნდა

აიგოს. რას ხატავს ხელოვანი. მივაქცევ აგრეთვე მკითხველს ყუ-  
 რადღება იმ გარემოებას, რომ ტიპს - ადამიანს სინამდვილეში ძა-  
 ლიან ძვირად შეხედება მწერალი. ამიტომ ადამიანთა ფოტოგრაფი-  
 ული სურათი ხელოვნებაში უმეტეს შემთხვევაში გასადევნია. რა-  
 განაც ასეთი სურათი — ტიპი ძალიან ძვირად თუ იქნება. მაგრამ  
 ხელოვნების საგანი ერთადერთი ტიპი ხომ არ არის; მას შეუძლია  
 ტიპებს სრულიად დაანებოს თავი და თავის სახად ტიპიურ მოვ-  
 ლელების. საზოგადოებრივ დამოკიდებულებათა ტიპიურა ვომბინა-  
 ციების ხატვა დაიხასოს. ასეთი ტიპიური მოვლენები და კომბინა-  
 ციები ცხოვრებაში ბევრია და მათი ფოტოგრაფიული ხატვა ხელოვნ-  
 ების კანონიერ კუთვნილებას შეადგენს; თუკი მწერალს მხად აქვს  
 ტიპიური მოვლენა, მანცდამაინც რად უნდა დაანებოს ამას თავი  
 და თვითონ გამოიკრიბოს ასეთი მოვლენის ელემენტები ცხოვრები-  
 დან? საფრანგეთის ცხოვრების ზოგიერთი მცოდნენი სამართლიანად  
 შენიშნავენ, რომ ზოლას ტიპი ხატვა არ ეხერხება. და მართლაც,  
 ვისაც ზოლა წაუყითხავს, დარწმუნდებოდა, რომ მის თხზულებებში  
 არიან სხვადასხვა ხასიათისა და ტემპერამენტის პირნი. ტიპები კი  
 ძალიან ცოტა და ისიც მეტად მკრთალი; ზოლას ნიჭს უფრო ბრბო-  
 რიიდავს. ცხოვრების დამახასიათებელი მოვლენანი და არა ტიპები.  
 მიუხედავად ამისა, ზოლამ რომ დიდი სამსახური გაუწია თავის სამ-  
 შობლო ლიტერატურასა და ცხოვრებას. და რომ ის საფრანგეთის  
 თანამედროვე ხელოვნების საუკეთესო მედროშეა. ამის უარყოფე-  
 ლი მე ბევრი არ ვიცი. არც ერთი ტიპიკ რომ არ მოეცა ნინოშვილს.  
 მისი დიდი ღირსება მაინც იმაში მდგომარეობს, რომ მან თავისი ხე-  
 ლოვნების საგნად ამ ტიპიურ მოვლენათა ხატვა გაიხადა და ამით  
 ჩვენ ცხოვრებას და მის ტენდენციას მკითხველის თვალწინ ფარდა-  
 ახადა. მისი უიშვილი, სიჰონა, ლიზა, ძალაძე და სხვები, თავისთავად  
 კი არ არიან საყურადღებონი, საყურადღებოა ის პირობანი და ის  
 საზოგადოებრივი წყობილება. რომლებშიაც ისინი ცხოვრობენ; სა-  
 ყურადღებოა მათი დამოკიდებულება ერთმანეთს შორის. საყურად-  
 ლებოა ის რყევა. რომელიც მათ რწმენა-შეხედულებაში ხდება. ნი-  
 ნოშვილმა უმთავრესი ყურადღება თვით ცხოვრებას მიაქცია და არა  
 ტიპებს; ცხოვრებას დამახასიათებელი მოვლენანი ფოტოგრაფიუ-  
 ლად გადმოიღო მან. თუ არა, — ეს კრიტიკისათვის სულ ერთია.  
 კრიტიკისათვის საკმარისია, რომ ავტორმა გააცნო მკითხველს ცხოვ-  
 რება; ანალიტურ გზას ამოიჩჩევდა, თუ ფოტოგრაფიულ ხატვას. ეს  
 მისი საქმე იყო, თუმცა სრული შეცდომაა, ვითომ ეს მოვლენანი ნი-  
 ნოშვილს ფოტოგრაფიულად გადმოეღოს ცხოვრებიდან. ერთად-  
 ერთი „მოსე მწერალი“ ჰკავს ფოტოგრაფიულ ხელოვნებას და შეიჩ-

ლება, მართლაც ფოტოგრაფიულად გადმოეხატოს ავტორს ცხოვრებიდან. მაგრამ ნუთუ ამით მის ხელოვნებას ღირსება აკლდება. თუკი ავტორმა იცნო ტიპიური მოვლენა? თუკი ასეთ მოვლენას ფესვები აქვს გადგმული საქართველოს ყოველ კუთხეში? თუ მწერლის მიერ აღებული მოვლენა საკმაოდ ტიპიურია, ამ მოვლენას ყველგან შეამჩნევთ ცხოვრებაში; აქედან კი გამოუცდელ მკვლევარს ასე ჰგონია: მოვლენა ფოტოგრაფიულად არის გადმოხატული. როდესაც განსვენებული გ. წერეთლის „რუხი მგელი“ დაიბეჭდა, იმერეთში ბევრმა პირმა საყვედურით მიმართა ავტორს: რა დაგიშავეთ ამის ფასი. რამ „გაზეთში გამოგვაცხადეთ“. რაკი რუხი მგელი მე მგავს. გ. წერეთელს სწორედ მე ვყავდი სახეშიო, ფიქრობდა ყოველი მათგანი. რასაკვირველია, ავტორი უდანაშაულო იყო. ამიტომ როდესაც კრიტიკოსი სახელოვან ნაწარმოებს არჩევს, უმაღლეს უნდა იკითხოს, ტიპიური არიან თუ არა ის პირნი და მოვლენანი. რომლებსაც მწერალი ხატავს? მართო ამის შემდეგ უნდა ეძიოს ავტორის მეთოდი და ფოტოგრაფიულ ხატვას წინაღუდგეს მხოლოდ იქ. სადა ტიპიური არაფერია.

ხელოვანმა თავის ფანტაზიაში კი არ უნდა ეძიოს იდეა, არამედ თვით ცხოვრებაში, რადგანაც მისი ასპარეზი სინამდვილეა, როგორც ზემოთ დავინახეთ; ასეც რომ არ იყოს, მკითხველისათვის მხოლოდ ისეთ იდეებს აქვს მნიშვნელობა, რომლებიც თვით ცხოვრებას წამოუყენებია. ან ადრე თუ გვიან წამოაყენებს. ამიტომ, რაკი მწერალმა შენიშნა ცხოვრებაში რაიმე იდეა მან უნდა გამოიხატოს ამავე ცხოვრებაში შესაფერი ფაქტები, რომ იდეა სახელოვნო ფორმაში ჩამოასხას. ვთქვათ, დაებადა მწერალს რაიმე იდეა. რომ გამოეხატოს ეს იდეა, ხელოვნური იქნება მისი ნაწარმოები თუ არა? თუ ამ იდეას ნამდვილ ფაქტებს გამოუნახავს ცხოვრებაში, ხელოვნური იქნება; თუკი ფაქტებს თვითონ შეთხზავს. ერთიმეორეზე მიაკოწიწებს თავისი იდეის გასამართლებლად და ამგვარად სინამდვილეს დაამახინჯებს, მისი ნაწარმოები ცრუ ხელოვნება იქნება მხოლოდ. ყველამ ვიცით, რომ გოგოლს იდეა თავისი შესანიშნავი თხზულებისათვის პუშკინმა გადასცა. გოგოლი ჩაუკვირდა ცხოვრებას. წაიკითხა მასში ეს იდეა და კიდევ ჩამოასხა ხელოვნურ ფორმაში. ამგვარად, როგორც ხელოვნური პროცესის წინ. ისე ამ პროცესის დროს გოგოლს იდეა განუშორებლად თან ახლდა: მაგრამ ნუთუ „Мертвые души“ ხელოვნება არ არის? აიღეთ ჰაუპტმანის „ჩაძირული ზარი“. ავტორს არც ფერიები უნახავს სინამდვილეში, არც ეშმაკები, არც ქაჯები; მან ცხოვრებაში ამოიკითხა მხოლოდ იდეა და ამ იდეის დასახატად გამოიყვანა ფერიები, ეშმაკები და ქაჯები.

მე არ უარვყოფ, რომ თავის დრამაში ჰალუტმანმა ცხოვრების ფაქტები შემოიტანა. მაგრამ ადამიანები რომ ფერობად და ეშმაკებად შეცვალა. ეს ცხადად ამტკიცებს. რომ ჰალუტმანი უმთავრეს ყურადღებას იღებს აქცევდა და სახელოვნო პროცესის დროს ის იღებდა ხელმძღვანელობდა...

აქედან ისიც ცხადია, რომ კრიტიკოსის მიერ თემების წერა, თუკი არიან ასეთი კრიტიკოსები. სრულიად უაზროა; აზრიანაც რომ იყოს. ასეთი საქმე კრიტიკის დანიშნულებას არ შეადგენს, მისი მიზანი სხვა არის.



ზემოთ მცირედნად იმასაც შევეხე, თუ როგორ განსხვავდება ერთიმეორასაგან ესთეტიკის თეორეტიკოსის პოზიცია და კრიტიკოსის. რასაკვირველია, ეს განსხვავება მარტო ფოტოგრაფიული ხატვისა და იდეის მნიშვნელობის კითხვით არ განისაზღვრება თეორეტიკოსის საგანია ხელოვნება. ის იკვლევს ამ ხელოვნებას ობიექტურად, ეძებს მის თვისებას. მის კანონებს. არჩევს იმ წარმოდგენებს, რომლებსაც სახელოვნო ნაწარმოები იწვევს მკითხველის გონებაში. რომ ამ რჩევით თვით ხელოვნება ახსნას. ფოტოგრაფიულ ხატვას. იდეას და სხვა, მისთვის პირდაპირი მნიშვნელობა არა აქვს. კრიტიკოსის საგანს კი ხელოვნური ნაწარმოები შეადგენს. ხელოვნურ ნაწარმოებს ის უყურებს. როგორც ფაქტს, აუცილებელ მოვლენას, და მისი მიზანია ახსნას ეს ფაქტი ანუ გამოარკვიოს მისი მიზეზები. სახიათი, თვისებანი. აღნიშნოს. რა არის საყურადღებო და რატომ არის, რა არ არის საყურადღებო და რატომ არ არის. გამოაშკარაოს ხელოვნური ნაწარმოების საბოლოო მნიშვნელობა და ყოველივე ამაზე მკითხველს მიუთითოს. ის ყოველისფერს აქცევს ყურადღებას. იდეასაც, ფოტოგრაფიულ ხატვასაც და სხვა, რასაც კი მისი მიზნისათვის მნიშვნელობა აქვს.

მე ზემოთ აღვნიშნე, რომ ხელოვნების მიზანი საზოგადოებრივი სარგებლობაა, ეს მიზანი გზას უნდა უნათებდეს ყოველ კრიტიკოსს თავის კვლევაში. მან უნდა დევნოს ისეთი ხელოვნური ნაწარმოები, რომელიც ამ მიზანს არ ეთანხმება. თუნდაც შიგ დაცული იყოს ხელოვნების ყველა კანონი, და უნდა მიაქციოს მკითხველის ყურადღება ისეთ ნაწარმოებს. რომელიც ხელოვნების მიზანს მცირედნად მაინც ემსახურება, თუნდა სახელოვნო ღირსებით სუსტიც იყოს. მხოლოდ ასეთ პირობებშია კრიტიკოსის მოღვაწეობა სასარგებლო საზოგადოებისათვის; ვისაც ადამიანის საზოგადოება სახეში არა ჰყავს თავისი მოღვაწეობის დროს მან რა გზაც უნდა, ის აირჩიოს,---

ნამდვილ მოღვაწეთა შორის მას ადგოლა არა აქვს. ამასთან ყოველი მოღვაწე მარტო იმას კი არ უნდა ცდილობდეს, რომ თვითონ მოუტანოს სხვას სარგებლობა, არამედ იმასაც, რომ სხვასაც გაუღვიძოს, სურვილი დასმარებისა, სხვას რომ სარგებლობა მოუტანო, უნდა შეისწავლო ის, გაიცნოს მისი ცხოვრება, მისი საქმიანობა და სხვასაც გააცნოს, აი, ყოველივე ამის გამო, ჩემ თვალში ძალიან დიდი მნიშვნელობა აქვს ხელოვნური ნაწარმოებს სოციალურ მხარეს და პუბლიცისტურ კრიტიკას. პუბლიცისტური ელემენტები ყოველი ერისა და ყოველი დროის სიტყვაკაზმულ ლიტერატურაში იყო; არც კრუკლასიციზმი, არც რომანტიზმი ამ ელემენტებს მოკლებული არა ყოფილან. მაგრამ დღევანდელი რეალიზმისა და მისი შტოების ნატურალ-ზმისა და თესქოლოგიური მიმართულების -- მთავარ ძარღვს პუბლიცისტური მხარე შეადგენს. საზოგადოებრივ სარგებლობასაც რომ თავი დავანებოთ, მარტო ამის გამოც მოვალეა დღევანდელი კრიტიკა, ხელოვნურ ნაწარმოებს ეს ძარღვი გაუხსნიხოს და დაათვალოს. აბსოლუტური ქვეყანაზე არ არსებობს ყოველასფერი შედარებითა; ამიტომ ყოველი მოღვაწე თავდაპირველად თავის დროს უნდა შეეფერებოდეს; უნდა ემსახურებოდეს თავის დროს, თუ შეუძლია, და არა წარსულს ან მომავალს; ვინც სინდისიერად ემსახურება აწმყოს, ის ამით მომავალსაც ემსახურება. ევროპის ლიტერატურის მიმართულებაც რომ არ მივიღოთ სახეში, ჩვენი ცხოვრება დღეს ისეთია, რომ ყოველი ქართველი პოეტი და ბელეტრისტი უმთავრესად პუბლიცისტი უნდა იყოს. ტურგენევის სიტყვები: ბელეტრისტისა და პუბლიცისტის მიზანი ერთი და იგივეა, გზა არის მარტო სხვადასხვაო, დღევანდელი ჩვენი ცხოვრებისათვის უტყუარი კეშმარტივებაა. ჩემი პოზიცია მე კარგად მქონდა გამორკვეული, როდესაც ნინოშვილს ვარჩევდი. მე მასში ვხედავდი და ვხედავ ბელეტრისტ-პუბლიცისტს, მის მიერ აღნიშნულ მოვლენებს და ცვლილებას ხალხის რწმენა-შეზღუდულებაში მე დიდ სოციალურ მნიშვნელობას ვაძლევ, ამიტომაც მალლა ვაყენებ ნინოშვილს, საერთოდ. მისი თხზულებანი ნამდვილ ხელოვნურ ნაწარმოებს წარმოადგენენ. ჩვენთვის მათ დიდი სოციალური მნიშვნელობა აქვთ და ამის დანახვა და დაფასება ჩემს მოვალეობას შეადგენდა ნინოშვილის, კლდიაშვილისა და მათი მსგავსი ბელეტრისტების მნიშვნელობა მათი ნაწერების პუბლიცისტურ მხარეშია და, ვინც ამ მხარეს არ მიაქცევს, ან ვერ მიაქცევს ყურადღებას, ის ასეთი ბელეტრისტების დაფასებასაც ვერ შესძლებს. ბ-ნ ხომლელს თავისი პოზიცია არასოდეს არ მქონდა გამორკვეული, არც დღეს აქვს. ამიტომაც ნინოშვილის მნიშვნელობის დაფასებაში უბრალო მკითხველის გაშვრიახობაც კი ვერ გამოი-

ჩინა. ის იქამდისაც კი მივიდა. რომ თავის დაფასებაში მოთხოვნებს სათაურებით ხელმძღვანელობს და ნინოშვილს „ტეტიათა მოტრფიალეთ“ აკუთვნებს“... მერე რა საბუთით? იმ საბუთით. რომ გურიის გლეხს ხატავს თავის მოთხოვნებში! ბ-ნ ხომლელს დავიწყებია. რომ ტეტიათა მოტრფიალეს ის კი არ ახასიათებს, რომ გლეხს ხატავს. არამედ ის, თუ როგორ ხატავს ამ გლეხს. თუ ბ-ნი ხომლელს დავუჭერებთ, ცოტას ვნახავთ მწერალს, რომ ტეტიათა მოტრფიალეს არ გამოდგეს; ჩეხოვი, გორკი ნაროდნიკები იქნებოიან, რადგანაც ხშირად გლეხებს ხატავენ. დუტუ მეგრელი, კლდიაშვილი, არაგვისპირელი, ევლოშვილი, — სულ ტეტიათა მოტრფიალენი გამოდგებიან! ტეტიათა მოტრფიალეს ის მწერალი კი არ არის. ვინც გლეხს ხატავს. არამედ ის. ვინც გლეხს იდეალურად ხატავს.

„ხალხის (იგულისხმება გლეხობა. ი. გ.) გული. როგორც ახლად დაბადებული ბავშვის ტვინი, თეთრი, დაუწერელი ქალაქია; არავითარი ბოროტება არ ჩანს მასში, არავის იგია არ ემდურის, თუ აქვს და რდი, უცებ დღის ვარაში ჩაუჭრობს მას, მისი გული ბროლის სარკვე“... აი, ტეტიათა მოტრფიალეს“. ნინოშვილის მოთხოვნებში კი ნამდვილი გლეხია, ცხოვრებიდან ამოღებული. მთელი მისი ღირსება-ნაკლოვანებით და არა იდეური, ამიტომაც მისი ტეტიათა მოტრფიალეობა მხოლოდ ბ-ნ ხომლელს თუ ელანდებოდა. ბ-ნ ხომლელი ვერ უარყოფს, რომ „ნინოშვილმა გამოსვლისთანავე მიიქცია საზოგადოების ყურადღება“, მაგრამ, აი, როგორი გამჭრიახობით ხსნის ამ გარემოებას: ნინოშვილი „ახალი კაცი“ იყო, ის პირველი შეეხო გურული გაკირვებული გლეხის ცხოვრებასო. მაშასადამე ყოველ ახლადგამოსული მწერალი მალე უნდა იქცევდეს საზოგადოების ყურადღებას, ასეა ნამდვილად? „კრებულის“ მე-10 გვერდზე გვეუბნება: ნინოშვილს ყოველ ნაწერში ეტყობოდა, რომ მხატვარი არ იყო, და რამდენიმე სტრიქონს შემდეგ კი უმატებს,--- „შემდეგში გაიმართებოდა და გაშლიდა ჩვენი თვალის წინ სოფელთა ტრაგედიას, რომელიც შესძრავდა მკითხველის სულსა და გულსა“. (ხაზი ჩემია. ი. გ.) საოცარია. ღმერთმანი! თუ მხატვარი არ იყო, ასეთ ძლიერ გავლენას რით მოახდენდა მკითხველზე. თუ მოახდენდა, მაშ, მხატვარიც ყოფილა და გვარიანი ნიჭის მხატვარიც. სწორედ ძლიერი ნიჭია საჭირო, რომ მკითხველის სული და გული შეძრას! ერთი სიტყვით, ბ-ნი ხომლელი თავის თავს ებრძვის: მას კიდევ უნდა და თან არც უნდა ნინოშვილში მხატვარი დაინახოს, და ეს ბრძოლა მთელ მის სტატიაში გამოსჭვივის. ის ნინოშვილის ნაკ-

<sup>1</sup> „წარსულიდან“. „მოამბე“ № 11, 1899 წ. გვ. 93.



ლულევანებათ აღნიშნავს: „სიმონაში და უიშვილში შეერთებულია წმინდა შრომის ინტერესებს, წარმომადგენელნიც და წვრილფეხა „ბურჟუაზიის“ ინტერესებიც. (ბ-ნი ხომლელი აქ ცოტა ცდება: სიმონა და ურშვილიც წვრილფეხა მესაკუთრენი არიან და არა წვრილფეხა „ბურჟუები“. რუსი მარქსისტიც აქ „УСРАИИ“-ს ხმარობს და არა ბურჟუას: ეს კი სულ სხვადასხვაა. ი. გ.) ამათ დასტრიალებს ნინოშვილი გულის მხურვალეებით... არსად არც ერთ მოთხრობაში ნინოშვილი არა თუ ცდილა. არც კი წარსცდენია მას გამოეხატა წმინდა შრომის, უსახლკარო, ბოგანო სოფლელი“ (გვ. 17, „კრებული“, III და IV). ასეთი საყვედური მით უფრო გასაოცარია და ახირებულის, რომ წინა გვერდზე ბ-ნი ხომლელი მართალი სურათის გამოხატვას ერთადერთ უდიდეს პირობად აღიარებს მხატვრისათვის. წმინდა პროლეტარი ქართველი, ნინოშვილს არ დაუხატავს, რადგანაც ასეთ წმინდა პროლეტარი ოთხმოცდაათიან წლებში არ იყო, როგორც სოციალური მოვლენა. ასეთ ნიშნებს. წმინდა პროლეტარების გაჩენასას. მხოლოდ დღეს იძლევა ჩვენი ცხოვრება და ლიტერატურაც. დღევანდელი ჩვენი გლეხი მესაკუთრეც არის ჯერ და პროლეტარის ნიშნებსაც ატარებს; დღეს ის აღარც წმინდა კერძო მესაკუთრეა. არც წმინდა პროლეტარი; ჯერ ის მხოლოდ გაპროლეტარების გზას ადგია და ასეც დახატა ნინოშვილმა. ქართველი გლეხი დღეს ერთი ხელით მანქანას წატანებია უკვე. მეორე ხელით კი ჯერ ისევ მიწას ჩაბლაუჭებია; არ უნდა, რომ მოშორდეს; ჩვენი ცხოვრების მსვლელობასაც. ჯერ იმდენად მძლავრად ვერ დაუტრიალებია ეს მანქანა, რომ „უიშვილები“ სრულებით მოგლიჯოს მიწას და ისეთ წმინდა პროლეტარებად აქციოს, როგორიც საზღვარგარეთ არის. ნინოშვილმა დახატა მხოლოდ ის, რაც ნამდვილად არსებობდა ჩვენ ცხოვრებაში, და ეს ღირსებად უნდა ჩაეთვალოს მას, ვისაც მართალი სურათის გამოხატვა „ერთადერთ უდიდეს პირობად“ მიაჩნია მხატვრისათვის. ამის შემდეგ ბ-ნი ხომლელს მაინც უკვირს: წმინდა პროლეტართა „კაჟანება ჩვენს ბელეტრისტიკაში ჯერ კიდევ არსად არ არის“-ო. ეს სრული კეშმარბატებაა და, ბ-ნი ხომლელი რომ ჩაკვირვებოდა ამ მოვლენას. დარწმუნდებოდა. რომ ჩვენი ბელეტრისტები უკეთ იცნობენ ჩვენს ცხოვრებას, ვიდრე ზოგიერთი ჩვენი კრიტიკოსი. ბ-ნი ხომლელი კმაყოფილებით აღნიშნავს, უდროოდ დაღუპული მწერალი ჩვენში აღარავის ახსოვსო, და თავის თავს ერთხელ კიდევ არწმუნებს: ეს ასეც უნდა მომხდარიყო. ბოლოს მაინც სულგრძელობას იჩენს და მკითხველს ნინოშვილის კითხვის ნებას აძლევს: ნინოშვილი ღირსია წაკითხვისო. გაიხარეთ, ნინოშვილის ძვლებო. ახლა მაინც ეღირსება თქვენს თხზულებებს წაკითხვა! მწერლის დაფასებაში მკითხველი

საზოგადოება რომ ყოველთვის კრიტიკით ხელმძღვანელობდეს, პოეტობა და ბელეტრისტობა საშინელი სასჯელი იქნებოდა, მაგრამ იღბლად საერთოდ მთელი მკითხველი მასა უკეთ აფასებს ყოველ მწერალს. ვიდრე ერთი რომელიმე კრიტიკოსი; ქართველმა მკითხველმაც დიდი ხანია დააფასა ნინოშვილი და ბ-ნი ხომლელის მეტსაჟერ ის არავის დაეინწყებია: მისი თსზულებანი დიდი ხანია სულ გაიყიდა და გარდა ორი პატარა მოთხრობისა. რომელიც „კვალის“ რედაქციამ გამოსცა, აღარსად იპოება გასაყიდად. მისი ნაწერების მოთხოვნილება ჟერ არ შესუსტებულა ხალხში და მეორე გამოცემაც მალე გამოვა, რაც ქართველ მწერალს ასე მოკლე დროში ძვირად შეხვდება ხოლმე წილად.

ამით ვათავებ ჩემ წერილს. ბოდიშს ვიხდი მკითხველთან რომ მას შემდეგ, რაც ისეც საკმაოდ ვილაპარაკე ნინოშვილის შესახებ. კვლავ დაუბრუნდი ამ მწერალს. თუმცა ეს სრულებით არ შეადგენდა ჩემს მიზანს ამ სტატიის წერის დროს, მაგრამ გარემოებამ მაიძულა. ხშირად ხდება, რომ ორი კრიტიკოსი ერთსა და იმავე მწერლის შესახებ სრულიად სხვადასხვა აზრის არიან, მაგრამ მათი მსაჯული მკითხველი საზოგადოებაა და არა თვით ისინი, რადგანაც თავისი თავი მართალი ჰგონია. ამ მოსაზრებით აღარც მე დაუბრუნდებოდი ნინოშვილს. რომ ამ ბელეტრისტის დაფასებაში ბ-ნი ხომლელი გარკვეულ გზას ადგეს და ხშირად არ ეწინააღმდეგებოდეს თავის თავს. როგორც მკითხველს დავანახვე.

ჩემი სტატია საგაზეთოა და არა რაიმე გამოკვლევა. ამის გამოც მე არც ვცდილვარ ესთეტიკის თეორია წარმომედგინა მკითხველისათვის. ან დასახული კითხვა სრულიად გამომერკვია. მე გამოვთქვი მხოლოდ ზოგიერთი მოსაზრება ხელოვნებისა და მისი დანიშნულების შესახებ და, თუ მართალი მითქვამს, შეიძლება სხვამ ისარგებლოს უნებმ ამით. ან მევე დავბრუნდე შემდეგში, როდესაც გარემოება შემამძლებინებს.

1900 წ.

## გიორგი წერეთელი. როგორც ბელეტრისტი

ვინ იცის, რა სიხარულით არ მივეგებეთ ახალ წელიწადს, რა იმედებით არ გავუღეთ კარი ახალ საუკუნეს. მაგრამ ახალმა წელმაც და ახალმა საუკუნემაც მოსვლისთანავე უბედურება მოუტანეს ჩვენ ცხოვრებას: დღეს მიაბარებენ მიწას გიორგი წერეთელს. თუ ვინმე იყო ჩვენი ქვეყნის ვულშემატივარი, საზოგადო საქმისათვის თავგანწირულად მშრომელი, იმათში ერთი საუკეთესო ალაგი გ. წერეთელსაც უჭირავს. ბუნებისაგან ნიჭით უხვად დაჯილდოებული აღიჭურვა მეცნიერებით. მიიღო მრავალმხრივი, ფართო განათლება. ადგილობრივ შეისწავლა დასავლეთ ევროპის ცხოვრება და ასეთი მომზადების შემდეგ გასაოცარი ენერგიით შეუდგა ჩვენი ცხოვრების გაუმჯობესებისათვის ზრუნვას; სამშობლოს ანაცვალა თავი და ამ თავგანწირულ შრომაში დალია სული. ჩვენ არ შეგვიძლია და არც კისრად გვიდვია, ამ მოკლე წერილში გავგვეცნო და დაგვეხასიათებინა მკითხველისათვის გიორგის მრავალგვარი მოღვაწეობა. ჩვენ მხოლოდ სახეში გვაქვს ამჟამად მისი მოღვაწეობა სიტყვაკაზმული მწერლობის ასპარეზზე, გვინდა, დავანახოთ მკითხველს მისი მხატვრული ნიჭის უმთავრესი თვისებანი და ამით ვამოვეთხოვოთ დაუვიწყარ მოღვაწეს...

ბატონყმობის გადავარდნამ ჩვენ ცხოვრებას დიდი ნაბიჯი გადაადგმევინა წინ, ჩვენი საზოგადოების შეხედულობა გააფართოვა და ამ გარემოებამ მწერლობაც განავითარა, ასპარეზი გაუფართოვა. ბატონს მწერლობაში გვერდში ამოუდგა მისი ნაყმევი, გლეხმა შეანგრია მწერლობის ვიწრო კლასიკური ფარგლები და გამოაცხადა: მეც ადამიანი ვარ. მეცა მაქვს გონება, მეცა მაქვს გული, მეც ვფიქრობ, მეცა ვგრძნობ და ამიტომ სრული უფლება მაქვს მწერლობაში ალაგი მოვითხოვო. ახალ სტუმარს ჩვენმა მწერლობამ სიყვარულის თვალთ შეხედა. მისი ღირსებანი თვალსაჩინოდ წარმოიდგინა და ამ გარემოებამ გამოიწვია, ერთი მხრივ, ის მოწინავე რეალის-

ტური მიმართულება ბელეტრისტიკაში. რომლის წარმომადგენელიც ილ. ჭავჭავაძეა. და მეორე მხრით. ტეტიათა მოტრფიალენი. რომლებსაც ჩვენ ბელეტრისტიკაში დღესაც დიდი ალაგი უჭირავთ და ნიჭიერი წარმომადგენლებიცა ჰყავთ. სამოცდაათიან წლებში განათლებული ახალ-თაობის საუკეთესო წარმომადგენლებმა უფრო ფართოდ და უტყუვრად შეხედეს ჩვენ ცხოვრებას. მის საჭიროებებს და დააარსეს პატარა ლიტერატურული ჯგუფი. რომელიც დაადგა ასევე რეალურ გზას და ნათლის სვეტად წინ წაიმძღვანა მთელი ერის ინტერესები და არა მარტო თავადაზნაურობის. ან გლეხობის. ამ ჯგუფის საუკეთესო წარმომადგენელი სიტყვაკაზმულ მწერლობაში არის გიორგი წერეთელი.

მართალია, რეალისტური მიმართულება გიორგი წერეთლიდან არ დაწყებულა. მაგრამ ამ სკოლას გიორგი წერეთელმა გაადგმევინა მტკიცედ ფესვები ჩვენ ბელეტრისტიკაში მას შემდეგ ამ გზას დაადგნენ დ. მეგრელი. ე.გ. ნინოშვილი და სხვ. ახალგაზრდა მწერლები, რომლებსაც ამიტომ შეგვიძლია გიორგი წერეთლის შეგირდები ვუწოდოთ. გ. წერეთლის ნიჭის საგანს მთელი ხალხის ცხოვრება შეადგენს: თავის ნაწერებში ის ერთნაირი სინამდვილეთა და სისრულით ხატავდა გლეხს, აზნაურს. თავადს. განათლებულს, გაუნათლებელს. ის ღრმად უკვირდებოდა ცხოვრებას და. რასაც ამჩნევდა; უტყუვრად ხატავდა. ტენდენციის გულისთვის არ ამახინჯებდა ცხოვრებას. ძვირად შეხვდებით ისეთ მწერალს, რომ მის ნაწერებში მისი საკუთარი მე არ გამოსჭვიოდეს. მისი საკუთარი სიმპათია, ანტიპათია, სურვილი. მისწრაფება არ აძლევდეს თავისებურ ელფერს იმ მოვლენებს და პირებს, რომლებსაც ის ხატავს. ეს არ ითქმის გიორგი წერეთლის შესახებ: როგორც ბელეტრისტი ის უნაკლო ობიექტივისტი არის; მის ნაწერებში თქვენ ვერ ნახავთ მისი „მე“-ს აჩრდილსაც, მის სიმპათია-ანტიპათიას; ის ცხოვრების ხატვის დროს სრულიად ივიწყება თავის თავს. ჩვენში არიან ისეთი მწერლები. რომლებიც ნაკლულევანებას მალავენ იმ პირებში. რომლებიც მათ მოწონთ. ღირსებას კი აზვიადებენ. გ. წერეთელს კი, პარიქით, საყვედური უფრო ეკუთვნის, რადგან ის ცდილობს არავითარი ნაკლოვანება არ დამალოს იმ პირებშიაც კი. რომლებიც სხვა მის მოქმედ პირებზე როგორც გონებით, ისე ზნეობით, გაცილებით მაღლა დგანან. მარტო ნამდვილი ცხოვრების ხატვა არ არის იმის თავდები, რომ მწერალს ნიჭი ჰქონდეს და თავისი მოღვაწეობით სარგებლობა მოჰქონდეს; სინამდვილაც არის და სინამდვილაც. ცხოვრებაში ბევრი რამ ზდება, მაგრამ ყოველისფერს არა აქვს მკითხველისათვის მნიშვნელობა. იმის გარჩევა, თუ რომელია ცხოვრების დამახასიათებელი

ლი მოვლენა, რომელი სრულად უმნიშვნელო. მეტად საძნელო საქმეს შეადგენს და ფეხის წაფორბილებისაც სწორედ აქ უნდა ეშინოდეს ყოველ მწერალს; ეს ისეთი კაცია, რომელიც ნათლად გამოაანკარავებს ხოლმე, რომელ მწერალს აქვს ნიკი და რომელს არა. ვიორგი წერეთლის რეალურა მიმართულების მნიშვნელობაც სწორედ იმაში მდგომარეობს, რომ ჩვენ ცხოვრებაში ყოველგვარ მოვლენას დიდი დაკვირვებით ზომავდა და ნათლად ატყობდა, რა იყო საყურადღებო, რა არა, რა ეკუთვნოდა წარსულს, რა მომავალს. ბატონყმობის მოსპობის შემდეგ, როდესაც გლახმა ცხოვრების მსვლელობაში აქტიურა მონაწილეობა მიიღო, ჩვენმა საზოგადოებრივმა ცხოვრებამ ნელ-ნელა იცვალა ფერი; ნატურალურ წარმოებას, მასზე აშენებულ საზოგადოებრივ განწყობილებას თანდათან გამოეცალა ნიადაგი. დაჰკარგა სიმტკიცე; ცხოვრება ნელ-ნელა დაადგა კაპიტალისტური წარმოების გზას სამოცდაათიან წლებში და წარმოების ახალმა ერამ შესაფერი საზოგადოებრივი ურთიერთობაც გამოაწვია: შეიცვალა ძველი ფეოდალი, შეიცვალა გლეხიც. მათ შორის სხვაგვარი დამოკიდებულება დამყარდა — ერთი სიტყვით. ევროპული ცხოვრების უმთავრესმა დამახასიათებელმა მოვლენამ სოციალურმა კლასებმა, ჩვენშიც იჩინეს თავი; ეს გარემოება იმისი უტყუარი ნიშანი იყო, რომ ჩვენ ევროპიელდებოდით. გაევროპიელება წინსვლელობის. ქონებრივად და გონებრივად წარმატების პომასწავებელია და არა დაქვეითების. არისტოკრატიის ინტერესების მოტრფიალეთა ერთი ნაწილი ჩვენი ცხოვრების ასეთ სასიზარულო ცვლილებას ვერ ამჩნევდა და პატრიოტული ლექსებით ბერავდა თავის თავმოყვარეობას; მეორე ნაწილი თუმცა ამჩნევდა რაღაც ცვლილებას ცხოვრებაში. მაგრამ იმდენი გამკრიახობა არა ჰქონდა, რომ ამ ცვლილებაში ჩვენი წინმსვლელობის უტყუარი ნიშნები გაერჩია; მას თავადობის მეტი არა აგონდებოდა რა. ჩედავდა, რომ თავადობა ნელ-ნელა ჰკარგავდა ცხოვრებაში მნიშვნელობას, ისობოდა და აპიტომ. რაც უფრო აშკარავდებოდა ეს ცვლილება, მით უფრო უმატებდა ოხვრა-კვნესას: ვველუბება მამულით, და წარსული დიდების გალობას, თითქოს მამული მარტო არისტოკრატია და მისი მიწა-წყალი ყოფილიყოს. გიორგი წერეთელმა ადრე შეამჩნია ჩვენი ცხოვრების წინმსვლელობა და ცვლილება; რადგანაც მისი იდეალი ევროპაში იყო და არა ძველ პატრიარქალურ-ფეოდალურ ცხოვრებაში. სხვებსავით ოხვრის მაგიერ დახატა ახალი ცხოვრება, ახლად განსახოვნებული კლასების „პირველი ნაბიჯი“ და ამით დაანახვა საზოგადოებას. საით მიდიოდა ჩვენი ეროვნული განვითარება და რა დაბრკოლებანი ეღობებოდა მას წინ. მისი რომანი „პირველი ნა-

ბიჯი“ გარკვევით და ნათლად უმტკიცებს შკითბველს ახალი ხანის დაწყებას ჩვენ ცხოვრებაში. სამწუხაროდ, ახალი ხანა ჩვენი ცხოვრებაშია დღესაც ცოტას ესმის ჩვენში; უმეტესობა არ ცდილობს შეიგნოს, რას მოასწავებს ის. „პირველი ნაბიჯის“ გამოსვლის დროს ხომ რომანის დედააზრი, მისი მნიშვნელობა მხოლოდ თითო-ორი პარაგრაფი და დაფადა. ერთი კრიტიკოსი იმასაც კი იძინდა: ასეთი სახელი მიტომ დაარქვა წერეთელმა თავის რომანს. რომ პირველად გამოვიდა სალიტერატურო ასპარეზზეო. უნდა ვაღიაროთ. რომ გიორგი წერეთლის მიმდევარმა, ნინოშვილმა, უკეთ დაგვანახვა თავის ნაწერებში ეს ახალი ხანა; მაგრამ ამის მიზეზი, ერთის შერათ, ისიც არის. რომ „პირველი ნაბიჯის“ წერას დროს ეს ხანა არ იყო იმდენად გარკვეული სახის. რამდენადაც ოთხმოცდაათიან წლებში, როცა ნინოშვილი გამოვიდა სამწერლო ასპარეზზე. რაც უნდა იყოს. ამ ახალ ხანაზე პირველად ჩვენ ბელეტრისტებში გიორგი წერეთელმა მიგვითითა. გიორგი წერეთლის ნაწერებში საუცხოოდ არის დახასიათებული ჩვენი ყველა წოდების წარმომადგენლები. ჩვენი მხატვრული გენია, რომელიც თავის საკუთარ კუქს უფრო ემსახურება, ვიდრე საზოგადო საქმეს; ის გვიჩვენებს. როგორ წარმოებდა ჩვენში აღზრდა, განათლება და რა ზარალი ან საარგებლობა მოჰქონდა მას, ენება ხალხის ზნე-ჩვეულებას, ცრუმორწმუნეობას და ამით მისი ნაწერები სხვებთან ერთად მშვენიერ წყაროს შეადგენენ ჩვენი ცხოვრების შესასწავლად შესამოცე წლებიდან მოკიდებული. ამ მხრით განსაკუთრებით აღსანიშნავია მისი რომანი „პირიმზე“. რომელიც „კვალში“ იბეჭდებოდა გასულს წელს: ამ რომანის ბეჭდვა „კვალში“ შეწყდა რედაქციისაგან დამოუკიდებელი მიზეზის გამო. „ჩვენი დროის ყვავილი“, „კიკოლიკი, ჩიკოლიკი და კუდაბზიკა“. „პირველი ნაბიჯი“, „პირიმზე“, „ლომკაცი“, „მამიდა ასმათი“, „რუხი მგელი“, „არანკა“, „ედიშერ ქელბაქიანი“. — აი გიორგი წერეთლის უმთავრესი ბელეტრისტული ნაწერები; რაც შეეხება წერილ შოთბრობებს, ისინი ხომ გაცილებით მეტი არიან. გიორგი წერეთელს მარტო ბელეტრისტისაში არ დაუჩინებია ღრმა კვალი; მან დიდი სამსახური გაუწია ჩვენს თეატრსაც. იმ დროს, როდესაც ჩვენი თეატრი მხოლოდ ლათაიებით ამზიარულეზდა საზოგადოებას და წარსული გმირების ვაჟაკობის მეტს არას უხატავდა, გიორგი წერეთელმა თანამედროვე ცხოვრება დაანახვა სცენიდან საზოგადოებას. მიუთითა სხვადასხვა ნაკლოვანებაზე და ამით საზოგადოების აღზრდაში თავისი წვლილი შეატანა. მისი პიესებია „კაბრი“, „ოჯახის ასული“ და „დარია“.

ამით ვათავებთ ამ დაუენწყარი მოღვაწის ბელეტრისტული ნიჭის

ზოკლედ დახასიათებას და ეუსურვებთ ჩვენს ცხოვრებას. რომ ასეთი ნიჭიერი და თავდადებული მოღვაწე აწ უფრო ბევრი წარმოეშობოს. მხოლოდ მაშინ თუ შეგვეძლება სხვა კულტურულ ერთა შორის ჩვენც დავასახელოთ ჩვენი თავი.

მშვიდობით, პატიოსანო მუშაკო და მამულის სასიქადულო შვილო. საყვარელო გიორგი!

1900 წ.

## ჩვენი სიტყვაკაზმული ლიტერატურა 1899 წელს

ჩვენი საზოგადოებრივ-ეკონომიური მსვლელობის შესახებ ყურ-ნალ-გაზეთებში და საზოგადოებაში, კარგა ხანია. ორგვარი აზრი არსებობს; პირველი აზრით, ჩვენში წოდებები ისპობან. მათ მაგიერ იზადებიან სხვადასხვა სოციალური კლასები. ჩვენი ცხოვრება კაპიტალისტური წარმოების გზას დაადგა; წოდებათა მოსპობა და კლასების გაძლიერება იგივე ჩვენი ერის გაძლიერება არის. მეორე აზრის მიმდევარი გაიძახიან: კაპიტალიზმი ჩვენში არც არის, არც შემოვუშვებთ. წოდების მოსპობას ღმერთმა ნუ მოგვასწროს: გლეხმა უნდა იგლებოს მხოლოდ, აზნაურმა იაზნაუროს, თავადმა ითავადოს. — ჩვენი ძლიერება მხოლოდ წოდებათა პარზონიულ განვითარებაშია. გაზეთი „ივერია“ უკანასკნელი აზრის მიმდევარა, თუმცა ღმერთმა ის ფრიად სუსტი ძალ-ღონით დააჩილდოვა თავისი აზრების გასავრცელებლად. პუბლიცისტიური ნაწილი მასში ყოველთვის სუსტი იყო და ამ უკანასკნელ დროს ისე მიიღია, რომ ხამ მკითხველს რომ ჰკითხოთ, რა მიმართულების არის „ივერიაო“. პასუხა გაუჭირდება. რაც შეეხება ბელეტრისტულ განყოფილებას. 1898 წელს არც ერთ ჩვენ ყურნალსა და გაზეთს არ მოუცია იმდენი მასალა წემოსხენებული პირველი აზრის დასამტკიცებლად. ე. ი. „ივერიის“ დასამტყუნებლად, რამდენიც თვით „ივერიამ“. „ივერია“ უბერხულ მდგომარეობაში ჩავარდა: ბელეტრისტულ ნაწილში ის არღვევდა მას, რასაც პუბლიცისტიკაში ქადაგებდა. ასეც უნდა მომხდარიყო: „ივერია“ ყოველდღიური გაზეთია. მაშასადამე, მას საშუალება ექვს. გაცილებით მეტი ბეჭდოს ბელეტრისტული ნაწარმოები. ვიდრე სხვა ყურნალ-გაზეთობას. — ყოველი ბელეტრისტი კი, რომელიც ჩვენ დღევანდელ ცხოვრებას ხატავს, რაც უნდა სუსტი ნაწილს პატრონი იყოს, თუ ფაქტებს განგებ არ დაამაზინჩებს, იმისი დამრღვეველი იქნება. რასაც „ივერია“ და მისი თანამოაზრენი ქადაგებენ. საჩოთირო მდგომარეობის ასაცილებლად მხოლოდ ერთი გზაა და-



ჩენოდა „ივერიის“; ან უნდა მიეტოვებინა თავისი უნაადაგო შეხედულება ჩვენი საზოგადოებრივი ცხოვრების შესახებ, ან ურჩი ბელეტრისტიკა გაეძევებინა, და აი, „ივერია“ ამ მეორე გზაზე შემდგარა: ამან ამჯობინა ცხოვრების უარყოფა და უნაადაგო მოძღვრების შერჩენა ე. ი. კემშარიტების განდევნა. როდესაც გადავიკითხე წარსული წლის „ივერიის“ ბელეტრისტიკა. იქ აღარ შემხვდნენ ის მწერლები. რომლებმაც 1898 წ. უკვე მიიქციეს მკითხველის ყურადღება, მასში ვეღარ ვნახე ვერც ერთი მოთხრობა, რომელიც რაიმე მხრავ ყურადღების ღირსი იყოს; რამდენადაც მდიდარი იყო 1898 წ. „ივერიის“ ბელეტრისტიკა და საყურადღებო, იმდენად ღარიბი და უმნიშვნელოა 1899 წელს. მაგრამ უკაცრავად: „ივერიის“ ფურცლებზე აღმოვაჩინე „დღეღელი ვანო“, რომელსაც გენიოსური საშუალებისათვის მიუგნია სულიერი მოძრაობის გამოსახატავად; ეს საშუალება გახლავთ — წერტილები! უსწავლია წერტილების დასმა. მოსწონებია არაგვისპირელის მოთხრობების სათაურები და თამამად ჰქელავს „ივერიის“ ფურცლებს. მისი მოთხრობები მეტად ორიგინალურია: წერტილები ნაწერზე მეტია!

ამ ბოლო დროს, რამდენადაც ვიცი, პირველად გამოვიდა სამწერლო ასპარეზზე ივ. ბ-ლი. რომლის ვრცელი მოთხრობა: „ქუთხუჯის ნახტომი“ — ივერიაში იბეჭდებოდა. მოთხრობა ნიჭიერად არის დაწერილი. მაგრამ მოთხრობის თემად ცალიერი წარსული ცხოვრების აღებას მკითხველისათვის ძალიან ნაკლები მნიშვნელობა აქვს და ამიტომ ზემოხსენებულ მოთხრობას არც ჩვენ ვეხებით ვრცლად. ყოველი ნიჭიერი კაცი დღეს ჩვენთვის ფრიად საჭიროა და ამიტომ ბ-ნი ბ-ლი ისევ ჩვენ თანამედროვე ცხოვრებას რომ დაუკავშირდებოდეს, თანამედროვე ჰირ-ვარამს რომ გაგვითვალისწინებდეს და დღევანდელი ქართველის გულსა და სულში ჩაგვახედებდეს, გაცილებით უფრო სასარგებლო იქნება ჩვენი საზოგადოებისათვის.

წარსული წლის „კვალის“ ბელეტრისტიკა შორის<sup>1</sup> საყურადღებო იყო ელ. წერეთელი. მან მოათავსა „კვალში“ რამდენიმე მოთხრობა. რომელთა შორისაც „ბედნიერება“ და „იდეალი და ცხოვრება“ განსაკუთრებით საყურადღებოა. არიან იმ დედააზრით, რომელიც მათ შიგა გატარებული. სანამ მათი დედააზრის განხილვას შევუდგებოდეთ.

<sup>1</sup> რამდენადმე უხერხულობას წარმოადგენს, რასაკვირველია, ჩვენივე თანამშრომლებს ჩვენს გაზეთშივე დაფასება, მაგრამ რას იზამთ, როცა სხვა ორგანოები ზმს არ იღებენ და სერიოზულ მსჯელობას რომელიმე მწერლის შესახებ ვერ ახერხებენ. ამიტომ ისევ ჩვენ უნდა შევეხოთ. როგორც მათ თანამშრომლებს, ისე ჩვენსასაც და შევეხოთ ერთნაირად, ერთნაირი მუდგომლობით. თვითრიტუა ყველა კრიტიკაზე მაღლა დგას.

ჩვენ მივუთითებთ მწერალს ერთ ნაკლოვანებაზე, რომელიც მის მოთხრობებს ეტყობა. ავტორის უმთავრესი ყურადღება დედააზრსა აქვს მიქცეული, მისი მიზანი მხოლოდ ის არის, რომ ერთი დასაბუთებული იდეა გაატაროს მოთხრობაში, მომქმედი პირები კი უყურადღებოდ რჩება. რაც ზიანს აყენებს მოთხრობის სამხატვრო ღირსებას და ამიტომ შესაფერ შთაბეჭდილებასაც ვეღარ ახდენს მკითხველზე. როდესაც პუბლიცისტი, კრიტიკოსი, მეცნიერი ნათლად და გარკვევით გაატარებს თავის ნაწერებში რაიმე იდეას, თუნდ ნაწერი მშრალი და სქემატურიც იყოს, მკითხველი მაინც კმაყოფილია, ოღონდ იდეა ნათლად გამოსჭვივოდეს და საკმარისი მოსაზრებითაც იყოს დასაბუთებული. სულ სხვა არის მწერალი-მხატვარი: ის აზროვნებს მხატვრულად ე. ი. სურათების შემწეობით, როგორც ბელინსკი ამბობდა, ამიტომ მისი აზროვნება მით უფრო მძლავრია, რამდენადაც უფრო რელიეფურად არის დახატული მისი სურათები; მის მიერ გატარებული იდეა მით უფრო ძლიერ შთაბეჭდილებას ახდენს მკითხველზე. რამდენიც უფრო სრულად არის დასასაბუთებული ამ იდეის მატარებელი ან მისი დასაბუთებისათვის გამოყვანილი მომქმედი პირები.

ამ მცირე შენიშვნების შემდეგ ჩვენ გადავალთ მოთხრობების ღირსებაზე. როგორც უკვე მოვიხსენიეთ, საუკეთესოდ მიგვაჩნია „ბედნიერება“ და „იდეალი და ცხოვრება“. პირველ მოთხრობაში ავტორმა დაგვიხატა ორი სხვადასხვა ბუნების და მოთხოვნების ადამიანი — მატა და რუსო. ორივე ახალგაზრდა ქალია. ორივე ახლა აპირებს ცხოვრებაში ფეხის შედგმას, მაგრამ რა დიდი განსხვავებაა მათ შორის! პირველი არის მშვიდობიანი, აუშფოთებელი ბუნების; მას გული იმდენად უცემს, რამდენადაც საჭიროა სისხლის ნელი; აუჩქარებელი ტრიალისათვის; სისხლის დუდილი, მძლავრი, შეუჩერებელი მისწრაფება რაიმე მიზნისაკენ მას არ უგრძვნია, არ გამოუცდია და ვერც იგრძნობს, რამდენი ხანიც უნდა იცოცხლოს. მასა აქვს მხოლოდ იმდენად მგრძობიარე ნერვები. რამდენიც საჭიროა წყნარი, ნყუდრო ცხოვრებისათვის; აღელვება. აშფოთება. აფეთქება მან არ იცის. რა არის, რადგანაც არ უგრძვნია, არ გამოუცდია და ვერც ოდესმე გამოცდის: ამგვარია მისი ბუნება. მთელი მისი აზროვნება ყოველდღიურ წვრილმანებშია გაფანტული; მას არ შეუძლია მთელი თავისი ფიქრი, აზროვნება ერთად შეკრიბოს. ერთ ფოკუსში მოათავსოს და სხვა ყოველივე მცირე ხანს მაინც დაივიწყოს. თავდავიწყებული სიყვარული ვისიმე ან რისიმე მას არ შეუძლია: „არაფერი ნაგვარი მთელ ჩემ სიცოცხლეში არ გამომიცდიაო“, — გულახდილად, გვატყობინებს ის. რანაირ ბედნიერებაში ან უბედურებაშიც უნდა ჩავარდეს, მას არასოდეს არ დაებადება თავში ასეთი კითხვები:

რა არის ცხოვრების მიზანი. ღირს რაიმე თუ არა ჩემი სიცოცხლე. მე დავიბადე. მაშასადამე, ყოფილა ცხოვრების მიზანი, მე ვცოცხლობ. მაშასადამე, სიცოცხლეს ფასი ჰქონიაო, გიპასუხებთ ის; შეიძლება მას გაუტყდეს გული, მაგრამ სასოწარკვეთილებამღის არასოდეს არ მივა; შეიძლება არასოდეს არ გახდეს ცხოვრების ღიდი კმაყოფილი. მაგრამ უმადურიც არ იქნება. ცხოვრებას ის ბევრს არაფერს თხოვს: კმაყოფილია მით, რასაც ცხოვრება აძლევს. მას არ სწამს სრული, ღრმა ბედნიერება და არც ეძებს მას ცხოვრებაში. ჩააყენეთ ის მყუდრო ცხოვრებაში. მიეცით მისი მშვიდობიანობის დარაჯი — ქმარი. გახდება ის რამდენიმე შვილის დედა და მეტს აღარას ითხოვს, კმაყოფილი იქნება თავისი ხვედრის. თუ კითხავთ: ხარ, მატა. სრული ბედნიერიო? — ის გაპასუხებთ: სრული ბედნიერება არ არსებობს და ამიტომ არც მე ვარ, მაგრამ ბედს არ ვემდურებო. ის დაემორჩილება ცხოვრებას, მთელ თავის ზრუნვას, ფიქრს, აზროვნებას. მოქმედებას, მარტო თავის თავს და საკუთარ ოჯახს შემოახვევს გარშემო. იცხოვრებს ასე მძინარედ, პასიურად. სანამ გული ცემას არ შეწყვეტს, მოკვდება და ჩვენი ცხოვრების რომელიმე გულშემატყვიარი ქებითაც გამოეთხოვება: შენ იყავი ნამდვილი ოჯახის დედა, ღმერთმა გაგვიმრავლოს შენსთანა დედების რიცხვიო, თითქოს უამისოდაც გამრავლებული არ იყოს, თითქოს გვეყავდეს სხვანაირი დედები!

რუსო მთელი თავისი სულიერი არსებით მატას საწინააღმდეგო ტიპია. ის არის მეტად ცოცხალი ბუნების, მის ძარღვებში აღუღებულ სისხლი მოძრაობს. მყუდრო, აუშფოთებელი ცხოვრება მას არ შეუძლია, არც უნდა. მას არ შეუძლია პასიურად ცხოვრება, მას უნდა მოქმედება. მას უნდა დაიკმაყოფილოს ცხოვრებაში. გამოხატოს, გამოააშკარავოს რაშიმე ის სულიერი ძალა, ის ენერჯია, რომელიც მისთვის ბუნებას ურგუნებია. ის არ არის ცხოვრების ყურმოჭრილი ძონა, არც ოდესმე დაემორჩილება ცხოვრებას; ის მისდევს მხოლოდ თავის სულიერ მოთხოვნილებას, თავის შინაგან გულისთქმას. მას არ უნდა იცხოვროს მხოლოდ ერთფეროვანი ცხოვრებისათვის, — ასეთი ცხოვრება მას სრულიად არ იზიდავს. მას არ შეუძლია, ცხოვრების წვრალმანებში დაფანტოს მთელი თავისი არსება; მისი ბუნება ითხოვს აშფოთებულ, აღელვებულ ცხოვრებას; თუ დაისახა რაიმე მიზანი ის ყველაფერს დაივწყებს. მთელი თავისი ბუნებით ამ ერთი მიზნისაკენ გაეშურება. არავითარ დაბრკოლებას არ შეუშინდება. ვერაფერი ვერ შეაფერხებს: ისი ყოველთვის დაძლევს და მიაღწევს თავის მიზანს. ან მიზანს შეწირავს ყოველიფერს. — სიცოცხლესაც მას შეუძლია გატაცებით სიყვარული და ამიტომ კიდევ სწავს

თავდავიწყებამდის გატაცება. ის მხოლოდ ასეთ ცხოვრებაში ჰხედავს სრულს, ქეშმარიტ ბედნიერებას, სიცოცხლე მარტო სიცოცხლისათვის მას არ მიაჩნია ბედნიერებად. მას ვერ იმორჩილებს ცხოვრება. ის თვითონ იმორჩილებს ცხოვრებას. ის არ არის მონა ფორმალური ზნეობის; დეე, ყველა კაცხავდეს თავისუფალ საყვარულს. ის არ შეუშინდება სხვის კაცხვას, რადგანაც ამგვარ საყვარულში ის უზნეოს არაფერს ხედავს. მას შეუძლია გაცილებით მეტი სისაძაგლე ჩაიღინოს. ვიდრე მატას. სამაგიეროდ, მას შეუძლია ისეთი გმირობის გამოჩენაც, რის შესაფერი ძალაც მატას არ მოეპოება.

აი, რა სხვადასხვაგვარად ესმისთ ამ ორ ადამიანს ცხოვრების მიზანი, სულიერი ცხოვრების დაკმაყოფილება და ბედნიერება, რომელსაც ყოველი ჩვენგანი ეძებს ცხოვრებაში, ნამდვილად კი რომელი უფრო ბედნიერია? საქმე იმაშია. ვის როგორ ესმის ბედნიერება. ჩაიხედეთ ახალგაზრდა ვაჟის გულში და აი რას ამოიკითხავთ: ლამაზი, მოსიყვარულე ცოლი, იმდენი შეძლება. რომ ყოველგვარი მოთხოვნილება გაუქირვებლად დაიკმაყოფილოს, ორიოდე ფუნჩულა ზავში, — მორჩა და გათავდა! თუ ეს აუსრულდა, სრული ბედნიერი იქნება. მართალია. პირველ ხანებში შეწუხდება, როდესაც სამშობლოს სამსახური სულ მიავიწყდება, მაგრამ ამგვარ მწუსარებას ერთობ მალე ამორეცხავს ხოლმე დღევანდელი ადამიანის გულიდან საკუთარი ბედნიერება. ჩაიხედეთ ახალგაზრდა ქალის გულში და იქაც მხოლოდ იმას ამოიკითხავთ, რის მძებარიც მატა არის ცხოვრებაში. ჩვენი ქალების უმრავლესობა მხოლოდ მატას წარმოადგენს, მითია კმაყოფილი. რითაც მატა, მარტო მას ეძებს ცხოვრებაში, რასაც მატა. ასეთი პირები ხშირად ჰპოვებენ ბედნიერებას, მაგრამ მათი ბედნიერებით საზოგადო ცხოვრებას იოტის ოდენიც არა ემატება რა. მათ არ შეუძლიათ ცხოვრებას შეძინონ რამე, ცხოვრება წინ წასწიონ თავისი ნებით, თავისი სურვილით, მხოლოდ პასიური მოქმედებისათვის არიან გაჩენილი. აქტიური მოქმედნი კი რუსოსთანა ბუნების პირნი არიან. თუ ადამიანმა მთელი თავისი არსება არ შესწირა დასახულ მიზანს, ის ვერ განახორციელებს მას. ვისაც არ შეუძლია თავდავიწყებით საყვარული, ძვირად მიაღწევს საყვარელ საგანს; ვისაც არ შეუძლია თავდავიწყებით გატაცება, ის ვერ მოუტანს საზოგადო საქმეს შესამჩნევ სარგებლობას და, კიდევ რომ სურდეს ასეთი სარგებლობის მოტანა, ძალიან სუსტ თანაგრძობას ჰპოებს; როგორ აღაფრთოვანებს. როგორ გაიტაცებს სხვას ისეთი ადამიანი. რომელსაც თვითონ არ შეუძლია გატაცება? მატასთან პირები მხოლოდ საკუთარი ბედნიერებისათვის ზრუნავენ, საკუთარი კეთილდღეობის მეტს ისინი თვითონ, თავისთავად არაფერს ეძებენ ცხოვრება-

ში; საზოგადო კეთილდღეობის ზრუნვაში, საზოგადო საქმეში კი ისინი სხვას თუ გაპყვებიან უკან. სხვა არიან რუსოსთანა ბუნების პირნი; მათ შეუძლიათ თავისი თავი დაივიწყონ და მთელი თავისა ძალ-ღონე საზოგადო საქმეს ანაცვალონ. კერძო ცხოვრებაში ისინი სწორად უბედურნი არიან, მაგრამ საზოგადო კეთილდღეობისათვის ზრუნვაში კპობენ ბედნიერებას. მაშ რომელია უფრო ბედნიერი, მკითხველო? ნატვრას რომ გასავალი ჰქონდეს. მე რუსოს ბუნებას ვინატრებდი და შენი კი არ ვიცი. სამწუხაროდ ჩვენ ცხოვრებაში მათთანა პირები ძალიან ბევრია, რუსოსთანა კი ძალიან ცოტა. თვით ჩვენი ცხოვრება არ არის ჯერჯერობით იმდენად ნიადაგ მომზადებული, რომ რუსოსთანა პირებს საშუალება მიეცეს თავისი სულის სიძლიერე. მოქმედების წყურვილი გამოააშკარაონ. ამიტომ საკვირველიც არ არის. თუ რუსოს გატაცება ჯერჯერობით მარტო სიყვარულში იხატება.

„იდეალსა და ცხოვრებაში“ ავტორს გატარებული აქვს ის აზრი, რომელიც არა ერთხელ გამოთქმულა ჩვენს მწერლობაში ჩვენი ახალთაობის შესახებ. ნაკლი, რომელიც ჩვენ ზემოთ მოვიხსენიეთ, ამ მოთხრობაში უფრო ეტყობა ავტორს. მან აიღო საუკეთესო წარმომადგენელი ჩვენი განათლებული ახალთაობისა, ჩააყენა ცხოვრებაში, დაგვანახვა მისი სრული უძლურება თავისი რწმენების განსორციელებაში და გულნატკენმა დაასკვნა: ღირს კი ცხოვრება, როცა ამასთანა კაცებიც — ასეთები გამოდგებიან ხოლმეო? რასაკვირველია. ფრიად სამწუხაროა, თუ ჩვენი ახალთაობის საუკეთესო წარმომადგენლებიც კი ან ვერ ახორციელებენ ან არ ახორციელებენ თავის იდეალებს ცხოვრებაში და მხოლოდ საკუთარი ეუჭისათვის იწყებენ ხოლმე ზრუნვას; შეიძლება ასეთი აზრი ავტორისა სრული ჭეშმარიტება იყოს, მაგრამ ეს ჭეშმარიტება რომ უფრო სარწმუნო ყოფილიყო. რომ უკეთ ჩაენერგა ის ჩვენს გონებაში. მას უნდა აეღო მართლა საუკეთესო წარმომადგენელი ამ ახალთაობისა და უფრო გარკვევით. უფრო სრულად, უფრო რელიეფურად დაეხატა ის, მისი გამოსვლა ცხოვრებაში, ბრძოლა და დამარცხება. უამისოდ კი ჩვენ არ შეგვიძლია; ბეჯან მანასიძე ახალთაობის საუკეთესო წარმომადგენლად მივიღოთ და მისი მაგალითით გულგატეხილმა მთელ ჩვენ ახალთაობას სრული უიმედობის თვალთ ვუცქიროთ.

იმ ბეჯანს, რომელიც გატაცებული იყო სხვადასხვა პატიოსანა აზრებით, რომელსაც მიზნად დაესახა ხალხის კეთილდღეობისათვის

წეწირა მთელი თავისი სიცოცხლე. ჩვენ ვერ ვსედავთ. ჩვენ ვერ ვიც-  
ნობთ პირადად, მას გვაცნობს პირველი კურსის სტუდენტი ვანო,  
პირველი კურსის სტუდენტს კი მარტო მწვანე მუნდირიც კი სიბრძ-  
ნისა და მეცნიერების ემბლემად მიაჩნია; გიმნაზიის შევიწროებული  
ატმოსფეროდან ის ერთბაშად ვადადის სრულიად სხვა ცხოვრებაში,  
მას ენიჭება დიდი თავისუფლება, გული უბრწყინდება, პესიმისტუ-  
რი ბუნებისაც რომ ყოფილიყოს. პირველ ხანებში სრული ოპტი-  
მისტი ხდება და ხშირად ხედავს იმას, რაც ნამდვილად არ არსებობს;  
მას ნაკლები მომზადება აქვს სხვის დასაფასებლად და ამიტომ ხში-  
რად გადაჭარბებულადა აქვს წარმოდგენილი თავისი უფროსი ამხა-  
ნაგის ღირსება, მით უმეტეს. თუ უკანასკნელი ხშირად ხმარობს  
პრტყელ-პრტყელ სიტყვებს, სამეცნიერო ტერმინებს, მომავალ მოდ-  
ეწედ მოაქვს თავი. თუ ყოველივე ამას მივიღებთ მხედველობაში.  
ავტორის რეკომენდაციას: ბეჟანი ახალთაობის საუკეთესო წარმო-  
მადგენელიაო, ცოტა ეჭვის თვალთ უნდა შევხედოთ, ხოლო ეჭვსგა-  
რეშეა, რომ ბეჟანი—სტუდენტი საიმედო ახალგაზრდაა. მას მოხნად  
დაუსახავს ხალხს ემსახუროს, საზოგადოებრივ ცხოვრებას გამოად-  
გეს რაშიმე; ასეთ დიად მიზანს ის საზრიანად უყურებს. ცდილობს,  
ალიჭურვოს მეცნიერების მძლავრი იარაღით და შეისწავლოს თავისი  
სამშობლოს ისტორია და ლიტერატურა; მას პატივს სცემს მთელი  
ამხანაგობა. ბევრი ცდილობს მას წაბადოს. ასეთი სტუდენტი ჩვეუ-  
ლებრივი არ არის. ის ჩვეულებრივზე მალა დგას. გამოდის ბეჟანი  
ცხოვრებაში. რას აკეთებს ის მთელი ათი წლის განმავლობაში, ჩვენ  
არ ვიცით. ათი წლის შემდეგ ჩვენ ვსედავთ, რომ ბეჟანი ჩვეულებ-  
რივი ადამიანია, ის არათუ ხალხს არ ემსახურება. აღარც უნდა რომ  
ემსახუროს, მარტო თავის თავისთვის ზრუნავს და უბრალო სიბრძ-  
ლულიც კი აღარ ებადება გაჭირებულისადმი: როცა ავადმყოფთან  
მიხმობენ, უმალ იმას კითხულობს, რას მომცემნო. და. თუ ქირა  
ეკოტავა, ფეხსაც არ გადაადგამს. რომ ახალთაობის უმეტესობა  
არას აკეთებს, უმცირესობა ვერას აკეთებს და სულ ცოტა ნაწილი  
ვერ აკეთებს იმდენს, რამდენიც შეუძლია. ამას ჩვენ არ უარვყოფთ.  
მაგრამ ავტორს უნდა დაენახებია ჩვენთვის ბეჟანის ბრძოლა ცხოვ-  
რებასთან, მისი სულიერი ტანჯვა. ის მიზეზები, რამაც მოწყვიტა ის  
მის პატიოსან მიზანს. როგორ შეიძლება ბეჟანი, ის კარგი, თითოთ  
საჩვენებელი ბეჟანი, რომელიც ხალხის კეთილდღეობისათვის ზრუნ-  
ვაში აპირებდა საკუთარი ბედნიერების, კმაყოფილების, ერთის სიტყ-  
ვით, ცხოვრების მიზნის მოპოებას, როგორ შეიძლება ასეთი ბეჟანი  
უბრძოლველად, უტანჯველად, უცრემლოდ დამორჩილებოდა ცხოვ-  
რებას?!<sup>1</sup> უამისოდ კი ბეჟანის გამოცვლა სრულებით გაუგებარია.

მე განგებ ვეძებდი, მკითხველო. ყოველნაირ ნაკლულევანებას ბე-  
 ყანაში. ყოველ მცირე ნაკლაც კი მოთხრობაში. რომ ამით ჩემი  
 თავი და შენც მენუგეშებინა, მაგრამ რამდენიც უნდა ვინუგეშოთ  
 თავი. ავტორის მიერ წამოყენებული ფაქტი ფაქტადვე რჩება. ჩვენ  
 არ შეგვიძლია იმის თქმა, რომ ახალთაობის საუკეთესო წევრნი  
 ცხოვრებაში სრულიად გამოუსადეგარნი ხდებოდნენ და უმნიშვნე-  
 ლოდ თვლიდნენ თავის დღეს, მაგრამ ახალთაობა ის არ არის, რაც  
 უნდა იყოს. ის არ აკეთებს მას, რის გაკეთებაც შეუძლია. იქნება მას  
 არაფრის კეთება არ უნდა? იქნებ მისი სიტყვები, საზოგადოებას  
 უნდა ვემსახუროთ. ენის უშინაარსო როკვა იყოს მხოლოდ? იქნება  
 ყველა ის პატიოსანი სურვილი, მისწრაფება. მიზანი, რომლებსაც ის  
 გვიცხადებს. მარტო სხვისი და თავის თავის მოტყუება იყოს, ბაქიო-  
 ბით ნათქვამი, გულწრფელობას მოკლებული? არა და არა. ახალ-  
 თაობის უმეტესი ნაწილი არც ერთი ერის საუკეთესო ხანაშიც არ  
 ყოფილა აქტიური მომქმედი საზოგადო ასპარეზზე და ამიტომ ამას  
 ვერც ჩვენ მოვთხოვთ ჩვენს ახალგაზრდობას. ყველგან და ყოველ-  
 თვის მხოლოდ მცირე ნაწილი მეთაურობდა საზოგადო საქმეს, და-  
 ნარჩენი მას თუ უწყობდა ხელს! ახალთაობის ერთ ნაწილს ჩვენ-  
 შიაც უნდა საზოგადოებას ემსახუროს, ის გულწრფელი სურვილით  
 არის გატაცებული ხალხს სარგებლობა მოუტანოს, სხვისთვის სამ-  
 სახურში საზრიანად დაუსახავს მას ცხოვრების მიზანი, მაგრამ  
 ცხოვრებაში ის ვერ ასრულებს მას. რაც სწადია, ვერ მოაქვს იმდენი  
 ნაყოფი. რამდენიც ნამდვილად შეუძლია. რა არის ამის მიზეზი?  
 ნუთუ ჩვენი ხალხი გონებრივად და ზნეობრივად სუსტდება, გადა-  
 გვარების გზას ადგას? იყო დრო, როცა რომელიმე ეპოქის შემოქმე-  
 დად ადამიანი მიაჩნდათ, მაგრამ ასეთი ბავშვური რწმენის ნეტარნი  
 დრონი წარვიდნენ, გაქრნენ, და დღეს თანდათან ვრცელდება ის  
 კეშმარიტება, რომ ეპოქა ქმნის ადამიანს; ხანდახან მომხდარა, რომ

---

! აქ წარმოთქმულ აზრს მთლად არ ვეთანხმებით. ბელეტრისტი სრულებით  
 არ არის სასაყვედურო იმისათვის, თუ რატომ ეს დაასურათა და არა ის. საქმე  
 იმაშია, თუ რანაირად და რა ხელოვნებით ხატავს იმას, რის დახატვაც მოუწადი-  
 ნებია. ჩვენ რომ თემები თავს მოვახვიოთ, — ეს ძალიან შორს წავვიყვანდა. «იდეა-  
 ლი და ცხოვრება» თავისივე სახელწოდებით აღნიშნავს მოთხრობის თემას. ავ-  
 ტორის სურდა წამოედგინა ორი ერთმეორის მოწინააღმდეგე ხანა, ორი კონტ-  
 რასტა და მათ უფრო ნათელყო დედააზრი. მას სახეშიაც არ ჰქონია შუა ხანებ-  
 ში აეწერა, მაშინ შეიძლება მთელი ტომიც გამოსულიყო და დედააზრი კი მინც  
 ცხადი არ გამხდარიყო.

საზოგადოებას შესამჩნევად წაუწევია წინ თავისი ცხოვრება, მაშასადამე, ხალხს შეუქმნია ეპოქა; მაგრამ როცა ცოტა ღრმად ჩაუკვირდებით, დაინახავთ. რომ ცხოვრებაში იმდენად მომზადებულა ნიადაგი, ისეთი პირობები განვითარებულა, რომ საზოგადოების. ერის მოქმედების განაყოფიერება შესაძლებელი გამხდარა. მოსპეთ ეს ნიადაგი, ეს ხელშეწყობი პირობები და მაშინ, თუნდა დღედაღამეს ასწორებდეს მუშაობით რომელიმე თაობა, შრომის შესაფერ ნაბიჯს ვერ გადაადგმევენებს წინ ცხოვრებას. მიუმატეთ ამას ცუდი აღზრდა, ნაკლები მომზადება, ცხოვრებიდან თავისუფალი აზროვნების განდევნა და მაშინ ცხადი იქნება, თუ რად არის დღევანდელი ჩვენი ახალი თაობა უფერული, უნაყოფო.

ფაქტის ახსნა და მისი გამართლება სრულებითაც არა მგონია ერთი და იგივე. რა მიზეზებიც უნდა მოვუპოვოთ ჩვენი ახალთაობის უმოქმედობას, უფერულობას, ასეთი მოვლენა მაინც სამწახურო იქნება. თვით ახალთაობამ უნდა დაიცვას თავისი ღირსება, უკეთ შეისწავლოს ჩვენი ცხოვრება, რომ შეამჩნაოს საიმედო მომავალი, და ამ მომავლისაკენ გაეშუროს მთელი თავისი ძალ-ღონით. ჩვენი ცხოვრების ამღვრევა საუკეთესო თავდებაა. რომ ჩვენი ხალხი წინ მიდის. ჩვენმა ახალთაობამ უნდა ხელი შეუწყოს მას ამ წინმსვლელობაში, საიმედო მომავლით გაიმზნეოს გული და გაეშუროს წინ. რა ვუყოთ, რომ ის დღეს და ხვალ ვერ იხილავს თავის შრომას და გვირგვინებულს? რა ვუყოთ, რომ ის დღეს და ხვალ ვერ შეადგამს ფეხს უკეთეს ცხოვრებაში? სამაგიეროდ, მისი შრომა მოახლოვებს ამ უკეთეს მომავალს და ეს საკმარისია, რომ ახალთაობამ უკუაგდოს კერძო ბედნიერების ვიწრო ფარგლები და კვალში ჩაუდგეს საზოგადო საქმეს, საზოგადო კეთილდღეობისათვის იზრუნოს.

\*

მეტად საგულისხმიერო იყო „კვალში“ ია ეკალაძის „ტყეშიც“! ამ პატარა სურათში პოეტმა გამოხატა ცხოვრების მთელი ფილოსოფია, ყველა ის ფიქრი და გრძნობანი, რომლებიც პატიოსან ადამიანს მოსვენებას არ აძლევენ, სულსა და გულს უხუთავენ. პოეტს უნდა, რომ ქვეყნად მეფობდეს სიმშვიდე, ძმობა, ერთობა, მაგრამ ადამიანთა შორის ის ვერც ერთს ამას ვერ ხედავს: ყოველი ადამიანი თავისთვის ზრუნავს, მარტო საკუთარი ბედნიერებისაკენ მიისწრაფვის და გზაზე ვინც უნდა შეხვდეს, არ დაზოგავს, არ დაინდობს. თუ მისი კეთილდღეობისათვის საჭირო გახდა სხვისი დაღუპვა, არ გაიტანს, დაღუპავს. ძალმომრეობა, უსამართლობა, სუსტის დაჩაგვრა, — აი. რას ხედავს პოეტი ადამიანთა საზოგადოებაში.



ამისთანა ადამიანი თითქოს უნდა ეზიზღებოდეს პოეტს, მაგრამ არა, — ძმობა-ერთობის მოტრფიალეს, ქვეყნიური უსამართლობით დატანჯულს ზიზღი, სიძულვილი არ შეუძლია, მისი ბუნება ყველასადმი სიბრალულს ითხოვს. პოეტი გაუბრძის ადამიანთა საზოგადოებას, მას უნდა ტყუი: მცენარეთა, მხეცთა და ფრინველთა შორის მაინც ჰპოვოს ის, რასაც ტყუილა ეძებდა ადამიანთა შორის. მაგრამ თურმე ყველგან, მთელს ბუნებაში, მხოლოდ გამწვავებული ბრძოლა ყოფილა არსებობისათვის, გაუტანლობა, ძალმომრეობა, უსამართლობა. პოეტი ვერსად ჰპოებს ნუგეშს, „თავისუფალი ნავთსაყუდარს“, მაგრამ ის მაინც არ იტეხს გულს; „იბრძოლე მარად, ეუბნება ის თავისთავს: „ან ვაჟკაცურად გაიტანე სვე ან შენ იდე-ალთ, შენ გულის თქმით გაუხდი მსხვერპლათო“. ასეთია დედააზრი ამ პატარა სურათისა. ია ეკალაძეს ნაწერებში სევდა და სატირა ერთად არის შეზავებული. მას მგრძნობიარე გული აქვს, შეუძლია ამხილოს ჩვენი საზოგადოება; მისი ნაკლულევანება და მით ჩვენ წინმსვლელობას ხელი შეუწყოს. ხოლო ერთი ნაკლი უნდა აიცილოს თავიდან: მას უყვარს უტრირება და თავისი იდეის გასამართლებლად ფაქტებისა და პირების ცალმხრივად დახატვა. ტენდენციის წინააღმდეგი ჩვენ სრულიად არა ვართ; პირიქით, ჩვენი აზრით, ყოველ ნაწარმოებში ნათლად უნდა გამოსჭვიოდეს დედააზრი. ხოლო დედააზრი დამყარებული უნდა იყოს ცხოვრების სინამდვილეზე; როდესაც მწერალი იდეის გასამართლებლად ფაქტებსა და პირებს ცალმხრივად ხატავს და ბევრ ელემენტებს მალავს, ამით ის ამახინჩებს სინამდვილეს და თავის იდეას სუსტ ნიადაგზე აფუძნებს, სიძლიერეს და ნდობას უკარგავს მკითხველის თვალში. აი, მხოლოდ ამგვარი არის პოეზიაში გასაკიცხი. ია ეკალაძეს კი ასეთი ნაკლი ემჩნევა და უნდა მოიცილოს.

სიტყვაკაზმული ლიტერატურით წარსულ წელს ძალიან მდიდარი იყო „მოამბე“. „მოამბის“ ერთი ღირსება იმაში მდგომარეობს, რომ უცხო ტომთა ლიტერატურიდან ძალიან ბევრს თარგმნის, მაგრამ უფრო გარჩევით რომ თარგმნიდეს, მეტ სარგებლობას მოუტანდა ჩვენ საზოგადოებას; მაგ., ის ხშირად აცნობს მკითხველებს ისეთ მწერლებს. რომლებსაც ჩვენში კი არა, ევროპაშიაც დიდად არ აფასებენ. ისეთ მწერლებს კი, რომლებსაც ყველგან ღირსეული სახელი აქვთ მოპოებული, ნაკლებად თარგმნის. — მაგრამ თარგმანების შესახებ სხვა დროს.

მელანიას „ნავარდობას“ დიდი სიხარულით მივეგებეთ, მაგრამ მხოლოდინი არ გავგიმართლდა: „ბნელოს“ დამწერს მეტი მოეთხოვებოდა. გარდა იმისა, რომ თვით მოთხრობა უფრო ვრცელ კორეს-

პონდენციას წარმოადგენს, ვიდრე მხატვრულ ნაწარმოებს, ზომიერება სრულებით არ არის დაცული შიგ. ნაწილებს შუა ძალიან სუსტი კავშირია. ავტორს გამოჰყავს სხვადასხვა პირი, მოგვიყვება მათ ბიოგრაფიას, დაბადებიდან მოკიდებული საკვილიამდე და, როცა საიჭიოს გაისტუმრებს, გაცეხული რჩებით და არ გესმით, რისთვის გაგაცნო ისინი ავტორმა. მაგალითად, ანანოს, მიხას, ჯილაშვილებს, სანდროს არაერთი მნიშვნელობა არა აქვთ მოთხრობაში, მთელი პირველი ნაწილი სრულიად უმნიშვნელოა და მეტი, მოთხრობის უმთავრეს გმირს, ალალოს, ავტორი ისეც გაგაცნობდა მოკლედ, რომ მთელი პირველი ნაწილი არ დაეწერა, მით უმეტეს, რომ ალალოს მოქმედება მეორე ნაწილიდან იწყება. სანამ რომელიმე პირს გაგაცნობდნენ ავტორი, ბაბუისა და მამის ცხოვრებასა და თავგადასავალს დაწვრილებით მოგვყავდა. მართალია, მემკვიდრეობა ადამიანის ხასიათში ბევრ რამეს ხსნის. მაგრამ აქედან ხომ ის არ გამოდის, რომ მწერალმა ყოველი მომქმედი პირის აღწერა ადამიდან დაიწყოს? მართო ყაზარ ყარამანიძის ამბავი ერთ მოთხრობას შეადგენს. რისთვის ილაპარაკა ამდენი ავტორმა ყაზარაზე? იმიტომ, რომ ყაზარას ქალს, სათინიკას, ალალო ირთავს! ამგვარი საბუთით თუ იხელმძღვანელა მწერალმა, თქვენი მტერი: მის მოთხრობას დამთავრება არ ეღირსება. — ზოგ მომქმედ პირს ცოლი ეყოლება, ზოგს ნათლული. ზოგს მეგობარი, და ყველას ისტორია თუ მოგვიყვება მწერალმა, მამები და ბაბუებიც ზედ მიაყოლა, სხვა რომ არა იყოს რა, ქალადი შემოელევა, და მკითხველის მოთმინებას თუნდა თქვენი ჭირი წაუღია. აი, სწორედ ამიტომ გამოვიდა „ნავარდობა“ იმდენად გაჭიანურებული, თორემ ავტორის მიერ აღებული თემა ერთ პატარა მოთხრობას სრულიად ეყოფოდა. იყო ღრო, როცა ამგვარი თემა ჯერ ახალი იყო ჩვენში, და ამიტომ მკითხველის ყურადღებასაც იზიდავდა. საზოგადოებრივი მნიშვნელობაც ჰქონდა. — მაგრამ ხომ მოგეხსენებათ: „ოდეს ტურფა გაიფლავს, აღარ ღირდეს არცა ჩირადო“. გ. ერისთავს აქვთ ამგვარი თემა ბრალიანისა და უბრალოს საჩინდროცო შეიქნა და ნუთუ მთელ ნახევარ საუკუნის განმავლობაში ან აღარ დაძველდა ან ველარ შეიგნო ის მკითხველმა? ჩვენი არისტოკრატია რომ ღარიბდება და მისი ქონების გვარიანი ნაწილი სომხის ბურჟუაზიის ხელში გადადის. ეს დიდი ხანია ყველამ იცის, მაგრამ საქმე მიზეზის გამორკვევა არას. ყურადღების ღირსი დღეს მხოლოდ ეს მიზეზია და არა იმის ძახილი: სომხები ქართველებს ყველფენო. მელანიას კი ამ მიზეზის გამორკვევისათვის ყური არ უთხოვებია და ჩვენ თვალწინ კახეთის თავადობას აფცქენევენებს. რატომ აფცქენევენებს თავს ჩვენი თავადობა? რა ატანს მას ძალას? ასეთ კითხვებ-

ზე მელანია არავითარ პასუხს არ იძლევა. თითქოს ეს ვაქრები რომ არ გაჩენილიყვნენ, ჩვენი თავადობა ქონებას არ გაფლანგავდა! ვინ ამბობს, — ფრიად გასაკიცხია ჩარჩებისა და სირაჯების სხვადასხვა უპატიოსნო მოქმედება, მაგრამ სომხის მაგიერ რა ტომის ვაქრობაც უნდა ყოფილიყო, ჩვენი თავადობა მაინც შეაქმევდა თავის საცხოვრებელს. ამის მიზეზი თვით დღევანდელი ცხოვრებას პირობებია და არა სომხის ბუნება; ყოველივე ეს „ნავარდობაში“ უბრალოდაც არ არის გამორკვეული. ამხელა მოთხრობის ჯერ დაწერა და მერე წაკითხვა მხოლოდ იმიტომ, რომ გაიგო, როგორ გადადის ჩვენი არისტოკრატიის ცხოვრება ვაქრების ხელში, დღეს უმაქნის დროის დაკარგვად მიგვაჩნია.

ეს მეორე წელიწადია „მოამბეში“ იბეჭდება ს. მგალობლიშვილის ვრცელი მოთხრობა, მაგრამ, სამწუხაროდ, რედაქციამ ძალიან გამოიზოგა და მოთხრობის მესამე ნაწილი მესამე წელიწადში გადაიტანა. ამიტომ ვეცდებით, მკითხველს მაშინ დავეანახოთ ამ მოთხრობის ღირსება-ნაკლოვანება, როცა ის დამთავრდება.

ამით ვათავებთ წარსული წლის სიტყვაკაზმული ლიტერატურის მიმოხილვას.

1900 წ.

## ქართული ლიტერატურა XIX საუკუნეში

საუკუნემ განვლო მას აქეთ, რაც საქართველოს ცხოვრება სულ სხვა პირობებში ჩადგა და, ცხადია, ბევრს დაეზადება ასეთი კითხვა: როგორ და რა მხრით განვითარდა ამ დროის განმავლობაში ჩვენი ცხოვრება, რა მანძილი გაიარა მან კულტურული წინმსვლელობის გზაზე? ასეთი კითხვა ბ. კიტა აბაშიძესაც დაზადებია, მაგრამ, როგორც კრიტიკოსი, ის მხოლოდ ჩვენი ლიტერატურული ევოლუციით დაინტერესებულა, კითხვის გადაწყვეტა მკითხველისათვის მიუზღვია, თვითონ კი ყურადღება მიუქცევია მარტო ლიტერატურის უმთავრესი ტონისათვის. ჩვენი ლიტერატურის უმთავრეს ტონად წარსულ საუკუნეში ბ. აბაშიძე აღიარებს პესიმიზმს; თუმცა ამით ძალიან ცოტაა ნათქვამი, მაგრამ ჩვენ მაინც არას ვიტყოდით, რომ ბ. აბაშიძეს კერძო მწერლები არ მოეყვანა თავისი აზრის დასამტკიცებლად. ჩვენს დროში ვერ ნახავთ ისეთ მწერალს, რომელსაც ერთი კენესა მაინც არ აღმოხდენოდეს გულიდან, მაგრამ ამის მიუხედავად თუ ყველა პესიმისტად მოვნათლეთ, დიდი სიცრუე იქნება...

პესიმიზმი განვითარდა წარსული საუკუნის პირველ ნახევარში, მაგრამ აქაც ბარათაშვილის პესიმიზმსა და ვ. ორბელიანის პესიმიზმს შორის არაფერი საერთო არ არის: მაშინ, როდესაც ვ. ორბელიანის პესიმიზმი იყო პესიმიზმი მხოლოდ ერთი კლასის — თავადობის, ბარათაშვილის პესიმიზმი იყო პესიმიზმი ბაირონისა და შელლისა, პესიმიზმი ღრმა ფილოსოფიური, პესიმიზმი მსოფლიო. მესამოცე წლებიდან ცხოვრების ერთბაშმა ევოლუციამ ისე აღაფრთოვანა ჩვენი პოეზია, რომ მის უმთავრეს ტონს პესიმიზმი აღარ შეადგენდა, მასში იყო მხოლოდ მისუსტებული ხმა კლასიური პესიმიზმისა, რომლის გავლენასაც აკ. წერეთელი და ილ. ჭავჭავაძეც ვერ ასცდნენ. მაგრამ ეს პესიმიზმი არ შეადგენდა დამახასიათებელ თვისებას მესამოცე და მესამოცდაათე წლების პოეზიისას და ამიტომ ჩემთვის გასაოცარია, როდესაც ბ. კ. აბაშიძე ცდილობს აკ. წერეთელი და ილ. ჭავჭავაძე პესიმისტებად მონათლოს.

გ. წერეთლის ბელეტრისტიკაში პესიმიზმის დანახვა ხომ სწორედ მელის სიზმარია. ოთხმოცდაათ წლებში ჩვენში ისევე იჩინა თავი პესიმიზმმა, ხოლო ეს პესიმიზმი ბევრით განირჩევა წარსული საუკუნის პირველი ნახევრის პესიმიზმისაგან: მაშინ, როდესაც პირველი იყო უმთავრესად პესიმიზმი კლასიური, მეორე არის, ერთი მხრით, პესიმიზმი — ფილოსოფიური ანუ მსოფლიო (არაგვისპირელი, დეკანოზიშვილი), მეორე მხრით, პესიმიზმი სოციალური (ევდოშვილი, არაგვისპირელი). როდესაც ბ. კ. აბაშიძე გვიცხადებს: ეს პესიმიზმი „მთელი ერის სულის განწყობილებების გამომსახველია, საერთო ნიადაგზე აღმოცენებულიო“, ამ აზრსაც დიდი განმარტება სჭირია; წარსული საუკუნის პირველი ნახევრის პესიმიზმი ამგვარ ნიადაგს მოკლებული იყო; მეოთხთხმოცდაათე წლების პესიმიზმს კი საერთო ნიადაგი უდევს სარჩულად. მიაგნო რა უმთავრეს ტონს ჩვენი ლიტერატურისა, ბ. აბაშიძემ მოინდომა იმის გამორკვევა, თუ საერთოდ, რა იყო ჩვენი ლიტერატურა წარსულ საუკუნეში და რა იქნება ის მომავალში, ან რა უნდა იყოს. ამ კითხვის უკეთ გადასაწყვეტად მან მიმართა სხვადასხვა მწერლებს, რომელთაგან ბევრმა ბ. აბაშიძე დიდ განსაცდელში ჩააგდო: ათჯერ რომ გადაიკითხოს მილის ლოგიკა, ზოგიერთ მიღებულ წერილში ერთ ლოგიკურ აზრს ვერ ნახავს. ყოველ ადამიანს სრული უფლება აქვს უაზრო წერილები წეროს და უაზრო წერილები იკითხოს, მაგრამ როდესაც ასეთი წერილებიდან რაიმე ზოგადი აზრი, ზოგადი დასკვნა გამოჰყავთ და საზოგადოებას აწვდიან, მაშინ ყველას უფლება ეძლევა ამ წერილებისა და მათი აზრის აწონ-დაწონისა. ჩვენ მხოლოდ ამ უფლებით ვსარგებლობთ.

ავტორები, რომლებმაც ბ. აბაშიძის თხოვნა შეასრულეს, ერთ დიდ შეცდომაზე გადამჯდარან, გარდა ერთადერთი განდევილისა და მცირეოდნად ს. მგალობლიშვილისა; ზოგს ეკლის გვირგვინი დაუდგამს თავზე, ზოგს იმედით შეუმოსავეს თავისი ნაღვლიანი სახე, მაგრამ, რადგანაც ბ. კიტამ მათ წინდაწინვე აუწყა: ჩვენი ლიტერატურის ტონი პესიმიზმიაო, არც ერთს არ უნდა მას აწყენინოს და მის წინაშე ყველას თავი ჩაუქინდრავს: ასე იქცევა ბ. ფანცხავა, არაგვისპირელი, მგალობლიშვილი, — შეიმოსნენ იმედით, მაგრამ მალე გაახსენდათ, რომ ბ. კიტას იმედი არაფრად ეპიტნავება, და თავისი წერილები წუწუნით დააბოლოვეს: დაღუპვა მოგველისო. რა საფუძველი ჰქონდა მათ იმედს? არავითარი, — რაც უნდა იყოს, მათ წერილში ჩვენ ამას ვერა ვხედავთ; რა საფუძველი აქვს მათ წუწუნს? არავითარი. ეს ბატონები ისე სჯიან ლიტერატურაზე და მის სასურველ მომავალზე. თითქოს ლიტერატურა ცხოვრების პირმშო კი არ

აყოს, არამედ ზევსის თავიდან იბადებოდეს მინერვასავით და ბ. კიტა აბაშიძის რეკეპტებით იზრდებოდეს. თავისთავად ცხადი უნდა იყოს თითქოს შემდეგი ქეშმარიტება: თუ წარსული საუკუნის განმავლობაში ჩვენი ცხოვრება ვითარდებოდა, ლიტერატურაც უნდა განვითარებულყო, თუ ჩვენი ცხოვრება ვითარდება, ჩვენი ლიტერატურაც განვითარდება მომავალში; მაგრამ წერილების ავტორებმა ამ ქეშმარიტებას გზა აუხვიეს და ერთი გაიძახის: ვილუპებით, რადგანაც უნიჭობებმა მწერლობის ასპარეზი მიგვატოვებინესო, მეორე კი — რაღა დაგვიხსნის, როდესაც ყველა იმ ენით აღარ წერს, როგორითაც ჩვენი მამა-პაპანი წერდნენო და სხვ. მაგრამ ჩვენც თავიდან დავიწყოთ და სათითაოდ ჩავყვეთ წერილებს. ბ. კ. აბაშიძე თავის ნაცნობებს თუ მეგობრებს ხანდახან ძალიან უხეირო სამსახურს გაუწევს ხოლმე: ასეთი სამსახური გაუწია მან იმ ქალს, „რომელსაც დამოკიდებულება არ აქვს ჩვენს ლიტერატურასთან“: ჯერ თავში რეკომენდაცია წამოუსკუპა წერილს, — ეს პასუხი მეტად საყურადღებოა, რადგანაც გულწრფელი აღსარებაა აზრთა იმ მდგომარეობისა, რომელიც ჩვენში მეფობსო, მაგრამ როდესაც მისმა რეკომენდაციამ მისივე „მეპასუხენი“ გააოცა, ბ. კიტამ მეორე რეკომენდაცია გამოაქრა: „იგი არის გამომხატველი თითქმის მთელი ჩვენი საზოგადოების ინტელიგენტი ნაწილის აზრისა“, და მეორეს მესამეც მიუმატა, აბა უსამებოთ როგორ იქნება: „აგრეთი მარსის მცხოვრებნი კიდევ საუკეთესო ნაწილია ჩვენის განათლებულის წრისა“. ბ. კიტას აზრით, „განათლებული ნაწილი ყოფილა და იქნება ყოველთვის მთელი ერის წინამძღოლი, მისი მმართველი“, თუ განათლებულ ნაწილს ასეთი დიდი მნიშვნელობა აქვს, „განათლებული წრის საუკეთესო ნაწილს“ ხომ უფრო მეტი მნიშვნელობა უნდა ჰქონდეს ცხოვრებაში და ამიტომ გავიცნოთ ამ „საუკეთესო ნაწილის“ ერთი მანდილოსანი. რომელიც ასეთი დიდმნიშვნელოვანი ჩარხი ყოფილა ჩვენი ცხოვრებისა. ამ პატივცემულ მანდილოსანს თავისი წერილი თითქოს იმისთვის დაუწერია, რომ სრული ულოგიკობის ნიმუში წარმოედგინა ბ. აბაშიძისათვის. წერილის თავშივე ის გვიცხადებს: ქართული ლიტერატურა სრულიად უცნობია ჩემთვისო. კარგი და პატიოსანი: არცოდნა არ ცოდნაო, მაგრამ თუ ჩვენს ლიტერატურას არ იცნობს. პირველი — რად ლიტერატორობს, (აკი ბ. კიტა გვიცხადებს: დამოკიდებულება არ აქვს ჩვენს ლიტერატურასთანო!) მეორე — რად სწერს თავის აზრს ისეთი საგნის შესახებ, რომელიც მას არ გაეგება, მესამე — რა ფასი აქვს ამგვარ აზრს? პირველის პასუხს ისევ ბ. აბაშიძე გვეტყვის; მეორის პასუხს თვითონ ეს მანდილოსანივე გვეუბნება: თუმცა მე ქართული ლიტერატურისა არა გამეგება რა, მაგრამ

თქვენი სურვილი უნდა ავასრულო. ახირებული ზასიათი ჰქონია ამ მანდილოსანს. ბ-ნი კიტას სურვილი მისთვის „კატეგორიული იმპერატივი“ ყოფილა და ისეთ საგნებზედაც კი ალაპარაკებს, რომლებიც მისთვის უცნობია! მესამე კითხვის პასუხი ყველასათვის ცხადია; ფასი ისეთი აზრისა, რომელიც საგნის ცოდნაზე არ არის დამყარებული, გახვრეტილი გროშია. ქართული ლიტერატურის უცოდინარობა ამ მანდილოსანს უბედურებად და სამარცხვინო ნაკლად მიაჩნია. აქედან ლოგიკა ერთადერთ გზას უჩვენებს მას: უბედურება და სირცხვილი თუ გინდა აიცილინო, შეისწავლე ქართული ლიტერატურა. მაგრამ ამ მანდილოსანის ლოგიკა სხვანაირი ყოფილა. მას არა აქვს სურვილი ქართული ლიტერატურის გაცნობისა. ბიჭოს?! თუკი ეს სირცხვილად და უბედურებად მიგაჩნიათ, რატომ არა გაქვთ შესწავლის სურვილი? — გოცებულები ეკითხებით თქვენ. უკაცრავად, თქვენს უმალ ბ. კიტა ეკითხება; ეტყობა, ასეთ ულოგიკობას ისიც გაუოცებია, რადგანაც კურსივები მოუხშირებია! იმიტომ, რომ გარემოებამ ხელი შემიშალაო, გიცხადებთ ის. გეთანხმებით, მაგრამ სირცხვილისა და უბედურების მოსაშორებლად გარემოების მიერ მოძღვნილი ნაკლოვანების მოშორებას ყოველი ადამიანი უნდა ეცადოს, — გინდათ თქვენ უპასუხოთ, მაგრამ ქ-ნ მანდილოსანს მეორე „იმიტომაც“ მზადა აქვს: ქართულ ლიტერატურას არ შეუძლია ჩემი აზრის დაკმაყოფილებაო. ამ მანდილოსანის სასარგებლოდ უნდა აღვნიშნოთ, რომ მას თვითონვე შეპარვია ეჭვი თავისი აზრის სიმართლეში. ვაითუ ტყუილს ვამბობდეთ, და დარწმუნებულა რომ ტყუილს ამბობდა და, ვიდრე ამ ცრუ აზრს გამოთქვამდა, გამოგვიტყდა: ეს აზრი უმეცარია და შეიძლება შემცდარიცო. ჩვენ ეჭვიც არ შეგვიტანია, რომ ამ მანდილოსანს ქართული ლიტერატურა ვერ აკმაყოფილებს, მაგრამ რადგანაც თვითონვე აცხადებს: არ დაიჭერთ, უმეცრებას ვამბობ და შეიძლება შეცდომასაცო, რა უფლება გვაქვს არ დავეთანხმოთ, რომ ის „უმეცრებას აღიარებს და შეიძლება შემცდარ აზრსაც“?! მაგრამ, კერძოდ მე შემდეგი გარემოება მაკვირვებს: დალოცვილი მანდილოსანი თუკი თვითონვე გრძნობდა, რომ „უმეცარი და შეიძლება შემცდარი აზრიც უნდა წარმოეთქვა, ვინ ატანდა ძალას, რაღაზე გვეუბნებოდა, — თავის უმეცარ და შემცდარ აზრს თავისთვისვე შევიწინააღვიწიო! მაგრამ უკაცრავად, — ჩვენ კი არ გვითხრა, არამედ ბ. კიტას, და ბ. კიტას სურვილს ხომ მასზე, მისივე აღსარებით, ასეთი გავლენა ჰქონია, რომ ათასგვარ უაზრობას წარმოათქმევინებს, ხოლო როდესაც ბ. კიტა აბაშიძე ამ უაზრობას სხვადასხვა რეკომენდაციებით „ცნობის ფურცლებში“ ასაღებს ნისიად, ესეც ხომ მანდილოსანის ბრალი არ არის! ამ მანდილოსანის

აზრით, ჩვენი ლიტერატურა მეტად ღარიბია, მეტად ინტერესს მოკლებულია, ცხოვრებას ჩამორჩა და ახლა მხოლოდ ისტორიულსა და არქეოლოგიურ ინტერესს წარმოადგენს. ასეთი კატეგორიული აზრი რომ წარმოთქვა ადამიანმა რომელიმე საგნის შესახებ, ამ საგანს ძალიან კარგად უნდა იცნობდე. ეს მანდილოსანი კი, თავისივე აღსარებით, ჩვენს ლიტერატურას სრულებით ვერ იცნობს, მაშ, ვინ აუწყა მისი სიღარიბე, ჩამორჩენა და სხვა და სხვა? ყოველივე ეს მას ლიტერატურის შესწავლით უნდა ამოეკითხა, მას კი ლიტერატურა არ შეუსწავლია. მაშ რაღად თქვა? ბ. კიტას სურვილი აღასრულა! ვთქვათ, ჩვენი ლიტერატურა მართლაც ვერ აკმაყოფილებს ამ მანდილოსნის აზრს. ნუთუ ეს უფლებას აძლევს მას, არ შეისწავლოს ეს ლიტერატურა და არათუ არ შეისწავლოს, სამშობლო ლიტერატურის უცოდინარობით თავიც მოჰქონდეს?! მე მგონია, არა. ყოველგან და ყოველისფერში მარტო საარგებლობით ხელმძღვანელობა იგივე პირუტყვობაა. ასეთი მოტივით მხოლოდ პირუტყვი ხელმძღვანელობდა უძველეს დროს, მაგრამ დღეს ისიც აღარ ხელმძღვანელობს ამ საზომით ყოველგვარ შემთხვევაში და ასეთი აზრი, მითუმეტეს, ადამიანს არ მიეტევება. რასაკვირველია, ყოველ ადამიანს სრული უფლება აქვს, თავი პირუტყვს დაადაროს, მაგრამ თავმოსაწონი აქ არაფერია. სამშობლო ლიტერატურა კიდევ რომ არ აკმაყოფილებდეს ადამიანს, მაინც მოვალეა, როგორც ადამიანი, შეისწავლოს ეს ლიტერატურა, შეისწავლოს თავისი ერის ცხოვრება და საჭიროებანი მისთვის, რომ თავის საზოგადოებას რაიმე მხრივ დახმარება აღმოუჩინოს. ხალხის კულტურულ სიმდიდრეზე დამოკიდებულია მისი ლიტერატურის სიმდიდრეც, ამიტომ ყოველმა ადამიანმა ხელი უნდა შეუწყოს თავისი ერის კულტურულ წინმსვლელობას, რაც, თავის მხრივ, ლიტერატურის წინმსვლელობასაც გამოიწვევს. ამისათვის კი საჭიროა ერის ცხოვრების ყოველმხრივი შესწავლა, თუნდა ეს ცხოვრება სრულებითაც არ აკმაყოფილებდეს ადამიანის გონებრივ მოთხოვნილებას. ეს მანდილოსანი თვითონაც გრძნობს, რომ „როგორც ქართველმა დედამ, მან ყველაზე უფრო უნდა იცოდეს ქართული აზრისა და ენის ისტორია და ნიმუშები“. ყოველი დედა ვალდებულია, შვილები აღზარდოს საზოგადოების სასარგებლო წევრებად; ამისათვის კი საჭიროა, რომ უმაღლეს იყოს საზოგადოებისათვის სასარგებლო; ამ უკანასკნელისათვის კი საჭიროა ცოდნა იმ საზოგადოების ცხოვრების გონებრივი მდგომარეობისა და საჭიროების, რომელშიაც ცხოვრობს; ამიტომ სრულებით უაზროა მანდილოსნის სიტყვები: ქართული ლიტერატურის შესწავლის სურვილი არა მაქვს, რადგანაც მას არ შეუძლია ჩემი აზრის დაკმაყოფილე-



ბაო. მანდილოსანი გულამღვრეული იხსენიებს იმ ქართველ ოჯახებს, რომლებიც გადაგვარების გზას ადგანან, მაგრამ თავის გულშიც რომ ჩაეხედნა, ენაზე იკბენდა და, თუ სხვაზე გული ემღვრეოდა, უმალ თავის თავზე აემღვრეოდა. თუ ქ-ნი მანდილოსანი ჩვენს ოჯახებს ეკითხება: სადღაა ქართველიო, მე კი მისი წერილისა და ბ-ნი კიტას შენიშვნების წაკითხვის შემდეგ ძალაუვნებურად დავეკითხე ჩემს თავს: ნუთუ ეს არის ჩვენი ქართველი დედა, ნუთუ მართლა ასეთია ჩვენი ინტელიგენციის საუკეთესო ნაწილი, რომელმაც ქართველ ერს, ბ-ნი კიტას სიტყვით, წინამძღოლობა უნდა გაუწიოს? არა და არა, ეს არის მხოლოდ მეტი ხორცი ჩვენი ერისა. ასეთი პირნი არ შეადგენენ ჩვენს ინტელიგენციას. ინტელიგენტებს მე ვუწოდებ იმ პირთ, რომლებიც გონებრივად ხალხზე მაღლა დგანან: ხალხის სულსა და გულს იცნობენ და მისთვის ზრუნავენ და არა იმ პირთ, რომლებიც ხალხის გულსა და გონებას არ იცნობენ, არც სურვილი აქვთ გაიციონ და რომლებსაც, ამის მიუხედავად ბ. აბაშიძე ჩვენი ინტელიგენციის საუკეთესო ნაწილს უწოდებს. ნუთუ ესეც დაბრმავება არ არის? ნუთუ ესეც პირუთვნელი აზრია, მეგობრის კავშირით ამალღებული და განსპეტაკებული? მანდილოსნის აზრით, ჩვენს ლიტერატურას მხოლოდ სიკვდილი მოელის. მაგრამ მეორე სვეტზევე გვიცხადებს: ძალად ვიკლავთ თავს, ძალად ვცდილობთ დამბლა დაგვეცესო. აქ ულოგიუბამ სწორედ საზღვარს გადააჭარბა: თუ ჩვენს ლიტერატურას მხოლოდ სიკვდილი მოელის და მას ცოტათი დღეს უგრძობლებს ქართველი ლიტერატორი, რა შუაშია აქ ძალად სიკვდილი, ძალად დამბლის დაცემა და სხვა? ჩვენი ოჯახი გადაგვარების გზას ადგას. ლიტერატურას სიკვდილი მოელის. ამისთანა დროსა, გვარიგებს მანდილოსანი, აპათია და გულგრილობა არც გასაგებია, არც მოსათმენიაო. ჩემი შენ გითხარი, გული მოგიკალიო, სწორედ ამაზედ არის ნათქვამი. თუ ეს სწამს ქ-ნ მანდილოსანს და ამის თქმასაც ბ. კიტას სურვილის აღსრულება არ აიძულებს, თვითონ რაღად მისცემია გულგრილობასა და აპათიას, თვითონ რატომ არ სწავლობს ჩვენს ლიტერატურას, თვითონ რად არის ისეთი ქართველი დედა, როგორებსაც თვითონვე გულამღვრეული უკიჟინებს? ამ მანდილოსანს, გავახსენებთ ქართულ ანდაზას: კუდა ხარი თავისთვის არ იყო და სხვებს ბუზებს უგერებდაო, და მოვახსენებთ: სხვა რომ დაარიგა და ურჩია აპათიისა და გულგრილობის უკუგდება, ახლა თავისი თავიც დაარიგოს, შეისწავლოს ჩვენი ცხოვრება და ლიტერატურა და, თუ მაინცდამაინც არ სურს, საგნის შეუსწავლელად, მართო სხვისი სურვილის ასასრულებლად, მსჯელობას თავი დაანებოს. თორემ ასეთი თავისმართლება: უმეცარ და შემცდარ აზრს

ვამბობო, მაგრამ იმიტომ, რომ თქვენი სურვილი ავასრულო, ვერაფერი თავისმართლებაა, რაზედაც თვით ბ-ნი კიტაც დამეთანხმება. აი, ეს გახლავთ „მრავალგზით საინტერესო“ წერილი. ახლა სხვებს მივმართოთ.



ბ. ფანცხავამ არ იცის, რა აზრი უნდა იქონიოს. თუ არ იცი, გაჩუმდი, მაგრამ ბ. ფანცხავა არ ჩუმდება, ალბათ მასაც ძალას ატანს ბ-ნი აბაშიძის სურვილის აღსრულება. ბ-ნ ფანცხავასათვის ცხადია, რომ მეცხრამეტე საუკუნეში ჩვენს ლიტერატურას ცხოველყოფილობა დაეტყო, მაგრამ ბოლო დროს ჩვენი მწერლობა დაკნინდა. ამის მიზეზად ბ. ფანცხავა ორ გარემოებას ასახელებს: გარეშე ლიტერატურის მეტოქეობას და ქართველობის ერთი ნაწილის მიერ მწერლობაზე გულის აცრუებას, რასაც ის გარემოება მოჰყვია, რომ ქართულ ლიტერატურას ინტელიგენტი მკითხველი აღარ ჰყავს, უმეცრებმა ლიტერატურის ასპარეზი დაიჭირეს და ნიჭიერნი და მცოდნენი კი სხვაგან ეძებენ მყუდროებას. ჩვენი დღევანდელი სიტუვკა, კაზმული მწერლობა რომ უფრო სუსტია, ვიდრე მესამოცდაათე წლებისა, ეს სრული ჭეშმარიტებაა, ხოლო სისუსტის მიზეზი სულ სხვა არის, ვიდრე ბ. ფანცხავას ჰგონია. გარეშე ლიტერატურა თუ მეტოქეობას უწევს შინაურს, ეს იმას ნიშნავს, რომ გარეული შინაურს ჯობია, უკეთეს გავლენას იქონიებს შინაურზე და ასეთ მეტოქეობას, ადრე თუ გვიან, შინაურის გაუმჯობესებაც უნდა მოჰყვეს. ეს ასე იყო და არის ყველგან და რაღა ჩვენი ლიტერატურა იქნება გამონაკლისი? თუ უნიჭობებმა ნიჭიერები განდევნეს, ეს ვერაფერი საბუთია ნიჭისა და ველარაფერი თავისმართლებაა. მწერლობის ასპარეზი ღია არის. მოდით, ნიჭიერებო და ილიტერატორეთ. თუ მართლა ნიჭიერები ხართ და ცოდნით აღჭურვილნი, უნიჭობესა და უმეცრებს ადრე და ადვილად დაამარცხებთ და ჩვენი ლიტერატურაც აყვავდება. მართალია, ერთად-ერთი ის, რომ ჩვენი ლიტერატურა ლიტერატორს ვერა ჰყვება და ამიტომ ის იძულებულია, მთავარი ძალა ლუქმაპურის შოვნას შესწიროს ლიტერატურის გარეშე და ლიტერატურას მხოლოდ დაქანცული თავით ემსახუროს, მაგრამ ეს მიზეზი მთელი საუკუნის განმავლობაში არსებობდა და მიუხედავად ამისა, იყო ისეთი მომენტები, როცა ლიტერატურა ჰყვავოდა. მესამოცდაათე წლებში ჩვენი ცხოვრების ერთბაშმა პროგრესმა გამოიწვია ლიტერატურის აღფრთოვანება და გაფურჩქვნა, დღეს კი ცხოვრება სხვა ვზას დაადგა და ამიტომ ლიტერატურაც სხვა მიმართულებას იღებს. ახალ გზაზე ერთბაშად მტკიცედ სიარული შეუძ-

ლებელია და ამიტომ ჩვენს დღევანდელ ლიტერატურასაც რაღაც გაუბედაობა ეტყობა; ცხოვრება ჯერ მტკიცე კალაპოტში არ ჩამდგარა, ამიტომ ლიტერატურასაც სიმტკიცე აკლია; დროებით ხალხის ყურადღებას უფრო მატერიალური ინტერესები იზიდავენ, რაც ხელს უშლის ლიტერატურის გაფურჩქვნას, მაგრამ ყოველივე ეს ისევ მომასწავებელია ჩვენი ლიტერატურის ევოლუციისა და არა სიკვდილისა. წარმოდგინეთ, მკითხველო, ბ. აბაშიძესაც კი უკვირს იმ მწერალთა მოქმედება, რომლებსაც უმეცართა და უზრდელთათვის ხელში შეუტოვებიათ ჩვენი ლიტერატურა. ლიტერატურის ხსნა ადვილია თვით ბ. ფანცხავას სიტყვებით: ნიჭიერნი რომ ისევ გამოვიდნენ სამწერლო ასპარეზზე, უნიჭოებს განდევნიან და აყვავდება ჩვენი ლიტერატურა! ამიტომაც არის, რომ ბ. კ. აბაშიძე დაუღალავად ებრძვის უნიჭობას, მაგრამ ერთი ხომ ყველას ვერ დაამარცხებს, იღბლად თლაფსუ ამოუდგა გვერდში და ერთი ორიოდე თლაფსუც თუ მოეშველა და ცილისწამებაც მოიშველიეს, გაიჩარხება საქმე: მწერლობის ასპარეზი ნიჭიერებს დაჩრებთ და ჩვენი ლიტერატურაც განსაცდელს ასცდება!

ბ-ნი არაგვისპირელი ულოგიკობაში ქ-ნ მანდილოსანს ეჭიბრება. მაგრამ რადგანაც მისი წერილი პატარაა, ულოგიკობაც ცოტაა. მწამს ჩვენი ლიტერატურის საუკეთესო მომავალიო, კატეგორიულად გვეუბნება ბ. არაგვისპირელი. მაგრამ მის მრწამსსაც ეს დაწყველილი წერტილები ღუპავს; წერტილების შემდეგ „რწმენა, იმედი და სასოება სადღაც უჩინრად იბუნდებიან და მხოლოდ ცეცხლის ალიდა ღაღადებს მის თვალწინ“. სწორედ ღამაზად დააბოლოვა; თუმცა ეს ბოლო თავს სრულიად ეწინააღმდეგება. მაგრამ რა ვუყოთ: წერტილების შემდეგ ყველაფერი შესაძლებელია! მაგრამ ეს ცეცხლის ალი და მისი ღაღადი რაღა საჭირო იყო. ვერ გავიგეთ, თუმცა „ღედა-ენაზე“ აღვიზარდეთ. წერტილების შემდეგ თუ იმედი ცეცხლის ალად იქცა, წერტილებამდე ხომ იმედი იმედივე იყო! მაშ, რაზე ამყარებდა ამ იმედს ავტორი? ქართველი ერის წარსული ღვაწლის შესწავლაზე, რის შემდეგაც ქართული ლიტერატურა დაიწყებს დიდის ნაკადულით ჩქეფას. ესეც ახალი თეორია: თუ გინდათ, რომ ჩვენი ლიტერატურა აყვავდეს, წარსული შეისწავლეთ ყველამ! წარსულის შესწავლა და საფუძვლიანი შესწავლა რომ ყველასათვის სავალდებულოა, ამაში ეჭვიც არა გვაქვს, მაგრამ წარსულის შესწავლა რომ ვერ ააჩქარებს დიდის ნაკადულით ჩვენს სიტყვაკაზმულ მწერლობას, ამაში მე დარწმუნებული ვარ. ბ-ნი არაგვისპირელი ჩვენს დღევანდელ მწერლებში ერთი საუკეთესო ბელეტრისტია;

წარსულის შესწავლა ან შეუსწავლელობა აჩნია მის ეტიუდებს? ჩვენ ამას ვერა ვხედავთ და შეიძლება სხვა ხედავდეს.

ბ-ნ ცაგარელის აზრით, ჩვენი ლიტერატურის განვითარება მეცხრამეტე საუკუნის მეორე ნახევარში თვალსაჩინოა, მაგრამ დღეს კი მას ერთი სენი შეჰპარვია — ენის უცოდინრობა, რომელიც მას სიკვდილს უქადის. როდესაც გრიგოლ ორბელიანი აკაკის ლექსებს აითხულობდა, გულამღვრეული გაიძახოდა: წმიდა ტაძარს (ე. ი. ჩვენს ლიტერატურულ ენას) ჩირქი წაეცხო. დღეს კი ქართველი მკითხველი ამბობს: წმიდა ტაძარი აკაკის ენაა და არა გრ. ორბელიანისაო. ცოტა არ იყოს, გრიგოლ ორბელიანის შეცდომას იმეორებს ბ. ცაგარელიც. ცხოვრება განვითარდა; ახალი მცნებები, რომლებსაც ჩვენი ძველები არ საჭიროებდნენ, საჭირონი შეიქნენ. ახალი მცნებების გამოსახატავად საჭიროა ახალი სიტყვები, ან ძველი სიტყვების ახალი კომბინაცია ახალი აზრის გამოსახატავად და ამან ნელა-ნელა გამოიწვია ჩვენს დროში ენის ცვლილება. პირველ ხანებში თუ გაფართოებული ენა კოკლობს, შემცდარ ფორმებს ჰკიდებს ხელს, თანდათან გასწორდება და გაიწმინდება. რაც შეეხება ბ-ნ ცაგარელის გოდებას, რომ ჩვენს ოჯახებში ქართული ენა არა ჰყვავის და ენის დაცვა ჩვენთვის აუცილებელ საჭიროებას შეადგენსო, ეს უტყუარი ჭეშმარიტებაა, ხოლო ენის სიწმინდე ლიტერატურის სიმადლეს ჭერ კიდევ არ მოასწავებს: ენა სამოსელია ლიტერატურისა და არა თვით ლიტერატურა, კარგი ლიტერატურული ენა თავისთავად კი არ არის კარგი, არამედ იმიტომ, რომ ასეთი ენა აზრის გაგებას უადვილებს ყველას. აზრს ყველას კუთვნილებად ხდის. ენა უნდა სასტიკად დავიცვათ, მაგრამ ეს არ ააყვავებს ჩვენს ლიტერატურას, როგორც ბ-ნ ცაგარელს ჰგონია: თუ ლიტერატურაში აზრი არ იქნა და სახელოვნო ღირსება, მართო ენა რას გააწყობს?

ბ. მგალობლიშვილს სწამს, რომ ჩვენს ლიტერატურას ბრწყინვალე მომავალი აქვს, მაგრამ ბოლოს მაინც ვერ მოითმინა და თავის მრწამსში მაინც ნაღველი გაურია. კაცია და გუნება, ხოლო საიდან ელის ბ-ნი მგალობლიშვილი ჩვენი ლიტერატურის აყვავებას? წარსულიდან!

•

ამ წერილებში საუკეთესოდ მიგვაჩნია ქ-ნ განდევგილის წერილი. ის არ უარყოფს, რომ ზოგ ეპოქაში მწერლობა უფრო ჰყვავის, ზოგში ნაკლებად, მაგრამ დარწმუნებულია, რომ მწერლობა ნაყოფია ცხოვრებისა და ცხოვრების ცვალებადობა წარმოშობს მწერლობის ცვალებადობასაც. ჩვენი მწერლობა ჩვენს ცხოვრებას, ქ-ნ განდევგილის აზრით, კვალდაკვალ მისდევდა და აქედან ის დასკვნა გამო-

ჰყავს, რომ მომავალშიც ჩვენი ლიტერატურის წინმსვლელობას ვერაფერი შეაფერხებს.

ბ-ნ კიტა აბაშიძეს არ შეუძლია ბ-ნი ზურაბიშვილის შესახებ. ენა დასძრას ისე, ერთი მხრით, არავინ გალანძლოს, მეორე მხრით: დაფნის გვირგვინი არ უძღვნას ბ. ზურაბიშვილის ბელეტრისტულ ნიჭს. აქამდის ბ. აბაშიძისაგან ვიცოდით, რომ ბ. ზურაბიშვილი ნიჭიერი ბელეტრისტი იყო. ახლა კი გავიგეთ, რომ მას „სოციოლოგიური, ესთეტიური და ფილოსოფიური“ ეტიუდები ჰქონია! მაგრამ დავანებოთ ამას თავი — დეე, ბ. აბაშიძეს სწამდეს ბ. ზურაბიშვილის ბელეტრისტული ნიჭი, — ამით ვის რა უშვავდება, „ცნობის ფურცელს“ კი მასალა ემატება — ისევე ბ. ზურაბიშვილის წერილის დედააზრი განვიხილოთ. წარსული საუკუნის ქართულ ლიტერატურას ის ადარებს, ერთი მხრით, ევროპის ლიტერატურას და აღიარებს, რომ პირველი სუსტია მეორესთან შედარებით; მეორე მხრით, ადარებს ჩვენს ძველ ლიტერატურას და პირველობას აკუთვნებს მეცხრამეტე საუკუნის ლიტერატურას. ბ. ზურაბიშვილის აზრით, უმთავრესი მოტივი წარსული საუკუნის ლიტერატურისა პატრიოტული იდეა იყო. ჩვენის აზრით, ეს იდეა ასულდგმულებდა ჩვენს ლიტერატურას სამოცდაათ წლებამდე, აქედან კი ლიტერატურა ჰკარგავს ცალმხრივ ხასიათს და პატრიოტულ მოტივსაც პირველობა ერთმევა. ბ. ზურაბიშვილს ეჭვი არა აქვს, რომ ჩვენი ლიტერატურა კვლავაც იცოცხლებს და გაყოველმხრივდება.

ამგვარად, ბ. კიტა აბაშიძეს ზოგმა სრულებით უაზრო წერილი მიაწოდა, სხვებმა აზრიანი, მაგრამ ნაკლებად დასაბუთებული. როდესაც ბ. ზურაბიშვილი ჩვენს ლიტერატურას ევროპის ლიტერატურას ადარებს, ასეთი შედარება ყოველთვის კარგია, მაგრამ ეს შედარება ჩვენის ლიტერატურის განვითარებისა და მომავლის შესახებ ვერაფერს გვეტყვის. შესაძლებელია, ევროპის ლიტერატურაზე ჩვენი ლიტერატურა გაცილებით დაბლა იდგეს, მაგრამ ამავე დროს ჩვენს ლიტერატურას შედარებით ბევრად სწრაფად ევლოს წარსული საუკუნის განმავლობაში ვიდრე ევროპისას და, ეს ნამდვილად ასეც იყო: თუ მეცხრამეტე საუკუნეში ევროპამ წარმოშობა დიდებული პოეტები, დიდებული პოეტები მას მეთვრამეტე საუკუნეშიც ჰყავდა, მეჩვიდმეტეშიც და სხვ. სამაგიეროდ, საქართველოში წარსულ საუკუნეში თითქმის მკვდრეთით აღსდგა ჩვენი ლიტერატურა და მერე როგორ აღსდგა? ისე ძლიერად გაშალა ფრთები, როგორც მას თამარის ეპოქის შემდეგ აღარასოდეს გაუშლია. შედარების დროს ისტორიული მხედველობა არ უნდა გვაფიწყებოდეს, რადგანაც უამისოდ ყოველი დასკვნა მცდარი იქნება.

ხელოვნება და, მაშასადამე, ლიტერატურაც ფსიქოლოგიური აქტია, ადამიანის აზროვნება კი, მისი სიღრმე-სიგანე და მიმართულება ცხოვრების ნაყოფია. ცხოვრების ცვლილებასთან ერთად იცვლება აზროვნებაც და მასთან ხელოვნება, ცხოვრების განვითარება და დაცემა იწვევს ხელოვნების განვითარება-დაცემას და ამიტომ, სანამ რომელიმე დროის ლიტერატურას შევისწავლიდეთ და აეხსნიდეთ, საჭიროა ამ დროის ცხოვრების ახსნა; სანამ გავიგებდეთ, რა გზას ადგას ლიტერატურა, უმალ საჭიროა გავიგოთ, რა გზას ადგას თვით ცხოვრება—წინმსვლელობისას, თუ დაქვეითებისას. ზემოხსენებული წერილების ავტორებიც, იმის მაგიერ, რომ დაენახვებიათ, წინ მიდიოდა თუ უკან ჩვენი ცხოვრება, და ამით ეჩვენებინათ ჩვენი ლიტერატურის მომავალი გზაც, ზოგი გაიძახის: მწამს, აყუავდებაო; ზოგი: ვხედავ, იღუპებაო; უსაფუძვლო რწმენას კი, ათასი საწუგეშოც იყოს ის, ან უნუგეშო, არავითარი ფასი არა აქვს.

ჩვენი ლიტერატურა წარსულ საუკუნეში შეიძლება დავყოთ სამ ხანად: პირველი გრძელდება მესამოცე წლებამდე, მეორე მესამოცე წლებიდან ოთხმოცდაათ წლებამდე, მესამის ასპარეზი ჯერ მხოლოდ რამდენიმე წელიწადია, მაშინ, როდესაც პირველი ორი ხანის ლიტერატურა მკაფიო და გარკვეული ხასიათის არის, მესამე ხანის ლიტერატურა რაღაც ყოყმანშია, გამოურყვეველია. ძველი მას მოსწყინდა, ახალს ეძებს, მაგრამ რა არის ეს ახალი, ჯერ, როგორც მწერლისათვის, ისე მკითხველისათვის, ბურუსით არის მოცული.

წარსული საუკუნის დასაწყისიდან ქართველობა განიყოფებოდა ორ დიდ ნაწილად: თავადაზნაურობად და გლეხობად. პირველი წარმოადგენდა ბატონს, რომელსაც შრომა სათაკილო ხელობად მიაჩნდა, მეორე კი ყმას, რომლისთვისაც ბედს დაუწესებია: ოფლითა შენითა ჯერ სხვები არჩინე, შემდეგ შენი თავიო. ჩვენ აღარ გამოვაცალკავეთ სასულიერო წოდება, რადგანაც ის თითქმის იმგვარსავე ბატონს წარმოადგენდა, როგორც თავადაზნაურობა. მეცხრამეტე საუკუნის დამლევაამდე მთელი პოლიტიკური ძალა თავად-აზნაურობის ხელში იყო, გლეხი კი ამ ძალას მოკლებული იყო; ის ომის დროს წარმოადგენდა თოფის ლუკმას, მშვიდობიანობის დროს კი ბატონის ლუკმას და აი, ამით განისაზღვრებოდა მთელი მისი პოლიტიკური და სოციალური მნიშვნელობა. რას აკეთებდა თავდაზნაურობა მშვიდობიანობის დროს? ის ცხოვრობდა ნიადაგ სოფელში, სოფლად წესრიგს იცავდა, მოსამართლე იყო გლეხებს შორის, მაგრამ რადგანაც ყოველივე ამას ცოტა დრო უნდებოდა, თავისუფალი დრო კი მას ბევრი რჩებოდა. დანარჩენ დროს თავის სიამოვნებას ანდომებდა: ან ქეიფობდა, ან ნადირობდა. წარსულ საუკუ-

ნეში მესამოცე წლებამდე სოფელი ჩვენი ცხოვრების ცენტრს წარმოადგენდა, სოფლად მცხოვრები თავად-აზნაურობა კი უღარდელ და უზრუნველ წოდებას; გონებრივი კითხვები მას არ აინტერესებდა, შინ ყოველისფერი მზად ჰქონდა, ამიტომ მისი ერთადერთი მიზანი მხოლოდ პირუტყვული სიამოვნება იყო. მეცხრამეტე საუკუნეში ამ უღარდელმა წოდებამ პოლიტიკური მნიშვნელობა დაჰკარგა; მას არათუ საგარეო საქმეში არაფერს კითხავდნენ, შინაურ საქმეებშიაც კი აღარ ურევდნენ. თუ სოფელში წინათ მარტო ის იყო ბატონი, ახლა მას მეორე ბატონი ამოუდგა გვერდში, რუსის მოხელე, ხშირად უფრო ძლიერი და გავლენიანი, ვიდრე პირველი. ამ გარემოებას ჩვენი არისტოკრატიისათვის ორი შედეგი მოჰყვა: პირველი ის, რომ მისი თავმოყვარეობა შეილახა, მეორე ის, რომ სოფელში ძველი ძალა და მნიშვნელობა დაჰკარგა და ამან, რასაკვირველია, მატერიალური ზარალიც მოუტანა. ამ დღიდან უღარდელ და უზრუნველ წოდებას დარდი შეეპარა და ეს დარდი მოსვენებას არ აღუვდა...



ამ მხრივ საყურადღებოა თავადების შეთქმულებისა და გლეხების ამბოხების ერთმანეთთან შედარება, როდესაც არისტოკრატია მოცდაათ წლებში შეთქმულება მოაწყო, მისი მიზანი იყო საქართველოს პოლიტიკური აღდგენა ე. ი. ძველი წყობილების დაბრუნება არისტოკრატიის ხელში. გლეხები კი უკმაყოფილონი იყვნენ არა ახალი წყობილებით, არამედ რუს მოხელეთა მხეცური შოქმედებით და მათი ამბოხებაც უმეტეს შემთხვევაში, ამ მოხელეთა უკანონობითა და სისასტიკით იყო გამოწვეული. ყოველივე ეს ცხადად ამტკიცებს, რომ გლეხობამ სხვა თვალთ შეხედა საქართველოს პოლიტიკურ სიკვდილს, არისტოკრატია სხვა თვალთ; არისტოკრატია უფრო იგლოვდა მას, ვიდრე გლეხობა, და ამის მიზეზი მათი ინტერესების სხვადასხვაობაში იყო: გლეხობას თვალსაჩინოდ იმდენი არა დაუჟარგავს რა პოლიტიკური ცვლილებისა გამო, რამდენიც თავადობამ დაჰკარგა და ამიტომაც პირველის გლოვა გაცილებით სუსტი იყო, ვიდრე მეორისა<sup>1</sup>. ჩვენ თუ ვამბობთ: პატრიოტული პოეზია ჩვენში კლასობრივმა ინტერესებმა წარმოშობეს-მეთქი, აქედან ის

<sup>1</sup> პრინციპიალურად ნაციონალურ იდეას ჩვენ სრულებითაც არ უარყოფთ, მაგრამ იმ ხანაში, რომელზედაც ჩვენ ლაპარაკი გვაქვს, ეს იდეა თავს ვერ იჩენდა მთელ ხალხში ზემოხსენებული მიზეზების გამო.

დასკვნა არ გამოდის, ვითომ ყოველი პატრიოტი მწერალი კლასობრივი ინტერესების მეტს ვერას ხედავდა. დარწმუნებული ვართ, რომ ყველა იმათ გულწრფელად უყვარდათ თავისი სამშობლო და ვერცა ხედავდნენ კლასობრივი ინტერესების გავლენას თავის პოეზიაზე. მაგრამ ცხოვრებაში ყოველთვის ასე ხდება: კლასობრივი ფსიქოლოგია იმდენად იმორჩილებს ადამიანის აზროვნებას, რომ ერთი რომელიმე კლასის ინტერესები მას მთელი ერისა და ხშირად მთელი კაცობრიობის ინტერესებამდ მიაჩნია. წარსული საუკუნის პოეტთა შორის ჩვენ გვყავს ერთი, რომელიც სრულიად აცდა კლასობრივი ინტერესების ზეგავლენას, მიუხედავად იმისა, რომ ისიც არისტოკრატიის წრეს ეკუთვნოდა და ამ წრის ზეგავლენით აღიზარდა; ეს იყო ნ. ბარათაშვილი. ეს პოეტი დღემდის გამოუცნობელი პირია და ვინ იცის კიდევ რამდენ ხანს დარჩება ის ასე გამოუცნობლად. თავადობის გლოვას ნ. ბარათაშვილი არ გაუტაცნია; საქართველოს პოლიტიკურ სიკვდილში ის ხედავდა აუცილებელ მოვლენას, რომელსაც წელში უნდა გაემართა გონებრივად დაბეჩავებული და მტრისაგან დაჩაგრული ქართველობა. ნ. ბარათაშვილს ჰქონდა საკუთარი სევდა, რომელიც იმ დროს მხოლოდ მისი იყო, რომელიც მარტო მას უღრღნიდა გულს, მხოლოდ მას უჟარგავდა მოსვენებას. ეს სევდა იქიდან წარმოსდგა, რომ ნ. ბარათაშვილი ერთობ ადრე დაიბადა; ის მთელი საუკუნით მაღლა იდგა მაშინდელ საზოგადოებაზე; მისი ბისწრაფება, მისი სულისკვეთება არავის ესმოდა, მის წყურვილს მოქმედებისას არავითარი ასპარეზი არა ჰქონდა, — ამიტომაც ის მთელი თავისი ხანმოკლე სიცოცხლის მანძილზე სულიერ ობლობას გრძნობდა, — გრძნობდა, რომ რამდენიც უნდა ეცოცხლა, მაინც ობოლი იქნებოდა, და ეს გრძნობა იყო დაუშრეტელი წყარო იმ სევდისა, რომელიც ასე ხიბლავს მკითხველს მის პოეზიაში.

მესამოცე წლებამდე ჩვენი პოეზია გამომხატველი იყო უმთავრესად პოეტის ინდივიდუალური აზრისა და მისწრაფებისა. პოეტის სიროვნება, მისი საკუთარი ნება, — აი, რა გამოსჭვივის მთელს მაშინდელს პოეზიაში. ამიტომ ჩვენი პოეზიის მიმართულება მესამოცე წლებამდე იყო — რომანტიკული, — პოეზიის უმთავრესი დარგი ინდივიდუალური ანუ სუბიექტური ლირიკა. როგორც სხვა მიმართულება, ისე რომანტიზმი ჩვენში ისე სავსებით არ გაფურჩქვნილა, როგორც დასავლეთ ევროპაში. რომანტიზმის თვისებათა შორის არის ერთი, — კერძო, საკუთარ გრძნობათა ხატვა. ქართულმა რომანტიკულმა პოეზიამ მარტო ეს ერთი თვისება განივითარა. მესამოცე წლებიდან ჩვენი პოეზია ნელ-ნელა იწყებს ახალ



გზას და ეს ახალი გზა თუ ნათლად გამოსჭვივის პოეზიის მიმართულებებში, იმდენადვე ნათლად არა ჩანს მის შინაარსში. მესამოცე წლებიდან დღევანდელ დრომდე ჩვენი პოეზია იყოფა ორ ხანად, რომელთაგან პირველი ხანა შეიძლება გავყოთ ორ ნაწილად: პირველი ნაწილი გრძელდება ოთხმოც წლებამდე, მეორე — ოთხმოციდან ჩვენს დრომდე, ხოლო ჩვენს დროში თავი იჩინა პოეზიის ახალმა სიონი — დადგა ახალი ხანა ჩვენი პოეზიისა. რამ გამოიწვია ცვლილება ჩვენს პოეზიაში? მხოლოდ ცხოვრების შეცვლამ. მესამოცე წლებში ჩვენი ცხოვრების წყობილებას საფუძველი გამოეცალა, თუ აქამდე ცხოვრების სახე ყველასათვის აშკარა იყო და ადვილად გასარჩევი, თავადს თავისი განსაზღვრული ალაგი ეჭირა ცხოვრებაში, აზნაურს — თავისი და გლეხს თავისი, ყოველივე ეს მოიშალა, ცხოვრების გარკვეული სახე წაიშალა და მის ალაგას ვერაფერს ვერაფერს არჩევდა. თავისი განსაზღვრული ალაგი ყველამ დაჰკარგა ცხოვრებაში, მოწინავე პირები ხედავდნენ, საითკენ წავიდოდა ჩვენი ცხოვრება, მაგრამ თვითონ ხალხი ამას ვერ ხედავდა; მოწინავე პირები მიუთითებდნენ ხალხს ახალი მრეწველობისა, ვაჭრობისა და სწავლა-განათლების გზაზე, მაგრამ ხალხი ჯერ ვერ დადგომოდა ამ გზას. ასეთმა გაურკვეველმა ხანამ გასტანა სამოცდაათ წლამდე და მან თავისი კვალი ჩვენს პოეზიასაც დააჩნია. აქაოდა გლეხობა გათავისუფლდაო, ჩვენმა პოეტებმა იფიქრეს: აწი საქართველოში საერთო ბედნიერება დამყარდება, ოღონდ ყველას გზა ვუჩვენოთო. თანამედროვე ცხოვრების გარკვევას პოეზიამ თავი დაანება და დაუბრუნდა ისევ წარსულს ან მიაქცია ყურადღება ზოგად კითხვებს. შინაარსის მხრივ ამ დროიდან ჩვენმა ლიტერატურამ ერთი ცვლილება შემოიტანა: გლეხი, რომელიც აქამდე პოეზიის ყურადღებას არ იზიდავდა, პოეზიის კანონიერ მოქალაქედ იქცა. იდეალური სახით გლეხი პირველად წარსდგა მკითხველის წინაშე ილ. ჭავჭავაძის პოეზიაში. ახალი ლიტერატურა მაშინვე რეალურ გზას გაბედვით დაადგა და ამ დღიდან რეალისტური და რომანტიკული მიმართულება თანაბრად მოდიან ერთად ოთხმოც წლებამდე. ოთხმოც წლებიდან კი რომანტიკული მიმართულება თანდათან ილულება და ჰქრება, რეალისტური კი თანდათან იფურჩქნება. თუ პირველ ხანებში რეალისტური მიმართულება არ იყო მკაფიო და გაბედული, მას ერია რომანტიკული ელემენტებიც; ოთხმოციდან წლებიდან რეალისტური მიმართულება იწმინდება ამ ელემენტებისაგან და მკაფიო გზს ადგება. რეალისტური მიმართულება ჩვენში მესამოცე წლებზე ადრე გაჩნდა, მაგრამ მხოლოდ მესამოცე წლებიდან იწყო განვითარება; იმის მამამთავრად უნდა ჩაითვალოს კონჭაძე, „სურამის ციხის“

ავტორი. მესამოცე წლებიდან პოეზიის მეთაურნი გახდნენ აკაკი წერეთელი და ილ. ჭავჭავაძე. სხვა ცვლილებათა შორის, ამ პოეტებმა ერთი შესამჩნევი ცვლილება შემოიტანეს: მათ შექმნეს ნამდვილი მარტივი ლიტერატურული ენა და ამით პოეზია გასაგები გახადეს ყოველი მკითხველისათვის. მანამდე ლიტერატურული ენა წარმოადგენდა უმთავრესად ანტონ კათალიკოსის ენას; ახალი ენის შექმნაში ყველაზე მეტი სამსახური მიუძღვით ი. ჭავჭავაძეს და ა. წერეთელს.

როგორც უკვე ვთქვით, გამორკვეულმა ცხოვრებამ მესამოცე წლიდან გამოურკვეველი სახე მიიღო და პოეზიამ ვერ მოჰქვინა მას ნათელი, ვერ გამოარკვია მისი სახე. ამ მხრივ ერთადერთი მშრომელი იყო ჩვენი ჟურნალისტიკა, რომლის სათავეში იდგენ გ. წერეთელი, ნ. ნიკოლაძე და ს. მესხი, ესენი კარგად იცნობდნენ ევროპის ცხოვრებას, მათი იდეალი დასავლეთი ევროპა იყო და თავის პუბლიცისტურ ნაწერებში დაუღალავად მიუთითებდნენ ჩვენს ერს იქითკენ. მათ მალე შეიგნეს თანამედროვე ცხოვრების მიდრეკილება; მათი ქადაგება ზედგამოჭრით შეეფერებოდა დროს, რა სახესაც ღებულაზდა ჩვენი ცხოვრება, ყველაზე უმალ მათ შეამჩნიეს და ახალი ცხოვრების სახე ყველაზე უმალ გ. წერეთელმა გადაიტანა სიტყვაკაზმულ ლიტერატურაში; ერთი მხრით, მან დაგვიხატა ჩვენი ერის იმ ნაწილის მდგომარეობა, რომელიც ძველ გზას შერჩენოდა, ბეორე მხრით, წარმოგვიდგინა იმ ნაწილის სურათი, რომელიც ახალ გზაზე გამოსულიყო, და ამით გვიჩვენა, საით მიდიოდა ჩვენი ცხოვრება და რა ნაბიჯი გადაედგა ახალს გზაზე. აქედან, ე. ი. ოთხმოცი წლებიდან, ჩვენი ლიტერატურა დაადგა გარკვეულ გზას როგორც მიმართულებით, ისე შინაარსით: რეალიზმი შეიქმნა მთავარ მიმართულებად, თანამედროვე ცხოვრება და თანამედროვე ადამიანის ფსიქოლოგია—შინაარსის მთავარ საფუძვლად. ამ გზიდან არ გადაუხვევია ჩვენს პოეზიას დღევანდლამდე. ხოლო მასში გამოირკვა ორი შემდეგი თვისება: მაშინ, როდესაც მწერლობის ერთმა ნაწილმა ვიწრო ფარგლებში მოიმწყვდია თავი და იდეალურად ხატვა დაუწყო გლუხსა და მის ცხოვრებას, მეორე ნაწილმა მთელი ჩვენი ცხოვრება გაიხადა თავის საგნად და მიუდგომელი ხატვა — მიზნად.

თუ რომანტიკული მიმართულება მხოლოდ სუბიექტურ ლირიკაში იხატებოდა, რეალიზმმა ეს ლირიკა საზოგადოებრივ და ობიექტურ ლირიკად გახადა, ეს ლირიკა მძლავრად გაიშალა, მასთან ერთად გაიფურჩქნა ბელეტრისტული ფორმაც სიტყვაკაზმული მწერლობისა და ჩვენი ლიტერატურა, როგორც შინაარსით, ისე ფორმითა და მიმართულებით გართულდა.

რად მიიღო ჩვენმა ლიტერატურამ გარკვეული სახე როგორც

მიმართულებით, ისე შინაარსით, მხოლოდ მეოთხმოცე წლებში? იმიტომ, რომ მეოთხმოცე წლებიდან გამოიკვეთა თვით ჩვენი ცხოვრების სახეც: წოდებრივი საზღვრები წაიშალა; თუ გლახი აქამდის მარტო მიწის მუშა იყო, ის ახლა ახალ გზაზე გამოვიდა: ერთი ხელი ვაჭრობასა და მრეწველობას ჩასჭიდა, მეორე განათლებას. თავადობამაც შეიგნო, რომ ძველებურად ცხოვრება მას აღარ არგოდა და ნელ-ნელა დაიძრა ლუარსაბის ტახტიდან. ძველი გზიდან გადაგდებული ცხოვრება მეოთხმოცე წლებიდან მტკიცედ დაადგა ახალს, ევროპული ცხოვრების გზას და ამან ჩვენი ლიტერატურაც გამორკვეულ გზაზე გამოიყვანა. რეალისტურმა მიმართულებამ უკანასკნელ ათ წლებში გამოიღო ერთი შტო — ფსიქოლოგიური, რომელიც თანდათან ვრცელდება ჩვენს ლიტერატურაში; მას გვერდში ამოუდგა სოციალური ლირიკა. ბოლო წლებში ჩვენს ლიტერატურას ყოყმანი დაეტყო, ძველი მოსწყინდა, მობეზრდა, ახალის ძებნაშია, მაგრამ ეს ახალი ჯერ გამოურკვეველია. როგორი იქნება ჩვენი სიტყვაკაზმული მწერლობა მომავალში? ჩვენი ცხოვრება შეუჩერებლად ვითარდება და ეს გამოიწვევს ლიტერატურის განვითარებასაც, ხოლო მასში უმთავრეს ალავს დაიჭერს ფსიქოლოგიური მიმართულება და საზოგადოებრივი ლირიკა. ამასვე გვიმტკიცებს ჩვენ ევროპის დღევანდელი ლიტერატურა. შექსპირის „ჰამლეტი“, ევროპის დღევანდელ ახალ თაობასთან შედარებით, ბედნიერი და გულმაგარი ახალგაზრდაა. მას თუ აწუხებდა თვითკრიტიკა. უიმედობა, გაუბედაობა და დაუსრულებელი ყოყმანი, დღევანდელი ახალთაობა ყველა ამ სენმა დატანჯა და მოთელა: მან ყველაფერი დაჰკარგა: წარსულიდან აღარაფერი სწამს, მომავალში არაფერს ელის, აწმყო არ აკმაყოფილებს და ყოველივე ამას შედეგად მოჰყვა ის, რომ ერთი ნაწილი თავისსავე გულს ასკდება, მეორე კი გაფაციცებდით ეძებს ახალ მსოფლიო შეხედულებას, რომ მით გულგამაგრებულმა იმედისა და ნუგეშის შუქი შეიტანოს თავის ცხოვრებაში და სულ მჩვარად არ იქცეს. იმიტომ დღევანდელი ადამიანის ფსიქოლოგია ფრიად საყურადღებოა, მით უმეტეს, რომ ამგვარი მოვლენა შემთხვევითი კი არ არის, ის თითქმის ყოველ საუკუნეში მეორდება და ყოველთვის ძველის უვარგისობისა და ახალის მოახლოვების მომასწავებელია. ამგვარი „ურწმუნოების“ ნიშნებმა ჩვენშიაც იჩინა თავი და ადრე თუ გვიან ეს პოეზიის სრულ კუთვნილებად გახდება, ჩვენი ცხოვრების ნივთიერი პირობები იცვლება და ასეთი ცვლილების ხატვა იმგვარი მწერლობის საქმეა, როგორიც არიან ბ-ნი კლდია-შვილი და ან. ერისთავისა. ცხოვრების ნივთიერი პირობების შეცვლას თან მოსდევს ადამიანის ფსიქოლოგიის, ანუ ცხოვრების სული-

ერი მხარის შეცვლაც და ასეთი ცვლილების ხატვა იმგვარი მწერლების საქმეა, როგორც არიან ბ-ნი არაგვისპირელი, დეკანოზიშვილი და ვედოშვილი.

ამგვარად, ჩვენმა ლიტერატურამ წარსული საუკუნე დაიწყო რომანტიზმით, შემდეგ გადავიდა რეალიზმზე და ის საუკუნე ფსიქოლოგიური მიმართულებითა და საზოგადოებრივი ლირიკით დაბოლოვდა. რომანტიკული პოეზია განიყოფება ორ ნაწილად: სუფრულ პოეზიად და პატრიოტულ პოეზიად. რეალური პოეზიაც ორ ნაწილად განიყოფება: პირველი მომხრეა იდეალიზაციისა ტიპებისა და ცხოვრების ხატვაში, მეორე წინააღმდეგი. რეალიზმი მეოთხმოცე წლებამდე გაურკვეველ გზას ადგა, ოთხმოცი წლებიდან ის გარკვეულ გზას დაადგა; უკანასკნელ წლებში ჩვენს პოეზიას ახალი ხანა დაუდგა. ჩვენი სიტყვაკაზმული მწერლობა წარსული საუკუნის განმავლობაში თანდათან გაფართოვდა ყოველი მხრით. ლიტერატურულმა ენამაც ევოლუცია განიცადა და ანტონ კათალიკოსის გაუგებარი და ძველი ენა აკაკი წერეთლის მარტივმა და მსუბუქმა ენამ შესცვალა.

1901 წ.

## ქართული საერო პოეზია

### 1. რაფიელ ერისთავი

სანამ ამ წერილის საგანს შევეუდგებოდე, საჭიროდ მიმაჩნია განმარტება, თუ რას ვუწოდებ და როგორ მესმის საერო პოეზია. როდესაც რ. ერისთავს, ალ. ყაზბეგსა და ვაჟა-ფშაველას დანარჩენ ჩვენ მწერლებს შეადარებთ, მათ შორის, ექვს გარეშეა, მსგავსებას ჰპოებთ, მაგრამ ამავე დროს განსხვავებაც დიდი და ამ განსხვავების მიხედვით შეგვიძლია, ჩვენი მწერლები ორ ჯგუფად გავყოთ, მიუხედავად იმისა, რომანტიკული მიმართულების იქნება თუ რეალურის ესა თუ ის მწერალი. აიღეთ, მაგალითად, ილ. ჭავჭავაძე და გ. წერეთელი. ამ ორ მწერალს შორის ის მსგავსებაა, რომ ერთიცა და მეორეც გვიხატავენ ამ გლეხის მდგომარეობას, იმ სოციალურ პირობებს, რომლებიც მას გარს არტყია, ან წარსულში ერთყა; ერთიცა და მეორეც გლეხის სევდასა და გულსნადებს უმეტეს შემთხვევაში საკუთარი შეხედულების პრიზმით ზომავენ, და არა თვით გლეხის მსოფლიო შეხედულებით. ასეთ გარემოებას შედეგად ის უკიდურესობა მოსდევს, რომ ილ. ჭავჭავაძის მოთხრობებში ზოგიერთი პირი თავის საკუთარ აზრსა და შეხედულებას კი არ გვატყობიებს, არამედ ავტორისას. აიღეთ ახლა რ. ერისთავი და ალ. ყაზბეგი. ერთიცა და მეორეც გლეხსა ხატავს; მათ შორის განსხვავება დიდი, მაგრამ ისინი იმ საერთო თვისებით უახლოვდებიან ერთიმეორეს, რომ უმთავრეს ყურადღებას აქცევენ თვით გლეხს, მის ზნეჩვეულებას, რწმენა-შეხედულებას, — ერთი სიტყვით, მის ფსიქოლოგიას, სოციალურ პირობებს კი თითქმის არავითარს; გლეხის გულსნადებსა და ჭირ-ვარამს საკუთარი აზროვნების პრიზმით კი არ უტყეპრიან, არამედ გლეხისავე შეხედულებით ზომავენ. ამ საერთო თვისებითვე განსხვავდებიან ეს უკანასკნელნი ბევრი ჩვენი მწერლისაგან. ზემოთყვანილი შედარებიდან აშკარა არის შემდეგი; ა) ერ-

თი წილი ჩვენი მწერლობისა იმდენად გლესხს არ ხატავს, რამდენადაც მის ცხოვრებას, უმთავრესს ყურადღებას სოციალურ პირობებს აქცევს, რომლებშიაც გლესხი ტრიალებს. მეორე ნაწილი ჩვენი მწერლებისა უმთავრესად გლესხს ხატავს; სოციალურ პირობებს კი რომლებშიაც ეს გლესხი ცხოვრობს, ნაკლებ ყურადღებას აქცევს. ბ) პირველი ნაწილი ჩვენი მწერლებისა გლესხის სულის მოძრაობის ხატვაში მარტო გლესხის შეხედულებით კი არ ხელმძღვანელობენ, არამედ საკუთარი რწმენა-შეხედულების ელფერს უმატებენ: მეორე ნაწილი კი მხოლოდ გლესხის სულსა და გულს გვიშლის და თავის მხრივ არას უმატებს; თუმცა ასეთი თვისება ალ. ყაზბეგს იმდენად არ ემჩნევა, როგორც რ. ერისთავს. ამ უკანასკნელი ჭგუფის მწერლებს ვუწოდებ მე საერო პოეტებს და მათს ხელოვნებას — საერო პოეზიას. შეიძლება ასეთი სახელი აღნიშნულ მცნებას რიგიანად ვერ ხატავდეს, მაგრამ მე უკეთესი ვერ გამოვნახე. მაშინ, როდესაც პირველი ჭგუფის მწერლები ჩვენში უმეტესობაა, მეორე ჭგუფს ეკუთვნიან მხოლოდ რ. ერისთავი, ალ. ყაზბეგი, ვაჟა-ფშაველა და მისი ძმა, ბაჩანა.

მე განზრახვა მაქვს, ამ მწერალთა მოღვაწეობას და მნიშვნელობის გამორკვევას ცალკე წერილები ვუძღვნა და, რა დასკვნამდისაც მივალ, ბოლო დაგვანახებ. რ. ერისთავსა და ალ. ყაზბეგს დრამატული პოეზიის დარგშიაც შეუტანიათ თავისი წვლილი, მაგრამ ამ წერილებში მათ დრამატულ ნაწერებს მე არ შევეხები და სხვა დროს გავარჩევ.



1453 წელს ბიზანტიის იმპერია დაემხო. ამ გარემოებას ევროპის გონებრივ მოძრაობაზე დიდი გავლენა ჰქონდა: განათლებულმა ბერძნებმა იწყეს გადასახლება ევროპის დასავლეთ სახელმწიფოებში და ამგვარად, ნელ-ნელა გააცნეს ევროპას ძველი საბერძნეთისა და რომის კულტურა. ასეთ თანდათანობით გაცნობას შედეგად მოჰყვა რენესანსი ანუ ხელოვნებისა და მეცნიერების აყვავება და ის ცრუკლასიციზმი, რომელსაც დამონებული ჰყავდა ევროპის პოეზია მეცხრამეტე საუკუნემდე; ჩვენს დროს რომ ცრუკლასიციზმი გამეფებულიყო, არათუ შეუძლებელია, წარმოუდგენელიც არის; საშუალო საუკუნეების ევროპაში კი ასეთი მიმართულებისათვის საუცხოოდ იყო ნიადაგი მომზადებული. საშუალო საუკუნეებში ევროპაში კათოლიციზმის სრული ბატონობაა. კათოლიციზმი ყოველისფერს ღვთის ნებას უქვემდებარებდა და, რადგანაც ქვეყნად ღვთის მოადგილედ პაპი მიაჩნდა, ამიტომ კათოლიციზმი ყოველის-

ფერს პაპს უმორჩილებდა; მისი უფლება განუსაზღვრელი იყო; მის წინაშე მეფეებიც კი ძრწოდნენ. კათოლიციზმის ბატონობა ნიშნავს ინდივიდუუმის სრულ უარყოფას, თავისუფალი აზროვნების სრულ დახშობას, გონებრივი წინმსვლელობის სრულ შეჩერებას. ასეთ პირობებში მყოფი საშუალო ევროპიელი მოკლებული იყო თავისი აზრების თავისუფლად განვითარებას, თავისი რწმენა-შეხედულების თავისუფლად გამოთქმის, მეცნიერულ კითხვების აშკარად, უშიშრად კვლევას, საზოგადო ცხოვრებაში თავისუფალ მოღვაწეობას და ამიტომ მას ერთი გზა დაარჩენოდა: ან ანაფორა ჩაეცვა და დოგმატების მეოხებით დაკმაყოფილებულიყო, ან ყოველისფერი უკუეგდო, ცხოვრებისათვის ზურგი ექცია, საკუთარ სულსა და გულს დაბრუნებოდა და იქ ეძია ნუგეში მეტაფიზიკური კითხვების რკვევით. ასეთ საზოგადო ატმოსფეროში მცხოვრებმა ევროპელმა გაიცნო საბერძნეთისა და რომის შესანიშნავი ხელოვნება და ფილოსოფია; მას თითქოს თვალი აეხილა და რადგანაც გარშემო ცხოვრებაში მის სულისკვეთებას, მოქმედების წყურვილს არავითარი ნიადაგი არა ჰქონდა, ის მთელი თავისი არსებით ახალ წყაროს დაეწაფა, დაიწყო ხელოვნებისა და ფილოსოფიის შესწავლა და მათი სიდიადით აღტაცებულმა არისტოტელე მიუწვდომელ ავტორიტეტად დასახა და ძველი ხელოვნება მისაბაძ სიმშვენიერედ.<sup>1</sup> ევროპის მწერლებმა ნელ-ნელა ხელი მიჰყვეს მიბაძვას და ასეთმა მიბაძვამ წარმოშვა ცრუკლასიციზმი. რა არის ცრუკლასიციზმი? ცრუკლასიციზმი არის ავტორიტეტის სრული გაბატონება ხელოვნებაში, ხელოვნების მომწყვდევა ვიწრო კანონებში, ინდივიდუალურ გრძნობათა თავისუფალი გამოხატვისა და აღმაფრენის სრული შეკვეცა, ნამდვილი ცხოვრების უკუგდება, — ერთი სიტყვით, ხელოვნების განვითარების უარყოფა, მისი ერთ წერტილზე გაქვავება და სიკვდილი. საფრანგეთის რევოლუციამ ლიტერატურის განახლებაც გამოიწვია და ამ საუკუნის პირველი ნახევრის ახალგაზრდა მწერლებმა ვიქტორ ჰიუგოს ბელადობით სასტიკი ბრძოლა გამოუცხადეს ცრუკლასიციზმს და კიდევ დაამარცხეს ის. ცრუკლასიციზმის ნანგრევებზე აყვავდა რომანტიზმი, რომელსაც დიდხანს მოუპოვა სრული ბატონობა ჰიუგოს გენიოსობამ. რომანტიზმი, როგორც ცრუკლასიციზმის წინააღმდეგ ამართული რევოლუცია, წარმოადგენს ავტორიტეტისა და დოგმატის უარყოფას, სრულ ინდივიდუალიზმს ლიტერა-

<sup>1</sup> აქ უნდა შევნიშნოთ, რომ renaissance ჯერ ხსენებაშიც არ იყო, რომ არისტოტელე ევროპის აზროვნებაზე გამეფდა. მაგრამ „აღორძინების“ შემდეგ მის ფილოსოფიას ზედმეტის ინტერესით დაეწაფნენ.

ტურაში, გრძნობათა, აღმაფრენათა და ფანტაზიის სრულ თავისუფლებას, ანარქიას.

თამარის დროს აყვავებული ქართული პოეზია საშუალო საუკუნეებში თანდათან მიჰკნა, მიიღია და მეცხრამეტე საუკუნეში ხელახლა იწყო გაფურჩქვნა. რაც მოეთხოვება ქართულ ნიქს დღევანდელს ჩვენს გონებრივსა და სოციალურ პირობებში, მეცხრამეტე საუკუნე ჩვენი პოეზიის ერთი საუკეთესო ხანაა. ცრუკლასიციზმს ჩვენში არ უჩენია თავი, რადგანაც ერთი მხრით, მისი განვითარების დროს საქართველოში პოეზია სრულებით მიმჭრალი იყო და მხოლოდ სასულიერო ლიტერატურა ბეუტავდა; ამას გარდა, მაშინდელი საქართველო ევროპას ისე ნაკლებად იცნობდა, რომ ევროპის ლიტერატურა საქართველოში გავლენას ვერ იქონიებდა. რომანტიზმმა კი ამ საუკუნეში ჩვენშიც იჩინა თავი და არათუ საკმაოდ განვითარდა, ისეთი შესანიშნავი ლირიკოსიც კი მოგვცა, როგორც არის ბარათაშვილი. რომანტიზმი ჩვენში დამოუკიდებლად აღორძინდა და განვითარდა, ის არ ყოფილა ევროპის რომანტიზმის გავლენის ნაყოფი. ის ჩვენში გამოიწვია, ერთი მხრით, საქართველოს პოლიტიკურად სიკვდილმა და, მეორე მხრით, მაშინდელი ცხოვრების ფუქსავატობამ და არარობამ. რ. ერისთავი დაიბადა 1824 წელს; მისმა აზროვნებამ თვალი აახილა და გაიშალა მაშინ, როდესაც ჩვენში რომანტიზმი განვითარებული იყო, როდესაც პოეზიის სათავეში ნ. ბარათაშვილი, გრ. და ვახ. ორბელიანები იდგნენ. თუ ცხოვრებამ გამოიწვია ჩვენში რომანტიკული პოეზია, ექვს გარეშეა, ამ მიმართულებას რაფიელიც ვერ უნდა ასცდენოდა. ცხოვრებასაც რომ თავი დავანებოთ, მაშინ ერთადერთი პოეზია ჩვენში რომანტიკული იყო; რაფიელის ნიჭის მიდრეკილება კიდევ რომ არ ყოფილიყო აქეთკენ, ის არ ყოფილა იმდენად ღრმა ნიჭის პატრონი, რომ დაწყებისთანავე რომანტიზმის გავლენას ასცდენოდა და თავისი საკუთარი გზა გაეკვლია. და მართლაც, რაფიელ ერისთავმა რომანტიზმით დაიწყო და რეალიზმით დააბოლოვა, როგორც ბ-ნი კიტა აბაშიძე სწერს.<sup>1</sup>

აილო თუ არა რაფიელმა კალამი ხელში, მაშინვე შეუდგა საკუთარ, პირად გრძნობათა ხატვას. საზოგადო ცხოვრებას, საზოგადო ჭირვარამს მან არავითარი ყურადღება არ მიაქცია, თითქოს ეს საზოგადო ცხოვრება არც კი ყოფილიყოს. მაგრამ საკუთარი გრძნო-

<sup>1</sup> „მოამბე“, 1900 წ. № VII.



პანი მრავალგვარნი არიან და ამიტომ მარტო ამის თქმა: რაფიელმა საკუთარი გრძნობანი გაიხადა პოეზიის საგნადო, კიდევ არ არკვევს, თუ რომელი გრძნობა შესწირა პოეტმა მსხვერპლად მელპომენას საკურთხეველზე. როდესაც რაფიელმა მოღვაწეობა დაიწყო საშწერლო ასპარეზზე, ჩვენი ცხოვრება მეტად უნუგეშო სურათს წარმოადგენდა. საზოგადო ცხოვრების მაჯა ისე დუნედ სცემდა, რომ ძნელი გამოსაცნობი იყო, სიკვდილის გზას ადგა ქართველობა თუ გამობრუნებისა და განახლების გზას; საზოგადო ინტერესები თითო-ოროლა პირს თუ ასულდგმულელებდა, საზოგადო საქმე, ორიოდე ადამიანის სურვილითა და მეცადინეობით გამოწვეული, ოდნავ ბეუტავდა. ასეთ პირობებში საჭირო იყო ბარათაშვილის ძლიერი და ფხიზელი ნიჭი, რომ ადამიანი საზოგადო ფეხის ხმას არ აყოლოდა, ნათლად შეეგნო მაშინდელი ცხოვრებისა და საზოგადოების სრული არარაობა და ფუქსავატობა და, თუ მისი ამაღლებისათვის არ ეზრუნა, თვითონ მაინც არ დამდაბლებულიყო, გაჰყოლოდა თავის გრძნობათა მერანს და ოცნებაში ეძია ობოლი სულის ნავთსაყუდარი და სევდიანი გულის მალამო, ან საჭირო იყო გიორგი ერისთავის ენერგია, რომ ქართველი საზოგადოება მცირეოდენ მაინც გამოეფხიზლებინა. რ. ერისთავს არც პირველი ნიჭი ჰქონდა, არც მეორის ენერგია; ბრძოლა, რაიმე მიზნისაკენ, სწორი გზით უდრეკად მიისწრაფება მის თვისებას არ შეადგენდნენ, პირიქით, მას უყვარდა „სიცოცხლე მშვიდი და მდორე“, როგორც ის გვეუბნება ერთ თავის ლექსში („ღმერთო მაშორე“, 164 გვ.), ამიტომ გამოსვლისთანავე ის აპყვა საზოგადო ფეხის ხმას, პოეზია ეროტიულ გრძნობაზე აასხა და ეს არის ის უმთავრესი გრძნობა, რომლისთვისაც მის კალამს მთელი ოცი წლის განმავლობაში არ უღალატნია. ამ დროის განმავლობაში მის ლექსებში შეხვდებით პატრიოტულ ლექსებსაც, მაგრამ მათი რიცხვი პირველთან შედარებით მცირეა, ეროტიული და პატრიოტული მოტივი — აი, ორი თემა, რომელსაც არ გასცილებია რაფიელის პოეზია სამოცდაათ წლამდე... როგორც მამია გურიელი, რაფიელიც ამ დროის განმავლობაში ქალში მხოლოდ გარეგნობას ეძებს და აღტაცებული გვიცხადებს:

ვეტრფი შავა თვალებსა, ვეტრფი სხივებრ მალებსა,

მე არ მიყვარს თვალები, თუ რომ იყვნენ მწვანენი და სხვ.

თითქოს მკითხველისათვის ძალიან საყურადღებო იყოს, შავი თვალები უფრო უყვარს პოეტს თუ მწვანენი. თუმცა მაშინდელი მკითხველისათვის ესეც საყურადღებო იქნებოდა, მაგრამ პოეტისა-

თვის არ შეადგენს ღირსებას, როდესაც ის მკითხველის დაბალ გე-  
მოვნებასა და განუვითარებელ გრძნობას გუნდრუქს უკმევს. თვა-  
ლების სიყვარულს პოეტი იქამდის მიჰყავს, რომ გულდამშვიდებით  
მათი მზერა აღარ შეუძლია:

რა წამს მათ დაინახავ, — როგორ არ გებრალები—  
ერკოლას ვიწყებ, მომივა მე დრო გაციებისა!

პირველ ხანებში პოეტის ბუნებაში სიყვარულის გრძნობის მე-  
ტი არა ყოფილა რა, მთელი მისი არსება ამ ერთ გრძნობას დამორჩი-  
ლებოდა. ამის მეტი არა აგონდებოდა რა, იმის მეტი აღარაფერი ენა-  
ტრებოდა. სიყვარულის მორევში ცურვა — აი, მისი იდეალი!

წაბლის ფერსა თვალებსა, ვინც თავს ათავყენებსა,  
სიმშვიდეს ემონება, მითვე ინეტარებსა,  
მათთან თვის საუკუნეს ტკბილად გაატარებსა, —  
მარადისლა ილოცოს სახელი ღვთაებისა!

ეთაყვანე წაბლისფერ თვალებს და ადიდე ღვთის სახელი, —  
გვარიანი გზა არის სამოთხის კარისაკენ!

რაკი სიყვარულის პანგებში რიგიანად გამოიწვრთნა პოეტი, მან  
გამოირკვია ჰემმარტი სიყვარული და ამიტომ მკითხველსაც ასწავ-  
ლის:

ოდეს ტურფას შეეყარო, ვისთვისც გიძგერს მარად გული,  
თუ რომ გიყვარს ჰემმარტიად, ასე უნდა სიყვარული:  
ხელი წელსა გადაჰხვიე, ვით რომ სურო ხესთან რგული,  
ისე მტკიცედ დაეკონე, ვით ფათალო ჩაწმახნული!...

მაშინ უნდა მშვენიერსა, თვალი თვალში გაუყარო,  
თავი თავსა, თმა დალაღსა, მკერდი მკერდსა დაამყარო,  
ტუჩი ტუჩსა შეაწებო, გული, სული გაახარო,  
ღაღიწყებას თავი მისცე, ნეტარების ცრემლი ღვარო!

გვარიანი იდეალია მსუბუქი სიყვარულისა. მაგრამ თუკი  
მთელ მაშინდელ არისტოკრატიას მხოლოდ ასეთი სიყვარული სწამ-  
და და ასეთი სიყვარული მიაჩნდა პოეზიის საგნად, რაფიელის დანა-  
შაული მარტო იმაში მდგომარეობს, რომ თავისი დროის რწმენა-  
შეხედულებას ვალი გადაუხადა და მის გავლენას ვერ ასცდა, თუკი  
ჩაეთვლება ასეთი აუცილებელი ნაკლულევანება დანაშაულად გა-  
მოუცდელ მწერალს. მოატანა ბატონყმობის განთავისუფლების ხა-  
ნამ. ასეთ დიად მომენტს ცხოვრებაში უსათუოდ უნდა გამოეწვია  
აღფრთოვანება, მაგრამ რაფიელს ერთი კრინტიც არ დაუძრავს მის  
წინააღმდეგ, უბრალო სიხარულიც არ დასცდენია მისი გაუქმების

გამო, ის ისევ სიყვარულს უმღერდა, ხოლო ძველებურის ალტაცებით აღარ, არამედ ლამაზ ქალს მწუხარებით შეჩიოდა:

რად შემიყვარებ? განა არ ვიცი,  
შენ ჟერ ნორჩი ხარ, მე კი მოხუცი.

პირველი ხანა რაფიელის მოღვაწეობაში სამოცდაათ წლამდე გრძელდება. მთელი ამ დროის განმავლობაში პოეტის ნიჭი თავის შესაფერ გზას არ ადგა; ეს ხანა ფრიად გრძელი იყო და მასთან ფრიად უნაყოფო. ამ ხნის განმავლობაში ის ხანდახან თარგმანსაც მიმართავდა ხოლმე რუსულიდან და მიუხედავად იმისა, რომ მაშინდელი დროის რუსული ლიტერატურა ძალიან მდიდარი იყო. ამ სიმდიდრეშიც რაფიელი მხოლოდ მდარეს ეძებდა და თარგმნიდა ეროტიულ-ლექსებს ისეთი უნიჭო მწერლებისას, რომლებიც დღეს რუსეთში სრულებით დავიწყებული არიან და სახელმოხვეჭილი არც რაფიელის დროს ყოფილან — მეორე თემა რაფიელის პოეზიისა პირველი ხანის განმავლობაში პატრიოტული მოტივია. რაფიელის პატრიოტული ლექსები ბევრად ჩამოუვარდებიან როგორც გრიგოლის, ისე ვახტანგ ორბელიანის პატრიოტულ ლექსებს. მთელი ასპინძის ომი, გარდა პირველი თვისა, ფრიად სუსტ პოეზიას წარმოადგენს. იქ რაფიელს მოჰყავს ერთი ტაეპი მესტვირული ლექსიდან:

კოხიო ბობლაიშვილი, — აქებენ: რაებს შვრებაო?  
— გამგელებულა ეს თუში, წინ ვერეინ დაუდგებაო,  
ნაკულა ქუიძესშვილი რა კანჭარივით ხტებაო, —  
შვიდი დაკაფა ხმალდახმალ, რიგი ხანჯალზე ღებებაო..

ეს ტაეპი მესტვირული ლექსიდან საუკეთესოა მთელს „ასპინძის ომში“.

ყოველი პოეტის ნამოღვაწარი კრიტიკოსისათვის აღსრულებულ ფაქტს წარმოადგენს. მისი მოვალეობაა, ობიექტურად ახსნას ეს ფაქტი, ისე, როგორც ბუნებისმეტყველი ხსნის რომელსამე ბუნებრივ მოვლენას, და დააფასოს ის ანუ მიუთითოს მკითხველს მის მნიშვნელობაზე საზოგადოებრივ ცხოვრებაში. წინადაც გამომითქვამს და ახლაც ვიმეორებ, რომ ყოველ მწერალს ვაფასებ არა ნიჭის მიხედვით, არამედ იმდენად, რამდენადაც მის ხელოვნებაში იხატება თანამედროვე ცხოვრების დამახასიათებელი მხარენი და რამდენადაც სასარგებლოა ის თანამედროვე საზოგადოებისათვის.

1870 წლიდან მოკიდებული 1880 წლამდე რაფიელის პოეტურ მოღვაწეობაში გარდამავალ ხანას წარმოადგენს. თუმცა იგავებში რაფიელმა შესამჩნევი ნიჭი გამოიჩინა, მაგრამ მისი ნამდვილი ასპარეზი საერო პოეზია იყო, რომელსაც მან 80-იანი წლებიდან მიაგ-

ნო, ე. ი. მაშინ, როდესაც პოეტი ორმოცდაათ წელს გადაცილებული იყო. ქართული პოეზიისათვის რაფიელი ოთხმოციან წლებში გაიფურჩქნა და ათი წლის განმავლობაში ისეთი ნაყოფი გამოიღო. რითაც ღირსეულად დაიმსახურა ნიჭიერი პოეტის სახელი. რა დიდი განსხვავებაა წინანდელ რაფიელსა და იმ რაფიელს შორის! როცა ერთმანეთს ადარებთ, თქვენ თვითონ არ გჯერათ, ნუთუ შესაძლებელია, რომ თავისი შესაფერი გზა ამდენ ხანს ვერ მიეგნოს ნიჭს?! როგორც ზემოთა ვთქვი, რაფიელის ნიჭმა პირველად იგავებში იჩინა თავი, და ამიტომ, სანამ მისი უკანასკნელი ათი წლის შოლვაწეობას დავახასიათებდე, მცირეოდენ სიტყვას უძღვნი მას, როგორც მეიგავეს. იგავების სფეროში თავისი კალამი რაფიელმა ადრე სცადა; ერთი-ორი ორიგინალური იგავეი დასწერა და მიანება თავი, რადგან მას, როგორც ორიგინალურ მეიგავეს, ნიჭი არა ჰქონდა. ორიგინალობის სფეროში რომ ვერას გახდა, თარგმანს მიმართა. — 1878 წელს დაიწყო კრილოვის თარგმნა და საბა-სულხან ორბელიანის არაკების გალექსვა. გარდა ორიოდ იგავეისა, კრილოვის არაკების უმეტესი წილი რაფიელს ისე საუცხოოდ აქვს თარგმნილი, რომ ზოგიერთი მათგანი თვით ორიგინალს არ ჩამოუვარდება. თუმცა ორიგინალური იგავეების წერაში რაფიელმა ნიჭი ვერ გამოიჩინა. მაგრამ იგავების მარტივი თემისაკენ მის ნიჭის უეჭველი მიდრეკილება ჰქონდა, რაც შემდეგმა მისმა პოეზიამ დაამტკიცა. ამ გარემოებით უნდა აიხსნას რომ მაშინ, როდესაც იგავები საუცხოო თარგმანს წარმოადგენენ, „ძუნწი გმირი“ რაფიელის თარგმანში პუშკინის „Скыпишь пылаешь“-ს ნაკლებად მოგაგონებთ.

ქართულ ენაზე კრილოვის არაკები ორმა მწერალმა თარგმნა: რაფიელმა და აკაკიმ, თუმცა აკაკი პოეტურის ნიჭით რაფიელზე მალე დგას, მაგრამ რაფიელის თარგმანები აკაკის თარგმანებს ჯობიან. რამდენიმე იგავეი, მაგ., „მგელი და გუგული“, „ორბი და გუგული“, „მაიმუნი და სარკე“ „ძუნწი და დედალი“, აკაკის ვაცილებით უკეთეს ფორმაში ჩამოუსხამს, ვიდრე რაფიელს. დანარჩენები კი რაფიელის თარგმანში უკეთესი გამოვიდნენ. ამის მიზეზი ორი გარემოებაა. აკაკის თარგმანი კრილოვის არაკების თარგმანს არ წარმოადგენს, — აკაკიმ ისესხა კრილოვისაგან მხოლოდ აზრი, ფორმა კი თავისი მისცა, ზოგან შეამოკლა, ზოგან ისეთი რამ მიუმატა, რაც ორიგინალში არ მოიპოვება; ზოგან ეს აუცილებელი იყო, როგორც მაგალითად, „ქირვეულ თამადაში“, მაგრამ უმეტესი მათგანის გადმოთარგმნა რომ შეიძლებოდა, ამას რაფიელის თარგმანები გვიმტკიცებენ. რასაკვირველია, აკაკისაც და სხვებსაც სრული უფლება აქვთ მხოლოდ აზრი ისესხონ უცხო მწერლისა, სიტყვიერი გამოხა-

ტულება კი ისეთი მისცენ, როგორც უფრო ეადვილებათ, ან საუკეთესოდ მიაჩნიათ; მაგრამ პოეზია, სხვათა შორის, მით განირჩევა პროზისაგან, რომ აზრს გარდა დიდი მნიშვნელობა აქვს იმ სიტყვიერ გამოხატულებას, რომელშიაც მწერალი თავის აზრს ახვევს; ამიტომ ყოველ თარგმანში თუკი ის თარგმანია, შეძლებისდაგვარად დაცული უნდა იყოს ეს სიტყვიერი გამოხატულება.

რაფიელის თარგმანი ამ მხრივ უნაკლოა; მასში დაცულია კრილოვის პოეზიის მუსიკალური მრავალფერობაც, რასაც აკაკის თარგმანებში ვერ შევხვდებით. აკაკიმ კრილოვის იგავების დედააზრი თავის ადვილსა და მჩქეფარე ლექსში ჩამოასხა, მაგრამ მისი იგავების ლექსი უმეტესად ერთი და იმავე წყობის არის, მუსიკალურ ერთფერობას წარმოადგენს, ეს კი, ჩემის აზრით, იგავებში ნაკლად უნდა ჩაითვალოს და არა ღირსებად. როდესაც კრილოვის არაკებს კითხულობთ, მასში გაკვირვებთ ლექსის მუსიკალური მრავალგვარობა; ეს მრავალგვარობა არათუ სხვადასხვა იგავში — ერთსა და იმავე იგავშიაც კი შეუტანია კრილოვს. ასევე მოიქცა რაფიელი. ასეთ მუსიკალურ სიმდიდრეს იგავებში შემდეგი მნიშვნელობა აქვს: იგავებში ყოველი ცხოველი ადამიანის სხვადასხვა თვისების ალგორითაა; ადამიანის თვისება აქ ცხოველის სახით არის წარმოდგენილი და ამ თვისებას ცხოველები თავისი მოქმედებითა და სიტყვებით ხატავენ. ამიტომ სიტყვიერ ფორმას და ლექსის მუსიკას დიდი გავლენა აქვს ილუზიის სიცხოველეზე. როდესაც მაგ. მუსიკა არ შეეფერება იმ იდეას, რომელსაც ის უნდა ხატავდეს, ასეთი კომპოზიტორი სახელს ნაკლებად დაიმსახურებს; თუ მუსიკა მწუხარების იდეას უნდა ხატავდეს და მისი კომბინაცია ამ იდეას სრულებით შეეფერება, მაშინ არათუ სრული ილუზია გელევათ, ზოგიერთ კარბი გრძნობის პატრონს ცრემლიც კი მოუვა; სამაგიეროდ, თუ მუსიკა, მაგ., მაისის მშვენიერ საღამოს უნდა ხატავდეს ტყეში და ამის მაგიერ მისი კომბინაცია უფრო სევდას ჰგვრის: მსმენელს, განვითარებული სმენის პატრონზე ასეთი დისჰარმონია მხოლოდ უსიამო შთაბეჭდილებას მოახდენს, გარდა იმისა, რომ მუსიკა სრულებით ვერ წარმოუდგენს მსმენელს მას, რის წარმოდგენაც უნდა, და ამგვარად, თავის მიზანს ვერ მიაღწევს. აგრეთვე, როდესაც იგავში დათვი სხარტულისა და მჩქეფარე ენით ლაპარაკობს, მელიას სიტყვებში კი ეშმაკობისა და გაიძვერობის მაგიერ უხეირო კავალერს მოგვაგონებენ, რომელსაც ჩვეულებრივი კომპლიმენტებიც კი ულაზათოდ ამოსდის პირიდან, თქვენი ილუზია სრულებით იფანტება. ამგვარად, მუსიკალური მრავალგვარობა იგავში იცავს ჰარმონიას დედააზრსა და გარეგან ფორმას შორის, ის მეტ სიცხო-

მელეს აძლევს ილუზიას და, რომ ეს ჰარმონია უკეთ დაუცავს რაფი-  
ელ ერისთავს, ვიდრე აკაკის, ამას შემდეგი მაგალითებიც ამტკიცე-  
ბენ:

მოვიდა და უთხრა მელას:  
შემიბრალე, ძმაო, ვკვდები  
სახრავ ძვალსაც ვერსად ვშოვობ,  
უგზო-უკვლოდ ვეხეტები.

მწყემსებს ღვიძავთ და ძაღლებიც  
ისევ ჰყუფენ, ჩემი მტრები,  
და შენს იქით გზა აღარ მაქვს,  
შემიბრალე, გივედრები.

მელამ უთხრა: ჩემო კარგო,  
მებრალები, გული მტკივა,  
აჰა, ღმერთმა მოგახმაროს  
მთელი ზეინი კარგი თივა.

ასე უთარგმნია აკაკის „მგელი და მელა“. იგივე ადგილი რაფი-  
ელის თარგმანში ასეთია:

ნათლიჯალაბო, არ გებრალები!.. —  
მგელმა შესჩივლა მაძღარს მელასა, —  
შემშლით ვკვდები... სუყველა მგლები  
ძრწიან,  
დაძრწიან  
ჰშიანთ ყველასა...  
მწყემსებს არ სძინავს,  
ძაღლები ღრინავს,  
ლამის შემშლით სული გამვარდეს!..  
მიშველე რამე,  
ღმერთი იწამე,  
გაღამარჩინე ამ საშინელს დღეს...  
უცებ წამოხტა მელა ცბიერი  
და მოახსენა: — ვაჰ, შენს მელიას!..  
როგორ დაღიხარ აგრე მშიერი? —  
შემშლილი, ვიცი, ძლიერ მწელია...  
ხომ დასუსტდები!.. კუჭი აგტკივია..  
აი, ნათლიავ, მიირთვი თივა...  
თუნდ მთელი ძირი,  
ნულარას ჩივი, ნულარას ტირი.

პირველ ლექსში ჩვენ ვხედავთ მხოლოდ აკაკის ლამაზ ლექსს,  
სილამაზეს გარდა იქ არც დედანია დაცული, ილუზიაც ფრიად სუს-  
ტია; მეორე თარგმანში კი უკეთ არის დახატული, როგორც მგლის  
გაჭირვებული და უსაშველო მდგომარეობა, რომელიც მისთვის

შემიშლს მიუყენებია, აგრეთვე მელიას ეშმაკობა და გაიძვერობა. როდესაც მელია ან მტერზე გაიმარჯვებს, ან გაჭირვებულ მდგომარეობაში დაინახავს ვისმე, მას ხასიათად აქვს საშინელი დაცინვა; მელიას ასეთი თვისება ერთნაირად არის დაცული როგორც ყველა ხალხის ზღაპრებში, ისე არაკებში. აკაკის თარგმანში მელიას ასეთი ხასიათი სრულებით გამოტოვებულია; რაფიელის თარგმანში კი მელიას ყოველი სიტყვა დაცინვა და თანაც ნიშნისმოგებაა.

კიდეც ერთი მაგალითი აკაკის „მგელი და წეროდან“:

მაგრამ მგელმა მიუგო:

— ბრძევო და სულელო!

არა კმარა, რომ შენი

არ დავიღვე ცოდვაო,

როცა ეგ შენი თავი,

ბრძევო, პირში მეღვაო?

რაფიელს ეს ადგილი, აი, როგორ უთარგმნია:

როგორ მიბედავ? — იძახის მგელი —

გადაირჩინე თავი სულელი

და მით არც კი ხარ შენ მადლობელი?!  
ერთი შეხედეთ ამ ყლაპიასა?!  
კისერი უგავს შიწის კიასა... და სხვ.

ამ ორი ადგილის შედარებით ყოველი მკითხველი დარწმუნდება თუ რამდენად უკეთ ხატავს რაფიელი მგლის თავხედ უმადურობას. თუმცა ზოგიერთ იგავში რაფიელის ენა ცოტა მძიმეა, მაგრამ საზოგადოდ მან კრილოვის იგავების თარგმანში საუცხოო მთარგმნელის ნიჭი გამოიჩინა. როდესაც შეადარებთ იგავებს მის წინანდელ პოეზიას, შემდეგი გარემოება გაკვირვებს: მაშინ, როდესაც წინანდელი მისი ლექსები მხოლოდ მსუბუქი მუზის ნაყოფია და უმეტეს მათგანში არაფერი არ ამხელს ავტორის ნიჭს, იგავებში ავტორს ეტყობა აუცილებელი ნიჭი და ამ ნიჭის თვისებაც ნათლად გამოსკვივის, — ამ თარგმანებით რაფიელმა დაამტკიცა, რომ მისი ნიჭის ფარგალი ვიწროა, მას არ ძალუძს ტიპების ხატვა, საქვეყნო იდეებისა და საკვირბოროტო ფილოსოფიური კითხვების აღძვრა მკითხველის გონებაში, რომ მას შეუძლია მხოლოდ მარტივი ბუნებისა და ხასიათის, უბრალო დამოკიდებულებათა და მარტივი ცხოვრების მიერ წარმოშობილი ფაქტების საუცხოოდ ხატვა, — მეტი არაფერი. თარგმანები იმ შესავალს წარმოადგენენ, რომლითაც რაფიელმა მიაგნო იმ ასპარეზის კარი, ურომლისოდაც ის, როგორც ორიგინალური პოეტი, მკვდარი იქნებოდა და მარტო თავის თარგმნებითა და კომედია-ვოდევილებით თუ დაიჭერდა ალაგს ჩვენი ლიტერატურის

ისტორიაში. ეს ასპარეზი არის გლეხი და მისი ბუნება, მისი იხდივი-  
დულური მწუხარება და მზიარულება.



როგორც ზევით განვიხილეთ, სამოცდაათ წლამდე რაფიელ ერის-  
თავის ერთადერთი მოტივი ქალები და წარსულ გმირთა ღიღება იყო.  
ამ დროის განმავლობაში მან ფრიად სუსტი და წარმავალი ნიჭი  
გამოიჩინა, რადგანაც ცარიელი რითმა და „ქება წარბთა და წამწამ-  
თა“ კემშარიტ პოეზიას არ შეადგენს. პოეტს რომ გული არ აპყრო-  
და თავის არშიყ მუზაზე და ბოლომდე მისი ერთგული მიჯ-  
ნური ყოფილიყო, შეუძლებელი იყო: რაფიელმა გადადგა ფეხი  
ისეთ ხანაში, როდესაც ადამიანის ცხოვრებაში ხორციელ, ანუ  
სქესობრივ სიყვარულს დიდი მნიშვნელობა ადარა აქვს, როდესაც  
ამ სიყვარულის ძლიერ აღძრულ გრძნობებს ძველებური სიცხოვე-  
ლის, სიძლიერის, გულწრფელობისა და წარმტაცობის მაგიერ, სი-  
სუსტე, უფერულობა და ნაძალადეობა ეტყობა. ამიტომ პოეტის  
ბუნება მარად ყმაწვილ და არშიყ მუზას უსათუოდ ჩამოშორდებო-  
და ნელ-ნელა და, თუ არ ჩამოშორდებოდა, გულწრფელობას მოკ-  
ლებული ლექსები უნდა ეწერა ნაძალადეოდ და თავის თავში წარ-  
მოედგინა ის ძლიერი გრძნობა, რომელიც მასში ან ცალიერ მოგო-  
ნებას წარმოადგენდა სიყმაწვილის გრძნობისას, ან მარტოოდენ  
ოდნავ ბეუტავდა. ეროტიული პოეზია და ისიც გრძნობასა და გულ-  
წრფელობას მოკლებული!

თუ მესამოცე წლებში რაფიელის მუზა კიდევ მღეროდა:

მაგრამ, ლამაზო, გული არ ჰქნების,  
წინწალი მასში ცხოვლათ იხრწნების.  
თუ მიეკარე — მსწრაფლ აღენთების,  
იფეთქავს, დაგწავს, თვით დაწვების!...ო,

შემდეგ და შემდეგ მისივე მუზა გვიმტკიცებს, რომ ყოვლის-  
ფერს თავისი დრო აქვს, რომ გულიც ჰქნება და, რაღაი დროს გადა-  
აცილებს, ლამაზისათვის აფეთქება აღარ ეხერხება და დაწვა ხომ  
სრულებით აღარ შეუძლია. ხორციელი სიყვარული თანდათან ქრე-  
ბა რაფიელის ლექსებში, მას „ტუჩი ტუჩსა შეაწებო“ აღარ აგონდე-  
ბა, არამედ სატრფოს „ნამდვილ სურათსა, ანგელოხის მსგავს“  
მხოლოდ გულში ატარებს და ამით ხორციელ სიყვარულს სრულე-  
ბით უკუაგდებს:

მომშორდი, აღარ მართობს მე სიყვარულის გესლი!..  
გამოფეხიზლდი, მოვიმკე ახლა ჰქეა და გონება,  
არ მწყურის სიყვარული, და სხვ.



სამწუხაროდ, პოეტმა ერთობ გვიან მოიმკო „ქვეა და გონება“. გვიან მოიკლა სიყვარულის წყურვილი და სურვილი რომ იმდენ ხანს შერჩა, რომ ამ სიტყვებს მხოლოდ 1889 წელს სწერდა, ე. ი. მაშინ, როდესაც მისი პოეტური მოღვაწეობის ასპარეზზე ფარდა ეშვებოდა. ამდენად ძლიერი გავლენა აქვს ყოველ ადამიანზე კლასიკურ ფსიქოლოგიას, როდესაც დაკვირვება და კრიტიკა უარყოფილია.

ასე თუ ისე, თვით დრომ მოიტანა, რომ რაფიელს თავის არზიყ მუზასთან კავშირი შეეწყვიტა, რომ ერთ მოვლენას არა ჩვენს ცხოვრებაში, რაფიელი შეიძლება იგავეების თარგმნას ვერ გასცილებოდა და სამუდამოდ თან ჩაიტანდა საფლავში თავისი პოეზიის საუკეთესო ნაწილს. ეს გარემოება იყო გლეხის განთავისუფლება. სამოცდაათი წლიდან მოკიდებული რაფიელი ახალი გზის ძებნაშია; ის გრძნობს, რომ ძველ მუზასთან მისი კავშირი სუსტდება და ადრე თუ გვიან უნდა გაწყდეს, ამავე დროს ახალი ვერ მიუგნია. ამ ახალი და მისი ნიჭის შესაფერისი გზის პოვნა თვით დრომ შეაძლებია რაფიელს. ოცი წლით რომ ადრე დაბადებულიყო პოეტი, ან ოცი წლით უფრო გვიან რომ გადავარდნილიყო ჩვენში ბატონყმობა, თამამად შეგვიძლია ვთქვათ, რომ რაფიელის საერო პოეზიაც დაზარხული იქნებოდა.

მესამე და მასთან საუკეთესო ხანა თავისი მოღვაწეობისა პოეზიის ასპარეზზე რაფიელმა დაიწყო ოთხმოცდამეათე წლების დასაწყისში. სანამ ის მიაგნებდა თავის ნამდვილ თემას, მას დაწერილი აქვს რამდენიმე ლექსი: „ზამთარი“, „აღდგომა“, „ბზობა“, „გაზაფხული“, „ზაფხული“ და „რთველი“. აქ ის აგვიწერს ან ყმაწვილის მარტივ ბუნებას და მის მხიარულებას, ან გლეხის მუშაობას. ყველა ეს ლექსები ხელოვნების მხრივ იმდენად საუცხოონი არიან, რომ მკითხველს ნათლად ეხატება თვალწინ როგორც მხიარული ბავშვი, რომელიც დღესასწაულს შეჰხარის, ისე მუშა, რომელიც ყმაყოფილია და ბედნიერად სახავს თავის თავს, რადგანაც ღმერთმა მოსავალი მისცა. ამ ლექსების შემდეგ რაფიელმა პირდაპირ თავის თემას მიმართა.

მესამე ხანა რაფიელის მოღვაწეობისა ჩვენ უკვე გვქონდა დახასიათებული „კვალის“ № 9-ში და ამიტომ მკითხველს იქ მივუთითებთ, როგორც იქ გვქონდა აღნიშნული, უკანასკნელი ხანის პოეზიის მნიშვნელობა მდგომარეობს გლეხის პიროვნების ამაღლებაში. ასეთ პოეზიას მნიშვნელობა ყოველთვის აქვს, რადგანაც ადამიანის გამოსარჩლება, ადამიანის პიროვნების დაცვა უდროო არასოდეს არ არის, მაგრამ ამ პოეზიის მნიშვნელობა გაცილებით მეტი იქნებოდა.

რომ ის წარმოშობილიყო მესამოცე წლებში. მეოთხმოცე წლებში თვით ცხოვრებამ აამაღლა გლეხი, და იმის ქადაგება პოეზიაში, რაც ცხოვრებამ უკვე განახორციელა, უალაგო იყო. მაგრამ მესამოცე წლების ზოგიერთ პოეტს ბედის მწერალმა დააწერა: ჰუმანური აზრები მაშინ იქადაგეთ, როდესაც თვით ცხოვრება უკვე განახორციელეს მათო, და რაფიელ ერისთავსაც ეს ბედი ხვდა. უნდა აღვნიშნოთ, დასასრულ, შემდეგი გარემოება: რაფიელს უნდოდა გლეხის ამადლება, მაგრამ იმ დროს, როდესაც მან ამგვარი ქადაგება დაიწყო, საჭირო იყო სხვა საშუალება, ვიდრე გლეხის სულისა და გულის გადმოშლა მკითხველისათვის. იმის მაგიერ, რომ გლეხისათვის გადაეშალა მისი ცხოვრება და მდგომარეობა და ამით აღეძრა მის არსებაში სიყვარული და მისწრაფება უკეთესი მომავლისაკენ, რაფიელი თითქოს განგებ ცდილობდა ასეთი მისწრაფების ჩასშობას გლეხში. ყოველგვარი უბედურების მორჩილად ატანა, სრული აპათია, უმოძრაობა, ერთი სიტყვით, უკიდურესი კონსერვატიზმი ცხოვრებაში, აი, რას ასწავლიდა რაფიელი თავის საყვარელ გლეხს. როდესაც უქადაგებდა: იყავ კმაყოფილი მით, რაცა გაქვს, და ბედნიერი იქნებიო. ასეთი აზრების ქადაგება ერის იმ ნაწილისათვის, რომელიც ყველაზე უფრო იტანჯება სოციალურ უსამართლობათა გამო, მომაკვდინებელ შეცდომად უნდა ჩაითვალოს. მაგრამ რაფიელის ასეთ აზრებს ზიანი არ ჰქონდათ გათვალისწინებულნი: მას სულითა და გულით უნდოდა, გლეხისათვის სარგებლობა მოეტანა ყოველი თავისი სიტყვით, და თუ ხანდახან ცდებოდა, ამის ერთადერთი მიზეზი იმაში მდგომარეობს, რომ რაფიელს ცხოვრების განვითარების ფილოსოფია არა ჰქონდა შეგნებულნი არც თეორიულად, არც პრაქტიკულად; მას უნდოდა გლეხისათვის გულის სიმაგრე და სულის სიძლიერე შეემატა ყოველგვარი უბედურების ასატანად. რაფიელის შეცდომანი ნათლად გვიმტკიცებენ, რომ პოეტი, რა ნიჭისაც უნდა იყოს ის, გაფაციცებით უნდა უკვირდებოდეს ცხოვრებას, არჩევდეს მასში კარგსა და ავს და აწმყოს ელემენტებში მომავლის ამოცნობას ცდილობდეს, უამისოდ მის მოღვაწეობას არ ექნება გზის მაჩვენებელი იდეალი.

## რაფიელ ერისთავი როგორც საერო პოეტი

მესამე და მასთან საუკეთესო ხანა თავისი მოღვაწეობისა პოეზიის ასპარეზზე რაფიელმა დაიწყო ლექსით „სამშობლო ხევსურისა“. ამ ლექსს ჩვენს საზოგადოებაში, როგორც განათლებულ ნაწილში, ისე გაუნათლებელ ხალხში, დიდი სახელი აქვს მოხვეჭილი. შემუშვადარად შეიძლება ვთქვათ, რომ საზოგადოება რაფიელს ყველაზე უფრო ამ ლექსით აფასებს. „სამშობლო ხევსურისა“ ღირსიც არის ასეთი სახელისა და გავრცელების, და აშკარად მოწმობს ავტორის ძლიერ ნიჭს ამ სფეროში, რომელსაც მან ასე გვიან მიაგნო, ხოლო რა არის ამ ლექსში მიმზიდველი, რა ხიბლავს მასში მკითხველს ასე უზომოდ, ეს ძალიან ბევრს ნათლად არა აქვს წარმოდგენილი. 1895 წელს, რაფიელის ორმოცდაათი წლის იუბილეს დროს, „ივერია“ და „მოამბე“ (ბ-ნი გრ. ყიფშიძე) ამ ლექსის სიდიადეს „ტიპიური ხეუსურის“ ცხოველ სურათსა და მის კემშარიტ ფსიქოლოგიას მიაწერდა.<sup>1</sup>

რაფიელი ამ ლექსში ისე ცოცხლად და ისე ძლიერად გვიხატავს მთიულის სიყვარულს სამშობლოსადმი, რომ თავის გრძნობასა და სიყვარულს მთიული შეუმჩნეველად ჩვენც გამოგვცემს. როდესაც კითხულობთ ამ ლექსს, თვალწინ ცოცხლად გეხატებათ მთიული, რომელიც ძლიერ სიყვარულს მიუჯაჭვავს საღ კლდეებზე, სადაც მას შავი სიკვდილი უჯობს სხვაგან სიცოცხლესა და ლაღობას; მიჩერებინართ ამ მთიულს, პირველად თითქოს გულიც მოგდით მასზე, ასე ვიწროდ რომ წარმოუდგენია სამშობლო, მაგრამ მისი გულწრფელობა გულს გიღობთ, მისი უზომო სიყვარული სამშობლოსადმი გხიბლავთ, უკვირდებით მისი ძლიერი გრძნობის ჩქეფას, დავიწყებას ეძლევით, გიცოცხლდებით თვალწინ ის კუთხე, რომელთანაც შეკავშირებულია თქვენი დაბადება, გაზრდა, სიყმაწვილე, იღვიძებს თქვენს გულში სიყვარული, იზრდება, იშლება და გარშემო ეფინება

<sup>1</sup> იხ. „მოამბე“, 1895 წ., № 9 გვ. 91.

მთიულის ვიწრო სამშობლოს კი არა, არამედ მთელს სამშობლოს, როგორც თქვენ გაქვთ წარმოდგენილი და აღტაცებული მზადა ხართ ბანი მისცეთ ხევისურს:

არ გავცელი მე ჩემ სამშობლოს  
სხვა ქვეყნის სამოთხეზე!

„სამშობლო ხევისურისაში“ მთიულის გრძნობა და სიყვარული სამშობლოსა გადამდებია: ყოველი ქართველისათვის და ამ ლექსის ღირსება-მნიშვნელობაც სწორედ ამაში მდგომარეობს. ჩვენი პოეტების უმეტესობა პატრიოტული ლექსებით მხოლოდ გვაოცებს წარსულ გმირთა სიმამაცითა და თავდადებით და გვარბიებს: აი, როგორ უნდა სამშობლოს სიყვარულით. რაფიელი კი არც არაფრით გვაოცებს, არც დარიგებას გვიკითხავს, — მას უკეთესი საშუალება აქვს: ის აღგვიძრავს გულში ძლიერ სიყვარულს სამშობლოსადმი.

საზოგადოებრივი ცხოვრება, მისი მსვლელობა, მისი კანონები რაფიელის ყურადღებას როგორღაც არ იქცევდა; ამ მხრივ პოეტი სრული მსგავსებაა თავისი გლეხის, რომელიც კმაყოფილია არსებულით და, თუ უბედურება რამ ეწვია, მაშინაც კი ღმერთს ემადლიერება. ამიტომ თუ მის პოეზიას უკანასკნელი და მასთან მძლავრი ხმა გლეხმა გამოაღებია, იმ გლეხმა, რომელსაც პოეტი აქამდე ყურადღებას არ აქცევდა, რაფიელიც მხოლოდ გლეხს უმღერის და მის ინდივიდუალურ ცხოვრებას. ამ მხრივ დიდი განსხვავებაა რაფიელსა და სხვა ჩვენს მწერალებს შორის. შეადარეთ მისი გლეხი ილია ჭავჭავაძის, ნინოშვილის და სხვ. გლეხს. მათ სახეში ჰყავდათ გლეხი — წევრი საზოგადოებისა; ესენი გვიხატავენ გლეხს იმ სოციალურ წრეში. რომელიც მას გარს არტყია, იმ ფიქრებს, რომლებსაც მასში ეს ცხოვრება იწვევს. რაფიელი კი ყურადღებას არ აქცევს იმ სოციალურ პირობებს, რომლებშიაც გლეხი ტრიალებს; მას სახეში ჰყავს მხოლოდ გლეხი მიწის მუშა. მაგალ., ნინოშვილის გლეხი ცხოვრებას ებრძვის და ამ ბრძოლის დროს არათუ ხშირად სრულებით აეყრება ხოლმე გული ცხოვრებაზე და სიცოცხლე ბეზრდება, ღვთის გამოცა კი წამოცდება ხოლმე ხანდახან. რაფიელის გლეხი კი მხოლოდ, —

ებრძვის შავს მიწას ღლითიღლე.  
ჯაფისაგან მოქანცულია.

რა უბედურებაც უნდა დაატყდეს მას თავზე, გული არასოდეს არ უტყდება, სიცოცხლე არ მოსძულდება და ღვთის საყვედურს ვერ ათქმევინებთ.

მე დედამიწის მებრძოლი  
გლეხი ვარ, გლეხად შობილი.

არა ვარ ღვთის მომღურავი,  
არა ვარ გულჩათხრობილი.

რაფიელის გლეხის უდიდესი უბედურება გვალვა და სეტყვაა, მაგრამ ასეთი უბედურების დროსაც ის ღვთის მადლიერია:

როცა მლალატობს მზე-წვიმა და მომიცდება ყანები,  
უფლის ნებაა, რა ვუყო, მე იმას ვეთაყვანები!..

რაფიელის გლეხს მთელი თავისი ბედ-იღბალი ოფლით ჩაუწუ-  
რია დედამიწაში; მიზანი მისი ცხოვრებისა შრომაა და როგორი  
შრომა, — „ყამირის გადაშავება!“ ასეთი შრომის გარეშე მას თავი-  
სი თავი და ცხოვრება ვერ წარმოუდგენია. მთელი მისი ცხოვრება  
ოთხ სიტყვაში: გაზაფხული, ზაფხული, შემოდგომა, ზამთარში არის  
გამოხატული: გაზაფხულიდან მოკიდებული ის იწყებს მიწასთან  
ბრძოლას, ამყობს თავისი შრომით და, როდესაც თავისი შრომის ნა-  
ყოფს ხედავს, სრული ბედნიერია. მის უბედურებასა და ბედნიერე-  
ბას, მწუხარებასა და მხიარულებას არავითარი კავშირი არა აქვს სა-  
ზოგადო მწუხარებასა და მხიარულებასთან და საზოგადო მიზეზებ-  
თან. მაშინ, როდესაც თუნდ ილ. ჭავჭავაძის გლეხის ფიქრი და მწუ-  
ხარება საზოგადო ფიქრი და მწუხარებაა, ცხოვრების პირობების  
მიერ აღძრული და გამოწვეული, რაფიელის გლეხის მხიარულება და  
მწუხარება მხოლოდ მისი საკუთარი, ინდივიდუალურია, ისეთი მიზე-  
ზებით გამოწვეული, როგორც ხარის სიკვდილი ან სეტყვისაგან ყა-  
ნის წახდენაა. მისი სიცოცხლე მიწის ჩიჩქნაში გამოიხატება და ამი-  
ტომ მას ყოველისფერი უყვარს, რაც კი ამ შრომაში ეხმარება; რა  
ღრმა, უზომო, ძლიერი, სწორედ მეგობრული სიყვარული და მასთან  
უნუგემო სევდა გამოიხატება თანდილას სიტყვებში:

შენი კირიმე, ვიშერავ!.. კირიმე შენი ქედისა...  
მომცილდი, მომკალ, ბეჩავი, — მწვეარი ჩემის ბედისა!..

რა უბედურებაშიაც უნდა ჩავარდეს ის, გულგატეხილი არასო-  
დეს არ არის ცხოვრებაში, ის გლეხად დაბადა უფალმა, შრომისაგან  
ოფლშია გაწურული; მაგრამ არათუ გული არ გასტეხია, კიდევ „ამა-  
ყობს, რომ აქვს ბევრი ნამკალი“.

რაფიელს უყვარს თავისი გლეხი, რომელსაც, —

ხვითქი გადასდის გულგაღელილსა  
და ახალუხიე არ მოსდევს შშრალი,  
თავზე წაუკრავს ნარმის ნახევი... და სხვ.

ღრმა და წრფელი სიყვარულით აგვიწერს მის „დაკორძებულ  
ხელებს“, „დაწყლულებულ ფეხებს“, „გადაღელილ მკერდს“, „აქე-

ცებულ კისერს“ და ასეთი გლეხი არათუ არ მიაჩნია მას საცოდავ, უბედურ შესაბრალოს და დაბეჩავებულ არსებად, არამედ თითქოს კიდევ შენატრის მას, რადგანაც მასში ბედნიერ არსებას ჰხედავს: რაფიელის თვალში ბედნიერება — „ეს არს კმაყოფილება მასზედ, რაც კაცს ჰქონია“, და მისი გლეხი ხომ ყოველთვის კმაყოფილია მით, რაც აქვს. ამ გლეხის ხატვაში რაფიელის ნიჭი იმდენად ძლიერია, რომ მკითხველს სრული ილუზია ეძლევა, მას თვალწინ ცოცხლად ეხატება გლეხი — მიწის მუშა და პოეტთან ერთად სიყვარულითა და პატივისცემით იმსკვალება ამ „გუთნითა და ნამგლით მებრძოლისადმი“. ამგვარად, იმ ლექსების მნიშვნელობა, რომლებშიაც რაფიელმა თავისი ნიჭი გამოააშკარავა, მხოლოდ გლეხის პიროვნების ამალღებაში მდგომარეობს; პოეტმა გააცნო ეს გლეხი საზოგადოებას და დაანახვა, რომ ისიც ჩვეულებრივი ადამიანია, რომ მასაც აქვს სული და გული.

1901 წ.

## ჩვენი საზოგადოებრივი ცხოვრება გუშინ და დღეს

### 1

საქართველო მეცხრამეტე საუკუნის პირველ ნახევარში ცხოვრობდა თავისი საკუთარი ცხოვრებით. სხვა მას არაფერი არ აინტერესებდა, — სხვა სახელმწიფოთა ცხოვრებაში ის არავითარ მონაწილეობას არ იღებდა. ქართველობა იყოფოდა ორ დიდ წოდებად: თავადაზნაურობად და გლეხობად. პირველიც და მეორეც სოფლად ცხოვრობდა. — სოფელი ჩვენი ცხოვრების დედაბოძი იყო. გლეხობა მისდევდა ხვნა-თესვას და მწყემსობას და თავისი შრომით არჩენდა თავადაზნაურობას და სამღვდელოებას; ამ უკანასკნელთაგან ყველაზე უკეთეს მდგომარეობაში იყო თავადობა, აზნაურობა და სამღვდელოება მისი მორჩილი მსღებელი იყო. მთელი აღებ-მიცემობა სომხების და ებრაელების ხელში იყო. გლეხების ცხოვრება მეცხრამეტე საუკუნის პირველ ნახევარში თითქმის არ შეცვლილა, თუ ცვლილებად არ მივიღებთ იმ გარემოებას, რომ წარსულთან შედარებით მან მეტი მყუდროება და მეტი მშვიდობიანობა მოიპოვა; წინათ მის კეთილდღეობას შეუჩიერებლად უთხრიდნენ ძირს როგორც გარეული მტრები, ისე შინაური, ეხლა კი მას ბატონის მეტი აღარაფერ სწოვდა სისხლს. საქართველოს პოლიტიკურად სიკვდილს გლეხობა ინდიფერენტულად შეხვდა: ის ყოველთვის უსამართლობის მსხვერპლი იყო, და ვინც უნდა ყოფილიყო საქართველოს ტახტზე, როგორც უნდა ყოფილიყო მთავრობა, გლეხობა წარსულის მოგონებით იმდენად გულგატეხილი იყო, რომ სამართლიანობას აღარავისაგან აღარ მოელოდა; ის შერიგებოდა თავის მწარე ხვედრს და მშვიდად ეწეოდა მძიმე ჭაპანს, მხოლოდ ხანდახან თუ აჯანყდებოდა ხოლმე, ამას რაიმე წარსული ბედნიერების მოგონება კი არ აიძულებდა, არამედ უსამართლობის ნამეტანი სიმწვავე. მეცხრამეტე საუკუნეს თავადაზნაურობა სულ სხვა გულით დაუხვდა; წარსულის გამოთხოვებამ მას საშინლად დასწვა გული, რადგანაც წარსულს ბევრი რამ გაყვა ისეთი, რის მაგიერიც აწმყოს არაფერი მოუტანია. ამის

უკეთ გასათვალისწინებლად საჭიროა გავიხსენოთ, როგორი იყო თავადის მდგომარეობა მეცხრამეტე საუკუნემდე. როგორ შეიცვალა ის მეცხრამეტე საუკუნეში. წინათ მას გარშემო ეხვია ურიცხვი ყმები, რომელთა სულისა და ხორცის ერთადერთი პატრონი თვითონ ის თავადი იყო, ყველა, ვინც გარშემო ეხვია, მას თვალწარბში შეჩერებოდა და მისი ყოველგვარი ჟინის ასასრულებლად მზად იყო. ერთადერთი მოსამართლე თავის სოფელში ის იყო და იქ ყველას ბედობა მხოლოდ ის წყვეტდა. თუ სამშობლოს მტერი შემოესეოდა, მეფე მას თხოვდა, შენი კაცებით მომეშველეო; ის მეფის მარჯვენა ხელი იყო, ქვეყნის მართვა-გამგეობაში მონაწილეობდა; სასახლის კარი მისთვის მუდამ ღია იყო, — მეფის სახლში თითქმის მეფის ტოლად გრძნობდა თავს, თავის სახლში — განუსაზღვრელ ბატონად. მეცხრამეტე საუკუნის დამდეგიდან თავადის ამგვარი მდგომარეობა სრულიად შეიცვალა. სამშობლოს მართვა-გამგეობაში მას ყოველგვარი მნიშვნელობა ჩამოართვეს, მეფე და მისი სასახლე ახლოსაც არავინ დაანახვია; თავის სოფელშიაც მას ბატონი გაუჩნდა, რომელიც ზოგიერთ მის მოქმედებაში ანგარიშს თხოვდა მას. თავადის თვითნებობას, თავისუფალ მოქმედებას ყოველის მხრით ფრთები შეეკვეცა. ყოველივე ამან ის არათუ ქონებრივად დააქვეითა, შინაყმათა თვალშიც კი სახელი გაუტეხა. თავადობამ იწყო წარსულის გლოვა, მოინდომა მისი დაბრუნება, მაგრამ ცდამ ამაოდ ჩაუარა. იძულებული გახდა თავის ხვედრს შერიგებოდა და ერთმა ნაწილმა ღვინოში და ქორმეძებრებში ჰპოვა თავისი იდეალი. მეორემ კალამი აიღო ხელში და წარსულის გლოვაში მოიპოვა სულის სიმშვიდე, მესამეს სამხედრო სამსახურმა დააეწიყებინა ძველი დიდება.

ამგვარად მომდინარეობდა ჩვენი ცხოვრება მესამოცე წლებამდე;

ცხოვრება იყო მარტივი და მდორე. მწერლობა ერთფეროვანი. მხოლოდ ერთი კლასის, თავადობის. სიმპათია-იდეალების გამომხატველი. რადგანაც სამხედრო სამსახურმა და ჩინოვნიკობამ შემოდგა ჩვენში ფეხი და ორივეს დიდი მოტრფიალენი გამოუჩნდნენ ჩვენს თავადობაში, სწავლა-განათლება ნელ-ნელა აღორძინდა და თბილისში სასწავლებელიც კი დააარსა მთავრობამ კეთილშობილთათვის. ახალგაზრდობის ერთმა ნაწილმა, რომელსაც მაშინდელ დროსთან შედარებით რიგიანი განათლება მიეღო, ნელ-ნელა უკუაგდო პირადი ცხოვრების ვიწრო ფარგლები და გამოვიდა საზოგადო ასპარეზზე. მისმა მოღვაწეობამ ჩვენს ცხოვრებას სული შთაბერა და საზოგადოებრივი ცხოვრება, რომელიც თითქმის სრულებით აღარ არსებობდა, ორმოცდაათ წლებში ნელ-ნელა აღორძინდა, მაგრამ ცხოვრების



ამოძრავება შუაგულიდან, თვით ხალხიდან, კი არ დაიწყო, არამედ ზედაპირიდან — თავადაზნაურობიდან, რუსეთთან დაახლოებამ ჩვენი არისტოკრატის ცხოვრებაში ერთი ღრმა ცვლილება კიდევ შემოიტანა, რომელსაც ძალიან დიდი მნიშვნელობა ჰქონდა. ჩვენი არისტოკრატია გაეცნო ევროპული ცხოვრების გარეგან მხარეს. რაშიც მკირეოდენი შრომა არ მიუძღვის ვორონცოვს, შეუყვარდა ბალ-მასკარადები, და რადგანაც ყოველივე ეს ფულს მოითხოვდა, რაც ჩვენს არისტოკრატისას არ გააჩნდა, არისტოკრატებმა ნელ-ნელა შეტოპა ვალის მორევეში; იმ დღიდგან მოკიდებული დღევანდლამდე უფრო და უფრო ღრმად ეფლობა, ქონებრივად ის დღითიდღე უფრო ლატაკდება და მას ველარავითარი ბანკი ველარ იხსნის დალუპვისაგან. თავადაზნაურობის დალუპვის, ე. ი. საზოგადო ცხოვრებაში ყოველგვარი მნიშვნელობის დაკარგვის მიზეზი დავალიანება სრულებითაც არ არის, როგორც ბევრს ჰგონია ჩვენში; მიეციოთ მას დიდი შეძლება და მოაშორეთ ვალები, — მიუხედავად ამისა, ის მაინც ჩვენი ცხოვრების მეტბორცი იქნება, ჩვენი საზოგადოებრივი წინმსვლელობისათვის სრულიად გამოუსადეგარი; — დავალიანება, ეს მხოლოდ ერთი სიმპტომია იმ სნეულებისა, რომელიც ახალმა დრომ შესძინა ჩვენს თავადაზნაურობას და რომლის შესახებაც ქვემოთ გვექნება საუბარი.

მესამოცე წლებში ბატონყმობა გადავიარდა; ჩვენი ცხოვრების წინაშე წარსდგა ახალი დროის ჰერკულესი — თავისუფალი გლეხი, რომელმაც ჩვენს საზოგადოებრივს ცხოვრებაში ღრმა ცვლილება შემოიტანა; რაც დრო გადის, ეს ცვლილება მით უფრო იზრდება. გლეხის გაუთავისუფლებლად ჩვენს საზოგადოებრივს ცხოვრებას დიდხანს და მრავალფერად განვითარება აღარ შეეძლო. ბატონყმობა მოისპო, — ერის საწარმოო ძალა გათავისუფლდა, თავისუფალი მუშა წარსდგა ცხოვრების წინაშე და გამოუცხადა: სანამ ეს ხელები შებორკილი მქონდა. მხოლოდ აქამდე შევიძელი შენი ზიდვა, რაკი ხელები გავითავისუფლე, მევე წავიღებ წინ და მეც შენთან ერთად დავწინაურდებო. მაგრამ ჩვენი ცხოვრების წინმსვლელობის მიზეზი მარტო თავისუფალი მუშა არ არის, არამედ თავისუფალი კაპიტალიც. ბატონყმობის გადავიარდნამ გათავისუფლებული გლეხი ზოგი სრულიად უმიწაწყლოთ დატოვა, ზოგს ძალიან ცოტა მიწა არგუნა; თავადაზნაურობამ კი ამ ცვლილებით ფული შეიძინა, რაც მას დიდხანს არ შერჩენია ხელში. ამგვარად, თავისუფალი შრომის წარმომადგენელი პირველ ხანებში გლეხი იყო მხოლოდ. მისვლა-მოსვლა ჩვენში ნელ-ნელა გაუმჯობესდა, მალე რკინიგზაც გაიხსნა, და საქართველოს სიმდიდრემ ჩვენში ნელ-ნელა მოიტყუა უცხო კაპი-

ტალი; უცხო ტომის კაპიტალს გვერდში ამოუდგა ის თავისუფალი კაპიტალიც, რომელიც საქართველოში იმყოფებოდა და რომელიც თითქმის სულ სომხების ხელში იყო, მაგრამ კაპიტალი უძღური იყო, თუ მას თან არ ექნებოდა სამუშაო ძალა და ამას ხომ თავისუფალი გლეხი აწვდიდა მას, — საქართველოში ნელ-ნელა დაიწყო კაპიტალისტური წარმოება. როგორ შეხება ამ მოვლენას ჩვენი ერის სხვადასხვა ნაწილმა? სანამ ამას განვიხილავდეთ, საჭიროა, პატარა ხანს უკან დავბრუნდეთ და გავიგოთ, რა გრძნობანი აუშალა ქართველ ერს ბატონყმობის გადავარდნამ, რა ცვლილება მოახდინა ერის აზროვნებაში განთავისუფლებულმა გლეხმა პირველ ხანებში? გლეხმა შეიძინა ადამიანური ღირსება და ამიტომ სიხარულით მიეგება თავის გათავისუფლებას, მაგრამ ასე ვერ შეხვდებოდა ამას თავად-აზნაურობა. ისეთი მოწინავე პირიცი კი, როგორც ვახ. ორბელიანი იყო, რომელსაც სამშობლოს სიყვარული ძილშიც კი მოსვენებას არ აძლევდა, „დავლუპეთ-ის“ ჩივილით მიეგება სამშობლოს ასეთ იშვიათ დღესასწაულს!

როდესაც ტბაში ქვას გადაისვრით, წყალი ატოკდება და გააობილი ალაგის გარშემო პატარა ტალღები ზედიზედ იწყებენ ნაპირისაკენ ქიანს. სწორედ ამგვარად აატოკა ჩვენი მდორე ცხოვრება ყმის გათავისუფლებამ: ერთფეროვანი ცხოვრება ნელ-ნელა გამრავალფერდა; ერთფეროვანი აზროვნება მყისვე დაირღვა: მოწინავე პირნი ორ ნაწილად გაიყვნენ, — პირველმა ნაწილმა თავადურის მფარველობით გადმოხედა მალლიდან გლეხს და მისი მასწავლებლობა, მისი აღზრდა მოინდომა, პრაქტიკული მოღვაწეობისათვის კი მას თავდაპირველად არავითარი პროგრამა არ გააჩნდა და ვერც ხედავდა ასეთი პროგრამის საჭიროებას; სულითა და გულით ის არისტოკრატიას ეკუთვნოდა, მისი მომხრე იყო და მისი ერთადერთი სურვილი ჩვენი საზოგადოებრივი ცხოვრების შესახებ ის იყო, რომ თავადაზნაურობას თავისი უპირატესობა შერჩენოდა ცხოვრებაში, თავისუფალი გლეხი ყოფილიყო მშვიდი, წყნარი, მიწის ერთგული მუშა და ძველი ნაბატონარის მოწინავე პატივისმცემელი და მორჩილი; ამ ნაწილს ჩვენი მოწინავე პირებისას ბატონყმური წყობილება ჩვენი საზოგადოებრივი ცხოვრების ერთადერთ და სამარადისო ფორმად მიაჩნდა; ამ ფორმის დარღვევა მის თვალში შეუძლებელიც იყო, არასასურველიც; ერთი სიტყვით, ეს ნაწილი გახდა არისტოკრატიის იდეოლოგი. მეორე ნაწილი ჩვენი მოწინავე პირებისა სულ ახალგაზრდებისაგან შედგებოდა და გამსჭვალული იყო დემოკრატიული-ბერალური აზრებით. ჩვენი ქვეყნის გაძლიერებას ის ხედავდა სწავლა-განათლებისა და ვაჭრობა-მრეწველობის აღორძინებაში, ბატონ-

ყმურ წყობილებას უარყოფდა. იურიდიულ კლასებს არავითარ მნიშვნელობას აღარ აძლევდა, მიუთითებდა ერს დასავლეთ ევროპისაკენ; მაგრამ მას ნათლად არ ჰქონდა მოღვაწეობის პირველ ხანებში გარკვეული, თუ ევროპის კულტურის გადმონერგვა ცხოვრებაში, თვით ერის გულში, რა ცვლილებას მოახდენდა, ამის უმთავრესი მიზეზი თვით ცხოვრების გამოურკვეველობა იყო: ბატონყმური წყობილება იშლებოდა, ახალი ისახებოდა და ასეთ პირობებში ნათლად გარკვეული, კონკრეტული პროგრამის შემუშავება ძნელი იყო, მეოთხმოცე წლებიდან ჩვენი ცხოვრების ტენდენცია თანდათან გამოირკვა, მეოთხმოცდაათე წლებში საწარმოო ძალთა განვითარებამ ისეთი ცვლილება მოახდინა, რომ ექვს გარეშე იყო, ჩვენს ცხოვრებაში კაპიტალისტურმა წარმოებამ შემოდგა ფეხი და ჩვენი ერის განკერძოებული ცხოვრება მთელი ევროპის ცხოვრებას დაუკავშირა. თავისი საკუთარი გემოვნება რომ არავის არ ეხმარა სათვალედ ჩვენი ცხოვრების დაკვირვებაში, ამ აშკარა მოვლენას ყველა აზრისა და მიმართულების პირნი ერთნაირად და ერთ დროს დაინახავდნენ, მაგრამ ეს ნამდვილად არ მოხდა. როგორც ზემოთ აღვნიშნეთ, თავისუფალი გლეხის ცხოვრებაში გასვლამ ჩვენი მოწინავე თაობა ორ ნაწილად გაყო: პირველი ჩვენი ცხოვრების წყობილებაში არავითარ ძირითად ცვლილებას არ მოელოდა და არც უნდოდა ამ მხრივ რაიმე ცვლილება; ნატურალური წარმოება, მასზე დამკვიდრებული იურიდიული კლასები ჩვენი ცხოვრების აღფად და ომეგად აღიარა და ამით ცხოვრების დაკვირვებისათვის თვითონვე წინააღმდეგობა დაიბრძოდა თვალეში. მეორე ნაწილი კი მოელოდა ცვლილებას, მას სურდა ეს ცვლილება, რადგანაც ნატურალური წარმოება და მასზე აღმოცენებული საზოგადოებრივი წყობილება ჩვენი საზოგადოებრივი განვითარების უკვე მოძველებულ საფეხურად მიაჩნდა; ის შეჰხაროდა ახალ საფეხურს და ამიტომ გაფაციცებით ადევნებდა. თვალყურს ჩვენი ცხოვრების ყოველგვარ მოძრაობას, ყოველგვარ მოვლენას. მან უკვე მეოთხმოცე წლებში შეამჩნია ევროპული ცხოვრების ნიშნობრივი ელემენტები ჩვენში და მისმა მომდევნო და მისი მიმართულებისა და დაკვირვების გამგრძობმა ახალთაობამ მეოთხმოცდაათე წლებში ხმამაღლა აღიარა: ჩვენი საზოგადოებრივი ცხოვრების ძველი ფორმა იშლება და მის ალაგს იჭერს ახალიო. აქედან თავისთავად ცხადია პასუხი ზემოთდამსულ კითხვაზე, თუ როგორ შეხვდა კაპიტალიზმის აღორძინებას ჩვენს ცხოვრებაში ჩვენი ერის სხვადასხვა ნაწილი; ჩვენი მოწინავე თაობის მეორე ნაწილი უარყოფდა ბატონყმურ წყობილებას, დარწმუნებული იყო, რომ მხოლოდ კაპიტალიზმს შეეძლო ჩვენი ერის გამოყვანა წინმსვლელობის გზაზე და ამიტომ, თუმცა გათვა-

ლისწინებული ჰქონდა კაპიტალიზმის ცუდი მხარეები, მაინც უკეთესი მომავლის იმედით გამხსნევებული მიეგება მას. პირველი ნაწილი კი მოტრფიალე იყო ბატონყმური ურთიერთობის, ის არისტოკრატიის იდეოლოგი იყო და იურიდიული კლასების სამართლისოდ შერჩენის მომხრე; კაპიტალიზმი კი ყოველივე ამას უარყოფდა და ანადგურებდა. ამიტომ ჩვენი მოწინავე თაობის ამ ნაწილმა სასოწარკვეთილების თვალთ შეხედა კაპიტალიზმს.

წინა წერილში ჩვენ დავინახეთ, თუ როგორ მიეგება ჩვენი მოწინავე თაობის სხვადასხვა ნაწილი — პროგრესული და კონსერვატული — კაპიტალიზმის აღორძინებას ჩვენში. ახლა საჭიროა განვიხილოთ, რა ცვლილება გამოიწვია უკვე კაპიტალიზმმა ჩვენს ცხოვრებაში, ერთი მხრით, და მეორე მხრით, ჩვენს აზროვნებაში.

კაპიტალიზმისათვის ორი აუცილებელი პირობა არის საჭირო: ერთი მხრით, თავისუფალი კაპიტალი, მეორე მხრით, თავისუფალი სამუშაო ძალა. კაპიტალიზმის აღორძინების პირველ ხანებში ჩვენ ერს ჰქონდა მხოლოდ თავისუფალი სამუშაო ძალა, კაპიტალი კი მას არ გააჩნდა და ამიტომ ჩვენ სამუშაო ძალას უცხო ტომთა კაპიტალი ამოუღდა გვერდში: ამგვარად, კაპიტალიზმს პირველ ხანებში წინ ეწეოდნენ სხვისი ფული და ჩვენი შრომა. ამ ფაქტს როგორც კაპიტალიზმის განვითარებისათვის, ისე ჩვენი ცხოვრებისათვის ძალიან დიდი მნიშვნელობა ჰქონდა, მაგრამ მიუხედავად ამისა, ჩვენს მწერლობას ამისათვის არავითარი ყურადღება არ მიუქცევია. უცხო კაპიტალმა 1) გამოაღებია ჩვენი ერის სამუშაო ძალას მეტი ნაყოფი, ე. ი. ჩვენი ერის ერთ ნაწილს ლუკმა პური გაუჩინა, 2) მან გაანაყოფიერა და გაამრავალმხრივა ჩვენი ერის შრომა, ე. ი. გაზარდა ჩვენი ერის საწარმოო ძალა. 3) მან გააფართოვა ჩვენი ერის მოთხოვნილებანი და ამით გააგანძიერა ჩვენი ერის გონებრივი პორიზონტი, 4) მან დააჩქარა ქართული კაპიტალის წარმოშობა და ყოველივე ამით ხელი შეუწყო, ერთი მხრით, კაპიტალიზმის განვითარებას ჩვენში, მეორე მხრით, ჩვენი ერის იდეურად გაერთიანებას, სარგებლობასთან ერთად უცხო კაპიტალმა ჩვენს ერს დიდი ზარალი მოუტანა და დღესაც მოაქვს მით. რომ ჩვენს მდიდარ სუფრაზე ჯერჯერობით ნამცეცების მეტს არას გვანებებს. — ეს აშკარაა, მაგრამ მარტო ზარალის დანახვა და სარგებლობის უარყოფა, როგორც ამას ბევრი შვრება ჩვენში, ისეთივე შეცდომა არის, როგორც მარტო სარგებლობის დანახვა და ზარალის დამალვა... ნელ-ნელა დაიბადა ქართული კაპიტალიც. ჯერ კიდევ სუსტი ნაბიჯით შემოდგა მან ფეხი ჩვენი ცხოვრების ასპარეზზე, მაგრამ, რაც დრო გადის, ქართული კაპიტალი ჩვენს თვალწინ იზრდება და ვითარდება და, თუ სარგებელით ვერ განდევ-

ნის უცხო კაპიტალს, მძლავრად მაინც ამოუდგება მას გვერდში და თავს აღარ დააჩაგვრინებს. კაპიტალიზმმა ერთმანეთს დაუახლოვა ჩვენი ერის სხვადასხვა ნაწილი და მათი ეროვნული თვითცნობიერება განავითარა, მან ერთმანეთისათვის საჭირო გახადა ჩვენი ქვეყნის სხვადასხვა კუთხეები: ერთი კუთხის მცხოვრები იძულებული გახდა, მეორე კუთხეში გადავიდეს, ერთ კუთხეს ჭირდება მეორე კუთხის სხვადასხვა ნაწარმოები და ყოველივე ამან კი გამოიწვია ქართველობის გაერთიანება; მართალია, ეს პროცესი ჯერ არ დამთავრებულა, ეს ახლო მომავალს ეკუთვნის. ამგვარად, ის, რაც ვერ შეძლო მთელმა წინა თაობებმა ხანგრძლივი დროის მანძილზე, შესძლო და მოახერხა კაპიტალიზმმა სულ რამდენიმე ათეული წლის განმავლობაში. ქართული კაპიტალიზმის აღორძინებამ ჩვენი ერის სხვადასხვა ნაწილს შუა ხაზი გაავლო და, რაც დრო გადის, ეს ხაზი თანდათან ღრმავდება: ერთ მხარეზე გროვდება ფულის პატრონი, მეორეზე მხოლოდ სამუშაო ძალის პატრონი; პირველია შრომის მყიდველი — ბურჟუაზია, მეორე შრომის გამყიდველი — მშრომელი ხალხი. პირველის როლი ცხოვრებაში სხვა არის, მეორისა სხვა; რასაც ქვემოთ გამოვარკვევთ, და ამიტომ ეს არ არის ერის დაყოფა მდიდრებად და ღარიბებად, — მდიდრები და ღარიბები ყოველ დროს იყვნენ: — ეს არის ჩვენის ერის სოციალურ კლასებად დაყოფა ეკონომიურ ნიადაგზე. ამგვარად, კაპიტალიზმმა ქართველობა გააერთიანა ეროვნულ ნიადაგზე, ხოლო დაყო ეკონომიურ ნიადაგზე.

სოციალური კლასების აღორძინებამ ჩვენ ცხოვრებაში აშკარად დაანახვა ყველას, რომ ჩვენში სამუდამოდ ირღვევა ბატონყმური წყობილება და მის ალაგს იჭერს ახალი, კაპიტალისტური ანუ ბურჟუაზიული. ეს ახალი წყობილება კი ცოცხს უსვამს ფეოდალურ არისტოკრატიას და მის ალაგას აყენებს ფულის არისტოკრატიას. კაპიტალი მეტად ტექნიკურად ეპყრობა შთამომავლობას და გვარიშვილობას, — მას არც ერთი ეს არა წამს; მისთვის არსებობს მხოლოდ მდიდარი და ღარიბი, ფულიანი და უფულო; ვის ხელშია ც ფულია, მისი მფარველიც ის არის, გინდა თავადი იყოს, გინდა გუშინდელი მონა. თავადაზნაურობა ძველის წყობილების ნაანდერძე სახეს ჰკარგავს. ახალი პირობების მიხედვით იცვლება და სოციალური კლასების შემადგენელ ნაწილებად ხდება: ერთი მხრით, ბურჟუაზია რიცხვში გადადის, მეორე მხრით, პროლეტარათა რიცხვში. ჩვენი ცხოვრება აშკარად გვიჩვენებს, რომ ჩვენი თავადაზნაურობის უმეტესობა პროლეტარათა კლასში გადადის.

ჩვენი ფეოდალური არისტოკრატის დაღუპვის აუცილებელი მიზეზიც სწორედ ამაში მდგომარეობს და არა მის დავალიანებაში,

ან სხვა რაიმე წვრილმან გარემოებაში; ცხოვრების ძველი წყობილება მიდის და მას უკან უნდა გაყვეს მისი პირმშო — ფეოდალური არისტოკრატია.

ზემოთნალაპარაკევიდან გამოირკვა ერთი გარემოება: კაპიტალიზმის აღორძინების პირველ ხანებში შრომის წარმომადგენელი მხოლოდ ჩვენი გლეხობა იყო, დღეს კი გვერდში ამოუდგა აზნაური და მას მალე მიყვება თავადიც; ეს საუკეთესო მაგალითია იმისა, თუ რამდენად არღვევს ძველ ურთიერთობას წარმოების ახალი ხანა. კაპიტალიზმის აღორძინებასთან ერთად ჩვენი ქვეყანა ეკონომიურად დაუეკავშირდა ევროპას, ეს კავშირი ჩვენ ფსიქოლოგიაში შესაფერცვლილებას ახდენს და ამგვარად ჩვენი ერის შინაგანი ცხოვრება როგორც მატერიალურად, ისე სულიერად ევროპის ცხოვრებას ემსგავსება. ცხოვრების ახალმა პირობებმა გაართულეს საზოგადოებრივი დამოკიდებულებანი და ურთიერთობა და ამას თან მოჰყვა, აუცილებლად, სულიერი წარმატებაც. ამგვარია ჩვენი ცხოვრება დღეს. თუ ცხოვრება შეიცვალა, მას შესაფერი ცვლილება უნდა გამოეწვია ქართველი ერის აზროვნებაში და ასეც მოხდა. ჩვენი ერის ყოველი წოდების რწმენა და შესედულებანი ბატონყმურ წყობილებაზე ზედგამოჭრილი იყო; როგორც თვით ცხოვრება იყო გარკვეული სახის, ისე ერის აზრიც გამორკვეული და დამკვიდრებული იყო; მაგრამ ატოკდა თუ არა ცხოვრება, შეირყა თვით აზროვნებაც და დამკვიდრებულ რწმენა-შეხედულებათა ალაგას ყოყმანმა, სათუბამ და იქვმა იჩინა თავი; ასეთი ქაოსიდან დღეს თანდათან ირკვევა ხალხის გონებაში დროის შესაფერი ახალი შეხედულებანი, რომელნიც ცხადად იქერენ ძველის ალაგს როგორც ოჯახში, ისე გარეთ, როგორც მამამშვილურ დამოკიდებულებაში, ისე ცოლქმრულ ურთიერთობაში და სხვ. ყოველივე ეს საუცხოოდ არის აღბეჭდილი ჩვენს თანამედროვე ბელეტრისტიკაში და ამიტომ მეც აღარ გამოვუდგები ამ მოვლენის უფრო ვრცლად განხილვას. ამჟამად უფრო საყურადღებოა იმ ცვლილების განხილვა, რომელიც მოხდა და დღესაც ხდება ჩვენი მოწინავე თაობის აზროვნებაში. როგორც ზემოთ დავინახეთ, მესამოცე წლებამდე ჩვენი მოწინავე თაობა ერთფეროვანი იყო; მასში ყველა ერთი მიზნით იყო გატაცებული, ყველას ერთგვარი აზრი და შეხედულებანი ჰქონდა, აქ აზრთა სხვადასხვაობა არ არსებობს. მესამოცე წლებში გლეხობის გათავისუფლებამ გაჰყო მოწინავე თაობა და წარმოშვა აზრთა სხვადასხვაობა: ერთი ნაწილი დაადგა არისტოკრატიულ-კონსერვატულ გზას, მეორე დემოკრატიულ-პროგრესულს. მეორე ცდილობდა ევროპული ცხოვრების გადმონერგვას ხამშობლო ნიადაგზე, პირველს კი ეს აზრადაც არ მოსდიოდა, არსე-

ბულით კმაყოფილი იყო და მის შენარჩუნებას მეცადინეობდა. ჩვენ დავინახეთ, როგორ შეხვდა თითოეული ეს ნაწილი კაპიტალიზმის აღორძინებას ჩვენს ცხოვრებაში. ჭეშმარიტება იმდენად ცხადი იყო, რომ დიდხანს მისი დაუნახაობა შეუძლებელი აღმოჩნდა; ჩვენი მიზნავე თაობის პირველმა ნაწილმაც დაინახა ყოველივე და სასოწარკვეთილებას მიეცა. სასოწარკვეთილების მწვავე ხანამ განვლო. არისტოკრატის იდეოლოგიები დარწმუნდნენ, რომ ჩვენი ცხოვრება შეუჩერებლად იღებდა წყობილების ახალ ფორმას და ამიტომ ლოდინი შეუძლებელი იყო, — საჭირო გახდა ახალი დროის შესაფერი სამოქმედო პროგრამა. ამ ახალი პროგრამის ძებნაში გამოაშკარავდა, ერთი მხრით, მთელი მათი უნიადაგობა, მეორე მხრით, მათი ტრაგიკული მდგომარეობა. მათ უნდოდათ საზოგადოებრივი ურთიერთობის ახალი ფორმა და ძველი ერთად შეედღულებინათ, მხოლოდ ისე, რომ უპირატესობა ფეოდალური არისტოკრატის ხელში ყოფილიყო, მათ დაუწყეს ქადაგება არისტოკრატის: ახალი დრო დადგა, ძველი ფარ-ხმალი აღარ ვარგა და სხვა იარაღია საჭიროო, ე. ი. ურჩევდნენ: ბურჟუად გადაიქცეითო! მას სურდა რომ ბატონყმური „პარმონია“ და უფროს-უმცროსობა ჩვენი ერის სხვადასხვა ნაწილს შორის არ დარღვეულიყო, და, რადგანაც ყოველივე ეს მიწათმფლობელობაზე იყო დამყარებული ბატონყმურ წყობილებაში, ამიტომ არისტოკრატის ურჩევდნენ: მამულს ხელი ჩასჭიდე, სოფლად გამაგრდი და მეურნეობა ააყვავეო. ამგვარად, რა გამოდიოდა? არისტოკრატის იდეოლოგიებს, რომლებიც არისტოკრატიულ კონსერვატულ ნაწილს შეადგენდნენ, სურდათ, რომ ჩვენი ფეოდალური არისტოკრატია ერთი ფეხით ქალაქში მდგარიყო, მეორე ფეხით სოფელში, ცალ ხელში სჭეროდა გაძლიერებული მრეწველობა, მეორეში მეურნეობა, და ამგვარად ცხოვრების სრული ბატონი ისევ ძველი არისტოკრატია ყოფილიყო. რადგანაც ყოველივე ეს ერთად შეუძლებელი იყო, შეუძლებელი იყო ახალთან ერთად იმ ძველის შენარჩუნებაც, რომელსაც ახალი უარყოფდა, შეუძლებელი იყო ახალის გადამახინჯება ძველ გემოვნებაზე ფეოდალური არისტოკრატის საამოდ და სასარგებლოდ, ამიტომ პრაქტიკული პროგრამის შემუშავების მაგიერ არისტოკრატის იდეოლოგიებს ნიადაგი გამოეცალათ და ჰაერში დაკიდებული დარჩნენ...

მეოთხმოცე წლებში ჩვენმა მოწინავე თაობამ გამოიღო პატარა შტო; ამ შტომ დაიჭირა საშუალო ალაგი არისტოკრატიულ-კონსერვატულ ნაწილსა და დემოკრატიულ-პროგრესულ ნაწილს შორის. ამ შტოს სრული დახასიათება ყოვლად შეუძლებელია, რადგანაც მას გარკვეული ფიზიონომია არ ჰქონია, მაგრამ რადგანაც მას

დიდი მსგავსება ჰქონდა პირველ ნაწილთან, მეორესთან კი არავითარი და რადგანაც მისი სიმპათია გლეხისკენ იყო. ამიტომ შვეიცოლია, ამ შტოს ვეწოდოთ კონსერვატულ-დემოკრატიული ნაწილი. ჩვენს ლიტერატურაში ეს ნაწილი ცნობილია „ტეტიათა მოტრფიალეთა“ სახელით, როგორც პირველი ნაწილი ჩვენი მოწინავე თაობისა, ისე ეს საშუალო ნაწილი წინააღმდეგი იყო კაპიტალისტური წყობილების, მისი სული და გული ჩვენებურს, ქართულს ეკუთვნოდა. ხოლო თუ პირველ ნაწილში ცხოვრების მეთაურად მხოლოდ არისტოკრატია უნდოდა, საშუალო ნაწილს სურდა. რომ ჩვენი ცხოვრება ყოფილიყო იდეური, თავადი თავადად დარჩენილიყო, გლეხი გლეხად, ხოლო ცხოვრების მართვა ისე უნდა ყოფილიყო განაწილებული თავადსა და გლეხს შორის, როგორც მამასა და შვილს შუა. ტეტიათა მოტრფიალენი ეტრფოდნენ გლეხს, მაგრამ მხოლოდ იმ გლეხს, რომელიც წარმოშობა ბატონყმობამ: მორჩილს, მშვიდს და წყნარს. მათ აზრით, ეს გლეხი შეადგენდა ჩვენი ცხოვრების გვირგვინს და სრულს უნაკლულობას, მხოლოდ ასეთ გლეხსა და თავადს შორის არსებულნი მამაშვილური კავშირი უქადდა ჩვენს ერს ბედნიერ და კულტურულ ცხოვრებას და ამიტომ დემოკრატიულ-კონსერვატული დასი ყოველგვარი ახალი წყობილების წინააღმდეგი იყო. მაგრამ ახალი წყობილება ამ დასის გემოვნების დაუკითხავად იკიდებდა ჩვენს ცხოვრებაში ფეხს, მისი ზეგავლენით გლეხი იცვლებოდა ნელ-ნელა მთელი თავისი ბუნებით, მამაშვილური კავშირი გლეხსა და თავადს შორის კი არსად ჩანდა და ამიტომ ეს დასიც სასოწარკვეთილებას მიეცა ნელ-ნელა. ამ დღიდან ეს დასი მიეკედლა ჩვენი თაობის პირველ ნაწილს, რომ მასთან ერთად ეღონა რამე ძველი წყობილების დარღვევის წინააღმდეგ და თავისი დამოუკიდებელი ფიზიონომია სავსებით დაკარგა. დღეს აქა-იქ ჩვენს საზოგადოებაში ობლად დარჩენილან თითო-ოროლა ტეტიათა მოტრფიალენი, რომელთა არსებობასაც მოგვაგონებს მხოლოდ მათი დროგამოშვებითი გლოვა ლიტერატურაში — წარსული ბატონყმური წყობილების დაკარგვის გამო და აწმყოს კრულვა. ტეტიათა მოტრფიალეობა ჩვენ ცხოვრებაში წარმოშობა, ერთი მხრით, რუსეთის „ნაროდნიკთა“ იდეების გავლენამ, მეორე მხრით, კაპიტალისტური წყობილების აღორძინებამ. ჩვენი მოწინავე თაობის პირველმა ნაწილმა ეს ცვლილება ვერ შეამჩნია, რადგანაც მას სრულებით არ მოელოდა, მეორემ კიდევ შეამჩნია და კიდევ გამოიცნო ის; საშუალო ნაწილმა კი თუმცა შეამჩნია ის, მაგრამ მისი გამოცნობა ვერ შეძლო, ამავდროს მას ჩაეწვეთა ყურში „ნაროდნიკების“ იდეები, მათი ზეგავლენით ხელი ჩასჭიდა ჩვენს ცხოვრებას და ყოველგვარი ცვლილება აღიარა.

1901 წ.



## 1900 წლის სიტყვაკაზმული მწერლობა

ჩვენი სიტყვაკაზმული მწერლობა დიდი ხანია არ ყოფილა ისე სუსტი და უნაყოფო, როგორც წარსულ წელს. ბ-ნი ს. მგალობლი-შვილის „წარსულიდან“ მთელი ორი წელიწადი იბეჭდებოდა „მოამბეში“; ამიტომ ის უფრო 1899 წელს ეკუთვნის, ვიდრე წარსულს: „ნაწარდობას“ იმდენი სახელოვნო ნაკლოვანებანი აქვს, რომ მას ის გაცვეთილი აზრიც კი ვეღარაფერს შველის, რომელიც ავტორს მისთვის სარჩულად დაუდვია. დარჩა თითქმის ერთადერთი „ქამუ-შაძის გაკვირება“. ამიტომ თუ წარსული წლის სიტყვაკაზმული მწერლობიდან მხოლოდ ისეთი ნაწარმოები აღვნიშნეთ, რომელიც ნამდვილ სახელოვნო ქმნილებას წარმოადგენს, თითქმის იგივე უნდა გავიმეორო, რაც უკვე მითქვამს მთელი წლის განმავლობაში ამა თუ იმ ნაწარმოების შესახებ; ეს კი არც ჩემთვის და არც მკითხველი-სათვის საყურადღებო არ არის. ნაწარმოებთა ღირსების განურჩევლად, ვეცდები, ერთად მოვუყარო თავი ყველა იმ კითხვასა და აზრს, რომელიც წამოაყენა წარსულ წელს ჩვენმა სიტყვაკაზმულმა ლიტერატურამ, და ამით მკითხველს დავანახვო, რას გვეუბნებოდა მთელი წლის განმავლობაში ჩვენი პოეზია, ჩვენი ცხოვრების ან ჩვენი სულიერი მდგომარეობის რა მხარეს უფრო აქცევდა ყურადღებას.

სიტყვაკაზმული მწერლობით წარსულ წელს ყველაზე ნაყოფიერი „მოამბე“ იყო. იქ დამთავრდა ს. მგალობლიშვილის ვრცელი მოთხრობის ბეჭდვა. მოთხრობა ძალიან საყურადღებოა, რადგანაც შეეხება უმთავრესად ისეთი დროის სწავლა-განათლების მდგომარეობას, რომლის შესახებაც ჩვენს მწერლობაში ძალიან ცოტა რამ თქმულა. ეს ნაწილი მოთხრობისა ცოცხლად და ოსტატურად არიბ დაწერილი. ავტორის აღწერას ჩართული აქვს იუმორი, მაგრამ თავიდან ბოლომდე ეს იუმორი იმდენად უმანკოა, რომ გულდაგულ სიცილის მეტს ვერაფერს გამოიწვევს მკითხველში. მოთხრობის ნაწილებს შორის მეტად სუსტი კავშირია. პირველ ნაწილს დანარჩენებ-

თან მხოლოდ ის კავშირი აქვს, რომ შაქრო გეგელაშვილი ედიშერის შვილიშვილია, მაგრამ რადგანაც შაქროს მთელ მოთხოვნაში სრულებით არავითარი მნიშვნელობა არა აქვს და ავტორმა მისი ვინაობა მხოლოდ იპიტომ გაგვაცნო, რომ ორმოცდაათიანი წლების სწავლა-განათლების შესახებ დაეწყო ლაპარაკი, ამიტომ პირველი ნაწილი მოთხოვნაში ზედმეტად მიგვაჩნია. მაშ, რისთვის დასჭირდა ავტორს მთელი ამ ნაწილის მიწებება? ნუთუ მას არავითარი მიზანი არა ჰქონდა? არა, ავტორს თავისი მიზანი კარგად ჰქონდა გამორკვეული, როდესაც პირველ ნაწილს უკავშირებდა მთელ მოთხოვნას. ბ-ნი ს. მგალობლიშვილი დიდი ხანია გამოვიდა სამწერლო ასპარეზზე და ერთხელვე არჩეული ვზიდან მას აღარ გადაუხვევია. როგორც პირველი მისი მოთხოვნები, ისე ეს უკანასკნელიც გაუღენთილია ავტორის ღრმა სიყვარულით გლეხისადმი; ის დიდი თანაგრძნობით ხატავდა და ხატავს ამ გლეხს, იდეალურის პრიზმით სინჯავს როგორც მის ბუნებას, ისე მის ცხოვრებას... რადგანაც ბატონყმობის გადავარდნის შემდეგ კარგა დრომ გაიარა, ამ დროის განმავლობაში ცხოვრება შეიცვალა და შეიცვალა მასთან ის გლეხიც, რომელიც ამ ჯგუფის მწერლობის ტრფიალს წარმოადგენდა. ასეთ გარემოებას ის შედეგი მოჰყვა, რომ ტეტიათა მოტრფიალებს გული გაუტყდათ აწმყოსე..

ავტორმა დაგვიხატა ძველი აზნაური, ედიშერ გეგელაშვილი, მისი დამოკიდებულება გლეხებთან, მისი თავგამოდება გლეხობისათვის და სხვა. თუკი ადამიანს სჩვევია ცალმხრივად რაიმე კითხვის აწონვა და გადაჭრა, ქართველმა ადამიანმა ასეთ ცალმხრივობაში, მგონი, ყველას გადააჰარბა. ექვს გარეშეა, ბატონყმობის დროს იყვნენ ისეთი პირები, როგორც ედიშერ გეგელაშვილი, მაგრამ ამ გამოწვევის განზოგადება და იმის ქადაგება: ბატონყმობა მამაშვილური ინსტიტუტი იყო — ერთი დიდი შეცდომაა. კერძო ფაქტი რომ რასმე გვეუბნებოდეს იმის მეტს, რომ გამოწვევისი ყოველ სფეროში არის, ბუნებისა და ადამიანის ცხოვრების შესწავლა ყოველად შეუძლებელი იქნებოდა. თუმცა ამ წარსულს ავტორი ძალიან ძაღლებს აწმყოსთან შედარებით, მაგრამ წარსულის ღირსების შესახებ ძალიან ცოტას გვეუბნება; მხოლოდ მწუხარებით გვიცხადებს: „იღუპება ყველაფერი, რასაც კი ძველი ელფერი ედო: სიმღერა, გალობა, შექცევა, თამაშობანი, სხვადასხვა გვარი ძველი ლხინი, ლექსით და ზმით კამათი“-ო, მაგრამ ყოველივე ამის დაღუპვაში საგოდებელს ვერაფერს ვხედავთ. მოთხოვნაში საყურადღებო პირს წარმოადგენს გიგოლა გულიაშვილი და საყურადღებოა აგრეთვე ის გარემოება, თუ როგორ ებრძვის მას ხალხი და როგორ ამარ-

ცხებს. გიგოლა გულიაშვილი ნათლად გვიმტკიცებს, რომ დღევანდელი ჩვენი ცხოვრება კანონიერი შვილია ჩვენი წარსულისა, თუმცა ამ წარსულს დღეს ის ძალიან ცოტაშიდა ჰგავს. ერთფეროვან „მასას“ გლახობა არ წარმოადგენდა ბატონყმობის დროსაც კი, მაგრამ მაშინდელი დამოკიდებულება ყმასა და ბატონს შორის, აგრეთვე ყმებს შორისაც, ამ დიფერენციაციის გაფურჩქვნას და ნათლად გამოაშკარავებს წინ ელობება. როდესაც ეს ხელშემშლელი მიზეზი მოისპო, ჩვენი ცხოვრება ნელ-ნელა გადასხვაფერდა ისე, როგორც უნდა გადასხვაფერებულიყო. სადაც მიგვიყვანს ასეთი ცხოვრება, მომავალი დაანახევებს, ვინც მოესწრება, ხოლო უკან რომ ვეღარ დაებრუნდებით, ეს ყველასათვის ცხადია.

წარსულ წელს „მოამბეში“ დამთავრდა მელანიას „ნავარდობა“. რომლის შესახებ უკვე გამოვთქვით ჩვენი აზრი.

ყველაზე უფრო საყურადღებოა როგორც „მოამბეში“, ისე წარსული წლის მთელ სიტყვაკაზმულ მწერლობაში ბ-ნი კლდიაშვილის „ქამუშაძის გაჭირვება“ იყო. ამ მოთხრობის შესახებ „კვლ-ში“ ვრცელი წერილი იყო და ამიტომ მას აღარ დაუებრუნდებით ავტორი მეტად დაკვირვებით ადევნებს თვალყურს ჩვენს ცხოვრებას და თავის დროზე აღნიშნავს ხოლმე ყოველ ახალსა და საყურადღებო მოვლენას. ამ მოთხრობაში ავტორმა თვალწინ წამოგვიყენა საუცხოოდ დახატული რამდენიმე სურათი ჩვენი ცხოვრებიდან. რომელთა დასკვნაც თავისთავად ცხადია ყოველი მკითხველისათვის. რა არის ეს დასკვნა? — სოფლის აზნაურობის გაღატაკება, წოდებათა ერთმანეთში აღრევა და სამოქალაქო გზაზე მათი გამოხვლის აუცილებლობა. ახალი მოვლენა, რომელზედაც ავტორმა მიგვიითია, არის წმინდა პროლეტარის გაჩენა ჩვენს ცხოვრებაში; ოტია სრულებით მოსწყდა მიწას. მან გაჰყიდა ყველაფერი სოფლად და ქალაქს მიმართა, რომ იქ ეძიოს თავისი ბედი.

წარსულ წელს „მოამბეში“ დაიბეჭდა ბ-ნ შ. არაგვისპირელის რამდენიმე ეტიუდი და ერთი ვრცელი მოთხრობა. პირველში, „უცნაურია, უცნაური!“, მან დაგვიხატა სწეული ადამიანი, ამნონი, რომელსაც გაგიჟებით უყვარდა თამარი, და როდესაც სქესობრივი გრძნობა დაიკმაყოფილა, თამარი მის თვალში სათელავ მჩვრად გადაიქცა და სიყვარული გაუქარწყლდა. ავტორს რომ ამნონი სწეულ ადამიანად მიაჩნდეს, ჩვენ არაფერს ვიტყვით, მაგრამ ავტორს თავისი გმირი საღი ადამიანი ჰგონია და ამიტომ ეტიუდის დედააზრიც სრულებით მცდარია. ავტორს რომ მარტო თავის საკუთარი წარმოდგენისათვის არ დაეჭვებია და სინამდვილისათვის მეტი ყურადღება მიექცია, დარწმუნდებოდა, რომ მარტო სქესობრივი გრძნო-

ბის დაკმაყოფილება არათუ არავის არ უქარწყლებს სიყვარულს, კიდევ უძლიერებს. მეორე ეტიუდი, „ბედნიერება მხოლოდ მაშინ ვიგრძენ!“, თავიდან ბოლომდე გაუგებარია. ახალგაზრდა ერასტიმ მეუღლე შეირთო, ბედნიერების მაგიერ უბედურებას შეეყარა და თავისი თავი მხოლოდ მაშინ იგრძნო ბედნიერად, როცა ცოლმა თავი დაანება. რასაკვირველია, ისეთი მეუღლის მოშორება, რომელთან ცხოვრება დაუსრულებელ ტანჯვად გადაქცევია მეორეს, ბედნიერებაა და ამ აზრში არც არავინ შეეცილება ავტორს, ხოლო გაუგებარია ეტიუდში, რად შეიძულა ელისაბედმა ერასტი ჯვარის დაწერის პირველ დღიდანვე? ერასტი გვატყობინებს, რომ მისი მეუღლე სხვებს არ ჰგავდა, მაგრამ მისი სასიათის შესახებ ამის მეტს არას ამბობს. ყოველი სტრიქონის კითხვის დროს თვალწინ გეხატებათ მხოლოდ ავტორის სურვილი; რად შეიძულეს ცოლ-ქმარმა ერთმანეთი? მხოლოდ ერთი პასუხია: იმიტომ, რომ ავტორს ასე სურს. რატომ ვერ გრძნობდა ცოლი ქმართან ბედნიერებას? იმიტომ, რომ ავტორს ასე სურს. თუკი ცოლი და ქმარი ერთად ვერ თავსდებათ, ამის მიზეზი მათსავე ხასიათში უნდა იმალებოდეს, ან მათს გარეშე; ავტორმა კი არც ერთი დაგვანახვა, არც მეორე. ერასტის სიტყვები: ეველა ქმრებმა რომ ჩემსავით გულახდილად გიაზბონ, იქნება ათასში ხუთი არ იყოს კმაყოფილი თავისი მეუღლისო, გვარწმუნებენ, რომ ავტორი სექსტიკურად უყურებს ცოლქმრულ კავშირს და ცოლ-ქმრობა თითქმის უბედურებად მიაჩნია. ამ ეტიუდში, სხვათა შორის, ის აზრიც არის გატარებული, რომ გასათხოვარი ქალის ხასიათის გაგება შეუძლებელია. ზოგიერთ თავის წინანდელ ეტიუდშიაც ავტორი ქალის ზნეობრივ მხარეს სექსტიკურად უყურებს; ზოგიერთი მისი ეტიუდის ქალი იმდენად უზნეოა და დაცემული ბუნების, როგორისაც მის ნაწერებში ვერც ერთ მამაკაცს ვერა ვხედავთ. თუ სჩადის მის ეტიუდებში მამაკაცი რაიმე სისაძაგლეს, წინდაწინვე დიდი ხნით განზრახული მიზნით კი არა, არამედ ავადმყოფი ბუნების წყალობით, ან განუზრახავად, ერთბაშად. ქალები წინდაწინვე დიდი ხნით განზრახული მიზნით ეპირებიან რაიმე უზნეო მოქმედებას. გაიხსენეთ მისი ერთი გასათხოვარი ქალი, რომელიც ერთ ყმაწვილს მეუღლეობის თანხმობას უცხადებს, ესიყვარულება კიდევ და ამავე დროს მეორეს წერილსა წერს: რაღაი გავთხოვდები, ჩემო საყვარელო, შენი ვიქნებიო. რამდენად უზნეო, გარყვნილი ხასიათის უნდა იყოს გასათხოვარი ქალი, რომ ეს მოიპოქმედოს! ჩვენს ცხოვრებას, რა თქმა უნდა, ამგვარი ქალი ჯერ არ წარმოუშვია და ღმერთმა ნუ ჰქმნას, წარმოშვას; მაგრამ ავტორის ერთ ღირსებას ის შეადგენს, რომ ჩვენს ბელეტრისტიკაში მან პირველმა გადააბიჯა

გაბეღით ჩვენი ცხოვრების საზღვრებს და გვაძლევს ისეთ ფსიქოლოგიურ მომენტებს, რომლებიც საერთოა ყოველი ადამიანისათვის, რა ცხოვრებისაც უნდა იყოს ის. ხოლო ასეთი მაგალითები ამტკიცებენ, რომ ავტორს ქალის ზნეობაზე შემცდარი შეხედულება აქვს. მის თვალში მამაკაცი ზნეობრივად მალა დგას ქალზე. ავტორის ასეთსავე შეხედულებას უნდა მივაწეროთ ზემოხსენებულ ეტიუდში გამოთქმული აზრი. ვითომ გასათხოვარი ქალის ხასიათის გამოცნობა შეუძლებელი იყოს. თავის ნაკლულევანებათა დაფარვა და ღირსებათა გამოფენა, თავისი თავის იმაზე უკეთესად ჩვენება, ვიდრე ნამდვილად ვართ, საზოგადოდ სჩვევია როგორც მამაკაცს, ისე ქალსაც. ექვს გარეშეა, ქალი ამ მხრივ მამაკაცს აჭარბებს, რადგანაც მისი უმთავრესი ასპარეზი ცხოვრებაში დღესდღეობით ისევ ოჯახში და ამიტომ უმთავრესი მიზანიც — გათხოვება, რაც მოწონებაზე არის დამოკიდებული; ის თვით ცხოვრებისაგან იძულებულია უფრო ეცადოს, მოგვაწონოს თავი, ვიდრე მამაკაცი ცდილობს, ხოლო ამ მეცადინეობაში მას იმდენი მოხერხება რომ განეფიქრებოდეს თავის ხასიათში, ვითომ მისი ნამდვილი ხასიათის გამოცნობა შეუძლებელი იყოს, სანამ ის გასათხოვარია, — შეცდომაა: თუ მისი ყურადღება დღესდღეობით უმთავრესად გათხოვებისაკენ არის მიქცეული და ამიტომ ცდილობს, ახალგაზრდა კაცის წინაშე ყოველი თავისი ნაკლულევანება დაჰფაროს, სამაგიეროდ, მამაკაცს ცხოვრებაში ფრიად ვრცელი ასპარეზი ჰქონდა და აქვს დღესაც ქალთან შედარებით; ის ავარჯიშებდა და ავარჯიშებს თავის გონებას, ვიდრე დედაკაცი; ასეთ ვარჯიშს კი აუცილებლად უნდა მოჰყოლოდა ის შედეგი, რომ მას დედაკაცზე უკეთ შეუძლია თავი გვაჩვენოს იმად, რაც ნამდვილად არ არის. ქალში გრძნობა უფრო ძლიერია და დამოუკიდებელი, ვიდრე მამაკაცში, მას თავის დამალვა დიდხანს არ შეუძლია, — გრძნობათა სიძლიერე მალე გასცემს, ხოლმე მას და ამიტომ არ არის იმ შეხედულების ღირსი, რომელსაც ავტორი „ბენდიერება მხოლოდ მაშინ ვიგრძენ!“-ში გვაწვდის.

შემდეგ ეტიუდში ბ-ნი არაგვისპირელი გვიხატავს, თუ როგორ ეარშიყება მეგობარი მეგობრის ცოლს და, როდესაც მას არცხვენენ, ის ხარხარით უპასუხებს: ბალდი ყოფილხარო. ჩვენს წინ დგანან ორი სხვადასხვა შეხედულების პირნი ერთისა და იმავე კითხვის შესახებ; არჩილი და ელიზბარი. პირველს უყვარს სხვისი ცოლი და ამაში უზნეოს სრულებით ვერაფერს ჰხედავს. მეორეს კი ეს საშინელ უზნეობად მიაჩნია. რომელ შეხედულებას ემხრობა ავტორი, ეტიუდში არ ჩანს და არც არის ეს საჭირო. მან დაგვიხატა ორი მო-

პირდაპირე შეხედულება და მკითხველის საქმეა, რომელს მიემხრობა და რომელს უარყოფს.

ცოლქმრული კავშირის დარღვევა უზნეობაა მხოლოდ იმდენად, რამდენადაც უზნეობაა საზოგადოდ დარღვევა ყოველგვარი პირობის, რომელსაც ადამიანი თავისი ნებითა სდებს: ზოგიერთ შემთხვევაში ეს უზნეობა თუ გასაკიცხია, ზოგიერთში გასამართლებელია, იმისდა მიხედვით, თუ რამ გამოიწვია ამ პირობის დარღვევა. სადაც სიყვარული აღარ არის, ოჯახის სიმტკიცე მარტო გონებაზედ არის დამყარებული და რადგანაც სულ ხშირად გრძნობა გონებას არ ემორჩილება, ოჯახის ღალატიც აუცილებელი ხდება. თუკი გივის ცოლი ღალატობს, ექვეს გარეშეა, ქმართან მას მხოლოდ კანონი აერთებს და შეიძლება კიდევ — რაიმე მოსაზრება, საოჯახო ინტერესებით გამოწვეული, არჩილთან კი — სიყვარული. თუმცა არჩილისა და გივის მეუღლის მოქმედება სრულებით აუცილებელია, მაგრამ მიუხედავად ამისა უზნეო, რადგანაც ცოლი არღვევს პირობას, არღვევს ამით გივის ბედნიერებას, რომლისთვისაც შეიძლება ცხოვრებაში ერთადერთ ნუგეშს ოჯახი შეადგენდა, უბრუნებს ბედობას შვილებს, რომელთა წარმოშობისა და აღზრდისათვის ის გივის უერთდება, — მაგრამ რა დიდიც უნდა იყოს უზნეობა, რომელიც ცოლის, ან ქმრის ღალატში გამოინატება, უმეტესი უზნეობა მაინც ის არის, როდესაც ეს ღალატი დაფარულია და არა პირდაპირი, აშკარა, გამოტეხილი. ცოლი რომ უცხადებდეს გივის: მე შენთან ცხოვრება არ შემძლია, რადგანაც არჩილს ვეკუთვნიო, არჩილიც რომ ასე იქცეოდეს და გველის ქერქში არ ეჩვენებოდეს მეგობარს, შესაბრაალისი იქნებოდა მხოლოდ გივი, არჩილსაც და გივის მეუღლეს კი ვერ გავკიცხავდით: გრძნობის დამორჩილება ხომ ყველას არ შეუძლია! დღეს არჩილსაც და მის საყვარელსაც ყველა გაჰკიცხავს, რადგანაც ისინი ორივენი ქურდულად იქცევიან, ორივენი ატყუებენ გივის. ამ მეორე უდიდეს უზნეობაშიაც კი არც ერთი და არც მეორე დამნაშავენი არ არიან. დამნაშავეა ის საზოგადოებრივი წყობილება, და მისგან გამომდინარე კანონი, რომელიც მათ სიყვარულს ამახინჯებს, რომელიც შეყვარებულ ქალსა და კაცს არ აერთებს და სიფლიდეს და სიცრუეს აიძულებს, ამგვარად, ცოლქმრული პირობის დარღვევა უზნეობაა უსათუოდ, მაგრამ ეს უზნეობა ჩირქს არ სცხებს ადამიანს, თუ იმ საპატიო მიზეზებით არის გასწვეული; ხოლო, როდესაც დარღვეულ პირობას საჩუღლად კანონი ედება, ეს გაცილებით მეტი უზნეობაა. რომ არ ირღვეოდეს ცოლქმრული პირობა, ხომ ყველას აჯობებდა, მაგრამ რადგანაც ეს შეუძლებელია, ამიტომ ერთი გზაა არის მხოლოდ: სიყვარულს თავი-

სუფლება უნდა ჰქონდეს მინიჭებული, მას კანონი არ უნდა ელობოდეს წინ და მომავალში ასეც იქმნება.

ამგვარად, თავის სამ ეტიუდში ბ-ნი არაგვისპირელი შეეხო სხვადასხვა მხრით სქესთა შორის ურთიერთობას. პირველ ეტიუდში მან სქესობრივი გრძნობის დაკმაყოფილება სიყვარულის გამაქარწყლებელ და ქალის დამამიცირებელ აქტად აღიარა — მეორეში ორივე მხარესათვის ბედნიერებად ჩათვალა ისეთი ოჯახური კავშირის შეწყვეტა, რომელიც სიყვარულზე არ არის აშენებული; მესამეში კი დაგვანახვა ოჯახური უზნეობა, რომელიც, ერთი მხრით, ნაყოფია ადამიანის ბუნების და ამიტომ აუცილებელია, მეორე მხრით — კი კანონის ჩარევით იქ, საცა მას ალაგი არა აქვს, და ამიტომ ასაცილებელი.

ავტორის ორი დანარჩენი ეტიუდიც „ეპ“ და „ბუნების მეფენი“ საერთო აზრით არიან შეერთებულნი. პირველში ავტორმა დაგვიხატა, თუ როგორი მსიარულებით უზვდება ბუნება ადამიანის უბედურებას, მეორეში კი ადამიანის სრული უძლურება და არარაობა ბუნებასთან შედარებით. ორივე ეტიუდში ავტორი გვიმტკიცებს, რომ ბუნება ადამიანისათვის კი არ არის გაჩენილი, არამედ ბუნება ცხოვრობს თავისი საკუთარი სიცოცხლით, ადამიანი კი მასში ისეთივე წარმავალი სტუმარია, როგორც ყოველი ცხოველი, პატარა ფუმფულადან მოყოლებული. უძველესი დროიდან ფილოსოფიაში ის აზრი არსებობდა, რომ ადამიანი მეფეა ბუნების: დედამიწა, მთელი მისი სილამაზე-სიმდიდრით, მისთვის არის გაჩენილი, მზე და მთვარე მას ემსახურებიან. ახლა ეს უარყოფილია. დარგინმა დაგვანახვა, რომ ადამიანს სრული ნათესაობა აქვს დანარჩენ ცხოველებთან, ის მათი სისხლი და ხორცია; მას შეუძლია ისარგებლოს მით, რაც მისთვის გამოსადეგია, ხოლო დედამიწა, მზე და მთვარე მისთვის არავის გაუჩენია; იყო დრო, როდესაც ის არ ყოფილა დედამიწაზე. დედამიწა კი ტრიალებდა, მასზე ურიცხვი ცხოველნი და მცენარენი ხარობდნენ. მზე და მთვარეც ანათებდნენ; მოვა დრო, როდესაც უკანასკნელი ადამიანი დედამიწაზე სულს დაღვეს, დედამიწა, მზე და მთვარე კი ისევ დარჩებიან და ისევ დიდხანს იტრიალებენ.

ბ-ნი არაგვისპირელის ერთი ეტიუდი „ქედილას გოდება“ გამეორება არის ავტორის ერთ-ერთი თემისა; ამ თემის სახელოვნო ფორმაში ჩამოსხმა საუცხოოდ ეხერხება ავტორს.

ამ ეტიუდში გატარებულია ვეგეტარიანიული აზრი, რომელსაც ჩვენში ძალიან ცოტა მომხრე ჰყავს. ვეგეტარიანიზმს მხოლოდ ერთადერთი მტკიცე საფუძველი აქვს: პირუტყვი თითქმის იმნაირივე არსებაა, როგორც ადამიანი, — მხოლოდ განვითარებით უკან ჩა-

მოგვრჩენია და სხვა გზას დადგომია; სიცოცხლის სიყვარული მასაც იმდენად აქვს ყოველ უჯრედში გამჯდარი, როგორც ადამიანს; მისი ლაკვლა იმდენადვე საცოდაობაა, როგორც თვით ადამიანისა და ამიტომ მისი სიცოცხლის მოსპობა ჩვენი კუჭის გასაძღომად აუცილებლად უზნეობაა; ასეთ მოვლენას ადამიანის გრძნობა უნდა ეწინააღმდეგებოდეს და ავტორიტ სწორედ ამაზე მიგვიითითებს თავის „ქედილას გოდებაში“. სამწუხაროდ, ასეთი უზნეობა ადამიანის მოთხოვნილებად არის გადაქცეული. მისი მოსპობა შეუძლია ერთ პირს, ორს, რამდენიმე ადამიანს, მაგრამ მთელმა კაცობრიობამ რომ ხელი აიღოს ხორცეულ საზრდოზე, ეს ტყუილი იმედია.

•

თუ ჩვენმა პოეზიამ დაანება თავი წარსულს და მთელი თავისი ყურადღება აწმყოს მიაქცია, ჩვენი დრამატული ხელოვნება ისევ იმ მდგომარეობაშია, რომელშიაც ის მისმა მამამთავარმა გ. ერისთავმა დასტოვა: თუ კომედია დაიწერება, მასში სრულიად უმანკო სიცილის გამომწვევი კომბინაციებისა და სიტყვების მეტი არაფერია; თუ დრამა ან ტრაგედია, — წარსული დროის სისხლისღვრის მეტს ვერასაჰპოვებთ შიგ. დრამატული ხელოვნების საგანი არის ადამიანის ფსიქოლოგია, ამ ფსიქოლოგიის ხატვა სხვადასხვა მომენტებში, სხვადასხვა ხასიათის, ტემპერამენტის და ზნეობის პირებში დრამატული პოეზიის მიზანს შეადგენს. ჩვენი დრამატული პოეზია კი თავის ნამდვილ საგანს და მიზანს სრულებით დაშორებული იყო და ახლაც ამ მდგომარეობაშია. ყოველ ახალ პიესას განახლებული იმედით ეგებები, მაგრამ ეს იმედი ისევ მალე ჩაქრება ხოლმე. ასე დაგვემართა „ასული ისრაელისას“ კითხვის დროსაც. ავტორმა აიღო ისტორიული ფაქტი, გაამეორებია ის ჩვენ თვალწინ მომქმედ პირებს და ბოლოს მშრალი ფაქტი ფაქტადვე დარჩა. ტრაგედიის სხვადასხვა ალაგას გაბნეულია ბევრი კარგი აზრი, მაგრამ ყველა ეს გაქარწყლებულია მთელი პიესის უაზრობით: თუ როგორ უნდა თავისუფლებისათვის თავის განწირვა, ეს ძალიან ბევრჯერ გვსმენია; ბევრი მაგალითიც დაგვიტოვა მისი ისტორიამ და განუწყვეტლად მის გამეორებას და გახსენებას მხოლოდ ის შედეგი მოსდევს. რომ ყველას ბეზრდება და აკი მოგებებზრდა კიდევ!

როდესაც ბ-ნი ან. ფურცელაძე პიესას წერს, თითქოს განგებ ცდილობს, რომ პიესა სცენისათვის უვარგისი გამოვიდეს. დიდი სახელოვნო ღირსებაც რომ ჰქონდეს მის ახალ ტრაგედიას, ერთ ნაკლად მაინც ის იქნება, რომ სცენისათვის სრულიად გამოუსადე-



გარია; მე არ ვიცი არც ერთი პიესა, სადაც ამდენი და ამსიგძე მონოლოგები იყოს. მეოთხე და მეხუთე მოქმედებაში ალაგ-ალაგ ბრბოს ფსიქოლოგია კარგად არის დახატული, სამაგიეროდ, მოქმედ პირთა ფსიქოლოგია მეტად სუსტია და ბევრგან ყალბიც. თავმოყვარე და გამოცდილი ოლომფრე ბავშვივით ხელში უვარდება ივდითს მაშინ, როდესაც შეუძლებელი იყო, მას მეტი სიფრთხილე, მეტი წინდახედულობა, არ გამოეჩინა. ოლომფრე მთვრალია; მის გვერდით მარტო ივდითია, რომელსაც მისი მოკვლა განუზრახავს; ივდითისათვის ყოველი წამი ძვირფასია; ოლომფრე უბრალო მეო.მარი ხომ არ არის, მხედართმთავარია, მას დარაჯობენ. თვალყურს უგდებენ; ყოველ წამს შეიძლება შემოვიდეს ვინმე და ივდითს ხელი შეუშალოს; ივდითი კი ოლომფრეს მოკვლის წინ იმოდენა მანოლოგს გვეუბნება, რომ მთელი სამი გვერდი უკავია. არაფერი არ აქარწყლებს ისე ილუზიას, როგორც სინამდვილის დამახინჯება.

წარსული წლის „მომამბეში“ იყო ბ-ნი ა. ცაგარლის ახალი კომედია „ცისარტყელა“, რომლის გარჩევითაც ჩვენს მიმოხილვას დავბოლოვებთ. იქვე იყო ბ-ნი არაგვისპირელის ვრცელი მოთხრობა „გიული“. თუ ერთ მაგალითზე შეიძლება რაიმე დასკვნის დამყარება, მაშინ ეს მოთხრობა ნათლად მიმტკიცებს, რომ ავტორის ვრცელი ნაწარმოების დაწერა არ ეხერხება — მისი სფერო პატარა ეტიუდებია, მხოლოდ მომენტები ადამიანის ცხოვრებისა და არა მთელი ცხოვრება, მხოლოდ ხანმოკლე აფექტები და არა მთელი ფსიქოლოგია. მოთხრობა არათუ არ წარმოადგენს სახელოვნო ნაწარმოებს, აზრიც არ არის მასში საყურადღებო; მოთხრობა იწყება სწორედ იქ, სადაც ის ავტორმა არა ხელოვნურად შეწყვიტა გიულის მოკვლით; მან ოდნავ აღძრა ქერბალაიას გულში ბრძოლა მოვალეობასა და გრძნობას შორის, მოულოდნელადვე ჩააქრო და ამით მოთხრობას მნიშვნელობა დაუკარგა.

ორიგინალური სიტყვაკაზმული მწერლობით, როგორც „კვალი“, ისე, „ივერია“ წარსულ წელს ძალიან ღარიბი იყვნენ. „კვალი“ თავის სიტყვაკაზმულ ნაწილში გვიხატავდა ჩვენი გლეხის კრიტიკულ მდგომარეობას („ივანეს ოჯახის თავგადასავალი“), სიყვარულითა და თან სევდით ავეიწერდა ქალაქის წვრილ მუშა ხალხსა და გაჭირვებულთ (ნატოს ესკიზები), გვახედებდა განათლებული პროლეტარის ფსიქოლოგიაში („უგულობა“) და სევდით აღნიშნავდა დღევანდელი ცხოვრების საშინელ უსამართლობას, რაც გამოწვეულია ეროვნული სიმდიდრის უთანასწორო განაწილებით („საღამო ქალაქში“). „დაკარგულ საუნჯეში“ ბ-ნი თომაშვილი შეეხო ერთ საჭირობოროტო კითხვას, ერთ დიდ უსამართლობას, რომელიც დიდი ხანია

გამოუწვევია ცხოვრებას: ახალგაზრდა ქალი შეცდა, უმანკოება დაჰკარგა და მის საქციელს საზოგადოება ისეთი ზიზღითა და კიცხვით უტყუროს, რომ მას თავის მოკვლის მეტი აღარა დარჩენია რა ეს მან ნებით ჰქნა ან თუ უნებლიეთ, — გვეკითხება ავტორი. ეკვს გარეშეა, ქალს საზოგადოების მიერ დევნა აკვლევინებს თავს, მაგრამ აშკარაა ისიც, რომ ეს ახალგაზრდა ქალი თავის თავს ამტყუნებს და საზოგადოების მხარეზე დგება, იმ საზოგადოების მხარეზე, რომელიც მას სიცოცხლეზე ხელს აღებინებს. როგორც ავტორის მიერ აღნიშნული ფაქტი, ისე ამ ახალგაზრდა ქალის ფსიქოლოგია აშკარად გვიმტკიცებს, რომ ადამიანის რწმენა-შეხედულება ცხოვრების ამა თუ იმ მდგომარეობაზე არის დამოკიდებული; ერთი ეპოქის ადამიანის ფსიქოლოგია იმდენად განირჩევა მეორე ეპოქის ადამიანის ფსიქოლოგიისაგან, რამდენადაც პირველი ეპოქის სოციალური ცხოვრება განირჩევა მეორისაგან. ამა თუ იმ შეხედულებას ადამიანში ცხოვრება ჰბადებს და ავითარებს.

„კრებულის“ მე-2 ნომერში დასტამბული ეტიუდის „ქ. თუ არას“ დედააზრი იგივეა, რაც ბ-ნი არაგვისპირელის „ბაღლი ყოფილხარ!“ რა განსხვავებაა გიორგისა და არჩილს 'მორის? როგორ უყურებენ ისინი ცოლ-ქმრის ღალატს? მაშინ, როდესაც არჩილი სრულ თავისუფლებას აძლევს გრძნობას და არავითარ გონებრივ მოსაზრებას, არავითარ მოვალეობას არ უყენებს მას, გიორგი გრძნობას გონების მორჩილათ ხდის. მას უყვარს სხვისი ცოლი, მაგრამ ამ სიყვარულს თვითონვე გაუბრძის, რადგანაც არ უნდა პატიოსანი ადამიანის სახლში უბედურება შეიტანოს. არჩილს მოგვაგონებს ამავე ავტორის ეტიუდის „არ დამენახო, არას!“ გმირი, — ნიკო. ეს ეტიუდი „ცნობის ფურცელში“ დაიბეჭდა: ნიკო თავს ანებებს საყვარელ ქალს მაშინ, როდესაც მას უკვე შვილი ჰყავს, თავს შემდეგის სიტყვებით იმართლებს: გიყვარდი, მიყვარდი, ეხლა აღარ მესიამოვნება შენი ალერსი და მეც გშორდები.... გრძნობამ არ იცის, რით დაიწყებს და რით დაამთავრებსო. რომელია მათში მართალი, რომელი მტყუანი? ეკვს გარეშეა, გიორგი მართალია, არჩილი და ნიკო კი მტყუანი. ადამიანის ცხოვრებასა და მოქმედებაში გრძნობას უსათუოდ უნდა ჰქონდეს ხმა. ადამიანს რომ გრძნობელობა არა ჰქონდეს, არათუ სიცოცხლე იქნებოდა უფერული და აუტანელი, თვით ადამიანიც საზიზღარი ეგოისტი იქნებოდა, მაგრამ გრძნობა ბრმა არის, ცალმხრივი, ის თავის მიზნის მეტს ვერაფერს ხედავს: არასფერს არ დაეძებს და ამიტომაც მისი დარაჯი, მისი შეცდომების გამასწორებელი ყოველთვის გონება უნდა იყოს. მართალია, გრძნობა ხშირად გონებას არ ემორჩილება და შეუხერხებლად მიისწრაფვის

თავისი მიზნისაკენ, მაგრამ, როდესაც გრძნობამ უკვე მიაღწია მიზანს, მისი ნამოქმედარის შედეგებში პასუხისმგებელი გონება უნდა იყოს. მას უნდა მიმართოს ადამიანმა და გაასწოროს გრძნობის მიერ ჩაღენილი შეცდომები, ნიკოს კი ეს სრულებით დავიწყებია და თავის ეგოისტურ ბუნებას, რომელსაც საკუთარი თავის მეტი არა ახსოვს რა. გრძნობის ძლიერების ქვეშ მალავს. მისი გრძნობა აღარ საკურობს მართას, მაგრამ მას საკუთარი შვილი ჰყავს ახლა და ის, თუ ადამიანად მიაჩნია თავისი თავი, მოვალეა ამ შვილის წინაშე; მან დაამცირა საზოგადოების თვალში მართა, გააუბედურა ის, რადგანაც საზოგადოება დღეის იქით მართას თითოს საჩვენებლად გახდის, ამიტომ ისევ ნიკომ უნდა აამაღლოს ის საზოგადოების თვალში, ისევ მან უნდა ააცილოს მართას საზოგადოების კიცხვა. ისევ მან უნდა დაუბრუნოს ბედნიერება. როდესაც გრძნობა უკვე დაკმაყოფილდა, სიყვარულის საზღვრები თავდება. აქედან იწყება მოვალეობის საზღვრები, — აქ კი გონება არის მბრძანებელი და არა გრძნობა.



ჩვენს პოეზიას ყოველ დარგში ჰყავს ნიჭიერი წარმომადგენლები, მაგრამ ამასვე ვერ ვიტყვით დრამატული ხელოვნების შესახებ. შესანიშნავი ნიჭის დრამატურგი ქართველებს ჯერ არ გვყოლია, ნამდვილი დრამა და განსაკუთრებით კომედია ჩვენს ხელოვნებას ჯერ ვერ შეუქმნია. როდესაც გადაათვალიერებ ჩვენს კომედიებს, რწმუნდები, რომ ქართველ დრამატურგებს ან ჯერაც ვერ შეუგნიათ, თუ რაში მდგომარეობს კომედიის არსებითი მხარე, — გულუბრყვილო ხარხარში, თუ სხვა რამ უფრო სერიოზულში: ან თუ შეუგნიათ, მათ შეგნებას მათი ძალა ვეღარ შესწვდომია. დღევანდელი ჩვენი ცხოვრება და გონებრივი მდგომარეობა გაცილებით უფრო მალლა დგას, ვიდრე ორმოცდაათ წლებში იყო; მიუხედავად ამისა, ჩვენი დრამატული პოეზია ისევ იმ მდგომარეობაშია, როგორშიაც მისმა მამამთავარმა დასტოვა. გიორგი ერისთავს კარგად ესმოდა კომედიის დანიშნულება... ის ხშირად უხატავდა საზოგადოებას ჩამაფიქრებელ მოვლენებს მისი საკუთარი ცხოვრებიდან. გიორგი ერისთავი, როგორც დრამატურგი, არათუ შეეფერებოდა თავისი დროის საზოგადოებას, ის მალა იდგა იმ საზოგადოებაზე. დღევანდელი დრამატურგი უკეთეს პირობებშია ჩაყენებული: საზოგადოებამ უკვე შეიგნო თეატრის დანიშნულება, მარტო ხარხარი მას აღარ აკმაყოფილებს, ის უფრო ფხიზელი გონებით და უფრო მგრძნობიარე გულით მიდის ახლა თეატრში, ვიდრე ამ ორმოცდა-

ათი წლის წინათ მიდიოდა, მაგრამ დღევანდელი ქართული პიესები მას ვერ აკმაყოფილებს: დღევანდელი ქართველი დრამატურგი საზოგადოების მოთხოვნილებას და გონებრივ მდგომარეობას არათუ ვერ უსწრებს, კვალდაკვალაც ვეღარ მისდევს. ბ-ნ ცაგარლის ახალ-მა კომედია „ცისარტყელამ“ ვერ დაგვირღვია ასეთი შეხედულება. პიესაში ალაგ-ალაგ შეხედებით კარგ აზრს მაგრამ ყველა ეს ისე ნაძალადევად არის ჩაკერებული კომედიაში, რომ კიდეც გიკვირთ: რას უნდა გამოეწვია ავტორის ასეთი სიუხვე? ეს კიდეც არაფერი, — ნაძალადევად არის ჩაკერებული თუ არა, ისიც კარგია, რომ პიესაში საგულისხმო აზრებს შეხედება მკითხველი; ხოლო სრულებით გაუგებარია, რა მიაჩნია ავტორს თავის კომედიაში იმ მთავარძალ ღვად, რომელიც სულს უნდა უდგამდეს კომედიას, რომელიც უნდა შეადგენდეს იმის *raison d'être*-ს პიესაში. ასეთი მთავარი ძარღვი არ არსებობს და ამით აიხსნება მისი ტექნიკური სისუსტე: ცალკე მოქმედებებს ერთმანეთში არაფერი არ აკავშირებს, მესამე მოქმედება სრულებით მეტია და საზოგადოდ, პიესა მეტად გაურკვეველსა და დაუმთავრებელ შთაბეჭდილებას ახდენს მკითხველზე. როგორც უკვე ვთქვით, დრამატული პოეზიის საგანი ადამიანის სულიერი მდგომარეობის გადმოშლაა; ამიტომ ყოველი პიესის ერთ უმთავრეს პირობას მოქმედება შეადგენს; ადამიანს იმდენად სიტყვა არ ახასიათებს, როგორც საქმე, — კარგი აზრის წარმოთქმა ბევრს შეუძლია, კარგი საქმის ჩადენა კი ძალიან ცოტას. გარდა ამისა, ადამიანის სული, მისი ზნეობრივი მხარე მხოლოდ მაშინ იშლება ჩვენს წინ სრულად, როდესაც მათი პატრონი მარტო ენას კი არ ატრიალებს, მოქმედებს კიდეც.

„ცისარტყელაში“ კი თითქმის არავითარი მოქმედება არ არის და ამიტომ მოქმედი პირები ისე მკრთალად არიან დახასიათებული. გარდა დარიასი და დათიკოსი, რომ ისინი მხოლოდ ლანდს წააგავენ ცოცხალი ადამიანისას. თუმცა ავტორი თავდაზნაურობის დაცემასაც შეეხო, მეურნეობასაც, საშუალო და უმაღლეს განათლებასაც და ბევრს სხვას, მაგრამ ხელოვნების მხრივ მის კომედიაში საჯეტესო ალაგია მეორე მოქმედების II, III და IV სანახავი, სადაც დათიკოს ოქუნჯობის მეტი არაფერია. ამ პიესაში ავტორმა პირველად სცადა სერიოზული კითხვების გადაწყვეტა. მაგრამ ასეთმა ცდამ ძალიან სუსტი ნაყოფი მოიტანა. რად დაარქვა ავტორმა თავის კომედიას „ცისარტყელა?“ ამის პასუხს ჩვენ ვტყობილობთ მესამე მოქმედების მესამე სანახავში: როდესაც ელიკო აცნობს ნიკოს თავის პრინციპებს, აღტაცებული ნიკო უპასუხებს:

„ნიკო. აგრეც უნდა იყოს! მაინც დიდი ბედნიერი ვარ, რომ

ეს მესმის დღევანდელი ქართველი ქალისაგან. ეს მოვლენა ჩვენს ცხოვრების ცისარტყელათ მიმართია!...”

ამგვარად, როგორც ნიკო, ისე თვით ავტორიც ელიკოში ხედავენ ისეთ ქართველ ქალს, რომელსაც უნდა ფუქსავატ და უმიზნო ცხოვრებაში აზრი შეიტანოს და მის განსახორციელებლად იშრომოს; ოჯახს კი არ დააწვეს მეტ ბარგად, არამედ ქმარს შემწეობა აღმოუჩინოს ზნეობრივად და მატერიალურად და ყველა გაჭირვებულს დაეხმაროს. ასეთია ნამდვილად ელიკო? არა. ელიკო არის ახალგაზრდა ქალი, რომელსაც ეს არის ახლა დაუმთავრებია სწავლა, გამოსულა ცხოვრებაში, მაგრამ ამ ცხოვრების არაფერი არ გაეგება. მას გაუგონია, რომ სოფლად არიან საბრალო, თმაგაბურძღვნილი ბავშვები, რომლებმაც წერა-კითხვა არც კი იციან; ყური მოუკრავს, რომ გლეხობა უეჭიმოდ იხოცება, წაუკითხავს რაღაც ქალთა უფლებების შესახებ და ახლა ის იმეორებს მოუნელებელ აზრებს: ქმარს უნდა დავეხმარო, სოფლად ვიცხოვრო, ბავშვებს ვასწავლო, ავადმყოფებს მოვუარო და სხვ. მას არა აქვს გამორკვეული მსოფლიო შეხედულება, გამორკვეული იდეალები და მაშასადამე, არც ერთხელვე გადაწყვეტილი მიზანი ცხოვრებაში და, კიდევ რომ ჰქონდეს ასეთი მიზანი, მას არა აქვს არავითარი ნება, რომ თავისი მიზანი ოდნავადაც განახორციელოს ცხოვრებაში. მას მუდამ შემდეგი ესიზმრება: მან სოფლად უნდა იცხოვროს, გოგო-ბიჭებს მოუყაროს თავი, ჩაუჯდეს შუაში და ასწავლოს, გლეხები ანუგეშოს, დაარიგოს, ავადმყოფებს მოუაროს, — ე. ი. მისი მიზანია, თავისი თავი სოფელს შესწიროს.

„ეს არის ჩემი ოცნება, რომელიც, უთუოდ უნდა განხორციელდეს, თუ ვიცოცხლე“, გადაჭრით გვეუბნება ის. ამავე დროს ის დარწმუნებულია, რომ თუ მალხაზის მეუღლე გასდა, თავის იდეალებს სრულებით უნდა გამოეთხოვოს და გახდეს უსაქმური, ზარმაცი და კოპწია ქალბატონი. „სხვანაირათ მოქცევა იმის სახლში არ შეიძლება“. მეორე მხრივ, ელიკო დარწმუნებულია, რომ მის იდეალს მხოლოდ ნიკო შეეფერება. აქედან თავისთავად ცხადია, რომ ელიკო ნიკოს ირჩევს, და ის ასეც იქცევა, მაგრამ მალე სცვლის თავის გადაწყვეტილებას და მალხაზს მიყვება. მერე რით ამართლებს თავის გადაწყვეტილებას? მით რომ მას არ უნდა მსხვერპლი შეიწიროს, ან ქვეყანას უნიჭიერესი მალხაზი გამოაქლოს! არა, ელიკო ჩვეულებრივი ინსტიტუტკაა, რომელსაც სხვისთვის ცხოვრება, სხვისი დახმარება არ შეუძლია. შეიძლება, ის იყოს რიგიანი მეუღლე, ქმარს შესძინოს ექვსი ან შვიდი, — ნაკლები — კი არა, — ფუნთუშა ყმაწვილი, მორჩა და გათავდა. მერე არ არიან ჩვენში ელიკოსთან.

ქალები? ძალიან ბევრი; მაგრამ საქმე იმაშია, რომ ავტორი ელიკოში ჩვენის ცხოვრების ცისარტყელის ნიშნებს ჰხედავს, რაც სრული შეცდომაა, ელიკო სრულებით სხვა გამოვიდა, ვიდრე ავტორს უნდოდა. ჩვენს ცხოვრებაში უკვე ჩნდებიან ნიშნები ისეთი ქალებისა, რომლებსაც ფუქსავატი ცხოვრება, მართო როიალზე ჟღარუნო, ცეკვა, სულ კომპლიმენტები და სასაცილო ანეგდოტები აღარ იზიდავენ, რომლებსაც მართო დედლობა და მხოლოდ შვილების სამრავლებელი მანქანის დანიშნულების ასრულება და მამაკაცის გასართობ სათამაშოდ ყოფნა აღარ აკმაყოფილებთ. მაგრამ არ უნდა გვავიწყდებოდეს, რომ ჭერ ჩვენი ცხოვრება მხოლოდ ნიშნებს იძლევა ასეთი ქალებისას და არა თვით ქალებს. ამიტომ ნიშნების მიხედვით ტიპის დახატვა ფრიად ძნელია და ასეთი საქმე მხოლოდ ძლიერსა და შორსმკვრეტელ ნიქს შეუძლია.

დანარჩენ მომქმედ პირებში მოაზრებულები გაცილებით უკეთესნი გამოვიდნენ, ვიდრე ახალგაზრდანი. თუმცა მალხაზი და, ნამეტურ, ნიკო ავტორს ძალიან მოსწონს, მაგრამ სპირიდონი და დიმიტრი თავისი რწმენა-შეხედულებით და აზრებით უფრო მალაღვანან, ვიდრე მალხაზი და ნიკო. მალხაზიცა და ნიკოც ცდილობენ, ჰკვიანად დაგვისახონ თავისი თავი, მაგრამ ორივენი ხშირად დიდ სისულელეს ლაპარაკობენ. სიყვარულის საკითხში მალხაზი ვერ გასცილებია სოფლის ტეტრას, რომლის აზრითაც, სიყვარული ორგვარია: უკანონო და კანონიერი; პირველი ჯოჯოხეთის კერძია, მეორე კი ღვთის მოსაწონი; შვილებიც ორგვარი არიან: უკანონო და კანონიერი: უკანონო შვილების ყოლა დიდი უზნეობაა, კანონიერისა კი, თუნდა ასიც გყავდეს, — არც კაცი და არც ღმერთი არ გიწყენს! ეკ, მართლაც, დიდი უზნეობაა, როდესაც ზნეობრივი კითხვების გადაწყვეტას მალხაზისთანა პირები ჰკიდებენ ხელს. ნიკო დიდი სექსტიკოსია. მას არაფერი სწამს, — არც საშუალო განათლება, არც უმაღლესი, გარდა სამეურნეო განათლებისა; როდესაც ინსტიტუტკა ეუბნება: ავადმყოფებს ვუწამლებო, ის ლამის მზად არის ენა გაულოკოს ასეთი სიტყვებისათვის და აჰავე დროს, მისი აზრით. ექიმები თურმე ხალხს ხოცავენ, რადგანაც ეს დასაქცევი მეორე კურსი საშინელი ძნელი ყოფილა! ნიკო ხედავს, რომ თავადაზნაურობა ილუპება, ცხოვრება ქერქს იცვლის და ხსნას მეურნეობაში ხედავს; მისი აზრით, ყოველი ქართველი მეურნეობას უნდა დაადგეს. ნიკოს აზრი იგივე ავტორის აზრია. პიესაში ბევრგან მიგვივითებს ავტორი, რომ ქართველობის ხსნა მხოლოდ მეურნეობაშია, მაგრამ ამ აზრის დასამტკიცებლად არავითარი საბუთი არ მოჰყავს. მეურნეობა ორგვარია: ნატურალური და კაპიტალისტური. ჩვენში დღეს

უმთავრესად მეურნეობა ნატურალურია. ავტორი კი გვიწვევს კაპიტალისტური მეურნეობისაკენ. კაპიტალისტური მეურნეობა კაპიტალიზმის შვილია; ის ყველგან ევროპაში გაჩნდა მხოლოდ კაპიტალისტური წარმოების განვითარების შემდეგ; რამდენიც უნდა გვიმტკიცოს ავტორმა, მაინც ცხადია, რომ კაპიტალისტურ მეურნეობას.. ცოდნის გარდა ფულიც უნდა; იმ ქვეყანაში კი, სადაც კაპიტალისტური წარმოებას ახლად შეუდგამს ფეხი და ჯერ საკმაოდ ვერ გაძლიერებულა, მეურნეობა უფრო ნაკლებ ზედმეტ ღირებულებას იძლევა, ვიდრე წარმოების სხვა დარგი და ამიტომაც უმეტესობამ რომ ნაკლები შემოსავალი ირჩიოს და მეტს თავი დაანებოს, ეს მხოლოდ მაშინ იქნება შესაძლებელი, როდესაც უმეტესობა გააგიჟდება. ამის გამო კაპიტალისტური წარმოების გაძლიერებამდე კაპიტალისტური მეურნეობის აყვავება ჩვენში უსაფუძვლო ოცნებად მიმაჩნია და, კიდევ რომ არ მიმაჩნდეს, დღეს ყველასათვის ცხადია, რა გზას ადგას ჩვენი ცხოვრება, და სრული დარწმუნებულობა ვარ, რომ ბ-ნ ცაგარელის ქადაგება ამ გზიდან ჩვენს ერს ვეღარ დააბრუნებს.

ამით ვათავებ ამ კომედიის შესახებ ბაასს. უფრო ვრცლად რომ გავჩერებულყავი, ეს არ შეადგენდა ჩემს მიზანს და არც იყო საამისოდ საყურადღებო ეს კომედია. მასში, ჩამოთვლილს გარდა, ბევრი ნაკლულევანებაა — თუ ხელოვნებისა თუ ტექნიკის მხრით, მაგრამ იმ რამდენიმე საგულისხმო აზრის მიხედვით, რომლებსაც ამ კომედიაში შეხვდებით, მისი წარმოდგენა სასარგებლო იქნება ქართველი მაყურებლისათვის, რომელსაც ჯერ ბევრი შერჩენია თავადური აზრები.

ჩვენმა განხილვამ თუ მკითხველი ვერ დააკმაყოფილა, ამის მიზეზი ისევ წარსული წლის სიტყვაკაზმული მწერლობის სისუსტეში ეძიოს. წარსული საუკუნე ჩვენმა სიტყვაკაზმულმა მწერლობამ სოციოლოგიური კითხვების რკვევით დააბოლავა და ვისურვოთ, რომ ახალ საუკუნეში უფრო მტკიცედ და მეტის ნიჭით ევლოს ამ გზით.

1901 წ.

## სიტყვაკაზმული მწერლობა 1901 წელს

წინა წელთან შედარებით გასული წლის სიტყვაკაზმული მწერლობა უფრო მდიდარი იყო როგორც რაოდენობათ. ისე ღირსებითაც. „მოგზაურში“ დაიბეჭდა და ამ დღეებში ცალკე წიგნადაც გამოვიდა ბ-ნ ნახუცრიშვილის ისტორიული დრამა „იანიჩარი“. როდესაც დიუმამ დაწერა თავისი საუცხოო „მარგარიტა გოტიე“, ის წარუდგინა ლიტერატორებსა და კრიტიკოსებს უტყუარი მსჯავრის დასადებად. შეიკრიბნენ პარნასელნი, განსაჯეს დიუმას პიესა, აწონ-დაწონეს, იდავეს და გადაწყვიტეს ერთხმად, რომ პიესა უზნეო იყო, სახელოვნო ღირსებას მოკლებული — ერთი სიტყვით, არ ვარგოდა. პარნასელთა მსჯავრმა დიუმამ არ შეაშინა, — მან თვით საზოგადოების მსჯავრს მიმართა და აღტაცებულმა საზოგადოებამ ერთხმად აღიარა, რომ პიესა თავისი მაღალი ზნეობით, ჰუმანური იდეით, გრძნობით სავსე ლირიზმითა და სხვ. საუცხოო ლიტერატურულ ნაწარმოებს და დრამას წარმოადგენდა. ჩვენი დრამატული საზოგადოების კომიტეტს უსათუოდ კარგად ხსომებია დიუმას დრამის თავგადასავალი და ამიტომ სასტიკი შეცდომის თავიდან ასაცილებლად მოწონების გზას დადგომა. მაგრამ დახეთ ფათერაკს! ეს გზა უფრო სახიფათო ყოფილა, ვიდრე დაწუნების გზა. ამის საუცხოო მაგალითს წარმოადგენს „იანიჩარი“, რომელიც კომიტეტმა არათუ მოიწონა, პრემიითაც კი დააჯილდოვა. დრამატული ხელოვნება უმაღლეს დარგს წარმოადგენს ხელოვნებისას, იმიტომ კი არა, რომ ბელეტრისტიკას, გინდ პოეზიას, ნაკლები მნიშვნელობა ჰქონდეს, — არა: იმიტომ, რომ დრამატული ხელოვნება გაცილებით მეტ ნიქს მოითხოვს, ვიდრე ლიტერატურული ხელოვნების სხვა დარგი; გარდა იმისა, რომ მწერლის ყოველგვარი სიმპათია, ანტიპათია, იდეალი, მისწრაფებანი ცოცხალ მოქმედ პირებშია აქ ჩამოსხმული, გარდა იმისა, რომ ხასიათების შემუშავება აქ უფრო სამძნელო საქმეა, დრამატულ მწერალს ერთი დაბრკოლება ელობე-



ბა წინ. რასაც სხვა მწერალი მოკლებულია; ეს არის პიესის ტექნიკური მხარე. ყოველი პიესის ასპარეზი სცენაა. პიესის მიზანია, სცენიდან უქადაგოს მაყურებელს ესა თუ ის აზრი, სცენიდან ამხილოს ის ამა თუ იმ უზნებობასა და უსამართლობაში. ამიტომ ლიტერატურული ღირსების გარდა პიესას უნდა ჰქონდეს ტექნიკური ღირსებაც; მისი მოქმედებანი იმდენად ბუნებრივი და მასთან იმდენად შემუშავებული და შეწყობილი უნდა იყვნენ ერთმანეთში, რომ მისი სცენაზე დადგმაც ადვილი იყოს. მაყურებელსაც არ ღლიდეს. პრემიით დაჯილდოებული პიესა კი როგორც სახელოვნო, ისე ტექნიკურ ღირსებას მოკლებულია. თვითეული მოქმედება იმდენად არის ვაკუანურებული, მომქმედი პირები ისე უმიზეზოდ და უთავბოლოდ გადაიან და შემოდიან სცენაზე, მოქმედებათა შორის ისეთი სუსტი კავშირია, რომ სცენაზე ამ პიესის დადგმა შეუძლებელია; ეს დატანჯვაა როგორც მსახიობების, ისე მაყურებელი საზოგადოების. სახელოვნო ღირსება ყოველი ლიტერატურული ნაწარმოებსა სამი ნაწილისაგან შედგება: ლიტერატურულ ნაწარმოებში, ერთი მხრით, უნდა იყოს ისეთი იდეა, რომელიც მკითხველის გულსა და გონებაში სასარგებლო კვალს ტოვებდეს; მეორე მხრით, ხასიათისა და მოქმედების შემუშავებასა და განვითარებაში უნდა იყოს სრული ბუნებრიობა. ძალდაუტანებლობა: ხელოვნება მით განირჩევა მშრალი მეცნიერებისაგან, რომ უკანასკნელი მხოლოდ გონებას მიმართავს, მხოლოდ გონების საზომით ხელმძღვანელობს. პირველი კი ერთსა და იმავე დროს გონებასაც ემსახურება და გრძნობასაც; მან მართო გონება კი არა, გრძნობაც უნდა დააკმაყოფილოს, — აი, ამისათვის კი საჭიროა სახელოვნო ფორმა. ანუ ენის პოეზია: ორ ლიტერატურულ ნაწარმოებში, რომლებსაც ერთი და იგივე იდეა აქვს დასახული, თავის მიზანს ის უკეთ აღწევს, რომელშიაც ენის პოეზია უკეთ არის დაცული. ენისა და აღწერილობის პოეზიას „იანიჩარი“ სრულიად მოკლებულია, ხასიათები სრულებით მკრთალი და უფერულნი. ბუნებრიობა ხომ არსად არ არის დაცული. გამორკვეულ, მკაფიო ხასიათს თქვენ ვერ იპოვით მთელ პიესაში. ცოცხალი ადამიანების მაგიერ აქ თავი შეუყრიათ რაღაც ფანტომებს, რომლებიც პრტყელ-პრტყელ სიტყვებს გაიძახიან მამულის სადიდებლად: აქვე ნახავთ ამაზონცებს. რომელთა ტრაბანს საზღვარი არა აქვს. აქვეა თავმომაბეზრებელი ერთფერობა, გრძობათა გასაოცარი სიყალბე და მრავალი სხვა. ჩვენი ძველი მამები და დედები თუ თავდადებული მამულისწვილნი იყვნენ. ეს კიდევ იმას არ ნიშნავს, ვითომ ისინი ყოველგვარ ადამიანურ გრძნობა მოკლებული ყოფილიყვნენ. მათში გრძნობის სინაზე და სიძლიერე

ერთად იყო შედუღებულმა მამულის სიყვარულთან და ვაჟკაცობასთან. რაც საუცხოოდ დასატა იღ. ქავჭავაძემ „დედა და შვილს“ „ინჰინარში“ კი ავტორმა დავეისტა რაღაც უგულო არსებანი, რომლებსაც სისხლის ღვრის მეტა აღარაფერი სწამთ. თუ ჩვენს ბუნებურ დედას უზენაეს სინარულსა და ნეტარებას აგრძნობინებდა მამულის გამარჯვება. ეს კიდევ არ ნიშნავს იმას. რომ ის ბრძოლაში მოკლულ შვილს აუღელვებლად დასჩერებოდა თავზე. მას თუ გამარჯვება ასარებდა. შვილის დაკარგვა გულს უკლავდა. მისი ვაჟკაცურად სიკვდილი მხოლოდ ანუგეშებდა. ჩვენ ძველ წინაპართა ღირსება სწორედ იმაში მდგომარეობს, რომ მათ მკლავის სიძლიერესთან ერთად გულის სიძლიერე და გრძნობათა სინაზე შეინარჩუნეს, რაც ასე იშვიათად მოხდება ხოლმე. ბ-ნმა ნახუცრიშვილმა კი ეს სრულებით ვერ დაგვანახვა: პატრიოტულმა იდეამ, წინაპართა მამულისადმი თავგამებებულმა სიყვარულმა ის იმდენად გაიტაცა, რომ სრულებით მიავიწყდა წინაპართა ბუნების მეორე მხარე. რაც ვაჟკაცობაზე არანაკლებ ამალღებს მათ. აი, ბრძოლის ველი; ზედ ღვია სასიკვდილოდ დაჭრილი არჩილი — ასლანი, რომელსაც სიცოცხლის ნიშანი აღარც კი ეტყობა და ერთი ყური დაუგდეთ. როგორ შესვლება მას დედა:

უიმე!... ჩემი არჩილი!...  
 ვაი, შენს დედას, ბედკრულო შვილი!...  
 როგორ ვუშველოთ, ახლა რა ვუყოთ?

ასე გეგონებათ, თითქოს ანას თავის არჩილი სამუშაოზე ჰქავს, ლობიოს გაგზავნა დაუგვიანდა და იმას წუხსო!

მოულოდნელად ნაპოვნ შვილს ჭიმშერი მოულოდნელადვე ჰკარგავს. ეყარგება ერთადერთი ქალიშვილიც და ამ მეხს. შეხეთ, როგორ ეგებებიან ისა და მისი კნენინა:

ჭ ი მ შ ე რ. ხალხო, შვილები მე აღარა მყავს...  
 გამხმარ ხესავით დავრჩი ტიალი...  
 ანა. მაგრამ სამშობლო გათავისუფლდა.  
 ეს იყოს მისთვის უკვდავი მსხვერპლი!...

განა ეს ბუნებრივია?! განა ეს მამულისადმი ღრმა სიყვარულს ამტკიცებს?! ეს ამტკიცებს უგულობას. გულქვაობას, უგრძნობლობას. სიმხეცეს და ავტორს რომ ჭიმშერისა და ანასათვის ვაჟკაცული შვილების გარშემო ლეკური ჩამოერბენინებინა. ეს უკეთესი მაგალითი იქნებოდა სამშობლოსადმი ძლიერი სიყვარულისა!

მივმართოთ ახლა პიესის იდეას. წარსულ გმირთა წამოყენებია ავტორს უნდოდა პატრიოტული გრძნობა აღეძრა და გაედვიძებინა მაყურებელში, დაძმური სიყვარულის სქესობრივ სიყვარულთან

დაპირდაპირებით ავტორს წადდა თვითეული მათგანის აწონვა. პირველი დედააზრი ახალს არაფერს არ წარმოადგენს, ის იმდენად მობეზრებული აქვს მკითხველსაც და მაყურებელსაც, რომ მარტო ამგვარი შინაარსი ართმევს პიესას პრემიის უფლებას, სხვა ღირსებით შემკულიც რომ იყოს: წინაპრების სატლავებიდან წამოყენება მხოლოდ იმიტომ, რომ მათი გმირობითა და თავგანწირვით მკითხველი გააკვირო, დღეს ან უსაქმური და უღარდელი კაცის ხელობა ან ისეთის, რომელსაც ცხოვრების მსვლელობისა და საზოგადოების მოთხოვნილებათა შესახებ სრულებით არაფერი გაეგება. ცხოვრება იცვლება, ცვლილება იწვევს ახალ მოთხოვნილებებს, ახალ მისწრაფებათ და ლიტერატურა თუ თავში არ მოექცევა ცხოვრების მსვლელობას. უკან მაინც აღარ უნდა ჩამორჩეს. ბ-ნი ნახუცრი-შვილი კი პირუტყლმა გადამჭდარა დახავსებულ პატრიოტულ იდეაზე, ჩვენი აწმყოსათვის ზურგი შეუქცევა და ჰგონია, თუ ქართველ ქალს შიშველი ხანჯალი ხელში დავაკავებინე და „ჰოი, სამშობლოო, შენთვის მოვკვდები“ ვაძახებინე, ამით სამშობლოს დიდ სამსახურს გაუწევსო.

მეორე დედააზრი — ორნაირი სიყვარულის დაპირისპირება — ორიგინალური და მასთან ერთად საყურადღებო თემაა და მარტო ეს სრულებით საკმარისი იყო, რომ ცოტა ფხიან ნიქს ზედ მთელი დრამა აეშენებინა, მაგრამ ავტორმა ამ თემას არც ჭეროვანი ყურადღება მიაქცია, ვერც შესძლო იმ სულიერი მოძრაობის გადმოშლა, რომელიც აღძრა ასლანსა და ნინოში ორნაირი სიყვარულის შეტაკებამ. მათში ძლიერი ბრძოლა და მღელვარება, სულიერი ტანჯვა და მწუხარება, სულიერი აღტაცება ერთიმეორეს ებრძვიან, მაგრამ ავტორმა ვერ ჩაგვახედა ამ ბრძოლაში, ვერ წარმოგვიდგინა ამ ორი სხვადასხვაგვარი სიყვარულის ზერელე ფსიქოლოგიური ანალიზიც კი, ორი საუცხოო მომენტია პიესაში: ერთი ის როდესაც ანა და სალომე შეიტყობენ, რომ ასლანი და ჯიმშერი მათი შვილები არიან. მეორე ის, როდესაც შეყვარებული ასლანი და ნინო ერთმანეთს შეხვდებიან მას შემდეგ, რაც გაიგეს, რომ და-ძმა იყვნენ.

როგორ, ასლანი ჩემი შვილია!?  
ჩემი არჩილი, ჩემი ბიჭუნა?  
ოპ. მოდი, შვილო, მამ, ჩამეკონე,  
დამიტკებ დიდ ხნის ნადაგი გული?...

აი, როგორ შეეყრება ანა თვრამეტი წლის შემდეგ დაკარგულ შვილს! ეს „მოდი“ და „მამ“ ხომ ყოველგვარ შთაბეჭდილებას უფუჭებს მკითხველს. ასეთი მომენტის დროს ენა დადუმებულია, მხო-

ლოდ გრძნობადა იპყრობს ადამიანის მთელ არსებას და სად არის ეს გრძნობა? „მოდო“ და „მაშ“-ში?!

მეორე მომენტი უკეთ დახატა ავტორმა: აქ მარტო „ძმარ“ და „დაოს“ შეყვარება ასლანისა და ნინოს მიერ საკმაოდ უხატავს მაყურებელს მათს სულიერ მდგომარეობას, მაგრამ ამ შთაბეჭდილებას სრულებით აქარწყლებს და-ძმის შემდეგი საუბარი.

პიესაში ბევრი სხვა სიყალბეა და ნაძალადეობა, რომელთა ჩამოთვლას მე აქ არ გამოვუდგები. საუკეთესო ადგილად უნდა ჩაითვალოს ასლანის მონოლოგი უქანასკნელ მოქმედებაში:

ამ ქვეყანაზედ ბედის ღიმილი  
ცრუპენტელა და ცვალებადია, და სხვ.

„მოგზაურის“ ფურცლებზე „გამოიქანქარიკა“ გასულ წელს ერთმა საკვირველმა პოეტმა ბ-ნმა ლასურიძემ. როდესაც მწერალს პოეტობის ნატამალი მიანიც სცხია, მაშინ კიდევ შესაძლებელია თავისი ნაწარმოების შესახებ გაზვიადებული წარმოდგენისა იყოს, მაგრამ როდესაც მას პოეტური ნიჭი სიზმრადაც არ ზმანებია და „საშინელსა ტანჯვასა შიგან“ შობს ყოველ ჯაგლაგ რითმას, თავმოყვარეობა ნებას არ უნდა აძლევდეს საჯაროდ გამოსვლისას. თუ ბ-ნ ლასურიძეს ჰგონია, რომ მას პოეტის ნიჭი აქვს. შესაბრალისია; თუ მას სწამს, რომ რაიმე მნიშვნელობა აქვს ძველი წიგნებიდან ისეთი სიტყვების ამოკრებას, რომელთა აზრი მასაც არ გაეგებ: კარგად, საცოდავია. მთელი წლის განმავლობაში „მოგზაურმა“ ვერც მისცა მკითხველს საზოგადოებას ვერც ერთი სახელოვნო ნაწარმოები. რომელშიც რაიმე ღირსება მოიპოებოდეს, და ეს უმთავრესად იმიტომ, რომ მისმა რედაქტორმა ის სამადლო თავშესაფარად განადა.

წარსული წლის განმავლობაში „კვალში“ დაიბეჭდა ორი საყურადღებო მოთხრობა: „ცოლი და ქმარი“ ეგ. ნინოშვილისა და „ეფემიას ოცნება“ ლალიონისა. განსვენებული ეგ. ნინოშვილი ნიჭიერი და მასთან ნაყოფიერი მწერალი იყო; თითქოს გრძნობდა. რომ დიდი დღე არა ჰქონდა, და ამიტომ მისი ყოველი ნაწარმოები აჩქარებული შრომის ნაყოფია. ზოგიერთი მისი მოთხრობა, როგორც მაგ. „პარტახი“, გაუშალაშინებელი. ზოგი კი სრულებით შეუმუშავებელი დარჩა ავტორს. „ცოლი და ქმარიც“ ასეთ შეუმუშავებელ მოთხრობას წარმოადგენს. დედააზრი ამ მოთხრობისა იგივეა, რაც „პარტახის“; — თუ როგორ არღვევს და ღუპავს ოჯახს ხანგადასული ჩვეულებანი. ზოგიერთი სურათი და თვით წვრილმანიც კი ორივე მოთხრობაში ერთი და იგივეა. ხოლო. მოქმედება „ცოლსა

და ქმარში“ უფრო ბუნებრივად არის განვითარებული. ავტორი თავის ნიკს აქ ძალას არ ატანს და ამიტომაც მოთხრობაში არ არის ის ტენდენცია, რომელიც „პარტახის“ სუსტ მხარეს შეადგენს. რამდენიმე ხასიათი მკაფიოდ და უნაკლოდ არის დახატული, ჩვენი ცხოვრების სურათები სინამდვილით აქვს ავტორს გაუმოღებული. მაგრამ მოთხრობის თემა, რომელიც ახალი და მასთან ფრიად საყურადღებო იყო ამ 7-8 წლის წინათ, დღეს უკვე მოძველდა და მკითხველს ვეღარ დააინტერესებს. ნინოშვილის მოთხრობები იგივე პუბლიცისტკაა: ყოველი თემა ავტორს იმდენად აინტერესებდა, რამდენადაც ეს თემა ცხოვრების დამახასიათებელი იყო; ის, რაც ცხოვრებას არ ეხებოდა, ნინოშვილის ნიკს ვერ იზიდავდა, ამიტომ ნინოშვილის მოთხრობათა ძალა შათს სოციალურ მნიშვნელობაში მდგომარეობს; ნინოშვილის ნიკი უტყუარი სარკეა თავისი დროის, ახვა მნიშვნელობა მას არა აქვს. ამგვარსავე გზას ადგას ბ-ნი ლალიონი. მაგრამ, სამწუხაროდ, ამ ავტორის ნიკი მეტად სუსტი ნაყოფიერებისაა, მისი „ეფემიას ოცნება“. რომელიც „კვალში“ იბეჭდებოდა. დაუმთავრებელი მოთხრობის შთაბეჭდილებას ახდენს მკითხველზე. ავტორმა ისე მოასწრაფა ბოლო, რომ მკითხველი გრძნობს, რომ რაღაც აკლია; მოთხრობაში არის გამოყვანილი სოფლის ქალი ეფემია, რომელიც დანარჩენებისაგან ბევრში განირჩევა, მაგრამ ამ ქალის სურათი ავტორს მკრთალი გამოუვიდა. აღნიშნულ ნაკლოვანებათა უმთავრესი მიზეზი ის არის, რომ ავტორის მთელი უკრადლება გიორგი პინტილიანსა აქვს მიქცეული. გიორგი პინტილიანი საუცხოო ტიპია ჩვენი ბურჟუაზიისა. ასე ნათლად და მკაფიოდ დახატულ ტიპს დღევანდელი ქართველი ბურჟუაზიისას ახვა ჩვენ ბელეტრისტებს ვერ უპოვით. „ფირალ დავლაძესა“ და „ეფემიას ოცნება“ შორის ექვსი წლის მანძილი არც კი არის და მიღსებულად ამისა, შეხეთ, რა შესამჩნევი ცვლილება განუტდია ამ ხნის განმავლობაში ჩვენს ცხოვრებას! შეადარეთ ერთმანეთს პირველი მოთხრობის ნიკო კალაძე და მეორის გიორგი პინტილიანი და აწკარათ დარწმუნდებით ამაში. გიორგი პინტილიანი იგივე „მოწიფული“ ნიკო კალაძეა. ამ ორ პირთა შორის დიდი მსგავსებაა. — ერთი და მეორეც ნაყოფია ახალი დროის. ერთი და მეორეც ვაქრობის გზას დადგომია. ორივეს ფული. შოგება და სიმდიდრე აინტერესებს მხოლოდ და ფულის საზომით ზომავენ ყოველისფერს: ზნეობა. უზნეობა. სინდანი, პატიოსნება არც ერთსათვის არ სეობს; მათ სწამთ მხოლოდ სიღარიბე და სიმდიდრე, ორივეს ახალი დროის კაცად მოაქვთ თავი, მაგრამ ამ დროისაგან მათ შეუძენიათ მხოლოდ ცული, გასაკიცხი თვისებანი და ფული. ამავე დროს

ამ ორ პირთა შორის დიდი ვანსხევაებაა. ამ 7--8 წლის წინათ იმ წრიდან გამოსულთ შორის. რომელსაც ავტორი ავეციერს. გიორგი პინტილიანებს იშვიათად წააწყდებოდით. — ყველა ნიკო კალაძეს წააგავდა; დღეს კი ნიკო კალაძეები გაიზარდნენ, გამოიცივალნენ და პინტილიანებად იქცნენ. ნიკო კალაძე ჯერ დაუღუფლებელი კაცია თავისი რწმენა-შესხედლებით. მართალია, ის სოფელს მოშორდა, მაგრამ სრულებით არ მოსწყვეტია მას. სოფელი მას კიდევ ძლიერად იზიდავს. ქალაქში მას მხოლოდ ფულის შეტენის სურვილი აჩერებს, ქალაქის უპირატესობას სოფელთან ის მხოლოდ ფულში ხედავს თავისი რწმენითა და შესხედლებით ის ჯერ კიდევ ბევრში ჰგავს სოფლელებს, მოწონს ბევრი რამ ისეთი. რაც საზოგადოდ, სოფლის კაცს იზიდავს. ერთი სიტყვით. მისი გემოვნება, მისი შესხედლებანი ჯერ არ დაშორებია სოფლის გემოვნებასა და შესხედლებას. სულ სხვაა გიორგი პინტილიანი. ის სრულებით მოსწყვეტია სოფელს. რომელთანაც მას აღარაფერი აერთებს. სოფელი ძულს მას. რადგანაც ეს მის გემოვნებას სრულებით არ შეეფერება. ქალაქი კი იზიდავს მარტო იმიტომ კი არა. რომ იქ ფულია. არამედ იმიტაც. რომ ქალაქში აღამიანი სრული ცხოვრებით ცხოვრობს. რასაც კი სული და გული ინატრებს. ყოველისფერი იშოვება. გიორგის სოფლელებთან საერთო აღარაფერი აღარა აქვს. ის ყველას მაღლიდან დაქცერას დამცინავის ღამილით და გულში ფიქრობს. ჩემთან შედარებით რა შესაბრალონი ხართ ყველანი. ის დამცინის მათს დროსტარებას. მათ სიმღერას. მათ მუსიკას. მათს ჩაცმულობას. ეზო-სახლკარს და სხვ. არაფერი სოფელურა მას აღარ მაყოფილებს. — ესაა თქვენი დროსტარება!... ამით კმაყოფილი ხართ თქვენ, არა! აი. როგორ პასუხს იძლევა ის ელენეს ყოველ მეცადინეობაზე, რომ მას მოაწონოს რამე და როგორმე გაართოს; არა. თუ გემოვნებით. გონებითაც ვაცლებით მაღლა აყენებს გიორგი თავის თავს სოფლელებთან შედარებით; ისე ელაპარაკება ყველას, როგორც ბევრის მცოდნე. მათთან შედარებით. ეს ტანი ავტორს საუცხოოდ აქვს დასატული და თუ ის ბევრში ვანიროვნე კალაძისაგან, ეს მხოლოდ იმის ნიშანია, რომ ჩვენი ცხოვრება შეუჩერებლად მიდის წინ. კაპიტალისტური წარმოების გზაზე. და უანდათან მეტ ცვლილებას იწვევს ჩვენს საზოგადოებრივ წყობილებაში.

გიორგი პინტილიანს ბევრში წააგავს მისიელ მეთუნაშვილი. რომელიც ს. ო. --ას ყავს გამოყვანილი თავის „წუთოსოფელში“. ეს მოთხრობა 1900 წელს იბეჭდებოდა და ვახუშტი წლის პირველ ნომერში დამთავრდა. თუ გიორგი პინტილიანი წარმომადგენელია ქართველი ბურჟუაზიისა, რომელსაც თავისი მოქმედების ასპარეზი

ქალაქში გადაუტანია. სამაგიეროდ მიხეილ მკაუნაშვილს სოფლად დაუწყო თავისი მიზნის განხორციელება! მერე რაში მდგომარეობს ამისი მიზანი? გამდიდრებაში. ფულის შეძენის გულისათვის ის არაფერს არა თაკილობს, ყოველიფერს კადრულობს. ყოველგვარ და ყოველიფერში ის მხოლოდ ფულს ეძებს; „პატიოსნება, ძმობა, მეგობრობა, სიყვარული მისთვის არ არსებობენ, — ფული და პირუტყვეული განცხრომა-სიამოვნება — აი, რაში ჰპოვებს ის შინაარსს ცხოვრებისას. ერთადერთი დამოკიდებულება, რომელიც სუფევს მასა და დანარჩენთა შორის — ეს არის სარგებლობისა და სიამოვნების შეძენა, ყველას გაფუჭვანა და გატყავება. უმანკოების ცინიკურად შელახვა“ — აი, მთელი მისი მოღვაწეობა. ფსიქოლოგია ამ გმირისა ავტორს ძალიან კარგად აქვს დასახული, მოქმედება მთელ მოთხრობაში მწყობრად და ბუნებრივად არის განვითარებული, სხვადასხვა ნაწილები ერთმანეთთან ლირიკულად არის დაკავშირებული და ყოველივე ეს ამტკიცებს, რომ ავტორს სახელოვნო ნიჭი აქვს. ამ მოთხრობაშივე შეეხო ავტორი თავადაზნაურობის „დალუპვის“ კითხვასაც, ამ კითხვის სახელოვნო ფორმაში განვითარებით ავტორმა დაგვანახვა, რომ თავადაზნაურობას, როგორც განკერძოებულ წოდებას, ვერაფერი ვეღარ იხსნის; მატერიალურად ის დღითიდღე ლატაკდება, ყოველივე განკერძოებული უპირატესობანი მან თითქმის უკვე დაკარგა. მაგრამ ყველაზე უფრო სამწუხარო ის არის, რომ გონებრივად და ზნეობრივად თავადაზნაურობა ერთ წერტილზე გაიყინა, აღარავითარი წინმსვლელობა ამ მხრივ მას აღარ ეტყობა: ყოველი მხრით ის გადაშენების გზას ადგას. აიღეთ თავადი გედევანი და მისი მეუღლე. განა ცხადზე ცხადი არ არის, რომ მათი დღენი დათვლილია? განა აშკარა არ არის, რომ ესენი წარსულს ეკუთვნიან და არა მომავალს, აწმყოში კი შესაბრალის სურათს წარმოადგენენ სულთმობრძავეისას? ჩვენს მწერლობაში არა ერთხელ და ორჯერ თქმულა, რომ წოდებათა მოსპობა ჩვენს ცხოვრებაში თვით დრომ მოიტანა და მასთან ბრძოლა, მისი შეცვლა ყოველად შეუძლებელია. ყველა მიმართულების პირნი აღიარებენ დღეს ჩვენში, რომ საქართველო ევროპიელდება, ჩვენ ყველას გვინდა, ყველა შევხარით ამ გავეროპიელებას. რომ იქნება აქ მაინც ვპოვოთ პასუხი მწვავე კითხვებზე. აქ მაინც ვპოვოთ მალამო სოციალური წყულულებისათვის; მაგრამ ამავე დროს თითქოს კარგად არ გვესმის. რას ნიშნავს ეს გავეროპიელება, ევროპასაც ვებოტინებით და „ჩვენებური, ძველებურიც“ არ გვინდა, მაშინ. როდესაც ორივე ერთად შეუთანხმებელია. მოუხერხებელია. მით უფრო გასაოცარია გულუბრყვილობა და გაუგებრობა ზოგიერთი მწერლისა ჩვენში, რომ-

ლებსაც სწამთ. რომ შესაძლებელია ყველა წოდებათათვის ერთნაირად ზრუნვა. გაიხედ-გამოიხედეთ. ჩაუკვირდით ჩვენს ცხოვრებას კარგად დაინახეთ, რომ წოდებები მიდიან, მათ ალაგს სხვა მოდის; ამგვარ პირობებში თავადაზნაურობის გასამაგრებლად ზრუნვა არა თუ შეუძლებელია, სიზიფის შრომაა, უაზრო და უნაყოფო. ერთადერთი, რაც შეიძლება თავადაზნაურობისათვის, ეს მისი გონებრივი და ზნეობრივი წარმატებისათვის ზრუნვა, აი. აქ არის მისი ფრიად სუსტი და საშიში მხარე და ამას უნდა მიაქციოს მთელი თავისი ყურადღება მან, ვისაც მისთვის გული შესტკივა. ხოლო დღეს თუ ხვალ თავადაზნაურობამ სამუდამოდ რომ უნდა დაკარგოს წოდებრივი სახე დაუბრუნებლად, ეს უკვე გადაწყვეტილია ისტორიისაგან. ზემოთ აღნიშნული მოთხრობის ერთი დიდი ნაკლოვანება იმაში გამოიხატება, რომ ზოგიერთი ადგილი ნამეტანი ცინიზმით არის აწერილი, მაგალითად, სულიკოს ბავშვობა და მისი უმანკო გარყვნილება, სხვისი მიბაძვით გამოწვეული. ასეთი ადგილები მოთხრობას არაფერს მატებენ: ყოველი მკითხველი კარგად მიხვდება, რომ დედის გარყვნილების მოწმედ ყოფნა ბავშვზე ცუდად იმოქმედებდა; პირიქით, ცინიკური რეალიზმი დიდ ნაკლულევანებას შეადგენს ყოველი სახელოვნო ნაწარმოებისას მაშინ, როდესაც ასეთ ცინიზმს არავითარი მოსაზრება არ ამართლებს. საჭიროა და სასურველიც ცხოვრების სისაძაგლისა და გარყვნილობის აშკარად და თამამად ხატვა მაშინ. როდესაც ავტორს მიზნად ქვეს ცხოვრების ამალება; ხოლო დაწვრილებით აღწერა იმისა თუ რას შერებოდა პატარა სულაკო ლოგინში ან როგორ იხუტებდა მუთაქას. მხოლოდ შეურაცხყოფს მკითხველის ესთეტიურ გემოვნებას. შეძენით კი მას ვერაფერს ვერ შესძენს. ნატურალიზმი კარგია მხოლოდ მაშინ, როდესაც ის ებრძვის ცხოვრების სისაძაგლეს. გასაკიცხია მაშინ. როდესაც ის ხატავს ყოველგვარ უზნეო მოვლენას იმისდა განუკითხავად თუ რა მიზანი აქვს ასეთ ხატვას. სამწუხაროდ. ჩვენ მწერლობაში ჩნდება აქა-იქ ნატურალიზმის ცუდი მხარის ნიშნები და კრიტიკის მოვალეობაა. მათს განვითარებას ებრძოლოს.

ან. ერისთავ-ხოშტარაას „კერა“ და ბარნოვის „მეჩვენა“ უნდა ჩაითვალოს ფრიად სუსტ ნაწარმოებებად. „კერაში“ თქვენ ვერ ხედავთ იმ ნიქს. იმ დაკვირვებას და ცოდნას ცხოვრებისას. რომელიც გამოიჩინა ავტორმა თავის წინანდელ ნაწერებში. გლეხის ბუნება ალაგ-ალაგ თუ რაგინად არის დახასიათებული. საერთოდ. სრულებით დამახინჯებულია ავტორის მიერ. ყოველივე ამას მიუმატეთ ის. რომ თემა მეტად შაბლონური და ყურადღებას მოკლებულია. და დამეთანხმებით. რომ „მოლიაულ გზაზე“ ავტორმა



ამისთანა ს-უფეცტებზე არ უნდა გააცდინოს კალამი და, თუ უკუკო-  
ლის დაწერა აღარ შეუძლია. უნდა შეჩერდეს: დახურდავებას და დაქ-  
ვეითებას ისევ კარგზე შეწყვეტა ჯობია. გლენის გოგოს შეუყვარ-  
დება გლენის ბიჭი: შეყვარებულთ ბევრი დაბრკოლება ელოდებათ  
წინ, მაგრამ ისინი მაინც თავის მიზანს მიაღწევენ. მაგრამ დახეთ  
უბედურებას? სიმონა კლდეზე გადაიჩეხება და მოკვდება და დარ-  
ჩება მართა თავის პატარა ბიჭის ამარა, რომლის შთასახვაც ავ-  
ტორს დიდი სიყვარულით აქვს აწერილი! ასეთ სიუჟეტში არაფერი  
არ არის საყურადღებო. ყოველგვ — მართას გაპარვიდან მოკვლე-  
ბული სიმონას სიკვდილამდე. შაბლონურად არის აწერილი. ამასაც  
რომ თავი დავანებოთ. ერთი მიბრძანეთ. ვისთვის ან რისთვის არას  
საჭირო და საყურადღებო. როგორ ებერებოდა დაორსულებულ  
მართას მუცელი და როგორის მორცხვობით დაჩერებოდა ზედ  
მართა?

ბ-ნმა ბარნოვმა „მეჩვენა“ ყარგად დაიწყო და ცუდად გაათა-  
ვა. როდესაც მოთსრობას კითხულობთ. გგონიათ. აი. აგერ. შეენება  
ავტორი. აი. აგერ საჭირობოროტო კითხვებსო, მაგრამ ავტორი ერთ-  
ბაშად გადადის სიყვარულზე: თეკლესი და უშანგის შეუღლება  
უბედური ნაბაჯი გამოდგება. იოსების ლოგინს უშანგი დაეპატრო-  
ნება. იოსებ სანდომიძეც თავს იკლავს. მაგრამ ავტორები ამ ეკო  
შემთხვევაში თუ რევოლუციით ისტუმრებენ საიქიოს თავის ვმო-  
რებს. ბარნოვი ორაგინალობას იჩენს: მესამე სართულიდან ის-  
ტუმრებს მგონი. ოხ. ამ სიყვარულმა მკითხველებს თავი მოაბეზრა:  
მაგრამ ჩვენ ბელეტრისტებს ჯერ კიდევ არ ბეზრდებათ! უმტყეკეთ  
მათ. რომ ცხოვრებაში დღეს სხვა რამ უფრო საყურადღებოა. ვაღ-  
რე სიყვარული. რომ ცხოვრებაში ბევრი რამ დგას სქესობრივ სიყ-  
ვარულზე მაღლა. რომ ადამიანი მარტო სიყვარულით არა ცოცხ-  
ლობს. მარტო სიყვარული არ აანტერებს მას. ჩვენი ბელეტრის-  
ტები მარტო სიყვარულსა და მხოლოდ სიყვარულს ხედავენ გარშე-  
ჰო. მეტს ვერაფერს. მართალია. სუსტი ნიქისათვის გათელილი  
ვაკვეთილი გზით სიარული უფრო ადვილია. ვიდრე ახალი  
მოპოება. მაგრამ დროა. რომ ჩვენმა ბელეტრისტიკამ მიანებოს თი-  
ვი ცარიელი სიყვარულის ხატვასა და თვალი გაახილოს. თორემ  
ამავე გზით თუ იარა, ჩამორჩება ცხოვრებას.

ბ-ნ ვაჟა-ფშაველას „გველის მკამელი“ როგორც თავისი დე-  
დაზრით. ასე სახელოვნო ღირსებით სამაგალითო ნაწარმოებს წარ-  
მოადგენს. პუნების სურათების აღწერაში ავტორის ნიჭი ძლიერია.  
მხატვრული ენა. პოეტურად დახატული სურათები „გველის მკა-  
მელს“ არ აკლია. მაგრამ მის უმთავრეს ღირსებას შეადგენს აზრის

სიმარტავე და მასთან სიღრმე. საწამ მინდია მისდევდა მხოლოდ სულის-თქმას, ეძებდა ქვეყნიერებაზე ჭეშმარიტებას და სიყვარულს, მისი სულის სიმშვიდე შეურყეველი იყო. მისი ბედნიერება დურღვეველი; როდესაც მან თავი დაანება სულის სამსახურს და მის თავად დაემორჩილა სორცის თქმათა. უარყო ჭეშმარიტება და სიყვარული და მათ მაგიერ წინ წამძღვარა მატერიალური მისწრაფებანი და სრული ეგოიზმი. — მისი სულიერი სიმშვიდე დაარღვა. მისი ბედნიერება სამუდამოდ მოიხსო. ბუნებამ დაკარგა მისთვის მნიშვნელობა, მან ბუნებისათვის; წინათ. თუ მას ყვევილებიც კი შექმაროდნენ. დღეს ის მარტო აკუთარა თავის ამარალა არის დარჩენილი. ბუნებამ უარყო, ხალხისათვის უსარგებლოა და ამგვარი სიცოცხლე მას ტანჯვის მეტს აღარას აძლევს. — მას გული წყდება წარსულზე. ნატრობს მის დაბრუნებას. მაგრამ ამაოდ: მინდია დეკა სამუდამოდ. დამდაბლდა, რომ აღარასოდეს აღარ აღდგეს. აღარ ამაღლდეს. რამ გამოიწვია ასეთი ძირითადი და მოულოდნელი ცვლილება მინდიას არსებაში? ცოლ-შვილსა და ოჯახზე ზრუნვამ; მხოლოდ ამ ერთადერთ მიზეზს ასახელებს ავტორი. მაგრამ მიზეზი ამგვარი მოვლენისა უფრო რთულია. უფრო ღრმა. ვიდრე მარტო ერთი ოჯახი. რაც უნდა იყოს. ავტორის გადაკრილი პასუხი ექვს ვარზევე ჰყოფს, რომ მას თანამედროვე ოჯახი მიანხია ადამიანის იდეალურ მისწრაფებათა ბორკილად. ეს აზრი სრულ ჭეშმარიტებად უნდა ჩაითვალოს. თანამედროვე. მონოგამიური ოჯახი გამოირყვა და თანდათან განვითარდა მხოლოდ მაშინ. როდესაც კერძო საკუთარების იდეა და სიყვარული თვით ცხოვრებამ ააღორძინა და გააძლიერა ადამიანმა. რამდენიც უნდა ამტკიცონ. რომ ოჯახი ბურჯის სახელმწიფოსი. საზოგადოების და სხვ. ექვს ვარზევეა. რომ დღევანდელ ოჯახს სახეში ჰყავს ადამიანი და არა საზოგადოება; ის უფრო ავითარებს ადამიანში ეგოისტურ გრძნობებსა და პირად მატერიალურ მისწრაფებათ. ვიდრე სოციალურსა და იდეალურს; დღევანდელი ოჯახი იმ კლდეს წარმოადგენს. რომელზედაც მიჯაჭვულია ადამიანის მთელი ძალ-ლოხვ და საშუალო ადამიანი მხოლოდ ოქნებაში თუ გაინთავსუფლებს თავს და ვაცილდება ოჯახის საზღვრებს; ნამდვილად კი ის სრული მონაა ოჯახის. ოჯახზე და მამასა-დამე. საკუთარ თავზე ზრუნვას ხმარდება მთელი მისი ძალ-ლოხვ.

თქვენი არ ვიცი. მკითხველუ. და მე კი მწარედ მეცინება ხოლმე. როდესაც ვკითხულობ აღფრთოვანებულ პოეზიას ძმობაზე. ერთობაზე. სიყვარულზე და სხვა ამგვარ მცნებებზე. რომელთა გმინაარსიანებას ასე ესწრაფვის ადამიანის ოცნება. ერთი მითიარით. სად არის ეს ძმობა. ერთობა. სიყვარული და ან განა შე-

საძლებელია მათი განხორციელება დღევანდელ პირობებში? ყველა ის მცნებანი, რომლებიც საერთოდ შინაარსს შეადგენს დღევანდელი ცხოვრების იდეალისას, სოციალური მცნებანი არიან, — ინდივიდუალურმა იდეალმა თავისი დრო და უამი მოჰამა, მან მისცა ადამიანს, ის, რისი მიცემაც შეეძლო, აწინდელი იდეალი კი სოციალურია, მას სახეში ჰყავს საზოგადოება და არა პიროვნება. ადამიანს კი უნდა სოციალური იდეალი განახორციელოს ინდივიდუალური ცხოვრების პირობებში, მთელი მისი ძალ-ღონე თავის თავისთავის ზრუნვას ხმარდება და ამავე დროს კი ის ოცნებობს საზოგადოებრივ იდეალებზე? ორივე ეს ერთად შეუთანხმებელია; ყოველგვარი დაწესებულება, რომელიც ადამიანში ავითარებს ეგოისტურ გრძნობებს, მარტო თავის თავისთავის ზრუნვის აუცილებლობას, ყოველი დაწესებულება, რომელიც წინ ეღობება ადამიანის ძალ-ღონეს და არ უშვებს მას საზოგადოებრივი იდეალებისაკენ, დღეს დროს გადასულ და მავნე დაწესებულებად უნდა ჩაითვალოს, ასეთ დაწესებულებათა რიცხვს ეკუთვნის დღევანდელი ოჯახიც; ოჯახის არსებული ფორმის მოსპობა იგივე განთავისუფლებაა პიროვნებისა საზოგადოებისათვის. მინდია მაშინ მოწყდა ქვეყნიერებას, მაშინ დაეხურა მას გზა სინათლისა და ჭეშმარიტებისაკენ, როდესაც მან ოჯახი აიკიდა ზურგზე. ადამიანის დანიშნულება, მისი მოვალეობა მინდიას სრულებით სხვანაირად ესმის; დღევანდელ ადამიანს თუ სახეში უმთავრესად ოჯახი ჰყავს, თუ ის უმთავრესად ოჯახისათვის ზრუნავს, მინდიას სახეში ჰყავს საზოგადოება, და არა მარტო საზოგადოება, მთელი კაცობრიობა. მთელი ბუნება: მას უბრალო მინდვრის ბალახიც კი ატყობინებს თავის საჭიროებას. მინდიას მთელი არსება აქეთ მოისწრაფვის, იქ ხედავს ის ჭეშმარიტებას, მაგრამ ოჯახმა მის მისწრაფებას ფრთები შეაკვეცა. მინდიას მთელი არსება შებორკა და დღეს ის ოცნებით თუ ისევ დაკარგული ცხოვრებისა და ადგილისაკენ მიისწრაფვის. ნამდვილად. საქმით კი ყოველივე იმას უარჰყოფს, რითაც წინათ ცოცხლობდა. ღრმა აზრს ვაჟა-ფშაველას ამ ახალი ნაწარმოებების ჩვენ სწორედ განხილულ იდეაში ვხედავთ, ასეთი იდეა ჩვენს მწერლობაში სრულებით ახალია. ავტორმა მარტივად და მასთან მკაფიოდ დაუხატა თვალწინ მკითხველს ეს იდეა და ამით მიმართა მისი აზროვნება ისეთი კითხვისაკენ, რომლებიც დღევანდელ პირობებში ერთ საჭირობოროტო კითხვათ გადაქცევია განათლებულ კაცობრიობას. მინდია რაკი ერთხელ გადაცდა ჭეშმარიტების გზას, მისი აღდგენა შეუძლებელია. ის მხოლოდ ოცნებითლა უნდა ეკუთვნოდეს თავის იდეალებს, ნამდვილად კი მონა უნდა იყოს თავისი მატერიალური

მოთხოვნილებებს; მინდია ამგვარად დამარცხდა, მაგრამ მისი დამარცხება მისი ტანჯვა, მისი გლოვა წარსულისა საუკეთესო თავდება, თუ საით უფრო მიისწრაფვის ადამიანის სული, თუ რამ უნდა გაიმარჯვოს საბოლოოდ და როგორ უნდა მოეწყოს შემდეგში ჩვენი საზოგადოებრივი ცხოვრება; ქეშმარიტება. სამართლიანობა და სიყვარული უნდა დამკვიდრდენ, ბოლოსაც იქნება, ცხოვრებაში და საზოგადოებაში უნდა მოისპოს ყოველივე ის, რაც ცხოვრების ასეთ ტენდენციას ელობება.

ოჯახის კითხვასთან მკიდროდ არის შეკავშირებული ქალთა კითხვაც, ქალთა ემანსიპაციაც. უფლებათა და მოვალეობათა თანასწორობა მამაკაცთა და ქალთა შორის საზოგადოებრივ ცხოვრებაში იგივე შეცვლას დღევანდელი ოჯახისა; ქალთა ემანსიპაცია და დღევანდელი ოჯახის შეცვლის საჭიროება ერთი და იმავე მიზეზით არააან გამოწვეული. ქალის ქომადგად, ცოლის მოსარჩლედ, ემანსიპაციის მოტრფიალედ და დამცველად გამოვიდა ქ-ნი ეკ. გაბაშვილი თავის „ლუარსაბს პატრონი გაუჩნდაში“, მაგრამ ავტორმა, სამწუხაროდ. მიზანს ვერ მიაღწია, მოთხრობა უფრო მოსწრაფებულ ნაწარმოებს წარმოადგენს, ვიდრე დაფიქრებულსა და შემუშავებულს. ავტორი ამტყუნებს ლუარსაბს იმაში, რაშიაც ის სრულებით არ არის გასამტყუნარი, მოწონს ვერაში ის, რაც მის სუსტ და გასაკიცხ მხარეს შეადგენს და ამიტომ ავტორის მიერ დაცვა ქალის თავისუფლებისა და ემანსიპაციისა სრულებით ყალბი გამოდგა. ავტორის აღწერით, „ლუარსაბი დიდი ლიბერალი იყო; თუმცა ქალთა ემანსიპაციას დიდ მნიშვნელობას აძლევდა და ფართო მოედანს უთმობდა თავის წარმოდგენაში, მაგრამ ნამდვილად კი განხორციელებული მამაკაცი იყო, ყოველის ეგოისტურის მამაკაცური მოთხოვნილებით, რომ ცოლი უნდა იყოს ქმრის — თუ არა სრული მონა, გამგონი მაინც იმისი განკარგულებისა, ამსრულებელი იმისი სურვილებისა, დამცველი და გამფრთხილებელი ყოველი იმის შექენილის გროშისა“ და სხვ. მიუხედავად ამისა, მთელ მოთხრობაში ჩვენ ვერ ვხედავთ ვერც ერთ ალაგს, რომელიც გვიმტკიცებს ლუარსაბის ხასიათის ასეთ ორგვარობას, რომელიც აშკარად ყოფდეს, რომ ლუარსაბი ნამდვილად მტერი იყო ცოლ-ქმარს შორის უფლებათა თანასწორობისა. რა არ მოწონდა მას თავის ცოლში? ამისათვის საჭიროა განვიხილოთ მოკლედ, რაში იხატებოდა ვერას ცხოვრება, მისი მისწრაფება, მისი იდეალები. ქმარი და სიყვარული მის გონებაში ერთად მოუთავსებელია, სიყვარულით გათხოვება მის მიზანს არ შეადგენს, ის გაყვება ყველას, ვისაც ფული ექნება, იმ იმედით, რომ ქვეყანა ერთი კაცის ამარა არ დარჩება და მას „არშეიყობის დრა

ქონდა და ექნება კიდევ. მან გადაწყვიტა, ლუარსაბს გაყოლოდა მხოლოდ იმიტომ. რომ ლუარსაბი შეძლების კაცი იყო და კარგი პრაქტიკაც ჰქონდა. გათხოვდა თუ არა. ქმრისაგან მოგროვილი ფული უცებ გაფლანგა. სახლის მორთულობას მოანდომა, დაიწყო ბაღებისა და „ვეჩერების“ გამართვა და ესეც არ იკმარა. -- თავი იხატევა აასრულა და არშიყი გაიჩინა. ერთი სატყეით. ვერას მიზანი იყო. შეძლებულ კაცს გაყოლოდა, რომ მისი ფულების შემწეობით ისეთი პირუტყვიანი ცხოვრება დაეწყო. როგორც ყოველი გონიერი ადამიანისაგან გასაკიცხია. ყოველივე ეს არ მოსწონდა ლუარსაბს, მაგრამ ის ცოლს მაინც არ ავიწროებდა. ის მხოლოდ უკმაყოფილებას აცხადებდა. ისიც ლმობიერად და მშვიდად. წარმოიდგინეთ. მკითხველო, ცოლ-ქმარი. რომელთაგან ქმარი შრომობს. ცოლი კი მისი ნაშრომით ბაღებს, კონცერტებს, სადილ-ვენამშებებსა მართავს და საყვარელს ინახავს! აი, ასეთი ცოლ-ქმარი არიან ლუარსაბი და ვერა; ნუთუ ლუარსაბის გაუბედავი უკმაყოფილება იმის მომასწავებელია. რომ ის მეტერია ქალთა ემანსიპაციის? ან იქნებ ავტორს ისეთი ცხოვრება. როგორითაც ვერა ცხოვრობს, ემანსიპაცია გონია? ავტორი რამდენიმე ადგილას ირონიულად უწოდებს ლუარსაბს „ემანსიპაციის მიმდევარ გმირს“ და ამით ამტკიცებს. რომ ემანსიპაციის სახე მას ან მეტად ბუნდოვნად აქვს წარმოდგენილი. ან მოთხრობაში. ვერ დახატა ის. რაც ჩაფიქრებული ჰქონდა.

იქ. სადაც საყვარელი არ არის. ცოლსა და ქმარს ერთად ადგილი არა აქვთ; ამიტომ, თუ ვერა გაექცა ლუარსაბს. ეს ასეც უნდა მომხდარყო. ამაში ვერას ვერავეინ გაამტყუნებს, მის ამგვარ მოქმედებას უზნეობის. უსინდისობის სახელით ვერავეინ მონათლავს, მაგრამ იმ ქალს. რომელიც ანგარიშით. უსაყვარულოდ მიჰყვება ქმარს. უფლება არა აქვს თავი იმართლოს, არ მიყვარდა და მიტომ დავანებე თავიო. ვერა კი. პირიქით, ქმარსა ჰკიცხავს. ქმარს დასცინოს. შენი საყვარელი კოლიო სხვამ გიხარშოსო. და იმის დაცინვას ავტორიც უერთდება. სრულებით ვერას მხარეს იჭერს და ლუარსაბს კი ჰკიცხავს. მერე რა საბუთით? იმ საბუთით. რომ ლუარსაბი „უსასო. უგვარო და უღაზათო“ იყო. ამას სომ გვრისწერამდეც სედავდა: ვერა? და არათუ სედავდა, მან იცოდა, რომ ლუარსაბი მას არასოდეს ეყვარებოდა. მან იცოდა. რომ ლუარსაბს მხოლოდ ფულისა და სასულის გულსათვის მიყვებოდა. მან იცოდა. რომ ლუარსაბის ერთგული მეუღლე არასოდეს იქნებოდა. მიუხედავად ამისა. მაინც გაჰყვა ლუარსაბს. მასთან ყოფნის დროს გარყვნილებისა და უზნეო ცხოვრების მეტს არაფერს აკეთებდა და ლუარსაბმა თუ მხოლოდ ამგვარი ცხოვრების წინააღმდეგ ხმა დაძრა, ისიც. მოკრძალებით.

უბედ-ობით. ეს თურმე ემანსიპაციის მოღალატეობა ყოფილა! ღუარსაბი საცოდავი, საბრალო. მშოშრა, კაცუსაა. მაგრამ ცოლი წინაშე ის სრულებით მართალია: ის თუ გასაკიცხია, მხოლოდ იქაში რომ მტკიცედ და კატეგორიულად არ აღუდგა წინ ცოლის გარყვნილებას და არ მოიშორა თავიდან მანამდე, სანამ ის თვითონ არ ითხოვრებოდა. უფლებებს მე დიდ პატევს ვცემ. ქალი უნდა განდგეს ისეთივე წევრი საზოგადოებისა, როგორც მამაკაცია. მან უნდა მოისვენოს იმგვარივე უფლებანი, როგორც მამაკაცს აქვს. ამისათვის კი საჭიროა გონებრივი და ზნეობრივი სიმადლე. რათა ქალი აღიჭურვოს ხასიათის სიმტკიცით. ენერგიულად შეუდგეს თანასწორობის მოხვეჭას და მოპოებული უფლებებით სარგებლობა შეეძლოს, ერთი სიტყვით. გონებრივითა და ზნეობრივით ამაღლება; აი. სად უნდა მიეშურებოდეს ქალი, აი. რაში უნდა იხატებოდეს ემანსიპაცია. სამწუხაროდ. უფლებათა თანასწორობა. ემანსიპაცია ასე არ ესმით ვერას და ავტორს: ვერას ეს თანასწორობა ისე ესმის. რომ მას უფლება უნდა ჰქონდეს. როგორც ნებავე ისე იცხოვროს. და ავტორიც მას კერს უკრავს. ვეთანხმები ავტორს. რომ ცოლი და ქმარი თანასწორნი უნდა იყვნენ. დროა უარყოთ ის სულიერი აზრი. რომ ქმარი თავია ოჯახისა. დროა ვალიართ. რომ ცოლისა და ქმრის შეთანხმებულ ნება უნდა განაგებდეს ოჯახს. მაგრამ უზნეობის. გარყვნილების ნება არც ქმარსა აქვს; და არც ცოლს. თავისუფლება და თანასწორობა გარყვნილებაში არ უნდა იხატებოდეს. როგორც ეს ჰგონია ვერას. რომელსაც ასე ამართლებს ავტორი.

ქალის გული უფრო ღმობიერი. ჩველი. გრძნობიერი. შემბრა-  
 ლე და სიყვარულით სავსეა. ვადრე მამაკაცის, თუ ქ-ნი ეკ. გაბა-  
 შვილი ღმობიერად ეპყრობა ვერას და კიდევ ამართლებს მას  
 იქ. საცა მისი გამართლება ყოვლად შეუძლებელია. სამაგიეროდ,  
 ბ-ნი არაგვისპირელი მეორე უკადურესობის მაგალითია: ის მეტად  
 სასტიკად ეპყრობა ქართველ ქალს. დაუმაღავად. გულახდილად,  
 მოურიდებლად და მასთან მკვახხეთ და შეუბრალებლად ასლის მას  
 პირში მის ნაკლულევანებას; ამგვარი მანერა წერისა ფრიად სიმპა-  
 თიური და სასარგებლოა. მაგრამ სოციერთ შემთხვევაში ავტორის  
 მსჯავრი უსაფუძვლოა. ხანდახან ავტორი ასევეს ქართველ ქალს  
 თავზე იმ ნაკლოვანებებს. რასაც უქანასკნელი მოკლებულა. აი-  
 ლეთ მაგალითად „ჩემი სამშობლო ჩემი გულია“. რისთვის შეუყ-  
 ვარდა ზღისის მარო? ამის პასუსს იძლევა მისივე წერილი. „ვერ  
 წარმოადგენ. ჩემო მეგობარო, წერს ის ვაბროს. რანაირად მიზიდა-  
 ვენ მისი კვიპატი. დიდრონი. საადუმლოებით სავსე თვალები..“

დანარჩენ მის სილამაზეზე აღარას ვამბობ, რადგანაც მარო იშვიათის სილამაზისაა... მე ხომ გადვირე, ისე შემეყვარდა, ერთხელაც აღარ გამხსენებია ვანდა, რომელსაც პირობა მივეცი ცოლქმრობისა“. აქედან პასუხი თავისთავად ცხადია: დადრონმა თვალემა და იშვიათმა სილამაზემ ისე შეაყვარა მარო ზდისის, რომ ვანდა სრულებით დაავიწყებია. ასეთ სიყვარულს მე ვეძახი პირუტყვეულ სიყვარულს: ზდისის იზიდავენ და რევდენ მაროს „დიდრონი თვალემა, მისი იშვიათი სილამაზე“ და ამის შემდეგ ზდისი იმდენად თავხედია, რომ მაროს უკიჟინებს პირუტყვეულ სიყვარულს და თავს იწონებს ჩვენს წინაშე იმის თვალემაში პირუტყვი დაცურავდა და ამან გამიქრო მისდამი სიყვარული. ზდისის ბუნებაში ორი ადამიანია შეერთებული: ერთია პირუტყვი, მეორე მაღალი იდეებით გატაცებული ადამიანი; პირველს გაგიჟებით უყვარს მარო, მეორეს კი არა და ზდისის სიყვარული გაუქარწყლდა, იმიტომ კი არა, რომ მან პირუტყვი დაინახა მაროს თვალემაში, — ასეთი სურათი, პირიქით, უფრო აღაგზნებდა ზდისის ბუნებაში პირუტყვს, — არამედ იმიტომ, რომ მან ვერ ნახა მაროში იმ იდეებით გატაცება, რომლებიც ზდისის წმინდათა წმიდას შეადგენენ. მარო ავტორს მეტად მკრთალად აქვს დახასიათებული, მაგრამ მკითხველი ვერსად ვერ ხედავს, რომ ის გარყვნილი, დაცემული ბუნების იყო; თუ ზდისიმ იმის თვალემაში პირუტყვი დაინახა, ეს მხოლოდ მისი აღგზნებული გრძნობათა ღელვის ილუზიაა, ან ავტორის უსაფუძვლო ფანტაზია, თორემ ყოვლად შეუძლებელია, გასათხოვარ ქალს საყვარელ არსებასთან პირველად სეირნობის დროს პირუტყვეული გრძნობანი აღელვებდნენ. შეიძლება მარო მეტად წამხდარი, დაცემული ბუნების იყო, მაშინ ასეთი მოვლენა შესაძლებელია, მაგრამ ავტორს, სანამ ამდენად დაამცირებდა ახალგაზრდა ქალს და შელახავდა იმის უმანკობას, უნდა ნათელი და მკაფიო სურათი დაეხატა მისი, რომ ასეთი დამცირება და შელახვა სრულებით სამართლიანი და საფუძვლიანი ყოფილიყო, როდესაც ზდისი ამბობს: თქვენ ჯერ ეროვნული თვითშეგნება არა გაქვთო, ეს სრულ ქემშარიტებად უნდა ჩაითვალოს; პოლონელს ამ მხრით, რასაკვირველია, არ მოეწონებოდა არც ქართველი კაცი და არც ქართველი ქალი, ხოლო როდესაც ის ანზოგადებს მაროს სიტყვებს: ჩემი სამშობლო ჩემი გულია და სადაც მე ვიქნები, სამშობლოც იქ იქნებაო, მთელ ქართველ ქალებს უკიჟინებს ამას და გაიძახის: ჩვენი ქალები ამ შემთხვევაში სხვანაირად სჯიანო, ეს სრული უსამართლობაა. ერთის მაგალითით ზდისის არავითარი უფლება არა ქონდა, ქართველი ქალისათვის ეკიჟინებია; ქართველი ქალის ეროვნული თვითშეგნება იმდენად სუსტი არ

არის, რომ მან სამშობლო გულს ანაცვალოს და იძახოს: სადაც მე ვიქნები, სამშობლო იქ იქნებაო, და რაც შეეხება ზღისის მიერ პოლონელ ქალების ქებას, თუმცა ისინი ეროვნული თვითშეგნებით მალა დგანან, მაგრამ მიუხედავად ამისა, ქართველ ქალზე გაცილებით უფრო ადვილად მიყვებიან სხვა ტომის კაცს და უფრო ადვილადაც ცვლიან სამშობლოს გულზე.

გაბრო ზღისის ეთანხმება და ამით თვით ავტორიც უკრავს კვერს ზღისის სიტყვებს; სწორედ ამაში ვხედავთ ჩვენ ავტორის უსამართლო მსჯავრს; ქართველი ქალის ეროვნული თვითშეგნება სუსტია. ამაში უკიჟინეთ მას, ამხილეთ ის, მაგრამ ის არ ცვლის სამშობლოს გულზე. ამაში მე ღრმად ვარ დარწმუნებული და ავტორიც დარწმუნდებოდა, რომ ჩვენი ქალის მხილების გადაქარბებული სურვილით არ იყოს გატაცებული.

ჩვენს ბელეტრისტიკაში ძალიან ცოტაა იმდენად მარტივი და მასთან გრძნობით სავსე, წარმტაცი და მომნიბლავი მოთხრობა, როგორც ბ-ნი არაგვისპირელის „მიწაა“! ბერას სულიერი მოძრაობა ავტორს თავიდან ბოლომდე უნაკლულად აქვს დახატული. აქ არც ერთი სიტყვა ყალბი და მეტი არ არის.... ამ ეტიუდში ავტორი მამულის სიყვარულს გვიხატავს... ბერას გრძნობის სიწრფელე, მისი ღრმა სიყვარული მამულისა ყოველ მკითხველს აუტოკებს გულს. სამშობლოს სიყვარული ყოველ ადამიანს უღვივის გულში და ხელოვნების მსახურის მნიშვნელობა იმაში მდგომარეობს, რომ იპოვნოს გულის კარი და მოხერხებულად შეეხოს ამ გრძნობას; ჩვენი პატრიოტული პოეზია დღეს ვეღარ აღწევს ამ მიზანს, წარსულ გმირთა გამოწვევა საფლავებიდან, მათი სისხლისღვრა და ხმალ-ხანჩლის წკრიალის აღწერა ვეღარ იწვევს ჩვენ გულში შესაფერ გამომხატურებას, ვერ ატოკებს შესაფერ გრძნობას: ის, რაც შეუძლებელია დღეს ჩვენი პატრიოტული პოეზიისათვის, შესაძლებელი გახდა ბ-ნი არაგვისპირელისათვის; უარყოფით პატრიოტული პოეზია და მაშინვე მამულის მოღალატეობას დაგწამებს ბევრი; ბევრს ვერ შეუგნია ის უბრალო აზრი, რომ პატრიოტული პოეზიის უვარგისობის აღიარება სრულებითაც არ ნიშნავს სამშობლოსა და მისდამი სიყვარულის უარყოფას; „მიწაა“ აშკარად ამტკიცებს, რომ გრძნობა მამულის სიყვარულისა ყოველ ადამიანს აქვს, ხოლო ამ გრძნობის გამოწვევას ცოდნა და მოხერხება უნდა. ავილოთ ერთი ადგილი ეტიუდისა:

— „ეს რა არის? — ცოტა სიჩუმის შემდეგ დაეკითხა უფროსი ბერას.

— მიწაა!..



— რა მიწა?

— ჩემი ქვეყნის მიწა, ანანურს რომ ამოვიარე, იქიდან წამოვი-  
ლე: ჩემი სოფელი იქავეა.

— მერე რათ გინდა?

— მე, შენი კენესამე, ამ ქვეყანაში მოვკვდები, გული ამას მე-  
უბნება. მინდა სიკვდილის წინათ გულზე დავიყარო, რომ ჩემი ქვეყ-  
ნის მიწა თან ჩამყვეს“.

ასეთ აღგილებს ახსნა და განმარტება არ უნდა; ბერას სიტყვე-  
ბი იმდენად წრფელია და გულის სიღრმიდან აღმოხეთქილი, რომ  
გულქვა უნდა იყოს ადამიანი, რომ ბერას გრძნობა ვერ შეიგნოს და  
მას პატივი არა სცეს. ხელოვნება ვერასოდეს ვერ მიაღწევს თავის  
მიზანს, როგორც უნდა ესმოდეს მას ეს მიზანი, თუ ის ვერ აღძრავს  
მკითხველში იმგვარივე თვისებებისა და ძლიერების გრძნობას, რო-  
გორც იმორჩილებს შემოქმედების დროს ავტორს ან იმ გმირებს,  
რომლებსაც ის თანაუგრძნობს. თავის მიზანს უნაკლოდ აღწევს ეს  
პატარა ეტიუდი და ამიტომაც ის თამამად უნდა ჩაითვალოს ბ-ნი  
არაგვისპირელის ეტიუდებში ერთ-ერთ საუკეთესო მარგალიტად.  
რაც შეეხება ამავე ავტორის „ჩემ თავგადასავალს“, ამისთანა სახე-  
ლოვნო ნაწარმოები განუეცნილი უნდა იქნას მწერლობიდან. სიმ-  
ბოლიზმის წინააღმდეგი ჩვენ სრულებითაც არა ვართ; ჩვენ ვთხოვთ  
მხოლოდ, რომ აზრი, იდეა აშკარა და ცხადი იყოს მკითხველისათ-  
ვის; უამისოდ მწერლობას არავითარი მნიშვნელობა არა აქვს და  
ამიტომ ისეთი ნაწარმოები, რომელიც გაუგებარ ლაბირინტს წარმო-  
ადგენს. დაგმობილი უნდა იქმნას, სიმბოლიური ფორმა ხშირად  
მეტ შთაბეჭდილებას ტოვებს, როდესაც აზრი ცხადია; ასეთი სიმბო-  
ლიზმი სრულ კუთვნილებას შეადგენს ხელოვნებისას, მაგრამ „ჩემი  
თავგადასავალი“ სრულებით გაუგებარია და მასში რაიმე აზრის  
ძებნაც კი მეტია.

გასული წლის განმავლობაში „ივერიას“ არ მოუცია არც ერთი  
სახელთვნო ორიგინალური ნაწარმოები, რომელიც რაიმე მხრით  
ყურადღების ღირსი იყოს. იგივე ძველი თემები, იმავე სიყვარულის  
უხეიროდ გადადევნვა, აი ერთადერთი შინაარსი იმ პატარა მოთხრო-  
ბებსა, რომლებიც „ივერიაში“ დაიბეჭდა. აქ იყო ე. მ.—შვილის  
რამდენიმე მოთხრობა, რომელთა შორისაც „ვთის გავეყარე, ვთის  
შევეყარე“ საუკეთესოა. ავტორი აქ ხატავს სოფლის ეკონომიურად  
დაქვეითებას და ჩარჩების ბატონობას, ამგვარი შინაარსის მოთხრო-  
ბები ავტორს წინათაც ჰქონია „ივერიაში“, ახლა კი ავტორი ისე ძველ  
ამბებს იმეორებს ახალი სახით. ჩვენ წინათაც აღვნიშნეთ და ახლაც  
ვიმეორებთ, რომ ე. მ.—შვილს დაკვირვების ნიჭი აქვს, თუმცა სუს-

ტი. ფანტაზია კი სრულებით არავითარი; მას შეუძლია ცხოვრები-  
დან ბევრი საყურადღებო ფაქტორების ამოღება, მაგრამ თუ სულ  
ერთსა და იმავე წერტილს მიაჩერდა და ერთი და იგივე ფაქტები  
იმეორა. მისი სუსტი ნიჭი არარაობაჲ იქცევა.

თითქმის იგივე უნდა ვთქვათ „ცნობის ფურცელზეც“ სადაც  
მთელი წლის განმავლობაში ბ-ნი არაგვისპირელის „თვალცრემლია-  
ნი გარეთ გამოვიდასა“ და ბ-ნ ა. ცაგარლის „სასცენო სურათებს“  
გარდა ყურადღების ღირსი არც ერთი სახელოვნო ნაწარმოები არა  
ყოფილა. პატარა ეტიუდში ავტორმა უბრალოდ და მკაფიოდ დაგ-  
ვიხატა ურწმუნო დათიკოს სულიერი მდგომარეობა აღფრთოვანე-  
ბულ მორწმუნეთა შორის. ერთი მხრით, დგას დათიკო, რომელსაც  
ყოველგვარი სარწმუნოებრივი რწმენა დაკარგვია; მეორე მხრით,  
დგას ხალხი, რომელსაც ღრმა რწმენა უღვივის გულში. ამ რწმენით  
გამხნევებული ის ყოველგვარ მწუხარებას ივიწყებს. მხოლოდ მხიარ-  
ულებას უღებს თავის არსებას და აღფრთოვანებული ეგებება  
ბედნიერ დღეს; ყველას სახეზე მხიარულება. კმაყოფილება, ბედნი-  
ერება არის აღბეჭდილი, მხოლოდ დათიკოა მათ შორის სრულებით  
მეტი, ურწმუნო დათიკო; მას უნდა სხვებივით მხიარულებას, სინა-  
რულსა და ნეტარებას გრძნობდეს ამ წამს. მაგრამ ყოველივე ამის  
მოპოვება რწმენის გარეშე მისთვის შეუძლებელია. დათიკოს სული-  
ერი მდგომარეობის განხილვა ორ საყურადღებო კითხვას აყენებს  
მკითხველის წინაშე: რამდენაღ საჭიროა ადამიანისათვის სარწმუ-  
ნოებრივი რწმენა და შესაძლებელია თუ არა ასეთი რწმენის გარეშე  
საკუთარი კმაყოფილება და ბედნიერება? განვითარების უმდაბლეს  
საფეხურზე ადამიანისათვის და მისი კმაყოფილებისათვის სარწმუ-  
ნოებრივი რწმენა არავითარ საჭიროებას არ წარმოადგენს, მაგრამ  
დღევანდელ საზოგადოებას თუ ავიღებთ, დავინახავთ, რომ რწმენი-  
სათვის აუცილებელ პირობებს წარმოადგენენ: ან უმეცრება, ან ხა-  
სიათის სისუსტე, ან საკუთარი ეგოიზმი, სწორედ უკანასკნელი მი-  
ზეზი არის დათიკოს სულიერი სიმშვიდის ჯამრღვევი. რა ვუყოთ,  
რომ ცხოვრება საუკუნო არ არის? ამ ქვეყანაზედაც იმდენი რამ  
არის საკეთებელი, რომ ვისაც თავისი საკუთარი თავისა და სიცოცხ-  
ლისადმი სიყვარული ყოველისფერზე ძლიერათ არა აქვს გამჭდარი  
გონებაში, ის, ათასი ურწმუნოც იყოს, სულიერ სიმშვიდეს არასო-  
დეს არ დაჰკარგავს. სხვა რომ ყოფილიყო იმ პირთა შორის, რომ-  
ელთა რწმენამაც დათიკოს მათი ბედი ანატრებია, მათ კი არ შენატ-  
რებდა, უფრო შეიბრალებდა, რადგანაც ის ვინც ჭეშმარიტების  
შუქს მოკლებულია და ილუზიით ცხოვრობს. სიბრაღელის ღირ-  
სია, ათასი საამოც იყოს ეს ილუზია. საკვირველია სწორედ: სულ

რაღაც ორმოცი წელი ძლივსა ვცხოვრობთ საღი ცხოვრებით, ამ მოკლე დროსაც მარტო საკუთარ კუქს ვანდომებთ და ამავე დროს კიდევ საუკუნო ცხოვრებას შეუთხოვთ. რისთვის, საუკუნო მუქთა-ხორობისათვის?!

თავის „სასცენო სურათებში“ ბ-ნ ცაგარელს ზნეობრივი აზრი აქვს გატარებული. ზნეობის ქადაგება ავტორმა „ცისარტყელა“-ში დაიწყო. იქ სასტიკად ჰკიცხავდა უკანონო შვილების ყოლას; მაგრამ ავტორი შემცდარ გზას ადგა: შვილიერება ისეთი აქტია, სადაც ზნეობრივ საზომს არავითარი ალაგი არა აქვს, უკანონო და კანონიერი — ეს ამ შემთხვევაში მხოლოდ საზოგადოების გამოგონილია და ქალი კი არ არის გასაკიცხი უკანონო შვილისათვის, გასაკიცხია ის საზოგადოება, რომელიც ადამიანებს ორ ნაწილად ყოფს: კანონიერად და უკანონოდ. უკანასკნელ სცენებში ავტორის გზა კუქმპარიტია და მისი მსჯავრი სრულებით სამართლიანია, ავტორს აქ გამოუყვანილი ყავს განათლებული სიკო, რომლისთვისაც არაფერი წმინდა არ არსებობს, გარდა ფულისა; ფულის გულისათვის ის ყოველგვარ სისაძაგლეს ჩადის, საყვარელ ქალს, რომელიც მას ენდო, თავს ანებებს, ირთავს ფულის გულისათვის მეორეს, რომელთანაც არავითარი სიყვარული არ აკავშირებს. თუ უზნეობაა ასეთი საქციელი, არანაკლებ უზნეობაა სიკოს მიერ შემდეგი თავისმართლება იმ ქალის წინაშე, რომელმაც მას მთელი თავისი არსება, თავისი პატიოსნება მიანდო.

სიკო. მართალია, ჩემი ცოლის შერთვის მიზანი ანგარება იყო, მაგრამ ამ ანგარებას ის გასამართლებელი საბუთი ჰქონდა, რომ უზრუნველყოფდით ჩვენს ცხოვრებას.

მინადორა. ვის ჩვენ ცხოვრებას?

სიკო. ჩემსა და შენს ცხოვრებას.

მინადორა. ცოლი?

სიკო. ცოლი ჩვენთან იქნებოდა, მაგრამ ჩვენ ის არასფერს დაგვიშლიდა. აი, სწორეთ ამგვარი ქალი ამოვირჩიე.

შეუძლებელია, რომ ადამიანი ამაზე უფრო დაეცეს ზნეობრივად. თუ, ერთი მხრით, ავტორმა დაგვიხატა განათლებული, მაგრამ უზნეო ადამიანი, მეორე მხრით, მან წარმოგვიდგინა ისეთი პირნი, რომლებსაც არავითარი განათლება არ მიუღიათ, მაგრამ პატიოსნება და ზნეობა კი შეუნარჩუნებიათ. უზნეობა, რაშიც უნდა იხატებოდეს ის, დევნის ღირსია, მაგრამ ავტორი ცხადად გვიმტკიცებს: რომ სულ ხშირად განათლება უძლურია უზნეობის ასალაგმად; უზნეობას თვით საზოგადოება უნდა დევნიდეს; დღეს კი ამას ვერ ვხედავთ, სამწუხაროდ; თვით ცხოვრება უნდა იყოს ისე მოწყობილი, რომ ადამიანს უზნეობისაკენ თავისუფალი გზა არ ჰქონდეს დათმო-

ბილი. დღეს კი ამის წინააღმდეგ ვხედავთ. საკუთარი ბუნება ვერ აამაღლებს ადამიანს, თუ თვით ცხოვრებამ არ აამაღლა ის. უმთავრესი საზრუნავი დღეს პიროვნება კი არ არის, თვით ცხოვრებაა, უზნეობის უმთავრესი მიზეზი თვით ცხოვრებაშია და არა პიროვნებაში. ამიტომაც საჭიროა ბრძოლა ცხოვრების არსებულ პირობებთან და არა პიროვნებასთან. ამაღლეთ ცხოვრება და მაშინ პიროვნებაც ამაღლდება.

წარსული წელი მდიდარი იყო სიტყვაკაზმული გამოცემებითაც: გამოვიდა ლექსები გრ. აბაშიძისა, ი. ევლოშვილისა და ს. ქვარციანისა, დაიბეჭდა ქ. აზიანის „ფული და ხარისხი“, „ჭკუისა მჭირს“ ცაგარლისა, „დედაკაცმა აგვრია“ ნახუცრიშვილისა და სხვ. ჩვენ არა ერთხელ გამოვევითქვამს ის აზრი, რომ უმთავრესი პოეზიაში აზრია, გარეგან ფორმას კი ხელშემწყობი მნიშვნელობა აქვს. თუ შეიძლება ასე ითქვას, ორ იმგვარ ნაწარმოებში, რომელთაგან პირველის იდეა სუსტია ან უმნიშვნელო, გარეგანი ფორმა კი საუცხოო, მეორეში კი იდეა ორიგინალურია და ძლიერი, გარეგანი ფორმა კი სუსტი, ამ უკანასკნელს ჩვენ ყოველთვის მაღლა დავაყენებთ, დავინახავთ, რომ პოეზია ფორმისა საუცხოოა, რაც შეეხება იდეას, ის არაფერს საყურადღებოს არ წარმოადგენს თანამედროვე მკითხველისათვის. ყოველი ხელოვანისათვის აუცილებელ პირობას წარმოადგენს, რომ მისა გრძნობა მკითხველის გრძნობაც იყოს, მისი ფიქრი მკითხველის ფიქრიც. თუ პოეტი იმეორებს მას, რასაც საზოგადოებრივი გრძნობა და აზრი უკვე გაცილებია, რა ნიჭის პატრონიც უნდა იყოს ის, სრულებით უმნიშვნელოთ ჩაივლის. ბუნებას ბ-ნი გრ. აბაშიძისათვის პოეტის ნიჭი ურგუნებია. მაგრამ თვით ცხოვრებას არ ჩაუყენებია ეს ნიჭი იმგვარ პირობებში, რომ ის განვითარებულიყო. იმის მაგივრად რომ პოეტი ცხოვრების სათავეში ჩამდგარიყო და მკითხველის გონება აემუშაებია, გრძნობანი აეშალა და ერთიცა და მეორეც წინ, მომავლისაკენ მიემართა, პოეტს უყურადღებოდ დარჩა აწმყო; განვლილი დროის ფიქრსა და გრძნობებს დაუბრუნდა და დაიწყო იმის გამეორება, რაც ალ. ჭავჭავაძის, გრ. ორბელიანისა და მამია გურიელის პოეზიაშია. სულ სხვა სურათს წარმოადგენს ბ-ნ ევლოშვილის პოეზია: გარეგანი ფორმა ალაგ-ალაგ სუსტია. მოუხეშავი, მაგრამ სამაგიეროდ, პოეტის ფიქრი და გრძნობანი აწმყოს ეკუთვნის და არა წარსულს, ის გამომხატველია მკითხველთა ერთი ნაწილის მაინც. ფიქრისა და გრძნობისა; ის ჰკიცხავს გულწრფელად ყოველივეს, რაც კი თანამედროვე ცხოვრებაში გაიციხვის. ღირსად მიაჩნია, უთითებს მკითხველს მეღანჭოლიურის ხმით დღევანდელ სოციალურ უსამართლობაზე. მუდამ მომავლისაკენ იხე-

დება, მისი იდეალი სიმპათიურია და ამიტომ იმ პოეტთა შორის, რომლებიც უკანასკნელ დროს გამოვიდნენ სამწერლო ასპარეზზე. ბ-ნი ევდოშვილი საპატიო ადგილს დაიჭერს.

შესაძლებელია, პოეზიაში აზრიც კარგი იყოს და ფორმაც. მაგრამ მიუხედავად ამისა. ასეთ პოეზიას მაინც მნიშვნელობა არა ჰქონდეს; საქმე ისაა, რომ აზრი დროის შესაფერი იყოს, და არა გაცვეთილი. ის მკითხველის გულსა და გონებას რასმე ახალს აღწევდეს და არ იწვევდეს ისეთ ფიქრსა და გრძნობას, რაც ცხოვრებას დიდი ხანია ქვეშარტებულ უღიარებია. ძმობა და სიყვარული რომ კარგი აზრია და უტყუარი ქვეშარტება. ამას არც ერთი ნორმალური ადამიანი არ უარყოფს, მაგრამ ვინმემ რომ მიყოს ხელი დღეს პათეტიკური ლექსების წერას ძმობასა და სიყვარულზე. ძნელად თუ ვისმეზე მოახდენს შთაბეჭდილებას. ბ-ნი ქვარიანის პოეზიის ერთი ნაწილი, ავტორის აზრები, მისი მისწრაფებანი სიმპათიურია, მაგრამ ამავე დროს იმდენად შესისხლბორცებული და ცხადი უმეტესობისათვის, რომ მათი ხელახლა გადაღებვა უქმად დროს დაკარგვას. მეორე ნაწილში ავტორს აზრებიც დროის შესაფერისი აქვს, გრძნობანიც ყოველი თანამედროვე მკითხველისათვის სიმპათიური. მაგრამ მიუხედავად ამისა. ვერც ეს ნაწილი ახდენს მკითხველზე ვერავითარ შთაბეჭდილებას. რა არის ამის მიზეზი?—ის, რომ ბ-ნი ქვარიანი პოეტი არ არის: მას აქვს მხოლოდ უნარი წაკითხული პოეზიის შთაბეჭდილებით იმავე თემაზე რითმიანი პროზა დაწეროს; ბ-ნი ქვარიანის ზოგიერთ ლექსს რომ კითხულობთ, იდეაც სიმპათიურია, ფორმაც რიგიანი, მაგრამ ისინი არათუ შთაბეჭდილებას ვერ ახდენენ თქვენზე, ასე გგონიათ, თითქოს საყინულეში ჩამაგდესო. ავტორის გრძნობა თქვენს გულს სრულებით ვერა წვდება. მხოლოდ ის მწერალია პოეტი, რომლის გულწრფელად გამოხატულ ფიქრსა და გრძნობას შეუძლია იმგვარივე ძლიერებისა და თვისების გრძნობა და ფიქრი აღძრას მკითხველში, პოეტის ყოველი აზრი უპირველესად გულს უნდა ატოკებდეს, ბ-ნი ქვარიანის ნიჭი კი ამ თვისებებს მოკლებულია და ამიტომაც მისი პოეზია ჩვენ არ მიგვაჩნია პოეზიად. ზოგიერთ ლექსებში გატარებულ აზრებსა და მისწრაფებათ კი სულითა და გულით თანაფუგრძნობთ.

ქ-ნი აზიანის. ბ-ნ ცაგარლისა და ნახუცრიშვილის პიესები ერთ წიგნად გამოვიდნენ „ცხოვრების სარკეს“ სათაურით. ბ-ნი ცაგარლის „ქკუისა მქირს“ საუცხოო ვოდევილია; თუმცა ცხოვრებაში ძვირად მოიპოვება ისეთი ბოჭაული, როგორც ავტორსა. ყავს დახატული და შეუძლებლადაც მიგვაჩნია, რომ ტასოსთანა ქალმა ასე მორჩილად აიტანოს გრიქულას ლოშნა, მაგრამ ვოდევილს ღიდა

ბუნებრიობა და ფაქტების ლოგიკა არ მოეთხოვება, რადგანაც მისი მიზანი უმთავრესად გულუბრყვილო სიცილია. „ქეუისა მჭირს“ ამგვარ მიზანს უნაკლოდ შეეფერება და სასურველია, რომ ის საპატრიო ადგილს დაიკერდეს ჩვენი ვოლდევილების რეპერტუარში. ბ-ნ ნახუცრიშვილის „დედაკაცმა აგვრია“ იმავე თემას შეეხება, როგორც ბ-ნ სიკოს „სოფელში“, რომელიც „მოამბეში“ დაიბეჭდა: ეს თემა სოფლის მოხელეთა თვითნებობა და ძალმომრეობა, თუ „სოფელში“ სუსტ სახელოვნო ნაწარმოებს წარმოადგენს, სამაგიეროდ. ბ-ნ ნახუცრიშვილს ცოცხლად და სინამდვილით აქვს დახატული რამდენიმე ფაქტი სასოფლო სასამართლოსა და მამასახლისის მოქმედებიდან. უმთავრესი ნაკლი ამ სცენებისა ის არის, რომ ავტორს პეტად გაუქიანურებია; ნახევრადაც რომ შეემოკლებინა, მაშინ თავიდან აიცილენდა იმ ერთფეროვნებას, რაც ასე ღლის მკითხველს ამ სცენების კითხვის უროს და ამით მათი სახელოვნო ღირსებაც მოიგებდა. კანონთა დებულებით სოფლის საქმეებს გარეშე მთავრობის გარდა განაგებს სოფლის ყრილობა. სოფლის სასამართლო ჯა მამასახლისი. თუმცა ამგვარი თვითმმართველობა პრინციპიალურად ფრიალ საჭიროა და სასარგებლოა, მაგრამ იმგვარ გონებრივ პირობებში, რომლებშიაც ჩვენი სოფელი იმყოფება. ხშირად მაზარალებელია; სულ ხშირად მამასახლისი და სოფლის მოსამართლე გლეხები ანუ „სუდიები“ წერა-კითხვის ცოდნას მოკლებული არიან, ამით სარგებლობს მწერალი და ათასგვარ უკანონობას ჩადის; სულ ხშირად სოფელში მდიდარ გლეხს, გინდ სხვა ვინმეს ისეთი გავლენა აქვს მამასახლისსა და მოსამართლეებზე, რომ როგორც უნდათ, ისე ამოქმედებენ მათ; ხშირად განათლებული მამასახლისი და მოსამართლენი ზნეობითაც იმდენად დაცემული არიან, რომ გამართლება-გამტყუნება, გინდ საქმის მოგება-წაგება ერთი აბაზის არაყზეა დამოკიდებული. ამიტომ ვერავეთარი სასარგებლო დაწესებულება ვერ მოქმედებს იქ, სადაც უმეცრება და ზნეობრივი სიღატაკე მეფობს. თვითმმართველობა კი არ არის სოფლისათვის საზარალო, მაზარალებელია ის გონებრივი სიბნელე, რომელსაც ჩვენი სოფელი მოუცავს. იქ, სადაც უმეცრება გონიერებას ქარბობს, ზნეობას უზნეობა, ვერავეთარი სასარგებლო დაწესებულება თავისთავად ნაყოფს ვერ მოიტანს. გაავრცელეთ ხალხში განათლება, აამაღლეთ ის ზნეობრივად და გონებრივად იმდენად, რომ თვითონ დაინახოს და შეიგნოს საკუთარი ინტერესები. თვითონ გაარჩიოს კარგი ავისაგან და მაშინ ის თვითონ უპატრონებს თავის თავს. აღნიშნული აზრის საუკეთესო დამტკიცებას წარმოადგენს ბ-ნ ნახუცრიშვილის სცენები და სიკოს „სოფელში“. თქვენ აქ ხედავთ უმეცარ მოსამართლეებს. უმე-

ცარსა და უზნეო მამასახლისს. რომლის სამართალიც იქით არის, საიდანაც ქრთამს მოელის ან კარგ სადალს: თქვენ აქ ხედავთ სოფლის ჩარჩს. რომელიც თავისი ჭიბით სამართალს ყიდულობს, თქვენ აქ ხედავთ მწერალს, რომელიც არათუ თვითონ იღებს ქრთამებს, მამასახლისსა და მოსამართლეებსაც აქეზებს ქრთამის ასაღებათ და დიდ უკანონობათ მიაჩნია, როცა მეტის აღება შეიძლება და ნაკლებს კი ჯერდებიან. მოსამართლეებისა და მამასახლისის მთელი გონებრივი და ზნეობრივი სილატაკე საუცხოოდ არის დახატული „დედაკაცმა აგვრიაში“. რომელიც აშკარად უთვალისწინებს მკითხველს. თუ რა შეადგენს ჩვენი სოფლისათვის ერთ უმთავრეს საჭიროებას. განათლება. განათლება და ისევ განათლება—აი, რა შეადგენს უმთავრეს პირობას, ურომლისოდაც სოფლის ცხოვრების რიგიანად წარმართვა ყოვლად შეუძლებელია.

გადავიდეთ ახლა „ფული და ხარისხზე“, ქ-ნი აზიანი სულ ახალგაზრდა მწერალია; რამდენიმე წელიწადი იქნება, რაც ის მწერლობის ასპარეზზე გამოვიდა და მალე დაიმსახურა საზოგადოების ყურადღება. საზოგადოება იცნობს მის სამ კომედიას: „ინჯილერი და დოხტური“, „ფული და ხარისხი“ და „გაცრუებული იმედები“. პირველი კომედიის შესახებ ჩვენ გამოთქმული გვქონდა აზრი ამ ორი წლის წინათ. რამდენიმე იმ ნაკლთაგანი, რომლებიც აუშნობდა პირველ კომედიას, ავტორს უკვე მოუცილებია თავიდან. თუ სინამდვილის სისაძაგლით ამღვრეულმა გულმა ავტორს პირველ კომედიასი ალაგ-ალაგ სინამდვილე დაამახინჯებინა და ტიპების მაგიერ კარიკატურები დაახატვინა, სამაგიეროდ, ვერც სინამდვილის დამახინჯებასა და ვერც კარიკატურას ველარ ნახავთ შემდეგ კომედიებში. „ფული და ხარისხი“ შინაარსი მარტივია; თ-ღი დავით ლამბაძის შვილი ლევანი. რომელმაც ყველა საშუალო სასწავლებლები დაიარა და ბოლოს შინ დაბრუნდა, ირთავს მდიდარი შარბათოვის ქალს—მამოს. მიჰყოფს ხელს ლოთობასა და გარყვნილ ცხოვრებას, მოაბეზრებს როგორც სიმამრს, ისე ცოლს თავს, ლოთობის დროს მოჰკლავს კაცს და ციმბირში ამოჰყოფს თავს. თემა, როგორც მკითხველი ჰხედავს, ახალი არ არის. გაღარბებული თავადები რომ ცოლის შერთვით იმედოვნებენ ხსნას და, რადგანაც სიმდიდრე სომხებში იყო. ამიტომ სომხის ქალებს ეტანებოდნენ და უკანასკნელებიც კნეინობას ხარბდებოდნენ. ეს ჩვენმა ცხოვრებამ და ჩვენმა ლიტერატურამაც დიდი ხანია იცის. მაგრამ ავტორს არ უნდოდა, ახალი რამ ეთქვა. მან გადმოიღო ნამდვილი ცხოვრებიდან ის. რამაც მისი ყურადღება მიიპყრო, მიუხედავად იმისა, რომ სურათი ახალი არ არის, ავტორმა ისე კარგად დახატა, რომ მაინც სა-

ყურადღებო გამოვიდა. „ფული და ხარისხი“ უტყუარი სახეა ჩვენი არისტოკრატიის დღევანდელი მდგომარეობისა. თავ. ლევან და კოწია ლამბაძეები ავტორს მეტად ხელოვნურად ყავს დახატული; ყოველი მათი სიტყვა, ყოველი მოქმედება, ყოველი მოძრაობა ბუნებრივია. ნამდვილი ცხოვრებიდან არის ამოღებული, რას წარმოადგენენ ეს ახალგაზრდა თავადები? სრულ არარობას, როგორც გონებრივად და ზნეობრივად. ისე ქონებრივადაც. მომავალი ამათ აღარავითარი არა აქვთ აწმყოში მხოლოდ საუცხოო მაგალითს წარმოადგენენ გადაშენებისას. გონებრივად და ზნეობრივად ამაღლება აღარც ერთს არ ძალუძს, სწავლის ნიჰსაც და სურვილსაც ორივე მოკლებულია. ღვინო და ქალები—აი, ერთადერთი საფიქრელი ორივესი, ლოთობა და გარყვნილება, აი, ერთადერთი საქმე, რომელიც მათ შეუძლიათ. ჩვენი თავადაზნაურობის იმ ნაწილის გამობრუნება, რომელსაც კოწია და ლევანი ეკუთვნიან, ყოვლად შეუძლებელია,—ეს ნაწილი გადაშენების გზას ადგას და დღეს თუ ხვალ სრულებით უნდა აღიხოცოს ჩვენს ცხოვრებაში. დარჩა მეორე, სამწუხაროდ. უმცირესი ნაწილი. ჩვენი არისტოკრატიისა, რომელსაც აქვს მომავალი იმდენად, რამდენადაც ის ახალი დროის მოთხოვნილებისამებრ იცვლება. ჩვენი თავადობის ამ ნაწილს სიტყვაკაზმული მწერლობა ნაკლებ ყურადღებას აქცევს.

არტემ შარბათოვი. მისი მეუღლე სოფიო და ქალი—მაშო ავტორს კარგადა აქვს დახასიათებული; ხოლო დავით ლამბაძე ბუნებრიობას მოკლებულია, ის თავისი რეზონირობით უფრო ავტორის სენტენციაა, ვიდრე ცხოვრებიდან ამოღებული პირი. ის უფრო თავადის ტანისამოსში გამოწყობილ თანამედროვე განათლებულ დემოკრატს წააგავს. ვიდრე 60 წლის თავადს. რომელიც შინაურულად აღზრდილა და სხვა არავითარი განათლება არ მიუღია. ის, რასაც დავით ლამბაძე ქადაგებს. ავტორის აზრებია და არა ლამბაძის; შესაძლებელია, ლამბაძეს სწამდეს, რომ თავადობას დღეს ფასი აღარა აქვს. რომ გვარიშვილობას პირადი ღირსება ჯობია და სხვ.. მაგრამ მის წლოვანებაში მყოფი ძველებური თავადი რომ ამდენად მოკლებული იყვეს თავადურ სიამაყეს და ბატონყმურ გემოვნებას. შეუძლებელია. ავტორმა ეს პირი უფრო თავის ფანტაზიით შეთხზა. ვიდრე ცხოვრებიდან ამოიღო და ამიტომ დავით ლამბაძე ცოცხალი ადამიანის შთაბეჭდილებას ვერ ახდენს. თუ პიესის ზოგიერთი პირი. როგორც ლევან და კოწია ლამბაძეები. სამაგალითო რეალიზმით არის დახატული. ამგვარისავე რეალიზმით არის შემუშავებული რამდენიმე სცენა პიესაში: მაგალითად, მეოთხე გამოსვლა პირველ მოქმედებაში, მეექვსე გამოსვლა, მეორე გამოსვლა მეორე მოქმე-



დებაში, მერვე გამოსვლა მესამე მოქმედებაში. გადავიდეთ ახლა პიესის ტექნიკურ მხარეზე. სამივე მოქმედებათა შორის ლოგიკური კავშირი არსებობს, მაგრამ უმთავრესი ნაკლი პიესის ტექნიკური მხარისა იმაში მდგომარეობს, რომ პირველი და მესამე მოქმედება მეტად გაჭიანურებულია. პირველი მოქმედების მეხუთე გამოსვლაში გლახები ზედმეტი არიან. სრულებით მეტად მიგვაჩნია აგრეთვე მერვე გამოსვლა პირველ მოქმედებაში. აქ თუ ავტორმა გამოიყვანა ივანე მუშტაძე, მას მიზნად ჰქონდა ჩარჩი დაეხატა, მაგრამ ივანე ძალიან სუსტი და მკრთალი გამოვიდა. მოისმინეთ, როგორი სიტყვებით შეხვდება ივანე თავად დავითს:

და ვ ი თ ი. ფულები უნდა მასესხო.  
ი ვ ა ნ ე. საღლა მაქვს, ძმაო, ფულები!

ეს ერთადერთი სიტყვა „ძმაო“ სრულებით აფუჭებს მთელ მერვე გამოსვლას. ამ ერთი სიტყვით ავტორმა დაამტკიცა, რომ ქართული ჩარჩის ბუნება, ფსიქოლოგია მას არა აქვს შესწავლილი: რა შეძლების პატრონიც უნდა იყოს ივანე, რა სიმაღლეზედაც უნდა აყანებდეს ის თავის თავს დავითთან შედარებით, დავითს ის „ძმაოს“ არასოდეს არ ეტყვის პირში. ივანეს დახატვაში ავტორი ძალას ატანს თავის ნიქს და ამიტომ მთელი ეს გამოსვლა რომ გამოეტოვებინა ავტორს, პიესა არას წააგებდა. მეხუთე გამოსვლა მესამე მოქმედებაში სრულებით მეტია: ის რომ შეემოკლებინა ავტორს და მეოთხე გამოსვლასთან შეეერთებინა, გაცილებით უმჯობესი იქნებოდა.

„გაცრუებული იმედების“ ღირსება და ნაკლულევენება იმგვარივეა. როგორც განხილული პიესის. შინაარსი აქაც მარტივია. სტეფანე ზარალოვი და მის მეუღლე ნინო დოქტორ შვილს მოელიან უნივერსიტეტიდან და მის დიპლომზე დიდ იმედებს ამყარებენ: ფულები, სახლები, კეთილი ცხოვრება—აი, რის გარშემო ტრიალებს მთელი მათი აზროვნება, მაგრამ შვილი ჩამოსვლისთანავე აქარწყლებს მათს იმედებს: მას არც ფული, არც სახლი არ იზიდავს, — მისი მიზანია სინდისიერად იცხოვროს და ყოველ გაჭირვებულს დაეხმაროს. პიესის უმთავრესი ნაკლი ის არის, რომ შიგ არავითარი მოქმედება არ არის; მოქმედება სცენის გარეშე წარმოებს, თვით სცენაზე კი ცარიელი ენის ტრიალია: ორივე მოქმედება ცოტა გაჭიანურებულია, თუმცა მკითხველსა და მაყურებელს იმდენად არა ჰდღის, როგორც „ფული და ხარისხი“. სტეფანე ზარალოვი, ნინო და ლიზა პიესაში კარგად არიან დახატული. ზარალოვი საუცხოო ტიპია იმგვარი მამებისა, რომლების მსგავსსაც ბევრსა ნახავთ ჩვენს ცხოვრებაში. მისი ერთადერთი მიზანი საკუთარი ბედნიერებაა; მისი აზროვნების,

მის მისწრაფებათა ერთადერთი საგანი—ფული. ის ყველაფერში ფულს ეძებს, ყველაფერს ფულის საზომით ზომავს. სწავლა-განათლებლის იდეური მხარე მას არ ესმის, განათლება მის თვალში მხოლოდ იარაღია ფულის მოსახვეჭად. მას ვერ წარმოუდგენია, რომ სიმდიდრეზე მაღლა იდგეს რამე ცხოვრებაში; მის თვალში საშინელი სისულელეა. როდესაც ადამიანს თავის თავს გარჯა სხვაც ახსოვს, სხვისთვისაც ზრუნავს. საკუთარი კეთილდღეობა—აი, რას უნდა ეტრფიალებოდეს ყოველი ადამიანი, მისი აზრით; ამ მიზნის მისაღწევად მისთვის ყოველგვარი საშუალება პატივსაცემია. ამიტომ ზარალთვის ზნეობრივსა და უზნეო საქციელზე, პატიოსნებაზე და ადამიანურ ღირსებაზე სავსებით თავისებური წარმოდგენა აქვს. მის თვალში „კაცი ის არის, ვისაც ფული აქვს“, როდესაც ადამიანი ყველას ეხმარება და თავის თავს კი ივიწყებს, ასეთი ადამიანი საბრალო და უღირსია. მისი შვილი ვანო კი სრულიად წინააღმდეგი ტიპია. ის უარყოფს ყოველივეს, რასაც მამამისი ეტრფის, მას ეზიზღება ყოველივე, რაც მამამისს მოსწონს. ის, რაც მამამისის თვალში პატიოსანი და სინდისიერია, მის თვალში უპატიოსნო და უსინდისოა; ის უარყოფს სიმდიდრეს, მაღალ საზოგადოებაში ტრიალს; მარტო თავის თავზე ზრუნავს. მარტო საკუთარი თავისათვის ცხოვრება დიდ უზნეობად მიაჩნია; ადამიანის ღირსება, პატიოსნება და სხვისთვის ცხოვრება, გაჭირვებულის შველა მის აზროვნებაში ერთად არიან შეერთებული; ამიტომ მამასა და შვილს ერთმანეთისა არაფერი ესმით, საერთო არაფერი აქვთ.

ლიზა ტიპიური წარმომადგენელია ქარაფშუტა ქალებისა. აოც თავში, არც გულში ფუქსავატობის მეტი არაფერი აბადია რა. საკუთარი რწმენა-შეხეულულება მას არ გააჩნია, ის ცხოვრობს საზოგადოების გემოვნებით; მოქმედებს ისე, რომ საზოგადოებამ არ გაიციუნოს: საკუთარი წარმოდგენა ზნეობაზე, პატიოსნებაზე და ადამიანის ღირსებაზე მას არ გააჩნია; მოსწონს ის, რაც საზოგადოებას მოსწონს, სწუნობს მას. რასაც საზოგადოება წუნობს, რასაკვირველია. ის საზოგადოება, რომელშიაც ის ტრიალებს. მისი ერთადერთი მიზანია საკუთარი ბედნიერება, სიმდიდრე, ფუფუნება და მდიდარი ქმარი, სიყვარულისათვის კი არა, არამედ ფულებისათვის. ნინო სრული მსგავსებაა თავისი ქმრის, სტეფანესი. ის აღზრდილია იმგვარსავე წრეში და აზრებში. როგორშიაც მისი ქმარი და ამიტომ მისი მიზანი და მისწრაფებანი იგივეა, რაც სტეფანესი, სტეფანეს ქალის სონას სახით ავტორს უნდოდა დაეხატა ლიზას წინააღმდეგი ახალგაზრდა ქალის ტიპი. სონას მიზანია თავისი შრომით ცხოვრება, სწავლა-განათლებით აღჭურვა და საზოგადოებისათვის ზრუნვა.

მარტო თავის თავზე ფიქრი, მარტო თავისი კუქისათვის ზრუნვა მას ჰირივით ეჭავრება და ამიტომ სულითა და გულით მიისწრაფვის მშობლების ოჯახიდან გასვლას. გაბო, სონას საქმრო, იმგვარივე აზრებისა და იდეალების ყმაწვილი კაცია, როგორც ვანო, მხოლოდ უფრო მოძრავი და ცოცხალი ტემპერამენტის. ხასიათთა სხვადასხვა რწმენა-შეხედულების ადამიანები ყავს გამოყვანილი: ერთ მხარეზე დგანან სტეფანე, ნინო, ლიზა, გიგო და კეკელა—გაბოს მშობლები, მეორეზე ვანო, სონა და გაბო. პირველნი არიან წარმომადგენელნი მატერიალური მიმართულებისა; მათი აზროვნების ცენტრში მოთავსებულია საკუთარი „მე“ და საკუთარი კუქი. მეორენი კი არიან წარმომადგენელნი იდეალური მიმართულებისა: მათი აზროვნების შუაგულში მოთავსებულია „მე“-ს მაგივრად გაქირვებული, კუქის მაგივრად სული. პირველი მიმართულების წარმომადგენელნი ავტორს საუცხოოდ ჰყავს დახასიათებული: სტეფანე და ლიზა ნამდვილი ცხოვრებიდან არიან ამოღებულნი, უნაკლოდ და სრული სინამდვილით; სულ სხვაა ავტორის ნიჭი მეორე მიმართულების პირთა დახატვაში: რამდენადაც ძლიერია ავტორი სტეფანესა და ლიზას დახატვაში, იმდენად სუსტია ვანოსა და სონას დახატვაში. ვანო რეზონიორია; სონა ხომ სრულებით მკრთალი, უფერული და უსიცოცხლოა: ამ პირთა შორის უკეთესი გამოვიდა ისევ გაბოს სახე. ეს სცენები ავტორს ნამდვილი ცხოვრებიდან აქვს ამოღებული და ცოცხლად და სრული რეალიზმით დახატული. როგორც სახელოვნო ღირსებით. ისე ტექნიკის მხრით, ეს კომედია. ერთი მხრით, მალა დგას „ფულსა და ხარისხზე“. მაგრამ, მეორე მხრით, უკანასკნელს მით ჩამოუვარდება. რომ მოქმედება აქ მეტია და უფრო ბუნებრივად და მეტის თანდათანობით მიმდინარეობს მაცურებლის წინაშე. ვიდრე „გაცრუებულ იმედებში“. მაგრამ ავტორის ნიჭი ჯერ გამოუცდელი და გაუწვრთნელია. ავტორს ჯერ კიდევ დიდი შრომა და მეცადინეობა სჭირია; თუ უნდა. რომ მისმა ნიჭმა შესაფერი ნაყოფი მოიტანოს, მან საფუძვლიანად უნდა შეისწავლოს, ერთი მხრით. სცენა. მეორე მხრით, ევროპის საუკეთესო დრამატურგები, მესამე მხრით, უნდა ეცალოს აღჭურვის ფილოსოფიური განვითარებით, რაც აუცილებელ პირობას შეადგენს ყოველი მწერლისათვის. რა ნიჭის პატრონიც უნდა იყოს; ვანოსთანა ტიპები ავტორს უფრო რეალური და უფრო ცხოველი გამოუვიდოდა. რომ მის დაკვირვებითს ნიჭს შესაფერი განვითარებაც ხელს უწყობდეს. უკანასკნელი პიესა აშკარად ამტკიცებს, თუ რა თვისების არი ქ-ნი აზიანის ნიჭი, რაშია მისი ძალა და რაშია მისი სისუსტე. ავტორის ფანტაზია სუსტია; სამაგიეროდ დაკვირვების ნიჭი ძლიერი. ის საუცხოოდ ამჩნევს ცხოვ-

რებისა და ადამიანის ბუნების გასაქიცი მხარეებს და აქ მისი ენა მკვირცხლი. ცოცხალი და დამცინავია; სამაგიეროდ, ცხოვრებისა და ადამიანის ბუნების კარგი მხარეების ხატვა მის კალამს არ ეხერხება და ამიტომ ავტორის ასპარეზი კომედიაა. რადგანაც ავტორი თითქმის ყოველისფერს შიგ ცხოვრებიდან იღებს, ამიტომ მისი ტიპების მრავალფერობა დამოკიდებულია იმ ცხოვრების სიტუაციებზე. რომელშიაც ავტორი ტრიალებს. ვინც გაიცნობს ავტორის სამივე კომედიას, ის მალე შეამჩნევს, რომ ავტორს საფანელი ელევია, ერთფერობა ეტყობა: ამის მიზეზი ის არის, რომ ავტორს პატარა წრე ჰყავს მხოლოდ შესწავლილი და მხოლოდ ამ პატარა წრიდან იღებს თავისი კომედიის მომქმედ პირებს. თუ ავტორის დაკვირვება ამ პატარა წრეს აღარ გასცილდება, წინაწინვე შეგვიძლია ვთქვათ, რომ ახალს ველარას მოგვცემს, ყოველი მისი კომედია ძველი ტიპების ახალ ტანისამოსში გამოყვანა იქნება. ამიტომ თუ ავტორს უნდა, რომ თავისი ნიჭი ერთ წერტილზე არ შეაჩეროს, ის ღრმად უნდა ჩაუყვიდრეს და ყოველის მხრით შეისწავლოს ჩვენი რთული საზოგადოებრივი ცხოვრება. ამისათვის თავისი დაკვირვება ავტორმა უფრო ვრცელ წრეში, მთელ საზოგადოებაში უნდა გადმოიტანოს და არა მის ერთ რომელიმე ნაწილში და დაკვირვების გარდა ავტორმა წინ უნდა წაიმძღვაროს გარკვეული მსოფლმხედველობა, გარკვეული იდეალები. მხოლოდ ამ პირობებში შესძლებს ავტორი ნამდვილი და შემუშავებული კომედიების შექმნას, დღეს კი მისი ნიჭი უფრო მზადების ხანაშია, ვიდრე შემოქმედებაში.

1902 წ.

## რბ არის კრიტიკა

(ბუნება და მშვენიერება — პოეზია და კრიტიკა)

არ გაგივლია. მკითხველო, ახალ გაზაფხულზე ბალში? სხვადასხვა ფერად აყვავებული ხეხილი მაყურებლის თვალს იტაცებს; ერთი კოკორი მთლად გადაშლილია და მზისათვის მიუშვერია მკერდი. მეორეს ოდნავ გაუღია ნორჩი ფურცლები და ეკეკლუცება ფუტკარს. მესამე, ეს არის ახლა აპირობს ბუდიდან გამოძრომას; ნორჩი ფურცლები მზის სხივებს სხვადასხვა ფერად აკრთობენ და გაოცებულ, გაღვიძებულ ბუნებას სილამაზით ავსებენ. თუ გინახავს ასეთი სურათი, მხოლოდ სინამდვილეში უფრო ცხოველი, უფრო მიმზიდველი, ნუთუ ერთხელ მაინც არ გითქვამს: მშვენიერია სიცოცხლე, მშვენიერია ქვეყნიერება, მშვენიერად არის მასში ყოველივე გაწესრიგებულიო? ის თვისება, რომლის შემაერთებელ მცნებასაც ჩვენ მშვენიერებას ვუწოდებთ, უხვად არის გაბნეული ბუნებაში თვით უსულო საგანთა შორისაც. ის აერთებს, აკავშირებს ერთმანეთთან მაღალი კლდიდან გადმომჩქეფარე ნაკადულს, მაისის გაშლილ ვარდს, მოციმციმე ვარსკვლავს, ცისარტყელას და სხვ. მისთვის არც ალაგი, არც დრო არ არსებობს. ის ყველგან არის, ცასა და დედამიწას აერთიანებს.

დილით ადრე არ გინახავს ბალახზე აგორებული ცვარი? არ დაგიწყია მისთვის ცქერა, როგორ აკრთობს ის ახლად ჩამოშვებულ მზის სხივებს და აღმასივით ბრჭყვიალებს! ეს ერთი წვეთი წყალიც კი მშვენიერების მატარებელია: თოვლი რა არის, განა არ შეგიმჩნევია ხშირად, რა ლამაზი, რა სიმეტრიული სახე აქვს მის პატარა ფერფლს? აქაც კი არის მშვენიერება, ამ პატარა ფერფლში, რომელსაც მზის ერთი უბრალო სხივიც კი არსებობას უსპობს.

დაანებეთ თავი უსულო საგნებს. განა ბუნებას ცხოველთა შორის ნაკლები სიუხვით დაუთვისია მშვენიერება? ბუნება და ბუნების საგნები რომ მოკლებული იყოს ყველა ამ თვისებას, რომელსაც ადა-

მიანის ენა მშვენიერებას უწოდებს; ყოველიფერი მკვდარი. უსი-  
ცოცხლო, მიუზიდველი იქნებოდა, — თვით ადამიანის ცხოვრებასაც  
კი არ ექნებოდა ფასი. რა სიცოცხლეა ის სიცოცხლე, რომელიც  
მშვენიერებას მოკლებულია? — „გველსა ხვრელით გამოიყენას ენა  
ტკბილად მოუბარო“, უთქვამს უკვდავ რუსთაველს. მშვენიერების  
გამოხატულებას ბუნებაში ორგვარი სახე აქვს, ან. უკეთ რომ  
ვთქვათ, მშვენიერება ცოცხალ ქმნილების შემეცნებას მხოლოდ ორა-  
გზით აღწევს: თვალის შემწეობით და ყურის შემწეობით. სმენე-  
ლობითი შეგნება მშვენიერების უფრო მეტ ესთეტიურ განვითარებას  
ითხოვს ცხოველისაგან, ვიდრე მხედველობითი შეგნება: ნახულის  
აწონა და დაფასება უფრო ადვილია, ვიდრე გაგონილია. მიუხედა-  
ვად ამისა, წყურვილი მშვენიერებისა იმდენად გავრცელებულია  
ცოცხალ არსებათა შორის, რომ ტკბილ ენას გველის გამოყენაც კი  
შესძლება ხვრელიდან. რომ აქ არავითარი გადაჭარბება არ არის.  
ამას ბევრი მაგალითი ამტკიცებს: ინდოეთში ადგილობრივი მცხოვ-  
რებნი ერთგვარის საკრავით იმდენად ათინიერებენ და იმორჩილე-  
ბენ შხამიან გველს, რომ მისი დაჭერაც კი უხიდათო ხდება. განა შენ  
თვითონ არ გინახავს. მკითხველო, გაზაფხულის პაპანაჭება დღეში  
როგორ წამოწვება ხოლმე ქვაზე უშნო, ულაზათო ხელიკი?! ის ამ  
დროს ბუნებისა და სიცოცხლის ნეტარებითა სტკბება და სრულ ბედ-  
ნიერებად გრძნობს თავს. ფრინველებს რომ არ ესმოდეთ, თუ რა  
არის მშვენიერება, ექვსგარეშეა. ბუნებას აღარ ეყოლებოდა სხვა-  
დასხვა მაგალობელი ფრინველი. რით ხიბლავს, რით იმონებს მამალი  
ბულბული თავის სატრფოს გულს? მხოლოდ ხმის სიმშვენიერით.  
ფრინველთა და ცხოველთა შორის დედლის მოსაპოვებლად უმეტეს-  
ნაწილად ბრძოლაა; ზოგან ბრძოლაა ფიზიკური, — ვინც ყველას  
მოერევა, დედალიც მას რჩება. მაგრამ ხშირად და უფრო ფრინველ-  
თა შორის ბრძოლა ესთეტიურია: ვინც უფრო მოაწონებს თავს დე-  
დალს თავისი გარეგნობით. გამარჯვებულიც ის არის. ამგვარი მაგა-  
ლითებით სავსეა ბუნების ისტორია. რას გვასწავლის ყოველივე ეს?  
აი, რას. ბუნებაში ვერ ნახავთ ვერც ერთ ცხოველს, რომელიც არ  
ეტანებოდეს მშვენიერებას, რომელსაც არ ხიბლავდეს მშვენიე-  
რება.

სწავლა იმისი, თუ როგორ ვითარდება და ფართოვდებოდა ის-  
ტორიის მსვლელობაში წარმოდგენა, არის ამავე დროს სულიერი და  
მატერიალური კულტურის ევოლუციის შესწავლა. თანამედროვე  
ადამიანს და თანამედროვე საზოგადოებას თუ მივმართავთ, დავრწ-  
მუნდებით, რომ ერთ უძლიერეს წყურვილს ადამიანისას წარმოად-  
გენს მშვენიერება, ძვირფასად მორთული სახლა მდიდრისა, ტლან-

ქად შეღებელი კარი ღარიბის ქოხისა, რაჭველის ქამანჩა და ბეთ-  
პოვენის მუსიკა. რკინის ბეჭედი ღარიბის თითზე და ევროპელი მდი-  
დარი ქალის სამკაული — ყველა ნაყოფია, გამოწვეულია მშვენიერე-  
ბის სიყვარულით, მშვენიერების მოთხოვნილებით. რა იაფადაც უნ-  
და აფასებდეს ყოველი ჩვენგანი სხვის აზრს, მაინც ყოველი ჩვენგანი  
ცდილობს, რაც შეიძლება, კარგის მხრით ეჩვენოს სხვას. წყურვილი  
მშვენიერებისა იმდენად მძლავრად არის ჩვენს არსებობაში გამჭდა-  
რი, რომ არც ლაპარაკის დროს, არც მიხრა-მოხრაში, არც ჩაცმა-და-  
ხურვაში, არც ერთ ჩვენთაგანს არ ავიწყებდა, რომ უშნოდ, ტლან-  
ქად, სასაცილოდ არაფერი მოიმოქმედოს. მოკლედ რომ ვთქვათ:  
ყველას გვინდა, ერთი მხრით, ჩვენში მშვენიერება იყოს, რაც შეიძ-  
ლება მეტი, მეორე მხრით, — რომ ჩვენში, ყველა რაც შეიძლება,  
მეტს მშვენიერებას ხედავდეს.

რატომ ეტანება ამდენად ადამიანი მშვენიერებას? სად არის  
ამის მიზეზი? ერთი მხრით, — ადამიანში, მეორე მხრით, — ისევე  
მშვენიერებაში. განვითარების დაბალ საფეხურზე ადამიანს ყოვე-  
ლივე მშვენიერი იმიტომ მოსწონდა, რომ მისთვის ეს სასარგებლო  
იყო, — ამბობს ბევრი. თავდაპირველად სასარგებლო და მშვენიე-  
რი ერთი და იგივე იყო, — ამბობს გუიო თავის ესთეტიკაში. ამგვა-  
რად, ზოგიერთი მეცნიერის აზრით მშვენიერებისადმი სიყვარულისა  
და მისწრაფების საიღუმლოება ადამიანის ეგოიზმში იმარხება —  
ადამიანს მოსწონს ყოველიფერი, რაც მისთვის სასარგებლოა, და  
რადგანაც ყოველგვარი მშვენიერი იმავე დროს მისთვის სასარგებ-  
ლოც იყო, აქედან ადამიანის ბუნებაში თანდათან ჩაისახა და გაძ-  
ლიერდა სიყვარული მშვენიერებისადმი.

ამგვარი აზრი შეცდომად უნდა ჩაითვალოს. როდესაც ვუკვირ-  
დებით ადამიანის მისწრაფებას მშვენიერებისადმი, ვრწმუნდებით,  
რომ ეს მისწრაფება მხოლოდ მოთხოვნილებაზეა დამყარებული —  
მშვენიერება ადამიანის ბუნების მოთხოვნილებაა, ესთეტიკურ მოთ-  
ხოვნილებას კი იწვევს და ანვითარებს მხოლოდ სიამოვნება და სარ-  
გებლობა. თუ ინდოელის სალამურს გველი ხვრელიდან ამოჰყავს  
მხოლოდ იმ მიზეზის წყალობით, რომ გველს სალამურის ხმა სიამოვნ-  
ებას ჰგვრის; თუ ზოგიერთი ფრინველი მხოლოდ ერთ მამალს ნებ-  
დება და არა მეორეს, მხოლოდ იმიტომ, რომ მისი გალობა ან მისი  
სილამაზე ყველაზე მეტად სიამოვნებს, თუ ჩვენ მოგვწონს მშვენიე-  
რი ქანდაკება, გამოჩენილი მხატვრობა, გაზაფხულის ლამაზი დი-  
ლა, აყვავებული ველი, ბეთპოვენის სონეტა, მესხიშვილის თამაში,  
გოეთეს ვერტერი და სხვა, მხოლოდ იმიტომ, რომ ყველა ეს სიამოვნ-  
ებას იწვევს ჩვენში. რად იწვევს ჩემში, შენში და მასში მშვენიე-

რება სიამოვნებას? ამას პასუხს ვერავინ მოგცემთ, — ამგვარია, საზოგადოდ, ადამიანის ნერვები, რომელთა ერთ უმთავრეს მოთხოვნილებას სიამოვნება შეადგენს.

თუმცა საძირკველი მშვენიერებისა სიამოვნებაა, მაგრამ მკითხველისათვის ცხადია, რომ საზოგადოება არ წარმოადგენს მშვენიერების კრიტერიუმს, მშვენიერების სასწორს: სულ ხშირად მას, რაც სასიამოვნოა, მშვენიერებასთან, შეიძლება შორეული ნათესაობაც არ ჰქონდეს. ამის მიზეზი სიამოვნების სხვადასხვაობაში მდგომარეობს. მშიერ კუჭზე მადლიანი ლუკმა დიდ სიამოვნებასა ჰკვრის ადამიანს. მაგრამ ლუკმის პირში ჩადება, რა მშვენიერიც უნდა იყოს ეს პირი და მისი ლეკვა, არავითარ მშვენიერებას არ წარმოადგენს. სიამოვნება ორგვარია: ხორციელი და სულიერი. ყოველ და ყოველგვარ მშვენიერების უმთავრეს და უპირველეს პირობას ის შეადგენს, რომ უნდა იწვევდეს ადამიანში მხოლოდ სულიერ სიამოვნებას.

მეორე მიზეზი მშვენიერისადმი მისწრაფებისა: როგორც უკვე ვთქვით, თვით მშვენიერებაშივეა. ამის შესაგნებად საჭიროა იმის გარკვევა, თუ რა არის თვით მშვენიერება? რად ვუწოდებთ ერთ საგანს ან მოვლენას მშვენიერს, მეორეს კი არა?

რა არის მშვენიერება? არსებული, რეალური საგანი ან მოვლენა ის თუ არა? მშვენიერება არის მხოლოდ განყენებული ცნება. — ის გამოხატავს მარტო სახელს სხვადასხვა თვისებისას. თუ ჩვენ ვამბობთ, ესა და ეს საგანი მშვენიერებას წარმოადგენსო, ამით ჩვენ, აი, რისი თქმა, ან რისი გამოხატვა გვინდოდა: ესა თუ ის საგანი შეიცავს ერთს, ორს, სამს ან მეტს თვისებას, რომლებიც ჩვენ სულიერ ანუ ესთეტიურ სიამოვნებას გვანიჭებენ. ამგვარად, მშვენიერება არის მხოლოდ განყენებული სახელი, განყენებული წარმოდგენა რომელიმე საგნისა ან მოვლენის იმგვარ თვისებათა, რომლებიც ადამიანის სულიერ სიამოვნებას იწვევენ.

აქედან ცხადია ისიც, თუ რად ვუწოდებთ ერთ საგანს მშვენიერს, მეორეს კი არა: ერთ საგანში მოიპოება ის თვისებანი, რომლებიც მშვენიერებას წარმოადგენენ და რომლებსაც მეორე მოკლებულია; ხოლო იმის ახსნა და გამორკვევა, თუ რას წარმოადგენენ ეს თვისებანი, რა ახასიათებს მშვენიერებას — ფრიად ძნელი და მასთან, ფრიად რთულია. აიღეთ სხვადასხვა ესთეტიკა, არისტოტელედან მოკიდებული. იმ კითხვაზე, თუ რა ახასიათებს მშვენიერებას, თქვენ ვერ მიიღებთ გადაჭრილ პასუხს, ყველა თავისებურად ხსნის ამ საკითხს, და ამიტომაც არის, რომ ესთეტიკა, მიუხედავად მთელის თავისი მეცადინეობისა, დღემდე მხოლოდ სუბიექტური აზრების



კრებულს წარმოადგენს და არა მეცნიერულ ნიადაგზე დამყარებულ მოძღვრებას. ინდუქციის შემწეობით ჩვენ შეგვიძლია გამოვარკვიოთ მხოლოდ რამდენიმე მხარე, ან რამდენიმე აუცილებელი პირობა მშვენიერებისა. ავიღოთ რომელიმე მოქმედება, თუნდა თამაში. თქვენ უყურებთ ორს მოთამაშეს; პირველის თამაშში თქვენ ხედავთ მშვენიერებას, მეორისაში კი არა. რა არის ამის მიზეზი? თუ კარგად ჩავუყვირდებით მოთამაშეთა მიხრა-მოხრას და იმ შთაბეჭდილებას, რომელსაც ისინი თქვენში იწვევენ, შემდეგ კეშმარიტებას აღმოვაჩინთ: ყოველგვარ მოძრაობას პირველი მოთამაშე ასრულებს ბუნებრივად, ძალდაუტანებლად, დაუღალავად და მწყობრად; მეორეს კი, როგორც ტანის რხევაში, ისე ფეხის აყოლებაში სიმძიმე, მოუხეშაობა, უსწორ-მასწორობა და ნაძალადეობა ემჩნევა. ამგვარად, ყოველგვარ მოქმედებაში მშვენიერების აუცილებელ პირობას წარმოადგენს ბუნებრიობა, ძალდაუტანელობა და ადვილად აღსრულება თვითეული მიხრა-მოხრისა. აიღეთ ორი სხვადასხვა საგანი: პირველი განხორცეულებაა მშვენიერებისა თქვენს თვალში, მეორე კი არა. თუ ჩაუყვირდებით ორივეს, მალე დარწმუნდებით, რომ პირველი საგნის სხვადასხვა ნაწილი ზომიერად და სისწორით არის ერთმანეთთან შეწყობილ-შეერთებული, მეორისა კი არა. ე. ი. პირველი საგნის ნაწილებში დაცულია სიმეტრია, მეორისაში კი არა. აუცილებელ და უპირველეს პიროვნებას მშვენიერებისას, რაშიაც უნდა იხატებოდეს იგი. წარმოადგენს სიმეტრია. აიღეთ სიმღერა, თუ ის მოკლებულია სიმეტრიას. — ანუ, მუსიკის ენაზე, რიტმს. უთუოდ ცუდ შთაბეჭდილებას ახდენს მსმენელზე. აიღეთ ლექსი. თუ ის მოკლებულია სიმეტრიას, ანუ, პოეზიის ენაზე რითმასა და მარცვალთაწყობის ერთგვარობას, მაშინ ის საძაგელ შთაბეჭდილებას ტოვებს ადამიანზე.

რათ წარმოადგენს სიმეტრია. რიტმი, რითმა, ბუნებრიობა. ძალდაუტანლობა და სხვ. მშვენიერების პირობას? ამის პასუხს ფიზიოლოგები იძლევიან. იმ საგანს, მოვლენას და სხვ, სადაც ყველა ეს პირობა დაცულია, ჩვენი წარმოდგენა უფრო ადვილად ითვისებს, ჩვენი ნერვები უფრო ნაკლებად იღლებიანო, ამბობენ ისინი, და მშვენიერების სამთავროს მხოლოდ ის ეკუთვნის, რაც უფრო ნაკლებად ღლის ნერვებს და უფრო ადვილად შედის წარმოდგენაში.

ამაზე მეტს არც ერთი ესთეტიკა არ გვეუბნება. მართალია, ბევრი ტომი დაწერილა მშვენიერების დასახასიათებლად, მაგრამ ყველა მხოლოდ იმ პირობების გარშემო ტრიალებს, რომლებიც ჩვენ ჩამოვთვალეთ. თუ რამდენად გამოუჩვეველია მშვენიერების კითხვა

დღეს და რამდენად ძნელია მშვენიერების გარკვევა და გამოცნობა ყოველ კერძო შემთხვევაში. ამის მაგალითს უხვად გვაძლევს კრიტიკის ისტორია. ლიტერატურის ისტორიამ არ იცის არც ერთი მწერალი. რომლის შესახებაც ორ სხვადასხვა კრიტიკას ერთი აზრი გამოეთქვას.

ამგვარად, ზემოთ აღძრულ კითხვებზე ჩვენ შეგვიძლია შემდეგი ვუპასუხოთ: მშვენიერებას, ერთი მხრით, იმიტომ ეტანება ადამიანი, რომ სულიერი სიამოვნება ადამიანის მოთხოვნილებას შეადგენს, მეორეს მხრით, იმიტომ, რომ მშვენიერება გვაძლევს ძლიერ სულიერ სიამოვნებას და ამავე დროს ნაკლებად გვიღლის ნერვებს. იმ ფაქტს, რომ მშვენიერება იწვევს ადამიანში სულიერ სიამოვნებას, სულიერი სიამოვნება კი ადამიანის ერთ უძლიერეს მოთხოვნილებას შეადგენს, კაცობრიობის ისტორიაში ძალიან დიდი მნიშვნელობა აქვს. მაგრამ ეს მნიშვნელობა არსად არ ჩანს ისე ცხადად, ისე აშკარად, როგორც ხელოვნებაში, რა იქნებოდა ხელოვნება, რომ სულიერი სიამოვნება ადამიანის ძლიერ წყურვილს არ შეადგენდეს? — მოკლილი კაცის ვარჯიშობა, მეტი არაფერი. გაცილებით ნაკლებიც — ხელოვნება სრულებით არ იქმნებოდა... სულიერი სიამოვნების წყურვილი ყოველგვარი ხელოვნების არსებობისათვის აუცილებელ პირობას შეადგენს და, თუ პირველს ადამიანი მოკლებული იქმნებოდა, ამით ხელოვნებასაც აღარ ექმნებოდა ცხოვრებაში აღარავითარი ალაგა. ცხოვრება, მშვენიერებას მოკლებული, ცხოვრება უიდეალო, ადამიანი მხოლოდ კუჭის მატარებელი — აი, რა იქმნებოდა. მაგრამ ჩვენ ხელოვნებაზე ჩამოვაგდეთ სიტყვა. ხელოვნება ბევრგვარია: მხატვრობა, მუსიკა, პლასტიკა, ხუროთმოძღვრება, პოეზია და სხვა რა იქმნებოდა რაფაელის მადონა, რომ ადამიანი მოკლებული იყო გრძნობას მშვენიერებისას, რომ სულიერი სიამოვნება მის მოთხოვნილებას არ შეადგენდეს? — ნაყოფი უსარგებლო შრომისა რა სახელს დაიმსახურებდა ბეთჰოვენი, რომ ქვეყნად სულიერი სიამოვნება არ არსებობდეს? — შეშლილისას. გამოჩენილ ფირდოუსის სახელი ხომ არც კი ეცოდინებოდა ისტორიას და ყველა გამოჩენილი მწერლები იხსენიებოდნენ მხოლოდ, როგორც ცოცხალი მაგალითი იმ საბრალო პირთა, რომლებიც იბადებიან იმისათვის, რომ მთელი თავისი სიცოცხლე წყლის ნაყვას შეალიონ!

საბედნიეროდ, ეს ასე არ არის. ხელოვნება ერთ უძლიერეს სამკაულს შეადგენს ცხოვრებისას და მას ეტანება ყველა, განურჩევლად წოდებისა და მდგომარეობისა.

სიტყვაკაზმული მწერლობა, ანუ საერთოდ პოეზია, ხელოვნების

ერთ-ერთ დარგს წარმოადგენს. მწერლობის არც ერთ ნაწილს ათა აქვს იმდენი მოთხოვნილება და გასავალი ცხოვრებაში. როგორც პოეზიას. არც ერთ მწერალს არა ჰყავს იმდენი თაყვანისმცემელი. რამდენიც პოეტს. აიღეთ გამოჩენილი მეცნიერი და გამოჩენილი პოეტი. განა პირველს ნაკლები სარგებლობა მოაქვს საზოგადოებისათვის, ვიდრე მეორეს? — არასოდეს; — სულ ხშირად მეტიც. მაგრამ მიუხედავად ამისა, პირველი მოკლებულია იმ საერთო თაყვანისცემას, რომელიც მეორეს ყველგან თან დასდევს. დავანებოთ მეცნიერთ თავი, ავიღოთ რომელიმე პრაქტიკული მოღვაწე, თუნდა უატტი. ათას შექსპირს არ შეუძლია იმდენი ცვლილების მოხდენა ცხოვრებაში და იმდენი პრაქტიკული სარგებლობის მოტანა კაცობრიობისათვის. რაც ერთმა უატტმა მოახდინა. მაგრამ სად შექსპირის სახელი და სად უატტისა! მერე აქ განა უსამართლობა და უმადურობაა საზოგადოების მიერ მოღვაწისადმი? სრულებითაც არა. უატტი იძლევა მშრალ სარგებლობას. შექსპირი კი, სარგებლობის გარდა, ძლიერ სულიერ სიამოვნებას, — აი, ამ სულიერ სიამოვნებაშია თავი და ძალა დამარბული. მიეცით საზოგადოებას სულიერი სიამოვნება და ის გაგაღმერთებთ: ამგვარად, პოეზიის *raison d'être* წუთიერი სიამოვნება შეადგენს, — უიმისოდ პოეზიის არსებობა შეუძლებელი შეიქმნებოდა.

რით მოქმედებს მკითხველზე პოეზია, როგორც მშვენიერება, ე. ი. რა პირობები, რა თვისებანი ახასიათებს პოეზიას, როგორც მშვენიერებას? ამგვარი თვისება მრავალია. პოეზია ბევრგვარია: სალირიკო, საეპოსო, ბელეტრისტული, სასცენო და სხვ. ყველა მათგანს სპეციფიკური თვისებანი აქვს, მაგრამ ამავე დროს ყველა მათგანისათვის მრავალი საერთო თვისებაც სავალდებულოა.

ერთ მთავარ პირობას პოეზიისათვის წარმოადგენს მხატვრული ენა. თუ, საზოგადოდ, დღევანდელი კრიტიკა ნაკლებ ყურადღებას აქცევს ამ მხარეს და, როდესაც შეეხება, ისიც რამდენსამე სიტყვიტ. ამის მიზეზი ის არის, რომ მხატვრული ენის საჭიროება პოეზიისათვის ანბანური ჰეშმარიტებაა და, თუ პოეზიაში ეს ჰეშმარიტება დაკლებული არ არის, ამის მიზეზი პოეტის გულშევიწყობა, თავისებურება და სალიტერატურო სკოლა კი არ არის, არამედ მხატვრული ენის უქონლობა და, საზოგადოდ, ენის უცოდინარობა: ლიტერატურაში ბევრგვარი სკოლა არსებობდა და დღესაც არსებობს, მათ შორის პრინციპიალური განსხვავებაა, ხოლო ლიტერატურის ისტორიამ არ იცის ორი სხვადასხვა სკოლა, რომელნიც მხატვრული ენის შესახებ ერთგვარი აზრისანი არ იყვნენ, მართალია, ხანდახან შეხვედებით.

რომ ერთი სკოლა უფრო ძველს ფორმებს და სტილს იცავს პოეზიაში, მეორე კი უფრო ახალს, ხ.ოლო იმაში, რომ ენა მხატვრული უნდა იყოს, ყველა თანახმაა. მხატვრულ ენას ახასიათებს ენის სიმარტივე; სიადვილე, სიმდიდრე და სხვ.

მეორე მთავარ პირობას პოეზიისას წარმოადგენს მხატვრული აღწერალობა. გარეშე საგნები და მოვლენანი ისეთი სისწორით, სინამდვილითა და სიცხოველით უნდა იყოს დახატული, რომ მკითხველს ნათელი სურათი წარმოუდგეს...

მესამე მთავარ პირობას პოეზიისას წარმოადგენს მხატვრული გამონახატულება. თავის ფიქრებსა და გრძნობებს პოეტი ისეთი სიწრფელითა და სინამდვილით უნდა ხატავდეს. რომ მკითხველი ნათლად იხედებოდეს პოეტის სულსა და გულში.

მეოთხე მთავარ პირობას წარმოადგენს ზომიერება ანუ სიმეტრია; ყველა ნაწილები ისე უნდა იყოს ერთმანეთთან შეხამებული, რომ, ერთი მხრით, ერთმანეთს ამშვენებდნენ და. მეორე მხრით, არც ერთი მათგანის გამოკლება არ შეიძლებოდეს. აქვე შედის რითმის მნიშვნელობა. რიტმი. ხმოვანთაწყობის ერთგვარობა და სხვ. როდესაც კითხულობთ თანამედროვე პიესებს, ხშირად არათუ მთელი გამოსვლა, მთელი მოქმედება ისეა ჩაკერებული. რომ მის გამოკლებითაც არაფერი აკლდება პიესას.

ყველა აღნიშნული პირობა წარმოადგენს მხოლოდ გარეგან მხარეს პოეზიისას. არის შინაგანი მხარეც. რომელიც. მხოლოდ იმ შთაბეჭდალეობაზეა დამყარებული, რასაც მკითხველში პოეზია იწვევს ან უნდა იწვევდეს. მაგალითად: პოეტი მართლა უნდა განიცდიდეს იმ ფიქრებსა და გრძნობებს, რომლებსაც ხატავს. — გულწრფელა უნდა იყოს, უნდა იწვევდეს მთლიან შთაბეჭდილებას. უნდა აღძრავდეს იმგვარის თვისებისა და ძლიერების ფიქრსა და გრძნობებს. როგორსაც თვითონ განიცდის შემოქმედების დროს. მაგრამ. რადგანაც ეს მხარე პოეზიისა ყველას თავისებურად ესმის და გამორკვეული და უტყუარად მიჩნეული აქ დღეს თითქმის არაფერია. ამიტომ ამის განხილვასაც არ გამოვუდგები, მით უმეტეს. რომ ეს მხარე პოეზიისა იმდენად მის მნიშვნელობას არ ახასიათება. რამდენადაც ამ მნიშვნელობის პირობებს.

მისი მიზანი მარტო სულიერი სიამოვნებაა, — ამბობს ერთი; პოეზია დაშორებული უნდა იყოს პრაქტიკულ მიზანს. — ამბობს მეორე: პოეზია უნდა ავითარებდეს მხოლოდ გემოვნებას მშვენიერებისას. — ამტკიცებს მესამე; პოეზია უნდა ემსახურებოდეს ცხოვრების წინსვლელობას. ქადაგებს მეოთხე. და ამგვარად, ათასნაირი პასუხი ისმის პოეზიის მნიშვნელობის შესახებ. აი, ამ აზრთა სხვადა-

სხვაობის გაკაფვას, გარკვევას ცდილობს მწერლობის ის დარგი, რომელსაც სალიტერატურო კრიტიკა ეწოდება.

ჩა არის სალიტერატურო კრიტიკა, როგორია მისი საზღვრები და რა არის მისი საგანი, არის თუ არა, საზოგადოდ, საჭირო სალიტერატურო კრიტიკა. აქვს მას რაიმე დამოუკიდებელი მნიშვნელობა, თუ ის მეტი ბარგია, მხოლოდ მაჩანჩალა პოეზიისა? ამ უკანასკნელი საკითხის გადაწყვეტა მით უმეტეს საჭიროა, რომ ბევრი და მათ შორის შესანიშნავი პირნიც, იმ აზრისანი არიან, რომ კრიტიკა სრულიად ზედმეტია, მას არავითარი მნიშვნელობა არა აქვსო. მაგალითად: რუსეთის გამოჩენილი მწერალრ და ფილოსოფოსი ტოლსტოი სალიტერატურო კრიტიკას სრულიად უარყოფს. თუ კრიტიკა დაიწყებს ფათურს იქ, სადაც მისი ალაგი არ არის, მას არათუ არავითარი მნიშვნელობა არ ექმნება, სასაცალოდაც გაიხდის თავს. თუ კრიტიკა გამოარკვევს თავის საგანს, გამოითარგლავს, გამოისაზღვრავს თავის სარბიელს. ამგვარ შემთხვევაში ის წარმოადგენს მთელ ფილოსოფიას პოეზიისას.

სამწუხაროდ, დღეს ასე არ არას: ყოველგვარი დომხალი რაც კი პოეზიის შესახებ იკაზმება, კრიტიკის სახელით სადღება, საზოგადოდ მიღებულია, ვითომ კრიტიკის მიზანი იყოს პოეზიის დაფასება, მისი ღირსება-ნაკლულეფანების გარკვევა მშვენიერების მზრით. ეს სრული შეცდომაა. წარმოიდგინეთ, რომ თქვენს კითხვაზე, — რა არის მაგიდა, ვინემ გიპასუხოთ: მაგიდა არის ავეჯი, რომელსაც ოთხი ფეხი აქვს. აქ შეცდომა ცხადია: ერთი, რომ ოთხი ფეხი ტანტსაც აქვს და სკამსაც და სხვ. მეორე — ოთხი ფეხი სრულებითაც არ არის მაგიდისათვის სავალდებულო და ნიშნობლივი თვისება: შესაძლებელია, მას ათი ფეხი ჰქონდეს, ან ერთი, და მაინც მაგიდა იყოს. აგრეთვე დაფასება პოეზიისა სრულებითაც არ შეადგენს კრიტიკის სპეციფიკურ თვისებას. — მას შეუძლია, სხვათა შორის, ამასაც მოტკიდოს ხელა, ხოლო მისი საგანი, მისი მიზანი უფრო ფართოა. ყოველგვარი მოძღვრება იმას უნდა ცდილობდეს, რომ მეცნიერებად გახდეს: იქითკენ უნდა იწევდეს კრიტიკაც. რა ახასიათებს მეცნიერებას საზოგადოდ? თავის განვითარების დაბალ საფეხურზე იკიხსნის მოვლენათა განსაზღვრულ ფარგალს, განვითარებას საშუალო საფეხურზე იგი ადგენს უტყუარ ემპირიულ კანონებს და, როდესაც იგი საკმაოდ განვითარდება, მას საშუალება ეძლევა, გამოკვლეულ კანონების მიხედვით, მომავალიც იკვლიოს, მომავალზე უტყუარი მსჯავრი წარმოთქვას.

ამგვარ კვლევაში მას გზას უნათებს შესაფერი მეთოდი. როგორც მეცნიერება, კრიტიკა ჯერ განვითარების პირველ საფეხურ-

ზეც არ შემდგარა. მისი საგანია პოეზია; ის იკვლევს პოეზიას, მაგრამ როგორ და რანაირად? კრიტიკის საზღვარი იწყება იქ, სადაც პოეზიისა თავდება. კრიტიკისათვის პოეზია არის ფაქტი ისე, როგორც ბიოლოგიისათვის უჯრედი და ასტრონომიისათვის მზის სისტემა. კრიტიკამ უნდა ახსნას ეს ფაქტი—პოეზია, ე. ი. კრიტიკამ უნდა გამოიკვლიოს პროცესი ანუ შემოქმედება — ერთი; მეორე — მან უნდა ახსნას ის პირობები, რომლებიც ბადებენ ამა თუ იმ სახის პოეზიას. პირველი საკითხი არის საკითხი ფსიქოლოგიური. მეორე კი — საზოგადოებრივი. ამგვარად, კრიტიკას კავშირი აქვს ფსიქოლოგიასთან და ყველა იმ მეცნიერებასთან, რომლების საგანიც საზოგადოებრივი ცხოვრებაა, როგორც სოციოლოგია, პოლიტიკური ეკონომია, უფლებათა მეცნიერება და სხვა.

შემოქმედებისა და პოეზიის ახსნის გარდა, კრიტიკას აქვს კიდევ ერთი დიდი მოვალეობა: მან უნდა გამოარკვიოს პოეზიის საზოგადოებრივი მნიშვნელობა. ამრიგად, კრიტიკამ პასუხი უნდა მოგვცეს შემდეგ სამ კითხვაზე: რა არის შემოქმედება? რა ინდივიდუალურ-საზოგადოებრივ ფაქტორებს ემორჩილება პოეზია? რა საზოგადოებრივი მნიშვნელობა აქვს. თუ ამგვარ ნიადაგზე დავაყენებთ კრიტიკას, მას უსათუოდ ეძლევა დამოუკიდებელი მნიშვნელობა. ამ ნიადაგს გარეშე კრიტიკა საესებით ზედმეტია და როგორც ყოველივე მეტი, — უსარგებლოც.

### კრიტიკა წარსულში. რა არის პოეზია, შემოქმედება

გავეცნოთ მოკლედ კრიტიკის ისტორიას და თვალი გადავაველოთ, თუ როგორ უყურებდნენ მწერლობის ამ დარგს კრიტიკის საუკეთესო წარმომადგენლები.

როდესაც ცოდნის ან ხელოვნების რომელიმე დარგი განვითარების საკმაო საფეხურს მიაღწევს, თავისთავად მისი ახსნის სურვილი ებადება ადამიანს. იქ, სადაც პოეზია საკმაოდ განვითარდა, ადრე თუ გვიან ლიტერატურული კრიტიკაც უნდა განვითარებულიყო, ისტორიულს საზომით რომ ვიხეღმძღვანელოთ, ძველი საბერძნეთის პოეზია დღევანდელი ევროპის პოეზიას არაფერში არ ჩამოუვარდება, ევროპამ ვერც ერთი დრამატურგი ვერ მოგვცა. რომელიც ძველი საბერძნეთის სოფოკლესზე მალა იდგეს.

იქ, სადაც ამდენად განვითარებული იყო პოეზიის საუკეთესო ნაწილი — ტრაგედია. — განვითარებული უნდა ყოფილიყო კრიტიკაც; და მართლაც, დემოკრიტიკე, პლატონი და არისტოტელე ძველი საბერძნეთის საუკეთესო კრიტიკოსები არიან, თუ პირველი არკვევდა და ლექსთაწყობის კანონებს, პლატონი იკვლევდა მშვენიერების

ძირითად თვისებებს. არისტოტელე კი თანამედროვე პოეზიის ანალოზით ცდლობდა პოეზიის მეცნიერულ თეორიის დამყარებას, იუ რა იყო არისტოტელეს პოეტიკის შინაარსი, ჩვენ არ ვიცით: აწ ნაწარმოებებს ერთი ნახევარი დაიკარგა; ჩვენს დრომდე მოატანა ნხოლოდ იმ ნაწილმა, სადაც არისტოტელე არკვევს ტრაგედიის თეორიას. ძველ რომში საუკეთესო თეორეტიკოსი კრიტიკისა იყო გამოჩენილი სატირიკოსი პორაციუსი.

არისტოტელეს პოეტიკას და პორაციუსის „საპოეზიო ხელოვნებას“ შეტად დიდი გავლენა ჰქონდა ევროპის ხელოვნებაზე მეჩვიდმეტე საუკუნემდე. მეჩვიდმეტე საუკუნეში გამოვიდა ბუალოს „საპოეზიო ხელოვნება“. რომელსაც გულდასმით იხეპირებდნენ ევროპის პოეტები თითქმის XIX საუკუნის ნახევრამდის.

ბუალო საუკეთესო თეორეტიკოსია ცრუკლასიკური ხელოვნებაა. თუმცა ის ენება ხელოვნების მნიშვნელობასაც. მაგრამ უმთავრესი საკითხი, რომელსაც ის ირკვევდა, შემდეგია: რა პირობა უნდა დაიცვას მწერალმა, რომ მისი ნაწარმოები მშვენიერებას წარმოადგენდეს. ბუალო მხოლოდ ამ მხრივ იკვლევს როგორც ხელოვნების კანონებს. ისე პოეტური ენის თვისებებს. ბუალოს თვალში სტილს პოეზიაში გაცილებით მეტი მნიშვნელობა აქვს. ვიდრე აზრს. პოეტური სტილის შესწავლას დიდ ადგილს უთმობს. ხელოვნების ყოველი დარგისათვის ბუალომ შექმნა რკინის კანონები; რომელაც სულს უნუთავს ევროპის ხელოვნებას; პოეზია იგივე აზრია. მხოლოდ თავისებურად გამოხატული. ყოველგვარი აზრი ხყოფია მარტო ინდივიდუალური ფსიქოლოგიისა კი არა, არამედ იმ საზოგადოებრივი პირობებისაც, რომელშიაც ადამიანი ცხოვრობს. ამიტომ. პოეზიის ასახსნელად საჭიროა, ერთი მხრით, პოეტის ბუნების. მეორე მხრით — სოციალური პირობების შესწავლა.

მეთვრამეტე საუკუნემდე ამ გზას კრიტიკა არ ადგა; მისი უმთავრესი საკვლევი — მშვენიერების პრინციპები იყო. მეთვრამეტე საუკუნეში პოპი, მონტესკიე და ჰერდერი ცდილობდნენ პოეზიისა და საზოგადოებრივ ცხოვრების შუა კავშირის გარკვევას. მაგრამ ამ გზას მტკიცედ და შეგნებულად ჟ-ნი სტალი დაადგა. თავი თსხულებამა „ლიტერატურის შეახებ“ ის იკვლევს, თუ რა გავლენა აქვს საზოგადოებრივ წყობილებას. პოლიტიკურ ორგანიზაციას და სხ. ლიტერატურაზე. სტალის გზას გაჰყვა ვილმენი. სტალთან ერთ დროს ბარანტი ჰბეჭდავს წიგნს საფრანგეთის XVIII საუკუნე. ლიტერატურის შესახებ, სადაც გარკვევით არის ის აზრი გამოთქმული. რომ ლიტერატურა მხოლოდ სარკეა ცხოვრებისა. საზოგადოებრივი წყობილება ლიტერატურასაც თავისებურ სახეს

აძლევს და არა ლიტერატურა საზოგადო წყობილებასაო. ამგვარად, ლიტერატურის ახსნის საჭიროება შეგნებულად მხოლოდ მეცხრამეტე საუკუნეში იბადება. მაგრამ ლიტერატურის მეკლევარნი უმთავრესად ყურადღებას საზოგადოებრივ ცხოვრებას აქცევენ. შეიძლება ამათ მიზეზი საფრანგეთის რევოლუცია იყოს. თანამედროვეთა აზროვნება ამ დღემდე ისტორიულმა მოვლენამ ძირიანად შეარყია თუ ზოგი ამ აზრისა იყო; ეს ამბობება სულ ენციკლოპედისტთა ქადაგების ბრალიაო. სხვები დარწმუნებით ქადაგებდნენ: საზოგადოებრივი წყობილება ფუყე და დაობლებული იყო. ამიტომ უსათუოდ უნდა დანგრეულიყო. ლიტერატურა აქ არაფერ შუაშიაო. რევოლუციამ შთანთქა ადამიანის აზროვნება. ყველა საზოგადოებრივი წყობილების კვლევამ გაიტაცა; აქ ეძებდნენ ყველაფრის მიზეზს, ეძებდნენ ლიტერატურის ახსნასაც. ფაქტი. რომ ბელოვნების ახსნის ერთი ნასკვი თვით პოეტის ბუნებაშია. ყველას გადაავიწყდა, გარდა სენ-ბევისა, რომელმაც იყისრა ამ ფაქტის ახსნა და დასაბუთება. სენ-ბევის კრიტიკა რვივე ბიოგრაფიაა; ის დაწვრილებით იკვლევდა პოეტის ფსიქოლოგიას. რომ ამით აეხსნა მისი ნაწარმოები. სენ-ბევს მეთოდი არის ბიოგრაფიული. ის იკვლევს პოეტს ბიოგრაფიას, რომ იმით გაიგოს მისი ფსიქოლოგია; ფსიქოლოგია კი, სენ-ბევს აზრით, ნათელსა ჰფენს მის პოეზიას.

ლიტერატურას უფრო ფართოდ ტენი უყურებდა. ეს ერთადერთი კრიტიკოსია, რომელიც კრიტიკისათვის ფართო მეცნიერულ ნიადავს იკვლევდა. ხელოვნებას ასახსნელად საჭიროა მწერლის მოღვაწის, წრისა და ისტორიული მომენტის გამორკვევა. ამისათვის, საჭიროა მემკვიდრეობის შესწავლა. სოციალურის, პოლტიკურის წყობილებისა და სხვ. გამოკვლევა. ისტორიული მომენტის შესასწავლად ტენი ცდილობდა იმის გამორკვევას. თუ როგორი იყო პოეტის სულიერი მდგომარეობა იმ დროს. როდესაც ის ამა თუ იმ ნაწარმოებას ქმნიდა.

თანამედროვე კრიტიკოსთა შორის საუკეთესო ადგილი ბრანდესს უჭირავს როგორც ნიჭით. ისე ვრუდიციით და ევროპის ლიტერატურის ცოდნით. ბრანდესი მოწაფეა როგორც სენ-ბევის. ისე ტენისა. პირველთან მას აერთებს ბიოგრაფიული მეთოდი. მეორესთან --- წრისა და ისტორიული მომენტის შესწავლა.

ამგვარად, ერთი წამით გასედევა წარსულისაკენ შემდეგ გარემოებაზე მივგოთივებს. კრიტიკული აზროვნება. ძველა დროიდან მოციდებულ მეთვრამეტე საუკუნის მიწურულამდე. მხოლოდ პოეზიის დაფასებას მისაღევდა. აქაც ის იმდენად ზნეობრივს ან სხვა რაიმე საზომით არ ხელმძღვანელობდა რაჰდენადაც წმინდ



მშვენიერებით. XVIII საუკუნის ბოლოდან დღემდე კრიტიკა ცდილობს მხოლოდ პოეზიის ახსნას.

დღევანდელი იმპრესიონისტული კრიტიკა, რომლის თეორეტიკოსადაც გენე-კენი უნდა ჩაითვალოს, ისევ ძველს გზას დაუბრუნდა: ის ცდილობს პოეზიის დაფასებას, ხოლო მშვენიერების ანალიზით კი არა, არამედ იმ შთაბეჭდილების აწონ-დაწონით, რომელსაც პოეზია ახდენს მკითხველზე საზოგადოდ, ან მხოლოდ კრიტიკაზე.

ზემოთ ჩვენ აღვნიშნეთ, თუ რა არის მიზანი კრიტიკისა. ერთი მხრით, ის ცდილობს ახსნას შემოქმედება და პოეზია, მეორე მხრით. ცდილობს გამოარკვიოს ხელოვნების საზოგადოებრივი მნიშვნელობა. რამდენადაც კრიტიკა ასრულებს პირველ დანიშნულებას, ის არის მეცნიერება; რამდენადაც მეორეს — ის არის პუბლიცისტიკა. ამრიგად კრიტიკის მიზანს ორი სახე აქვს: ერთი მეცნიერული, მეორე პუბლიცისტური.

რა არის პოეზია? პოეზია არის მხოლოდ სურათში ან სურათებში ჩამოსხმული აზრი, აქედან შემდეგი ორი დასკვნა: 1) უმთავრესი ნაწილი პოეზიისა არის აზრი, 2) იქ, სადაც არ არის აზრი, არ არის არავითარი პოეზია, ხოლო მარტო აზრი საკმაო არ არის პოეზიისათვის: აზრის გარდა, პოეზიას განუყრელად თან უნდა ახლდეს ისიც. რასაც საერთოდ მშვენიერება ეწოდება. თუ რისთვის არის ეს მშვენიერება საჭირო, ამას ქვემოთ დავინახავთ. დღემდე არ არსებობს არც ერთი თეორია, რომელიც საკმაო დაახლოებულ პასუხს იძლეოდა, თუ რა არის შემოქმედება. დღეს ყველაზე უფრო გავრცელებულია სპენსერის თეორია. სპენსერი შემოქმედებასა და საზოგადოდ, ხელოვნებას, უყურებს როგორც უშიზნო თამაშს, ვარჯიშს. არსებობისათვის ბრძოლაში იხარჯება ცხოველის ენერგია, ყოველ ცხოველს ენერგია ზედმეტი აქვს. ვიდრე რჩენისათვის საჭიროა. ზედმეტ ენერგიას ის ხარჯავს უშიზნო ვარჯიშობაში. ხელოვნებაც იგივე ვარჯიშობაა, მიზანს მოკლებული.

როგორც სიტყვა არ არის მარტო ადამიანის კუთვნილება, და მერცხლის კიკიკისა. ხბოს ბლავილში და სხვ. უკვე არის ჩასახული სიტყვა. არც შემოქმედებაა მარტო პოეტის კუთვნილება, ის ყოველ ადამიანს გააჩნია; როდესაც ბავშვი ცდილობს უსწორმასწორო ხაზებით ადამიანის თავის, ფრინველის და სხვ. დახატვას, როდესაც პატარა მოსწავლე ალტაცებით უამბობს დედას, თუ როგორ კარგად მიუგო მან გაკვეთილი მასწავლებელს, აი, ამ მარტივ ფაქტებშიაც კი არის საკმაოდ შემოქმედება.

რა არის შემოქმედება? ის გამოხატვან სურათისა, გრძნობისა და ფიქრის, — ჩვეთვლილ მაგალითებში კი ყველა ეს ელემენტი ზია! რაც უნდა ნიჟიერი იყოს ბავშვი, დიდ ადამიანთან მისი შედარება შეუძლებელია, — მაშ შემოქმედება ყოველ ნორმალურს გონიერების ადამიანს სჩვევია; მაგრამ ამგვარ შემოქმედებას არავითარი ხელოვნების შექმნა არ ძალუძს, ხელოვნება ნაყოფია მხოლოდ უმწვერვალესად განვითარებულის შემოქმედებისა. აიღეთ ორი ორატორი. ორივე ერთისა და იმავე საგნის შესახებ ლაპარაკობს. მაგრამ როდესაც ერთი სრულსა და გარკვეულს წარმოდგენას აძლევს მსმენელს, მეორე მხოლოდ ბუნდოვან წარმოდგენას სტოვებს. აიღეთ ორი აღწერა რომელისამე ბუნებრივი მოვლენისა: მაშინ, როდესაც პირველი აღწერა მკაფიო სურათს სტოვებს თქვენზე, მეორე მხოლოდ დაჩრდილულ, უკონტურო სურათს გაძლევთ. რა არის ასეთ განსხვავების მიზეზი? მიზეზი შემდეგია: ნათელი წარმოდგენა რომ იქონიოთ საგანზე, უნდა იცოდეთ, ერთი მხრით, ის თუ რა ძირითადი მსგავსება აქვს მას სხვა საგნებთან, მეორე მხრით — თუ რა ძირითადი განსხვავებაა მასა და სხვა საგნებს შორის, მესამეც ის, თუ როგორია მისი ნიშნობლივი დამახასიათებელი თვისებანი. ხშირად შეხვდებით სიტყვაკაზმულ მწერლობაში შემდეგ ფაქტს: ერთი მწერალი რამდენსამე ფურცელს ანდომებს თავისი გმირის დახასიათებას, მაგრამ ბოლოს გმირი რაღაც უსახო, გაურკვეველი გამოდის, მეორე კი რამდენიმე სიტყვით სრულყოფილად და უნაკლოდ ახასიათებს თავის გმირს; აქ მიზეზი ცხადია, ერთი ბევრს ლაპარაკობს, მაგრამ მთავარი თვისება გმირის ხასიათისა მისთვისაც შეუძნეველი რჩება. ამიტომ ვერც მკითხველს აძლევს ნათელ წარმოდგენას; მეორე კი მხოლოდ გმირის ხასიათის ნიშანდობლივ, სპეციფიკურ თვისებაზე მიგითითებთ და ამით ერთის დაკვირვით ვაგაცნობთ მას; მაშასადამე, შემოქმედების ერთი თვისება იმაში მდგომარეობს, რომ ის უფრო ადვილად ამჩნევს ყოველს მოვლენასა და საგანში ნიშანდობლივსა და არანიშანდობლივ თვისებებს, ვიდრე ჩვეულებრივი დაკვირვება.

ცხოვრება შეუჩერებლად წინ მიდის, ის მუდამ ცვალებადია; სოლო ამ ყოველდღიურ ცვლილებას ჩვეულებრივი ადამიანი ვერ ამჩნევს. ბაზაროვები მხოლოდ მაშინ დაინახა რუსეთის საზოგადოებამ გარკვევით, როდესაც ტურგენევის რომანი წაიკითხა. განა ტურგენევის რომანმა დაჰბადა ისინი? რა თქმა უნდა არა. თვით ბაზაროვმა დაჰბადა ტურგენევის რომანი, მაგრამ ტურგენევი დაინახა და დახატა ის, რაც ცხოვრებაში უკვე გაჩენილი იყო და რასაც უმრავლესობა ჯერ ვერ ხედავდა. საზოგადოდ.

შემჩნეულა შემდეგი: როდესაც ადამიანის ყურს მრავალი დღის განმავლობაში სულ მაღალი ტონის ხმა ესმის, დაბალი ტონის ხმა ბოლოს აღარ ეყურება. იგივე ემართება საზოგადოებაში მცხოვრებ ადამიანსაც: მისი თვალა, მისი ფიქრი, აზროვნება მიჩვეულია ცხოვრების ერთგვარ სახეს, ერთგვარ მიმდინარეობას, და ცვლილებას ცხოვრების სახეში, მის მიმდინარეობაში მხოლოდ გვიან ამჩნევს. ავიღოთ დიდებული შექსპირი, ჰამლეტი ჩვენის დროი: დიდებული ლიტერატურული განძია, მაგრამ, თუ მხედველობაში მივიღებთ იმ საზოგადოებრივ პირობებს, რომელშიაც ეს პიესა დაიბადა. ავტორის ნაჭი კიდევ უფრო მიუწვდომელი ხდება: მართლაც, დახატვა იმისა, რაც უკვე არსებობს და რამდენსამე ნიშნის მხედვით აღდგენა იმისა, რაც მომავალში უნდა იქნეს, ერთი და იგივე არ არის. — მეორესთან შედარებით პირველი სულ ადვილი საქმეა. შექსპირის თანამედროვეებმა ჰამლეტი ვერ იცნეს, — ვერ იცნეს იმიტომ, რომ ჰამლეტი შექსპირის დროს არ ყოფილა; ის დიდი შვილია მეცბრამეტე საუკუნისა. საზოგადოება კარგად იცნობდა მაკბეტებს, რიჩარდებს, ჰენრიებს, ხოლო ჰამლეტი მას არ ენახა. შექსპირის დროს მხოლოდ იშვიათი ნიშნები იყო საზოგადოებაში ჰამლეტისა, პოეტმა კი ამ ნიშნების წყალობით შექმნა უკვდავი ტიპი. რომელმაც საუცხოოდ დაახსიათა ევროპის ყველა შემდეგი თაობა. დღემდე მოკიდებული.

ამგვარად. შემოქმედების მეორე თვისება მდგომარეობს იმაში, რომ ის ამჩნევს და ხედავს ცხოვრებაში იმას, რაც ჩვეულებრივ დაკვირვებას შეუძლებელი რჩება. ჰამლეტში რომ პოეტს მხოლოდ ის შეეერთებინა, რაც მან ცხოვრებაში დაინახა. მისი ჰამლეტი სრულებით სხვა გამოვიდოდა. და თუ ეს ასე არ მოხდა. მხოლოდ იმიტომ, რომ პოეტი მართო ცხოვრების სინამდვილეს არ დაენდო და თავის ფანტაზიასაც დაუჭერა. ფანტაზია ერთი უძლიერესი თვისებაა შემოქმედებისა: შემოქმედება უფანტაზიოდ იგივეა. რაც ურჩველი უფრთოდ. ადამიანი — უხელოდ. ფანტაზია — ეს სამსონის თმაა შემოქმედებისათვის: როგორც სამსონი უძლურია უთქოდ, ისე შემოქმედება სუსტია უფანტაზიოდ. ქართული პოეზიის სიუჟეტის ერთი მთავარი მიზეზი იმაში მდგომარეობს, რომ ჩვენის პოეტების ფანტაზია, საერთოდ, მეტად სუსტია. ამ უკანასკნელ მოვლენა მიზეზი ქართველ ადამიანის ბუნებაში კი არ მდგომარეობს. არამედ ცხოვრების პირობებში. ფანტაზია იმ ერისა, რომელიც მოკლებულია პოლიტიკურ დამოუკიდებლობასა და თვითშემდეგობას. სუსტია. მაშასადამე, სუსტი უნდა იყოს თვით ლიტერატურაც.

თავაუფლება და თვითმოქმედება საუკეთესო საშუალებაა. როგორც  
კერძო ადამიანისა, ისე მთელს ერია განსაკუთრებლად.

მკითხველისათვის ცხადია ის ქვეშარიტება, რომ ტიპები ცხოვ-  
რებაში ან სრულებით არ არიან. ან ერთობ იშვიათად. მაშ, საიდან  
აგსახულობს მას მწერალი? ის უკვირდება მრავალ სხვადასხვა პირს.  
ამხნევს და კრებს მათში ტიპიურ თვისებებს. შემდეგ ყველა ამათ  
ერთ პიროვნებაში მოუყრის თავს და მისცემს მას ინდივიდუალურ,  
თვისებურ სახეს. ამგვარად, შემოქმედების მეოთხე თვსება მდგო-  
მარეობს იმაში, რომ ის აერთებს, ერთად ჰკრებს მას, რაც ცხოვ-  
რებაში გაფანტულია. გაბნეულია. წაიკითხეთ „ოთარანთ ქვრივი“  
და „მოლიბუღ გზაზე“: პირველს ვერ გამოაკლებთ ვერც ერთ სიტ-  
ყვას ისე, რომ მთლიანობა არ დაირღვეს. აქ ყოველი სიტყვა თავის  
ალაგას არის, ყოველი სიტყვა საჭიროა. სამაგიეროდ. მეორეში არა-  
თუ სიტყვის, მთელი თავის გამოკლება შეიძლება ისე, რომ რო-  
მანის ღირსებას არათუ არაფერი არ დააკლდება, შეემატება კი-  
დეც. მაშინ, როდესაც პირველი მკითხველს ხიზლავს თავის სიტ-  
ყვამოჭრილობით, მეორე ცუდ შთაბეჭდილებას ახდენს, ღლის  
მკითხველს სიტყვაზვიადობით. ამგვარი ანალიზი სხვადასხვა ნაწარ-  
მოებისა ცხადად ამტკიცებს, რომ მეზუთე და ერთ უსაჭიროეს  
თვისებას შემოქმედებისას ზომიერების, სიმეტრიის დაცვა შეად-  
გენს.

ყველა ჩამოთვლილის თვისებით საკმაოდ რომ იყო დაჯილ-  
დობული პოეტი, მისი შემოქმედება ფრიად სუსტი იქნება, თუ  
მას თან არ ახლავს ერთი თვისებაც. რომელსაც პოეზიაში მეტად  
დიდი მნიშვნელობა აქვს, ხშირად შეხვდებით მწერლობაში, რომ  
ერთს ადვილად ეხერხება ყოველგვარი გრძნობის, აზრისა და თვისე-  
ბის გამოხატვა, მეორეს კი მეტად ეძნელება. ამის მიზეზი ის არის,  
რომ ერთს საკმაოდ აქვს გამომხატველობის ნიჭი, მეორეს კი არა.  
სწორედ ეს გამომხატველობის საკმაო განვითარება შემოქმედების  
უცილებელ თვისებას შეადგენს. გამომხატველობითი ნიჭი რთული  
თვისებაა შემოქმედების, —ის, ერთი მხრით, ბუნებრივი განძია.  
მეორე მხრით, შექმნილი ცოდნა: მაგალითად, მწერალმა რომ  
ადვილად და სიწორით გამოხატოს თავისი ფიქრი და გრძნობები,  
გამომხატველობის ნიჭთან ერთად მას უნდა ჰქონდეს მდიდარი  
ენა, უამისოდ მისი გამომხატველობითი ნიჭი შებოროცილია.

ყველა ჩამოთვლილი თვისება შეადგენს შემოქმედების ობი-  
ექტურ მხარეს. მასთანადამე, შემოქმედებას სუბიექტური მხარეც  
ჰქონია. ასეთ მხარეს შეადგენს შთაბეჭდილების მთლიანობა, გრძნო-  
ბათა სიღრმე და სიწრფელე და სხვ. მკითხველისათვის ცხადია, რომ

თვით შემოქმედება არის ფსიქიკური აქტი. იმდენადვე აუცილებელი, როგორც სუნთქვა და სხვა. მის საძირკველს, როგორც ყოველის ფსიქიკურ აქტისას, იღეათა ანოციაცია შეადგენს. ამგვარი შემოქმედებითი ანოციაციის მიზეზი არის: ან 1) გარეშე ბუნება. ან 2) პოეტის შინაგანი მხარე, ანუ „მე“, ან 3) ორივე ერთად. ყოველგვარის შემოქმედების დამახასიათებელ მხარეს ის შეადგენს, რომ იგი არის მოთხოვნილება. ადამიანის სხვადასხვაგვარი მოთხოვნილება ორ დიდ ჯგუფად განიყოფება; ერთ ჯგუფს შეადგენს ის მოთხოვნილებანი, რომელთა მიზანიც სასიცოცხლო საჭიროებათა დაკმაყოფილებაა, მაგალითად, საზრდოობა, სუნთქვა და სხვა; მეორე ჯგუფს შეადგენს ის მოთხოვნილებანი, რომელიც ხორციელ დაკმაყოფილებას, სიცოცხლის განგრძობას სრულებით არ ემსახურება; პირველს უწოდებენ: საზოგადოდ, ფიზიკურ მოთხოვნილებას, მეორეს სულიერს. შემოქმედება წარმოადგენს სულიერ მოთხოვნილებას. გავიგოთ. რა განსხვავებაა ამ ორ სხვადასხვაგვარ მოთხოვნილებათა შორის.

ავიღოთ ორი ფიზიკური მოთხოვნილება: სმა-ჭამა და სუნთქვა. ადამიანი თავისი ფიზიკური აგებულობით წარმოადგენს ცოცხალ მანქანას; როგორც ყოველგვარ მანქანას, მას შეუძლია მუშაობა; მუშაობისათვის კი საჭიროა მასალა ანუ საზრდო; როგორც ყოველგვარი მანქანის ნაწილები, ისე ადამიანის სხვადასხვა ქსოვილებიც ცვდებიან მუშაობის დროს; მათ შესავსებად საჭიროა იგივე საზრდო; ამგვარად, საზრდო საერთოდ იცავს იმ პირობებს, რომელთა გარეშე ჩვენს აგებულებას სიცოცხლე და მოქმედება არ შეუძლია. თვითონ საზრდოობა ხშირად სიამოვნებას გვძენს, მაგრამ ამ სიამოვნებას არავითარი კავშირი არა აქვს თვით საზრდოობის ღირსშესაძლებასთან; იგივე უნდა ვთქვათ სუნთქვაზეც. ჩვენი ქსოვილებში მისი მოქმედების შედეგად რჩება უვარგისი ნივთიერება — ნახშირის სიმჟავე; მოქმედება კი ქსოვილებს არ შეუძლია უუვანგბადოდ; სუნთქვის შემწეობით ჩვენი აგებულება იშორებს თავიდან აირველს და იძენს ჰაერიდან მეორეს. ამგვარად, სუნთქვის ერთადერთი მიზანია დაცვა იმ პირობებისა, რომელიც ჩვენი ქსოვილების სიცოცხლისა და მოქმედებისათვის არის საჭირო.

ავიღოთ ახლა რომელიმე სულიერი მოთხოვნილება, მაგალითად, მუსიკა. ჩვენ ეს მაგალითი იმისათვის ავიღეთ, რომ ამგვარი მოთხოვნილება ყველა ხალხის კუთვნილებას შეადგენს, როგორც კულტურულ სიმაღლეზედაც უნდა იღვეს იგი. ყველასათვის ცხადია, რომ მუსიკის დაკვრას ან მის მოსმენას არავითარი დამოკიდებულება არა აქვს იმ პირობებთან, რომელშიაც ჩვენი ქსოვილები

ციცხლობენ და მოქმედებენ. რა სულიერა მოთხოვნილებანიც უნდა ავიღოთ, ყველგან ამ თვისებას აღმოაჩენთ. ამგვარად ძირითადად განახევავება ფიზიკურსა და სულიერ მოთხოვნილებათა შორის ის არის, რომ პირველი აუცილებელ საჭიროებას წარმოადგენს სიციცხლისათვის, მეორე კი არა. როგორ გაჩნდა ფიზიკური მოთხოვნილებანი? ისინი, ერთი მხრით, თან დაჰყვა სიციცხლეს, მეორე მხრით, წარმოიშვა და განვითარდა არსებობისათვის ბრძოლაში. მაგალითად, საზრდოობა თანდაყოლილი მოთხოვნილებაა სიციცხლისა. ქვეყნად არ მოიპოვება არც ერთი მიკრობი, არც ერთი უმნიშვნელო უჯრედი, რომელიც არ საზრდოობდეს ამა თუ იმ სახით. სქესობრივი მოთხოვნალება წარმოიშვა და განვითარდა მხოლოდ შემდეგ, როდესაც ქვეყნად ორგანიული, სიციცხლე დიდი ხანია არსებობდა.

სულ სხვა სურათს წარმოადგენს სულიერ მოთხოვნილებათა წარმოშობა და განვითარება. როგორც დავინახეთ, სასიციცხლო პროცესებთან სულიერ მოთხოვნილებათ არავითარი კავშირი არა აქვთ: აქედან ცხადია, რომ სულიერი მოთხოვნილებანი ხანგრძლივის განვითარების ნაყოფი უნდა იყოს.

თავისუფალმა დრომ და თავისუფალმა ენერგიამ წარმოშვა და განავითარა ცხოველ არსებაში სხვადასხვა სულიერი მოთხოვნილება. სულიერი მოთხოვნილებანი იქ, სადაც ნერვები საკმაოდ არ არის განვითარებული, წარმოუდგენელია. ავიღოთ, მაგალითად, ძაღლი: არსებობისათვის ბრძოლა მას დიდს დროსა და ენერგიას არ აცლის: დანიშნულ დროზე პატრონი აწვდის მას ლუქმას. იმ ენერგიას, რომელიც მასში დღიური ლუქმის ძებნაში დაუხარჯავი რჩება, იგი ანდომებს თამაშს. ამგვარადვე ირჩება კატა: არ გიყურებიათ, როგორის გატაცებით და მზიარულებით ათამაშებს ხოლმე იგი ბურთს ან ქაღალდის სორსოლს? მან კარგად იცის, რომ არც პირველი და არც მეორე თავი არ არის, მაგრამ მას აქვს ზედმეტი ძალა, რომელიც დახარჯავს ლამობს და თამაშში ხარჯავს მას. ამგვარად თამაშში წარმოადგენს უმთავრეს სულიერ მოთხოვნილებას არა მარტო კატისა და ძაღლისას, არამედ თითქმის ყველა პირუტყვისას. ადამიანი არის მანქანა, მისი ყოველი ორგანო მუშაობს. მუშაობის დროს ის ხარჯავს ენერგიას, რომელსაც ჩვენი სხეული იჩენს. რომელი ორგანოც უნდა აიღოთ, ყოველ მათგანს აქვს გაცილებით მეტი ენერგია, ვიდრე მისთვის საჭიროა ჩვეულებრივის მუშაობის დროს. აიღეთ, მაგალითად, ადამიანის გული. ჩვეულებრივ მუშაობის დროს, შუათანა რიცხვი, ის ოთხმოცჯერ ჰფეთქავს ერთ წუთში. არაჩვეულებრივის მუშაობის დროს კი (ავადმყოფობის დროს) —

ის ორასამდე ჰფეთქავს წუთში, ე. ი. ორჯერ და მეტჯერაც უმატებს მუშაობას. ეს ზედმეტი ენერგია შეადგენს აუცილებელ პირობას, ურომლისოდაც შეუძლებელია სულიერი მოთხოვნილება გაჩნდეს.

მივუახლოვდეთ ფიქრით იმ ხანას, როდესაც ადამიანი მბეცურ მდგომარეობაში იყო. სანამ ის მთელს თავის ძალ-ღონეს თავის რჩენას ანდომებდა. შეუძლებელი იყო მას რაიმე სულიერი მოთხოვნილება გასჩენოდა. როდესაც ის გონებრივად იმდენად განვითარდა, რომ უფრო ნაკლები შრომით უკეთ მოიპოვა საზრდო ღამგვარად ენერგიის ერთი ნაწილი დაუხარჯავი დარჩა. ამ დროინდელმა ძალამ პირველად აატოკა, ააქოლოა მისი ტანი. ათაძაშა მისი გული და ნერვები. ეს აქოლოება იყო პირველი ნაახი სულიერის მოთხოვნილები.

რამდენადაც უმჯობესდებოდა ცხოვრების პირობები, იმდენად უფრო ვითარდებოდა ადამიანიც. თავდაპირველად მის სულიერ მოთხოვნილებას უთუოდ თამაში წარმოადგენდა, თამაშის შემდეგ და შემდეგ მიემატა ესთეტური სიამოვნება, მხედველობითი, შემდეგ კი სმენითი — მუსიკა, ეს სამი დასახელებული წყარო წარმოადგენს უმთავრეს სათავეს სულიერის მოთხოვნილებისა. მას შემდეგ მიემატა და თანდათან უფრო ძლიერდება სააზროვნო სულიერი მოთხოვნილება. პოეზია წარმოადგენს უკანასკნელ დარგს სულიერი მოთხოვნილებისას.

ამგვარად, როგორც შემოქმედება, ისე პოეზია, ორივე სააზროვნო სულიერ მოთხოვნილებას წარმოადგენს: მწერალი შემოქმედებაში ჰპოვებს ესთეტურ სიამოვნებას, თავისსავე შემოქმედებით იკმაყოფილებს სულიერ მოთხოვნილებას. მკითხველი კი პოეზიაში ჰპოვებს ესთეტურ სიამოვნებას, პოეზიის შემწეობით იკმაყოფილებს თავის სულიერ მოთხოვნილებას. რატომ ჰპოვებს ერთი სულიერ სიტკბობებს შემოქმედებაში, მეორე კი პოეზიაში? რატომ იზადება ერთი პოეტად, მეორე კი უბრალო მკითხველად? — რატომ არის თოვლი თეთრი და არა შავი? რატომ არის ყინული ცივი და არა ცხელი? ყველა ამგვარ „რატომ“-ზე ერთადერთი პასუხი მხოლოდ „მიტომ“ არის. ტვინის ის თვისებანი, რომლებიც შემოქმედებას ახასიათებენ, ყოველ ადამიანს აქვს, როგორც უკვე მოვიხსენეთ ზემოთ, ხოლო მათ რომ შემოქმედება წარმოშობონ, საჭიროა მათი საკმაოდ ჰარმონიული განვითარება, — ამას კი უმეტესობა მოკლებულია. შემოქმედება მტად რთული აქტია; ის მეცნიერებას ჯერ ვერ შეუსწავლია და ვერც გამოუკვლევია.

## ხელოვნურ ნაწარმოების კრიტიკა

თუ გვინდა ვაცოდეთ, როგორ ხსნის კრიტიკა პოეზიას ან საზოგადოდ, ხელოვნურ ნაწარმოებებს. ჭერ უნდა გავარკვიოთ: 1) თუ როგორ უნდა ახსნას კრიტიკოსმა მთელი ხანის პოეზია. 2) როგორ უნდა ახსნას კრიტიკოსმა ერთი პოეტის მთელი ხელოვნება; 3) როგორ უნდა ახსნას კრიტიკოსმა რომელიმე პოეტის ნაწარმოები. როდესაც ადამიანი ახასიათებს საერთოდ საგნების გროვას, მაშინ ის მხედველობის სხვა საზომით ხელმძღვანელობს, ვიდრე იმ შემთხვევაში. როცა ის ერთ რომელსამე საგანს ახასიათებს. უკანასკნელ შემთხვევაში ის ყურადღებას აქცევს საგნის ყოველგვარ თვისებას, რა წვრილმანიც უნდა იყოს ის. მკაფიო, გარკვეული სურათის დასახატად საჭიროა ერთნაირი სისწორით აღნუსხვა, ერთი მხრით. იმ თვისებებისა, რომლებითაც აღნიშნული საგანი სხვებს წააგავს, მეორე მხრით იმ თვისებებისა, რომლებითაც სხვებისაგან განირჩევა. სულ სხვანაირად იქცევა ის პირველ შემთხვევაში: აქ მას მხედველობაში აქვს მხოლოდ საერთო თვისებები, ე. ი. თვისებები, რომლებითაც საგნები ერთიმეორეს წააგვანან. რატომ? იმიტომ რომ საერთო, ზოგად წარმოდგენას რამდენისამე საგნისას მხოლოდ მათი საერთო თვისებანი იძლევიან და არა ინდივიდუალური. სწორედ იგივე უნდა ითქვას პოეზიაზედაც. სულ სხვაა, ერთი მხრით, მთელი რომელიმე ხანის პოეზიის დახასიათება, მეორე მხრით, ერთი რომელისამე პოეტისა.

პირველ შემთხვევაში კრიტიკოსმა სახეში უნდა მიიღოს მხოლოდ ზოგადი, საერთო თვისებანი ყველა იმ პოეტისა, რომლებიც აღნიშნულ ხანას ეკუთვნოდნენ; მეორე შემთხვევაში კი ის განსაკუთრებულ ყურადღებას პოეტის ინდივიდუალურ თვისებებს აქცევს. გავიგოთ. რა უდევს სარჩულად საერთო თვისებებს პოეზიისას და რა ინდივიდუალურ თვისებებს.

ყოველგვარი პოეზია: როგორიც და ვისიც უნდა იყოს, ან მხოლოდ აზრია ცხოვრების შესახებ, ან თვით ცხოვრებაა, ან ორივე ერთად. როდესაც პოეზია ცხოვრებას ხატავს, ცხადია, ეს ნახატი იმ-



გვარი იქმნება, როგორც თვით ცხოვრებაა, ან პოეტის წარმოდგენა ამ ცხოვრებაზე; ორივე შემთხვევაში ამგვარი პოეზიის ამა თუ იმ სახის მიზეზი ცხოვრების საზოგადოებრივი პირობანი არიან. რა არის პოეზიის მიზეზი მაშინ, როდესაც ის მხოლოდ ინდივიდუალური აზრია, პოეტის შეხედულება?

ყოველი აზრისათვის ორი ძირითადი მიზეზია საჭირო — ერთი ძხრით, — გარეშე, მეორე მხრით — შინაგანი, გარეშე მიზეზს წარმოადგენს ცხოვრება, შინაგანს — ადამიანის პიროვნება. ადამიანი რომ აღიზარდოს საზოგადოების გარეშე, მას არათუ არავითარი აზრი არ დაებადება თავში ათასი წელიც რომ იცოცხლოს, ერთი სიტყვაც არ ეცოდინება და უსიტყვოდ რა აზროვნება შეიძლება! ის წრე, სადაც ბავშვი იზრდება, სურათები, რომელსაც ბავშვი ხედავს. ნელ-ნელა აღვიძებენ მასში აზროვნებას, და უკვე დადინჯებული ადამიანის აზროვნებას ყოველთვის უტყუარი ბეჭედი აზის ცხოვრებისა. თუ ნიცმე ქმნის ზეკაცას სამეფოს, ტოლსტოი უარყოფს თანამედროვე კულტურას, სპენსერს კი იდეალად მიაჩნია თანამედროვე ინგლისის საზოგადოებრივი წყობილება, ამის მიზეზია, ერთი მხრით, მათი პიროვნება, მეორე მხრით, ის ცხოვრება, რომელშიაც თვითეული მათგანი იმყოფებოდა.

თუ ცხოვრების ერთი და იგივე პირობანი სხვადასხვაგვარ აზრებს იწვევენ სხვადასხვა პირებში, მიზეზი ის არის, რომ ყოველ ადამიანს თავისებური ბუნება აქვს და მასში ერთი და იგივე ცხოვრება სხვადასხვა რეაქციას იწვევს; ყოველი აზრი ამონაკენისია ცხოვრებისა, ხოლო პიროვნების გულში გატარებული. ამგვარად, რა სახისა და რა მიმართულებისა უნდა იყოს პოეზია. ცხოვრება წარმოადგენს მის საერთო ობიექტურ მიზეზს. პიროვნება პოეტისა კი მის ინდივიდუალურ მიზეზს. ამიტომ, როდესაც კრიტიკოსი ახასიათებს რომელიმე ეპოქის პოეზიას, მას მხედველობაში აქვს მხოლოდ ის საერთო მიზეზი, ე. ი. აღნიშნულ ეპოქის საზოგადოებრივი ცხოვრების სპეციალური პირობები.

მხოლოდ ამ პირობების გარკვევითა და გათვალისწინებით ის შეიგნებს და ახსნის ამ დროის პოეზიის საერთო საზოგადო ხასიათსა და მიმართულებას. მარტო სოციალური პირობების გათვალისწინება საკმარისი არ არის მაშინ, როდესაც კრიტიკოსი ხსნის ერთი რომელიმე პოეტის მთელ ხელოვნებას. რატომ? აი, რატომ: როგორც უკვე აღნიშნული გვქონდა, პოეზიას ორი ძირითადი ფაქტორი აქვს: ცხოვრების პირობები და პოეტის პიროვნება. პოეზია მხოლოდ აზრია; ყოველი ადამიანის აზრი წარმოადგენს ცხოვრების ზემოქმედების ნაყოფს, ხოლო ცხოვრების ზემოქმედების გავლენას თან ერთვის

პიროვნების<sup>1</sup> ინდივიდუალური ბუნების გავლენაც. თუ ერთსა და იმავე დროს, ერთსა და იმავე საზოგადოებაში ერთი პოეტი ვარსკვლავებს შეგალობს, მეორე კი დედამიწას დასტირის, ამის მიზეზი მათსავე პიროვნებაშია.

პიროვნება რთული მცნებაა. მას ორი მხარე აქვს — ფიზიკური და საზოგადოებრივი. პიროვნება — ფიზიკური ერთიანად ნაყოფიან მემკვიდრეობისა; პიროვნება საზოგადოებრივი კი ნაყოფია აღზრდის, განათლების და წრის ზეგავლენისა. თუ კრიტიკოსმა არ იცის პოეტის მემკვიდრეობა დაწვრილებით, მას აუხსნელი დარჩება მისი პოეზიის ზოგიერთი მხარე; აგრეთვე, თუ ის არ იცნობს იმ წრეს, რომელშიაც პოეტი აღიზარდა, მისთვის გაუგებარი იქმნება მის პოეზიაში ბევრი რამ. ამგვარად, როდესაც კრიტიკოსი ხსნის რომელიმე პოეტის პოეზიას, ცხოვრების პირობებს გარდა. მან უნდა გაითვალისწინოს ჯერ მემკვიდრეობა, მისი აღზრდა, განათლება და ის წრე, რომელშიაც ტრიალებდა პოეტი, როგორც ბავშვობაში, ისე შემოქმედების ხანაში.

ამგვარად, ცხოვრების საზოგადოებრივი პირობანი, პოეტის მემკვიდრეობა, მისი აღზრდა-განათლება, წრე და პოეტის სულიერი მდგომარეობა, — აი, ის ნიადაგი, ურომლისოდაც კრიტიკა უნაყოფოა. ამგვარი გზა ფრიად რთულია, ბევრში განუხორციელებელიც. მაგრამ ეს ერთადერთი გზაა კრიტიკისა.

ჩვენ განვიხილეთ პირველი ნაწილი კრიტიკისა, მის მეორე ნაწილს წარმოადგენს პოეზიის საზოგადოებრივი მნიშვნელობის გამოარკვევა. რა მნიშვნელობა აქვს პოეზიას? ემსახურება ან უნდა ემსახურებოდეს ის პრაქტიკულ მიზანს თუ არა? ამ კითხვის შესახებ უძველეს დროიდან აზრთა სხვადასხვაობა სუფევს. არისტოტელე, მაგალითად, უარყოფდა პოეზიას იქ, სადაც პრაქტიკული მიზანი გამოსჭევივოდა და. ამის მიხედვითაც, არქიტექტურას ის ხელოვნებად არ თვლიდა მხოლოდ იმიტომ, რომ არქიტექტურას პრაქტიკული მიზანი აქვს. კანტი, რენჟეიე. ტრინტალენი, სპენსერი — ყველა იმ აზრისანი არიან, რომ პოეზია და სარგებლობა ძირითადად ეწინააღმდეგებიან ერთმანეთს. ე. ი., იქ, სადაც სარგებლობაა, პოეზია არ არის და იქ, სადაც პოეზიაა, სარგებლობა არ არის. რატომ. რა დააკლდა პოეზიას მით, რომ ის სარგებლობას ემსახურებოდეს? ამის შესახებ არც ერთი არაფერს ამბობს. ისინი ხელმძღვანელობენ იმ მოსაზრებით, რომ ესთეტიკური სიამოვნება თამაშია, თამაში კი — სარგებლობის მიზანს მოკლებულიო. აქედან მხოლოდ ის დასკვნა შეიძლება გამოვიტანოთ. რომ ესთეტიკური სიამოვნება უსარგებლოა პრაქტიკულად, და არა ის. რომ პოეზიაც უსარგებლოა ცხოვ-

რებაში. მართალია. პოეზია იძლევა ესთეტიურ სიამოვნებას, მაგრამ გარდა ამ სიამოვნებისა, ის იძლევა სხვასაც და, აი, სწორედ ამ „სხვას“ აქვს უმთავრესი მნიშვნელობა.

რა არის ეს „სხვა“? იქნება ის იყოს გემოვნება მშვენიერებისა და ამ გემოვნების განვითარებაში მდგომარეობდეს პოეზიის მნიშვნელობა, როგორც ამას ბევრი ფიქრობს?! პოეზია, რომელიც მხოლოდ ესთეტიურ სიამოვნებას გვანიჭებს და რომელიც მხოლოდ მშვენიერების გემოვნებას ავითარებს, ფრიად დაბალი ხარისხის პოეზიაა. ვთქვათ, განუვითარა მკითხველს პოეზიამ გემოვნება მშვენიერებისა. მერე? მერე არაფერი! ექნება მას განვითარებული გემოვნება, მორჩა და გათავდა! ვთქვათ, შესძინა პოეზიამ მკითხველს მხოლოდ ესთეტიური სიამოვნება, მერე? მერე არაფერი. დარჩება ის ნასამოვნები, მორჩა და მოსვენება! მე არ უარვყოფ, რომ ერთიცა და მეორეც პოეზიას შეუძლია. მაგრამ ერთიცა და მეორეც პოეზიის მდებარე მიზნად მიმაჩნია. რა საბუთი მაქვს? მხოლოდ ერთი და, აი, ისიც. როდესაც საზოგადოებაში უმეტესი ნაწილი მოკლებულია ნორმალურ საზრდოს როგორც გონებისათვის, ისე კუჭისათვის; როდესაც საზოგადოებაში უმეტესობა მოკლებულია ნორმალურ თავისუფლებასა და ნორმალურ ადამიანურ უფლებებს, როდესაც საზოგადოებაში, ნაცვლად სიმართლისა და სამართლიანობისა, ძალმომრეობა და უსამართლობა პარპაშობს, — ადამიანის ყოველ მისწრაფებას და ხელოვნებასაც სხვა მიზანი უნდა ჰქონდეს, ვიდრე მარტოოდენ — სიამოვნება ან მშვენიერებისადმი გემოვნების განვითარება. ეს სხვა მიზანია — რაც შეიძლება, მეტი ბედნიერება უმეტესობისათვის. ვიდრე ადამიანთა უმეტესობა უბედურია, ხელოვნებაც სხვასთან ერთად უნდა ემსახურებოდეს მათს გაბედნიერებას და, თუ ოდესმე ის ამ დიად მიზანს მიაღწევს, მაშინ მისი მისიაც აღსრულებული იქნება.

ამგვარად, როდესაც კრიტიკოსი არკვევს პოეზიის საზოგადოებრივ მნიშვნელობას, მის რკვევას გზას უნდა უნათებდეს ზემოთ აღნიშნული მიზანი პოეზიისა.

ამ წერილის თავში ჩვენ გამოვთქვით ის გადაჭრილი აზრი, რომ პოეზია სულიერ სიამოვნებაზეა დამყარებული. აქ კი ჩვენ პოეზიის დანიშნულებას პრაქტიკულ მიზანში ვხედავთ, როგორ უნდა მოვათავსოთ ერთად ეს ორი შეხედულება? აზრთა წინააღმდეგობაა აქ თუ არა? სულიერი სიამოვნება წარმოადგენს იმ უმთავრეს პირობას, ურომლისადაც პოეზია ვერ განახორციელებს თავის უმაღლეს მიზანს; სულიერი სიამოვნება მხოლოდ საშუალებაა მიზნის განსახორციელებლად და არა თვით მიზანი, — მის გარეშეა; სულიერი სია-

მოენება ის მძლავრი იარაღია, რომლითაც პოეზია მწერლობის ყველა დარგს სჯობია. თუ პოეტი აღწევს მიზანს მხოლოდ ამ იარაღის წყალობით, იმ სარგებლობისათვის, რომელიც პოეტს მოაქვს, საუკეთესო საზომი სულიერი სიამოვნებაა. ხშირად ორ ხელოვნურ ნაწარმოებში ერთი და იგივე აზრია გატარებული. მაგრამ მაშინ, როდესაც ერთ მათგანს გაფაციცებით კითხულობენ და არჩევენ, მეორე შეუმჩნეველად რჩება. ამის ერთად-ერთი მიზეზი ის არის, რომ პირველი აძლევს მკითხველს ძლიერ სულიერ სიამოვნებას, მეორე კი არა.

ყოველი მწერლის ღირსება მხოლოდ იმაში მდგომარეობს, რომ სარგებლობა და სიამოვნება ერთმანეთს შეუწონოს და სულიერ სიამოვნებასთან ერთად მკითხველს სასარგებლო აზრი, გრძნობა ან განზრახვა მიაწოდოს, რადგანაც პოეზიის პრაქტიკული მნიშვნელობის ტონი დამოკიდებულია სულიერი სიამოვნების ტონზე. სულიერი სიამოვნება კი შედეგია მშვენიერებისა, თავისთავად ცხადია, რომ მშვენიერებას ანუ ხელოვნურ ღირსებებს მოკლებული პოეზია უმნიშვნელოდ და უსარგებლოდ რჩება. ამიტომ ხელოვნურ ღირსების გარკვევა და დაფასება ყოველთვის წინ უნდა უძღოდეს პოეზიის საზოგადოებრივი მნიშვნელობის გამორკვევას.

1905 წ.

## ნიკოლოზ ბარათაშვილი

როდესაც რომელსამე საზოგადო მოღვაწეზე გამოითქმება ხოლმე ბევრგვარი, ხშირად ერთიმეორის სრულიად საწინააღმდეგო აზრი, ეს უტყუარი საბუთია იმისა, რომ ამგვარი მოღვაწე თავისი ნიჭითა და მნიშვნელობით საკმაოდ სიმამლღეზე დგას. ჩვეულებრივი ნიჭის, პატარა ტალანტის დაფასება არ არის ძნელი, — სულ სხვაა არაჩვეულებრივი ნიჭი, დიადი ტალანტი; ჩვეულებრივი არშინით მისი ღირსების გაზომვა არ შეიძლება.

ერთ-ერთ დიად ნიჭს ჩვენს მწერლობაში წარმოადგენს ნ. ბარათაშვილი. XIX საუკუნეში ჩვენ არ მოგვეპოვება არც ერთი მწერალი. რომლის შესახებაც იმდენი დაწერილიყოს და იმდენი სხვადასხვა აზრი გამოთქმულიყოს, როგორც ბარათაშვილის შესახებ. მართო ეს გარემოება რომ მივიღოთ მხედველობაში, და აგრეთვე ის ფაქტი, რომ ბარათაშვილის ლექსები იმგვარად მოქმედებენ ჩვენს სულსა და გონებაზე; თითქო ავტორი ჩვენთან ერთად ცხოვრობდეს და მოქმედებდეს, — აქედანაც ცხადი იქნება, რომ ბარათაშვილი დიდებული ნიჭია.

ყოველი ადამიანი, რა დიადი ნიჭითაც უნდა იყოს ბუნებისგან დაჯილდოებული, შვილია თავისი დროის და თავისი წრისა. ხშირად მოხდება ხოლმე, რომ ნიჭიერი ადამიანი ბევრით გაუსწრებს თავის დროს აზროვნებით და მისწრაფებით, მაგრამ დრო და წრე თვალსაჩინო დაღს ასევამს ამისთანა ნიჭსაც. ბარათაშვილი ადრე დაიბადა, ძალიან ადრე: თავისი ნიჭით, მიმართულებით, ზნეობრივი ფიზიკონომიით და მოქმედების წყურვილით ის სრულებით არ შეეფერებოდა თავის დროს, თავის საზოგადოებას; ამ საზოგადოებაში ის სულით ობოლი იყო და სწორედ ამგვარ პირობებში დაიბადა და გაიშალა ბარათაშვილის პოეზია. სწორედ ამგვარმა დრომ და საზოგადოებამ დააჩნია მას ერთგვარი ბეჭედი.

ბარათაშვილს ხშირად აღარებენ ბაირონს. მსგავსება ამ ორ პოეტს შორის დიდია, მაგრამ განსხვავებაც დიდია: მაშინ. როდესაც

ბარათაშვილის პოეზია მსოფლიო გოდებაა ობოლი სულიაა, ბაირონის პოეზია, მსოფლიო გოდებას გარდა, ბასრი მახვილია. თავისი ნიჭით, ტემპერამენტით, მოქმედების წყურვილით ბარათაშვილი იმგვარსავე ტიპს წარმოადგენს, როგორსაც ბაირონი. მაგრამ ბაირონის გარშემო ცხოვრება დულდა, საზოგადოება მოქმედებდა; ბარათაშვილის გარშემო კი ცხოვრება სდუმდა, საზოგადოება ფრიად უფერული, ფრიად მძინარი იყო. ბაირონს თვით დრო და ცხოვრება უწყობდა ხელს, რომ მას თავისი პოეზია ბასრ მახვილად გადაექცია; დრო და ცხოვრება კი ბარათაშვილის მხოლოდ სულიერ ობლობას უწყობდა ხელს და, რაც უფრო უკვირდებოდა პოეტი ცხოვრებას, მით უფრო ეძლეოდა თავის საკუთარ თავს და მსოფლიო პესიმიზმს...

ჩვენი ცხოვრება სრულებით მდორე იყო დამდგარი ქაობივით და. თუ ერთ კაცს არა ჰქონდა იმდენი ძალ-ლონე. რომ მთელი ეპოქა შეექმნა ჩვენს კულტურულს ცხოვრებაში, ეს სრულებით გასაკვირი არაა. — პირიქით, ჩვეულებრივი მოვლენაა: ერთი კაცი ისტორიას ვერ შექმნის, გენიოსი მხოლოდ საუკეთესო გამომხატველია თავისი დროის იდეალების და მისწრაფებისა და. თუ თვით ცხოვრება იყო უსიციოცხო და უიდეალო. ერთი ბარათაშვილი რას გააწყობდა? ადამიანის ყოველგვარ მოღვაწეობისათვის შესაფერი ნიადაგია საჭირო. ყოველგვარი მოღვაწეობის ნაყოფი დამოკიდებულია ამ საზოგადოებრივ ნიადაგის ღირსებაზე. რადგანაც ბარათაშვილს საზოგადოებრივი ნიადაგი სრულებით უვარგისი და შეუფერებელი დახვდა, მან იგრძნო საშინელი სულიერი ობლობა და მისი ნიჭიც ვერ განვითარდა სრულიად. როგორც ბაირონის ნიჭი, მისმა ნიჭმაც ვერ გამოიღო ის ნაყოფი, რის გამოღებაც შეეძლო.

ამიტომ, სანამ გავითვალისწინებდეთ ბარათაშვილის პოეზიის უმთავრეს თვისებებს, საჭიროა მოკლედ თვალი გადავავლოთ ბარათაშვილის დროს. წრეს და საზოგადოებას, რომელშიაც ის ცხოვრობდა.

მეცხრამეტე საუკუნის დასაწყისში, სანამ რუსეთის მმართველობა ფეხს მოიმარებდა ჩვენში, ჩვენი ცხოვრება დამყარებული იყო ნატურალურ მეურნეობაზე; ყმის შრომა საფუძვლად ედვა მთელს ჩვენს კულტურულ მსვლელობას. ევროპის კულტურას. გარეგან მხარეს ევროპულ ცხოვრებისას და არც შინაგანს ჩვენში ადგილი არ ჰქონდა და ამიტომ ჩვენი არისტოკრატია მთელ თავის სულიერსა და გონებრივ კმაყოფილებას სოფელშივე ჰპოებდა. ყმების შრომით სასმელ-საკმელი მას უხვად შემოსდიოდა, ფული კი მისთვის სრულებით არ იყო საჭირო. თუ ფულის უმთავრესი თვისება ის არის. რომ მან გაძლოა არ იცის, არ ფუჭდება და. რაც ჩეტი გექნება, ისა

გობია, — სასმელ-საჭმელის საჭიროება განსაზღვრულია, მისი დიდ-საანს შენახვა შეუძლებელია და ამგვარ შენახვას არცა ჰქონდა აზრი აღნიშნულ დროს. ამიტომ ჩვენი არისტოკრატია პურ-მარილით იყო ვანთქმული, მას სტუმარი უყვარდა, ქეიფი, დროსტარება და ამგვარი ცხოვრებისათვის მას სალსარიცა ჰქონდა და კმაყოფილიც იყო თავი-სი ხვედრით.

მაგრამ, აი, შემოდგა ჩვენს ცხოვრებაში ფეხი ევროპის კულტურამ რუსეთიდან. არისტოკრატის საუკეთესო პირები ჯერ კიდევ მეთვრამეტე საუკუნეში შეუდგნენ ჩვენში ევროპის გონებრივ კულტურის გადმონერგვას. მათი გატაცება ამ მხრით ისეთი ძლიერი იყო, რომ ბატონიშვილმა იოანემ მთელი პროექტი შეადგინა, თუ როგორ უნდა მოწყობილიყო საქართველოს მართვა-გამგეობა ევროპულს გეგმაზე. ყაბახი და ჯამბაზობა. — აი, რით ტკბებოდა ქართველი საზოგადოება თითქმის XVIII საუკუნის გასვლამდე. არისტოკრატის საუკეთესო წევრებმა მოიხდომეს ამ აზიური გასართობების მაგიერ ევროპიულ თეატრის გადმონერგვა და ერეკლე II დროს კიდევ დაიწყო ტფილისში წარმოდგენები. ერთი სიტყვით, ჩვენი არისტოკრატია ცდილობდა დამოუკიდებლობის დაკარგვამდე ევროპის კულტურის გადმონერგვას ჩვენში, ქართველების გაევროპიელებას გონებრივად და ცხოვრებით.

რუსეთის მმართველობა იმ დროს, როცა ის ჩვენში შემოვიდა, თვითონ იყო მოკლებული ევროპის კულტურას და ამიტომ ჩვენ რას მოგვიტანდა, რაც თვითონ არა გააჩნდა რა?! პეტრე დიდმა რომ რუსებს წვერ-ულვაში გაპარსა და ევროპის პარიკებში და ტანისამოსში გამოაწყო, რუსეთის არისტოკრატის ეს პირველად. მართალია, ვერაფრად ეჭაშნიკა, მაგრამ შემდეგში ისე გაიტაცა ამ გარემოებამ, რომ მთელი თავისი ყურადღება ევროპის კულტურული ცხოვრების გარეგან მხარეს მიაქცია. ამიტომ რუსებმაც ჩვენში ის შემოიტანეს, რაც მათ გააჩნდათ, — ევროპის ცხოვრების გარეგნობა. ახალი გასართობები, ახალი დროსტარება ჩვენს არისტოკრატას ძალიან მოეწონა, ევროპული დროსტარებისათვის კი პური და ღვინო აღარ იყო საკმარისი, — ფული გახდა საჭირო. თავადაზნაურობა მოაწვა ქალაქადგილებს. გაიგო ფულის გემო და, აი, სწორედ აქედან იწყება არისტოკრატის დავალიანება და სწრაფი გადატაკება, რადგანაც იმ დროს, გარეგნობით გატაცების ხანაში, სამხედრო მუნდირი უფრო სატრფიალო იყო ყველასთვის და საპატიო, ამიტომ ჩვენი არისტოკრატია სამხედრო სამსახურს მიაწვა. თუ ჩვენს დროშიც თავმოძვონე თავადიშვილი არ უყადრისობს სხვადასხვა გზით პრაპორშჩიკის ეპოლე-

ტების მოპოვებას. მაშინდელს დროში ეს ეპოლეტები იდეალი იყო ჩვენი არისტოკრატიისათვის.

სოფელში ცხოვრება უფერული იყო და მდორე. ქალაქშიც იგივე უშინაარსობა და უსიცოცხლობა სუფევდა. გლებობა შრომის მძიმე უღელში იყო შებმული, თავადაზნაურობის ერთი ნაწილი სოფელში სავსე მარნების დაცლას ალევდა თავის სიცოცხლეს, მეორე ნაწილი ქალაქში კოტრდებოდა და მესამე ნაწილი მხოლოდ სამსახურად სამსახურზე ოცნებობდა.

ამგვარს ცხოვრებაში და წრეში აღიზარდა ბარათაშვილი ისიც გაიტაცა ცხოვრების გარეგანმა მხარემ, მანაც სამხედრო სამსახური დაისახა მიზნად. ერთ წერილში იგი წერს თავის ბიძას. გრ. ორბელიანს: „სულ არ მომსვლია თქვამს სამოქალაქო სამსახური. ჩემი სურვილი იყო ჭარისკაცობა. იგი მზრდიდა მე აქამომდე და ახლაც ხანდახან კიდევ შთამომეპარება ხოლმე გულში. მაშ რაღამ დამიშალა. თუ ჩემი სურვილი იყო?“. საყურადღებოა ამ მხრით მეორე წერილი. აქ პოეტი სიტყვას გადუქრავს თავის ბიძას: მომავალად შენს მოადგილედ, გზა მომეცი სოფელშიო, და შემდეგ დასძენს: „მე შინაგანი ხმა მიწვევს საუკეთესო ხვედრისაკენ, გული მეუბნება. რომ შენ არა ხარ ახლანდელს მდგომარეობისათვის დაბადებულიო! ნუ გძინავსო! მე არა მძინავს. მაგრამ კაცი მინდა, რომ ამ პატარა ღრეკლდეს გამიყვანოს, და დავდგე გაშლილს ადგილს. ოჰ, რა თავისუფლად ამოვისუნთქავ მაშინ. რა ხელმწიფურად გარდავხედავ ჩემს ასპარეზსა! ჩემი თქირი მანდეთ მოჰქრის. ეცადე, რომ რეენკამფთან დამანიშენინო“.

აი, რა იყო პოეტის „მხურვალე განსჯა“, როგორც თვითონვე ამბობს ამავე წერილში. შინაგანი ხმა იწვევდა პოეტს საუკეთესო ხვედრისაკენ, მაგრამ პოეტს მაშინდელ დროისა და საზოგადოების ზეგავლენის წყალობით, ეს საუკეთესო ხვედრი სამხედრო სამსახურად ჰქონდა წარმოდგენილი. ეს ნატვრა რომ ასრულებოდა პოეტს. ის მალე დარწმუნდებოდა თავის შეცდომაში, მალე დაინახავდა. რომ შინაგანი ხმა აქეთ არ იწვევდა მას, კმაყოფილებას მას ვერც სამხედრო სამსახური მისცემდა; მაგრამ საგულისხმო აქ ის გარემოება არის, რომ პოეტს თავისმა წრემ და დრომ დალი დაასვა. პოეტს რომ ეს წყურვილი ასრულებოდა. ეჭვს გარეშეა, ის მაინც ვერ მოიპოვებდა სრულ სულიერ სიმშვიდეს, ხოლო ისიც ეჭვს გარეშეა, რომ პოეტი უფრო კმაყოფილი იქნებოდა თავისი ხვედრით ვიდრე ნამდვილად იყო, უფრო ნაკლებად იგრძნობდა სულიერ ობლობას, ამ ობლობის სიმწვავეს და მაშინ მის პოეზიასაც კოტათი მაინც მოაკლდებოდა ის მომხიბლავი და წარმტაცი გრძნობა. რომელიც ერთ უმ-



თავრეს ღირსებას შეადგენს მისი ნაწერებისაჲ. ცალკე აღებულ ან ფაქტს, რასაკვირველია, დიდი მნიშვნელობა არა აქვს. მაგრამ სხვა ფაქტებთან ერთად ამ გარემოებამაც იმოქმედა პოეტის სულიერ განწყობილებაზე.

მაშ, რაღამ დაუშალა პოეტს სამხედრო სამსახურში შესვლა? ოჯახის გაჭირვებულმა მდგომარეობამ. პოეტის მამა მდიდარი თავადაზნაურობით იყო, მაგრამ გაღატაკდა და მთელი ოჯახი პოეტს დააწვა სარჩენად კისერზე. კურსის გათავებისთანავე, ის იძულებული გახდა, რაც შეიძლება, მალე ეშოვნა ისეთი ალაგი, რომ ოჯახს მატერიალურად დახმარებოდა. ახალგაზრდა, გატაცებულ ყმაწვილს. რომელსაც ოცნება ითასგვარ გზას უხატავს წინ ცხოვრებაში. სულ ია და ვარდით მოფენულს, გაღარიბებული მამა ცივ წყალს ასხამს გულზე: ოჯახს უპატრონეთ. უმეტესი ნაწილი ახალგაზრდობისა ამგვარის ზვედრით სრულებით კმაყოფილდება. ბევრი, ძალიან ბევრი ახალგაზრდა იმ აზრით ოცნებობს, როდის დავეხმარები ჩემს ოჯახსო, და როცა ეს აზრი განუხორციელდება, სრულს კმაყოფილებას გრძნობს. პეტს აღარას ეძებს. ვინ ამბობს, ოჯახის დახმარება ფრიად კარგი საქმეა, მაგრამ ბარათაშვილი არ იყო იმგვარი მიმართულებისა და ბუნების კაცი, რომ მას თავისი ცხოვრების მიზანი ოჯახის საზღვრებით შემოეფარგლა. „გულის თქმა ჩემი შენს იქითა ეძიებს სადგურს“-ო, ეუბნება ის ცას. და აი დაადგა იგი თუ არა ცხოვრების გზას, ხელფენი შეუკრეს, კანცელარიის მაგიდას მოუსვეს და უთხრეს: იშრომე და არჩინე ოჯახიო. მაგრამ გონებას ხომ ვერავინ შეუკრავდა მას! გონება სივრცეს ეძებდა, ვიწრო ფარგალში არ ეტეოდა, ცის იქით ეძიებდა სადგურს, მის ცხოვრებას კი თავიდანვე დაუძლეველი დაბრკოლება გადაეღობა წინ.

განა შეიძლებოდა, ამგვარს პირობებში ნიკოლოზ ბარათაშვილს, ბარათაშვილს და არა სხვას ვისმე, გული არ გასტეხოლა, სევდა არ დაპატრონებოდა? არ შეიძლებოდა და, აკი, გაუტყდა და დაუსევდიანდა კიდევ პოეტს გული. პოეტი დროებით შეუკრავდა თავის ზვედრს იმ იმედით, რომ მალე დავამარცხებ მას და ჩემს სურვილს, ჩემს მისწრაფებას ავისრულებო. მას იმედი ჰქონდა ნათესავებისა, ეხვეწებოდა თავის ბიძას — გრ. ორბელიანს — დამეხმარეო, უსაყვედურებდა, ქართველი თავისიანს არ გამოადგებაო, მაგრამ ბიძამისი დარწმუნებული იყო, რომ საქართველოში მისთანა მეორე აღარავინ იყო, თავისი თავით სტკებოდა და არა თუ პოეტს არავითარ ყურადღებას არ აქცევდა, მისი მდგომარეობისათვის არა ზრუნავდა, არამედ მის ნიჭსაც ვერ აფასებდა, ის თავისი ნიჭით

იყო გატაცებული და სრულებით ვერ ამჩნევდა თავის ღისწულში ღიად ტალანტს.

იქნება საზოგადოებაში ჰპოვა პოეტმა დახმარება და თანაგრძნობა? თვითონ პოეტს დავუგდოთ ყური: „ვინც მაღალის გრძობის მექონი მეგონა, იგი ენახე უგულო; ვისიც სული განვითარებული მეგონა, მას სული არა ჰქონია, ვისიც გონება მრწამდა ზეგარდმო ნიჭად, მას არათუ განსჯა ჰქონია; ვისიცა ცრემლნი მეგონებოდნენ ცრემლად სიბრალულისა, გამომეტყველად მშვენიერის სულისა. თურმე ყოფილან ნიშანნი ცბიერებისა, წვეთნი საშინელის საწამლავისა. სად განისვენოს სულმა, სად მიიღრიკოს თავი“? პოეტი თანდათან დარწმუნდა, რომ „ქართველობაში არ არის მეგობრული და ნათესაობრივი გრძნობა“. შეუძლებელი იყო, ამგვარ რწმენას არ გაეტეხა გული პოეტისათვის, რომლის მთელი არსებაც ყველასადმი სიყვარულით, ყველასადმი თანაგრძნობით და ნათესაობით იყო გამსჭვალული. ადამიანი — და, მით უმეტეს, ენერგიითა და საზოგადოებრივის ინსტიქტით ძლიერი ადამიანი, — დასთმობს ოჯახსაც, მეგობარსაც, ნათესავსაც, თუ თვით საზოგადოებრივი ცხოვრება აკმაყოფილებს მას, გზას აძლევს მასში დაგროვილ ენერჯიას და მოქმედების, მოღვაწეობის წყურვილს. მერე ამგვარ საზოგადოებაში ცხოვრობდა ბარათაშვილი?

არა და არა. საზოგადოება სრულებით მოკლებული იყო გონებრივ ინტერესებს, მხოლოდ აქა-იქ თითო-ოროლა პირნი იყურებოდნენ ევროპისაკენ და ეცნობოდნენ ევროპის ლიტერატურას. გარშემო სრული უმეცრება, უიდეალობა სუფევდა. ქეიფი, ჭორები და სამბედრო სამსახური, — აი, რას ეტანებოდნენ საუკეთესო წევრნი არისტოკრატიისა. თავის წერილებში ბარათაშვილი ყველგან საზოგადოებას ემღერის. ტფილისა და მის საზოგადოებას სთვლის „უსარგებლოდ გულისა და გონებისათვის“. ხშირად შეხვდებით დიდი ნიჭი მქონე ადამიანს, რომელიც შავ მუშაობას, წვრილმან საქმეებს მოპკიდებს ხოლმე ბელს, როდესაც საზოგადოება არ იძლევა მისი ნიჭის. მისი მისწრაფების შესაფერ ნიადაგს. სამაგიეროდ არიან ისეთებიც, რომლებსაც მხოლოდ ფართოდ შეუძლიათ ფრთების გაშლა, მხოლოდ მძლავრად შეუძლიანთ გულის აძგერება, მხოლოდ აღუღებელი ცხოვრების ტალღებზე შეუძლიანთ მოქმედება. თუ ცხოვრება ამგვარ პირებს ფრთებს არ აშლევინებს, ხელებს უბორკავს, ისინი უმოქმედოდ, თავისსავე გულს ასკდებიან, რადგანაც წვრილმანი საქმეებისათვის, შავი მუშაობისათვის სრულიად გამოუსადეგარნი არიან.

ამგვარი იყო ბარათაშვილიც. მისი ნიჭისა და წყურვილის შესაფერ ასპარეზს ცხოვრება არ იძლეოდა, წერილმანი საქმეებზე სთავის კი ის არ იყო დაბადებული, მის ლიტერატურულ ნიჭსაც არავითარი საზოგადოებრივი აუდიტორია არ გააჩნდა, რაც ასე საჭიროა ყოველი ლიტერატორისათვის. გაზეთი არ არსებობდა, მისი ნაწარმოების მკითხველი და დამფასებელი საზოგადოების ფრიად ვიწრო წრე იყო. ამგვარი საზოგადოება განა დააკმაყოფილებდა პოეტს? არა და არა! პოეტის გულსა და გონებას ერთი მთვარეანი ღამე გაცილებით მეტს საზრდოსა და ნუგეშს აძლევდა, ვიდრე მთელი მაშინდელი საზოგადოება, — საზოგადოებაში ის სრულიად თბილი იყო. „სიცოცხლე მომძულებია ამდენის მარტობით: შენ წარმოიღვინე, მაიკო, სიმწარე იმ კაცის მდგომარეობისა, რომელსაც მამაცა ჰყავს, დედაც, დებიც, მრავალნი მონათესავენი, და მაინც კიდევ ვერვის მიჰკარებია, მაინც კიდევ თბოლია ამ სავსე და ვრცელ სოფელში“ — აი, რას სწერს ის ერთ-ერთ წერილში. დიახ, სოფელი სავსე იყო და ვრცელი, საზოგადოება რიცხვით ღიდი, მაგრამ არაფერში არ შეეფერებოდა პოეტის ბუნებას. პოეტი ხედავდა ამას და გრძნობდა, რომ ხსნა არსით იყო.

პატარაობისას პოეტი იყო ცელქი, ოხუნჯი, მოუსვენარი; დიდობისას საზოგადოებაში ის იყო მეტად მხიარული, ენამახვილი, მოსწრებული და ოხუნჯი. მისი მხიარულება არ იყო ნაძალადევი. მაშ. რა მიზეზი იყო, რომ საზოგადოებაში მხიარული და ოხუნჯი ბარათაშვილი, დარჩებოდა თუ არა მარტო, სევდას მიეცემოდა, თავის გულს ასკდებოდა და ნატრობდა: ნეტავი მომცა პატარა და დამოუკიდებელი ქონება. მყისვე დავტოვებდი საზოგადოებას და ბუნების კალთებზე გავატარებდი წყნარად ჩემს ცხოვრებასო? მიზეზი ცხადია: სხვები ოხუნჯობდნენ და მხიარულობდნენ და ამით სრული კმაყოფილი იყვნენ. — მეტს ისინი ცხოვრებას არაფერსა სთხოვდნენ, სხვა რასმე ისინი საზოგადოებაში არაფერს ეძებდნენ; ბარათაშვილს კი სწყუროდა საქმე, მოქმედება, მას ვრცელი ასპარეზი უნდოდა თავის ნიჭისა და ენერჯიის გასაშლელად. ეს ასპარეზი კი არსად იყო და ამიტომ ნაღვლობდა. ამიტომ ევსებოდა სევდით გული: ბუნებით მხიარული პოეტი, ცხოვრებამ გახადა მგლოვიარედ. როგორც ზნეობის მხრით, ისე გონების მხრით პოეტს უფლება ჰქონდა თავისი დიდების სიმადლიდან ამაყად გადმოეხედა პატარა კაცუნებისათვის, რომლებიც მაშინდელ საზოგადოებაში დაფუსფუსებდნენ; მათთან შედარებით პოეტი ბედნიერი იყო. მაგრამ ეს პატარა კაცუნები ერთი გარემოებით პოეტზე ბევრით ბედნიერნი იყ-

ვენე: თავისი ზნეობრივი და გონებრივი სილატაკით ისინი სრულიად შეეფერებოდნენ მაშინდელს დროს და ამიტომ კმაყოფილნი იყვნენ ბედისა და ცხოვრებისა; პოეტი კი ძალიან აღრე, ერთობ უდროოდ დროს დაიბადა და ამით იყო უბედური. იმ შავბნელ ეპოქაში ეს დიადი ადამიანი თითქოს განგებ მოავლინა ბუნებამ, რომ ქვეყნისათვის ეუწყებინა: ქართველთა სული და გული არ ჩამკვდარა, არ განრწინილა. ქართველთა გონებაში ანთებული ლამპარი არ ჩამქრალა, სული ისევ გამოიღვიძებს, გული ისევ აძგერდება, გონება ისევ გამოაშუქებს და ქართველი ერი ისევ აღსდგებაო.

უმთავრესი კანვა, რომელზედაც მოქარგა ოქროს ასოებით ბარათაშვილმა თავისი პოეზია, არის ღრმა და უსაზღვრო მათელიო პეიზაჟი. ამგვარი ნიადაგი ბარათაშვილის პოეზიას თვით ცხოვრებამ მოუმზადა, როდესაც პოეტმა საზოგადოებაში ვერაფერი ვერა კპოვა, ის შეუდგა ფილოსოფიურ კითხვების გარკვევას: ის უკვირდებოდა მსოფლიოს მიზანსა და დანიშნულებას, ცხოვრების მიზანს, ადამიანის ბუნებას და ერთხელვე დასვედიანებული პოეტი ყოველგან და ყველაფერში ამოებებს ხედავდა. ქვეყნური ამოებით გულდახურული პოეტი ცის იქით ეძიებს სადგურს, მაგრამ უსაზღვრო წყურვილებს ადამიანისას, განსაზღვრული გონება ვერ აძლევს ვერავითარ პასუხს და პოეტი სასომიხილი ჩაილაპარაკებს: ყოველივე ან ამოება, ან საიდუმლოებით არის მოცული და ჩვენთვის მიუწვდომელი. ყველა ის ფილოსოფიური კითხვები, რომლებსაც პოეტი ეხება თავის პოეზიაში, შეადგენენ ყველა ღრობას და ყოველ კულტურულ ხალხის კითხვებს; ყველა ამ კითხვების გადაწყვეტა, სამყაროსა და ბუნების საიდუმლოების ახსნა და შეგნება, ადამიანის დანიშნულების გამორკვევა, სიცოცხლის ობიექტურ მიზნის პოვნა— შეადგენდა და შეადგენს ყოველ კულტურულ ხალხის წყურვილს.

ამიტომ ბარათაშვილი მსოფლიო პოეტია. ეს კითხვები ყოველთვის საინტერესონი იყვნენ და იქნებიან და ამიტომ ბარათაშვილიც უკვდავია და უკვდავი იქნება. თუკი ყოველივე ამოებაა, რა აზრი აქვს მაშინ ჩვენს მისწრაფებას, მოქმედებას? ეს გორდიის კვანძია, რომელსაც ბარათაშვილი ერთის დაკვრით გადაჭრის: „არც კაცი ვარგა, რომ ცოცხალი მკვდარსა ემსგავსოს, იყოს სოფელში და სოფლისთვის არა იზრუნოს“, — სწერს ის, ე. ი. დეე, იყოს ცხოვრება ჭუჭი და ამოება, — ჩვენ კაცნი გვქვიან და, სანამ ცოცხალი ვართ, ადამიანურად უნდა ვიცხოვროთო. და მართლაც, რა აზრისა უნდა ვიყოთ ცხოვრების შესახებ, რა ამოებადაც უნდა მიგვაჩნდეს ის, მაინც

შეუძლებელია, არ დავეთანხმოთ პოეტს იმ აზრში, რომ ადამიანმა ადამიანურად უნდა იცხოვროს. რას ნიშნავს ადამიანურად ცხოვრება პოეტის თვალში? ადამიანურად ცხოვრობს მხოლოდ ის, ვინც სოფელს. ე. ი. საზოგადოებას, ანუ ხალხს ემსახურება. სოფელს უნდა არგო რამეო, აი, რას ითხოვს ბარათაშვილი ადამიანისაგან.

თუ ამას ითხოვდა პოეტი სხვისაგან, მით უმეტეს მოსთხოვდა საზოგადოებისათვის შრომასა და მოქმედებას საკუთარ თავა. და პოეტის პესიმიზმის უმთავრესი მიზეზიც სწორედ აქ არის: ცხოვრება ფრიად მდორე იყო, პოეტის ბუნება კი მეტად ფართო, პოეტის წყურვილი მეტად ძლიერი. პოეტს იღუმალი ხმა დასდევს ყოველგან და მოსვენებას არ აძლევს: „ეძიე ყმაო, შენ ხვედრი შენი, ვინძლო იპოვნო შენი საშვენი“. პოეტი დაეძებდა თავის ხვედრს, სასოწარკვეთილი ბევრჯერ წამოიძახებდა ხოლმე: როს მხვდეს ამქვეყნად ჩემი წილობაო! პოეტი გატაცებულია საზოგადო აზრებით. მას სწყურია რთული ცხოვრება, განვითარებული საზოგადოება, გონებრივი და ზნეობრივი კითხვებით დაინტერესებული წრე, — ერთი სიტყვით, მას სწყურია ფართო საზოგადოებრივი ასპარეზი მოქმედებისათვის. „მინდა მზე ვიყო, რომ სხივნი ჩემადღეთ გარსა მოვაელო, საღამოს მისთვის შთავიდე, რომ ღილა უფრო ვაცხოვლო; მინდა, რომ ვიყო ვარსკვლავი, განთიადისა მორბედიო“. — გვიცხადებს ის. აი, სად მიაქანებს პოეტს ოცნება, აი, როგორია მისი ძლიერი წყურვილი საზოგადოებრივი მოღვაწეობისა. ნაცვლად ამისა, პოეტს გარშემო აკრავს ფუჭი და სამარისკარს მიმდგარი საზოგადოება, საზოგადოება მოკლებული ყოველგვარ იდეასა და პროგრესიულ მოქმედების წყურვილს; წინ უდგას კანცელარიის შავიდა, ზედ აწყვია „дело“, „дело“, „дело“... ერთი მიბრძანეთ, სად უნდა ჰპოვოს აქ ბარათაშვილმა თავისი ხვედრი, ან როგორ და რა გზით უნდა ჰპოვოს ის, რის პოვნაც შეუძლებელია? ამიტომაც ამბობს გულდამწვარი პოეტი: „მაგრამ მე მხვედრსა ჩემსა ვერ ვპოვებ და მით კაეშანს ვერლა ვიშორებო“.

მტკიცე ნაბიჯით, სავსე გულითა და დიადი აზრებით შედგა ფეხი პოეტმა ცხოვრებაში. მისი „წრფელი ზრახვანი“ წარმოადგენენ იმ ტაძარს, სადაც ენთო ჩაუქრობელი წმინდა ლამპარი. ცხოვრებამ პოეტის ზრახვანი არ გაამართლა, განქრა ტაძარი; აღფრთოვანებული იმედებისა და გატაცების ნაცვლად პოეტის გულში დაისადგურა სევდამ და წყვიდიადმა და უტაძროდ დარჩენილი პოეტი დადის ობლად, ისევ მწირი, მიუსაფარი. სევდიანი პოეტი ბუნებას მიმართავს. ბუნება მას გაგიჟებით უყვარს, ბუნება მას ანუგეშებს, ბუნებაში

პოეტი ჰპოებს თვისთ ფიქრთ შვებას, ბუნება ამორებს მის გულს ვა-  
ებას. პესიმიზმი, გამოწვეული საზოგადოებრივ-ფალოსოფიურ მო-  
ტივებით, დიდი თავყანისმცემელია ბუნებისა. თავყანსა სცემს ბუნე-  
ბას ბარათაშვილიც.

მეორე უმთავრესი მოტივი ბარათაშვილის პოეზიისა არის ზნე-  
ობრივი სიმტკიცე-სიფაქიზე. ყველგან და ყველაფერში ბარათა-  
შვილი ზნეობრივ მხარეს, ზნეობრივ საკითხს აყენებს წინ. აიღეთ  
სიყვარული. აღმოსავლეთის პოეზია უგალობს ხორციელ სიყვა-  
რულს, ზნეობრივი გრძნობის ალაგას ის აყენებს ხორციელ გრძნო-  
ბას და ამიტომ უმთავრეს ყურადღებას აქცევს ამ გრძნობის გაღვი-  
ქება-გაძლიერებას: აქ ალაგი აქვს და ფრიად საპატიო ალაგიც.  
თვალების, წარბების, ლოყების, ტუჩების აღწერას. ხვეწნას, კოცნას,  
ეშხით აყრუოლებას და სხვ. სულ სხვაა ბარათაშვილი. მის თვალში  
თვით უკვდავება მშვენიერსა სულში მდგომარებს და მხოლოდ კავ-  
შირი ესრეთთ სულთა, ჰშობს სიყვარულსა; მხოლოდ მათ შორის  
არის გრძნობა, ესრეთ სანუკველი, რომ მის უტკბილეს არცათუ არ-  
სასუფეველი.... თუ ხანდახან ბარათაშვილსაც გაიტაცებს თვალები  
და წარბები, — მხოლოდ იმდენად, რამდენადაც გარეგანი სილამაზე  
სულიერი მშვენიერების გამომხატველია.

ამ კითხვაში ჩვენი პოეზია ბარათაშვილის დროს და მას შემ-  
დეგაც — ერთი სიტყვით, მთელი ჩვენი ეგრეთ წოდებული არის-  
ტოკრატიული პოეზია — სრული მონაა ან მიმბაძველი აღმოსავ-  
ლეთის პოეზიისა, რომელსაც სქესობრივი მისწრაფება და სიყვა-  
რული ერთი და იგივე ჰგონია. მით უფრო მეტის დიდების ღირსია  
ბარათაშვილი, რომელმაც ჩვენი პოეზია ერთბაშად დააყენა ზნეობ-  
რივ სიმალღეზე.

მესამე უმთავრესი თვისება ბარათაშვილის პოეზიისა არის ნაცი-  
ონალური იდეა. უმთავრეს პირობად ერის კეთილდღეობისათვის  
ბარათაშვილს მიაჩნია ეროვნული დამოუკიდებლობა. თავისუფლება  
თავისთავად არავითარ ბედნიერებას არ მოასწავებს ბარათაშვილის  
თვალში, — თავისუფლება მხოლოდ მაშინ არის კარგი, როდესაც  
მის შინაარსს შეადგენს ერის კულტურული ცხოვრება. ამიტომ,  
თუ ბარათაშვილი იგლოვს საქართველოს დამოუკიდებლობის მოს-  
პობას, სამაგიეროდ, ის მეფე ერეკლეს ემადლიერება: „აჰა, აღს-  
სრულდა ხელმწიფური აწ აზრი შენი და ვსკამთ ნაყოფსა მისგან  
ტკბილსა აწ შენნი ძენი. ჟამთვითარებით გარდახვეწილი შენთ შვილო  
მიდამო მოაქვთ მამულში განათლება და ხმა საამო; სადაც აქამდინ  
ხმლით და ძალით ჰვლობდა ქართველი, მუნ სამშვიდობო მოქალა-

ქის მართავს აწ ხელიო“. და ბოლოს დასძენს: „აწ მიხვდა ქართლი შენსა ქველსა ანდერძ-ნამაგსა და თაყვანსა სცემს შენს საფლავსაო“.

აქედან თავისთავად ცხადია, რომ მოქალაქეობრივი ცხოვრების და განათლების განვითარებას ბარათაშვილი გაცილებით მეტ მნიშვნელობას აძლევს ერის კეთილდღეობისთვის, ვიდრე მარტოდენ თავისუფლებას და მაშინ, როდესაც ორივე ერთად — ე. ი. თავისუფლება და კულტურული განვითარება — შეუძლებელია, ბარათაშვილი ამჯობინებს პირველის დათმობას, ვიდრე მეორისას. ასე რომ არ იყოს ერეკლეს საფლავის წინაშე ის არ იტყოდა, შენი აზრის და ქველი ანდერძ-ნამაგის ნაყოფს ვიმკითო. ბარათაშვილის პატრიოტიზმი ითხოვს, რომ ყოველი ერი თავისუფალი იყოს, ხოლო თავისუფლება მას უნდა, როგორც პირობა კულტურული განვითარებისათვის; პოეტი უარყოფს იმგვარ თავისუფლებას, რომელიც ხელს არ უწყობს ერის მოქალაქეობრივ განვითარებას, ე. ი. გონებრივსა და ქონებრივს წარმატებას.

ამ კითხვაშიაც პოეტმა წინ გაუსწრო ჩვენს არისტოკრატიულ მწერლებს. მაშინ, როდესაც ჩვენი არისტოკრატიული პოეზია კლასობრივი გოდებით არის სავსე საქართველოს უამოუკიდებლობის გამო, პოეტიც გულმხიარული არ ეგებება საქართველოს თავისუფლების დაკარგვას, მაგრამ იმავე დროს სულ სხვა თვალთ უყურებს და სხვა საზომით ზომავს ამ კითხვას.

ღიადი აზრი, ღიადი გრძნობა — აი, ბარათაშვილის პოეზია. როგორც უკვე ვთქვით, მისი პოეზიის აზრი და გრძნობანი ძვირფასია ყოველი ადამიანისათვის, ამაშია ძალა ბარათაშვილის ნიჭისა, ამით არის ის უკვდავი, ამით არის ის მსოფლიო პოეტი. მისი ტკბილხმოვანი, მოკლედ მოჭრილი, ზოგჯერ ნაზი და მოალერსე, ზოგჯერ კი მკვიდრი და ენერგიული ლექსი, გარეგანი ფორმით ზედმეწყობილი არის პოეზიის დედააზრთან და ეს გარემოება უფრო აძლიერებს და აღრმაგებს ბარათაშვილის პოეზიის შთაბეჭდილებას.

როდის გამოვიდა ბარათაშვილი სამწერლო ასპარეზზე? მაშინ. როცა ჩვენს პოეტებს ოლიმპად ქართული სუფრა წარმოედგინათ და პოეზიის საგნად ქალის სალამაზე და ღვინო. ამ უაზრობისა და უიდეალობის დროს ბარათაშვილი ცალკე გადგა, მან სრულებით განკერძოებული ალაგი დაიკავა, აღმოსავლეთის და თანამედროვე ქართული პოეზიის გავლენას სრულებით ასცდა და ჩვენი პოეზია განაახლა როგორც ცხოვრებაში, ისე პოეზიაშიც, ბარათაშვილი ობოლი იყო. მან შექმნა ჩვენს მწერლობაში სრულიად ახალი მიმართულება. უარპყო პოეზიის ძველი მოტივები და პოეზიას დაუკავშირა

ცხოვრება: პოეზიის საგნად აირჩია საზოგადოებრივი და საკაცობრიო მსოფლიო კითხვები. ბარათაშვილით თავდება ჩვენს პოეზიაში აზიური ხანა და იწყება ევროპული. აქაც ბარათაშვილი დიდხანს დარჩა ობლად. აზიური გავლენა იმდენად ძლიერი იყო, რომ არასტოკრატულმა პოეზიამ ჩვენს დრომდე შეირჩინა თავისი ელფერი. ეს გარემოება, ერთი მხრით, ცხადად ამტკიცებს პოეტის დიდ ნიჭსა და, მეორე მხრით, კიდევ უფრო აძლიერებს ბარათაშვილის მნიშვნელობას ჩვენს პოეზიაში: ის მარტო თავის აზრებითა და გრძობებით კი არ არის დიდი, ის დიდია აგრეთვე. როგორც განმახლებელი ქართულ პოეზიისა.

საერთოდ, ბარათაშვილი დიდ საუნჯეს შეადგენს ჩვენი პოეზიისათვის, მაგრამ თანამედროვე საზოგადოებამ ვერ იცნო იგი... არავინ იცის, რა გამოვა რისგანო, გაუბედავად სწერდა პოეტი თავის ბიძას, გრიგოლ ორბელიანს, როცა თავის ლექსებს უგზავნიდა, მაგრამ საზოგადოება ბრბო იყო. უბედური იყო პოეტი, ამგვარ საზოგადოებაში რომ დაიბადა და ბედნიერი მით იყო, რომ მალე მოკვდა. ნართლა რომ არსებობდეს ყოველი ერის მფარველი ანგელოზი, ქართველ ხალხს უფლება ჰქონდა, მიემართა მისთვის საყვედურით: უმადური ხარო! ბარათაშვილს ჩვენს დროში უნდა ეცხოვრა, ჩვენა დროა და ჩვენი დღევანდელი ცხოვრება მისი შესაფერი და ის კიდევ ჩვენი დროის შესაფერი.

1905 წ.



## ილია ჭავჭავაძის პოეზიის ერთი მხარე

რა არის პოეზია? ფიქრის. გრძნობისა და აზრის მწყობრად შედუღება და მშვენიერების სახით მათი გამოხატვა. ამ საზომით თუ მივუდგებით ილ. ჭავჭავაძის პოეზიას, დავრწმუნდებით, რომ ილ. ჭავჭავაძე უდიდესი პოეტია საკაცობრიო აზრებით. საკაცობრიო გრძნობისა და იდეალებით გამსჭვალული.

მისი პოეზია დაუშრეტელი წყაროა ღრმა აზრისა, ღრმა გრძნობისა და დიადი მისწრაფებისა... ი. ჭავჭავაძე დიდებული პოეტი იყო და დიდებულ პოეტადვე დარჩება მარად, როგორც პოეტი. ილ. ჭავჭავაძე უკვდავია.

„სიცოცხლე ჩვენი არც დედისაა, არც მამისა, — ქვეყნისა არის, ჯერ ქვეყანა“-ო, სწერს ილია ერთ ალაგას და ეს აზრი მას იმთავითვე ძვალ-რბილში ჰქონდა გამჭდარი. თავისი ლიტერატურული მოღვაწეობის პირველ ხანებში ილ. ჭავჭავაძე მცირეოდენად ბაძავს ძველ მწერლებს. სევდა, უკმაყოფილება და ღრმა სიყვარული მამულისა, — აი, რასა ვხედავთ პოეტის პირველ ლექსებში. პოეტი თუმცა ამყოფს ჩვენი წარსულით, მაგრამ იდეალს ეძიებს მომავალში და არა წარსულში; პოეტი უკან კი არ იხედება, ის წინ მიისწრაფვის.

მას ნულარ ვსტირით, რაც დამარხულა,  
რაც უწყალოს ღრთ ხელით დანთქმულა,  
მოვიკლათ წარსულ დროებზე დარდი...  
ჩვენ უნდა ვსდიოთ ეხლა სხვა ვარსკვლავს.  
ჩვენ უნდა ჩვენი ვშვათ მყოობადი,  
ჩვენ უნდა მივსცეთ მომავალი ხალხს...

ახალგაზრდა პოეტის ძლიერი სურვილია — წინ წარუძღვეს თავის ერს, მასთან იყოს ჰმუნვასა და სინარულში, მისი წყლული საკუთარ წყლულად მიიჩნიოს, მისი ტანჯვით სული დაეტანჯოს და შესილოს მოსწმინდოს ერს ტანჯვის ცრემლი.

დიადი საკაცობრიო გრძნობები, ბედისაგან დაჩაგრულთა სიყვარული, მათი ტვირთის შემსუბუქებისათვის ზრუნვა და მათი ცხოვ-

რების გაუმჯობესების წყურვილი, — აი, რა ახასიათებს პირველი სტრიქონიდანვე ილ. ჭავჭავაძის პოეზიას. ერის დაჩაგრულ ნაწილს ჩვენს პოეზიაში არა ჰყოლია უკეთესი ჭირისუფალი; ერის დაჩაგრული ნაწილისადმი ჩვენს პოეზიაში ილიაზე ღრმად, ილიაზე მძლავრად არავის გამოუთქვამს თავისი თანაგრძნობა და სიყვარული.

კაცი — გიყვარდეს! —  
ცათ შთამომძახეს,  
როს მათ დამბადეს.  
ყველგან ეს სიტყვა  
ლამპრად წინ მიმყვა...

და მართლაც, პოეტის ნაწერებში უხვად არის გაბნეული სიყვარული დაჩაგრულთადმი და ღრმა რწმენა, რომ მომავალი მათია.

იმ დროს, როცა ახალგაზრდა პოეტი სამწერლო ასპარეზზე გამოვიდა, ყველაზე უფრო დაჩაგრული ჩვენში ყმა იყო, ერის უპირველეს წყლულს ბატონყმობა წარმოადგენდა; ერის ტანჯვის სათავე ბატონყმობიდან იწყებოდა და პოეტმაც ძლიერი იერიში მიიტანა ბატონყმობაზე. „მესმის, მესმის“, „აჩრდილი“, „კაკო ყაჩალი“, „გლახის ნაამბობი“ და „კაცია ადამიანი?!“ სრული უარყოფა და გმობაა ბატონყმობისა. პოეტს ბატონყმობა მიაჩნია უსამართლოდ, მონობად და მისი ბორკილის მტერების ხმა მისთვის სანატრელი ხმაა.

ღმერთო, ღმერთო, ეს ხმა ტკბილი  
გამაგონე ჩემს მამულში!

პოეტი მტერია ყოველგვარი უსამართლობისა და ძალმომრეობის, ის შენატრის ძმობას, ერთობას, სიყვარულსა და თავისუფლებას, კაკო ყაჩალის პიროვნება მთელ პროპაგანდას წარმოადგენს ბატონყმობის წინააღმდეგ, — პროპაგანდას სასტიკს, ძლიერს, შეუბრალებელს, უკომპრომისოს. ახალგაზრდა პოეტის სული და გული ყმისაყენ არის მხოლოდ. პოეტის „უძლიერესი ნდობა — ოცნებად გადაქცეული“ ბატონყმობის დამხობა და შრომის განთავისუფლება.

პოეტი მტერია მარტო ბატონყმობისა კი არა, წოდებრივი წყობილებისაც, მისი იდეალია ისეთი ცხოვრება, საცა არავითარი წოდებები არ არსებობენ, არამედ ყველა ტოლი და თანასწორია. პოეტი დარწმუნებულია, რომ წოდებრივი წყობილება საზოგადოებრივი ცხოვრების სამარადისო, გარდუვალი სახე კი არ არის, არამედ ერთერთი საფეხურია ისტორიული განვითარებისა და ადრე თუ გვიან უნდა მოიხსნოს. პოეტის შეხედულებით, მომავალი წყობილება და საზოგადოებრივი ურთიერთობა ერთიანად შრომაზე იქნება დამყა-

რებული და ამიტომ, ღრმად დარწმუნებული ამხნევებს შრომის შვილს: მყოობადი მარტო შენიაო.

ასეთ მყოობადში, პოეტის წარმოდგენით, არც უფროსი იქნება, არც უმცროსი, არც ბატონი, არც მონა. არამედ გამეფდება სრული თანასწორობა. კეთილდღეობა და ბედნიერება. ასეთ ხანას სრული თანასწორობისა და თავისუფლებისას პოეტი უწოდებს „შრომის სუფევას“. პოეტის შეხედულებით, სამართლიანობა და სიმართლე, კაცთ-მოყვარეობა და სათნოება მხოლოდ მაშინ აღარ ივლიან ეკლის გვირგვინით. როდესაც საზოგადოებაში ყოველისფერი შრომაზე იქნება დამყარებული.

პოეტმა პირველი ნაბიჯითვე გვამცნო, რომ მთელი მისი სიყვარული და თანაგრძნობა, მთელი მისი სული და გული, მთელი მისი არსება შრომის შვილებისავე იყო. მას გულწრფელად და მძლავრად უყვარდა ეს შრომის შვილები და სწამდა კიდევ, რომ მომავალი მათ ეკუთვნოდა. სხვანაირად ვერც მოიქცეოდა ის, ვისაც ისე ესმოდა საზოგადოებრივი ცხოვრების განვითარება, როგორც ილია ჭავჭავაძეს.

გადაიკითხეთ პოეტის „მგზავრის წერილები“ და ჰკითხეთ თქვენს თავს თუ რად უყვარს პოეტს მყინვარზე უფრო თერგი. იმიტომ, რომ მყინვარი განზე გამდგარა, მიუკარებელია, თერგი კი მუდამ მოძრავია, მუდამ იბრძვის და აგონებს ავტორს ადამიანის ცხოვრებას. პოეტის შეხედულებით, ცხოვრებაც იგივე ბრძოლაა. პოეტს სწამს, რომ „მოძრაობა და მარტო მოძრაობა არის ქვეყნის ღონისა და სიცოცხლის მომცემი“. ვინ არის ეს მოძრავი ელემენტი საზოგადოებაში? იქნება გაბატონებული ნაწილი? აი, რას სწერდა პოეტი ამ ნაწილის შესახებ:

რად შეებრძვის ის ბორბტებასა,  
როს შეოხებით მისით თვით რჩება?

მაშინ, ვინ იბრძვის, პოეტის აზრით, ცხოვრების გაუმჯობესებისათვის? „ქვეყნიერების ბედნიერების ქვაკუთხედი ყოველთვის ძირიდან დადებულა, ყოველი შენობა ძირიდან ამაღლებულა, მაღლიდან კი შენობა არ დაწყებულა“, — წერს პოეტი მგზავრის წერილებში. ეს სიტყვები ფილოსოფიაა ისტორიული განვითარებისა. პოეტის მთელი სიმპათია იყო ეგრეთწოდებული დაბალი ანუ მშრომელი ხალხისაკენ, შრომის შვილისაკენ, ერთი მხრით, იმიტომ, რომ მშრომელი ხალხი დაჩაგრულია და პოეტი კი ყველა დაჩაგრულის მოსარჩლეა, — მეორე მხრით, იმიტომ, რომ პოეტის შეხედულებით, წინმსვლელობის გზაზე ცხოვრება მხოლოდ მშრომელ ხალხს მიჰყავს, მხოლოდ ძირიდან შენდება ცხოვრება და არა მაღლიდან.

პოეტის მისწრაფებანი. პოეტის იდეალები, მისი მსოფლიო შეხედულება უკიდურესად დემოკრატიული იყო და მაშინ, როდესაც ჩვენში. ბატონყმობა პარპაშობდა; პოეტმა მალა ააფრიალა დემოკრატიული ღრმობა და მედგრად შესძახა: ძირს ბატონყმობა. ძირს მონობა, გაუმარჯოს თავისუფლებასო. მაშინ, როდესაც წოდებრივი წყობილება მტკიცედ იყო დაცული, პოეტმა გამოაცხადა: წოდებრივი წყობილება უნდა მოისპოს და უნდა მოვიდეს „შრომის სუფევად“. პოეტი უარყოფს ბრწყინვალე წოდებას და მიმართავს შრომის შვილთ: იბრძოლეთ, მომავალი თქვენია, თქვენის კეთილდღეობის ქვაკუთხედის აშენება მხოლოდ თქვენ შეგიძლიათო.

გადაიკითხეთ „კაკო ყაჩაღი“ და „კაცია ადამიანი?!“... მოიგონეთ პოეტის გესლიანი სიტყვები: თავადიშვილი კარგი არ არის, ავრა იყოსო, და მაშინ დარწმუნდებით, რომ ჩვენს მწერლობაში არავის არ მიუტანია ისეთი იერიში ბრწყინვალე წოდებაზე, როგორც ილ. ჭავჭავაძემ მიიტანა თავის პოეტურ ნაწერებში. პოეტის ძლიერება გამოიხატება ზომიერებაში, ღრმა გრძნობაში, ღიად აზრებში და ფსიქოლოგიურ ანალიზში. მისი ყოველი თხზულება საუცხოო ნიმუშია იმისა, თუ როგორ უნდა იწერებოდეს სიტყვაკაზმული ნაწარმოები. ამდენად შემუშავებულ ნიმუშებს ქართულ ენაზე ძალიან ცოტას ნახავთ. ილ. ჭავჭავაძის პოეზიაში ყოველი სიტყვა თავის ალაგას არის: არც გამოკლება შეიძლება, არც ჩამატება. ავტორს საუცხოოდ ეხერხება იმის გამოხატვა, რასაცა ხედავს, გრძნობს და ფიქრობს; ამიტომ ყოველი მისი აზრი გულის სიღრმეში სწვდება მკითხველს.

სამწერლო ასპარეზზე პოეტი გამოვიდა მესამოცე წლებში, როცა ჩვენს ცხოვრებაში მონობისა და ღრმა ძილის მეტი არაფერი არსებობდა. გულწრფელი სურვილებითა და მისწრაფებით გატაცებული, ღრმა გრძნობით, ღიადი აზრებითა და ქეშმარიტი მსოფლიო შეხედულებით აღჭურვილი პოეტი შეუდგა ცხოვრების გამოღვიძებასა და გარდაქმნას. მას არ დაუტოვებია ჩვენს ცხოვრებაში არც ერთი ცუდი მხარე, რომელიც არ გაეკიცხოს შეუბრალებელის სატირით და სასტიკის იუმორით. სამაგიეროდ რაც იყო კარგი და ღრმის შესაფერისი, იქითკენ მიაქანებდა პოეტი ცხოვრებას მთელი თავისი ძალღონით. სდევნიდა ყოველგვარ ბოროტებას, თესდა სიკეთეს, სამართლიანობას, კაცთმოყვარეობას და სათნოებას. გულწრფელი, თავგამოდებული, შეგნებული მოსარჩლე იყო „ბედისაგან დაჩაგრულთა“ და მტკიცედ იცავდა მათს ინტერესებს. მიუხედავად წარსულის ღრმა სიყვარულისა, პოეტი არ მისტიროდა მას, „რაც დამარხულა“; მისი იდეალი მომავალში იყო და ამწყოს გაუმჯობესებით ის ხალხის ამ მომავლის აშენებაში მხურვალედ მონაწილეობდა.

ილ. ქავჭავაძე საუკეთესო მეზობელი იყო უკეთესი შომაგლისათვის, ის თავგამოდებული ქომაგი იყო ბედისაგან დაჩაგრულისა, ის იყო მშრომელი ხალხის უდიდესი პოეტი-ფილოსოფოსი და ქართული ხელოვნების პირველხარისხოვანი ვარსკვლავი.

1908 წ.

## სალიტერატურო უენიშვნეზი

### I

კრემლში მიღესავს ნღველი  
ღა მელნად ის მიხმარია. —

ტკბილად გვიგაღობს აკაკი.

წამერთო ყვეღა, ღა ნუგეშად ღღეს  
მარტოღა კრემლნი მე ღამშუენიღს. —

ბანს აძღვეს აკაკის იღია.

ოჰ, რად არ ძაღმიძს, მთღად კრემღად ვიქცე.  
გაღხღე მღინარე აღქაღებუღი! —

კვენსის ღღუტუ მეგრეღი.

ერთიღ ვნუგეშობ, ერთიღა:  
მივენღე კრემლის ღენსა:  
ესაა ჩემი ნუგეში:  
ტირიღში ვპოვებ შევბასა.  
კრემღებო, თქენი შვიღი ვარ,  
თქენა ხართ ჩემი ფონია;  
იღინეღ უხვად, ვიღრემღე  
შემწუეღს ტირიღის ღონია!  
თქენა ხართ ჩემი ნუგეში,  
სხვა მე ვერ მომიგონია. —

გოღებს ვაჟა-ფშავეღას ფანღური. კრემღი, კრემღი ღა ისეღ  
კრემღი! აი, რა გაისმის ჩვენს პოეზიაში.

კრემღი სღის ბარათაშვიღს, მაგრამ ის ამაყია — თავის კრემღს  
თვიღთონვე ჰყღაპავს ღა სხვას არ უჩვენებს, მტირალ სახეს სხვას არ  
ღანახვებს. კრემღებს ვერ მღღავს იღია, აკაკი, ღღუტუ მეგრეღი.  
ვაჟა-ფშავეღა.

თუ წინათ ეს კრემღები იშვიათად გაისმოღა ჩვენს პოეზიაში,  
ღღეს კრემღები ჩენი სიტყვაკაზმული მწერღობის უმთავრესი თვი-  
სებაა.

აიღეთ ჩვენი ახალგაზრდა პოეტები: რუხაძე, ევლოშვილი, ზომ-  
ლეთელი, იასამანი, თურდოსპირელი, მალაქიაშვილი, ქუჩიშვილი,  
ლენხუმელი, ტუქსიშვილი, შანშიაშვილი, გრიშაშვილი, მჭედლიშვი-  
ლი და სხვ. თუმცა უმეტეს მათგანს ჯერ თავისი ხვედრიც ვერ უპოვ-  
ნია, მაგრამ ცოტათ თუ ბევრად მათი პოეზიაც ცრემლებით არ არის  
განა შეზავებული?

ჩვენი პოეზიის ასპარეზზე ვაჟა-ფშაველა ხმალამოდებული გად-  
მოხტა — უშიშარი, შეუპოვარი, საბრძოლველად გამზადებული მთის  
შვილი.

ველი — სადა და როდისა  
თქრიალს მოიღებს ჯარიო,  
რომ მეც მოვახტე შავრასა,  
პირს დავისახო ჯვარიო.

დღეს კი ერთადერთს ნუგეშს ისიც ცრემლში ჰპოვებს და ცრემლს  
მიმართავს:

იღინეთ უხვად, ვიდრემდე  
შემწევს ტირილის ღონია!

ტირილის დედა სევდაა. ჩვენი პოეზიის ცრემლებიც სწორედ ამ  
სევდის ნაყოფია.

ბრჭყალით ვუპყრია სევდასა,  
როგორაც არწივს გნოლია.

მთელი ჩვენი პოეზია, ბარათაშვილიდან მოყოლებული დღემდე,  
ბრჭყალით უპყრია სევდასა.

განა ბაირონი კი არ იყო სევდით შეპყრობილი?

მაგრამ ბაირონის სევდა ცრემლად არ დამდნარა, არამედ ის იქცა  
ბრძოლის წყურვილად, ბრძოლის ცეცხლად და პოეტი აანთო, აამ-  
ხედრა, გაასალკლდევა და ისეთი ძალა აგრძნობინა, რომ ბაირონმა  
თვით ღმერთს გამოუცხადა ომი.

ჩვენი პოეტების ხვედრი კი სულ სხვა არის. აიღეთ ბარათაშვი-  
ლი. — ეს ძლიერი სული, დიადი გრძნობა. სევდით სავსე, ის ციხე  
იქით ეძიებს სადგურს, რომ დაშთოს აქ ამოეხა; ის ოცნების მერანს  
ჰკაზმავს, რომ ნიავს მისცეს ფიქრნი თვისნი, შავად მღელვარნი,  
ბრძოლით კი არავის არ ებრძვის.

სევდით შეპყრობილი ბაირონი ბრძოლაში ეძებს შვებას და  
თვით ღმერთთანაც რომ დასჭირდეს შერკინება, ის არ შედრკება,  
უკან არ დაიხევს. ამაზე მეტი სიმამაცე, ამაზე მეტი გრძნობა თავი  
ძლიერებისა, შეუძლებელია.

ჩვენი პოეტები კი, სევდით შეპყრობილნი, ცრემლში ჰკოვე-  
ბენ შვებას.

ბრძოლა მას შეუძლია. ვისაც ხელ-ფეხი თავისუფალი აქვს, ვინც თავისუფლებას ჰგრძნობს მთელი თავისი არსებით, ვინც თავისუფ-  
ლებით სუნთქავს, თავისუფლებას ჰყნოსავს.

ხელ-ფეხშებოროკილს, რომელიც თავისუფლებას არა გრძნობს. რომელიც თავისუფლებით არა სუნთქავს, — ამასაც კი შეუძლია ბრძოლა, მხოლოდ ერთის პირობით: იმის ბრძოლას უნდა აცისკროვ-  
ნებდეს სხივი გამარჯვებლისა, მის ბრძოლას წინ უნდა მიუძღოდეს იმედი გამარჯვებლისა. როცა ხელფეხშებოროკილია და იმედიც არსად არის, რადგანაც საიმედო გარეშემო არაფერია, როცა ადამიანი სრულ თავის უძღურებას გრძნობს და ხედავს, მას ცრემლის მეტი აღარა დარჩენია რა, თუ ის პოეტია; ხოლო თუ ის ფილოსოფოსია, მისტი-  
ციზმს მიმართავს, ბუნების ცხოვრების გარეშე რწმენის სამეფოში მონახავს ის სულის მოსასვენებელ სადგურს.

ბაირონი თავისუფალი ბრიტანეთის შვილი იყო. ის ხედავდა, ის გრძნობდა თავისუფლებას, ის სუნთქავდა თავისუფლებით. ამიტომ სევდა მასში მხოლოდ ბრძოლის წყურვილს აძლიერებდა.

ჩვენ კი... ჩვენ ბედმა გვარგუნა სულ სხვა ცხოვრება. სულ სხვა ხვედრი. ცხოვრების პირობები ჩვენ მძიმე ლოდევით გვაწევს, სულს გვიხუთავს, გულს გვიწამლავს; გამოსავალი გზა არსად არის, არც არავითარი იმედია გამოსვლისა: ჩვენ ვგრძნობთ ჩვენს მონღომებას. ჩვენს უძღურებას და ცრემლების მეტი აღარა დაგვრჩენია რა:

უბედო ბედმა გამრიყა,  
მიმაკლა ლოდსა კლდისასა;  
ვერც არა თავსა ვუშველე,  
ვერც გაჰირებებს ძმისასა.  
ღამეხვე, სმენავ, ღამეხვე,  
ნულარც რამ გამიგონია!  
ცრემლებო, თქვენი შვილი ვარ,  
თქვენა ხართ ჩემი ფონია,  
იღინეთ უხვად, ვიდრემდე  
შემწევს ტირილის ღონია!

უმეტეს შემთხვევაში, ჩვენი პოეტი ბრძოლის სიმღერით გამო-  
დის სამწერლო ასპარეზზე. გაივლის დრო და ბრძოლის სიმღერა ოხ-  
ვრად გადაიქცევა. სული სასოწარკვეთილებას ეძლევა, გული ტყდე-  
ბა, სიმები წყდება, იმედი ქრება, გრძნობა ძალისა ალაგს უთმობს საშინელს გრძნობას უძღურებისას. ცრემლებიღა რჩება. მხოლოდ ცრემლები.



ამგვარია სინამდვილე ჩვენში, იმიტომ, რომ ამგვარივეა სინამდვილე, საერთოდ, მთელს რუსეთში...

პოეტი იმით განირჩევა არა პოეტისაგან, რომ ის უფრო ჰხედავს და უფრო გრძნობს. თუ სინამდვილე მწარეა, გრძნობაც მწარეა. ამიტომ პოეტი სხვაზე უფრო იტანჯება, როცა სინამდვილე მტანჯველია...

## II

ბერძენთა მითოლოგიაში ერთი საუკეთესო გადმოცემაა. ახალგაზრდა იკაროსმა ფრთა შეისხა და აფრინდა მალა, ჰაერში. ის გაიტაცა ოცნებამ შორს, შორს, მოჰხიბლა მშვენიერებამ და მიუახლოვდა მზეს, რომ ახლოს ეხილა ეს წყარო სითბოსი და სინათლისა, მომნიჭებელი სიცოცხლის და ნეტარებისა.

იკაროსმა მოინდომა სინათლის ცნობა, ჭეშმარიტების პოვნა, სიცოცხლის საიდუმლოების ამოკითხვა, მაგრამ მზემ ფრთები გაუღწია და იკაროსი დედამიწას დააკვდა.

განა ყველა ქართველი პოეტი იკაროსი არ არის? ყველა ქართველი პოეტი იკაროსის ბედს განიცდის, მხოლოდ ერთის დიდის განსხვავებით. იკაროსს უნდოდა მზეს ჩაჰკვროდა გულში და გატაცებამ სრულებით დააფიქსა, რომ მისი ფრთები მზის სიცხოველეს ვერ გაუძლებდა.

ქართველი პოეტიც მზისკენ მიისწრაფვის, მაგრამ მარტოკა კი არა. მას თან მიაქვს სინათლისაკენ, სითბოსაკენ, სიცოცხლისაკენ, ჭეშმარიტებისაკენ თავისი მრავალტანჯული სამშობლოს შავი ბედიხოლო ნათელი სხივების სიცხოველით ფრთებდამწვარი კი არ ვარდება ძირს, არამედ ბნელეთისა და წყევლიადის სისქეს ვერ აპობს და ნათელი სხივი სამუდამოდ ეკარგება თვალთაგან.

ვაჟა-ფშაველა თავის პირველ ნაწერებში იგივე იკაროსია. მხნე, მამაცი, შეუპოვარი, სახეგაბრწყინებული ის მიისწრაფვის სინათლისაკენ, სიმართლისაკენ.

ის შეუპოვარია, ქედმოუხრელი.

მთლად მე მეკუთვნის ქვეყანა:

მთაში — მთა, ბარად — ბარია,

ზღვა და ხმელეთი ერთიან,

ცას — ვარსკვლავების ჭარია,

დილით — მზე მანათობელი,

ღამით — გუშავი მთვარია.

წარსულთა გმირთა ნამოქმედარით და მაგალითით გამხნეებულნი, ის მომავალში ეძებს საგმირო საქმეებს.

ვაჟა-ფშაველა დიდი ნიჭია, დიდი ხელოვანი. მის ოცნებას საზ-

ღვარი არა აქვს, ის სივრცით არ გაიზომება, დროში არ გამოიხატება. მაგრამ მისი პოეტური აღმაფრენა მაინც ფრთაშეკვეცილია; ბუნებას მისთვის ყოველისფერი უხეად მიუცია, რომ თავისი ნიჭი მსოფლიო კითხვების რკვევაში ავარჯიშოს; მიუხედავად ამისა, პოეტი თავის სალ კლდეებს „ზავით მზარავთა და კაცის ფენდაუკარებთა“ შეჭხორცებია მთელის თავისი არსებით და მისი ოცნება, მისი ფიქრი, მისი გრძნობა, მთელი მისი აზროვნება. მთელი მისი ნება, მთელი მისი სურვილი ამ კლდეებს დასტრიალებს გარშემო.

რატომ? რა არის მიზეზი?

ღმერთო, სამშობლო მიცოცხლე! —  
მძინარეც ამას ვლუღუნებ.

აი, რატომ. აი, რა არის მიზეზი.

თუ რომ პოეტი, მძინარე, სამშობლოზე ფიქრობს, ცხადია, ფხიზელის მთელი მოფიქრება მხოლოდ სამშობლოს გარშემო დაიწყებს ტრიალს.

მსოფლიო კითხვებისათვის რანაირად მოიცილის პოეტი, რა დიდი ნიჭის პატრონიც უნდა იყოს ის, როცა სამშობლოს კითხვას შებოჭილი ჰყავს მთელი მისი არსება, მთელი მისი გრძნობა, მთელი მისი მოფიქრება!

ვერც ერთი ქართველი. რომელიც კი თავით ფიქრობს და გულთ გრძნობს, სამშობლოს კითხვას გვერდს ვერ აუქცევს.

ბედმა ყოველისფერი მოგვცა, რომ ჩვენი ცხოვრება დიდებული იყოს და ჩვენი ხალხი ბედნიერი, მაგრამ მათმა სიბეცემ და შორსმჭვრეტელობის უქონლობამ, ვინც ისტორიამ ჩვენი პოლიტიკური ცხოვრების სათავეში წამოასკუპა, ხელიდან გამოაცალა ის, ურომლისოდაც შეუძლებელია დიდებული ცხოვრებაც და ბედნიერებაც. ეს არის ეროვნული თავისუფლება.

ფართო, განვითარებული პოლიტიკური ცხოვრება შეუძლებელია იქ, საცა ეროვნული დამოუკიდებლობა არ არსებობს. ლიტერატურის განვითარება კი — როგორც, საერთოდ, კულტურული ცხოვრების ყოველი დარგის განვითარება — შეუძლებელია იქ, საცა თვით ცხოვრება არ არის რთული და განვითარებული...

არავინ არ იცის, რად იზადება პეტრე პეტრედ, ივანე ივანედ და სხვა; ხოლო ის კი ცნობილია, რომ პეტრეს, ივანეს და სხვათა გრძნობა, აზროვნება შეკავშირებულია ცხოვრების გარეშე პირობებთან, გარემოებასთან და ღარიბ ცხოვრებაში ისახება ღარიბი გრძნობა. იზადება ღარიბი ფიქრი, რთული, მდიდარი ცხოვრების პირობებში კი რთული და მდიდარი გრძნობა-ფიქრები.

ბუნებამ მდიდარი გრძნობითა და ფიქრებით რომ დააჩილდო-

ვოს ვინმე, ცხოვრების ღარიბ პირობებში ის ვერ გამოააშკარავებს თავის ფიქრებსა და გრძნობებს.

ამიტომ, რა ნიჭის პატრონიც უნდა იყოს ქართველი პოეტი, მისი ნიჭი საკმაოდ ვერ გაიშლება, მისი ოცნება ვიწრო საზღვრებში მოექცევა, მისი აღმაფრენა საკმაოდ ფრთებს ვერ გაშლის.

ვაჟა-ფშაველა უხვად დააჩილდოვა ბუნებამ. მდიდარი ოცნება, ღრმა გრძნობა, ბუნების ცოდნა, მხატვრული ენა. ფერადების მრავალგვარობა. — ყოვლისფერი ხელთ უპყრია პოეტს. პირველი სტრიქონებიდანვე თქვენი თვალის წინ იხატება ძლიერი ხელოვანი, მსოფლიო პოეტი, მაგრამ გადის დრო და პოეტი მიჯაჭვული რჩება თავის სამშობლოს ზავით მზარავ კლდეებზე, ვითარცა ამირანი.

რაც უნდა გაურბოდეს რომელიმე პოეტი სამშობლოს კითხვას, ეს კითხვა მისდაუნებურად დაიპყრობს იმის გულს, იმის აზროვნებას, იმის ოცნებას. ძლიერი სევდა, რომელსაც არსაიდან არ შემოევლება, ადამიანის გრძნობას აჩლუნგებს, აზროვნებას ასუსტებს, ნებას აუძლურებს. სამშობლოს საკითხი ყველა ჩვენი პოეტისათვის უდიდესი საკითხია, ეს საკითხი კი მხოლოდ სევდისმომგვრელია და ისეთი სევდის. რომელსაც არსაიდან არ შემოევლება. ეს სევდა, ბოლოს და ბოლოს, ოცნებას უკლავს, აზრს უწამლავს, ნებას უსუსტებს და გრძნობა-აზროვნების ძალას აცლის ქართველ პოეტს...

და როდესაც ჩვენი არსებობა, ჩვენი ხვალისდელი დღე უზრუნველყოფილი არ არის, რანაირად შეუძლია ჩვენს პოეტს სამშობლოს ტანჯვით არ დაიტანჯოს, სამშობლოს სევდით არ დასევდიანდეს?!

ეს სევდა ნელ-ნელა ჩაითრევს მას, მთელ მის არსებას დაიპყრობს, მთელ მის ოცნებას დაიმონებს, მთელ მის გრძნობას შებოროტავს, გულში ჩაიკრავს და მაშინ პოეტი მსოფლიო კითხვებისათვის მკვდარია, იმის ჩანგის უმთავრესი საგანი, ყოველდღიური ცხოვრება და მისი ჰირ-ვარამი იქნება, ცრემლები კი უმთავრესი ნაყოფი. და როდესაც ვაჟა-ფშაველამ თავის უკანასკნელ ნაწერებს „ცრემლები“ უწოდა, ამ ერთ სიტყვაში მთელი თავისი პოეტური სულისკვეთება, მთელი თავისი აზროვნება, მთელჯ თავისი ფიქრები, გულისნადები გამოხატა. პოეტი უკვირდება ცხოვრებას და ყოველგან უსამართლობას ხედავს. უკვირდება ბუნებას და იგივე უსამართლობაა.

„ერთი საათის სიტურფე ათასს წლისას თანმდებოდა“, რადგანაც დრო ყველაფერს ერთნაირად სპობს, ყველაფერი ერთნაირად ფუჭია, ერთნაირად წარმავალი.

რადა, რად არის ასე?

პოეტი თითქოს თავს ინუგეშებს: „გაძლება გვმართებს. ბუნება რასაც დაგვადებს ხარჯადა“.

მაგრამ ამგვარი ნუგეში რომ სრული უნუგეშობის მოძასწავებელია, თვითონ პოეტივე გვიმტკიცებს, როდესაც ის „თვალთაგან ცრემლმთოვარე“ გაჰყურებს განვლილ ცხოვრებას.

სევდა, სევდა და სევდა! აი რით არის სავსე პოეტის უკანასკნელი ნუგეში, მაშინაც კი, როდესაც პოეტი სევდას ივიწყებს და უნდა სამხიარულო რამ დაამღეროს, თითები აღარ ემორჩილება, გული სხვას ამბობს:

ხელში ავიღებ ჩანგურსა,  
მინდა დაემღერო ლაღადა, —  
თითები აღარ მომყვება —  
გული არ არის საღადა.  
გადაქცეულა ნაოხარ,  
გაბეჩხებულ ბაღადა.

პოეტს უნდა, დედამიწა დაივიწყოს მისი ჭირ-ვარამით, მისი ტანჯვით, მისი ცოდვებით, მისი ცრემლებით; მას უნდა ოცნებით ცის სივრცეში გაფრინდეს, რადგანაც მას უყვარს ციური აზრი. ღვთიური გრძნობა, ფიქრი, მაგრამ „ფრთებს მიკვეცს, აღმაფრენასა, ამბავი ყოველდღიური“.

ტრაგიზმი პოეტისა იმაში მდგომარეობს, რომ მას უნდა მოსწყდეს ცხოვრებას, დაივიწყოს ის და ციურ ფიქრს, ციურ გრძნობას გაჰყვეს, მაგრამ ცხოვრება მას აჯ უშვებს, ბრჭყალებში ჰყავს ჩაქედილი და ეუბნება: ჩემის ტანჯვით დაიტანჯე, ჩემის სევდით დასევდიანდი, ჩემის უბედურებით გაუბედურდი, ჩემთან ერთად იტირე და შენს აღმაფრენას ფრთები შეჰკვეციეო.

პოეტიც სევდით დატანჯული ნაღვლის ზღვაში დასცურავს და თუმცა წინ ცრემლი გუბედ უღვას, მაინც ტირის. ტირილიც არას შევლის, მაგრამ ტირილის მეტი აღარაფერი დარჩენია, რადგანაც იმედი მთლად დაკარგული აქვს.

როდესაც პოეტი ივიწყებს ყოველდღიურ ცხოვრებას, მისი ოცნება, ფრთებგაშლილი, ცაში დანაფარდობს, ვარსკვლავებს ეთამაშება, მთვარეს ეაღერსება, რომ ზეციური ჰანგები შეჰკრიბოს, მაშინ პოეტის ყოველი ლექსი, ყოველი სტრიქონი, ყოველი სიტყვა, განხორციელებული მშვენიერებაა. ნამღვილი შედევრია, უკვდავი მარგალიტია.

მაგრამ სადაც უნდა გასტყორცნოს პოეტი ოცნებამ, დედამიწის ვლოდება მაინც ყველგან სწვდება იმის სმენას, იმის გულს.

საწყალი საწყლადვე რჩება,  
ისევ სღის ცრემლის ღვარია,  
მგლები, აფთრები მრავლდება,  
ხარობს იმათი გვარია.

და პოეტის ოცნება ისევ ძირს ეშვება; პოეტის გული ისევ სევდით ივსება, მისი ფანდური ისევ ბედგანამწარი იწყებს გოდებას:

მტრისამც გულია ასეთი  
როგორც გული ჩემია:  
უნდა დაელიო სიმწარით  
ჩემი სიცოცხლის ღღენია.

პოეტი რწმუნდება, რომ მის ჩონგურს, ჩონგურს. რომელიც: ციურ ჰანგებს დამღერდა, სიმები დააწყდა. „დამიწყდა ჩონგურის სიმები. აღარ აესხმის, აღარა“.

გული დადუმდა, გონება დაჩლუნგდა და ერთადერთ ნუგეშს პოეტი ცრემლშია ჰპოულობს, კაეშამს იმსუბუქებს „ცხელის ცრემლისა დენითა“.

რა არის ან სად არის მიზეზი პოეტის სულიერი ტანჯვისა?

ვაჟა-ფშაველას სევდას სამი სათავე აქვს: ეროვნული, სოციალური და ფილოსოფიური.

პოეტს უყვარს თავისი ბედშავი სამშობლო და, რადგანაც ის უბედურია, ხელ-ფეხშებორაკილი, მონადქეუელი, თავისუფლების მოტრფიალე. პოეტის გული სევდით, ნადველითა და ბოდმით არის სავსე. ეს სევდა, ეს სასოწარკვეთილება პოეტისა მით უფრო უსაზღვროა, რომ პოეტს აღარავითარი იმედი არა აქვს თავისი სანატრელი მამულის მკვდრეთით აღდგომისა, ამიტომ პოეტის გული სევდით ივსება და ცრემლში ეძებს ნუგეშს.

პოეტი უკვირდება ცხოვრებას და ყოველგან უსამართლობასა და ძალმომრეობას ჰხედავს; საწყალს ცრემლის ღვარი სდის, მგლეზბი, აფთრები მრავლდება, ხარობს იმათი გვარია.

პოეტი ნატრობს რომ, —

სიმართლის გამარჯვებისა  
მთაზე არწივი ყიოდეს.  
შხამის და გესლის მთესველნი  
მოისპნენ, არარობდნენ.

მაგრამ ამავე დროს დარწმუნებულია, რომ მისი ნატვრა ნატვრადვე რჩება და ვინ იცის, როდემდის.

ამიტომ სევდა სევდას ემატება და პოეტი ცრემლებშია ეძებს შვებას. ვაჟა-ფშაველა თავისი მსოფლიო შეხედულებით ნიკოლოზ ბარათაშვილის ნათესავია.

ნ. ბარათაშვილის თვალში აწმყო მხოლოდ ფუჭი და ამაოებაა. წარსულთა დროთა მოგონება კი იმის სულს აფიქრებს.

ვაჟა-ფშაველასათვის აწმყოში არაფერი არაა და წარსულზე ფიქრი მას სულს უწუხებს.

ნიკოლოზ ბარათაშვილი თავის მსოფლიო შეხედულებით მსოფლიო სევდის მატარებელია, ცხოვრება, ადამიანის არსებობა მას არ აკმაყოფილებს, მას აფიქრებს და თან აღონებს სიცოცხლის მიზანი. საიდუმლოება სიკვდილისა, ამოება და წარმავლობა ყოველივე არსისა, თვით საწუთროსიც.

ამგვარივე კითხვები აღონებს, აფიქრებს ვაჟა-ფშაველასაც. ნიკოლოზ ბარათაშვილი ხედავდა, რომ ყოველივე წარმავალია, მაგრამ მისი გულისთქმა ცის იქით ეძიებდა სადგურს, ზენაართ სამყოფს; მას სწამდა, რომ არსებობდა სამარადისო, უკვდავი, წარუვალი ანუ აბსოლუტი და ის ეძებდა ამ სამარადისოს, ამ აბსოლუტს, მაგრამ ვერ ჰპოვებდა და ეს კიდევ უფრო აათქეცებდა იმის სევდას.

ვაჟა-ფშაველაც ხედავს, რომ ყოველივე წარმავალია: ყოველივეა დასასრული აქვს:

განგების სათამაშოდა,  
გასართობად ვართ გამხდრები;  
ერთია, თუნდა ჩვენ ვიყვნეთ  
და თუნდა მინდერის თავეები,  
გავერანდება ერთხელაც  
ტურფად შემკული ბაღები,  
ჩამოინგრევა დარბაზი  
და სასახლისა თაღები.

ბარათაშვილსა და ვაჟა-ფშაველას შორის ერთი დიდი განსხვავებაა, ბარათაშვილი — მშვიდი, წყნარი სევიდა. ვაჟა-ფშაველა კი სევდით შეპყრობილი მიჯაჭვული ამირანია, რომელიც თავის ხმალს ვერ მისწვდომია.

მიეცით ბარათაშვილს ამირანის ხმალი, ის ხელს არ მოჰკიდებს, რადგანაც ის არავის არაფერში არ ამტყუნებს და არავის ებრძვის, ის სევდიანი ფილოსოფოსია.

მიეცით ვაჟა-ფშაველას ამირანის ხმალი, ის მაშინვე გაკვეთავთ თავის შემბორკველ ჯაჭვებს და თავივე საომრად დაეშვება.

### III

როდესაც ჭაბუკის გულში სიყვარულის გრძნობა აღიძვრის ნათლად, მკაფიოდ ან ბუნებრივად, ეს გრძნობა სტიქიურად მოითხოვს თავის გამოსახვას, გამოაშქარავებას, განსახოვნებას პოეზიაში, თუ სიყვარულით შეპყრობილი ერთხელ მაინც არა სცდის თავისი გრძნობა პოეზიაში ჩამოასხას, მას ან არ განუცდია ღრმა, მწვავე, ძლიერი გრძნობა სიყვარულისა, ან იმ წლოვანებაშია, როცა მშრალი გონება ყოველ გრძნობას იმორჩილებს და მას თავის სილამაზეს, გიჟურ გატაცებას და სიძლიერეს აცლის.

პოეზია ნაყოფია სიყვარულისა. იქ, საცა სიყვარული არ არის, პოეზიაც არ არის. ხოლო იქ, საცა სიყვარულია, პოეზია ყოველთვის არის.

პოეტი შეყვარებული ადამიანია. ყოველი თავისი შემოქმედების დროს ის უსათუოდ განიცდის ამ გრძნობის სიცხოველეს

რაც უფრო ძლიერია პოეტი, მით უფრო ძლიერია და ცხოველი მისი სიყვარული, და რაც უფრო ძლიერია მისი სიყვარული: მით უფრო მშვენერი, წარმტაცი და მომჯადოებელია მისი პოეზია.

ვაჟა-ფშაველაც შეყვარებული პოეტია. პოეტის სიყვარულის საგანი მისი სამშობლოა. აიღეთ მისი პოემები, მისი წვრილი ლექსები— ყველგან აშკარად. ნათლად ან მალულად გატარებულია სიყვარული სამშობლოსა. ძლიერია პოეტის სიყვარული სამშობლოსადმი; ძლიერია სამშობლოს უბედურება; ამიტომ ძლიერია ვაჟა-ფშაველას სევდაც. ეს სევდა არ არის წყნარი, ვით საღამო, მშვიდი, ვით მარადისობა, მეოცნებე, ვით ზღვის ნიავე, — ის მეტბრძოლია, მაგრამ, რადგან ხელ-ფეხი შეკრული აქვს და ხსნა არსაით არის, შინაგანი ძალა და ბრაზი მას ცრემლებად აღნობს.

თუ სამშობლოს აწმყო მდგომარეობა პოეტს სიცოცხლეს უწამლავს, დაბადების დღეს აწყველინებს და თვალთაგან ცრემლთა ზღვას ადენინებს, სამაგიეროდ, სამშობლოს მთები პოეტს ნეტარებითა და სიხარულით ავსებს, ავიწყებინებს მწარე აწმყოს და მაშინ მისი ფანდური ისევ ლალად ჰგალობს ციურ ხმებს, ისევ უსაზღვრო იმედებით იქვლინება.

ვაჟა-ფშაველას ისე უყვარს მთა, როგორც ბულბულს ვარდი, იას მზის შუქი, შეყვარებულს თავისი სატრფო. ვაჟა-ფშაველას სატრფო მთა არის:

შენგნით იხარონ ვერხვებმა  
დეკა, ურძანთა, ღვიათა,  
კლდეთა — უენო ჩემ სატრფოდ.

აი, როგორის სიტყვებით მიმართავს პოეტი მზეს:

კლდეზე ვარ დაფუძნებული,  
უშრეტს მაწოვებს ნექტარსა.

და მართლაც, პოეტის ნიჭის სიღრმე-სიძლიერე, მთელი წარმტაცი, მომხიბლავი სინაზე, სიმშვენიერე იმის პოეზიისა მაშინ აშკარავდება როდესაც პოეტი მთებს და კლდეებს დასტრიალებს, მთა-კლდეებს აგვიწერს.

ვაჟა-ფშაველა ბუნების საუცხოო მხატვარია და მთის აღწერაში მას ტოლი არ ჰყავს.

ვაჟა-ფშაველას მთელი მსოფლიო მთაშია მოქცეული; თუ მთა აქვს პოეტს, სხვა მას არა უნდა რა. პოეტი ყველაფერს დათმობს, მთას კი, ამ უენო სატრფოს, ის ვერ დათმობს, ვერ შეეღვეა.

ვაჟა-ფშაველა მთის პოეტია. მთა ვაჟა-ფშაველას პოეზიაში უსულო, უგრძნობელი, მკვდარი ნაწილი კი არ არის ბუნებისა — ის ცოცხალია, ჰფიქრობს, გრძნობს, თავისი საკუთარის ცხოვრებითა სცხოვრობს, ვაჟა-ფშაველამ მთას სული ჩაჰბერა, გული ჩაუდგა, გრძნობით შემოსა, ფიქრით შეჰბურა.

ნისლი პოეტის წარმოდგენაში უბრალო ანაორთქლი კი არ არის მიწის — ნისლი ფიქრია მთებისა.

მთელი თავისი უსაზღვრო სიყვარული მთებისადმი, მთელი სიმშვენიერე. მთელი ცხოვრება, მთელი პოეზია მთებისა ვაჟა-ფშაველამ გამოჰხატა, გამოჰკვეთა „დაუსრულებელ კენესაში“ აღის სახით.

საზარელია ეს მხარე,  
ზავით მზარავი კაცისა...  
როცა კი შემობინდდება,  
კისკისი ისმის აღისა, —  
ამ მომხიბლავის, ცბიერის,  
ტურფა, მმახშირის ქალისა,  
კლდიდამ რომ დაბლა სიბუბზე  
ჩხრიალი ისმის წყალისა,  
თავს უპყრობს კლდისა ნაქურსა,  
მატყვევებელი თვალისა;  
გადაივარცხნის ქოჩორსა,  
ჩამოპოხილსა ნამისა,  
და შეუბურავს საროს ტანს  
ჯანლი ნაწნავთა ჯარისა.  
შესტრფის ამ კლდიჯნ მხარესა,  
უჩვენებს ელვის კბილებსა  
ცაზე გადმოსულს მთვარესა.  
მთვარე რომ ჩავა, ვარსკვლავნიც  
თითობითა ქრებიან,  
ცაში ზარს დაჰკერენ ცისკრისას,  
ცოდვილთ სულეები ჰკრთებიან,  
და მკვდარნიც საფლავებიდან  
სასეირნოდა დგებიან.  
მაშინ კლდის ქალი, ეს ტურფა,  
წავა ნაბიჯით სწრაფითა;  
შეივლის შავსა ჯანჩახებს,  
გალიპულს წყალთა ჰაფითა,  
ბნელს ღვიმეს მოეფარება  
შუალამედე აქა ზის,



ტკბილად დამღერის არესა.  
მკვდათ სულთ ანლამდის ღზინშა  
სიპის კარების ჩქაფითა...  
ცა გაიბურვის ნისლებით,  
როგორც მურით და ლაფითა.

ამ ნაწყვეტში ყოველი სიტყვა მარმარილოდან არის გამოკრილი, გამოსკენილი მშვენიერებაა და მთელი ლექსი ისეთი ღრმა, წარმტაცი და საოცნებო პოეზიაა, რომ ავტორი მსოფლიო პოეტებს ეტოლება, უთანასწორდება. გარეგანი ფორმა, ენის მხატვრობა, ლექსთაწყობა, მუსიკალობა და აზრი ისე შეწყობილი, შეზომილი და შეთანხმებულია ერთმანეთში, როგორც მარმარილოს უკვდავ ქანდაკებაში. ეს მახინჯი, ჭუჭა ტანის, ფეხებდარაკვილი და თმაგაბურძგენილი ნაყოფი ხალხის შეშინებული წარმოდგენისა, პოეტმა გადააქცია ისეთ მშვენიერ, მომხიბლავ, ტურფა და თმახშირ კლდის ქალად, რომელსაც უმწერ სულიერის ნეტარებით აღტაცებული და თვალი ვერ მოგიშორებია.

ამ ლექსში იხატება პოეტის ნიჭის ერთი თვისება—სიმბოლიზმი. სიმბოლიზმი წარმოადგენს მთელ განსაზღვრულ მიმართულებას ევროპის ლიტერატურაში. ის დაიწყო პირველად საფრანგეთში და შემდეგ გავრცელდა ევროპაში.

სიმბოლიზმი მწერლობაში მეტად რთული მიმდინარეობაა და მასში მრავალი სხვადასხვა მცნება იყრის თავს.

სიმბოლისტებს უწოდებენ მათ, ვინც სრულებით უარპყოფს ცხოვრებას და მხოლოდ თავისი ოცნებიდან იღებს სახეს თავისი პოეზიისათვის. სიმბოლისტებს უწოდებენ მათ, ვინც პოეზიის ფორმას, სტილს აქცევს მთელ ყურადღებას და არა აზრს. სიმბოლისტებს უწოდებენ მათ, ვინც ყოველივე ჩვეულებრივს უარყოფს და თავისი პოეზიის საგნად არაჩვეულებრივს იღებს. სიმბოლისტებს უწოდებენ მათ, ვინც მკაფიო, გამოკვეთილ, ყველასათვის ადვილად გასაგებ აზრს უარყოფს და პოეზიაში გამოსთქვამს ბუნდოვან აზრს, რომელიც ყოველ მკითხველს თავისებურად ესმის. სიმბოლისტი ეწოდება მასაც, ვინც რაიმე განყენებულ აზრს, ან მოვლენას განსაზღვრულ სახეში ჩამოასხამს, გამოჰხატავს.

ალი, კლდის ქალი, ნამდვილად არ არსებობს, კლდის ქალში ვაჟა-ფშაველამ გამოხატა, გადმოგვცა მთელი ცხოვრება, მთელი ბუნება მთებისა: წყლის ჩხრიალი მთებში, მთვარიანი ღამე, თოვლით დახურული მწვერვალების ელვარება შუქზე, ხევების ხმაური, სიო მთებში, ხეების რხევა, ფოთოლთ შრიალი, მთის მწვერვალთ ნისლი და ქედებზე დაფენილი ღრუბელი; ელევა და გრუხუნის, — ერთი

სიტყვით, მთელი ცხოვრება, მთელი ბუნება, მთელი სურათი მთებისა, ყველა მოვლენა ბუნებისა მთაში, მთელი პოეზია მთებისა ვაჟა-ფშაველამ გამოჰხატა ერთ სახეში — კლდის ქალში ანუ ალში.

#### IV

ბრტენი იყო და მდიდარი ეკლესიასტე. ყოველივე მას მორჩილებდა. ყველაფერი მის ხელთ იყო. მას არ გააჩნდა ისეთი სურვილი, რომლის განხორციელებაც არ შესძლებოდა. ქვეყნიური ბედნიერების, მსიარულებისა და სიამოვნების კარი მისთვის ფართოდ იყო გაღებული და ქვეყნიური ნეტარებისა და სიტკბოების ზღვაში გულმხიარული დანაწარდობდა. ყოველივე აუსრულდა, ყველაფერს მიაღწია. ყოველივე გამოსცადა, ყველაფერი იგემა და, როდესაც, ბოლოს, დაეკითხა თავის თავს: რა არის ქვეყანა, რა არის ადამიანის ცხოვრებაო? — ამოა ამოგებათა და ყოველივე ამოაო. აი, მოკლედ, პასუხი მთელი მისი განვლილი ცხოვრებისა, მისი განცდილი ნეტარებისა.

სამყარო, ბუნება, მეტად რთული საიდუმლოებაა, სიცოცხლე კი ერთობ წუთიერი. დროს დასასრული არა აქვს, სივრცე — საზღვარი. სამყაროს თავი და ბოლო, ჩვენი სიცოცხლე კი ელვასა ჰგავს, — გამოაშუქებს ერთს წამს და, სანამ ბუნების საიდუმლოებას ოდნეადაც მინც მივუახლოვდებოდეთ, ჩაქრება კიდევ.

ჩვენი დაბადება ჩვენ არ გვეკითხება, ჩვენი ნების, ჩვენი სურვილის გარეშე ვღებულობთ სახეს; ვცხოვრობთ, ვმხიარულობთ, ვიტანჯებით და ვკვდებით, ვქრებით, ვისპობით სამუდამოდ, როგორც საკურათი „მე“-ს მატარებელი პიროვნება და აღარასოდეს აღარ გავმეორდებით. დრო ივლის შეუჩერებლად. დაუსრულებლად; უსაზღვრო სივრცეში დაუსაბამო და უბოლოო ბუნება მრავალ ცვალებადობას განიცდის, ჩვენი შეგნება, ჩვენი „მე“ კი აღარასოდეს აღარ იქნება.

ფუი! რა სისულელეა სიცოცხლეო, ძალაუნებურად აღმოჰხდება ადამიანს. როცა ის ბუნების დაუსრულებლობას თავისი არსებობის წუთიერობას შეუდარებს.

სიკვდილის საშინელება იმაში კი არ მდგომარეობს, რომ „მე“ ისპობა სამუდამოდ, არამედ უფრო და განსაკუთრებით იმაში, რომ „მე“ ისპობა, ბუნების საიდუმლოებას ვერ იგნებს. ვიბადებით. მაგრამ რისთვის. არ ვიცით: ვცოცხლობთ, მაგრამ რისთვის, არ ვიცით: რა არის სიცოცხლე, საიდან მოვდივართ. საით მივდივართ, არაფერი ეს ჩვენ არ ვიცით და სიცოცხლე ისე მოკლეა, რომ ვერასოდეს ამას ვერ გავიგებთ.

დროთა შეუწყვეტელ და დაუსრულებელ დიხებაში ჩვენ მხოლოდ ერთ წამს ვახელთ თვალებს, რომ ჩვენი სრული არარაობა, ჩვენი ცხოვრების მისწრაფების. სურვილების, განზრახვების სიფუტქედენინახეთ და შემდეგ სამუდამოდ დავხუჭოთ თვალები.

ფუი: რა სისულელეა სიცოცხლე, ძალაუნებურად აღმოხდება ადამიანს. როდესაც ყოველივე ამას გაითვალისწინებს.

სასოწარკვეთილებაში მყოფ ადამიანს სარწმუნოება ევლინება მანუგეშებლად.

— ნუ გეშინია, ბუნების გარეშე ღმერთია დაუსაბამო და უბოლოო, მას ემორჩილება ყველაფერი.

— სიცოცხლე წუთიერი სრულებითაც არ არის, ეს მხოლოდ ასე გეჩვენება. მართალია, შენ თვალებითა ჰხედავ, მაგრამ თვალები რომ დაგიღებება, აბა მაშინ გექნება საუკეთესო მხედველობა! მართალია. შენ ყურადღებით ისმენ. მაგრამ ყურები რომ დაგიღებება, აბა მაშინ გექნება საუკეთესო სმენა! მართალია, შენ გულითა გრძნობ, მაგრამ გული რომ მოგიკვდება და დაგიღებება, აბა მაშინ უნდა უყურო შენი გრძნობების გაცხოველებას!

დაახლოებით ამგვარად ანუგეშებს სარწმუნოება ადამიანს. ადამიანსაც სჯერა დაუჭერებელი, სწამს უწამებელი.

სხვადასხვა სარწმუნოებრივ მოძღვრებათა უმეტესი ნაწილია ჰიზანს შეადგენს გამართლება, ახსნა და აზრისა და შეგნებული ნების შეტანა იმ სისულელეში, რომელსაც ადამიანის სიცოცხლე ეწოდება.

სარწმუნოებას არ შეუძლია სიცოცხლის ახსნა ღვთაებრიობის იდეის გარეშე.

მოსპეთ ის აზრი, ის იდეა, რომ ღმერთი არსებობს და მაშინ სარწმუნოება სრულიად უძლურია, სარწმუნოება უღვთოთ შეუძლებელია. ღვთაებრიობის იდეის წარმოდგენაში სხვადასხვა სარწმუნოებრივი შეხედულებანი შეგვიძლია დავყოთ ორ ნაწილად. ერთი ღმერთს აყენებს ბუნების გარეშე, როგორც უნივერსალურ გონიერებას და მას უმორჩილებს სამყაროს.

მეორე კი თვით ბუნებაში ხედავს ღვთის განსახოვნებას.

ნაკლი ორივეში დიდი, მაგრამ პირველი შეხედულება თანამედროვე ცოდნით აღჭურვილ ადამიანს სრულებით ვერ დააკმაყოფილებს. ჩვენ არ ვიცით, რა არის ბუნება, და გვინდა მისი ახსნა ბუნების გარეშე, თვით არსი ღმერთით. გვაფიწყდება, რომ ჩვენ არ ვიცით, რა არის. ვინ არის თვით ღმერთი და არც შეგვიძლია ამის ცოდნა; ის უფრო გაუგებარია, ვიდრე ბუნება, რადგანაც ბუნების შესწავლა

კიდევ შეიძლება, ღვთისა კი სრულებით არა, — ღვთისა მხოლოდ რწმენა შეიძლება.

ამგვარად, გაუგებარი ბუნების ასახსნელად ჩვენ ვქმნით იდეას გაუგებარივე ღვთაებრიობისა და საქმეს გაადვილების მაგიერ კიდევ უფრო ვაძნელებთ, რადგანაც ერთი გაუგებრობის ალაგას ხელთა გერჩება ორი გაუგებრობა.

სულ სხვაა მეორეგვარი შეხედულება. ის უარყოფს ღმერთს ბუნების გარეშე და ხედავს მას თვით ბუნებაში, ბუნების ყოველ საგანში, ბუნების ყოველ სხეულში, ბუნების ყოველ ნაწილში. ბუნების ყოველ მოვლენაში, ყოველ სახეში. მთელი ბუნება. ამ მოძღვრებით, თვით ღმერთია. ამიტომ ეწოდება ამ მოძღვრებას პანთეიზმი („პან“ — ბერძნულად ნიშნავს ყველაფერს. „თეოს“ კი ღმერთს). რისთვის დასჭირდა პანთეიზმს ბუნების გაღმერთება? ამით პანთეიზმს იმის თქმა უნდა, რომ ბუნება მკვდარი, უაზრო უნებო არსი კი არ არის, არამედ ცოცხალი, სულიანი, აზრიანი და ნებიანი. თუ დავეთანხმეთ ამგვარ აზრს, მაშინ მთელი ბუნება, მთელი სამყარო ახსნილია თქვენთვის. ახსნილია სიცოცხლის საიდუმლოებაც. მთელი ბუნება ცხოვრობს საკუთარი სიცოცხლით, ყოველი კერძო სიცოცხლე ნაწილია მსოფლიო სიცოცხლისა, ყოველი კერძო ნება ნაწილია მსოფლიო ნებისა, ყოველი კერძო აზროვნება ნაწილია მსოფლიო აზროვნებისა, ყოველი კერძო გონება ნაწილია მსოფლიო გონებისა. ბუნება უკვდავია, უკვდავია მსოფლიო აზროვნება, ამიტომ უკვდავია ყოველი კერძო აზროვნებაც. ყოველი პიროვნება, ყოველი „მე“ საკუთარ ზორციელ სახეს იცვლის სიკვდილის პროცესით, ხოლო ყოველი კერძო აზროვნება. როგორც არა ზორციელი ყოფა უკვდავია.

ვაჟა-ფშაველა, როგორც პოეტი, წმინდა წყლის პანთეისტი. სამყარო მის პოეზიაში სულიერი არსებაა, ის უკვდავია. ჰფიქრობს, გრძნობს და აზროვნებს.

სამყაროს ყოველი ნაწილი, ბალახი. ქვა სულიერი ქმნილებაა.

რაც კი რამ დაუბადია  
უფალს სულიერ-უსულო,  
ყველასაც თურმე ენა აქვს,  
არა ყოფილა ურჯულო.

ამ მხრივ ყველაზე უფრო საყურადღებოა ვაჟა-ფშაველას „გველის მჭამელი“.

მთელი სამყარო „გველის მჭამელში“ უნივერსალური. უკვდავი სამარადისო სულის განსახიერებაა. მკვდარი, უსულო არაფერი არ

არსებობს. ხე: ბალახი, ქვა, კლდე, წყალი ყველა ცოცხალი ქმნილებაა ყველა აზროვნებს, ყველა ფიქრობს. მინდიას ყვავილები, ბალახი ემუსაიფება, მინდიას ესმის ხის ტირილი, მისი გულისტკივილი, მინდიას ეყურება ჩიტების ენა.

ყოველი არსება მხოლოდ სხვადასხვა სახეა ზოგადი სულისა და ამკვარად, ყველა ქმნილებანი, ყველა სხვადასხვა არსებანი მჭიდროდ არიან ერთმანეთში შეკავშირებული და მსოფლიო სულში ერთიანდებიან.

სანამ მინდია გრძნობდა თავის თავს მსოფლიო სულში სულის ნაწილად. მისი ცოდნა, მისი გონიერება, მისი ძალა უსაზღვრო იყო.

მაგრამ მინდიამ უღალატა თავის რწმენას, შესწყვიტა კავშირი მსოფლიო სულთან და ერთბაშად დაჰკარგა ცოდნაც, ძალაც.

„გველის მჭამელში“ ვაჟა-ფშაველა მარტო პოეტი კი არ არის, ის არის პოეტი-ფილოსოფოსი და თავისი ფილოსოფიური ხელოვნებით უახლოვდება შილერს. ვაჟა-ფშაველა სწორედ იმგვარივე პანთეისტია პოეზიაში, როგორც შილერი.

1939 წ.

## სარწმუნოება სამოთხლოს სიყვარულისა

(გ. ორბელიანი)

მე რომ ზღაპრის მთხზველი ვიყო, ჩემს სიტყვას ასე დავიწყებდი: დედამიწის ერთ ტურფა, კეკლუც კუთხეს მზედედოფალი აცისკროვნებდა. მშვენიერება სულისა და ხორცისა მასში ერთიმეორეს შეტოლებოდნენ, შეწონებოდნენ, გონებით ის იყო ბრძენი, გარეგნობით ვით თვალწარმტაცი ქანდაკება. დიდებული მოქანდაკის მიერ მზის შუქიდან გამოკვეთილი. შეფე დაძაბუნდა, დასნეულდა. უამი სიკვდილისა მოუახლოვდა. დედოფალი საგონებელში ჩავარდა. მწუხარებაში მყოფმა მიიხედ-მოიხედა გარშემო და მხოლოდ მტრების გამოწვდილი ხელები დაინახა. საუკუნოობით ის ებრძოდა უსჯულოთ და აი, ახლა მათ უნდა ჩავარდნოდა ხელში — შეუძლებელია! მოკვდები, ვამჯობინებ! — იფიქრა დედოფალმა და ამ დროს თვალი მოჰკრა მდიმარე სახეს, მას მიეპყრო სევდით სავსე თვალები, — მე შენი მეგობარი ვარ, მოესმა დედოფალს ტკბილი სიტყვები. საერთო რწმენამ, საერთო მისწრაფებამ, სერთო მოწოდებამ დიდი ხანია შეგვეერთა, მომეცი ხელი.

დედოფლის სახე სხივმა სიხარულისამ გაუბრწყინა, გული იმედმა აღაფრთოვანა. სამეგობროდ გამოწვდილ ხელს ხელი ჩაჰკიდა.

ჩემი რწმენა, ჩემი არსება წაბილწვას გადურჩაო, უთხრა მან თავის თავს, მაგრამ მალე დარწმუნდა, თუ როგორ მოსტყუვდა. ცრუ მეგობარმა ვერაგულად მოჰკლა მეფე. დედოფალს ფავზე ვკორგვინი წააგლიჯა და სამკაულებად გადააქეთა, მშვენიერ ხელებზე ბორკილები დაადვა და თავისუფალი და ამაყი — მონად აქცია.

დედოფალს მრავალი შეილება ჰყავდა, ზოგი მეომარი იყო, ზოგი მეცნიერი. ზოგი ხელოვანი.

ცრუმეგობარმა მოიხმო ერთი მათგანი, ზეგარდმო ნიჭით ცხ-

ბული. ტანთ შემოსა ოქრომკედით მოქარგული სამოსელით, გული დაუმშვენა ჯვრებით. მხრები ჯინჯილებით და უთხრა:

დიდსა პალატსა თვალთ წარმტაცსა მე შენ აგიგებ, ვერცხლით, ოქროთი. წალკოტით მას გავაბრწყინებ. მოგრთავ ძვირფასის ძოწეულით, ძვირფასის თვალებით. რომ შენნი ტოლნი შენ გიმზერდენ შურის თვალებით! ოღონდ გიყვარდე.

— ჩემი აკვანი სხვა ნანაზე დედამ ურწია. — მიუგო ყრმამ.

— აბა მითხარი. რანაირი იყო დედაშენის ნანა, ან რა ხმაზე გიმღეროდა მამაშენი? — დაეკითხა წარბშექმუხვნით ცრუმეგობარი.

— ის ითქმის კაცად ქველად და ნათლად, ვინც თავის სამშობლოს ემსახურება. — მიუგო ყრმამ.

— მე შენ მოგეცი ახალი სამშობლო, ემსახურე მას და სამსახური ერთი ასად დაგიფასდება, — უთხრა ცრუმეგობარმა.

— არაგვისა და მტკვრის კიდედო, სამშობლო, თაყვანსა გცემ დილით და მზის ჩასვლით თაყვანს გცემ კიდევე. მე ერთი მაქვს სამშობლო. მთელი ჩემი არსებით. მთელი ჩემი ნერვებით, მთელი ჩემი გულის ძაფებით მხოლოდ ის მიყვარს, მეყვარება და ამ სიყვარულს საფლავში ჩავიტან. — მიუგო ყრმამ.

— უმადურო ადამიანო. — ბრაზით წარმოთქვა ცრუმეგობარმა და პირი იბრუნა.

უმადურმა ყრმამ კი ჩანგური მომართა, სიმები ცრემლით დანმა და ზედ დაამღერა:

დიდსა წარსულსა მომეალიც დიდი ექნება.

ჩემი სამშობლო, დანგრეული კვლავ აყვავდება!

ვინ იყო ეს ტურფა და მშვენიერი დედოფალი! ვინ იყო ეს ცრუმეგობარი?

ვინ იყო ეს უმადური ყრმა?

ტურფა დედოფალი, რომელსაც გვირგვინი ვერაგულად მოჰგლიჯეს თავზე. ჩვენი საქართველოა.

ცრუმეგობარი? მიმართეთ აკაკის, ილიას, დიმიტრი ყიფიანს და ისინი უკეთ აგიხსნიან.

უმადური ყრმა? ეს იყო ვახტანგ ორბელიანი.

ცრუმეგობარმა ყოველი ღონე იხმარა. რომ მისი გული მოეგო, მისთვის დედის ნანინა და მამის სიმღერა დაევიწყებინა, გენერალ-მაიორად გაზარდა. მთელი თერგის მხარე მას ჩააბარა, ე. ი. პატარა მეფედ დასვა. მაგრამ ვერავითარმა წყალობამ. ვერავითარმა ჯილდომ. ვერავითარმა ჯინჯილებმა მიაი გული ვერ შესცვალეს

და უმადური ქართველი გენერალ-მაიორის მუნდირშიაც უმადურ ქართველად დარჩა.

უსაშინელესი სისაძაგლე, უდიდესი ცოდვა, რომლის ჩადენაც კი ადამიანს შეუძლია, ეს თავისი ეროვნების უარყოფაა, თავისი დედაენის, თავისი ისტორიის დავიწყებაა. ეროვნება, სამშობლო ენა, სამშობლო ისტორია ვანტანგ ორბელიანისათვის წმიდათა წმიდა იყო, რომელსაც ის თავყვამს სცემდა, რომელზედაც ლოცულობდა და გენერალ-მაიორობა ათასჯერაც რომ მიეცათ, მისი გული დედინაცვლის ნანას ბანს ვერ მისცემდა. მშობელ საქართველოს ვერ უღალატებდა.

ჩვენ კი გენერალ-მაიორის მუნდირში კი არა, ბერის ანაფორასა და პრაპორშჩიკის ეპოლეტებში ვცვლით ჩვენს ეროვნებას, ჩვენს დედაენას, ჩვენს სამშობლოს, ჩვენს წმიდათა წმიდას!

ვინ იყო ვანტანგ ორბელიანი? შთამომავლობით წმინდაწყლის არისტოკრატი — მეფე ერეკლეს შვილიშვილი. აზრით, მისწრაფებით, იდეალთ წმინდა წყლის დემოკრატი. ხორციით ის აღმოცენდა უსამართლობის, ძალმომრეობის, ბორკილების ნიადაგზე. მისმა სულმა კი გააზღვია უსამართლობის და ძალმომრეობის ზღუდე. მიღეწმობლენა ბორკილები, ცხოვრების ქარიშხალში უშიშრად გადასტყორცნა თავისი თავი. თამამად გაჩერდა იმ ნავსაყუდარში. რომლის შესავალსაც აწერია: ძმობა და ერთობა საზოგადოებრივს ცხოვრებაში, ხალხის ნების ბატონობა პოლიტიკურს წყობილებაში.

საზოგადოებრივი ცხოვრება ბრძოლაა სხვადასხვა კლასთა შორის. ბრძოლაში ყოველი კლასის სული მჭიდროდ არის დაკავშირებული იმის მდგომარეობასთან; სული ანუ მისწრაფება, იდეალი ერთი კლასისა ან წოდებისა ერთია, მეორისა მეორე, მესამისა მესამე და სხვ. შეუძლებელია, რომ თავადაზნაურობა, როგორც მთელი წოდება, გაიმსკვალოს გლეხობის იდეალით, ისე, როგორც გლეხობა ვერ გაიმსკვალება თავადაზნაურული იდეალით. მაგრამ ის, რაც მთელს კლასზე ან წოდებაზე ითქმის, კერძო პიროვნებაზე არა ვრცელდება. ხშირად ესა თუ ის პირი თავის სულით თავის კლასს კი არ ეკუთვნის, არამედ სულ სხვას.

ისეთი სოციალისტები. როგორიც სენ სიმონი. ფურიე. რობერტ ოუენი. ფერდინანდ. ლასალი --- ბურჟუაზიის წრიდან გამოვიდნენ. თავის სულით კი ისინი სრულებით მოპირდაპირე კლასს ეკუთვნოდნენ. და ეს ასე რომ არ იყოს, კაცობრიობის პროგრესი გაცილებით უფრო ნელს ნაბიჯით წაუიღოდა წინ. როდესაც დაჩაგრულთა წრიდან გამოდიან ისეთი პირები. რომლებიც სულით დამჩაგ-



ვრელებს უერთდებიან, საზიზღარი და შემზარავია. ხოლო როდესაც დამჩაგვრელთა წრიდან გამოდიან ისეთი შვილები, რომლებიც უარპყოფენ თავისი წრის სულის სწრაფვას, დიდებული სანახაობაა, გრძნობის ამაღლევებელი, სულის დამატკბობელი სურათი. ასეთი სანახაობაა ვახტანგ ორბელიანი. ის გამოვიდა იმ წრიდან, რომლის, იდეალი იყო ბატონყმობა — წარმავალი სიმახინჯე და სულით შეუერთდა უკვდავებას, სამარადისო ქვეშარიტებას ძმობისა და ერთობისას.

ქრისტეს მცნება მას ენაზე კი არ ჰქონდა დაკოსებული მხოლოდ, იმ პირებსავე, რომლებიც სიტყვით ქრისტეს ემსახურებიან და საქმით კი ჭალათს და ეშმაკს, ქრისტიანული მოძღვრება მას ძვალ-რბილში ჰქონდა გამჭდარი და ყოველი მისი ქადაგება ამ მოძღვრებიდან გამომდინარეობდა. სიყვარული და თანაგრძნობა ყველასადმი, ძმობა და ერთობა, თანასწორობა და სრული თავისუფლება. აი, იდეალი ვახტანგ ორბელიანისა.

ძმობა და ერთობა პოეტის თვალში ცის მცნებაა. და მას ღრმად სწამს, რომ ადრე თუ გვიან ეს მცნება ადამიანთა შორის უსათუოდ განხორციელდება.

ვახტანგ ორბელიანს ქერივ-ოხერი და დავრდომილი ძმანი მუდამ თვალწინ უდგას და მისი შეხედულებით, კაცი მხოლოდ იმას ეთქმის, ვინც საქმით დავრდომილთ ეხმარება და ქერივ-ოხერთ ცრემლებს შეუშრობს.

კაცი ის არის,  
ვინც ოფლს მიწას ღვრის...  
და მუნით ნაყოფს აღმოაცენებს  
და იმ ტბილ ნაყოფს  
ქერივ-ოხერთ უყოფს  
და უშრობს მშვირთ ობოლთა ცრემლებს.  
კაცი ის არის,  
ვისაც გულს ესმის  
ციური სიტყვა: „ძმობა, ერთობა“  
და სიყვარულით  
აღსილის გულით  
დავრდომილ ძმათა მოეხმარება.

ერეკლე მეფის შვილიშვილი, თავადაზნაურთა წოდების წარჩინებული წარმომადგენელი, გენერალ-მაიორი და თერგის მხარის უფროსი უარყოფს თავისი წრის ნიადაგს და გლეხკაცის მდგომარეობაზე, იმის ქირ-ვარამზე ფიქრობს. და არათუ ფიქრობს, პოეტს ავალებს:

შეგვიყვანე გლეხივით სახლშია.  
იმათ ბაღში და მათ ვენახშია;  
დაგვანახვე, რით სწუხს, რით ხარობს გლეხი.

; ვახტანგ ორბელიანი სულით უზენაესი სამართლიანობისაკენ, უკმაყოფილო კემმაროებისაკენ მიისწრაფვის, ასეთი დიადი მიზნის განხორციელებად პოეტს საჭიროდ მიჩანია სრული თავისუფლება აზრისა.

ნუ დაუტყვევებთ კაცსა აზრსა,  
თუმც იყოს არა მცნებისა;  
დეე, მაღლა თქვას. წარმოთქვას, —  
მაშია ყოფა ნებისა.  
ღვთის ქმნილს გალა არ შეენის,  
რად იყოს ტყვეობაშია?  
ბევრით ჯობია სიკვდილი სიცოცხლეს გალიაშია.

დეე, აზრი ყალბი იყოს, მას მაინც სრული თავისუფლება უნდა ჰქონდეს დათმობილი, რადგანაც მასშია ყოფა ნებისა ე. ი. ცხოვრება საკუთარი ნების, საკუთარი სურვილის მიხედვით. ყოფა ნებისა სარჩულად დაედო პოეტის პოლიტიკურ რწმენასაც.

ვახტანგ ორბელიანს აქვს ერთი ლექსი, „დედოფალი“, რომელშიაც გატარებულია პოეტის პოლიტიკური რწმენა.

სადედოფლო მიმართავს მეფეს შემდეგი სიტყვებით: მეფეე, არაფრად მიჩს მე ჯდომაც მეფის ტახტზედა, თუ მის სიმაღლით არ გარდმოდის მაღლი ერზედა, და თუ გასურს ვიყო დედოფალი შენის ერისა. მაშ, ჯერ მას მიეც, რაც მისია — ყოფა ნებისა!

ნუ ანდობ შენს ერს, დიდო მეფეე, მძლავრთა მოხელეთ,  
შენი სამეფო შენ და ერმა ერთად განაგეთ.

ამგვარად, მძლავრი მოხელე ითხოვს მძლავრ მოხელეთა გამგებლობის სრულ გაუქმებას. საზოგადოებრივი ცხოვრების მოწყობა თავისი ნების, თავისი სურვილის თანახმად — ეს არის ხალხის თანშობილი, განუყრელი იმანენტური უფლება, პოეტის შეხედულებით, და საზოგადო საქმეს უნდა განაგებდნენ ერთად თვითონ ერი და მეფე. ერი განაგებს თავის თავს მის მიერ ამორჩეული წარმომადგენლების საშუალებით. და რადგანაც პოეტს მძლავრ მოხელეთა მმართველობა არა სწამს, აქედან, ცხადია. რომ პოეტი მომხრეა სრული პარლამენტარული მონარქიისა და ქადაგებდა ასეთ აზრებს მეოთხმოცე წლებში, როდესაც რუსეთში რეაქცია ფაფარაყრილი მძვინვარებდა ისე, როგორც დღეს; როდესაც ასეთი რადიკალური აზრები გვესმის შილერისაგან — გაიხსენეთ მისი მარკიზ პოზა „დონ კარლოსში“ — ჩვენ აღტაცებაში მოვდივართ, მაგრამ არ გვიკვირს. ში-

ლერი გამოვიდა დაბალი წრიდან და რა გასაკვირალია, რომ ის ამ წრის შესაფერის პოლიტიკურ წყობილებას ითხოვდეს. ხოლო როდესაც ჩვენ გვეუბნება მეფის შვილიშვილი, გენერალ-მაიორი და დიდი ბიუროკრატი: სიტყვასა და რწმენას სრული თავისუფლება უნდა დაეთმოს, ბიუროკრატიას უნდა ჩამოერთვას მართვა-გამგეობა და გადაეცეს ხალხს, რომელსაც სრული უფლება აქვს ისე მოაწყოს თავისი ცხოვრება, როგორც სურსო, ჩვენ არათუ აღტაცებაში მოვდივართ. განცვიფრებასაც განვიციდით ისე, როგორც რაიმე სასწაულის წინაშე და როგორც პეტრე მოციქულმა შესძახა ქრისტეს, როცა მისი ფერისცვალება იხილა, ჩვენც ისე მზადა ვართ შეეძახოთ პოეტს: ვახტანგ, ვახტანგ, რა ტკბილია შენი სიტყვა, რა სპეტაკი შენი რწმენა; რა იქნებოდა, რომ ყველა წარჩინებული, ყველა გენერალ-მაიორი, ყველა დიდი მოხელე შენს დიად სულს ცოტათი მაინც ზიარებოდა!

სილიადე ადამიანის ბუნებისა, დასაბამიდან შენ იყავი ხვედრი მხოლოდ რჩეულთაო, — ამბობს მორი, შილერის „ავაზაყებში“. სწორედ დიადი იყო ვახტანგ ორბელიანის ბუნება, ამიტომაც ის იყო რჩეული რჩეულთა შორის.

ყოველივე რაზედაც მე მიგითითებ ვახტანგ ორბელიანის პოეზიაში, ეკუთვნის რწმენის, იდეის სფეროს. ვახტანგ ორბელიანის რწმენა სპეტაკია. მისი იდეები დიდებული. პოეტი ეკუთვნოდა იმ წრეს. რომელსაც ყოველისფერი წარსულში ჰქონდა, მაგრამ პოეტი თავისი რწმენით, თავისი იდეალებით წარსულს კი არ ეკუთვნის, ის ეკუთვნის მომავალს, ბრწყინვალე მომავალს, როცა ხალხი თვითონ იქნება თავისი ბატონ-პატრონი, როცა ხალხი თვითონ მოაწყობს თავის ნებისამებრ ცხოვრებას, და ძმობას. ერთობას და თანასწორობას ტახტს დაუდგამს. დიდებულია პოეტი იდეის სამყაროში, მაგრამ ძალა მისი პოეზიისა განა აქ არის. ის შეუღარებელია, აგზნებული, ვით ცეცხლი, შეუპოვარი, ვით ქარიშხალი, მქუხარე, ვით მეხი, ანკარა ვით კლდის ნაკადი, წმინდა ვით ბავშვის ლოცვა, ტკბილი და მომაჯადოებელი. ვით ქალწულის კოცნა, ნაზათ მწველი, ვით სევდიანი მელოდია გრძნობის სფეროში.

ბუნებაში რომ გრძნობა არ არსებობდეს, სამარადისო სიცივის სუდარაში იქნებოდა ყოველივე გახვეული და მშვენიერება შეუძლებელი იქნებოდა. გრძნობა სულია მთელი ბუნებისა, ის თანჩაქსოვილია მსოფლიო ნივთიერებაში. ის ყველგან არის, ყველაფერში: ჰაერში. ღრუბელში, მზის შუქში, ბალახში, ყვავილში, წყალში ქვაში. გრძნობა შეადგენს ადამიანის ბუნების საუკეთესო, უმშვენიერეს სამკაულს. მიეცით ადამიანს ბევრით უფრო ამადლებული გონიერე-

ბა, ვიდრე დღესა აქვს და წაართვით გრძნობა. ის იქნებოდა შშრალი, ცივი, ვით ყინული, ვით ქვა, ერთფეროვანი, ვით უდაბნო. უსიხარულო, უდარდელი, ბუნება მას მობეზრდებოდა, ის კი ბუნებას. ყოველივე დიადი, ყოველივე მშვენიერი მოისპობოდა; მისწრაფება უკეთესისადმი ჩაქრებოდა. გონება მხოლოდ იკვლევს, ან უკეთეს შემთხვევაში, ხსნის, ფარდასა ხდის ცხოვრებას, გრძნობა კი ამშვენებს. ალამაზებს თვით ცხოვრებას.

მე შეუწყველად მწამს ადამიანისა და ცხოვრების შეუწყვეტელი გაუმჯობესება. სამოთხე, რომელსაც მორწმუნენი უსაზღვრო სივრცეში ეძებენ, როცა იქნება, აქ, ჩვენს დედამიწაზე დამყარდება. მაგრამ ყოველი წინადადგმული ნაბიჯი, მხოლოდ ბრძოლით მოაპოვება, წინმსვლელობა მარტო ბრძოლას კი არ ითხოვს, ითხოვს მსხვერპლსაც. ადამიანები თავის თავს მსხვერპლად სწირავენ, რომ უკეთესი მერძაი მოუპოვონ სხვებს. მათაც კი, ვასი „მეც“ ჭერ არ განახსოვნებულა. სიცოცხლის განწირვა სხვების საკეთილდღეოდ! გონების თვალსაზრისით რომ შეხედოთ ამ მოვლენას, რა სისულელეა! მთელს მარადისობაში, საუკუნეთა დაუსრულებელ ცელაში ერთხელ, ერთის წამით მოგეცა სიცოცხლე და იმის მაგიერ, რომ შენ იყო ბედნიერი, სხვისი ბედნიერებისათვის უნდა მოისპო ეს სიცოცხლე! მშრალი გონების სასწორზე ეს მხოლოდ სიგიჟეა.

გრძნობის საზომით კი ეს არის დიდებული, წარშტაცი, მომაჯადოებელი მოვლენა. რომლის წინაშეც ყოველმა მოკვდავმა მუზნლი უნდა მოიდრიკოს.

მარტო გონების ზეგავლენით ვერასოდეს ვერ შესწირავს ადამიანი თავს სხვათა კეთილდღეობას. გრძნობა კი ამგვარ მსხვერპლს წშირად სიხარულით, სიამოვნებით გამოაღებინებს ხოლმე ადამიანს.

და თუ არ დავივიწყებთ, რომ უმსხვერპლოდ წინამსვლელობა შეუძლებელია, მაშინ, ცხადია, გრძნობა რომ არ ამშვენებდეს ადამიანსა და ცხოვრებას და არ ეწეოდეს მათ წინ, ადამიანი თავისი განვითარებული გონებით ერთსა და იმავე ადგილს დაუწყებდა ტყეპნას. საუკეთესო უმშვენიერეს თვალს გრძნობის სფეროში სიყვარული წარმოადგენს.

სიყვარული ისეთივე ზოგადი, უნივერსალური მოვლენაა მთელს მსოფლიოში, როგორც, მაგალითად, მოძრაობა. ის აძლევს სიცოცხლეს ყოველივე ხილულსა და უხილავს უბრალო ბალახიდან, უკანასკნელი მღილიდან მოყოლებული. სიყვარული აკავშირებს ერთ სისტემაში მზეს, დედამიწას და სხვა ციკლებსო, ამბობს შილერი.

უმადლესი განსახიერება სიყვარულისა არის სიყვარული მამულისადმი. სიყვარული იგივე მსხვერპლია. რომელსაც ადამიანი სწი-

რავს, ყოველი მსხვერპლი ადამიანს აკეთილშობილებს, ამაღლებს.

არავითარ ძალას არ შეუძლია ადამიანის გაკეთილშობილება, გამშვენიერება იმდენად, რამდენადაც იმ მსხვერპლს, რომელიც მამულის სიყვარულში წარმოიშობა.

ყოველი ადამიანი თავის სამშობლოსთან, თანამემამულეებთან სისხლით, ხორციით არის შეერთებული, შეკავშირებული. შეკავშირებულია თავისი გონებით, რადგანაც მამულისა და ეროვნების ფარგლებში იფურჩქნება და ვითარდება ადამიანის გონება; შეკავშირებულია გრძნობით, რადგანაც მამულისა და ეროვნების ფარგლებში სწარმოებს სიყვარული, სიხარული, სევდა, მწუხარება. ადამიანი უშთავრესად იმით განირჩევა პირუტყვისაგან, რომ მას თავისი საკუთარი „მე“ აქვს და ამ „მეს“ შეგნება. ეს თვისება თანდაყოლილი კი არა აქვს ადამიანს, ის ნელ-ნელა ვითარდება ადამიანის გონებრივად განვითარებასთან ერთად. და ყოველი ჩვენგანის „მე“ ვითარდება, ისკვნება სამშობლოსა და ცხოვრების სამზღვრებში. ერთი სიტყვით: ყოველი ადამიანი ფიზიკურად და სულიერად, მთელი თავისი აზროვნებით. თავისი გრძნობებით. თავისი „მე“-თი სამშობლოსა და ეროვნებასთან მტკიცედ არის შეკავშირებული და მამულის სიყვარული ბუნებრივი და აუცილებელია და თან სტიქიური გრძნობაა.

უნდა უყვარდეს თუ არა ადამიანს თავისი მამული, თავისი ეროვნება? ამგვარი კითხვა თვითონ თავის არსებაში შეცდომას შეიცავს. ეს იმას ემგვანება, ვინმემ რომ იკითხოს, უნდა სუნთქავდეს თუ არა ადამიანი ჰაერით. ადამიანს არ შეუძლია, არ უყვარდეს თავისი მამული, თავისი ეროვნება. და თუ მაინც მოიპოება ამგვარი. რომელსაც მამული არ უყვარს ან ამ სიყვარულს მთელი ერის დამლუპველ მიმართულებაში ჰხედავს, ის უნდა ჩაითვალოს მხოლოდ დამახინჯებულ ადამიანად.

სიმახინჯე, როგორც ფიზიკური, ისე სულიერიც, არსებობს.

თვითონ ეს გრძნობა, რაც უნდა განვითარდეს ის, საზარალოა თუ არა ეროვნებისათვის ან მთელი კაცობრიობისათვის?

ვიდრე ამ კითხვაზე მიუვებდეთ, საჭიროა ვიცოდეთ, კეთილშობილი ადამიანი საზარალოა თუ არა ეროვნებისათვის?

თავისთავად ცხადია, რომ არა. ეროვნული გრძნობა ადამიანს მხოლოდ აკეთილშობილებს და ამიტომ ის ფრიად სასარგებლოა ეროვნებისათვის. კაცობრიობა ეროვნების გარეშე ფიქციანია, არ არსებობს. კაცობრიობა ეროვნებათა კრებულია და თუ ჭეშმარიტი სიყვარული მამულისადმი ეროვნების პროგრესს ხელს უწყობს, ის

ამით კაცობრიობის ინტერესებს ემსახურება, ვისაც თავისი ხალხი, თავისი ქვეყანა არ უყვარს, იმას კაცობრიობა საიდან ეყვარება!

ხოლო როდესაც ეროვნების ჩასაყლაპად მტერი არავითარ საშუალებას არ ზოგავს, მაშინ ამ გრძნობის გაღვიძება და გაძლიერება. ცეცხლად გადაქცევა უძლიერესი საშუალებაა ეროვნების გადასარჩენად. დეე, განვითარდეს და გაძლიერდეს ყოველ ჩვენგანში სიყვარული მამულისა, დეე, ყოველ ქართველ ოჯახს, ყოველ ქართველ მამას. ყოველ ქართველ დედას მამულის სიყვარული აუძგერებდეს გულს. დეე: ეს გრძნობა ცეცხლად იქცეს, მთელს ჩვენს მამულს მოედოს და ააგიზგიზოს, აანთოს ყოველი ჩვენგანის არსება. — მაშინ მტერიც ვერაფერს დაგვაკლებს და ყოველ განსაცდელს კაჟივით ავიტანთ.

თუ ამდენ ხანს შეეჩერდი მამულის სიყვარულზე, იმიტომ, რომ ეს გრძნობა ვახტანგ ორბელიანში უმწვერვალესად იყო განვითარებული. ვახტანგ ორბელიანი ხორცშესხმული სიყვარულია მამულისა. ის იმდენად მჭიდროდ არის ჩასკვნილი. შეხორცებული მამულთან, რომ მხოლოდ მამულით ფიქრობს, მამულით აზროვნებს, მამულითა გრძნობს, მამულით სუნთქავს, მამულით იტანჯება, მამულით ხარობს. ერთი სიტყვით, ის მხოლოდ მამულით ცოცხლობს, კიდევ მეტი. — ის მამულით არის პოეტი. ძლიერ გრძნობას სიყვარულისას რომ ადამიანის გაპოეტება შეუძლია, ამის საუკეთესო მაგალითი ვახტანგ ორბელიანია. დაივიწყეთ ის ნაწილი მისი პოეზიისა, რომელიც მამულის სიყვარულზეა აშენებული. მაშინ ვახტანგ ორბელიანი წარსდგება თქვენს თვალწინ უბრალო მოლექსედ, რომელსაც ბევრი კარგი, დიადი აზრი აქვს, მაგრამ პოეზია კი სუსტი. ხოლო როდესაც ამ მოლექსეს ჩანგს მამულის სიყვარული დაჰქროლავს და ააჟღერებს, თქვენ გესმით მძლავრი, ფიქრთაამშლელი, გრძნობათა აღმძვრელი, სევდისმომგვრელი, ცეცხლივით მწველი მელოდია ნამდვილი ხელოვანისა, ჭეშმარიტი პარნასელისა.

მამულის სიყვარული ვახტანგ ორბელიანმა ზეცამდის აამაღლა, სარწმუნოებად გადააქცია, მისი პოეზია ლოცვაა, ვედრებაა, გულის სიღრმიდან ამოხეთქილი და ცრემლით, ნალველითა და უზომო სევდით შეზავებული. როდესაც პოეტი მოგვითხრობს სამშობლოს წარსულსა და აწმყოზე, ის იმგვარისავე გრძნობით იმსჯელებს, როგორც ღრმადმორწმუნე ადამიანი ქრისტეს ვნებათა წარმოდგენით. ყოველისფერი, ცა, ვარსკვლავები. მთვარე, ყვავილი, სიმღერა — პოეტს მამულის წარსულს აგონებს.

რაც ფიქრს აწუხებს, გულს აკენებს  
და სულსა სტანჯავს.

წარსული პროექტის თვალში დიდებული ზღაპარია. მდიდარი ფა-  
ტაზია.

დღეს ყოველივე ეს განკრა და...  
ჩვენი ივერი, მშენებერი, არს სისხლის კალო,  
გმირთა აკლამი, გულსაკლავი და სავალლო.

საქართველო დაინგრა, დაეცა და პროექტის სევდის, პროექტის  
დაუშრეტელი ცეცხლისა და გოდების მიზეზიც აქ არის.

რა ვენა, ცოდვილმა, გულსა და სულს ცეცხლი მედება,  
რა საქართველო დანგრეული მომელანდება.

საქართველოს ნანგრევებზე პროექტმა ააშენა სარწმუნოება მამუ-  
ლის სიყვარულისა, ტაძრად მას თავისი გული დაუდვა და თვითონ  
სამშობლოს კირისუფლად აღიკვეცა.

მისი პოეზია გლოვია, მოთქმაა, გოდებაა მამულისა.

პროექტის ახალმა სარწმუნოებამ სძლია ძველს, ძველის საძიკვე-  
ლი შეარყია. ამდენად ძლიერია პროექტში სიყვარული მამულისადმი.  
მამულის სიყვარულით გატაცებული ის უარყოფს და გმობს ღმერთს:

გონება ხელოსი, გაშმაგებულს აზრი შერევა,  
სარწმუნოებას გულის კმუნვის ძალა ერევა.  
მაშინ, მოყვასნო, მზა ვარ, გვიხოთ, მითხარით ერთი:  
ნეთუ მართლა გწამთ, რომ არსებდეს და იყოს ღმერთი?  
თუ დაბადება სამყაროსი იყო მის ნება,  
და თუ ეს აზრი არ არს შტერთა და ცრუ ზმანება,  
თუ მართლა მნათობთ, ცას და ზღვათა, მათა და ეელებს  
თავის შუქითა, სიუხვითა ის აცხოველებს;  
თუ მან დაგებადა, მან გვცა გრძნობა, კჳა და ენა,  
თუ მან ეს ტყენი, ეს მდელიონი აღმოაცენა;  
თუ თვის ქმნილებას საზღვარი და კანონი მისცა,  
და სული საღმრთო და ცხოველი შთაბერა და სცა;  
თუ ქვეყანასა წესი მისგან მიენიჭების,  
თუ ნათელი არს და ნათელი კეშმარტების, —  
მაშ, საქართველო ასე მწარედ რისთვის დაემხო?!

თუ მხედველობაში მივიღებთ, რომ პროექტი ღრმად მორწმუნე  
ადამიანია, ამაზე მძლავრი სიყვარული მამულისა, ამაზე ძლიერი  
მსხვერპლი წარმოუდგენელია. როდესაც ადამიანი გმირულის თავ-  
განწირვით შეეწირება მამულს, ეს დიდებული სურათია, მაგრამ ამ  
მსხვერპლის სახით ხორცია, იღუპება ხორცი, დროებითი, წარმავა-  
ლა. ხოლო როდესაც ადამიანი თავის წმიდათა წმიდას, თავის სარ-  
წმუნოებას. თავის სულს სწირავს მამულს, ეს სათაყვანებელი სურა-  
თია. რადგანაც სულის უკვდავების განწირვაა მამულისადმი სიყვა-  
რულის საკურთხეველზე.

ყველაფერი, რაც კი პოეტს დიდებულ წარსულს აგონებს, მას სტანჯავს და პოეტი მთელი თავისი ოცნებით, თავისი გრძნობებით, მთელი თავისი სულით წარსულში გადადის, წარსულს დასტრიალებს თავს, ის ერთგვარი პანთეისტია. სამშობლო მან ღმერთად აქცია და ეს მისი ღვთაება — სამშობლო თავისი წარსულით ყოველგან არის, ყოველისფერშია; წყალთა დუდუნე, ციხის კოშკის ნანგრევი, მთა, ველი, ხევი, ქვა, წარწერა ყოველისფერი წარსულის დიდებას უამბობს პოეტს:

ჩვენს გულს უხმონი ბერს უამბობენ,  
რაც რომ ყოფილან,  
მაზედ უბნობენ.

აწყმოს, გულსაკლავსა და სავალალოს, პოეტი შორდება ისე, როგორც ილიას განდევნილი. თუ განდევნილი ღვთისმშობლის ხატს არ ამორებს თვალს, პოეტის ხატიც. ღვთისმშობელიც, მისი ღვთაება, მისი წმიდათა წმიდა სამშობლოა და ის სამშობლოს დიდებულ წარსულს არ ამორებს თვალს.

თუ განდევნილში ხორციელმა გრძნობამ ზეციური სილია, პოეტში მამულის სიყვარული თვით ზეციურ გრძნობასა სძლევს და ამ გრძნობას პოეტი ზეცას ააცილებს, ზეცაზე მალა აყენებს. თუ განდევნილს ხატის დასაყრდნობად შუქის სვეტი აქვს, პოეტის დასაყრდნობ სვეტს იმედი შეადგენს, რომელიც მას ტურფა ასულის სახედ მოევიწინება და ეუბნება:

გწამდესო, ღვაწლი მამაპაათ არ განჰქრებინან,  
გწამდეს, ეს შთენი დიდებულად კვლავ აღადგება...  
თქვენი სამშობლო, დანგრეული, კვლავ აყვავდება.

და მართლაც, ნუთუ ჩვენი დანგრეული სამშობლო აღარასოდეს აყვავდება? ნუთუ ქართველი ერი წელში ველარასოდეს გაიმართება? ნუთუ მერცხალი აღარასოდეს აღარ გადმოსძახებს მას, — გაზაფხული, გაზაფხულიო? არა, დანგრეულ სამშობლოს ჩვენზე სიყვარული ააყვავებს; მონად მოხრილს ქართველ ერს ჩვენი გული გამართავს წელში; გაზაფხულის მახარობელ მერცხალს ჩვენი გრძნობანი მოაფრენენ, მხოლოდ საჭირია, რომ მამულის სიყვარული ჩვენს პოეტსავეთ სარწმუნოებად გავიხადოთ.

დეე, ყვავ-ყორანნი თავს დასტრიალებდნენ მას; დეე, შავი ღრუბელი შემოერტყას მას გარშემო, დეე, ბნელი ძალები მის განადგურებას ცდილობდნენ, დეე, ვერაგობამ და მტარვალობამ ყველა უფლება წაგართვას, ვერავითარი ძალა ვერ წაგართმევს ერთ უფლებას, სამშობლოს სიყვარულს, ვერ წაგართმევს იმიტომ, რომ ეს

24. ო. გომართელი, ტ. I



უფლება ჩვენს გულშია ჩაქსოვილი. დეე, თავდაცვის ყველა საშუალება მოგვისპონ, — ვერავითარი ძალა ვერ მოგვისპობს ერთს საშუალებას: ზიზღს სამშობლოს მტერთადმი. მამულის სიყვარულით აღგზნებულნი და მის ორგულთადმი ზიზღით აღჭურვილნი კიდევ ბევრ შავ დღეს ავიტანთ, გავუძლებთ და ბოლოსაც არის, მაინც დაგვიდგება ის დრო დიდებისა, როდესაც მამულის ვნებით წამებულ პოეტს ალტაცებულნი ჩაეძახებთ საფლავში: პატარა კახის შვილიშვილო, შენი სამშობლო დანგრეული, კვლავ აყვავდა.

1909 წ.

## 6. ბარათაშვილის პიროვნება და მისი პოეზია

ნიკოლოზ ბარათაშვილი ის სახელია, რომელსაც მოწიწებით, თაყვანისცემით უნდა იხსენიებდეს ყოველი ქართველი, თუკი მას ქართველობისა შერჩენია რამე. ნიკოლოზ ბარათაშვილი ის პირია, რომლითაც უნდა ამაყობდეს ყოველი ქართველი. ვისაც კი ესმის, თუ რა არის ეროვნული სიამაყე.

ნიკოლოზ ბარათაშვილი ის სახელია, რომელიც ძლიერის სისპეტაკის სხივივით ანათებს ჩვენს შავბნელ ცხოვრებას და ყოველ ქართველს, რომელსაც კი თავისი სამშობლოს სვებედი აფიქრებს, აღონებს, უკიდურესი სასოწარკვეთილების დროსაც კი ამხნევებს და გულს იმედით უვსებს. — და მართლაც, უგულო, უსულო, უკულტურო ერი ნიკოლოზ ბარათაშვილს ვერ წარმოშობს, ამისთანა შილები მხოლოდ დიდბუნებოვან, დიდსულოვან და მაღალი კულტურის ერებსა ჰყავთ.

ბიოგრაფია პოეტისა მარტივია.

ის დაიბადა 1816 წელს, 22 გიორგობისთვის, შეძლებული თავადის ოჯახში. მამამისმა, მელიტონ ბარათაშვილმა, მთელი საცხოვრებელი ხელგაშლილობით და ბედოვლათობით გაფლანგა და სიბერის უამს სიღარიბეს ეწია. პოეტის დედა ეფემია, გრიგოლ ორბელიანის და იყო. რამდენადაც პოეტის მამა იყო მკაცრი, ფიცხელი, ჭიუტი და გაუტეხელი ხასიათისა, იმდენად დედა იყო გულკეთილი, მშვიდი და წყნარი. პოეტი ხასიათით ძალიან ბევრით წააგავდა თავის დედას.

წერა-კითხვა პატარა ნიკოს დედამ ასწავლა. შემდეგ ის მიიბარეს კალოუზნის სამრევლო სასწავლებელში; აქიდან ის გადავიდა კეთილშობილთა სასწავლებელში, რომელიც 1830 წელს გიმნაზიად გადააკეთეს.

პატარა ნიკო მეტად მხიარული, ნიჭიერი და მასთან ცელქი იყო. რამდენადაც მას სწავლაში ემადლიერებოდნენ მასწავლებლები, იმ-

დენად ყოფაქცევისათვის ემდუროდნენ. ერთხელ ნიკო კიბიდან დაგორდა და ორივე ფეხი მოიტეხა. თუმც ფეხები მოურჩა, მაგრამ საკოპლე მანაც ემჩნეოდა. უმთავრესად ამან შეუშალა პოეტს ხელი და სამხედრო სამსახურში ვეღარ შევიდა.

ლექსების წერა პოეტმა სასწავლებელშივე დაიწყო; ის მონაწილეობდა რუსულ ხელნაწერ ეურნალში. რომელიც მოსწავლეებს ეკუთვნოდა.

ვიმნაზიის კურსი ნიკომ დაასრულა 1835 წელს.

ერთადერთი ასპარეზი, რომელიც მაშინდელს ახალგაზრდობას იზიდავდა — უმთავრესად იმიტომ, რომ დროც იმგვარი იყო და სხვა ასპარეზიც არ არსებობდა — სამხედრო სამსახური იყო. ბარათაშვილსაც სამხედრო სამსახურში უნდოდა შესვლა, მაგრამ მამა წინააღმდეგი გაუხდა, უმთავრესად იმიტომ, რომ ფეხი არ უვარგოდა. თუმცა ნიკო თავისას არ იშლიდა, ამბობდა: ფეხები კარგი მაქვს, რადგანაც ჩემებურად კიდეც დავხტი, კიდეც ვთამაშობო.

მამინ ბარათაშვილმა დააპირა უნივერსიტეტში წასვლა, რადგანაც, თუ „სტატსკი ვიყო, ბარემ ვიყოვო“, მაგრამ აქ მშობლების უსახსრობამ შეუშალა ხელი. პოეტი იძულებული გახდა, სამსახურში შესულიყო, რომ თავი ერჩინა და მშობლებსაც დახმარებოდა.

სამსახურში პოეტი მეტად მხნე და შრომისმოყვარე იყო. ამისათვის საუკეთესო მოხელედ ითვლებოდა.

1845 წელს ის დანიშნეს მაზრის უფროსის თანაშემწედ განჯაში. სადაც ის 9 ღვინობისთვის გარდაიცვალა. პოეტი დაასაფლავეს განჯაში საყდრის გალავანში და ამგვარად აღსრულდა მისი წინასწარმეტყველება:

ნუ დავიმარხო ჩემსა მამულში,  
ჩემთა წინაპართ საფლავებს შორის!

1893 წელს 25 აპრილს პოეტის ნეშთი გადმოასვენეს თბილისში და მიწას მიაბარეს დიდუბის ეკლესიის ეზოში.

საზოგადოებაში ბარათაშვილი მხიარული კაცი იყო. ქეიფი, ლხინი, დროსტარება, ცეკვა-თამაში, მითქმა-მოთქმა, არშიყობა და ზანდაზან კორიკანობაც მას ძალიან უყვარდა. სჯა-ბაასში ის მეტად ოხუნჯი იყო, სიტყვამოსწრებული და ენაგესლიანი; მისი გესლიანი ენა განსაკუთრებით ქალებს ხვდებოდა ხოლმე.

აი, ერთი მაგალითი.

„დიახ, ნურავის მოვაგონდები! — სწერს ის მაიკოს ერთ წერილში. — იმისი არ იყოს, როგორც ერთ ქალს უბრძანებია: რომ აქ მოგვწყინდნენ და გავყარეთო! ეგეც ეგრე იყოს, მაგრამ მე ეს ვიცი

რომ ჩვენ წელს ოცდაექვსისა შევსრულდით და წინაც ჯერ ბევრი სუგეში და სიამოვნება გვიძევს! ვაი, იმის ბრალი, ვინც ოცდარვა წლისაა და აღარც არაა ამ სოფლის ემყოფილებას მოელის!“

პოეტის ერთ-ერთ განსაკუთრებულ თვისებას იუმორი შეადგენს. ძლიერი სულიერი ტანჯვის, მარტოობისა და სევდის დროსაც კი იუმორი პოეტს არ შორდებოდა.

„ჩვენს დიდ პლატონს, — სწერს ის ერთ წერილში, — ძილში კატა დაჰწოლოდა ბაკენბარდზე და ასე გაეთელა, რომ ველარას გზით კერ გაუსწორებია. ეს ერთი ბაკენბარდი ისე გათელილი დარჩა: ვურჩიეთ, რომ მოიპარსოს, მაგრამ არ გვიჯერებს. ეს აკლდა მის ფილოსოფიურ სახეს“.

ხასიათით პოეტი წმინდა წყლის რომანტიკოსია. საზოგადოება მას იმდენად უყვარს, რამდენადაც მას თავდავიწყება, გამხიარულება შეუძლია. სხვა დროს მისი საუკეთესო მეგობრები მთვარე, საღამო, მტკვრის დუღუნის და სასაფლაოა.

«Дай мне маленькое, независимое состояние, — სწერს ის ერთ მეგობარს რუსულად, — я бы сейчас оставил и света людей с их ненасытностью и мирно и покойно провел бы патриархальную жизнь в лоне простой природы, столь величественной и прекрасной в нашем отечестве».

გულით პოეტი მეტად კეთილი და პატიოსანი იყო. მტრობა და სიძულვილი მის გულში დიდხანს ვერ იკიდებდა ფეხს. მეგობრისათვის არაფერს ის არ დაიშურებს. მაშინ, როდესაც მის გარშემო ქეიფისა, არშეიყობისა და ჭორიკანობის მეტი არაფერი იყო, ბარათაშვილის გონება ისეთ კითხვებს არკვევდა, როგორც მიზანი ადამიანის ცხოვრებისა, ადამიანის დანიშნულება, მსოფლიოს დასაბამი და დასასრული და სხვ.

მე შენსა მკვრეტელს მავიწყდების საწუთროება...

გულისაჟმა ჩემი შენს იქითა ეძიებს სადგურს! —

ეუბნება პოეტი ცას!

პოეტი მეტად გულჩათხრობილი იყო. ის მხოლოდ ერთადერთ მეგობარს მაიკოს ჩაახედებდა ხოლმე თავის გულში ხანდახან.

პოეტი მეტად შრომისმოყვარე იყო და სიზარმაცე ძალიან სძულდა. თუმცა სამსახური მას არ იზიდავდა, მაგრამ რაკი ხელი მოჰკიდა. საქმის სინდისიერად და ერთგულად ასრულებას თავის მოვალეობად სთვლიდა.

ზნეობრივ ცხოვრებას პოეტი მალა აყენებდა და ზნეობის აღზრდას, შემუშავებას დიდ მნიშვნელობას აძლევდა.

ბარათაშვილი მორწმუნე კაცი იყო და უზენაესი შემოქმედის

არსებობა მას შეურყევლად სწამდა, ყოველივე სოფელში ღვთის ნებააო, სწერს ის ერთ წერილში. პოლიტიკური სფეროს პოეტი განუსაზღვრელი, თვითმპყრობელი მონარქის მომხრე არ იყო. მისი შეხედულებით, „მარადის ერსა ეკუთვნის გულისთქმა მეფის“.

როდესაც წაიკითხავთ ბარათაშვილის წერილებს, თვალწინ დაგესახებათ მხიარული, ხუმარა, მოქეიფე, მოარშიყე, ოხუნჯი ახალგაზრდა. თუ ამ ახალგაზრდას დროდადრო სევდა ეწვევა ხოლმე, რა ვუყოთ! ვინ არის ისეთი გულის პატრონი, ან იმგვარ ბედნიერ ვარსკვლავზე დაბადებული, რომ იმის გულს ხანდახან სევდა არ შემოაწვეს ხოლმე!

ხოლო როდესაც კითხულობთ მის ლექსებს, სულისკვეთება, სევდა, მწუხარება, სულის ობლობა, კვნესა გულისა, მარტოობა, განუშორებელი კაეშანი, დაკოდილი, მოკლული გული, უდაბნო, წყვილიადი, ამაოება, — აი, რა გესმით როდესაც თქვენ ჩაუკვირდებით ნიკ. ბარათაშვილის პოეზიას. თქვენს თვალწინ იშლება საშინელი სულიერი ტანჯვა მიუსაფარი მწირის, ჭკუით ურწმუნო, გულით უნდო, სულით მსახვრალი ადამიანისა, რომელსაც მამაცა ჰყავს, დედაც, დებიც, მრავალნი მონათესავენი და მაინც კიდევ ვერვის მიჰკარებია, მაინც კიდევ ობოლია ამ სავსე და ვრცელს სოფელში, რომელსაც სიცოცხლე მოსძულებია ამდენის მარტოობითა და ტანჯვით.

სადაც უნდა იყოს პოეტი, რასაც უნდა აკეთებდეს, ვარდს შეჰხაროს ის, ცას, საღამოს, ბუნებას, ჩონგურს უსმენს, თუ სიყვარულს ითვალისწინებს, ყოველგან ფიქრი ამაოებისა თან დასდევს მას შავი ყორანივით და მისი ვარდი გაფურჩქვნისთანავე სტკნება, მისი მხიარულება განსახვისთანავე სევდად იცვლება, მისი ღიმილი ტუჩებზედვე ხმება.

ერთი მხრით, მხიარულება, დროსტარება, ცეკვა, თამაში, არშიყობა, ქეიფი, ოხუნჯობა, ჭორიკანობა; მეორე მხრით, სევდა, ტანჯვა, მარტოობა, ობლობა, საშინელება ამაოებისა, სიცოცხლისადმი სიძულვილი და ყველა ეს წინააღმდეგობა, ყველა ეს ერთიმეორის უარყოფა ერთსა და იმავე დროს ერთსა და იმავე ადამიანში!

ერთი მხრით, მხიარული, ოხუნჯი, მოქეიფე, მოარშიყე ახალგაზრდა, მეორე მხრით, ჭკუით ურწმუნო, გულით უნდო, სულით მსახვრალი, მიუსაფარი მწირი, რომლის გულსაც ნეტარება არ ასაღარებს, მის ნაცვლად სევდა და წყვილიადი დაისადგურებს. და ორივე ეს სრულიად სხვადასხვა ადამიანი ერთსა და იმავე პიროვნებაში!

რით აიხსნება ასეთი გასაოცარი მოვლენა? რამ გაპყო, რამ გააპო პოეტის პიროვნება ორ სხვადასხვა არსებად? შეიძლება პოეტის

ცხოვრებაში ისეთი რამ მოხდა, რამაც მას სამუდამოდ დაუყოლა, დაუსევდიანა გული?

პოეტი იყო ერთ ხანს უიმედო სიყვარულით შეპყრობილი, მაგრამ ამ მხრით მან სძლია თავის გულს. პოეტს არ აუსრულდა თავისი საწადელი: ვერც სამხედრო სამსახურში შევიდა, ვერც უნივერსიტეტში წავიდა, მაგრამ ამ გარემოებამ პოეტი პირველ ხანებში დაალონა მხოლოდ, შემდეგ ის დაუმორჩილა ბედს, როგორც თვითონვე სწერს ერთ წერილში, თავი თავისი ხელმწიფეობას და საზოგადოებას შესძლენა და გულმოდგინედ შეუდგა სამსახურს.

ექვი არ არის, საპირადო უსათუოდ ურევია პოეტის სევდაში, მაგრამ განა შეიძლება ბარათაშვილის უნივერსალური სევდის ახსნა საპირადო მოტივებით? უიმედო სიყვარული, პატარ-პატარა უსიამოვნება ცხოვრებაში, უიღბლობა სამსახურში — ეს ხომ წვეთია იმ ზღვაში, რომელსაც ბარათაშვილის სულიერი დრამა ეწოდება ბარათაშვილი არ ყოფილა იმგვარი ბუნების ადამიანი, რომ საკუთარი კეთილდღეობა მთავარ მიზნად დაესახა და საკუთარ უიღბლობას დაენტო მასში ის ჯოჯოხეთი სულიერი ტანჯვისა და წამებისა. რომელსაც ის თავის გულში ატარებდა.

მაშ, რით აიხსნება ასეთი გასაოცარი მოვლენა? შეიძლება, პოეტმა ისეთი რამ ჩაიდინა, რისთვისაც მას სინდისი სტანჯავდა ამის პასუხს თვით პოეტივე გვაძლევს. „ნუთუ ხმა ესე არის ხმა დევნისა შეუწყალისა სინდისისა?.. მაგრამ მე ჩემში ვერ ვპოვებ ავსა, მის საშფოთველოს და საქენჯნავსა!“ მაშ, რით აიხსნება ასეთი გასაოცარი მოვლენა! რამ გააპო ბარათაშვილის პიროვნება ორ სრულებით სხვადასხვა ადამიანად?

„თუ ფიქრობ, ასეთს რას იფიქრებ, რომ ბოლო არა ჰქონდეს, ასეთს რას მიიღებ, რომ არ დაკარგო? მიჩვენე კაცი, რომ მადლიერი იყოს ამ წუთის სოფლისა“. — სწერს პოეტი თავის დას მაიკოსა.

«Непостижимость цели нашего назначения, безграничность желаний человеческих и суета всего подлинного наполнили душу ужасной пустотой».

წერს პოეტი მეორე წერილში.

მიწიერი პოეტის თვალში ყველაფერი მხოლოდ ამოებაა.

აქედან ცხადია, რომ პოეტი თავისი ფილოსოფიური შეხედულებით პესიმიტი — გულგატეხილი იყო. ცხადია, ამგვარი შეხედულების ადამიანი უფრო მეტს ითხოვს ცხოვრებისაგან, ვიდრე სხვა; მას არ დააკმაყოფილებს ის, რაც სხვისთვის სრულებით საკმარისია.

პოეტის გარშემო ცხოვრება რომ ასეთი ყოფილიყო, რომ მას სულიერი კმაყოფილება მცირეოდენად მაინც მოეპოებია, მისი პოე-

ზიაც შეიძლება არ ყოფილიყო იმდენად გამსჭვალული უსაზღვრო, უნუგემო სევდით, მაგრამ პოეტის გარშემო ისტორიული საზოგადოებრივი ცხოვრება ისე მოეწყო, რომ პოეტის ფილოსოფიური პესნიმისში ჭაიფურჩქნა და მისი გული ააკენესა, სული სევდით შემოსა.

ბარათაშვილის გარდაცვალების შემდეგ ლევან მელიქიშვილი წერდა გრიგოლ ორბელიანს: „საქართველომ დაჰკარგა მასში კაცი, რომელსაც იგი უყვარდა მთელის პოეტურის გულით და რომელიც ამ სიყვარულს ყველა თავის მოვალეობაზე მალა აყენებდა“. თუ ერთი საიდუმლოება ბარათაშვილის სევდისა თვით მისსავე ფილოსოფიურ მიდრეკილებაშია, მეორე საიდუმლოებაც აი, ამ სიყვარულში უნდა ვეძიოთ.

უსაზღვრო და მასთან უნუგემო იყო პოეტის სიყვარული მამულსადმი; უსაზღვრო, უნუგემო იყო ამიტომ მისი სევდაც.

განა სხვებს კი არ უყვარდა იმ ღროს საქართველო?

ღიას, უყვარდა, მაგრამ ბარათაშვილი ზეგარდმო ნიჭით იყო ცხებული, მას უყვარდა საქართველო მთელის თავისი პოეტურის გულით, მთელი თავის პოეტურის ნერვებით, მთელის თავის პოეტურის ოცნებით, მთელი თავის პოეტური გატაცებით, მთელი თავისი პოეტური ცეცხლით.

ბარათაშვილივით ღრმად, მძლავრად, მთელი არსებით, მთელი ნერვებით სიყვარული მამულისა ჩვეულებრივ ადამიანებს არ შეეძლოთ. ბარათაშვილივით ღრმად ვერაფერს ჩაიხედავდა სამშობლოს ცხოვრებაში, მასავით სრულად ვერაფერს გაითვალისწინებდა მის აწმყო ცხოვრებასა და ვერაფერს წარმოიდგენდა მის მომავალს. ამიტომ ვერც ვერაფერს დაიტანჯებოდა მასავით მძლავრად სამშობლოს ტანჯვით. განა მამულის სიყვარული ისეთი რამ არის, რაც ადამიანის აულს სევდითა და მწუხარებით ავსებს?

ღიას! გაუბედურებული, მოტყუებით შებორკილი და, როგორც მეორე პოეტი ამბობს, ჩაბალახადილი მამულის სიყვარული მხოლოდ სევდას იწვევს ამ მამულიშვილის გულში და ეს სევდა იმდენად უფრო უსაზღვროა, რამდენადაც უფრო ღრმად გრძნობს ადამიანი, რამდენადაც უფრო ძლიერია მისი სული. გრძნობათა სიღრმესიუხვე და სულის სიძლიერე ბარათაშვილს არ აკლდა, ჭარბობით კი სჭარბობდა.

საქართველომ მრავალ და საშინელ ქარცეცხლში გამოიარა და თავისი არსებობა, თავისი პიროვნება მაინც დაიცვა.

მრავალ ყმაწვილ კაცთ იმედთა ქართლისა,  
დასდევს აქ თავი მამულისათვის.

და მამული მტერს არ დაანებეს, სხვას არ ჩაუგდეს ხელში ჩვენს წარსულში, როგორც ყოველი კულტურული ერის ცხოვრებაში, ბევრი რამ იყო ისეთი, რაც თანამედროვე შეხედულებით, თანამედროვე საზომით გასაკიცხია, დასაგმობია, მაგრამ ვის, რომელი ერის წარსულში იყო მართო ია და ვარდი! რომელი ერის ისტორიამ განახორციელა სრული ერთობა, ძმობა და თანასწორობა! სამაგიეროდ, ჩვენს წარსულში ბევრი რამ დიდებული იყო და საერთოდ, იგი დიდებული ტრაგიზმით არის სავსე.

სამაჰმადიანოსთან შეუწყვეტელი ბრძოლით მოქანცული ქართველი ერი მიენდო, თავის ნებით მიეკედლა ერთმორწმუნე რუსეთს და ის კი დაივიწყა, რომ, —

სახელმწიფოსა მსჯელის ერთობა არა რას არგებს,  
ოდეს თვისება ერთა მის შორის სხვადასხვაობდეს.

როდესაც ჩვენ გვეუბნებიან: ქართველი ხალხი ზეიმითა და დაფნალარით მიეგება რუსის ჯარს თფილისში შემოსევის დროსო, დიახ, სრული ჭეშმარიტებაა. მხოლოდ ეს ჭეშმარიტება მარტოოდენ იმას ჰღაღადებს, თუ რა იმედებით იყო ამ დროს აღჭურვილი ქართველი ერი, როგორის გულით უხვდებოდა ის რუსის ჯარს ან რას მოელოდა მისგან.

მაგრამ ის კი ჭეშმარიტება არ არის, რომ არ გასულა ამის შემდეგ დიდი დრო და უამი და საქართველოს სხვადასხვა კუთხეში აჯანყებამ, ამბოხებამ და შეთქმულებამ იჩინა თავი!

ახლა თქვენ თვითონ გაითვალისწინეთ სულიერი ტანჯვა, იმედების დამსხვრევა, სასოწარკვეთილება და სევდა იმ ერისა, რომელმაც იარაღი გვერდზე მიაყუდა იმ იმედით, რომ დავისვენებო, და მეორე დღესვე იძულებული გახდა, იარაღისათვის ხელი ეტაცნა, რომ თავისი პიროვნება, თავისი ადამიანობა, თავისი უფლებანი დაეცვა: ასეთი რეაქცია გამოიწვია მეფის იმპერიის ზედაფენების კოლონიურმა პოლიტიკამ.

თავისი იმედების დამსხვრევა, თავისი სასოწარკვეთილება, თადა ყოფილიყო განწირულის სულისკვეთება, კვნესა გულისა, სასოწარკვეთილება, შავი ფიქრები და სევდა იმ ერისა, რომელმაც დაინახა, რომ ის მოატყუეს, მოატყუეს ვერაგულად, რომელიც დარწმუნდა, რომ საკუთარის ხელით საკუთარი ყელი გამოიჭრა?!

თქვენ თვითონ წარმოიდგინეთ, რა უზომო, რა უსაზღვრო უნვისი სულისკვეთება, თავისი სევდა, თავისი ნალველი, თავისი კვნესა გულისა ქართველმა ხალხმა აჯანყებასა და შეთქმულებაში გამოხატა.

იგივე სევდა მამულისა, იგივე შავი ფიქრები, იგივე კვნესა გუ-



ლისა, იგივე განწირული სულისკვეთება მთელი ქართველი ერისა, საქართველოს საუკეთესო პოეტმა თავის გრძნობათა სიმებზე ასახა, საკუთარს გულში გაათბო, საკუთარის ცრემლით დააღბო, საკუთარის სისხლით შეღება, საკუთარ ნაღველში ამოავლო და მით მოქპარა თავისი პოეზია, — პოეზია ყოვლისფრის წარმავლობის, პოეზია მსოფლიოს ამოებისა, პოეზია ობოლის სულისა.

საქართველოს პოლიტიკურად სიკვდილმა პოეტს თვალწინ დაუყენა კითხვა მამულის ყოფნა-არყოფნისა. ეს კითხვა მთელის თავისი სიძნელე-საშინელებით პოეტის წინ იყო ამართული და რამდენადაც უფრო ძნელი იყო ამ კითხვის გადაწყვეტა, იმდენად უფრო ღრმა იყო ბარათაშვილის სევდა და სულიერი ტანჯვა.

როდესაც ქველი სოლომონი ეუბნება ირაკლის — რომე ქართველებს არად მიაჩნისთ უბედურება, თუ აქვთ თვის ჭერქვეშ თავისუფლებათ, ეს სიტყვები ნიკ. ბარათაშვილის სიტყვებია, ეს აზრი პოეტის აზრია, პოლიტიკური დამოუკიდებლობა, ბარათაშვილის რწმენით, უმთავრეს პირობას შეადგენს ერის კეთილდღეობისა და დიდებისათვის.

ამიტომ იხედება პოეტი წარსულისაკენ.

ყოველისფერი — მთვარე, საღამო, მთაწმინდა, მტკვრის დუღენი, ჩონგურის ხმა, პოეტს თვალწინ უყურებს სამშობლოს წარსულს.

წარსულთა დროთა მოგონებით  
სულს აფიქრებენ.

წარსული დიდებული იყო. ვითომ როდის და რაში არ ვყოფილვართ კარგით, თავმომწონედ წერს ერთ ალაგს პოეტი. პოეტს უყვარს ეს წარსული. წარსული პოეტის წმიდათა წმიდაა, მისი სამლოცველო, წარსული ის ტაძარია, რომლის შესახებაც პოეტი ამბობს:

მუნ გუნდრუკის წილ შეესწირავდი წმიდას სიყვარულს,  
რომლის საკურთხად დავსდებდი მე ჩემს გულსა და სულს.

არ გეგონოთ, რომ პოეტის იდეალი წარსული იყოს. არა პოეტი უპირატესობას აძლევს მშვიდ, მოქალაქეობრივ ცხოვრებას და სწავლა-განათლებას, მაგრამ წარსულში არის ის, ურომლისოდაც სამშობლოს დიდება და ბედნიერება პოეტს ვერ წარმოუდგენია, — ეს არის პოლიტიკური თავისუფლება.

მაგრამ წარსული განჭრა, განჭრა ტაძარიც.

პოეტს არ შეუძლია უტაძროდ ცხოვრება, მას აწყმომშიაც იგივე ტაძარი უნდა, მაგრამ ამაოდ.

ველარ აღმიგო სიყვარულმა კვალად ტაძარი!  
ვერსად აღვანთე დაშობილი მისი ლამპარი! —

ჩივის პოეტი.

რამდენი სევდა, რამდენი ტანჯვა, რამდენი კვნესა, რამდენი ნაღველი, რამდენი ცრემლი და უიმედობა, რამდენი სასოწარკვეთილება და უნუგეშობაა ამ სიტყვებში!

რატომ ველარსად ააგო პოეტმა ტაძარი?

რატომ ვერსად დაანთო მისი ლამპარი?

ამის პასუხს პოეტის „ფიქრნი მტკერის პირად“ გვაძლევს.

არ ვიცი ამ დროს ჩემს წინაშე ჩვენი ცხოვრება  
რად იყო ფუჭი და მხოლოდა ამაოება!

პოეტის თვალში აწმყო მხოლოდ ფუჭია და ამაოება. ამ გვარს ნიდაგზე კი რა ტაძარი აიგება?

რატომ არის აწმყო ფუჭი და ამაოება?

ერთი მხრით, იმიტომ, რომ საქართველომ დაკარგა თავისუფლება.

მეორე მხრით, იმიტომ, რომ თავისუფლების დაკარგვას თან მოჰყვა ქართველი ხალხის ზნეობრივად დაცემა, სულიერი დაქვეითება. „განა ქართველებში არის მეგობრული და ნათესავეური გრძნობა? — სწერს პოეტი მაიკოს ერთ წერილში, — ვინც მაღალი გრძნობების მექონი მეგონა, იგი ვნახე უგულო; ვისიც სული განვითარებული მეგონა, მას სული არა ჰქონია, ვისიც გონება მრწამდა ზეგარდმო ნიქად, მას არცა თუ განსჯა ჰქონია; ვისიც ცრემლი მეგონებოდნენ ცრემლად სიბრაღელისა, გამომეტყველად მშვენიერის სულისა, თურმე ყოფილან ნიშანნი ცბიერებისა, წვეთნი საშინელის საწამლავისა“. — წერს ის მეორე წერილში. ამას ამბობს პოეტი, რომელიც წარსულზედ გვეუბნება: „ვითომ როდის და რაში არ ვყოფილვართ კარგნიო“.

მოიგონეთ პოეტის სიტყვები:

ჰოი, დედანო, მარად ნეტარნო,  
კურთხევა თქვენდა, ტბილსახსოვარნო!  
რა იქნებოდა, რომ ჩვენთა დედათ  
სულიცა თქვენი გამოჰყოლოდათ!

ვინლა ჰყავს გულის შემატკივარი  
მამულს ასული ახლა თქვენგვარი?  
ქარმან ჩრდილოსმან ყველაზე პირველ  
გამოუცვალა მათ გული ცხოველ!  
ჯანი გაეარდეს აწ შვილსაც, მამულს,

ოლონდ ვამოთ ჩვენს საკუთარ გულს!  
რის ქართველობა, რა ქართველობა!  
ვითომ რას გვაენებს უცხო ტომობა?

საქართველომ მარტო თავისუფლება კი არ დაჰქარგა, მისი შვილები ზნეობრივად დაეცნენ, სულიერად დაქვეითდნენ.

და, აი სწორედ აქ იხადება პოეტის რომანტიზმი, მისი სევდა. მას უნდა განშორდეს ქალაქს. საზოგადოებას, სრულებით დაივიწყოს აწმყო, შეუერთდეს ოცნებით წარსულს, ბუნებას, მაგრამ ამაოდ, სევდა განუშორებლად თან დასდევს მას და პოეტის სული მკუდროებას ვერსად ჰპოულობს.

სად განისვენოს სულმა, სად მიიდრიკოს თავი! — სასოწარკვეთილებით გაიძახის პოეტი.

სამშობლოს უბედურებით გამოწვეული, პოეტის ფილოსოფიური პესიმიზმით განაყოფიერებული და იმის მგრძნობიარე გულში გაღვივებული სევდა თანდათან გადაიქცევა მსოფლიო მწუხარებად და ბარათაშვილის ნიჭის სიდიადეც სწორედ აქ აშკარავდება: ეროვნულს ნიადაგზე მან შექმნა მსოფლიო სევდით, საკაცობრიო გრძნობებით გამსჭვალული პოეზია.

ბარათაშვილის სიყვარული მამულისადმი იმის წერილებშიაც მკაფიოდ იხატება, პოეტს უყვარს, როდესაც სხვისგან ქართველების ქება ესმის. ამგვარი ქება იმის ეროვნულ გრძნობას ხიბლავს; თავმოყვარეობას ქართველისას უკმაყოფილებს.

მაგრამ ბარათაშვილი არ არის ბრმა თაყვანისმცემელი თავისი ერისა, ის უკვირდება ქართველ ხალხის სულიერ თვისებებს და არკვევს მასში პირუთენელად სხვადასხვა ნაკლს.

შორსმხედველობის უქონლობა, ხასიათის სისუტე, დაუდევრობა, სიზარმაცე, ერთმანეთის გაუტანლობა, აი ქართველების ნაკლი. პოეტის აზრით.

ამგვარია პიროვნება და პოეზია ნიკოლოზ ბარათაშვილისა.

მისი ტანჯვა მთელი საქართველოს ტანჯვაა. პოეტის გულის კვნესა მთელი საქართველოს გულის კვნესაა. ბარათაშვილის სევდა მთელი საქართველოს სევდაა, პოეტის ობლობა და მარტობა მთელი საქართველოს ობლობა და მარტობაა. პოეტის შავი ფიქრები მთელის ქართველობის შავი ფიქრებია. ბარათაშვილის სულიერი დრამა — მთელი ჩვენი მამულის სულიერი დრამაა.

ბარათაშვილი გულია საქართველოსი. საქართველოს უნუგეშობამ, ქართველი ხალხის სულისკვეთებამ, გულის კვნესამ და სევდამ ბარათაშვილში ჰპოვეს თავისი ნამდვილი გამოხატულება.

და დღეს საქართველოს განყენებულ იდეას რომ შეეძლოს ჩვე-

უღებრივის ადამიანურის ენით დალაპარაკება, იმავე სევდას, იმავე  
.ამაობას, იმავე ობლობას, იმავე განწირულ სულისკეთებას, იმავე  
გულის კენესას მოგვითხრობდა, რითაც გამსჭვალულია ბარათაშვი-  
ლის პოეზია.

ბარათაშვილის სევდა დღესაც შავი ზეწარივით გადაჰფარებია  
ჩვენს ბედკრულ სამშობლოს. ნუთუ არასოდეს არ გაიფანტება ის?  
ნუთუ არასოდეს არ შეიცვლება ის ბედნიერი ქართველი ერის მხი-  
არულ სიმღერად?!

1910 წ.

## მაცვალას გასამართლება

დამცველის, ივ. გომართელის სიტყვა

ბატონო მოსამართლენო და ნაფიცნო მსაჯულნო! ერთხელ უზენაესმა ზევსმა მოიხმო ჰერმესი და უბრძანა: წადი დედამიწაზე და გაიგე, როგორ ცხოვრობენ ჩემ მიერ გაჩენილი ადამიანები.

ჰერმესმა აასრულა უზენაესის ბრძანება, გასწია დედამიწისაკენ, მიიარ-მოიარა ყოველი მხარე, დაათვალიერა ყოველი კუთხე, ნახა ყველაფერი, დაბრუნდა ზენაართ საყოფს დანადგელიანებულის, წარს-დგა ზევსის წინაშე და სევდით სავსემ მოახსენა:

— ყოვლის შემძლებლო! ჩისტვის გააჩინე ადამიანი ამგვარი? ყოვლისფრისათვის, რაც ცხოვრებაში უკვდავია, მშვენიერი, რაც ადამიანს მხოლოდ ბედნიერებისაკენ ეზიდება, მას ფრთები შეუქვეცავს, საკუთარი გრძნობისათვის, აზრის და გონებისათვის მას ბორკილები დაუდევს და თავისი თავი მონად გაუხდია.

ზევის ჩაფიქრდა და შემდეგ დინჯად წარმოთქვა.

— მე გავაჩინე ადამიანი თავისუფალ არსებად და არა ჩემს მონად, მე ჩავუნერგე მას მისწრაფება უზენაესი, უკვდავი, ჭეშმარიტებისაკენ. დეე, ბორკილები უჭედოს მან ყოველისფერს, ისევე ადამიანი დაამსხვრევს ამ ბორკილებს და უკვდავ ჭეშმარიტებას ქვეყნად გაამეფებს!

მართლაც, ბ-ნო მოსამართლენო და ნაფიცნო მსაჯულნო, როდესაც მე თვალს გადავაველებ განვილილ ისტორიულ გზას და ვხედავ, რომ ის მთლად სისხლით არის მორწყული და მსხვერპლით დაფარული, გულის სიღრმიდან მწარე ოხვრა აღმომხდება ხოლმე; რად გაჩნდა, რად ადამიანი ამგვარი? მან ყოველისფერი შებორკა,—ყოველისფერს კლიტე დაადვა. თავისუფალი გრძნობა, თავისუფალი აზრი, თავისუფალი ცხოვრება მუხრუჭებში მოაქცია და, მაშინ, როდესაც მას შეეძლო სამოთხის დამყარება, ჯოჯოხეთი დაამკვიდრა.

მაგრამ მე როდესაც ვითვალისწინებ, რომ ისევე ადამიანი ამ-

სხვრევს ამ ბორკილებს, რომელსაც მე ვხედავ, რომ ისევ ადამიანი ათავისუფლებს თავის გრძნობას, თავის აზრს, მთელ თავის ცხოვრებას და ამგვარად, თუმცა ნელის, მაგრამ შეუჩერებელი ნაბიჯით მიისწრაფვის უკვდავი ქეშმარიტებისაკენ, გული იმედით შევსება და თავს ვეუბნები: დეე, ცხოვრება მძიმე ბრძოლა იყოს, მწარე ბრძოლა, პატიოსანი მებრძოლნი ნუ გამოიღვეიან და უკვდავი ქეშმარიტება, ბოლოსაც არის, გაიმარჯვებს, მწარე სინამდვილის ნანგრევებზე ის ტანტს დაიდგამს და საიმედო კეთილდღეობის დროშას ააფრიალებს.

თქვენს წინაშე, მოსამართლენო და ნაფიცნო მსაჯულნო, ერთი ამგვარი მებრძოლთაგანია...

მაყვალა ებრძოდა მთელი თავისი არსებით ადამიანთა მიერ შექმნილ უსამართლობას; თავისი ნაზი ხელებით ის ამსხვრევდა იმ ბორკილებს, რომლებიც ადამიანს თავისი გრძნობისათვის, თავისი გულისათვის დაუდვია.

არის ისეთი რამ ცხოვრებაში და ადამიანის გუნებაში, რასაც ბორკილები ვერას აენებს, ზიანს ვერ აყენებს, მაგრამ არის ისეთიც, რაც ბორკილებისათვის მეტად ნაზი, მეტად ფაქიზია და ყოველგვარ შებორკვას, დაბრკოლებას მსხვერპლით აძლევს პასუხს.

ამგვარი მსხვერპლი ყოველთვის და ყველგან სიბრალულს იწვევს. რა დანაშაულობაც უნდა მიუძღოდეს მას, მიტევების ღირსია, რადგანაც ქვეყნად არ არის ისეთი ცოდვა, ისეთი დანაშაულობა, რაც მსხვერპლით არ გამოისყიდებოდეს.

ადამიანის გრძნობათა შორის სიყვარულია, რომელიც ბორკილებს არ ემორჩილება, რომელიც ყოველგვარ ბორკილებშიც კი მაინც თავისუფალი რჩებოდა. როდესაც საზოგადოება ან ადამიანი ცდილობს ამ გრძნობის მონად ქცევას, სიყვარული მსხვერპლით თავდება.

აი, სწორედ ამგვარი მსხვერპლია მაყვალა, მსხვერპლი უწმინდესი, უმალლესი გრძნობის — სიყვარულისა.

თქვენს წინაშე, ნაფიცნო მსაჯულნო და მოსამართლენო, დგას ახალგაზრდა ქალი, რომლის მთელი ცხოვრება, თხუთმეტი წლიდან მოკიდებული, მხოლოდ დაუსრულებელი ტანჯვა-წვალება იყო. თუ ნაგის ბნელს შხამითა და ნაღვლით სავსე ცხოვრებაში მხოლოდ ერთი წუთით შემოუშუქებია სხივს ბედნიერებისა და ნეტარებისას, მხოლოდ იმიტომ, რომ შემდეგ ეს ბედისაგან განწირული არსება, წლობით დატანჯულიყო, წლობით წამებულიყო.

თქვენს წინაშე დგას ქალი, რომელსაც ბუნებამ ყველაფერი მისცა, რათა ბედნიერი ყოფილიყო: გარეგანი სიმშვენიერე, მტკიცე

ხასიათი, პატიოსნებითა და სიყვითთ ადვსილი გული და წრფელი წმინდა. ანკარა, ძლიერი გრძნობა სიყვარულისა.

თავისუფალი კლდეების თავისუფალი ქალი თითქოს დაბადებულ იყო იმისათვის, რომ ცხოვრების ბაღში მარტო ვარდები ეკრიფა. ცხოვრების მეჯლისში მარტო ნექტარი ესვა. ბედმა კი, ანუ უფრო, კაცთა ვერაგობამ, ისე მოაწყო მისი ცხოვრება, რომ ეგ მხოლოდ ეკალსა კრეფდა, ნექტარის მაგიერ შხამსა და ძიმწარეს სვამდა და ბედნიერების ნაცვლად დაუსრულებელ ტანჯვას მოიმიკიდა. ჩაუკვირდით ნაფიცნო მსაჯულნო, მის თვალებს. განა რაში, რაში უნდა დამდოთ ბრალიო, წაიკითხავთ შიგ, ნუთუ იმაში, რომ მე ძალით გამათხოვეს თხუთმეტი წლისა?

განა რისთვის უნდა გამკიცხოთ? ნუთუ იმისათვის, რომ ვერ შევიყვარე კაცი, რომელთანაც წრფელმა გრძნობამ კი არ შემაერთა, არამედ — კაცთა ძალადობამ?

რაში მდებთ ბრალს? ნუთუ იმაში, რომ ჩემს გულში გრძნობამ წრფელი სიყვარულის ტახტი დაიდგა?

ან იქნებ იმაში, რომ ეს გრძნობა სიყვარულისა ვერ ამოვირეცხე, ვერ ამოვიშალე ჩემი გულიდანო?

აი. რას გვეუბნება, ბ-ნო მოსამართლენო და ნაფიცნო მსაჯულნო, — მრავალტანჯული მაყვალას თვალეები, და მართლაც ამ მხრივ არათუ არაფერია საბრალმდებელო, პირიქით, მაყვალა სრული თანაგრძნობის ღირსია.

ქალი გაათხოვეს ძალით, მხედველობაში არ მიიღეს მისი გულისთქმა, ფეხქვეშ გათელეს მისი წრფელი გრძნობა, — თანაგრძნობის მეტი რა გვმართებს, ვინ იქნება ჩვენში ასეთი გულქვა?

მას უყვარდა მთელი თავისი ახალგაზრდა გულით, მთელი თავისი უმანკოებით, მთელი თავისი ახალგაზრდული სასოებით. თანაგრძნობის მეტი ვის რა გვმართებს, განა ვინ იქნება ასეთი გულქვა?

მან ვერ სძლია სიყვარული, ვერ ამოიგლიჯა გულიდან ეს გრძნობა. განა აქ რომელი თქვენგანი დასდებს მას ბრალს?

ან კი რად უნდა ამოეგლიჯა გულიდან ეს გრძნობა? ნუთუ სიყვარული ღირსი არ არის იმისა, რომ მას სრული თავისუფლება ჰქონდეს დათმობილი ადამიანის გულში? ადამიანთა საზოგადოებაში არ არის არაფერი, რისთვისაც სიყვარული, ეს უწმინდესი, უმშვენიერესი გრძნობა ადამიანისა, საზიანო იყოს, სიყვარული თავისუფალი უნდა იყოს და ყოველგვარი დაბრკოლება, რომელიც მას წინ ეღობება, მარტო პიროვნებისათვის კი არ არის საზარალო, არამედ — მთელი საზოგადოებისათვის. მაყვალას სიყვარული შებორკეს, შეზღუდეს, აწამეს, ჯვარს აცვეს.

სიტყვა თქვენ გეკუთვნით, ბ-ნო მოსამართლენო და ნაფიცნო მსაჯულნო, თქვენ უნდა გვითხრათ: სამართლიანად მოექცენენ მას, თუ უსამართლოდ. თქვენ უნდა გვითხრათ: ვის მხარეზეა ქვეშარიტება, — მაყვალას მხარეზე, თუ იმათ მხარეზე, ვინც მაყვალას სიყვარული ფეხქვეშ გათელა. რა დანაშაულიც უნდა მიუძღოდეს მაყვალას თქვენს თვალში, ნაფიცნო მსაჯულნო, მაინც თანაგრძნობის ღირსია, რადგან მას ამოქმედებდა წმინდა გრძნობა სიყვარულისა, სიყვარულს კი ყველაფრის გამოსყიდვა შეუძლია, რა დანაშაულიც უნდა მიუძღოდეს ბ-ნო მოსამართლენო და ნაფიცნო მსაჯულნო, თქვენს თვალში მაყვალას, მას თქვენ ვერ გააკიცხავთ, — მთელი თავისი ახალგაზრდობა, მთელი თავისი ბედნიერება, მთელი თავისი გრძნობანი მან მსხვერპლად შესწირა და თქვენ დამისახელეთ ისეთი დანაშაული მაყვალას მოქმედებაში, რის გამოსყიდვაც ამისთანა ქსხვერპლს არ შეეძლოს.

რატომ ყოველი ღონე არ იღონა მაყვალამ, რომ არ მისთხოვებოდა იმ კაცს, რომელიც მას არ უყვარდაო, ამბობს ერთი მუხლი ბრალდებისა. ნუ დაგავიწყდებათ, ბ-ნო მოსამართლენო და ნაფიცნო მსაჯულნო, რომ მაყვალა თხუთმეტი წლისა გაათხოვეს. მთაში ქალი უფრო მალე ვითარდებაო, გეუბნებათ ბრალმდებელი, მაგრამ რა განვითარებულიც უნდა იყოს თხუთმეტი წლის ქალი, მას მაინც ვერ მოსთხოვთ იმდენ გამჭირაბობას და სიმტკიცეს, რაც ხასიათდადინჯებულ, გონებადამჯდარ ადამიანს მოეთხოვება. თხუთმეტი წლის მაყვალამ გაბედა და უთხრა გელას: მე შენ არ მიყვარხარ, სხვა მიყვარს, ნუ გინდა ჩემი შეერთვაო, მაგრამ წას ძალა დაატანეს. მას მოერივნენ. ონისე რომ მთაში არ ყოფილიყო, დარწმუნებული ვარ, რომ მასთან გაიქცეოდა. ქალთან ვინც იყო, მას ყველა ძალას ატანდა. რა უნდა ექნა? არა, თქვენ ამისათვის ვერ გააკიცხავთ მაყვალას, მით უმეტეს ვერ გააკიცხავთ, რომ მაყვალა პირველ ხანებში შეურიგდა ბედს, მას სულითა და გულით უნდოდა ქვეშარიტი ცოლი ყოფილიყო გელასი, შეეყვარებია გელა, მაგრამ გელამ ყოველი ღონე იღონა, რომ მათ შორის ცოლ-ქმრული ანგარიში არ შეკრულიყო.

თუ მაყვალა გელას გაშორდა, ამის მიზეზი ის კი არ იყო, რომ მაყვალამ საკმაო საშუალება არ იხმარა, რათა გელას არ გაყოლოდა, არამედ გელას მოქმედება, გელას ხასიათი, გელას გარყვნილი ბუნება.

მაყვალას ცხოვრებაში მხოლოდ ერთი მომენტი, როდესაც მან, პირველი შეხედვით, ვერ გამოიჩინა საკმაო სისპეტაკე ზნეობისა. ეს გახლავთ მომენტი, რომელზედაც მიგითითათ ბრალმდებელმა. მაყვა-

25. ა. გომართელი, ტ. I



ლა ქმრის ოჯახში ცხოვრობდა და ამავე დროს მთელი თავისი არსებით, მთელი სულითა და ხორციით იმ დღიდან, რა დღესაც მაყვალა ონისეს ცოლად შეუერთდა, უნდა გაშორებოდა ქმრის სახლს, ამას მოითხოვდა ზნეობა, ამას მოითხოვდა სიყვარულის სიწმინდე. მაგრამ, ნაფიცნო მსაჯულნო და მოსამართლენო! გაითვალისწინეთ მაყვალას მთელი ცხოვრება. მისი ცხოვრება მარტო ტანჯვა კი არ იყო, წამება იყო, მისი ადამიანობის, მისი ყმაწვილქალობის ფეხქვეშ საზიზღრად გათელვა. მოიგონეთ მისი ქმარი გელა, ეს ვნებით, სქესობრივი ჟინით სავსე ადამიანი, რომელიც მაყვალაში მხოლოდ სქესს ხედავდა, მეტს არაფერს და თავისი კოცნითაც კი შეურაცყოფას აყენებდა. ყმაწვილი ქალის გული წმინდა სიყვარულისაკენ მიისწრფვოდა, ქმრის ვნებით ამღვრეული თვალები კი ყოველთვის ერთსა და იმავეს ეუბნებოდნენ: მე შენში ვხედავ მხოლოდ ჩემი ჟინის მოსაკლავ სქესობრივ მანქანას და სხვას არაფერსო, და მაშინ თქვენთვის ცხადი იქნება მაყვალას უკანასკნელი თავდავიწყებაც.

მაყვალას ბნელ ცხოვრებაში მხოლოდ ერთხელ შემოაშუქა ნეტარების სხივმა და მაყვალა გაჰყვა ამ სხივს, გაენდო გულისთქმას. ნუთუ ეს ზრულებით ბუნებრივი არ არის, იმდენადვე ბუნებრივი, როგორც ძილი ძლიერი დაქანცულობის შემდეგ?

ეს ერთადერთი მომენტი მაყვალას ცხოვრებაში სიზმარი იყო. ვწვენიერი, მომხიბვლელი სიზმარი. ნუთუ თქვენ გაკიცხავთ მაყვალას მხოლოდ იმისათვის, რომ მას სიზმარში აღარ გაახსენდა სინამდვილე და მერე რა სინამდვილე? რომელიც მას მხოლოდ ძირმწარესა და შხამს ასმევდა, რომელიც მის ადამიანობას ფეხქვეშ სთელავდა? თქვენ ასწონით ყველა გარემოებას. ბ-ნო მოსამართლენო და ნაფიცნო მსაჯულნო, და მიუტყევეთ მაყვალას ამ აუცილებელ თავდავიწყებას.

მაყვალამ მილაღატაო. გარწმუნებთ გელა.

მაყვალას ამგვარ მოქმედებას შედეგად მოჰყვა გელას ოჯახის დაღუპვაო. გეუბნებათ საბრალმდებლო ოქმი.

მე კი გეტყვით, რომ მაყვალას ქმრისათვის არ უღალატნია, რადგანაც მას ქმარი არ ჰყოლია; მაყვალას ოჯახი არ დაუღუპავს, რადგანაც მას ოჯახი არ ჰქონია.

მაშ, ვინ იყო გელა? ყველაფერი, რაც გინდათ და ვინც გინდათ. ხოლო გელა ქმარი არა ყოფილა, და თუ თქვენ მაინც ქმარს უწოდებთ გელას, ისიც მიბრძანეთ, რომელ თქვენთაგანს არ შერცხვება ამის შემდეგ ქმრის სახელის ტარებისა?

რა არის ქმარი? ის არის ამხანაგი, ის არის მეუღლე, ის არის ტოლი. რით, როდის, რაში დაამტკიცა, რით გამოხატა გელამ, რომ

ის მაყვალას ამხანაგი, მაყვალას ტოლი იყო? იქნება იმით, რომ ძალადობით შეირთო მაყვალა? იქნებ იმით, რომ მაყვალა გაშორდა გელას და გელამ მაინც ძალით მოიყვანა? ან იქნებ იმით, რომ ამხანაგური მოპყრობის ნაცვლად გელა ბატონად გაუხდა ცოლს და აწვალეზდა, ატირებდა? რა არის ღალატი ცოლ-ქმარს შორის? ქეშმარიტი ცოლ-ქმრობა ნებაყოფლობითი, ძალდაუტანებელი კავშირია. ამგვარი კავშირი გულისხმობს საურთიერთო პირობას ერთგულებისას. როდესაც ეს პირობა ირღვევა, იშლება კავშირიც. აი, ეს არის ღალატი. იქ, საცა კავშირი არ ყოფილა ნებაყოფლობით შეკრული და პირობა შეთანხმებით დადებული, არავითარ ღალატზე არ შეიძლება ლაპარაკი.

რა ნებაყოფლობითმა კავშირმა შეაერთა მაყვალა და გელა? როდის ან რომელ ერთგულებაზე შეპტიცეს მათ ერთიმეორეს?

გელამ იცოდა. რომ მაყვალას ის არ უყვარდა: გელამ იცოდა, რომ მაყვალას გული სხვას ეკუთვნოდა და მაინც შეირთო მაყვალა; ეს არის ცოლქმრული კავშირი? არა, არა და არა! მაშასადამე, ვერც მაყვალას მოქმედებას ვუწოდებთ ღალატს!

მიუხედავად იმისა, რომ მაყვალა ძალით მისცეს გელას, მაყვალა მაინც არ გადადგამდა იმ ნაბიჯს, რა ნაბიჯიც გადადგა, რომ გელა მოქცეოდა მას ადამიანურად, მაგრამ გელამ თავისი სახლი საროსკიპოდ გადააქცია. გელა ისე ეპყრობოდა მაყვალას, როგორც როსკიპს და თუ ამგვარ კაცს მაყვალა გაშორდა, ეს ღალატია?

გელამ უღალატა ადამიანობას, გელამ ზირქი მოსცხო ყველა ქმარს, გელამ შეარცხვინა ყველა მამაკაცი — აი, ის უნდა გააკრათ: სამარცხვინო ბოძზე, რომ ზედავდეს ყველა: თუ როგორი არ უნდა იყოს ქმარი და მაყვალა კი... მაყვალა ღირსია, ათასჯერ ღირსია, რომ ვუთხრათ: ვაშა შენს სულგრძელობას, ვაშა შენს მოთმენასო!

მაყვალამ თურმე ოჯახი დაღუპა, დაარღვია! მაგრამ მიჩვენეთ, სად იყო ეს ოჯახი? როცა კითხვა შეეხება ცოლქმრობას, მაშინ ოჯახი არის საძირკველი, ორი თანასწორი, ტოლი ადამიანის კავშირით გასკვნილი და სიყვარულზე დამყარებული. გელას ოჯახი განა ამგვარი ოჯახი იყო? არა, ის იყო აშენებული ძალმომრეობაზე, უსამართლობაზე, ქალის დამონებაზე, პიროვნების ფეხქვეშ გათელვაზე, წმინდა სიყვარულის აბუჩად აგდებაზე, საროსკიპო ზნე-ჩვეულებაზე! და თუ მაყვალამ დაანგრია ამგვარი ოჯახი, მართლაც რომ ვაშა მის ქალობას! ოო, როგორ გავიწმინდებოდით. როგორ ავმალდებოდით, რომ ერთ მშვენიერ დღეს ყველა ამგვარი ოჯახი დაინგრეოდეს! ამგვარები კი ჯერ ბევრია!

ნუ გამრისხავთ, ბ-ნო მოსამართლენო და ნაფიცნო მსაჯულნო,

და დღეს, როცა ქალი ყოველგვარ უფლებებს მოკლებულია, განა ყოველი ოჯახი სულ ცოტათი მაინც, სულ მცირე პატარა საროსკიპოს არ წააგავს?

და მანამ, სანამ ქალი სრულუფლებიანი ადამიანი არ გახდება. არც ერთ ჩვენგანს უფლება არა აქვს, თქვას: ოჯახი მაქვსო, მაშ, გელას, იმ გელას, რომელიც ქალს მხოლოდ მამლის თვალთ უყურებს. რომელსაც საროსკიპოს ზნე-ჩვეულებები შინ შემოჰქონდა, ამ გელას რა უფლება აქვს თქვას, ოჯახი მქონდა და ეს ოჯახი მაყვალამ დამიქციაო? არა. მას არ ჰქონია ოჯახი! მან არც კი იცის, თუ რა არის. რას ეწოდება ოჯახი. მას ოჯახი სახლი ჰგონია, საცა ცოლ-ქმარი საქმელსა სჭამს, საცა ცოლ-ქმარს სძინავს! მაყვალას თავგადასავალში, ნაფიცნო მსაჯულნო და მოსამართლენო, ფარდა ეხდება მთელი ისტორიის საშინელ უსამართლობას, კაცობრიობის საშინელ იარას.

რა არის ეს იარა? რაში მდგომარეობს ეს უსამართლობა? — ქალის უფლებათა უარყოფაში.

მთელი ისტორიული ცხოვრების გზაზე ქალი გაჰკვივის: მე იმგვარივე ადამიანი ვარ, როგორც მამაკაციო, მეც მეკუთნის ცხოვრებაში ყველა ის უფლება, რაც მამაკაცსო და ჩვენ კი ეს ხმა ან არ გვესმის, და თუ გვესმის, მაინცადამაინც არ ვცდილობთ, რომ ქალის კანონიერმა გულისკვნესამ დაკმაყოფილება მოიპოვოს.

გელამ ფეხქვეშ გათელა მაყვალას ყველა ადამიანური უფლებანი და გამოაცხადა: ქალის ერთადერთი მოვალეობა მხოლოდ მორჩილებაა, მისი ერთადერთი უფლება მონობაა.

და როდესაც თემი გელას წინ აღუდგა, გელამ კანონს მიმართა, კანონით განამტკიცა მთელი თავისი მოქმედება მაყვალას მიმართ. ამიტომ მაყვალას საქმე მარტო მაყვალასი კი არ არის, არამედ ყველა ქალებისა. თქვენს წინაშე დგას, ერთი მხრით, გელა და მისი კანონი, მეორე მხრით, მაყვალა და მისი ტანჯული გული. პირველხი გეუბნებიან: ქალი მამაკაცის სწორი არ არის და არც იქნება, ის მონაა მამაკაცისაო და მონადვე უნდა დარჩესო.

მეორე კი გეუბნებათ: ქალი იმგვარივე ადამიანია, როგორც მამაკაცი და არ არის არც ერთი უფლება, რაც მამაკაცს უნდა ეკუთვნოდეს და ქალს კი არაო.

პირველნი გეუბნებიან: თავისუფალი სიყვარული შეუძლებელია, ჩვეხ არ გვინდა, არ გვსურსო. მეორე კი გეუბნება: სიყვარული მხოლოდ თავისუფალი შეიძლება, — ბორკილები მას არ დაედებისო.

თქვენ, ბ-ნო მოსამართლენო და ნაფიცნო მსაჯულნო, უნდა გა-

დაწყვიტოთ ეს საკითხი, თქვენ უნდა აგვიხსნათ, საით არის ჭეშმარი-  
ტება: გელასა და მისი კანონებისაკენ, თუ მაყვალასაკენ.

თქვენ უნდა გვითხრათ: მართლა მონაა ქალი, თუ ის თავისუფა-  
ლი ადამიანია: თქვენ უნდა გვითხრათ: ქალი უფლებრივად გათვა-  
ლისწინებული უნდა იყოს მამაკაცთან თუ არა? ბორკილებში უნდა  
იყოს ჩაჭედილი სიყვარული, თუ მას თავისუფალი გზა უნდა ჰქონ-  
დეს დათმობილი. და თუ საზოგადოების აზრი თქვენი გადაწყვეტი-  
ლებით ერთხელ კიდევ გაახარხარებს გელასა და მის კანონს, „დე-  
დამიწა მაინც ბრუნავს“, ბ-ნო მოსამართლენო და ნაფიცნო მსა-  
ჯულნო, და შორს აღარ არის ის დრო, როცა ჰაერს გაარღვევს შემ-  
დეგი ხმა: „გაუმარჯოს თავისუფალ ქალს — ადამიანს და მის თავი-  
სუფალ სიყვარულსო“.

1910 წ.

## გიორგი სააკაძე

(სიტყვა, წარმოქმული სახალხო სახლში, გიორგი სააკაძის გასამართლებაზე)

ბ. მოსამართლენო და მსაჯულნო!

თქვენ დღეს წილად გხვდათ მეტად მძიმე და რთული საკითხის გადაჭრა. თქვენს წინაშე დგას ადამიანი, რომელსაც ჩვენი მრავალტანჯული ერის ისტორიამ დიდი მოუარავის სახელი უწოდა. და აი თქვენ უნდა გვითხრათ დღეს გადაჭრით: მთელი მოღვაწეობა იმ ადამიანისა სამშობლო ქვეყნის ასპარეზზე ჭეშმარიტება იყო თუ სიყალბე, კეთილი თუ ბოროტი, ქვეყნის საკეთილდღეოდ თუ დასაღუპავად მიმართული. გაიხსენეთ, ბატონებო, პილატეს კითხვა: რა არის ჭეშმარიტებაო.

ორი ათასმა წელმა განვლო მას აქეთ; შეგნებული ადამიანი წინათაც და ამ ხნის განმავლობაში მუდამ ეკითხებოდა თავის თავს: რა არის ჭეშმარიტებაო, მაგრამ გადაჭრილი პასუხი ჯერ არავის არა სმენია.

და მართლაც, ბ. მოსამართლენო და ნაფიცნო მსაჯულნო! რა არის ჭეშმარიტება, რა არის სიყალბე? რა არის კეთილი და ბოროტი? რა არის წასაბაძი ან რაა დასაგმობი, გასაკიცხი?

თუ ყველა ამ ცნებებს გამოჰყოფთ, გამოაცალკეებთ ცხოვრებიდან, მიიღებთ მხოლოდ უშინაარსო სიტყვებს.

რატომ? იმიტომ, რომ აზრს, შინაარსს ყველა ამგვარ ცნებებს თვით ცხოვრება აძლევს.

ცხოვრების გარეშე ჭეშმარიტება და სიყალბე, კეთილი და ბოროტი, კარგი და ავი არ არსებობენ, — ყოველივე ეს თვით ცხოვრების პირობებში ისახება და ვითარდება.

ამიტომ, როდესაც გვინდა ადამიანის მოქმედებას ფასი დავდოთ, უნდა ვიცოდეთ პირობები ამ მოქმედებისა, ე. ი. უნდა გავიცნოთ, ერთი მხრით, თვით ისტორიული გარემო, რომელშიაც ის მოღვაწეობდა.

არავითარი მოქმედება ადამიანისა თავისთავად, ცხოვრების პირობების გარეშე, არც კარგია, არც ცუდი, არც კეთილი, არც ბოროტი. ყოველ მოქმედებას. ყოველ ნაბიჯს ადამიანისას თვით ცხოვრება ასევე ბეჭედს. მივმართოთ სულ უბრალო მაგალითს: როსკინობა საზიზღარი, საძაგელი რამ არის, მაგრამ რომელი თქვენგანი აიღებს ქვას იმ დედის ჩასაქოლად, რომელიც თავის სხეულსა ჰყიდის, რათა უსუსური ბავშვები შიმშილით სიკვდილს გადაარჩინოს, როდესაც მას სხვა გზა აღარ დარჩენია რა?

მკვლელობაზე უსაშინელესი დანაშაული მე ვერ წარმომიდგენია. ვისა აქვს უფლება, თავის მსგავს არსებას სიცოცხლე მოუსპოს? არავის. მკვლელი ღირსია ზიზღისა, ჩაქოლისა. მაგრამ განა თქვენ არ იცით ისეთი მაგალითები, როცა ხალხი მკვლელს ამართლებს? და არათუ ამართლებს, ადიდებს კიდევ. ქებას ასხამს?

ბატონებო! საზოგადოებრივ ასპარეზზე მოღვაწეობის დასაფასებლად ზოგადი, ერთხელ და სამუდამოდ გამოჭრილი საზომი არ არსებობს, — ის, რაც ერთ პირობებში გასაკიცხია, მეორეში შეიძლება სანაქებოც გახდეს.

მე მინდა, მე გთხოვთ, ბ. მოსამართლენო და ნაფიცნო მსაჯულენო, ყოველივე ეს გაითვალისწინოთ, როცა თათბირი გექნებათ გიორგი სააკაძის მთელი მოღვაწეობის შესახებ.

ბ. მოსამართლენო, თქვენს წინაშე რომ იდგეს ჩვეულებრივი ადამიანი, რომლის მთელი მოღვაწეობაც ჩვეულებრივ პირობებში გაშლილიყოს, მაშინ მე პირველი დავეთანხმები ბ. ბრალმდებლებს. მოგახსენებდით: დიახ, გიორგი სააკაძე დამნაშავეა-მეთქი.

მაგრამ, ბ. მოსამართლენო, თქვენ წინაშე არის ადამიანი არა-ჩვეულებრივი, მთელი მაგისი მოღვაწეობა სწარმოებდა არა ჩვეულებრივს პირობებში.

ამგვარ შემთხვევაში მეტი სიფრთხილე. ასჯერ გაზომვა უაღაგო არ არის.

თქვენ თვითონ მოგეხსენებათ, ბ. მოსამართლენო, რომ არაჩვეულებრივ შემთხვევაში ზოგჯერ სათაყვანებელია ისეთი მოქმედება. რომლის სახელიც ჩვეულებრივ დროს მხოლოდ დანაშაულია. არა-ჩვეულებრივ შემთხვევაში ზოგჯერ ადამიანი არათუ იძულებული. ვალდებულია დაადგეს ისეთ გზას, რომელიც ჩვეულებრივ პირობებში უარსაყოფია.

საქმე მხოლოდ ისაა. თუ ვინ რისთვის, რა მიზნისათვის ირჩევს ასეთ გზას.

— ეჰე! მიზანი შენს თვალში ყოველგვარ საშუალებას ამართლებს? — შეიძლება გამკიცხოთ. მაგრამ არა, ბატონებო, მიზანი არ

ამართლებს ყოველგვარ საშუალებას. ხოლო როდესაც ყველა „რევინი“ საშუალება უქმია და უნაყოფო, უკიდურესი საშუალების ხმარებაც ეპატიება მაშინ იმ ადამიანს, ვინც უმაღლეს მიზანს ახორციელებს.

რომ ჩაუქვირდეთ, ბ. მოსამართლენო, საზოგადოებას, ორგვარი ბუნების პირებს შენიშნავთ.

ერთის მთელი მსოფლიო, მთელი მარადისობა მისი საკუთარი ოჯახია.

თუ ის და მისი ოჯახი კარგა იქმნენ, სხვა მას არაფერი აღარდებს. არაფერი აფიქრებს. ქვეყნის ვარამი, ქვეყნის მხიარულება იმის გულს არა სწვდება; მისი ოცნება საკუთარ კერას არ გასცილდება. მისი სურვილები საკუთარ კეთილდღეობას. დეე, მთელი ქვეყანა უბედური იყოს, რას დავეძებ, ოღონდ მე ვიყო ბედნიერიო, — აი. მისი სულთასწრაფვა.

ბედნიერიო. გაიგონებთ ამგვარი ადამიანის შესახებ, მაგრამ, ბ. მოსამართლენო, ეს არის პირუტყვეული, ზოოლოგიური ბედნიერება და მთელი კაცობრიობა რომ ასეთ ბედნიერთაგან შედგებოდეს. ცხოვრება ჩირად არ ეღირებოდა და ადამიანი დამპალ პანტად.

მეორე ადამიანის მთელი ოცნება მთელი საზოგადოების, მთელი ერის, მთელი კაცობრიობის გარშემო ტრიალებს; მთელი ერის ბედნიერება მისი საკუთარი ბედნიერებაა. მისი პირადი ბედნიერება გათქვეფილა საზოგადო ბედნიერებაში; პირადი ბედნიერება და პირადი უბედურება მისთვის არ არსებობს.

შეუძლებელია ბედნიერი ვიყო იქ, საცა ჩემს გარშემო უმრავლესობა უბედურიოა, ფიქრობს ის მუდამ. უბედური, სულელი, გაიგონებთ ამგვარი პირების შესახებ. მაგრამ არა, ბ. მოსამართლენო. უმაღლეს, უზენაეს ბედნიერებას მხოლოდ ესენი ეწაფებიან. პირად ცხოვრებაში ისინი უბედურნი არიან, იმათ სდევნიან, აწამებენ, სტანჯავენ, ხოცვენ, მაგრამ მარილს კაცობრიობისას მხოლოდ ესენი შეადგენენ. და ამგვარი პირები რომ არ ევლინებოდეს დროდადრო კაცობრიობას. ცხოვრება ერთ ფურთხად არ ეღირებოდა.

ამგვარ პირებს ჩვენ ვაღმერთებთ და როცა გულში უიმედობა დაისადგურებს. ამგვარი პირების სურათი და მოგონება ხელახალი იმედებით გვაესებს, გვაფრთოვანებს და წინ, უკეთესი მერმისისაკენ გვეზიდება.

და თვით ცხოვრება განა რა არის, თუარ მისწრაფება უკეთესისადმი! ამ უკანასკნელ პირთა გუნდს ეკუთვნის დიდი მოურავიც.

მაგისტვის არათუ ბედნიერება, პირადი სიცოცხლეც არ არსებობს.

უმალღესი ბედნიერება ეს სიცოცხლეა; როდესაც გრძნობ, რომ შენ შეგნებული წევრი ხარ მსოფლიოსი, ეს უმალღესი ნეტარებაა; მაგრამ არც ერთი და არც მეორე არ არსებობს დიდი მოურავისათვის.

მაგისათვის არსებობს მხოლოდ სამშობლო, მთელი ქართველი ერი.

არათუ პირად ბედნიერებას. პირად სიცოცხლეს გასწირავს ეგ მთელი ერის კეთილდღეობისათვის.

პირად ცხოვრებაში მამას შვილზე — პაატაზე უძვირფასესი არავინ გააჩნია. მთელი იმედები პაატაზე აქვს დამყარებული, მაგრამ როცა მთელი ერის კეთილდღეობა ითხოვს პაატას სიკვდილს, ეგ ჰკლავს თავის საყვარელს, თავის უძვირფასესს.

როგორც მამა, ეგ სტირის, ლოყებს იხოკავს, ხოლო როგორც ღირსეული ადამიანი, როგორც სათაყვანებელი შვილი ერისა, ამაყად ამბობს:

პაატა მთელს ერს ვერა ჰშობავს, მთელი ერი კი ბევრ პაატას ჰშობავსო.

თქვენ გეცოდინებათ ბევრი დიდებული აფორიზმები, მაგრამ ამაზე დიდებული, კი არა, ბ. მოსამართლენო.

არათუ პაატას, ცოლს, მეგობრებს, ნათესავეებს, საკუთარს თავს გასწირავს დიდი მოურავი. თუკი ეს საჭიროა მამულის კეთილდღეობისათვის.

ვერ წარმოიდგენთ ვერავითარ მსხვერპლს, რის წინაშეც დიდი მოურავი გაჩერდეს, თუკი სხვა გზა არ ექნება სამშობლოს გადასარჩენად.

ნურავინ მეტყვის, ნურავინ გამაგონებს, რომ ეს გაუგებარია.

ვისაც თავისი ერი, ერი ბედნიერი კი არა, ტანჯული, მრავალტანჯული შეჰყვარებია, ვისაც სიყვარული, აი, აქ, გულში უგრძენია, მისთვის გიორგის სულიერი განწყობილება ცხადია, ვითარცა ნათელი მზისა.

ცხოვრება გრძნობას მოკლებული; სიცოცხლე უსიყვარულოდ აუტანელი სამარეა, სიმახინჯეა.

და სამშობლოს სიყვარული განა უმალღესი გრძნობა არ არის?

განა სამშობლო ღირსი არ არის სიყვარულისა? განა ადამიანი ვალდებული არ არის, სამშობლოს სიყვარულით ყოვლისფერი დაივიწყოს. ყოვლისფერი სძლიოს და გადალახოს?

თქვენ მეტყვით, ეს გრძნობა გარყვნესო, თქვენ გამაჩუმებთ: ყოველ დაბალ ადამიანს სამშობლო აკერია ენაზეო.



თქვენ პირში ჩამჩრით: ყოველი უპატიოსნო სამშობლოს სიყვარულის სამოსელში ახვევს საკუთარ, პირად ინტერესებსო.

მეც გეტყვით: განა ამგვარი პირია დიდი მოურავი? განა ამგვარია ამისი სიყვარული სამშობლოსა?

ამან ზომ თავისი იმედი — პაატა საკუთარი ხელით ზვარაკად შესწირა სამშობლოს საკუთრხეველზე?

განა ამაზე წმიდა, ამაზე უანგარო, ამაზე ღრმა, ამაზე ძლიერი სიყვარული არათუ სინამდვილეს. დიდებულის პოეტის უსაზღვრო ფანტაზიას კი შეუქმნია?

ჰო, წარსულიდან თქვენ იცით ერთი მაგალითი, როდესაც აბრამი ისააკს სწირავდა ღმერთს მსხვერპლად, მაგრამ ნუ დაივიწყებთ: რომ აბრამს ამოქმედებდა შიში ღვთისა, გიორგის კი სიყვარული სამშობლოსი.

ბ. მოსამართლენო, ასეთ ძლიერ სიყვარულს დაუპირდაპირეთ სამშობლოს მდგომარეობა, მისი მაშინდელი ბედ-იღბალი.

ჩვენი ფეოდალები სამშობლოს იღვის შეგნებას სრულებით მოკლებული იყვნენ. სამშობლო — ეს მე ვარ! — აი, რას ფიქრობდა და გრძნობდა ყოველი მათგანი.

ათასად დაქუცმაცებულ საქართველოს ისინი წურბელასავით სასიცოცხლო სისხლსა სწუწნიდნენ და სამარეს უმზადებდნენ. აკი კიდევ გაუთხარეს სამარე!

მეფე სათამაშო ბურთად ჰყავდათ ფეოდალებს გადაქცეული საქართველოში მეფობდნენ შადიმანის მსგავსი ფეოდალები და არა მეფე.

ერთადერთი გიორგი სააკაძე იყო, რომელსაც გათვალისწინებული ჰქონდა სამშობლოს აწმყო და მომავალი, რომელიც სამშობლოს, ე. ი. მთელი ერის ინტერესს ყველაფერზე მალლა აყენებდა.

თუ ათასად დაქსაქსული საქართველო არ გაერთიანდებოდა, მისი დაღუპვა აუცილებელი იყო. ამაში ღრმად დარწმუნებული იყო გიორგი სააკაძე და ამიტომ მისი უძლიერესი სურვილი იყო ამ დაქსაქსული საქართველოს გაერთიანება.

როგორ, რა გზით, რა საშუალებით?

ფეოდალები საქართველოს გაერთიანების მოსისხლე მტერნი იყვნენ, რადგანაც საქართველოს გაერთიანება და გაძლიერება ფეოდალების ალაგმვასა და მოსპობას მოასწავებდა. გლებობა შიშით იყო დამონებული და შებოჭილი. ერთი სიტყვით, თვით ერში არ იყო ისეთი ძალა, რომელსაც შესძლებოდა დიდი მოურავის ზრახვა-თა განხორციელება. საშინელი ტრაგიზმი დიდი მოურავისა სწორედ აქ მდგომარეობს.

ერთი კაცი ლამობს საქართველოს გაერთიანებას მაშინ, როცა ყველა ძალის მქონე იმის წინააღმდეგ არის ამხედრებული; ერთ კაცს უნდა ბრძოლა ყველას წინააღმდეგ მაშინ, როცა ხუთ კაცს არც კი ესმის მისი სულისკვეთება, მისი დიდებული ზრანჯანი.

ტიტანური მიზნის განხორციელებას ერთი კაცი კიდებს ხელს და ბ. ბრალმდებელი კიდევ კიცხავს: საშუალებათა არჩევაში სიფაქიზე აკლდაო.

დიდ მოურავს ან გულზე ხელები უნდა დაეკრიფა და ცალიერის სიტყვებით ენუგეშებია ქართველი ერი: ნუ გეშინია. მომავალი შენია და გულს ნუ გაიტეხო, როგორც ამას ურჩევს ერთი ბრალმდებელი, ან არადა საქმისათვის მიემართა.

მოურავმა სიტყვას საქმე არჩია და მიმართა სპარსეთს. რათა. რისთვის? საქართველოს ასაკლებად, როგორც ამას ბრალმდებელნი ამტკიცებენ? არა და ათასჯერ არა. იმათ ვერ იცვენს დიდი მოურავი. სპარსელები საქართველოს დასარბევად კი არ წამოიყვანა გიორგი სააკაძემ, არამედ ქართველის მეფის წინააღმდეგ. ქართლის მეფე გიორგის აზრით საქართველოს დაღუპვას უქადდა და აი მას უნდოდა სპარსეთის დახმარებით ქართლის მეფე ტახტიდან გადაეგდო. რომ ქართლ-კახეთი გაეერთიანებინა.

გიორგი სააკაძეს მტერი ბევრი ჰყავდა და მათს ცილისწამებას თურმე დღესაც აქვს გასავალი.

შაჰ-აბასი სამჯერ შემოესია საქართველოს. პირველი შემოსევის დროს მართლაც თან ახლდა მას გიორგი სააკაძე, მაგრამ სწორედ გიორგი სააკაძემ გადაარჩინა საქართველო დარბევას. მეორედ კი შაჰ-აბასი აღარ ენდო გიორგის, მარტო შემოესია საქართველოს და ააოხრა კიდევ.

გიორგი თუ საქართველოს მტერი იყო, უნდა გახარებოდა კიდევ საქართველოს აკლება. მაგრამ მან შეკრიბა ქართველნი, ჩაჰბერა მათ ძლიერი სული თავგანწირულებისა და როცა სპარსელები მესამედ შემოესიენ საქართველოს, ისეთი დღე დააყენა მათ, რომლის მსგავსიც ისტორიამ ორი-სამი თუ იცის — მოსპო, მოსრისა სპარსეთის ჯარი.

ამას უძახით მოღალატეს. მამულის გამყიდველს?

ქართლ-კახეთი შეაერთა დიდმა მოურავმა. საჭირო იყო იმერეთის შემოერთება.

ამ მიზნის განხორციელებისათვის დიდმა მოურავმა ქართლებსა და იმერლებს ერთმანეთის სისხლი დაადვრეინა.

სამოქალაქო ომი ფრიად სამწუხარო რამ არის, მაგრამ თუ სხვა

გზა არ იყო, ვაშა, დიდო მოურავო, რომ უკიდურეს ზომასაც არ დაერიდებოდა მთელი საქართველოს საკეთილდღეოდ.

თუ ამ სამოქალაქო ომისაგან მოწყენებულ ზარალს გვერდს დაუყენებთ იმ სარგებლობას, რაც შედეგად მოჰყვებოდა მთელი ქართველი ერისათვის ქართლ-კახეთ-იმერეთის გაერთიანებას, დამეთანხმებით, რომ ქართლებსა და იმერლებისაგან ერთმანეთის სისხლის დაღვრა სახსენებელი არ არის იქ, საცა საქმე მთელი ქართველი ერის ბედ-იღბალს, მთელი საქართველოს არსებობის საკითხს შეეხება.

ერთ თავის სიტყვაში რობესპიერმა სთქვა: ღმერთი რომ არ ყოფილიყო, უნდა გამოეგონებიათო.

ბატონებო! ამ სიტყვებში ღრმა ჭეშმარიტებაა დამარხული, დიდი ცოდნაა ხალხის ფსიქოლოგიისა.

სიცოცხლე ფუჰია და წარმავალი, ადამიანი სუსტი, უძლური... ბუნება კი უსაზღვრო და ძლიერი, ჩვენი ოცნება ფრთაგაშლილია. ჩვენი ძალ-ღონე კი მას ვერ სწვდება და როდესაც ადამიანი თავის არსებაში სანუგეშოს ვერასა ხედავს, სისრულეს, სიღიადეს თავის გარშემო ეძიებს და ჰპოებს ღმერთში, გმირებში.

განა ამირანი, ყარამანი არსებობდნენ როდისმე? არა. ესენი ხალხის სურვილმა, ხალხის ოცნებამ შექმნა.

განა შვეიცარიელებს მართლა ჰყავდათ ვილჰელმ ტელი? არა. ის მხოლოდ ხალხის ოცნებამ წარმოშობა.

ხალხს გმირები უნდა, ის გმირებს ეძებს და როცა ცხოვრებაში მათ ვერა ჰპოვებს, იგონებს, თვითონვე ჰქმნის მათ.

ჩვენ კი... ჭეშმარიტად ჩვენისთანა უბედური ერი დედამიწის ზურგზე არ მოიპოვება. ჩვენ თვით ცხოვრებამ მოგვცა დიდებული გმირი გიორგი სააკაძის სახით და ლამის ეგეც კი წუმპეში ამოვსვართო, თავს ლაფი დავასხათ.

ბატონებო! ორიოდ გმირი გავგაჩნია და გავუფრთხილდეთ მათ. რომ ხალხმა სრულებით არ დაჰკარგოს იმედი უკეთესი მომავლისა.

დიდი მოურავი: ბატონო მოსამართლენო, გაკიცხვის ღირსი კი არ არის, სათაყვანებელია და მისი სახელი ნეტარ სახსენებელი.

ეგ ღირსია იმისა, რომ მისი სურათი ყოველი ქართველის ოჯახში ეკიდოს, რათა დედა შვილს მიუთითებდეს და ეუბნებოდეს: აი, ეს არის ის გიორგი სააკაძე, რომელმაც თავისი ოჯახი, თავისი ქონება, თავისი კეთილდღეობა, თავისი სიცოცხლე და თავისი შვილი საქართველოს კეთილდღეობას ანაცვალაო.

მე კი ლოცვა რომ შემეძლოს, ყოველდღე ხელაპყრობილი შევევდარი ზეცას, გიორგი სააკაძისთანა პირები ბლომად მოუვლინე ბედ-კრულ საქართველოს-მეთქი.

## შთაბეჭდილებანი

ცხოვრებას და ისტორიას რომ ჩაუკვირდეთ, ერთ გარემოებას შენიშნავთ.

საზოგადოება დიდის პატივისცემით ეპყრობა იმ პირებს, ვისაც რაიმე თვალსაჩინო ტექნიკური აღმოჩენა ეკუთვნის, ხოლო აღმერთებს, თაყვანსა სცემს იმ პირებს, ვისაც პოეზიის დარგში შესანიშნავი ნაწარმოები შეუქმნია. აღმოჩენა საკაცობრიოდ რჩება, ხოლო აღმომჩენელის სახელი ხშირად დავიწყებას ეძლევა. გამოჩენილი პოეტის სახელი კი ყოველი ხალხის ყოველ შეგნებულ წევრს ახსოვს მარად.

უმეტესობას არ ახსოვს მათი სახელი, ვინც მოიგონა ორთქლის ქვაბი, გემი, მატარებელი, ტელეფონი და სხვ. ხოლო ჰომირისის, დანტეს, შექსპირისა, გოეთესი, შილერისა და სხვათა სახელი მათაც კი ახსოვთ, ვისაც უმეტესი ნაწილი მათი ნაწერისა არც წაუკითხავს.

ეს მოვლენა თითქოს უმნიშვნელოა, მაგრამ მასში ღრმა აზრია ჩამარბული, ყველა დიდი ტექნიკური აღმოჩენა თავდაპირველად აუმჯობესებს ადამიანის ნივთიერ ცხოვრებას — კუქს ემსახურება. საუკეთესო ნიმუში პოეზიისა კი აკეთილშობილებს ადამიანის ბუნებას — მის სულს ემსახურება.

რა არის აზრი არამეტუ ადამიანის ცხოვრებისა, მთელი მსოფლიოს არსებობისა?

სულის განვითარება — ადამიანის სულიერი ამაღლება.

სიცოცხლის მიზანი უმაღლესი შეგნების წარმოშობაა.

თვალი გადაავლეთ დედამიწის ისტორიას: უაზრო, შეუგნებელი ნივთიერებაში ისახება გრძნობა; გრძნობა ვითარდება სხვადასხვა ცხოველის სახით და შეგნებულად იქცევა ადამიანში. ადამიანის შეგნების განვითარებას კი საზღვარი არა აქვს.

საიდან წარმოიშვა დასაბამითვე სამყარო, არ ვიცი და არც ერთმა თქვენგანმა არ იცის. ხოლო საით მიდის მსოფლიოს განვითარება — ეს ჩემთვის ცხადია — უმაღლესი შეგნების წარმოშობისაკენ.

უმეტესი დრო ადამიანს ეხარჯება ფიზიკური არსებობის დაცვაში; უმეტეს დროს ის ხორციელ ზრუნვას ანდომებს; მაგრამ ის სტიქიურად, მთელი თავისი არსებით მიისწრაფვის სულიერი ამაღლებისკენ. ამიტომაც არ ივიწყებს და აღმერთებს იმ პირებს, რომლებიც მას სულიერად აღამაღლებენ. იმ პირებს კი, ვინც მის ნივთიერ ცხოვრებას აუშჯობესებს, პატივს სცემს, მაგრამ ხშირად ივიწყებს.

თქვენ ხომ ჰომიროსის სახელი არასოდეს არ დაგავიწყდებათ და განა იცით ვინმემ იმ პელინის სახელი, რომელმაც წყალში უქრობი ცეცხლი გამოიგონეს?!

სიცოცხლის მიზანი რომ სმა და ჭამა იყოს, განა ცხოვრება დაშალ პანტად ელირებოდა?

სიტკბოება სიცოცხლისა, მისი მიზანი, მისი უმაღლესი მოწოდება სულიერ ამაღლებაშია.

ჩვენ მიჯაჭვული ვართ დედამიწაზე, მაგრამ მაინც ვარსკვლავებს მიეჩერებივართ, ვარსკვლავებისკენ მივისწრაფვით და ვაღმერთებთ იმ პირებს, ვინც ამ მისწრაფებას აღვივებს და აცხოველებს ჩვენში.

ადამიანის სულს ავითარებს, აკეთილშობილებს მშვენიერება --- ამ სიტყვის ყოველმხრივი მნიშვნელობით.

თვითონ მთელი სამყარო გამოხატულებაა მშვენიერებისა. სული ადამიანისა მშვენიერებიდან არის ნაშობი.

პოეზია ნაწილია მშვენიერებისა და ადამიანის სულისათვის იმდენადვე არის საჭირო, რამდენადაც სხეულისათვის ჰაერი.

არათუ კერძო ადამიანის ცხოვრებაში, მთელი ერის ცხოვრებაშიაც პოეზიას უდიდესი მნიშვნელობა აქვს. პოეზია აძლიერებს.. ამაღლებს მთელი ერის სულს. მომავალი კი ძლიერი სულის მატარებელ ერს ეკუთვნის და არა ლაჩრებს. მონებს, სულით დაცემულებს.

რამდენჯერმე გულდასმით გადაიკითხეთ „ვეფხისტყაოსანი“ და დარწმუნდებით, რომ პოეზია წყაროა უმაღლესი სულიერი ნეტარებისა. სულიერი ნეტარების ხშირ განცდას კი შედეგად სულის ამაღლება მოსდევს.

ერი, რომელიც მდიდარია პოეზიით, ძლიერია სულითაც, ის მკვდარიც კი ცოცხლობს.

ერი --- ღარიბი პოეზიით, სულიერადაც სუსტია. ამგვარი ერიც ცოცხლადვე მკვდარია.

ბერძნები და რომაელები მოკვდნენ, მაგრამ ისინი ცოცხლობენ.. ძლიერმა პოეზიამ განავითარა მათი ძლიერი სული, რომელიც დღეს მთელს განათლებულ კაცობრიობას თავს დასტრიალებს...

მეცხრამეტე საუკუნემ ჩვენს არსებობას საშინელი საფრთხე შეუქმნა, მაგრამ მანვე მოგვცა ღიღებულები პოეტები, რომლებმაც ჩვენი ერის სულიერი ამაღლება და გამაგრება მტკიცე ნიადაგზე დაამყარეს.

რა იქნებოდა ჩვენი ცხოვრება, რომ არ გვყავდეს ნ. ბარათაშვილი. ვახ. ორბელიანი, ი. ჭავჭავაძე, აკაკი წერეთელი, ალ. ყაზბეგი!

დღეს კი ამ პირების წყალობით გაბედულად და თამამად შეგვიძლია ფეხი შევდგათ კულტურულ ერთა წრეში.

როდესაც გულს შავი ღრუბელი გადაეფარება და უიმედობა მოიცავს, გაიხსენეთ ეს პირობა და დარწმუნდებით: ის ერი, რომელსაც ეროვნული ძაჩისცემის ვერაგულად, ავაზაკურად შეწყვეტის ღროს, ასეთი შვილების წარმოშობა შეუძლია, არ მოკვდება.

ღიღებულ მნათობს ჩვენი მეცხრამეტე საუკუნის პოეზიისას ილ. ჭავჭავაძე წარმოადგენს.

ქეშმარიტი სიდიადე ნამდვილი პოეტისა სიკვდილის შემდეგ აშკარავდება, როცა ის დაშორებულია.

არ შეგინიშნავთ განა? სიცოცხლეში რომელიმე პოეტი ბრწყინავს, ღიღებულები სახელი თან ახლავს მას, მოკვდება, განშორდება საზოგადოებას და ოდნავღა ბეუტავს. სანამ ცოცხალი იყო, ბევრად მეტი ჩანდა, ვიდრე მის ნამდვილ ღირსებას შეეფერებოდა.

სულ სხვაა ილია.

ის სიცოცხლეშიაც დიდი იყო, სიკვდილის შემდეგ უდიდესი გახდა.

ის ცოცხალი ღიღებულები იყო.

სიკვდილის შემდეგ მისმა შუქმა ყოველივე დაჩრდილა. ასეთია ძალა დიდი ხელოვანისა.

ილია ჭავჭავაძე ნამდვილი ეროვნული პოეტია. ის არათუ ყველგან, ყოველთვის. ფხიზლად თუ ძილში“ თავის ბედკრულ საქართველოს დასტრიალებს. მისი ლუარსაბი, დარეჯანი, ოთარაანთ ქვრივი, გიორგი, ჭრიაშვილი ტიპიური ქართველები არიან...

ამავე ღროს ილია საკაცობრიო პოეტია, რადგანაც ის შეეხო ისეთ კითხვებს, ისეთ სამოქალაქო იდეას. რომლებიც საერთო მთელი კაცობრიობისათვის.

ვისი იდეალია სრული თანასწორობა და შრომის სუფევა, რასაც ქადაგებს პოეტი?

ყველასი, მთელი კაცობრიობისა.

ილია ჭავჭავაძე მარტო პოეტი კი არ არის, ის პოეტი-ფილოსოფია. მასავით არავის არ ეხერხება ცხოვრებისა და ადამიანის გულის სიღრმეში ჩახედვა, დახახულისა და ნაგრძნობის ფილოსოფიუ-

რი განჭვრეტა. ის დიდებული მცოდნეა ცხოვრებისა და ადამიანის სულისა.

ზოგ-ზოგან ლექსთაწყობა ილიასი არც კი მოგეწონებათ, მაგრამ ყოველი მისი სიტყვა ჩაქუჩივით გვხვდება და გულის სიღრმემდე ატანს.

რატომ?

იმიტომ, რომ პოეტი სიტყვის კეშმარიტი მოქანდაკეა. მისი ყოველი სიტყვა თითქოს სალი კლდიდან არის გამოკვეთილი.

განა ჩვენი ცხოვრება დრამა არ არის? მაგრამ ქართველებს დრამის წერა არ გვეზერხება. კომედიები, ვოდევილები, ფარსები კი ჩვენი საქმეა.

ეს ადვილი ასახსნელია. დრამაში დიდი ზომიერებაა საჭირო, კომედიებში, ვოდევილებში და ფარსებში გადაჭარბებაც უადგილო არ არის. ქართველი ადამიანი კი ბუნებით ზომიერებას მოკლებულია, მას ყველგან და ყველადღერში გადაჭარბება უყვარს.

ტიპური ქართველი მწერალი ყაზბეგია. გადაჭარბება მას იმდენად უყვარს, რომ მისგან აწერილი სურათი ბუნებისა სინამდვილეზე ბევრად უფრო მშვენიერია.

ილ. ჰავკეაძე ამ მხრივ შეუღარებელია. სიღინჯე და ზომიერება კეშმარიტი ხელოვანისა აქვს.

აიღეთ მისი „განდეგილი“ და „ოთარაანთ ქვრივი“. აბა ამოშალეთ, ახ გადასვით რომელიმე სიტყვა, ან სინონიმით შეცვალეთ, შეუძლებელია.

„ოთარაანთ ქვრივი“ დიდებული ნიმუშია სახელოვნო ზომიერებისა და სიღინჯისა.

კეშმარიტებაა, დიდებული პირები ისტორიას არა ქმნიან, მაგრამ ისტორიაც არ მიედინება დიდებული პირების დაუნმარებლად. ვარსკვლავი გზას არ ანათებს, მაგრამ ბნელს ღამეში კი გზას გააკვლევინებს ადამიანს, და გზადაბნეული მგზავრისათვის ხომ ერთი ვარსკვლავიც ხსნა არის.

განა მთელი ჩვენი ერი გზადაბნეული არ არის?

გარემო საშინელ სიბნელეს მოუცავს, მაგრამ ჩვენი ქვეყნის გაბურულ ცაზე ილია ანათებს.

საით გვინათებს ის გზას?

ბრწყინვალე მომავლისაკენ.

ჩვენ ყველანი პატარა ადამიანები ვართ, სულით უძლურნი, უიმედოხი, პატარა რამ გვახარებს, პატარა რამ სასოწარკვეთილებაში ჩაგვაგდებს.

ილია კი სულით ძლიერი იყო, შტკიცე, ვით სალი კლდუ.

როგორც შეილს აწმყოისას თვალზე ცრემლი მოსდიოდა. როგორც წინასწარმეტყველი მომავლისა, ამბობდა:

ჩემო ტურფა ქვეყანავ,  
რაზედ მოგიწყენია?  
აწმყო თუ არა გწყალოის,  
მომავალი შენია!

ილიას, აკაკის და შოთას ნაწარმოებნი ყოველი ქართველის ოჯახში უნდა იყოს და მათზე უნდა იზრდებოდეს ახალი თაობა. სამწუბაროდ, დღევანდლამდე ხეირიანი გამოცემაც კი არ მოგვეპოვებოდა ილიასი. დღეიდან კი ქართულ მწიგნობრობას ერთი საუცხოო გამოცემა შეემატება, — ილიას თხზულებათა პირველი ტომი. თამამად შემიძლია ვთქვა, რომ რუსეთშიაც არ იქნება უკეთესი გამოცემა.

ვის უნდა ვუმადლოდეთ?

ექიმ მიხ. გედევანიშვილს.

სად ექიმი, სად გამომცემლობა, არა მკითხველო?!

წარმოიდგინეთ, მეც ასე ვფიქრობდი.

როდესაც გავიგე, ექიმი მიხეილ გედევანიშვილი ილიას თხზულებათა გამოცემას აპირებდნო. არ მწამდა, თუ ეს განზრანგვა რიგიანად დაბოლავდებოდა:

სად ექიმი, სად ილიას თხზულებათა საუცხოო გამოცემა-მეთქი, ვფიქრობდი.

სინამდვილემ ყოვლისფერს გაადაქარბა და ჩემი ეჭვი სრულიად გააქარწყულა, — გაჟვანტა.

მართალია, ჭერ წიგნი გამოცემული არ არის და ამ ცოტა ხანში შეუდგებიან უკვე გამოცემას. მაგრამ, რაც დამზადებულია: ქალალდი, შრიფტი, და განსაკუთრებით, სურათები, საკმარისია იმის აღსანიშნავად, თუ რა მშვენიერი წიგნი გამოვა.

ექიმმა მიხ. გედევანიშვილმა სწორედ სასწაული მოახდინა.

მან დაამტკიცა, რომ შრომასა და სიყვარულს ყოველისფერი შეუძლიან.

პოეტის სული იმის ნაწერებშია. ილიას სულიც იმის პოეზიაშია ჩაქსოვილი.

და როდესაც ქართველი საზოგადოება მიიღებს ილიას თხზულებათა პირველი ტომის საუცხოო გამოცემას, ეს დღე იქნება ჩვენი მწერლობისა და მწიგნობრობის ნამდვილი დღესასწაული.



## ჭალადიდელის პოეზია

ყოველი სახელოვნო ნაწარმოები ნაწილია პოეტის სულასა-  
მასში გამოკვეთილია ყოველივე, რასაც პოეტი იმ დროს ფიქრობდა  
და გრძნობდა. რაც მას აღეღებდა. ახარებდა და სევდასა ჰგვრიდა.

და რაც უფრო ძლიერია, თან მშვენიერი, ეს სული, მით უფრო  
ღრმა შთაბეჭდილებას ახდენს სახელოვნო ნაწარმოები.

ზოგჯერ მოხდება: პოეტის სული ლამაზია, მაგრამ საკმაოდ  
ძლიერი ნიჭი არ ახლავს თან, რომ შესაფერი ფერადები და სურა-  
თები გამოიხატოს. მაშინ პირველი შთაბეჭდილება ნაწარმოებისა სუს-  
ტია, მაგრამ რაც უფრო ჩაუუკვირდებით მას, მით უფრო იშლება  
თქვენს თვალწინ და ცხადი ხდება პოეტის სულის სილამაზე, მისი  
პირადი ღირსებანი.

ჩვენი პოეზიის ცაზე ჭალადიდელის შემოქმედება მეტად მკრთა-  
ლად ბეუტავს. მაგრამ მასში ნათლად ისახება პოეტის სული და ამ  
მხრით არის ის საყურადღებო. ყოველი ლექსის მთხზველი პოეტად  
არ ითქმის.

პოეტია თუ არა ჭალადიდელი?

უმეტესი ნაწილი მისი ლექსებისა ვერ გაგაკვირვებთ ენის სიმ-  
დიდრით და სილამაზით, მხატვრული სახეებისა და ფერადების შეწყ-  
ყობითა და მრავალგვარობით, აზრის ორიგინალობა-თავისებუ-  
ლობით, ან ფანტაზიის სიუხვით, მაგრამ არის შიგ ისეთი მარგალიტე-  
ბიც, რომელთა შექმნა მხოლოდ ჭეშმარიტ ხელოვანს შეუძლია. აი-  
ლეთ. მაგალითად. „მოგონება“ და „სიმღერა გარდახვეწილისა“. ამ  
ლექსების დაწერა შეუძლებელია. თუ ღვთიური ცეცხლი გულში არ  
ღვივის.

ჭალადიდელი აღიზარდა მესამოცე და მესამოცდაათე წლების  
მოწინავე აზროვნებაზე. მან შეისისხლხორცა ეს აზროვნება და თა-  
ვის ნაწერებში გვეხატება მოწინავე რწმენა-აზრის პიროვნებად.

ძმობა, ერთობა, თანასწორობა. სიყვარული. — აი, რას ქადა-  
გებს ის თავის პოეზიაში.

რა არის, პოეტის შეხედულებით, „ამსოფლიური დანიშნულება?“ — მოძმის დახმარება, — გვეუბნება თვითონ პოეტი ერთ-ერთ ლექსში.

ვინ არის მოძმე?

ყოველი ადამიანი, რომელსაც უჭირს. რომელიც ბედს გაუსწირავს და ადამიანს დაუჩაგრავს.

და როცა შეგხედეს კაცი უძღერი,  
იკოდე, რომ ის შენი ძმა არის.

ვიც უნდა შეგხვდეს, — გინდ მტერი, გინდა მოყვარე, — ყველას საყვარული უნდა მიუზღო მხოლოდ, ქადაგებს პოეტი. ამ კითხვაში პოეტი უკიდურესი იდეალისტია და კვშმარტი ქრისტიანი.

ნეტარ არს კაცი, რომელიც სოფელს  
და მის ტალღას არ შეჰუბნია:  
თავისა მტერსა და დაუნდობელს  
მეგობრულად მიჰგებნია.

არც ერთ ადამიანს და მოღვაწეს, რა გენიოსიც უნდა იყოს ის, სამარადისო მნიშვნელობა არა აქვს, ბოლოს ყოველივე ქრება, მაგრამ ეს იმას არ ნიშნავს, ვითომ ყოველივე ამაო და ფუჭი იყოს; აწმყო წარსულის ნაყოფია და ამავე დროს ხიდია მომავლისა. ყოველი ადამიანი განსაზღვრულ დროსა და პირობებში მოქმედებს და ამიტომ მისი შრომაც ამ დროისა და პირობების მიხედვით უნდა ფასდებოდეს.

ქალადიდელი ეკუთვნოდა სამხედრო წოდებას, რომლის ცხოვრება და მისწრაფება ძირიანად ეწინააღმდეგებოდა პოეტის რწმენას, მან დაიწყო წერა მესამოცე წლების გასულს, როცა ბატონების აზროვნება გამეფებული იყო ჩვენს ცხოვრებაში. მიუხედავად ამისა, მან შეუერთა თავისი ხმა ძმობა-ერთობისა და თანასწორობის გუგუნს, მუშის შრომას ქება უძღვნა, აამაღლა ის და თამამად გამოაცხადა:

აფერუმ ყოველ შრომას,  
ქება ყოველს ოფლის წვეთს,  
ქება მუშის მუშურ ხმას  
და მისს მართხელა ბედს.

ყოველ პოეტს ჰყავს თავისი მერანი; რა მრავალფეროვანიც უნდა იყოს მისი შემოქმედება, მას მაინც ერთი ყავს სატრფო, რომელსაც დასტრიალებს პოეტის გრძნობა და ოცნება, ფიქრი და მიწრაფება. ამგვარად, ჩნდება მთავარი მოტივი ანუ ლეიტმოტივი პოეტის შემოქმედებისა.

ვინ არის სატრფო ქალადიდელისა?  
სამშობლო.

აქედან წარმოსდგება უმთავრესი მოტივი ქალადიდელის შემოქმედებისა — სამშობლოს სიყვარული. პოეტის საუკეთესო ლექსები ამ გრძნობის ნაყოფია.

სამშობლოს მოგონება პოეტს ფრთებს ასხამს. მის ნიჭს ასპეტაკებს, აძლიერებს, პოეტი იცვლება, ის თავის თავს აღარა ჰგავს. სამშობლოს სიყვარულს გარეშე ქალადიდელი ჩვეულებრივი მოლექსეა, ამ გრძნობით გამსჭვალული კი, ის ჭეშმარიტი პოეზიის წმინდა ნაყადს ეზიარება და აშკარად გვიმტკიცებს, რომ ძლიერი სიყვარული დედაა პოეზიისა.

პოეტი ადამიანს იმდენად აფასებს, რამდენადაც მას სამშობლო უყვარს. პოეტი მარტოოდენ გრძნობით კი არ კმაყოფილდება, — ის ითხოვს საქმეს: ყოველი ადამიანი თავის მოქმედებასა და მისწრაფებაში სამშობლოს კეთილდღეობით უნდა ხელმძღვანელობდეს.

ადამიანს, რომელსაც სამშობლო არ ახსოვს, პოეტი პირუტყვზე დაბლა აყენებს.

პოეტი შეჰყურებს მერცხალს, რომელსაც თავისი მხარე არ ავიწყდება, ამავე დროს იგონებს ადამიანს, რომელსაც სამშობლო დაეიწყებია და ამბობს:

ომელს პირუტყვის გრძნობა ბევრით სჯობს  
მით, რომ სამშობლო არ აგონდება.

ვინ არის ჭეშმარიტი ადამიანი, პოეტის შეხედულებით?

ნამდვილი ადამიანია მხოლოდ ის, ვინც მოძმეს ეხმარება, გაჭირვებულს ხელს უწვდის და სამშობლოს აყვავებას ხელს უწყობს.

სადაც უნდა იყოს პოეტი, ის მუდამ სამშობლოს იგონებს, მუდამ მისი ნახვა ენატრება.

ჩემ სამშობლოს ვიგონებ,  
ნახვას ველირსებოდე. —

ნატრობს პოეტი.

სამშობლოს მოგონება პოეტის გულს სიყვარულით ავსებს, სულს ამალღებს, გუნებას ოცნების სფეროსაკენ იტაცებს, ყველაზე უძვირფასესი სიტყვა პოეტისათვის სამშობლოა; ყველაზე უძლიერესი ნატვრა სამშობლოს აყვავებაა.

მაცოცხლე და მანატრე,  
თუნდ საფლაეში ედნებოდე,  
აყვავებულ სამშობლოს  
თუკი მოვესწრებოდე!

ჰალადიდელის გრძნობა სამშობლოსადმი თავის გულწრფელობით ხიბლავს მკითხველს და იწვევს მასში შესაფერ გამოხმაურებას.

ჰალადიდელის ნიჭის ერთ დამახასიათებელ მხარეს სატირა და იუმორი შეადგენს.

ჰალადიდელის სატირა საკმაოდ მჭრელია, მაგრამ მწველი აო არის და გესლიანი, როგორც აკაკის სატირა.

საუცხოოა ამ მხრივ ჰალადიდელის „სიზმარი“, მოხელეს რომ სიზმარში ორდენი ელანდება.

არ ვიცი, ვის მოეტანა,  
ანუ ვის გამოეგზავნა,  
ოღონდ ვნახე, ყელზე ჭილდოთ  
დაეკიდნათ ჩემთვის „ანა“.

რამდენიმე სტრიქონში სამაგალითოდ არის დახასიათებული მოხელე, მთელის მისის სულიერი ავლა-დიდებითა და მისწრაფებით.

ჰალადიდელის იუმორი მსუბუქია, უწყინარი, სიტყვამოსწრებული და მკვირცხლი. ჰალადიდელის მთელ პოეზიაში ეროვნულ-დემოკრატიული ჰანგია აჟღერებული.

ამიტომაც მიყვარს ფაცხა  
ღარიბული, არმდიდრული. —

გვეცხადებს ავტორი ერთ-ერთ საუკეთესო ლექსში.

მთელი მისი პოეზია იწვევს მკითხველში სიყვარულს მოძმისადმი, დაჩაგრულთადმი, შრომისა და მამულისადმი; აღვიძებს მისწრაფებას ერთობასა და თანასწორობისადმი. ავტორის მთელი სიმბათია „შრომის შეილისაკენ“ არის; ის მტერია მუქთახორობისა, წოდებრივი უთანასწორობისა და მთელს იმედს საქართველოს აღორძინებისას ამყარებს ღარიბული ფაცხიდან გამოსულ ხალხზე.

## ა კ ა კ ი <sup>1</sup>

ცხოვრების გზაჯვარედინზე, იქ, სადაც საზოგადო და საპირადო ერთიმეორეს შორდება, პირქუში დედაბერი იჯდა და ცხოვრების ძაფს რკინის თითისტარზე ართავდა.

ურიცხვი ხალხი ზღვასავით ღელავდა.

საპირადოსაკენ მიმავალ გზაზე ტევა არ იყო. ერთი მეორეს ეცილებოდა გასწრებას.

მეორეზე კი აქა-იქ მოჩანდნენ მიმავალნი.

ყრმა ვინმე უცხო შედგა დედაბრის წინაშე და გადაშლილ მანძილს გაუხწორა თვალი.

-- მითხარი. საით წავიდე, რომ მიზანი ჩემი ვიპოვო? — ეკითხება ის დედაბერს.

დედაბერი ხმას არ იღებს და შეუჩერებლად ართავს ცხოვრების ძაფს.

ბასუხის მომლოდინე ყრმას გულმა უქარნახა:

რადგან არ დასდევ არცა პატივსა,  
არც დიდებასა ამა სოფლადა,  
ბრმად რომ მონებენ საზოგადო აზოს  
და შეუპოვრად დახვალ ობლადა, —

ამიტომ გასწი იმ გზით, საითაც ცოტაა მიმავალიო.

ყრმა გაუდგა გზას. დიდხანს იარა შეუუსვენებლად. მის წინაშე უდაბნო გადიშალა. დაქანცული შედგა, კლდის ძირს ჩამოჯდა ქვაზე და თვალები დახუჭა, რომ უფრო სრულად ჩაძირულიყო ფიქრთა მორევში. მას მოაგონდა დედ-მამა, დები, ძმები, ნათესაეები, ოჯახი... ყურში თითქოს ვილაცამ ჩასძახა: დაბრუნდი, დაბრუნდიო.

— არასოდეს. — წარმოთქვა მან:

არ დაეგდებ მე ამ გზასა,  
რა გინდ იყოს ეკლიანი,

<sup>1</sup> წაკითხულია 1915 წ. 25 მარტს, ქართულ კულტურის მოყვარულთა საზოგადოების მიერ აკაკის სახსენებლად გამართულ დილაზე.

ვიცი, სხვებიც მომყვებიან,  
ჩემებრ შავბედ-ეტლიანი.

წამოდგა ზეზე, რომ განეგრძო გზა, მის წინაშე შავით შებურვილი ქალწული იდგა; სახე მისი უსაზღვრო, აუწერელ, გამოუთქმელ სევდას შეეპყრო.

— შითხარი. ვინ ხარ ან საიდან მოსული? — ეკითხება ყრმა.

— აი დალიე და გაიგებ. — უპასუხა ქალწულმა და ყრმას სურამი მიაწოდა.

ყრმა მოწყურებული იყო, ის დაეწაფა სურას.

ყვავილთა სურნელება, ფრინველთა გალობა, ცისარტყელას ფერადები, მზის სიცხოველე და სინათლე, ვარსკვლავთა ციალი, მთვარის საიდუმლოება — აისა და ქვეყნის სილამაზე ძაგ სურამია, შენი ერის ოხვრასა და ცრემლებში გაღესილი. — წარმოთქვა ქალწულმა. — ვინც ერთხელ დაღვეს ამ სასმელს, იგი თავის თავს აღარ ეკუთვნის.

— მაშ ვის? — დაეკითხა ყრმა.

— უკან გამომყევი და გაიგებ.

დიდი მანძილი გადაიარეს... ერთს უცხო წალკოტს მიაღვინე.

რასაც კი თვალი ისურვებს,  
ან გული მოინატრებსო,  
სულ აქ ყოფილა, ღეთის მადლით  
სრულად ვერაფერს აკრებსო.

წალკოტის მცხოვრებნი საღათას ძილით იყვნენ შეპყრობილნი. არ ეძინა მზეთუნახავს, მაგრამ წალკოტს გველუშაპი დაჰპატრონებოდა და მზეთუნახავის დღე დათვლილი იყო.

საუცხოო სანახავი იყო მზეთუნახავი, — ის იტანჯებოდა და ტანჯვაში კიდევ უფრო მშვენიერი ჩანდა.

— აი, ვის ეკუთვნი შენ, — მიუთითა ქალწულმა ყრმას მზეთუნახავზე. — შენ უნდა იხსნა ის განსაცდელისაგან.

— მაგდენი ღონე მე სად შემწევეს! — ოხვრით მიუგო ყრმამ და თვალი მზეთუნახავს მიაპყრო.

— შენ უნდა გააღვიძო საღათას ძილით შეპყრობილნი. მათი საერთო ძალა იხსნის მზეთუნახავს.

— რით, რა საშუალებით?

— აი, ჩონგური. ჩამოჰკარი თითები და გამოაღებინე ციურა ხმები, რომლებიც მკვდარსაც კი ააყენებს საფლავიდან. — მიუგო ქალწულმა, გადასცა ჩონგური და გაქრა, ვითარცა მოჩვენება.

ყრმამ ახედ-დახედა ჩონგურს, გადასინჯა სიმები, ჩამოჰკრა თითები და გაისმა უცხო სიმღერა:

გავკაეებივარ შავ ბედსა,  
 დავდივარ შეუპოვარი!  
 ვერ შემაშინებს რისხვით ცა,  
 კირზედა კირის მთოვარი!  
 არ ვულალატებ სინიღისს,  
 თავს შევინახავ წმინდადა,  
 და ჩემს სიცოცხლეს ვიგულებ  
 ჩემის სამშობლოს წინდადა.  
 ოფლით მოერეცხავ სამშობლოს,  
 იმ წმინდა სისხლით ლებულსა.  
 რომ შევეყარო პირნათლად  
 იქ, ჩვენს წინაპრებს, ქებულსა!  
 და აქ კი შესანდობარსა  
 ჩაუარაკრავებ კულითა  
 და შემოვძახებ თამამად,  
 გრძნობით ალესილის გულითა;  
 ჩონგურო, ჩემო დიდებავ,  
 და ძლიერებავ, კალამო,  
 ზოგჯერ ფინთიხო გულისა,  
 ზოგჯერ წყლულისა მალამო!  
 ნუ გამომილევ ძალ-ღონეს  
 საბრალო მუშას — მთესველსა,  
 მებრძოლსა გულგაუტეხელს,  
 ბნელში იმედით მკვესელსა...

ამ დღიდან ყრმას ჩონგური ხელიდან აღარ გაუგდია, სანამ მისა-  
 გული ჩონგურის სიმებს არ დაადნა, სულიც არ დაიცალა...

ვინ არის მზეთუნახავი?

ცხრაკლიტულში მჯდომარე, ცაფირუზ, ხმელეთზურმუხტიანი,  
 მრავალტანჯული, მაგრამ ტანჯვაში კიდევ უფრო მშვენიერი ჩვენი  
 ტურფა სამშობლო.

შავით შებურვილი და უსაზღვრო სევდით შებყრობილი ქალ-  
 წული?

ჩვენი სამშობლოს ბედი.

ვინდაა ეს უცხო ვინმე ყრმა, მებრძოლი გულგაუტეხელი, რო-  
 მელიც გაჭირვებასა და შავ ბედს ჩონგურით და სიმღერით უხვდე-  
 ბა?

ჩვენი ტკბილი აკაკი.

ჯადოსანი, რომელიც თავის სევდას მხიარულად მოგაჩვენებთ  
 და გოდებას სიმღერად;

ჯადოსანი, რომელიც თავის ჭმუნვას ღიმილად დაგანახვებთ და  
 ცრემლებს სიცილად.

— აი, აკაკი.

თუ იღია ფიქრია საქართველოსი. მისი გონიერება. — აკაკი

გრძნობაა ქართველი ერისა, ქართველი ერის გული. ქართველი ერის სულთა-სწრაფვის, მის უწმინდეს გრძნობათა მეტად ძლიერი, მეტად ღამაზი ტალღა.

ქართველი ერის სიხარული და მწუხარება, ქართველი ერის სიცილი და გოდება, ქართველი ერის ღიმილი და სევდა, ქართველი ერის ზრახვანი, ოცნება და იმედი, შეურყეველი იმედი, რომ მომავალი მაინც მისია. აი, მთელი შინაარსი ამ ტალღისა.

თეთრი ქაფი, ამ ტალღაზე მოლივლივე — ეს ხომ აკაკის სიცილია. სიცილი, რომელიც იმედის სხივად ჩაქსოვილა მთელს მის პოეზიაში.

სიტყვის ღმერთი, რომელიც სიტყვას კიდევ ათამაშებს, კიდევ ამღერებს, კიდევ ატირებს, კიდევ აცინებს — აი, აკაკი.

არავის სიტყვა ისე არ უყვარს, როგორც აკაკის.

სამაგიეროდ, სიტყვასაც ისე არავინ არ უყვარს, არავის ისე არ ემორჩილება, როგორც აკაკის.

რუსთველმა სიტყვა მარმარილოდან გამოჰკვეთა — სიტყვა მშვენიერი, სიტყვა დიდებული, სიტყვა მზიური, სიტყვა უნაკლოდ შემოხაზული.

აკაკიმ სიტყვა ქართველი ერის დაკოდილი გულიდან ამოსჭრა, საკუთარ ცრემლსა და ნაღველში ამოავლო, შიგ ჩააწნა, ჩააქსოვა სიმღერა, სევდა, ცრემლები, შხამი, იმედი და გარეშემო სიცილის ნაზი სამოსელი შემოავლო.

აკაკის სიტყვა მთელი ქართველი ერის სიხარული და სევდაა, ჭმუნვა და სიცილი, — მთელი ქართველი ერის რწმენა. სასოება და იმედი.

აკაკის სიტყვა — დაუდგრომელი, მუდამ მოძრავი. ცელქი, ცქრიალა, კობტა, ღამაზი, მოსხლეტილი, მალი და ბასრი — ერთსა და იმავე დროს კიდევ მღერის, კიდევ იცინის, სევდით იწურება. იმედით ივსება და შხამსა და გესლში დაფერილ ისრებს აფრქვევს.

სიმღერით ის აღვიძებს და სულიერად ამაღლებს აკაკის სამშობლოს. რომლის აწმყო სურათი მას სევდით ავსებს.

შხამიანი ისრებით ის გულს უგმირავს სამშობლოს მოღალატეს, მტერსა და ორგულს.

სიცილითა და იმედით ამხნევენს ყველა გულგატეხილს:

რაგანღ ბელით ვიყო კრული,  
საშინელიც მჭონდეს ბოლო,  
არ შედრკება ჩემი გული,  
ვინდა ქვითაც ჩაეჭოლო.

მუდამ მხიარულს, მუდამ ხალისიანს. მუდამ სიცოცხლით აღ-



სავსეს, მას ყველგან სიციცხლე. ყველგან სისხლისე, ყველგან იმედი და მხიარულება შეაქვს.

ის მარად ჯოჯოხეთს ატარებს გულით. მუდამ ქვეყნის პირით არის დატვირთული, მაგრამ მაინც მხიარულია, მაინც იცინის და სხვასაც ამხიარულებს, სხვასაც აცინებს:

არ მშორდება მწუხარება და კირი,  
მაგრამ მაინც სულ ვიცინი, არ ვსტირი!

ხოლო თუ ჩავუკვირდებით აკაკის სიცილს, შიგ ბლომად დავინახავთ ცრემლსაც, სევდასაც.

მაშ, სად არის სათავე, მიზეზი ამ „ბნელში იმედით მკვესელის“ სევდისა?

დაბადებული მზის მგოსნად, სიკვდილს რისთვისა ნატრობს; დაბადებული სრული ბედნიერებისათვის ცრემლს რატომ აფრქვევს?

სანამ ჩემი საყვარელი  
ქაჯებსა ჰყავთ ცხრაკლიტულში,  
ვინ მალირებს სასუფეველს, —  
ჯოჯოხეთი მიძევს გულში.

ვინ არის ეს შეუბრალებელი საყვარელი, რომელიც მგოსანს არსად არ შორდება, მოსვენებას უკარგავს, სტანჯავს და აწამებს?

ძველი ტურფა, დღეს მკვდარივით მძინარი,  
ფენშიშველი თავზე ლეჩაქმონდილი, —  
უგრძნობლად ჰხდის, საწყალს, საღათას ძილი!  
თავს ვადვივარ მისი კირისუფალი.

აი, ვინ ყოფილა. აკაკის სატრფო, აკაკის საყვარელი!

ჩვენ ვიცოდით, რომ სამშობლოს სიყვარული ადამიანის მოვალეობაა.

ჩვენი პოეტების უმრავლესობა ამ სიყვარულს გონებას უმორჩილებს.

აიღეთ რაფიელის უკვდავი ლექსი: „სამშობლო ხევსურისა“.

სადაც ვშობილვარ, გავზრდილვარ და მისროლია ისარი,  
სად მამა-პაპა მეგულვის, იმათი კუბოს ფიცარი,  
სადაც სიყრმითვე ვჩვეულვარ, ჩემი სამშობლო ის არი!

დიდებული სიტყვებია, უკვდავი; მაგრამ ყოველი სიტყვა აქ გონების ნაკარნახევია, ნაფიქრია.

აკაკიმ მამულის სიყვარული მშრალ გონებას ხელიდან გამოჰკვლიჯა და გულში მოათავსა. მამულის სიყვარული მისთვის მოვალეო-

ბა კი არ არის. გრძნობაა, ძლიერი, წარმტაცი, დამათრობელი გრძნობა.

სხვებმა შეგვაგნებინეს ეს სიყვარული.

აკაკიმ კი გვაგრძნობინა — გულით, მთელის ნერვებით გვაგრძნობინა და ამ გრძნობის სინაზე. სიწმინდე, ძლევამოსილება და მომხიბლავი, დამათრობელი სიტკბოება მთელს არსებაში გაგვატარა.

სამშობლოს სიყვარულში აკაკიმ იმდენი გრძნობა, იმდენი ალერსი ისეთი ნაზი, მომხიბლავი, დამატყვევებელი სევდა შეიტანა, რომ ჩვენ ყველას აგვინთო ცეცხლი ამ სიყვარულისა და თავისი სევდა ეროვნულ სევდათ გადააქციაა, — მთელს ერს აგრძნობინა ეს სევდა.

სამშობლო მან დაგვიყენა თვალწინ მშვენიერ ქალწულად, ნესტან-დარეჯანდ. რომლის მარტო ხილვა ადამიანს სიყვარულით ათრობს, აჯადოებს.

მშვენიერო, შენ გეტრფი,  
შენი მონა, ერთგული,  
შენთვის სულდგმულს, შენგანვე,  
შენთვის მიძგერს ეს გული!  
მეგულები ციხეში,  
ცხრაკლიტულში მჯდომარე..  
შეთვისებას გიპირებს გაიძვერა მოყვარე...  
გაუფროხილდი, ნუ გჯერა  
მაგის ტკბილი ნანინა.  
შენზე წინათ სხვაც ბევრი  
მოხიბლა, შეაცდინა.  
გაუმაგრდი განსაცდელს,  
აიტანე ტყვეობა!  
შენის ნესტან-დარეჯანს  
მაგალითი... მზეობა.

რომელ შეყვარებულს გამოუთქვამს ასე უბრალოდ და თან ასე ძლიერად თავისი გრძნობა?

აქ სამშობლოს სიყვარულის მშრალი მოვალეობა არ არის, აქ თვითონ სიყვარულია. აქ ანკარა ნაკადულია სპეტაკი, ძლიერი, თავის დამავიწყებელი სევდითა და იმედით სავსე გრძნობისა.

ამის შემდეგ მზად ხართ დაეკონოთ სამშობლოს მიწას, ეამბოროთ მას და პოეტთან ერთად შესძახოთ:

ცა-ფირუზ, ხმელეთურმუხტო,  
ჩემო სამშობლო მხარეო,  
შენი ვარ, შენთვის მოეკვდები,  
შენზედვე მვლოეიარეო.

სამშობლოზე მგლოვიარე, სამშობლოს ჭირისუფალი — აი, აკაკი. განა ყველა ჩვენი დიდი პოეტი სამშობლოს ჭირისუფალი არ არის. სამშობლოზე მგლოვიარენი?

კი, მაგრამ აკაკის სევედა და გლოვა მაინც უფრო ნუგეშიანია, იმედით სავსე, გამამხნევებელი, სულის ჩამდგმელი, ადამიანის გმირად გადაქცევი...

აკაკიმ იმთავითვე გამოაცხადა თავისი რწმენა:

რაც ძალადობით წაიღეს,  
ვინ დაიბრუნებს ნებიითა?  
ვინ ნახა თავისუფლება  
ტანჯვით და მოთმინებითა!

ინდა —

სხვისი იმედი რას არგებს  
თავისუფლების მძებნელსა?

ერთადერთი იმედი აკაკის ხალხისა აქვს.

ხალხი უნდა გამოფხიზლდეს, წელში გამაგრდეს, გონებრივად და ქონებრივად მოლონიერდეს და თვითონ გახდეს თავისი თავის ბატონ-პატრონი — აი, აკაკის შეხედულება.

და მართლაც მან მთელი თავისი სიცოცხლე ხალხის გამოფხიზლებას მოანდომა.

მან მოსტაცა მზეს ცეცხლი, დაინთო გულში, აენთო სამშობლოს სამსხვერპლოზე. დაიწვა, დაიფერფლა, და თავის მიზანს კი მიაღწია.

მისი სიტყვები:

მაშინ იქუხებს, იელვებს  
ხალხთ ძალი მიძინებული. —

წინასწარმეტყველებასავით აღსრულდა: ხალხის მიძინებულმა ძალამ მართლაც იქუხა, იელვა.

ჩვენ ვინილეთ ბრწყინვალე მზე ამ ქუხილისა და ელვისა. მან ცოტა ხნით გააშუქა ჩვენი ბნელი ცხოვრება და ღრუბელს ამოეფარა...

აკაკი მაშინ იმ ხანში იყო, როდესაც ადამიანი ასეთ მოვლენას თუ მტრულად არა, გულგრილად მაინც უყურებს.

როგორღა უყურებდა აკაკი?

„დღევანდელს ამბებს ისე შევხარით, — სწერს ის, — როგორც დედა შეჭხარის შვილის პირველი ბიჯის ადგმას. ახალი ფეხადგმული ბარბაცებს, აქეთ-იქით ეხლება უსწორმასწოროდ, ეცემა, მაგრამ დედა გაორკეცებულის სიფრთხილით ადევნებს თვალყურს, რომ არსად გადაიჩხოსო. სახარულით უხარია კი, რადგანაც დარწმუნებუ-

ლია, რომ მისი შვილი კუტი არ არის და რომ წამოიზრდება. მაშინ უდედოთაც სწორად გაივლის. ჩვენც ველით იმ დროს და სიხარულით შევყურებთ დღევანდელ დღეს“.

აიღეთ შესანიშნავი ლექსი, რომელიც მან უძღვნა ამ ხანას:

სიუმაწვილიდან მოხუცებამდე  
ეს მაწვა გულზე, როგორც რომ ლოდი.  
და ხალხის ჩვენში გამოღვიძებას  
ერთხელ ოდესმე მეც მოველოდი.  
მადლობა უფალს; რომ მოვესწარი  
ჩემი სურვილის ასრულებასა,  
და ვით ბუღბული დაბერებული  
მეც დროს ვუგალობ „ქებათ-ქებასა“.  
ხალხი მღელვარებს, ვაშა მის ღელვას! —

ამას წერს სამოცდაათი წლის აკაკი!

ქეშმარიტად ვაშა, ათასჯერ ვაშა მარტო დიდ მგოსანს კი არა დიდ მოქალაქეს, რომლის გულსაც თვით ყოვლადშემძლებელი დროც კი ვერავეითარ დაღს ვერ აჩენს.

ასეთ ადამიანზე სხვაგან ლოცულობენ, მის ყოველ სიტყვას წმინდად ასრულებენ, ჩვენ კი მის ანდერძსაც კი ფეხქვეშა ვთელავთ! მე მოგახსენებთ იმ ანდერძზე, რომელიც მის ნაწარმოებშია.

რა სწერია ამ ანდერძში?

ნუ დაპკარგავთ ეროვნებას და გაუფრთხილდით სამშობლო მიწა-წყალსო. აი, რა გვიანდერძა ჩვენი მამულის უდიდესმა მოამაგეჰ.

დაე, კრულ იყოს, შეჩვენებული მისი სახელი, ვინც დღეის შემდეგ ეს ანდერძი აკაკისა გასტეხოს.

კრულ იყოს, შეჩვენებული მისი სახელი, ვინც საქართველოს მიწა-წყლის თუნდაც ერთი მტკაველი, ერთი ზელისდადება ქართველ ხალხს დაუკარგოს.

1915 წ.

## პოეზიის წლისთავზე

სამყარო მიუწვდომელი მშვენიერებაა ყოველმხრივ. ადამიანთა ცხოვრება კი სხვადასხვა სიმახინჯით სავსე.

ყოველგვარი სიმახინჯის დაძლევა და ძირიან-ფესვიანად აღმოფხვრა — აი, მიზანი ადამიანისა.

სიმახინჯე არსებობდა, არსებობს და ალბათ დიდხანს იარსებებს კიდევ ცხოვრებაში, მაგრამ მას არა აქვს არავითარი უფლება არსებობისა.

და მე ღრმად მწამს, რომ ადამიანი, ბოლოს და ბოლოს, დასძლევს მას სამუდამოდ და ცხოვრება იქნება მშვენიერი, უნაკლო, ისე, როგორც თვით სამყარო.

აი, ამ ბრძოლაში მშვენიერების საბოლოოდ და სამუდამოდ გასამარჯვებლად პოეზიას უდიდესი მნიშვნელობა აქვს.

პოეზია ყველგან და ყოველთვის ქმნიდა და ქმნის ახალ სინამდვილეს. რომ მახინჯ სინამდვილეს ცხოვრებისას მისცეს ახალი სახე.

ამ მიზანს აღწევს პოეზია როგორც შინაარსით, ისე სახით.

შაირობა პირველადეე  
სიბრძნისაა ერთი დარგი.

ქართულ პოეზიას მუდამ ახასიათებდა როგორც აზრი, ისე ფორმა. ამ გზას მისდევს დღესაც ქართული პოეზია.

ყოველ დროს თავისი აზრი აქვს და თავისი გრძნობა.

პოეზია სათავეში უნდა ედგეს თავის დროს, უნდა ჰქონდეს შეგრძნობა. წინაცნობა მომავლისა. ამავე დროს ყოველივე ვითარდება და ამ განვითარებას ყველგან და ყველაფერში შეაქვს ცვლილება... პოეზია ამ საერთო განვითარების გზაზე წინ უნდა უსწრებდეს არსებულ სინამდვილეს, უამისოდ მას აზრი ეკარგება.

თანამედროვე ქართული პოეზია ამ მხრივ მეტად საყურადღებოა: ის ჩქარისა და მტკიცე ტემპით ყალიბდება როგორც ახალ რაზმში, ისე ახალ ფორმებში.

თითქოს გუშინ იყო: ჩვენს პოეზიას გარკვეული დედააზრი ჰქონდა, ჩამოყალიბებული ფორმა და პოეზიის ასპარეზზე იდეური ბძოლა არ იყო გამძაფრებული.

ახალი ფორმების და შინაარსის ძიების გზაზე თანამედროვე ქართული პოეზია ლირიკის რკალში მოექცა და არც კი ცდილობს ამ რკალის გარღვევას.

ლირიკა საუცხოო ყვავილია პოეზიის ბაღში. რა ტყბილად აგერებს ჩვენს გულს თანამედროვე ქართული ლირიკა, რა საამოდ ატოკებს ჩვენს ნერვებს, რა ლამაზად არხევენ ჩვენს კუნთებს და ნეტარებით ავსებს ჩვენს სულს!

მაგრამ პოეზიის დიდ სისტემაში ლირიკა მეტად პატარა ცთომილია, ქართულ პოეზიას კი მზე უნდა. მზისაკენ გაქანება. მზის დაპყრობა.

რუსთველმა იხსნა საქართველო დაღუპვისაგან საუკუნეთა განმავლობაში.

თანამედროვე ქართულმა პოეზიამ უნდა აზიდოს საქართველო ჯერ არნახულ სიმაღლემდე.

ჩვენი პოეზიის გასული წელი მდიდარი იყო ლირიზმით. უკვე ცნობილ სახელებს ემატებიან ახლები. მაგრამ წარსულმა წელმა ლირიკის რკალში უკვე შეიტანა ერთგვარი დეკადანსი: გამეორება, რითმებისა და მეტრის ტაციობა.

ლირიკის რკალი უკვე მომწიფდა გასარღვევად.

პოეზიის ახალმა წელმა უნდა იცისროს ეს:

მოშიარე არა ჰქვია, ვერას იტყვის ვინცა გრძელად.

1923 წ.

## ეგნატე ნინოშვილი

(მისი ძეგლის გახსნის გამო)

დღეს ჩვენ ვხსნით ეგნატე ნინოშვილის ძეგლს.

ეს არის ადამიანის ხელით გაკეთებული, ეგნატეს მარადი ხსოვნის შესანახად დადგმული ძეგლი.

ის ქვითა და კირით არის შედგენებული.

ქალაქის შუაგულ ალაგას დადგმული, ის ჩაფიქრებული და თითქოს ოდნავ დაღონებული გასცქერის მუდამ ხალხით სავსე ქუჩას.

გაივლის დრო და, ვინ იცის, იქნებ ეს ძეგლი კიდევ წაიქცეს. მაგრამ ეგნატეს ხსოვნა მაინც იცოცხლებს მშრომელი ხალხის გულში.

მოდგმა მოდგმას გადასცემს ეგნატეს უკვდავ სახელს. გულის სიღრმეში ჩამარხავს ეგნატეს ხსოვნას მომავალ თაობათა მთელი წყება და ისე, როგორც დღემდე არ დავიწყებულა მისი სახელი, მას არც შემდეგში წაეფარება დავიწყების ხავსი.

ვინ იყო ეგნატე?

რატომ უყვარს ის მშრომელ ხალხს?

რატომ აფასებს მას?

ეგნატე ნინოშვილი ღარიბი გლეხკაცის შვილი იყო.

ის მოესწრო იმ დროს, როდესაც ბატონყმობის ულლიდან განთავისუფლებულ გლეხკაცს კიდევ უფრო მძიმე და მწარე უღელი დააწვა კისერზე.

უმიწაწყლო გლეხს ძველი ბატონის გარდა ახალიც გაუჩნდა. წარჩინებულ წოდებას გვერდში ამოუდგა „ფულიანი ხალხი“, მარად დღიწყო მან ობობას ქსელის ხლართვა და როცა სოფლის სიმწარით გაბოროტებული გლეხი ქალაქს მიადგა, აქ მას ეს ფულით გათავადიშვილებული ბატონი დახვდა.

სოფლად ვაის გაყრილი გლეხი, ქალაქად ვუის შეეყარა.

ეგნატე მოესწრო იმ დროს, როდესაც ცხოვრების ჩარხმა ჩვენი ბრწყინვალე წოდებისათვის უკულმა იწყო ტრიალი.

თავადაზნაურობას ახალმა ხალხმა, გუშინდელმა ვიგინდარებმა, მოუნდომეს დაჩრდილვა.

შიშველა წოდებას ფასი ეკარგებოდა, პირველობა ახლადჩასახულ ვაჭარულ-მრეწველობის თაოსანთა „პირადი ღირსებისაკენ“ გადაქანდა.

იმდროინდელი საზოგადოების სურათი დაახლოებით ასეთი იყო: ნიადაგშერყეული თავადაზნაურობა, ახლადჩასახული ბურჟუაზია და, მათ შორის, როგორც გრდემლსა და უროს შუა მომწყვდეული, სოფლად გლეხი და ქალაქად სოფლიდან სიღარიბისაგან თავდასალწევად გამოქცეული იგივე გლეხი, ქალაქში უკვე მუშად გადაქცეული.

ეგნატე თვით გლეხის შვილი იყო. გაჭირვება და სიღარიბე არ მოსცილებია მას აკენიდან საფლავამდე.

ის მთელი არსებით გრძნობდა ქვეყნის უსამართლობას და რითაც შეეძლო, იბრძოდა მის წინააღმდეგ.

მაგრამ ან კი რით შეეძლო ეგნატეს ბრძოლა?

ერთადერთი საშუალება მაშინ ის იყო, რასაც მან მოჰკიდა ხელი.

ახალგაზრდობაში შეგნების შეტანა და მათში ბრძოლის წყურვილის აგზნება: ეგნატემ პირველმა გააჩაღა ჩვენი ამნაირი მუშაობა.

ის თავს უყრიდა ახალგაზრდობას. აცნობდა მას არსებულ უკუღმართ ცხოვრებას და ასწავლიდა ამ ცხოვრების საშუალებას.

მაგრამ მარტო ეს მუშაობა ვერ დააკმაყოფილებდა ეგნატეს.

მას სწყუროდა ფართო ასპარეზი, მისთვის ოცნებად იყო გადაქცეული ტვირთმძიმეთა და მაშვრალთა შორის ყოფნა, მათ შორის საქმიანი ტრიალი, მათთვის გზის ჩვენება და წინ წაძლოლა.

საამისო პირობები იმ დროს არ იყო.

ეს უკლავდა ეგნატეს გულს, ეს უმოკლებდა მას დღეს და ჩქარის ნაბიჯით მიაქანებდა საფლავისაკენ.

მაგრამ ამ პირობებშიაც მან მოახერხა წარუშლელი კვალის დატოვება.

მან მოჰკიდა ხელი მხატვრულ მწერლობას, რომ თავის მოთხრობებში გამოიყვანა „ჩვენი დროის რაინდები“, დაენახვებინა მკითხველისათვის ტარიელ მკლავაძეების საზიზღარი სახე, დაეპირდაპირებინა მათთვის წმინდა და სპეტაკი სპირიდონ მცირიშვილები იმ სახით, რომ მკითხველს არჩევანი არ შეშლოდა, რომ ნაკლებად გაგებულად აღვივლად მიხვედრილიყო, ვინ იყო ამ ორ, ერთიმეორისათვის დაპირდაპირებულ პიროვნებათა შორის მტყუანი და მართალი.



ეგნატეს სხვა დანარჩენ მოთხრობებშიაც სწორედ ამავე სახითა ჰყავს დაპირისპირებული ერთმანეთთან დაჩაგრული და დაჯაბნეული გლეხი, ერთი მხრით, მეორე მხრით კი, ძალადობაზე დამდგარი მკლავაძეები. მათი ქომავი მთავრობის პოლიციელები, სამღვდლოება და მოსე მწერლები.

ეგნატე არაფრით და არაფერში ჰგავდა იმ მწერლებს, რომლებიც გატაცებული აღფრთოვანებით ხიბლავდნენ მკითხველებს ბუნების სიმშვენიერეთა დახატვით, ის არ უმღეროდა „უუუუნა თვალებს“, „წითელ ღვინოს“.

მის ხელში კალამი იყო იარაღი ბოროტების დასაბრუნებლად, ქვეყნად არსებული უკუღმართობის ძირის ამოხადებლად.

ამიტომაც, რომ როდესაც ეგნატეს მხატვრულ ნაწარმოების გარჩევაზე მიდგება საქმე, ხშირად გვესმის, ნინოშვილის ნაწერებში შინაარსი ძალისძალათი არის ჩამწყვდეული ხელოვნურად დაუმუშავებელ ფორმაში.

ეს სიმართლესთან დაშორებული არ არის.

მოთხრობის სახე ეგნატეს ნაწერებს ჰქონდა მხოლოდ იმიტომ, რომ იმდროინდელ პირობებში სხვანაირად წერა არ შეიძლებოდა. ვინ იცის, ჩვენ დროს რომ მოსწრებოდა, ეგნატეს იქნებ არც ერთი მოთხრობა არ დაეწერა.

უფრო მოსალოდნელია, რომ ის, ხელოვანი, ფაქიზი იგავ-არაკებით მოსაუბრე კალამს ბრძოლის მეკვეთე ლახვარს ამჯობინებდა და ქვეყნად არსებული ბოროტების წინააღმდეგ გოგია უიშვილებს კი არ ალაპარაკებდა, არამედ თვითონ იტყოდა.

ჩვენს დრომდე მიღწევა ეგნატეს არ ეღირსა.

გაკვირვებამ, შიშშილმამ, სნეულებამ და უფრო მეტად კი იმ დროის საშინელმა პირობებმა ჩქარა მოუღეს მას ბოლო.

დღეიდან მისი ძეგლი ჩვენ მულამ თვალწინ გვექნება.

ეგნატე ნინოშვილი კუდიანი ვარსკვლავივით შემოიჭრა ჩვენი ცხოვრების და მწერლობის ცაზე, გაანათა ისეთი გზები ჩვენი ცხოვრებისა, რომელსაც ვერავინ ვერ ამჩნევდა და უცბად დაიწვა საკუთარი გულის ცეცხლში, რომ უკვდავების გვირგვინი დაედგა, დაუვიწყარი ხსოვნა დაეტოვებია და უკვდავების სახელი მოეხვეჭა.

ეგნატე ნინოშვილი!

რა მოკლე იყო მისი სიცოცხლე, მის ახლომახლო გამვლელს ყოველთვის გაახსენებს ეს ძეგლი, რომ სწორედ ეგნატე იყო ის „პირველი მერცხალი“, რომელმაც ახარა მუშებს და გლეხებს გაზაფხულის მოახლოება.

ამაში პირველობას მას ვერავინ შეეცილება.

მან პირველმა „ჩაუსახა გულს იმედი“ დაჩაგრულს და დაბეჩა-  
ვებულს გლეხსა და მუშას.

მან ანიშნა და გააგებინა თავისი მოთხრობებით ყველას, რომ  
უკუღმართ ძალმომრეობაზე დამყარებული ქვეყანა უნდა დაინგრეს  
და რომ ეს ქვეყანა დაინგრევა კიდევ.

მწერლობაში, რამდენადაც ეს მაშინ შესაძლებელი იყო, სხვისი  
პირით ეუბნებოდა თავის მკითხველს, რომ მონობის ბორკილების  
დასამტვრევად საჭიროა ერთი პირი და თავგამოდებული ბრძოლა.

ფარულ კრებებზე და ყრილობებზე ის თავს უყრიდა და აკავ-  
შირებდა ახალგაზრდობას და ასწავლიდა მას ბრძოლის გზას.

ასეთი იყო ეგნატეს ხანმოკლე ცხოვრების თავგადასავალი.

ეგნატეს დღეს საქართველოს მუშათა და გლეხთა მთავრობა  
ძეგლს უდგამს.

პირველ ენადგმულ, პირველ შეგნებულსა და რევოლუციური  
ქინით გატაცებულ გლეხს, რომელმაც თავის არსებაში შეაერთა და  
შეათავსა ქალაქის მუშის ზნე და მისწრაფება, ეგნატე ნინოშვილს,  
დღეს საქართველოს მუშები და გლეხები დამსახურებული პატივის-  
ცემის ნიშნით უგებენ ძეგლს.

თვითეულ მუშას, თვითეულ გლეხს ამ ძეგლმა ერთი რამ უნდა  
გაახსენოს.

აი, დამწყები იმ დიადი საქმის, რომელიც დღეს გამარჯვებით  
დაგვირგვინდა.

ერთი იყო ის.

მის გარშემო უკუნი სიბნელე სუფევდა.

ის ერთი იყო, მაგრამ ამ სუსტმა და უღონო ადამიანმა პირვე-  
ლად გადაისროლა ბრძოლის ალის დამნთებელი ქინქლი.

დიდება და პატივი მუშათა და გლეხთა განთავისუფლებისათვის  
პირველად ბრძოლის ველზე გამოსულ ეგნატე ნინოშვილს.

რა ხანმოკლეა მისი სამწერლო წვა, სულ რამდენიმე წლით შე-  
მოფარგლული, მაგრამ რა ნაყოფიერი?!

ჩუმი, მაგრამ მრავლისმეტყველი.

თავმდაბალი, მაგრამ უკვდავების შარავანდედით შემოსილი.

უწყინარი, მაგრამ ბრძოლის ცეცხლით აგიზგიზებული.

სიყვარულით აღსავსე, მაგრამ ბოროტების შეუბრალებლად  
მამხილებელი.

დაჩაგრულთა მოსარჩლე და დამჩაგვრელთა სასტიკი მდევნელი.

მშრომელი ხალხის გულის მესაიდუმლე და მისი წინამძღოლი,  
გზის მაჩვენებელი.

რევოლუციის მედროშე და მისი წინამორბედი.

ახალი დროის წინასწარმეტყველია — ზი, ვინ იყო ეგნატე ნინო-  
შვილი.

„მინდა, რომ ვიყო ვარსკვლავი, განთიადისა მორბედი“, — ამ-  
ბობდა სულის უზენაეს სიმთა მპყრობელი ნიკოლოზ ბარათაშვილი.

ბედმა მას არგუნა ასეთი ხვედრი.

ვარსკვლავი, განთიადისა მორბედი, ეგნატე ნინოშვილია.

ნინოშვილი ქართველი ხალხის ახალი ისტორიის შესავალია.

ახალი ხანა ჩვენი ისტორიისა, ხანა ტანჯვისა, ხანა თავდავიწყე-  
ბული სასტიკი ბრძოლისა, ხანა უთვალავი მსხვერპლისა და გამარჯ-  
ვებისა ნინოშვილით იწყება.

ნინოშვილი მშრომელი ხალხის მემატრიანეა.

ნინოშვილი მებრძოლი თაობის წინამძღოლია.

ხან სოფლის მწერალი, ხან სოფლის მასწავლებელი, ხან ასოთ-  
ამწყობი, ხან მუშა, ნინოშვილი მუდამ ერთი აზრით, ერთი ფიქრით,  
ერთი სურვილით იყო გატაცებული.

თანამედროვეთა შორის ცხოვრობდა, როგორც ყოველი ხორ-  
ციელი, მაგრამ თანამედროვეობას არ ეკუთვნოდა. ტარიელზე ნათქ-  
ვამი სიტყვები ნინოშვილზედ გამოჰკრილია:

„სხვაგან ჰქრის მისი გონება, მისმან თავისა წონამან“.

ნინოშვილის გონება მუდამ სხვაგან ჰქროდა — მშრომელი ხალ-  
ხის მომავლისაკენ.

მისი სხეული ყოველდღიურ ცხოვრებაში ტრიალებდა, ის წყნა-  
რი იყო, ჩუმი, უჩინარი, მორიდებული, მოკრძალებული, შეუმჩნე-  
ველი; მისი გული კი მშრომელი ხალხის ბედის ქურაში იწვო-  
და და მისი ოცნება მშრომელი ხალხის მომავალს დასტრიალებდა  
თავს.

სხეულით სუსტი, მაგრამ რწმენით ძლიერი, დაუძლეველი, ის  
მალე დამიწდა იმისათვის, რომ მშრომელი ხალხის გამარჯვების  
გზაზე მუდამ ნათელ შუქად ყოფილიყო ამართული.

ნინოშვილი — მშრომელი ხალხის გულის მესაიდუმლე.

ნინოშვილი — მშრომელი ხალხის მედროშე.

ნინოშვილი — მშრომელი ხალხის მემატრიანე.

ნინოშვილი — მშრომელი ხალხისათვის ტანჯული.

ნინოშვილი — მშრომელი ხალხის მომავლის წინასწარმეტყვე-  
ლი.

უწინარეს ყოვლისა, ხელოვანია, ხელოვნება კი ჰუმმარიტების  
ძიებაა.

საზოგადოების ცხოვრებას არა აქვს ერთი ჰუმმარიტება, აქ

ქეშმარიტება იმდენია, რამდენიც არის წოდება, რამდენიც არის კლასი.

სხვა არის ქეშმარიტება ბატონისა, სხვა — ქეშმარიტება ყმისა სხვაა ქეშმარიტება თავადისა, სხვა არის ქეშმარიტება გლეხისა. სხვა არის ქეშმარიტება ბურჟუაზიისა, სხვაა ქეშმარიტება მუშისა.

ნინოშვილი დაიბადა გლეხის ოჯახში, აღიზარდა გლეხოებაში. შემდეგ ტრიალებდა მუშებში; თვითონ იყო მასწავლებელიც, მუშაც და ამიტომ მან შეიყვარა მთელი თავისი არსებით მშრომელი ხალხი, ცხოვრების მიზნად დაისახა მუშურ-გლეხური ქეშმარიტების ძიება.

ხელოვნების საშუალებით ასეთი ქეშმარიტების პოვნა მხოლოდ ერთადერთი გზით შეიძლება, ცხოვრების გადაშლით და იქიდან უტყუარი დასკვნის გამოტანით.

ეს გზა ხელოვანისათვის მეტად სახიფათოა და აქ აშკარადება, როგორც დიდი, ფართო გაქანების მხატვარი, ისე პატარა, ბეცი მემატინანე ცხოვრების წვრილმანებისა.

ცხოვრება არ არის დამდგარი ტბა, ის მდინარეა, რომელიც მანინაც კი ჩქარა მიდის, როდესაც გაჩერებული გეჩვენებათ. ცხოვრების გზაზე ზოგიერთი მოვლენა უკვე წარსულს ეკუთვნის, უკან უკან მიდის, ზოგში კი მომავალი ისახება, ბევრჯერ მხოლოდ ოდნავად ხელოვანის ნიჭიც იმაში მდგომარეობს, რომ ეს უბრალოებისათვის ჯერ შეუმჩნეველი, მაგრამ მომავლის მატარებელი მოვლენანი გამოიცნოს, გააშუქოს და სხვებს დაანახოს.

სწორედ ასეთი ნიჭით იყო დაჯილდოებული ეგნატე ნინოშვილი.

როგორც მხატვარი წვრილმანებისა, ის სუსტია. წვრილმანი, დეტალები მას არ იზიდავს, მისი ზოგიერთი მოთხრობა სრულებით არ არის დამუშავებული მხატვრულად. აჩქარება ეტყობა. აიღეთ „ქრისტიანი“, ეს ერთი საუკეთესო მოთხრობა ნინოშვილისა. აქ თქვენა გაქვთ მოცემული მხოლოდ ჩონჩხი მოთხრობისა, მას აკლია დამუშავება, გაშლა-განვითარება. სამაგიეროდ, ნინოშვილს არ გამოეპარება არც ერთი სურათი, სადაც მოიპოება ჩანასახი ცხოვრების მომავალი სახისა.

ნინოშვილი არ არის მემატინანე ყოველდღიური ყოფაცხოვრებისა.

მას აინტერესებს ზოგადი სურათი, საერთო სახე, დასკვნა მთელი ცხოვრებისა.

ნინოშვილს არ იზიდავს ცხოვრების პირწავარდნილი სინამდვილე, მას უყვარს დამახასიათებელი, დამაფიქრებელი, ტიპიური სა-

ხე, რადგანაც მხოლოდ ასეთი სახეები გვაძლევენ საშუალებას, მომავალს ავხადოთ ფარდა.

განკვერტა მომავლისა, დანახვა ჯერ არდანახულისა, აი, ნინოშვილის იშვიათი თვისება.

ნინოშვილმა გადაგვიშალა თვალწინ ჩვენი სოფლის მთელი ცხოვრება მის დამახასიათებელ მდინარეებაში.

ცხოვრების სათავეში წარჩინებული წოდებაა იასონ უქმაძე, მანუჩარ არწივაძე, განსაკუთრებით კი ტარიელ მკლავაძე — აი, ამ წოდების წარმომადგენლები.

ყოველ წოდებას, ყოველ კლასს აქვს სხვადასხვა ხანა, როგორც კერძო პიროვნებას, ახალგაზრდობა, მომწიფება და ვაჟკაცობა, შემდეგ სიბერე და დაძაბუნება; ახალგაზრდობისას ის ძალ-ღონეს იკრებს საბრძოლველად, დავაჟკაცების ხანაში მას გარკვეული მიზანი აქვს და ის იბრძვის ამ მიზნისათვის. შეიძლება დამარცხდეს არა ერთხელ და ორჯერ, მაგრამ ბოლოს გამარჯვება აუცილებელია, გამარჯვებისთანავე ის ჩაუდგება ცხოვრებას სათავეში და ფრთებს შლის მისი შემოქმედება ყოველ დარგში: პოლიტიკაში, მეცნიერებაში, ხელოვნებაში და სხვ. ამ ხანაში ყოველი წოდება, ყოველი კლასი ამოსწურავს საკუთარ ძალ-ღონეს და შემდეგ ბერდება, დაბუნდება, უნარი შემოქმედებისა ეკარგება. ზნეობრივად იხრწნება და მხოლოდ იმას სცდილობს, რომ მდგომარეობა შეინარჩუნოს. ამ დროს უსწრებს მას ახალი და უფრო ძლიერი კლასი. ფეხსა ჰკრავს და გადაადგდებს თავის გზიდან.

წარჩინებული, გაბატონებული წოდების დაძაბუნება ზნეობრივი გახრწნილება და მისი მოსპობის აუცილებლობა ისე მკვეთრად არავის დაუხატავს, როგორც ეს დაასურათა ნინოშვილმა.

ტარიელ მკლავაძე უკვდავი სახეა. შეხედეთ მას: ახოვანი ვაჟკაცი, მაგრამ ის ამოსულია დამპალ ნიადაგზე და იმიტომ მთელი მისი ძალ-ღონე იხარჯება ლოთობასა, გარყვნილებასა და სხვადასხვა ბოროტებაში. ის ყველგან და ყველაფერში დაუსჯელი რჩება, მისი ბოროტება გლეხის სიკეთეზე იმარჯვებს, მისი სიმტყუვნე გლეხის სიმართლეზე.

რატომ?

იმიტომ, რომ ის ეკუთვნის წარჩინებულ წოდებას, რომელიც ცხოვრების სათავეშია, ნინოშვილი გვახედვებს ამ ცხოვრებაში და ჩვენ ვხედავთ საშინელ ტანჯვას, უსამართლობას. უუფლებობას და ძალმომრეობას, რომელთა ქსელშიაც გახვეულია მშრომელი ხალხი.

უუფლებობისა და უსამართლო წყობილების ნიადაგზე ჩნდებიან თვით ხალხში მოსე მწერლები, რომლებიც ტარიელ მკლავა-

ძებთან ერთად წერბელასავით სისხლსა სწოვენ სასოწარკვეთილებაში ჩაეარდნილ ხალხს.

— ასე ცხოვრება შეუძლებელია, ნუთუ საშველი არსაით არ არის? — ჰყვირით თქვენ.

— საშველი არის, — დინჯად და იმედიანად გეუბნებათ ნინოშვილი. — ერთობა და ბრძოლა.

ნინოშვილის დროს მშრომელი ხალხის აზროვნებაში ეს შეხედულება არ იყო მკათიოდ ჩამოყალიბებული, მაგრამ მისი გონება რომ ამ გზით მუშაობს, ეს აშკარად ჩანს ნინოშვილის მოთხრობებში.

„პალიასტომის ტბაში“ ივანე დარწმუნებულია: „ყაზახებმა რომ ერთპირობა იცოდეს და ერთმანეთის ფხარის მიცემა. მაშინ...“

რა, მაშინ? — ივანე აღარ ამბობს, თითქოს ეშინია თავისი აზრის დაბოლოების და ხამამალა არ ამბობს, გულში კი კარგად იცის, რაც მოხდება მაშინ: „ყაზახები გაიმარჯვებენ“.

მშრომელი ხალხის წრიდან არის გამოსული სპირიდონ მცირიშვილი, რომელიც განზრახ დააჯილდოვა ნინოშვილმა სნეული აგებულებით, რომ უფრო ცხოველი ყოფილიყო ძლიერება, მისი მიზანია ხალხს შესწიროს თავისი სიციოცხლე, ხალხს აუხილოს თვალები და შეაგნებინოს, რომ მისი განთავისუფლებისათვის ერთადერთი ასპარეზი ბრძოლის ველია. სპირიდონმა კარგად იცის, რომ მისი „ცხოვრების გზა მეტად ეკლიანია და ძნელი სავალი იქნება“, მაგრამ მას ვერ გასტეხს ვერავითარი დაბრკოლება.

ნინოშვილის მოთხრობები საშინელი ფურცლებია მშრომელი ხალხის ტანჯვისა და აუტანელი მდგომარეობისა, მაგრამ ეს ფურცლები სასოწარკვეთილების ნალექს კი არ სტოვებენ მკითხველის არსებაში, არამედ იმედს უღვიძებენ.

არის გამოსავალი, არის ხსნა მშრომელი ხალხის გაერთიანებულ ბრძოლაში, გვეუბნება ნინოშვილის მთელი შემოქმედება.

ნინოშვილის სამწერლო მოღვაწეობა ქადაგებაა მშრომელი ხალხის ერთობისა და ბრძოლისა.

ნინოშვილი ამ ერთობისა და ბრძოლის წინამორბედი.

ასეთია ნინოშვილი, როგორც მწერალი, ხელოვანი.

როგორია ის, როგორც პოლიტიკური მოღვაწე?

როდესაც ნინოშვილი გამოვიდა საზოგადო ასპარეზზე, ჩვენში არც მუშათა საკითხი არსებობდა, არც მუშური გაგება და დაფასება ცხოვრებისა. სხვებთან ერთად ნინოშვილმა გაუკაფა გზა კლასთა ბრძოლას და მეცნიერული სოციალიზმის შეგნებას ჩვენში.

მშრომელი ხალხის საკითხი მტკიცედ დააყენა და მუშათა საქმეს რკინის საფუძველი ჩაუყარა.

ეს სხეულით სუსტი, სიცოცხლით მოსწრაფებული ადამიანი დაჯილდოებული იყო ძლიერი ნებიფ და შეუღრეკელი რწმენით, რომ მშრომელი ხალხი ერთობითა და ბრძოლით თავისას გაიტანდა.

როგორც პირად ცხოვრებაში, ისე სამწერლო და პოლიტიკურ ასპარეზზე, ის იყო მთლიანი პიროვნება, რომელსაც გათვალისწინებული ჰქონდა ხალხის ბედი, მიზანი და მომავალი.

მისი მოღვაწეობა მეტად ხანმოკლე იყო, იმიტომ, რომ ის იწვოდა.

ეს, ალბათ, ასეც უნდა მომხდარიყო: მის ღროს მშრომელი ხალხის საკითხი ჩვენში, მისი ბედი და მომავალი წყვედიადით იყო მოცული, უნდა დამწვარიყო დიდი, ძლიერი ნიჭი, რომ თავისი ალით გაერღვია ეს წყვედიადი. ნინოშვილიც დაიწვა მშრომელი ხალხის ბედის დახშულ კარებთან; სამაგიეროდ, შეაღო ის.

რა გასაკვირალია ამის შემდეგ, რომ ჩვენი მშრომელი ხალხი მუდამ ნეტარებით იგონებდეს თავის საყვარელ ეგნატეს.

ხელთუქმნელი ძეგლი დიდი ხანია დაიდგა მან მშრომელთა გულში და დღეს ჩვენ მუხლს მოვიდრეკთ ხელთქმნილი ძეგლის წინაშე.

დიდება ეგნატეს ხსოვნას.

1923 წ.

## ალ. ყაზბეგი და მისი ძიება

მიყვარს საგმირო ჰანგები  
სიტყვა და აზრი ციური...  
ფრთებს მიკვეცს, აღმაფრენასა,  
ამბავი ყოველდღიური.

მთელი მოღვაწეობა ყაზბეგისა ვაჟას განცხადების ჯადასტურებაა. ვახ. კოტეტიშვილმა შეიცნო ბუნება ყაზბეგისა, როდესაც მისი ერთი ბეჭი ზეცისაკენ აზიდა, მეორე კი მიწისაკენ დახარა.

მთელი შემოქმედება ამ ბელეტრისტისა ძლიერი გაქანება იყო ზეცისაკენ, გარდაუვალი, მარადიული კეთილისა, სამართლიანობისა და სიყვარულისაკენ, მაგრამ მიწამ, მიწის უსამართლობამ, ბოროტებამ ჩასჭიდა მაგრად ხელი და მოუღო ბოლო. წარმოიდგინეთ ტილოზე საშინელი გველეშაპი, რომლის წინააღმდეგაც გამოდის ნაზი მეომარი; მეომრის ერთადერთი იარაღი მისი გულია და ამ უთანასწორო ბრძოლაში ის იღუპება.

ნაზი მეომარი არის ალექსანდრე ყაზბეგი და გველეშაპი კი ცხოვრება, ყველა მისი საშინელი მხარით..

ყაზბეგი რომ არ შეშლილიყო, უსათუოდ თავს მოიკლავდა. მე ვერ წარმომიდგენია სხვაგვარი დაბოლოება ამ იშვიათი ადამიანისა. რატომ?

იმიტომ, რომ ყაზბეგი გაორებულია, ყაზბეგში ორი პიროვნებაა და ერთი ყაზბეგი მეორე ყაზბეგის წინააღმდეგობა არის, ერთს სძულს მეორე, ერთი მეორეს ებრძვის.

ამ ბრძოლაში ხორციელი სახე ყაზბეგისა უნდა დაღუპულიყო და აკი დაიღუპა კიდევ.

ჩვენს მწერლობასა და საზოგადოებაში ყაზბეგი არ არის ახსნილი, გამოცნობილი.

არ არის იმიტომ, რომ მასში ორი ადამიანია, ერთი მეორის უარმყოფელი. ზოგი ერთს ამჩნევს, ზოგიც — მეორეს; მთლიანი ბუნება კი შეუმჩნეველი რჩება. აიღეთ „ელგუჯა“, „მოძღვარი“, „მამის



მკვლელი“, „ხევისბერი გოჩა“, — მე არ ვიცი კაზმულ მწერლობაში მეორე ნაწარმოები, რომელიც ამდენ ფიქრთა ამშლელი იყოს, სადაც ამდენი პრობლემა იყოს გამოკვეთილი, როგორც ყაზბეგის თვითეულ მოთხრობაში...

როგორც ხელოვანს, მას ბევრი და დიდი ნაკლი აქვს. ფრიალონი და ნაპარალები ვერ სპობენ დედამიწის სიმრგვალებს. ვერც ყაზბეგის ბევრი ნაკლი ჰფარავს მისი ხელოვნების სიდიადეს. ყაზბეგი დიდი ხელოვანია და მისი შემოქმედების სიმრგვალებს ორი პოლუსი აქვს. ზოგი მარტო ერთს მიჩერებია, სხვები — მეორეს.

არათუ შემოქმედება, თვით ცხოვრება ყაზბეგისა ბავშვობიდან სიკვდილამდე მძლავრი გაქანებაა ერთი პოლუსიდან მეორისაკენ.

ფუფუნებაში აღზრდილი, რომელსაც ჩიტის რძეც კი არ აკლდა, განებივრებული, სიმდიდრით გალალეებული ბავშვობისას; დაჯაყაყების შემდეგ კი ლატაკი, რომელიც მთელი სიცოცხლე სიღარიბეს ებრძოდა...

ყაზბეგი უადრესად ტრაგიკული პიროვნებაა.

ტრაგიკულია ამის გამო მთელი მისი შემოქმედება: რალაც საშინელი ბედისწერა თან სდევს მის გმირებს და ისეთს პირობებში მოექცევიან, რომ მათი დაღუპვა გარდაუვალია.

როგორც მთელი ცხოვრება, ისე მისი თვითეული მხარე, ყოველი მოვლენა ყაზბეგს ეჩვენება საკუთარ ღირსება-ნაკლოვანებათა პრიზმაში.

ყოველგვარ მოვლენას ის ითვისებს საკუთარი გაორების თვალთახედვით.

ამიტომაც არის, რომ ყაზბეგის შემოქმედება კონტრასტების, ორეულთა კალეიდოსკოპია.

აიღეთ კერძო ადამიანი, მთელი ერი. ერთში — ყოველგვარი სიკეთე. მეორეში — ყოველგვარი სისაძაგლე. ერთი მხრით, გაგი, რომელიც არ დაერიდება არავითარ საზიზღრობას; მეორე მხრით, ელგუჯა, რომელშიაც განხორციელებულია კეთილშობილური ადამიანი, ყველა თავისი მაღალი მისწრაფებით. აიღეთ თვითონ საზოგადოება და საზოგადოებრივი წყობილება. — აქაც იგივე კონტრასტებია და გაორება. ერთი მხრით, თემი, აღსავსე ყოველგვარი ღირსებით; მეორე მხრით, თვითმპყრობელობა, აღსავსე ყოველგვარი სისაძაგლით.

თავისი გვარტომობით, ჩამომავლობით ყაზბეგი ეკუთვნის დიდკაცობის წრეს: მამა — ხევის მოურავის შვილი და გენერალ-მაიორი, დედა — თავად თარხნიშვილის ასული. იმ დროს ჩვენს დიდკაცო-

ზას უკვე მოკმული ჰქონდა თავისი დრო როგორც ისტორიულად, ისე სოციალურად. დრომოკმული ჯგუფი. წრე, წოდება, კლასი. შესაძლებელია, ერთგვარ ძალას კიდევ გრძნობდეს და კიდევ წარმოადგენდეს. მაგრამ მასში უკვე დაწყებულია დაშლა, გადაგვარება... ეს თვისებები შეინიშნება მის შემოკმედებაშიც.

ერთმანეთის ღანახვარზე შეყვარებულნი თრთიან. ცახცახებენ; ხელის შენება ხომ სისხლს უმღვრევს და აშლილი ვნების ცეცხლს აუნთებს მათ სხეულში, ფიორდებიან, ოფლი ასკდებათ.

მათი კოცნა არ არის შეყვარებულთა ჩვეულებრივი კოცნა, არამედ გაშმაგებული კოცნაა.

ამ აზრის გასაშუქებლად საყურადღებოა „მოძღვარში“ ის ადგილი, სადაც ბეჟია ონისეს მოუყვება მაცვალას ამბავს. მაცვალას ხსენებაზე ონისე აენტება, გაფიორდება და ცახცახს დააწყებინებს ისე მძლავრად, რომ ბეჟიაც კი შენიშნავს და გაკვირვებული ეკითხება:

— მაგრამ რაი გაცახცახებს?

შეიძლება ვინმემ იფიქროს, ეს ჩვეულებრივი აღელვება არის შეყვარებულისაო, მაგრამ ასეთი ახსნა ეწინააღმდეგება მოხვევის ბუნებას და თემოს ზნე-ჩვეულებაში ვაჭედოილ ხასიათს.

აიღეთ ის ადგილი „ხევისბერში“ — სადაც მოხუცი ქალს ჩააბარებს „ხელის მომკიდეს“ ონისეს.

„— ონისევ! აჰა, ჩაგვიბარებია თქვენთვის ქალი წრფელი და შეურცხვენელი... დღეის ამას იქით შენ აგვირჩევიხარ ამის სმად... ამ სიტყვებზედ იმან გადასცა ონისეს ქალის მთრთოლვარე და გასურებული ხელი.

„ონისემ რა წამს ამ ხელის მიკარება იგაძნო, როგორღაც შეკრთა, დაიბნა და თვითონაც გაქრეოლდა. თუმცა ამგვარი მდგომარეობის მიზეზი ვერ აეხსნა.

— აბა, შენ იცი და შენმა კაცობამ, როგორც დღეის ამას იქით მოუვლი და უპატრონებ... თქვენს სოფელში შენს მეტი პატრონი არავინ ეყოლების, შენ უნდა გაუწიო ძმობა.

— აბა, ღმერთს არ მოეტყუების. რომ თავს დავდებ მაგისთვის.

მოხუცი მივიდა, წყნარად ასწია პირბადე სწორედ იმ დროს, როდესაც ონისე ამბობდა:

— ეგ და, მე — ძმა.

მაგრამ სიტყვა ნაბეგარზედ გაუწყდა, მთლად გათრთოლდა და მთერალსავით წაბარბაცდა, მაგრამ თავი ისევ შეიკავა.

— რაი მოგივიდა? — მიეშველა მოხუცი.

— არც-რა, არც-რა, დამცხა, თავს ბრუ რასმე დამეხვა, — ძლივსლა წარმოსთქვა ონისემ.

— ბევრი თუ არა სვი?... მაიტა-ლა წყალი! — მიუბრუნდა მოხუცი იქ მყოფებს.

— არ მინდა, შენაი კირაშივე, — უპასუხა კაცმა, რომელსაც ქალის ხელი ჭერ კიდევ არ გაეშვა, თუმცა ჰგრძნობდა, რომ ეს ხელი სწავდა, სდაგავდა მას, უღელვებდა სისხლს და გონებას აფანტვინებდა“.

აწონაწერი განმარტებას არ საჭიროებს, ის საკმაოდ აშუქებს ჩემს შეხედულებას.

მსგავსი ადგილი ბლომად მოიპოვება ყაზბეგის მოთხრობებში.

ყოველივე ეს არის სნეული ნაწილი ყაზბეგის შემოქმედებისა, ჩამოაცალეთ ყოველივე ეს და თქვენ დაგრჩებათ დიდი მხატვარი, დიდი ხელოვანი, ღრმა განცდით და ღრმა აზრით დატვირთული.

მთელი შემოქმედება ყაზბეგისა გამოსახვაა, მხატვრული განსახიერებაა მისი ფილოსოფიური აზროვნებისა.

ჩვენს თვალწინ იშლება იშვიათი ხელოვნებით დახატული სურათი თემისა, მისი ზნე-ჩვეულებებისა; თემის დაჯახება უზნემ, გარეშე ძალასთან, რუსული თვითმპყრობლობის სახით; თემის ბრძოლა თავისუფლებისათვის და სხვ., მაგრამ სიმძიმის ცქიტი აქ არ არის მოთავსებული.

ყოველ მწერალს ესაჭიროება სახეები, არე თავისი შემოქმედებისა. თავიდათავია ის ფილოსოფიური დებულება, რომელიც შეადგენს ცხოველმყოფელ ძარღვს ყაზბეგის მთელ შემოქმედებაში.

ყაზბეგის შეცნობა მსოფლიოსი ენათესავება ძველი ირანის შეხედულებას. გაიხსენეთ ირანელთა მოძღვრება: მსოფლიოში ორი დასაბამია — ორმუზი და არიმანი; პირველია დასაბამი კეთილისა; მეორე — დასაბამი ბოროტისა. ამ ძალთა შორის სასტიკი და შეუწყვეტელი ბრძოლა არსებობს, მაგრამ ყოველთვის და ყოველგვან საბოლოოდ პირველი იმარჯვებს — დასაბამი კეთილისა.

ამ მოძღვრების ზეგავლენა უსათუოდ ატყვია შოთას „ვეფხისტყაოსანს“, რომელიც ამ გზით ვითარდება და ბოლოვდება;

„ვცან სიმოკლე ბოროტისა, კეთილია შენი გრძელი“. აქ არის მოცემული სრული ოპტიმიზმი — დათრგუნვა ბოროტისა და კეთილის მარადიულობა.

ყაზბეგის ფილოსოფიური აზროვნებითაც მსოფლიოს ორი დასაბამი აქვს, ორი ძალის გარშემოა ის შემოქმედებითი: ერთია დასაბამი კეთილისა, მეორე — დასაბამი ბოროტისა. ამ ორ ძალთა შორის საშინელი, გამანადგურებელი ბრძოლა მიმდინარეობს და ამ ბრძო-

ლაში ყოველთვის და ყოველგან მეორე ძალა იმარჯვებს — დასაბამი ბოროტისა. კეთილი მუდამ ძლეული და დამარცხებული რჩება.

ვცან სიმოკლე კეთილისა, ბოროტია შენი გრძელი, — აი, რა გზით ვითარდება და ბოლოვდება ყაზბეგის შემოქმედება.

აქ არის მოცემული საშინელი პესიმიზმი — დათრგუნვა კეთილისა და ბოროტის მარადიულობა.

თავისი ფილოსოფიური დებულება ყაზბეგმა გადაშალა მხატვრულ სახეებში, განავითარა თემური ცხოვრებისა და გარეშე ძალის თემთან ბრძოლის პირობებში.

ყაზბეგის ნიჭი სწორედ აქ ბრწყინავს, კაშკაშებს, ნაპერწყლებს ისვრის, ცეცხლს აფრქვევს; ხან ამაყია, როგორც მთის არწივი. ხან მრისხანე, როგორც გახელებული ლომი; ხან წყნარი და ნაზი, ვით ქალწული; ხან აღელვებული, ვით ზღვა; ხან გალადებული, გულმხიარული, ხან კი ნაზი, სევდის მფრქვეველი; ხან საქორწილოდ გამოწყობილი, ხან ძაძით შემოსილი, მგლოვიარე, ხევზე შეყვარებული. თემის ჰირსიუფალი — ყოველთვის კი თვალის მომჭრელი, გულის ამათრთოლებელი, ფიქრთა ამშლელი და ოცნების წარმტაცებელი.

ბევრს ყაზბეგი ერთფეროვანი ჰგონია, — აქ ერთგვარი გაუგებრობაა.

ის ერთფეროვანია იმდენად, რამდენადაც ყველგან და ყველათფერში დაეძებს ერთსა და იმავეს: სამართალს, ჭეშმარიტებას, კეთილის ძლევაგმოსილებას.

ზოგჯერ ის ჩქარია ასეთი ძიების დროს; ხან ზახან საკმაოდ დამუშავებული არ არის თემა, დახვეწა, დაწმენდა აკლია აქაიქ ენას, მაგრამ ფანტაზია მას ყოველთვის მოჭარბებული აქვს.

ამას მისი ავადმყოფობაც მოწმობს: ყაზბეგმა დაასრულა თავისი მოღვაწეობა ისეთი სნეულებით, რომელიც ფანტაზიის აფერადებასა და აჩქარებულ დუღილს იწვევს.

ყაზბეგი ჯადოსანი მხატვარია მთის ბუნებისა, — მოხვევის გულთამხილავი.

აიღეთ „მოძღვარში“ გუდამაყრის ხეობის აღწერა და ბერსაჰირის დღე.

აქ თქვენ თვალწინ, ტილოზე ასახული სურათია, საუცხოოდ შეხამებული საღებავებით.

მხატვარი ქმნის ისეთ შთაბეჭდილებას, თითქოს საკუთარის თვალით ვხედავდეთ იშვიათ სურათს დიადი ბუნებისას.

აიღეთ „მამის მკვლელში“ სურათი ამაყი ხარირემისა. იქვე ხდის ხეობის სურათი ჯა აღწერა ჯიხვების კიდილისა. აიღეთ „მოძღვარ-

ში“ ონისეს გულის გადაშლა, როდესაც ის ცხვრის ფარას ეთხოვე-  
ბა; ჰირკროლა შიშაქი, ქეჩი, ბოქა, ყოჩი, — რომელი ერთი ჩამო-  
ვთვალო! ასეთი სურათებით სავსეა ყაზბეგის შემოქმედება. ამ სუ-  
რათებში ყოველი სიტყვა ნაირ-ნაირ ფერადებად იშლება და არავი-  
თარი სიძნელე ავტორისათვის არ არსებობს. აქ ნათლად ვხედავთ,  
თუ რაოდენი საიდუმლოებაა სიტყვაში და რის გამოხატვა შეუძ-  
ლია მას.

მთის ბუნება ყაზბეგის შემოქმედებაში ამოწურულია, ყაზბე-  
გის დაძლევა ამ დარგში შეუძლებელია. საჭირო იყო კიდევ მთის  
ამეტყველება და ეს ღირსეულად შეასრულა ვაჟამ.

მისი სიტყვებია:

უსულო საგნებს სული ჩავბერგ,  
ავასაუბრე ლოდები კლდისა  
და როგორც მეფე, გავათამამე  
მწირი ბალახი, ის ქუჩი მთისა.

სრული ქეშმარიტებაა. როდესაც გადახვალთ თვითონ თემის  
ცხოვრებაზე, იგივე სისრულე, იმგვარივე ხელოვნებით შესრულე-  
ბული სურათები.

ავტორს არ დაუტოვებია თემის ცხოვრების არც ერთი მხარე.  
ჩვენს წინაშე გადაშლილია დიდებული სურათი თემისა, მისი ზნე-  
ჩვეულება, მისი ადათი, მისი დამოკიდებულება ყოველ წევრთან,  
მტერთან, მოყვარესთან. სტუმართან, მისი სამართალი, შეგნება,  
მსოფლმხედველობა, სარწმუნოებრივი, საზოგადოებრივი და ზნე-  
ობრივი შეხედულებანი.

ერთი სიტყვით, სრული სახე თემისა, უნაკლოდ დასურათებუ-  
ლი — აი, რას ვხედავთ ყაზბეგის შემოქმედებაში.

ადამიანის გრძნობათა რთულ ხლართებში, მისი გონებრივი  
ცხოვრების მრავალგვარ ხვეულებში ავტორი თავისუფლად და გა-  
უქირვებლად მიიკვლევს გზას.ე

ყაზბეგი თემის დიდი პატრიოტია, მისი ტარიელი, მასზე მგლო-  
ვიარე. მის მხატვრულ ასახვაში არის იდეალიზაცია თემისა და ამ  
გზაზე, რა თქმა უნდა, ჩვენ მას ბოლომდე ვერ გავყვებით, ბოლომდე  
მასთან ვერ დავრჩებით, აქ ჩვენ მის შეხედულებას ბოლომდე ვერ  
გავიზიარებთ, მაგრამ ეს სულ სხვა საკითხია.

გასარკვევი ეს კი არ არის, არამედ შემდეგი: გამართლებულია  
თუ არა მხატვრულად ყაზბეგის ფილოსოფიური დებულება?

ყაზბეგის შემოქმედებაში ამაზრზენი სიძლიერითა და სიმძაფ-  
რით არის დაპირისპირებული თემი და ახალი გარეშე ძალა.

აქ სწარმოებს საშინელი, სასტიკი, მკაცრი და შეუბრალებელი ბრძოლა. თემის მხარეზეა სიმართლე, სამართლიანობა, კეთილშობილება, რაინდობა — ერთი სიტყვით, კეთილი, ამ სიტყვის ფართო მნიშვნელობით.

რა არის მეორე მხარეზე? მოგაგონებთ „მამის მკვლელიდან“ სულ უბრალო ალაცს:

„გასაკვირველი იყო ეს მდგომარეობა! მოწყობილს მმართველობის დროს, როდესაც ნაჩაღნიკები, დიამბეგები, სუდი, ნაცვლები და სხვა ათასი მოხელე ხალხი ჭიანჭველებსავით ირეოდნენ და მართლმსაჯულებდნენ, — ალალმართალი დედაკაცი კაცისმკვლელებს ეხვეწებოდა, რომ დაეფარა უსამართლობისაგან“.

უბრალო სურათია, უბრალოდ დაწერილი. მაგრამ როდესაც ჩაუკვირდებით, რა შემზარავია, რა საშინელება!

აიღებთ ალალმართალი იაგო საპყრობილესი.

„თუმცა ის იწვა დახუტულის თვალებით, მაგრამ ძილი მაინც გაუფრთხა და ამის მაგივრად ფიქრი ფიქრზედ ებადებოდა.

იმას ცხოვლად წარმოუდგა თავისი მდგომარეობა, ის უსამართლობა, რომელიც იმისთვის მიეყენებიათ და ის კი ვერ გაეგო, თუ რა უნდოდათ იმისგან, ან ასე უწყალოდ რა დანაშაულისათვის ექცევიან!

ის არ იყო ქურდი, და ქურდობას სწამებდნენ!

ის არ იყო ავაზაკი, და ავაზაკობას აბრალებდნენ!

იმას უყვარდა, და საყვარელს საგანს. ამორებდნენ!

სცემდნენ, აწვალებდნენ, ამტყუნებდნენ და გამართლების ნებასაც კი არ აძლევდნენ!

რისთვის? რად? ვის რა შეემატებოდა მის წვლებით? რად ხდებოდა ეს ასე?.. — ეს კითხვები გაურკვეველად ტრიალებდა იმის თავში და დაბოლოება კი არ სჩანდა“.

იაგოს ტანჯვა მთელი თემის ტანჯვაა; იაგოს მწარე ფიქრები მთელი თემის გულის ვარამია. მთელი თემი გმინავს იაგოსავით საშინელი უსამართლობის ფეხქვეშ და ამაოდ კითხულობს:

— რისთვის? რად?

სამართლის ფეხით გათელვა, ბინძური გული, მდაბალი ბუნება. უპატიოსნობა, უნამუსობა, ძალმომრეობა. ყოველგვარი სისაძაგლის შესაძლებლობა — აი. როგორია ახალი ძალა თვითმპყრობელობის სახით, ყაზბეგის შემოქმედებაში.

არის სამართალი თემის სახით, მაგრამ მას თელავს უსამართლობა ახალი ძალის სახით.

არის კეთილშობილება, მაგრამ მას აშარცხებს უპატიოსნობა.

არის უმანკოება, მაგრამ ის მსხვერპლად ეწირება აღვირახსნილ გარყვნილებას.

არის რაინდობა, მაგრამ მას გათახსირება ამარცხებს.

თუ თემი, ავტორის წარმოდგენაში, არის განხორციელება კეთილისა და სამართლიანობისა, გარედან შემოჭრილი ახალი ძალა არის განხორციელება ბოროტისა და უსამართლობისა.

ყაზბეგმა დაგვიხატა სურათი საშინელი ბრძოლისა: ერთი მხრით — თემი, მეორე მხრით — თვითმპყრობელობა.

ამ ბრძოლაში პირველი მარცხდება და უხეში, უსამართლო, ბოროტი ძალა იმარჯვებს.

აიღეთ მოძღვარი ონოფრე — ფეხის ფრჩხილებამდე წმიდა და უმწიკვლო ადამიანი. „მისი სახელი გონივრობითა და გულკეთილობით, სიწმინდითა და თავგანწირულებით მთაში შორს გავარდნილიყო“.

ონოფრეს ცხოვრება არის ლოცვა, მარხულობა და ქვეყნის სამსახური. „არაოდეს მამა ონოფრეს არ უნახავს განსაცდელში მყოფი კაცი ისე, რომ თავის თავზე ზრუნვა არ გადაჰვიწყებოდა. პირველადვე სხვისი შევლის გულისთქმა არ გაჰღვიძებოდა“.

იშვიათი სისუბეტაკისა და სიწმიდის პიროვნებაა ონოფრე, რომელიც ბალახის მოგლეჯასაც კი ცოდვადა სთვლის.

და აი, ბოროტება, უსამართლობასთან ხელიხელ ჩაკიდებული, ასეთ ადამიანსაც კი არ ინდობს და ღუბავს.

ცხადია, — საშველი, გამოსავალი არსად არის, „კაცი ტანჯვისათვის არის გაჩენილი“. როგორც განმარტავს ხევისბერი გოჩა, და ამ სატანჯველს არსაიდან არ /შემოევლება.

— ჩვენ კი აღარ გვეცხოვრება! — აღმოჰხდება კობას „მამის მკვლელში“ და მართლაც, ცხოვრება საშინელებაა, სიცოცხლე — აუტანელი.

მაგრამ არა! არის ცხოვრებაში ერთი რამ, რაც იმის საშინელებას ანელებს, აქარწყლებს და სიცოცხლეს ატკობს, ალამაზებს. ეს არის სიყვარული. აი, ეს აზრი გაიფლავებს ყაზბეგის შემოქმედებაში. ან უკეთ რომ ვთქვათ, ეს აზრი ამოტივტივდება სინამდვილის საშინელების მორევიდან, რომელშიც ყაზბეგი იბრძვის და ამოდ ცდილობს თავის განთავისუფლებას.

ყაზბეგი მთელი თავისი გატაცებით, მთელი ოცნებით. მთელი თავის გრძნობათა სიწმინდითა და ძლიერებით, მთელი თავისი გულწრფელობით და თავდავიწყებით გაჰყვება ამ აზრს და სიყვარულში ეძებს ხსნას.

მისი სიყვარული, ამიტომაც, არაჩვეულებრივია, უშიშარი, ზეუპოვარი, დაურიდებელი, ყოვლისშემძლებელი, ყოველგვარი დაბრკოლების გადამლახველი.

ყაზბეგის შეყვარებული სამშობლოს ტოვებს, თავის სახლ-კარს, ნათესაებს, ქონებას, დალატობს ერს, თემს, ძმას, არღვევს და ანადგურებს ყოველისფერს, რაც კი სწამს, რაც წმიდათა წმიდად ჰიაჩნია:

გადალახავს ყოველგვარ დაბრკოლებას, მაგრამ სიყვარულის დაძლევა არ შეუძლია.

გაიხსენეთ ფოლადივით მაგარი და მტკიცე ონისე „მოძღვარში“.

„— ქალაუ! ორნივე ფიტანჯებით, ვეწვალებით და ვერ დავივიწყებთ ერთურთი... ერთურთი ვნახეთ და შეგვიყვარდა ერთმანეთი... ჩვენის ნებით არ მომხდარა ესა და ვერც ჩვენი ნებით გავიყრებით. ვეცადე, ქალაუ! ვეცადე, ღვთის მადლმა, რომ გულიდამ ამომელო, შენი სიყვარული ფესვიანად ამომეგლიჯა, შენი სახე ცხელი რკინით ამომებუჯა გულიდამ, მაგრამ დავდნი, დავიღიე და აჰა. მაინც შენთან მხედავ“.

ამ სიტყვებში მხატვრული სიცხოველითა და სიცხადით არის აღვარებული სიყვარულის ცეცხლი, მისი ძლიერება და ადამიანისაგან მისი დაძლევის სრული შეუძლებლობა.

ჩაუკვირდით ყაზბეგის საუკეთესო გმირებს — ქალებსაც. ზამაკაცებსაც. ელგუჯა, მათია, მზალო, იაგო, ნუნუ, ონისე, მაყვალა, „ხვეისბერის“ ონისე: ძიძია — ყველა მაგარი, ზეუპოვარი, გაუღრეკელი პიროვნებაა, უმაგრესი რვალისა, როგორც ტარიელი იტყვის თავის თავზედ.

მიუხედავად ამისა. სიყვარულის წინაშე ისინი უძლურნი არიან. სიყვარული ჰღუნავს მათ და, რაც უნდა, იმას ჩაადენიებს.

ყაზბეგმა განზრახ დაგვანახვა ასეთი პირები, რომ სიყვარულის ძლევამოსილება უფრო აშკარა და ნათელი ყოფილიყო.

და აი, ამ ყოვლადშემძლებელ სიყვარულს მხოლოდ ბოროტება, სძლევს.

ვის არ გახსოვთ ტორვალდსენის სიყვარული — ამური! ცელქი, მალხაზი, პუნტულა, უმანკო და მზიარული ბავშვი. თმახუქუქა ყვავილების გვირგვინით დადაფნული. მან ყველგან სიცილი. მზიარულება და სიამოვნება მიაქვს.

რა დიდი განსხვავებაა ყაზბეგის სიყვარულთან! არის ერთი ზღაპარი. საარაკო სილამაზის მზეთუნახავი სიყვარულის ცეცხლში დაგაჯა ერთიმეორეზე უკეთეს, ვარსკვლავივით რაინდებს.



მზეთუნახავს ერთი პირობა აქვს: ვინც მასთან ღამეს გაათევს, ვათენებისას თავს წააგდებინებენ.

მრავალი რაინდი სწირავს თავს, ოღონდ კი რამდენიმე საათი დასტკბეს მშვენიერ და საშინელ მზეთუნახავთან.

ამდენადვე მშვენიერია, მაგრამ გაცილებით უფრო საშინელი ყაზბეგის სიყვარული. ის მოგაგონებთ გოეთეს სიყვარულს „ფაუსტში“. ფაუსტისა და გრეტხენის სიყვარული სიცოცხლეს უსწობს გრეტხენს, მის ღედას, ძმას და უმანკო შვილს.

ამგვარივე თვისების არის ყაზბეგის სიყვარული. ის უაღრესად ტრაგიკულია, გაუმძღარი მსხვერპლით და ვინც ხელში ჩაუვარდება, უკვე განწირულია.

ყაზბეგის სიყვარული მარტო თავისი შედეგით კი არ არის საშინელი. ის თვითონ თავის ბუნებით საკუთარ არსებაში ბოროტებას ატარებს: ზოგს ღუპავს შეუბრალებლად, დაუზოგავად, სხვები ბოროტებამდე მიჰყავს და თავის გარშემო ბოროტებას თესავს. აიღეთ ელგუჯა, მზალო, მათია — ყველა მსხვერპლია სიყვარულისა. მარტო გაგი რამდენ ხალხს ღუპავს სიყვარულის გულისათვის. აიღეთ „ხევისბერი გოჩა“. იქ ონისე უნებლიეთ ხდება მოძმეთა მოღალატედ და დაღუპავს მათ მხოლოდ სიყვარულის გამო. იმავე სიყვარულის ბრალია, რომ გოჩა თავის საყვარელ შვილს კლავს.

დასკვნა, რომელსაც იძლევა ანალიზი ყაზბეგის სიყვარულისა, შემდეგია: სიყვარული ბოროტთან ბრძოლაში უძლურია; ზოგჯერ კი თვითონ ატარებს თავის არსებაში ბოროტებას.

ამგვარად თავის ორეულთან ბრძოლაში ღონემიხდილი, მოქანცული. დატანჯული და წამებული ყაზბეგი სიყვარულის კუნძულზე ცდილობს მოსვენებას და დამშვიდებას, აქ უნდა ჰპოვოს გამართლება ადამიანის მთელი ტანჯვისა და მწუხარებისა. ის ფარდას ახსდის სიყვარულის საიდუმლოებას, რომ ბოროტება გასრისოს, გაანადგუროს.

ნაცვლად ამისა, ჩვენ ვხედავთ მსხვერპლთა ჩონჩხებს, შვილის სისხლში შეღებილ ხელებს ხევისბერისას და გვესმის გულშემზარავი ღრიალი გოჩასი.

„— შვილი, შვილი! რა იქნა ჩემი შვილი!“

ჩირს დანარცხებულ სიყვარულზე ბოროტება ფეხით შემდგარა და ხარხარებს.

სიყვარული იყო ერთადერთი ტაძარი, სადაც ყაზბეგის „გულსა და მოკლულსა კაცთ სიავით და ბედის ბრუნვით“ განსვენებო სწყუროდა

ვანქრა ტაძარი და მხატვრის გულში დამკვიდრდა უდაბნო თავისი მღვმარებით და საშინელებით.

ის დიდხანს იბრძოდა, მდგრად, თავგამეტებით იბრძოდა; მთელი თავისი არსებით, შემოქმედებითი ნიჭის მთელი ზიძლიერით. ნერვებდაქიმული. ოცნებაგახურებული იტანჯებოდა, მაგრამ მისი ფილოსოფიური დებულება მაინც გამართლდა და ბოროტმა საბოლოოდ გაიმარჯვა.

წინ — გარდაუვალი უფსკრული, უკან — იმედების, ოცნების ნამტვრევები, შიგნით — დამსხვრეული გული.

ღარჩა ორში ერთი: ან თავის მოკვლა, ან სიგიჟე.

ბედმა უკანასკნელი არგუნა და ეს იყო აუცილებელი დასასრული ამ იშვიათი ნიჭისა.

მას სწყუროდა, ის მიისწრაფვოდა მთელი არსებით, მთელი თავისი გიჟური გატაცებით, კეთილისათვის მარადიული ტანტი აეგო და ცხოვრება სამუდამოდ გაეწმინდა, სიცოცხლე გაემრავლებინა და აღამიანი დაეხსნა ბოროტისაგან.

შან თავს იღვა მეტად მძიმე ტვირთი. იტანჯებოდა ქვეყნისათვის, აღამიანისათვის, ტანჯვით იკვლევდა გზას კაცობრიობის ბედნიერებისაკენ.

ტანჯვამ და საშინელმა ბრძოლამ ის მიიყვანა საგიჟეთის კართან და უდროოდ მოუსპო დღე. ბოროტება შემდგარა მის საფლავზე და გაჰკივის: შენ კი არ იტანჯე, შენ კი არ ატარე შენს გულში კაცობრიობის ვარამი, სხვამ ატარა, სხვა იტანჯა და შენ კი სხვისი ტახტვა მოიპარეო.

ტანჯვის მპარავი! — აი, როგორ გაუსწორდა ბოროტება მას. ვინც მას ნიღაბი ჩამოჰგლიჯა.

1924 წ.

## გიორგი წერეთელი

ოცდახუთი წელიწადი შესრულდა, რაც გიორგი წერეთელი გარდაიცვალა.

როგორც ჩვენი მწერლობის, ისე ჩვენი საზოგადო მოღვაწეობის ასპარეზზე გიორგი წერეთელი მეტად თვალსაჩინო პიროვნებაა და დიდი ღვაწლიც მიუძღვის. მისი ლიტერატურული მოღვაწეობა მრავალმხრივი და მრავალფეროვანია, მაგრამ მკითხველი საზოგადოება მას იცნობს უფრო როგორც ბელეტრისტს და, მართლაც, ამ დარგში არის ის ძლიერი და ორიგინალური.

ყოველი ბელეტრისტი, ისე, როგორც ყოველი მწერალი, შემოქმედების დროს იმყოფება თავისი მსოფლმხედველობის ზეგავლენის ქვეშ: როგორც არის, საერთოდ, მისი მსოფლმხედველობა, იმგვარივეა შემოქმედებაც.

თუ იცნობთ მწერალს ამ მხრივ, წინდაწინვე შეგიძლიათ თქვათ, თუ როგორი იქნება დედააზრი მისი შემოქმედებისა.

როდესაც გიორგი წერეთლის ბელეტრისტული ნიჭი გაიშალა, ჩვენი მოწინავე საზოგადოების აზროვნების ფოკუსს ილია ჭავჭავაძე წარმოადგენდა.

მწერლობის ასპარეზზე ილია გამოვიდა ბრძოლის საყვირით. წარჩინებული წოდება გამოაცხადა ქართველი ერის მეტბოროტად და „ღარიბთ ერთობა“ დააწერა თავის დროშაზე.

ბრძოლა წარჩინებული წოდების წინააღმდეგ და „ღარიბთ ერთობის“ დაცვა, აი, რა გამოაცხადა მან ახალთაობის მიზნად გრიგოლ ობებლიანთან კამათის დროს.

ჩვენში ყველაზე უდიდესი საქმე არის ერის დაცემული ვინაობის აღდგენა. ყველა ამ საქმეს უნდა ვემსახუროთ და ერთმანეთს ძმურად მივცეთ ხელი. დაახლოებით ასეთი ღერძის გარეშემო ტრიალებდა ილია ჭავჭავაძის მთელი მსჯელობა.

არა ბრძოლა, არამედ მორიგება და თანხმობა დაცემული ერივ-

ხული ვინაობის აღსადგენად. მეგრე, წარჩინებულ წოდებასა და გლეხობას შორის რომ ხილია ჩატეხილი? ეს ხილი უნდა აღადგინოს წარჩინებული წოდების შეგნებამ და სინიდიწმა, რასაც ილია მხატვრულად უწოდებს ცრემლიან ცოდნას „ოთარაანთ ქვრივში“.

ილია სასტიკად ებრძოდა ყველას, ვინც კი წინააღმდეგი იყო „ჩვენი დაცემული ვინაობის“ ასეთი გზითა და საშუალებით აღდგენიანა...

სწორედ ამ ხანებში გაიფურჩქნა გიორგი წერეთლის ბელეტრისტიკული ნიჭი და მისი შეხედულება ძირიანად ეწინააღმდეგებოდა ილია ქავჭავაძის მოძღვრებას.

გიორგი წერეთელი იყო რეალისტი ბელეტრისტიკაში. ის გაჰყვა იმავე გზას, რომელზედაც მოღვაწეობდნენ ჰონტაძე და არდაზიანი და ღრმად ჩაიხედა ჩვენი ცხოვრების სინამდვილეში.

რა ამოიკითხა ბელეტრისტიკა ამ ცხოვრებაში? წოდებრივი ურთიერთობა ირღვევა და ჩნდება კლასები. რომლებიც იკავებენ ცხოვრებაში წოდებით ადგილს. მაშასადამე, ცხოვრება ერთ დონეზე არ არის გაჩერებული, არამედ ის მოძრავია, იცვლება, და წინ მიდის. ასეთი ცვლილებისა და წინმსვლელობის დროს ერთი კლასი ეცემა და გზას უთმობს მეორეს. წარჩინებული წოდება დეკადანსს განიცდის, გადაგვარებისა და წოდებრივად გადაშენების გზაზე დაექანება. ეს გადაგვარება წარჩინებული წოდებისა გიორგი წერეთელს საუცხოოდ აქვს დახატული.

ვინ იჭერს წარჩინებული წოდების ადგილს? ამის პასუხს ჩვენ ვხედავთ „პირველ ნაბიჯში“. ერის ცხოვრებაში შემოჭრილია ახალი კლასი, ბურჟუაზია, რომელიც გაბედულად, მტკიცედ და დაუზოგავად მიისწრაფვის წინ, თავისი მიზნების განსახორციელებლად. თუ თავადაზნაურული წოდება ანადგურებდა გლეხობის კეთილდღეობას, უფრო სასტიკი და ღელშობელი მტერია შშრომელი ხალხისა ახლად მოვლწნებული ბურჟუაზია.

აქედან თავისთავად ცხადია დასკვნა: მშრომელმა ხალხმა ხსნა უნდა ეძიოს სხვაგან, სხვაგვარ საზოგადოებრივ წყობილებაში.

ეს დასკვნა გიორგი წერეთელს არ ეკუთვნის, აღარ დასცალდა, მაგრამ ეს თავისთავად გამომდინარეობს მთელი მისი ბელეტრისტიკიდან.

ხანგრძლივი ავადმყოფობის შემდეგ მან საკმაოდ მოიკეთა და უკვე ოცნებობდა მომავალი მუშაობის შესახებ, რაზედაც პირადად ჩემთვის გაუზიარებია თავისი შეხედულება. მას დაწყებული ჰქონდა დიდი რომანი, რომლის პირველ ნაწილში თავად ბაკურაძის სახით დახატული ჰქონდა თავადაზნაურული წყობილება და ბატონყ-

მური ურთიერთობა. მეორე ნაწილში უნდა გაეშალა ბურჟუაზიის ცსოვრება.

— მესამე ნაწილში მუშა ხალხს გამოვიყვან. ის მოსპობს ბაკურაძეებსაც. ბურჟუაზიასაც და დაამყარებს სრულიად ახალ ცხოვრებას, — თვალებგაბრწყინებული მესაუბრებოდა გზრდაცვალებამდე ორი კვირით ადრე. — მართალია, დღევანდელ პირობებში ცენზორი მესამე ნაწილს არ გაუშვებს, მაგრამ მე დავეწერ და იმას დაუდგება ალბათ თავისი დროო. — თანვე დასძინა.

თავისი განზრახვის განხორციელება აღარ დასცალდა: ერთბაშად გაუარესდა მისი მდგომარეობა, ისევე ჩავარდა ლოგინად და მალეც გათავდა.

ქართველი ინტელიგენციის ისტორიაში გიორგი წერეთელი სამ ხანას ანუ სამ დასს ჰხედავდა. პირველი იყო ძველი თავადაზნაურული ინტელიგენცია, რომელსაც გრიგოლ ორბელიანი ახასიათებდა; მეორე — უფრო მოწინავე, რომელსაც ილია ჭავჭავაძე მეთაურობდა; მესამე — სულ ახალი, რევოლუციურად განწყობილი და სოციალისტურად მოაზროვნე.

„კვალი“ გადაიქცა სოციალ-დემოკრატების ორგანოდ და თავის დროზე ქართველ პროლეტარიატს მან დიდი სამსახური გაუწია. საქართველოს მუშა ხალხის ისტორიკოსი „კვალს“ გვერდს ვერ აუსვებს.

ამგვარად, გიორგი წერეთელმა ძალიან ადრე აუღო ჩვენს ცხოვრებას ალღო და ჩვენი მშრომელი ხალხის სარევიოლუციო მოძრაობაში თავისი წვლილი შეიტანა.

გიორგი წერეთელი მეტად საინტერესო პიროვნებაა და ისეთი კვალი დასტოვა, რომელიც არასოდეს წაიშლება. ქართველი მშრომელი ხალხის ისტორიაში მას უსათუოდ ექნება საპატიო ადგილი.

1925 წ.

## შინაარსი

ივ. გომართელი — (წინასიტყვაობა გ. ნატროშვილისა)	5
თხზულებანი მამია გურიელისა	11
კრიტიკული შენიშვნები	46
ოცნება და ცხოვრება	50
ხალხის გულის მესაიდუმლე (თხზულებანი ეგნატე ნინოშვილისა)	56
კრიტიკული შენიშვნები („ამოდის. ნათდება“ და სხვა მოთხრობები ვაჟა-ფშაველასი, 1898 წ.)	128
შარშანდელი „ჭეჭილის“ კრიტიკოსი	132
ქართული სიტყვაკაზმული ლიტერატურა 1898 წელს	144
ხელოვნება და მისი მიზანი	163
გიორგი წერეთელი, როგორც ბელეტრისტი	196
ჩვენი სიტყვაკაზმული ლიტერატურა 1899 წელს	201
ქართული ლიტერატურა XIX საუკუნეში	213
ქართული საერო პოეზია I. რაფიელ ერისთავი	230
რაფიელ ერისთავი, როგორც საერო პოეტი	244
ჩვენი საზოგადოებრივი ცხოვრება გეშინ და დღეს	248
1900 წლის სიტყვაკაზმული მწერლობა	258
სიტყვაკაზმული მწერლობა 1901 წ.	273
რა არის კრიტიკა (ბუნება და მშენიერიება — პოეზია და კრიტიკა)	302
ხელოვნურ ნაწარმოების კრიტიკა	321
ნიკოლოზ ბარათაშვილი	326
ილია ჭავჭავაძის პოეზიის ერთი მხარე	338
სალიტერატურო შენიშვნები	343
სარწმუნოება სამშობლოს სიყვარულისა (ე. ორბელიანი)	359
ნ. ბარათაშვილის პიროვნება და მისი პოეზია	371
მაყვალას გასამართლება — (დამცველის, ივ. გომართელის სიტყვა)	382
გიორგი სააკაძე (სიტყვა, წარმოთქმული სახალხო სახლში. გიორგი სააკაძის გასამართლებაზე)	390
შთაბეჭდილებანი	397
ქალაქდიდელის პოეზია	402
აკაკი	406
პოეზიის წლისთავეზე	414
ეგნატე ნინოშვილი (მისი ძეგლის გახსნის გამო)	415
ალ. ყაზბეგი და მისი ძიება	425
გიორგი წერეთელი	436

Иван Гедеонович Гомартели  
Избранные статьи  
В двух томах  
Письма о литературе и искусстве  
том I  
(На грузинском языке)  
Издательство «Литература да хеловнеба»  
Плеханова 179  
19 Тбилиси 66

რედაქტორი გ. ნატროშვილი  
გამომც. რედაქტორი ნ. ხომერიკი  
მხატვარი შ. კუპრაშვილი  
მხატვ. რედაქტორი ირ. ჯანაშვილი  
ტექნიკური თ. მამფორია  
კორექტორი ც. ქაროსანიძე

ხელმოწერილია დასაბეჭდად 30/VIII-66 წ. ქალაქის ზომა 60×90<sup>1</sup>/<sub>16</sub>  
ნაბეჭდი თაბახი 27,75 სააღრიცხვო-საგამომცემლო თაბახი 23,74  
ში 00367. ტირაჟი 8.000. შეკვ. № 626.

ფასი 1 მან. 96 კპ.

გამომცემლობა „ლიტერატურა და ხელოვნება“  
პლехანოვის 179, თბილისი 1966

საქ. კპ ცკ-ის გამომცემლობის პოლიგრაფკომბინატი  
თბილისი, ლენინის ქ. № 14.

Полиграфкомбинат издательства ЦК КП Грузии  
Тбилиси, ул. Ленина № 14.